


God Ile Riong Kinnga
Ponganga nge
Mangsengre Okei



The New Testament in the Mangseng Language of Papua New
Guinea

**God Ile Riong Kinnga Ponganga nge Mansengre Okei
The New Testament in the Manseng Language of Papua New Guinea
Nupela Testamen long tokples Manseng long Niugini**

copyright © 1999 Wycliffe Bible Translators, Inc.

Language: Manseng

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents.

For other uses, please contact the respective copyright owners.

2012-11-24

PDF generated using Haiola and XeLaTeX on 18 Apr 2025 from source files dated 31 Aug 2023
65e1c726-2893-536b-a159-517869464e50

Contents

FRT	1
Matiu	3
Mak	58
Luk	95
Jon	154
Pakekere Ole Omaing	194
Rom	246
1 Korin	275
2 Korin	302
Galesia	321
Epesus	331
Pilipai	340
Kolosi	347
1 Tesalonaika	353
2 Tesalonaika	359
1 Timoti	363
2 Timoti	371
Taitus	376
Pilemon	380
Hibru	382
Jems	403
1 Pita	410
2 Pita	418
1 Jon	423
2 Jon	430
3 Jon	432
Jut	434
Riong Ngopatnga	437
Read the New Testament . . .	465
Ritetong nge riong pelie . . .	471

God Ile Riong Kinnga Ponganga nge Mangsengre Okei

**The New Testament in the
Mangseng language of Papua
New Guinea**

**Nupela Testamen long tokples
Mangseng long Niugini**

God Ile Riong Kinnga Ponganga
The New Testament in the Mangseng
language of Papua New Guinea
[mbh]

Translation by Wycliffe Bible Translators

© 1999, Bible League International

Print publication, 1999 by Bible League
International

Web version
2014, Wycliffe Bible Translators, Inc.
www.Wycliffe.org

<http://pngscriptures.org>

www.ScriptureEarth.org

This translation is made available to you under the terms of the Creative Commons license (Attribution-Noncommercial-No Derivative Works).
<http://creativecommons.org/licenses/by-nc-nd/3.0/>

Your are free to share — to copy, distribute and transmit the text under the following conditions:

- **Attribution.** You must attribute the work to *Wycliffe Bible Translators* (but not in any way that suggests that they endorse you or your use of the work).
- **Noncommercial.** You may not use this work for commercial purposes.

- **No Derivative Works.** You may not alter, transform, or build upon this work.
- **In addition,** you have permission to port the text to different file formats, as long as you don't change any of the text or punctuation of the Bible.

Notice — For any reuse or distribution, you must make clear to others the license terms of this work.

Tok Orait

Dispela Buk Baibel i kam wantaim tok orait na lo bilong Creative Commons Attribution-Noncommercial-No Derivative Works license. Em i tok olsem **yu ken givim kopi long narepela manmeri**. Yu ken wokim kopi na givim long husat i laikim. Tasol, yu mas tok klia dispela samting i kam long <http://tokplesbaibel.org>. Yu no ken kisim mani na salim dispela. **Yu mas givim nating**. Na tu, **yu no ken senism Tok**.

Ol piksa i kam wantim ol Baibel na narapela buk i stap long dispela sait i gat tok orait long usim wantaim dispela samting tasol. Sapos yu laik narapela tok orait, yu mas askim husat i papa bilong copyright long dispela ol piksa.

Sapos yu laik stretim samting i no orait long dispela tok orait, stretim tok, salim Buk Baibel, o tainim Tok bilong God long nupela tok ples, yu ken **askim mipela**.

Olgeta tok orait na lo long tok ples English i stap long <http://creativecommons.org/licenses/by-nc-nd/3.0/legalcode>.

Sapos yu gat askim long dispela, **plis askim mipela**.

**Pes kathnga ako erere omole
omole o voth nge, aka a God
ile Riong Pnganga lemi**

Erere Iion[tab]Iion Orornga[tab]Pes

Riong Mukalinga

Erere ake ini a God ile riong nge keir. Na ini Baibel alavusnga avele, ini inga epee ako o apet i ve ini "Nupela Testamen" eve "Nupela Kontrak" na nge keir ini "God Ile Riong Kinnga Ponganga." Na them oma i mo i semel nge titalnga, na them oma mun

i mo imirenga i semel nge elnga. Them engeng nge riong omole omole eksinga avele, them engeng nge riong mirenga eksinga. Them sis rintet ve aro tokokoere o tital inga riong ake, na a ur e avele na olemi mire senu nge riong aken mirenga. Na them oma mun ur pelie ako i pavurvur aro i opoal tokoke areko o tital a God ile erere ake.

1. Ako a Panongpolong Sivenga or penel lemi, ruru nge riong ponga pelie, aro o thepol ves pelie, aken i mirenga ve, ves areken o ri mun nge rurumong aken.
2. Na aro ve o thepol leta omole ako i voth a rumongaling nge riong omole na i voth roro na i pokurut rintet na i vene:a, aken i mirenga ve, ritetong nge riong aken i voth ruru nge pes aken. Omole i voth nge Matiu 7:6 na i voth a rumongaling nge 'otoli.'
3. Na ruru nge lain ako i voth ruru nge pes pulua, aro o thepol ves numba ako i pokurut rintet, na ves pelie ako o rumongal nge o ri mun nge riong pelie ako o voth a ves aken lemi. Ves areken aro o opoal thomu mo lomu mire i aalonga nge a God ile riong elonga.
4. Aro ve o thepol [], riong ako i voth a lemi ini riong ako toko powe ninengare nge a God ile riong kene o ri ve, riong aken toko relnga i paeso, na ini toko aka i wat malueng aken iana avele. O ri venen aken, eneke o thepol malueng nomenganga aka watongare o wat i na o panes senu riong ranga ve aka toko aken iana, na riong aka i voth a [] lemi, i voth a malueng areken lemi avele.
5. Na ritetong nge riong pelie i voth na i patea nge pes 652. Ritetong areken aro i opoal thomu mo lomumu i nine nge Judar ole vothung na nge riong pelie imirenga.
6. Na opoaling nge ves kathnga aka o ri nge ur pelie, i voth mun a rumongaling nge erere ake.

Naro o el opoaling nge a God na Ioni Riringa na nge a Jisas Krais, mo aro lomumu i nine nge a God ile riong aka i sungu a it nge, nge keir. I nunganga.

English Preface

'God Ile Riong Kinnga Ponganga' is a meaning based translation of the New Testament into the Mangseng language of Papua New Guinea. The approximately 3,000 speakers of this language live in the mid section of New Britain Island. Information about parallel passages, footnotes, cross references, manuscript variants [indicated by square brackets], and the glossary and topical index in the back, have been given in the Mangseng preface above. We give thanks to God for the prayers and gifts of His people which were an integral part of bringing this translation into existence. We trust that God Almighty through the power of the Holy Spirit will mightily use His word in the Mangseng language in the lives of His people who speak Mangseng.

Panongpolong Sivenga aka Matiu i wat i Matiu Ritetong nge a Matiu

Panongpolong Sivenga alapenel o ri nge a Jisas ile mimiong na ile rinong na ile los wereraing. Na Panongpolong Sivenga or me aka ini a Matiu, Mak na Luk ole riong pelie aka i thun inga. Na aro ve ong thepol rirumong omole aka a Matiu ile erere lemi, papulua ong pavurvur aka aro ong thepol mun i aka a Mak ile erere lemi, eve a Luk ile erere lemi, aveto rirumong pelie o voth inga nge osivenga ole erere lemi. Na Matiu, Mak na Luk ole riong pelie i thun inga venen aken, aveto Jon ile riong i rel nge or, na ile rirumong pulua aro ong thepol i avele a Matiu, Mak na Luk lemi.

Na Panongpolong Sivenga aka Matiu i wat i, kene i wat i mo i opoal Judare mo ole mi mire aka ve, Jisas ini toko aka God i ateal i ve aro i el werer ile tokokoere. Na Judare o apet toko aken ini "Mesaia" eve "Krais." Na Judare ole mi ve Mesaia aro i velpol ini ole nepes mo toko e avele aro i theal ol or. Na Matiu i wat mun riong pulua aka i voth a God ile erere lemi aka i ritet nge a Mesaia, mo aro i pathengal Judare ve, Jisas i panes vengveng riong areken. Aken i mirenga ve, Jisas ini Mesaia, ini toko aka o men tetal i ve aro i velpol mo i pavthopot or nge ole ngarangre osa thewo. Na Matiu i wat mun nge a Jisas ile pamirealing. Na i ranga ve aka Jisas ile pamirealing areken o voth nge vonge or lim. (Thepol a Matiu 5-7; 10; 13; 18 na 24-25) Na Matiu i rirum nge a Jisas ile mimiong na ile omaing nge vonge or lim aken oa wop.

Jisas ile velpoling ake ru a alue

(Vonge 1:1-4:16)

*Jisas ititeviere oionre.
(Luk 3:23-38)*

¹ Ake ini a Jisas Krais ititeviere oionre. Jisas ini a Devit itevinga na Devit ini a Abraham itevinga.

- ² Na Abraham ini a Aisak itema.
Na Aisak ini a Jekop itema.
Na Jekop ini a Juda ome ititeinre otema.
- ³ Na Juda ini a Peres ome a Sera otema, na onina ini a Tamar.
Na Peres ini a Hesron itema.
Na Hesron ini a Ram itema.
- ⁴ Na Ram ini a Aminadap itema.
Na Aminadap ini a Nason itema.
Na Nason ini a Salmon itema.
- ⁵ Na Salmon ini a Boas itema, na inina ini a Rahap.
Na Boas ini a Obet itema, na inina ini a Rut.
- Na Obet ini a Jesi itema.
- ⁶ Na Jesi ini a Nepes a Devit itema.
Na Devit ini a Solomon itema.
Na Solomon inina ini a Batsiba aka Devit i pamuespot i a Uria nge.
- ⁷ Na Solomon ini a Rehoboam itema.
Na Rehoboam ini a Abija itema.
Na Abija ini a Asa itema.
- ⁸ Na Asa ini a Jehosapat itema.
Na Jehosapat ini a Jehoram itema.
Na Jehoram ini a Usia itema.
- ⁹ Na Usia ini a Jotam itema.
Na Jotam ini a Ahas itema.
Na Ahas ini a Hesekia itema.
- ¹⁰ Na Hesekia ini a Manase itema.
Na Manase ini a Emon itema.
Na Emon ini a Josaia itema.
- ¹¹ Na Josaia ini a Jehoiakin ome ititeinre otema.

Na nge wop lemi aken Babilonre o pun tomo e Israelre ma o wolpot ir a Babilon la.

- ¹² Babilonre o wolpot Israelre lale a Babilon la, ma Israelre ole vothong a Babilon i patea nge a Jehoiakin.
Na Jehoiakin ini a Sealtiel itema.
Na Sealtiel ini a Serubabel itema.
- ¹³ Na Serubabel ini a Abiut itema.
Na Abiut ini a Eliakim itema.
Na Eliakim ini a Asor itema.
- ¹⁴ Na Asor ini a Sadok itema.
Na Sadok ini a Akim itema.
Na Akim ini a Eliut itema.
- ¹⁵ Na Eliut ini a Eleasar itema.
Na Eleasar ini a Matan itema.
Na Matan ini a Jekop itema.
- ¹⁶ Na Jekop ini a Josep itema.
Na Josep ini toko aka iewo sengenga ini a Maria aka i pop a Jisas, ini toko aken te apeta i ini a Mesaia, ini toko aka God i ateal i ve aro i el werer ile tokokoere.

¹⁷ Jisas ititeviere ako i patea nge a Abraham ma me i mulalu nge a Devit kene or ini toko or mule pa omole pothoi or penel. Na i patea mun nge a Devit ma me i mulalu nge owolpotnga a Babilon kene or ini toko or mule pa omole pothoi or penel. Na i patea mun nge owolpotnga a Babilon ma me i mulalu nge a Krais ile velpoling kene or ini toko or mule pa omole pothoi or penel mun.

Jisas ipopnga.

¹⁸ Jisas Krais ipopnga kene i velpol vene: Inina Maria o ateal i ve aro i ewoa a Josep, ave o ela pel rongan, na tokokoere o thepol aka Maria iopo lale. Ini Oni Riringa ile omaing a i nge ma iopo.

¹⁹ Na iewo a Josep ini toko vengvenga ma ini plong ve aro i palemara a Maria a tokokoere otheki, mako ilemi ve aro i mothong kine i.

²⁰ Rongan Josep ilemi rum nge aken, nako Toko Pomnga ile ensel i velpoltun i nge ile oni theong, ma i ria i ve, "Josep, Nepes a Devit itevinga, mothong tova lomum kerenga nge a Maria ielanga mo ini ewom. Ke Maria iopo aken nge Oni Riringa ile omaing.

²¹ Aro i pop itun tomonnga e, naro ong apeta iion a Jisas aka i mirenga ve, 'Pamimionga', eneke aro i el werer ile tokokoere nge ole vothung kerengare."

²² Na ur alavusnga areken o velpol vene re ake, mo i pavelpol nunganga ur alavusnga aka Toko Pomnga ile riong elnga i ri nge ve,

²³ "Ovote aka i ngo tomo e toko rongan aro iopo mo i pop itun tomonnga e, naro o apeta iion a Emanuel." Ako i mirenga ve, "God i voth tomo nge it." *Aisaia 7:14*

²⁴ Mako Josep i surpola ma i ewoa ol a Maria ranga ve aka Toko Pomnga ile ensel i ritet a i nge lale. Ma i peange e iewo sengenga ma i wol i a ile vel la.

²⁵ Ave o ngo tomo e pel avele, i pavurvur aka la i pop itun tomonnga aken, mako Josep i apeta iion a Jisas.

2

Toko powe ninengare o es me mo o thepol a Jisas.

¹ Maria i pop a Jisas a rem a Betlehem a epee a Judia. Na nge wop lemi aken Herot i voth ini nepes. Na Maria i pop i lale ma toko powe ninengare o plosa a epee aka nang i povlesa nge me ma o es a Jerusalem la.

² Ma o nina ve, "Povothvoth aton mo aro i velpol ini Judare ole nepes, i voth a kath? Eneke, them voth a epee aka nang i povlesa nge me ma them thepol sivemit aka i paateal nge ile velpoling. Make them es me mo them lotual i."

³ Nepes a Herot i nongpola ur aken, ma ilemi pompom rintet nge riong aken tomo mun nge toko alavusnga aka o voth a Jerusalem.

⁴ Mako i leng Judare ole pris kimangare tomo mun nge pamirealingare nge a Moses ile patorong, ma i nina or ve, "Toko aka ini a Krais aka God i ateal i ve aro i el werer ile tokokoere, aro inina i pop i nge pen kath, e?"

⁵ Mako o olal ile riong ve, "Akola a rem a Betlehem a epee a Judia. Na i vene re ake, eneke God ile riong elnga i wat i nomenga vene:

⁶ 'Betlehem aka i voth a epee a Judia.
Iion aro i kima mun
ako a Judia tomo nge rem areko oion
kima aka a epee a Judia.

Eneke mukalinga e aro i velpol a i nge,
naro i theal lek toko Israelre
ranga ve aka sipsip thealnga i
theal ile sipsipre.'"
Maika 5:2

⁷ Lamako Herot i pawol kinepot toko powe ninengare mo i nin senu or nge nang kathnga aka sivemit aken i velpoltun or nge.

⁸ Lama i pakepot or a Betlehem la, na i ria or ve, "Thomu o es mo o ortet senu wain aken, na tova ve thomu o sangpolo i, aro thomu o riteta lek, mo tho es mo tho lotual mun i."

⁹⁻¹⁰ O nongpola nepes aken ile riong ma i vus, mako o losa ol ma o es, nako o thepol mun sivemit aton i velpol tel a or nge a epee aka nang i povlesa nge me. O thepol i veno aka, ma olemi sivenga rintet nge ma i mengmeng avele. Na sivemit aken i

mukal ole mala i mit vengtun nge vel aken ru wain aken i ngo nge.

¹¹ Mako o koro a vel lemi, ma o thepol wain aken tomo nge inina Maria, ma o koru oeve ma o lotual i. Na o thepu ole alal na o ela sungong aka iolonga i roro ma o sungu i a i nge, aka ini gol, na ni peti taulonga sivenga, na pawonga sivenga aka o ongtun i ma iunnga thelnga sivenga.

¹² Na nge ole lo wererong a ole pen o panes ol sovengalo relnga e, eneke nge ole oni theong, God i ri engeng or ve, o mothong tova o es werer ol a Herot nge la.

Maria ome a Josep ole loong a Isip la.

¹³ Toko powe ninengare o es lale, lama pemliko ma Josep ioni the aka Toko Pomnga ile ensel e i velpoltun i ma i ria i ve, "Vurpola na ong losa mo es tomo nge wain aken ome inina mo thomu o lo kine a Isip la. Aro thomu o voth tel nge mo i pavurvur aka aro tho ria werer mun wong, eneke Herot aro i ortet wain aken mo i so rin i."

¹⁴ Na a ur e avele, nako Josep i vurpola, ma i wola wain aken tomo nge inina, na nge pemliknga aken o lo kine a Isip la.

¹⁵ Ma o voth nge, i pavurvur aka Herot i rin. I vene re ake ma ur aken i pavelpol nunganga ur areko God i ria ile riong elnga nge ve,
"Tho lengpot tuk a Isip me." *Hosea 11:1*

Herot i sungu riong nge wainlangae osorinrinnga.

¹⁶ Toko powe ninengare o es ol a Herot nge avele, ma Herot ilemi mire aka ole apaltet i lale, ma ilemi kling rintet. Mako i sung riong a ile punongare nge ve, aro o es a Betlehem na rem areko o voth toth toth a Betlehem, mo aro o pun rin wainlanga totomone alavusnga aka oa tovu po or aini na posposengaere mun. Herot i ria tovu po or aini, eneke powe ninengare o apeta nang aken sivemit aken i velpoltun or.

¹⁷ Mako riong aka God ile riong elnga a Jeremaia i ri nge, i velpol nunganga. Na ile riong vene:

¹⁸ "Tokokoere o nongpol tanging na walking aolonga
ako i espot a rem a Rama me.
Ini a Resel aka i tang nge itutunre,

na toko e avele i pavurvur nge ipaengengalanga,
eneke itutunre o rin rin ma vus."
Jeremaia 31:15

Josep ome a Maria ole lo wererong a ole pen tepun.

¹⁹ Herot i rin lale, mako Toko Pomnga ile ensel i velpoltun a Josep nge ile oni theong aka a Isip.

²⁰ Ma i ria i ve, "Vurpola mo ong plosa, na wola wain aken ome inina mo o es werer a Israel la, eneke tokokoe areko o ri ve o pun rin wain aken o rin lale."

²¹ Mako Josep i plosa ma i wola wain aken ome inina ma o es ma o velpol ol a Israel.

²² Ave Josep i nongpola ve, Arkelaus i el itema a Herot imei na ini nepes aka a epee a Judia, ma i ngeip ol nge esong aka la. Na nge oni theong Toko Pomnga ile ensel i sungu riong a i nge ve, i mothong tova i es a epee a Judia, mako o es ol inga a epee a Galili.

²³ Ma i oma ol ile rem a Nasaret. Ake kene i pavelpol nunganga God ile riong elngare ole riong aka o ri ve,
"Aro o apeta i ve ini toko Nasaret anga."

3

Jon Paninuonga ile panongpolong. (Mak 1:3-8; Luk 3:2-17)

¹ Na nge wop lemi aken Jon Paninuonga i velpol ma i mit a pen polpolnga aka a Judia ma i patea ile panongpolong nge.

² Ma i ri ve, "Kimomu lelal lomu vothung kerengare, eneke God ile menong e nepes kene i toth me lale."

³ Na Jon ini toko aka God ile riong elnga a Aisaia i ri nge ve:

"Toko e aka i presa pres a pen polpolnga ve,

"Thomu o monsi a Toko Pomnga ile sovengalo,

na thomu o pavengveng pen kerengare aka aro i es nge.'"
Aisaia 40:3

⁴ Na Jon ia neong kene o oma i nge mekerem aka ini kamel ini thoing, na ia let ini mekerem peti ma i kin i a ilopat, na ia aning ini sisre na i thin inga sthong ei.

⁵ Na tokokoere ako o es a i nge me, o es a Jerusalem me, na pelie mun e pen epee alavusnga aka a epee a Judia, na pelie mun nge rem areko o ngo tothaloo a thei a Jordan.

⁶ Ma o pamilimlem ole vothung kerengare, lama Jon i paninu or nge thei a Jordan.

⁷ Ave Jon i thepol aka Parisire or pulua tomo mun nge Sadiusire or pulua aka o es a i nge me, mo olemi ve aro i paninu or. Ma i ria or ve, "Thomu ini pilimo kerengare. Anga i ria thomu ve aro thomu o lo nge paomelaling aka God aro i sungu i, e?

⁸ Aro thomu o oma vothung sivengare aka i pathengal aka ve, thomu o lel kimomu nge lomu vothung kerengare lale.

⁹ Na o mothong tova lomumu ve, 'Aro God i paomelal them avele, eneke Abraham ini titevimeem.' Tho ria thomu ve, God i pavurvur nge anral areke eksinga mo o velpol ini a Abraham ititeviere.

¹⁰ Na God ile paomelaling i ranga ve ini telenga wowonga aka i totho aka aro i vairo i a thomu nge aka o ranga ve ini won. Na won alavusnga areko omonnga i sivenga avele, aro o tetela ir mo o asesu or a won sesenga nge la.

¹¹ "Na tho paninu thomu nge thei mo ur aken i pathengal aka ve, thomu o lel kimomu nge lomu vothung kerenga lale. Ave toko aka i rumongal nge tho me, kene ile engenging i aolonga rintet nge lek engenging, na i pavurvur aro tho es totho a ilo sei mo aro tho inospot ile esonga a we, kene avele. Naro i paninu omu pelie nge a God Ioni Riringa, aveto omu pelie nge won sesenga.

¹² Naro i nongpol toko alavusnga ole riong, naro i thomreu areko o sivenga na areko o kerenga, ranga ve ini toko pen lesnga aka i thomreu wit monnga sivenga na wit peti kerenga. Naro i veliloalo wit enanga a ile pen sivenga, aveto wit peti aro i asesu ir a won sesenga nge aka aro ile vusonga avele."

Jon i paninu a Jisas.

(Mak 1:9-11; Luk 3:21-22; Jon 1:31-34)

¹³ Nge wop lemi aken Jisas i vota a Galili, ma i losa e pen aken ma i es a Jon nge a thei a Jordan mo ilemi ve, aro Jon i paninu i.

¹⁴ Ma Jon kene i tongporum aka aro i eksing ilemi, ma i ria i ve, "I vova aka ong es a tho nge me, e? Aro i sivenga tova ong paninu tho."

¹⁵ Ave Jisas i olal ile riong ve, "Ong oma ur aka tho ria ong nge ponange, mo aro te panes vothung vengvenga alavusnga." Mako Jon i nongal ikei, ma i oma i ranga ve aka Jisas i ria i nge.

¹⁶ Jon i paninu a Jisas ma vus ma Jisas i es a klangklang. Nako Pen a Urvet i thep, ma i thepol a God Ioni Riringa aka i esu a i nge me, ma i ranga ve ini pothu na i men a i nge.

¹⁷ Ma lenging i esu a Pen a Urvet me ma i ri ve, "Ake ini Tuk a urvet, aka lemik sivenga rintet nge i."

4

Jisas ile tongporumong.

(Mak 1:12-13; Luk 4:1-13)

¹ Lama Oni Riringa i paes a Jisas a pen polpolnga la, mo aro Satan i tongporum i.

² Na Jisas i vota nge na i an avele e nang na mlik or mule pa penel, lamako Jisas i rova ol mesipuniong.

³ Na a ur e avele na Satan i es a i nge me, ma i ria i ve, "Tova ve ong ini a God Itun, aro ong ria um areke mo o eksing mo ini bret."

⁴ Ave Jisas i olal ile riong ve, "Na God ile erere i ri vene,
'Toko i pavurvur aro i mimi inga nge aning avele,
ave aro i mimi nge a God ile riong alavusnga.' "

Lo 8:3

⁵ Lamako Satan i wola a Jisas aka la a rem riringa a Jerusalem ma i paesa i a Lotu Tepun a Vel, ma i pamita i roro a vel polemi.

⁶ Ma i ria i ve, "Tova ve, ong ini a God Itun, aro ong ophou la, ke God ile erere i ri ve,
'God aro i ria ile enselre
mo aro o theal ong.
Naro o monteta la ong nge omeni,
mo aro evom i tup nge um e avele.' "

Buk Song 91:11-12

⁷ Lama Jisas i olal ile riong ve, "Ave God ile erere i ri mun vene, 'Mothong tova tongporum Toko Pomnga ako ini lom God ile engenging.' " *Lo 6:16*

⁸ Lamako Satan i wola mun a Jisas a tete polemi ako i roro rintet, ma i pathengalpot i nge rumrem alavusnga ake ru a ulue tomo mun nge a malmaling.

⁹ Lama i ria mun i ve, "Aro tho sungu ur alavusnga ake ru a ong nge, tova ong koru evom na ong lotual tho."

¹⁰ Ma Jisas i olal ile riong ve, "Satan, ong lopot nge tho, eneke God ile erere i ri ve, 'Aro ong lotual inga Toko Pomnga ako ini lom God.'

Naro ong voth inga a isa thewo.' " *Lo 6:13*

¹¹ Mako Satan i lopot a Jisas nge, nako enselre o es me ma o opoal ol a Jisas.

Jisas i patea ile omaing a epee a Galili.

¹² Lama Jisas i nongpol ako o paeso a Jon a mang a midenga lemi, mako i lo werer a Galili la.

¹³ I velpol a Nasaret ma i losa nge na i alpo a rem a Kaperneam aka a thei a pamonlel a Galili, aken ini net Sebulun na net Naptali oa ulue.

¹⁴ Na ile vothung ake i pavelpol nun-ganga ur aka God ile riong elnga a Aisaia i ri nge ve,

¹⁵ "Ako nge a net Sebulun na net Naptali oa ulue,
totho a rua, aka a thei a Jordan wo epee,
epee a Galili i voth nge.

Ini pen aka tokokoe areko or ini Judare avele o voth nge.

¹⁶ Na toko areken, o voth a mideng aolonga lemi,
aro o thepol pen lalanga aolonga.

Na areko o voth a rinong lemi,
pen lalanga i to a or nge lale." *Aisaia 9:1-2*

***Jisas i panongpol nge a God
ile menong e nepes, na i
pamimi werer toko na seng
alavusnga areko ni
multhanging i voth a or nge***
(Vonge 4:17-9:34)

*Jisas i lengpot ile wainlanga teltelingare.
(Mak 1:16-20; Luk 2:5-11; Jon 1:35-42)*

¹⁷ Nge wop lemi aken Jisas i patea ol ile panongpolong ma i ri ve, "Kimomu lelal nge lomu vothung kerengare, eneke God ile menong e nepes i toth me lale."

¹⁸ Jisas i es a thei a pamonlel a Galili a wonwon po, ma i thepol titeinpel aini, Saimon, aka iion aininga a Pita na iteinnga a Andru. Or paini ini silang elngare ma o rongu oa susua a thei, eneke ake ini or paini ole omaing, aka o el umtun nge.

¹⁹ Mako Jisas i ria or ve, "Thomu o panes tho mo aro tho patoral thomu nge tokokoere oelnga."

²⁰ Na a ur e avele, nako o modipdopu oa susuare, mako o panes ol i.

²¹ Lama o espot mun lollo avele na i thepolo mun titeinpel aini, aka ini a Jems na Jon a oa wok nge, tomo nge otema a Sebedi aka o italal oa susua min-ranga. Mako Jisas i lenga mun or.

²² Na a ur e avele, nako o modipdopu oa wok tomo nge otema, mako o panes ol i.

Jisas i panongpol na i pasenu werer toko ni multhanginga pulua.

²³ Lamako Jisas i esu esa ol a pen alavusnga aka a Galili, ma i pamireal a Judare ole lotuonga a velre na i panongpol mun nge Panongpolong Sivenga nge a God ile menong e nepes, na i pasivenga mun tokokoere nge ni multhanging alavusnga aka i el or.

²⁴ Na iion i kima a pen alavusnga aka a Siria. Mako tokokoere o paes tokokoe areko ni multhanging rel relngare o velpol ol a or nge, a i nge la. O paes areko sisong aolonga rintet i voth a oni peti, na tokokoe areko tamata kerengare o rero or, na tokokoe areko sawirong aolonga i el or ma o matu, na tokokoe areko oni peti motungtung, mo Jisas i pasivenga or.

²⁵ Na pulua pomnga aka o panes i. O es a Galili me, na pelie mun o losa a Jerusalem na epee a Dekapolis na epee a Judia na pelie mun a Jordan wo epee.

5

Jisas i patalor nge toko kathnga areko sapase or.

(Luk 6:20-23)

¹ Jisas i thepol pulua pomnga ako o es tuntun i me. Mako i es a tete polemi la mo i men nge. Na ile wainlanga areken o veliloalo pel a i nge.

² Mako i patea ol ile patoraling a or nge.

³ Ma i ri ve,

“Sapase areko olemi mire ve, ole ur e avele ru a God itheki nge,
eneke God ile menong e nepes ake ro a Pen a Urvet ini ole.

⁴ Sapase tokokoe areko o voth nge tanging, eneke God aro i pasivenga oopo.

⁵ Sapase tokokoe areko o paruru osivenga, eneke God aro i sung ulue alavusnga a or nge.

⁶ Sapase tokokoe areko olemi engeng na olo wom rintet nge vothung vengvenga panesngā, eneke ur aken olemi nge aro i velpol a or nge.

⁷ Sapase tokokoe areko olemi esal toko rel relngare, eneke God aro ilemi esal mun nge or.

⁸ Sapase tokokoe areko olemi riritet, eneke aro o thepol a God.

⁹ Sapase tokokoe areko o engeng nge tokokoere opamensenunga, eneke tokokoere aro o apeta or ini a God itutunre.

¹⁰ Sapase tokokoe areko o el matheong nge vothung vengvenga panesnga, eneke aro o voth sivenga e God ile menong e nepes ake ro a Pen a Urvet.

¹¹ “Sapase thomu e nang ako tokokoere o ri kerenga e thomu, na o oma tangatun e thomu, na o ri mun riong le apaltetonga nge thomu, eneke thomu o panes tho.

¹² Aro lomumu sivenga na o ngenge sise nge, eneke olongomu aolonga lale a Pen a Urvet. Ole vothung kerenga e thomu i ranga ve ini ako ole vothung kerenga nomenga e riong elngare.

Jisas i ri ve o ranga ve ini au.

¹³ “Thomu o ranga ve ini au a tokokoere nge ake ru a ulue. Ave aro ve au aken imosisennga i vus, aro tokokoere o pavurvur avele ake aro o oma i mo i mosisen werer, i kerenga re lale aken. Aro o asespot i inga ma tokokoere o tepelostun i.

Jisas i ri ve o ranga ve ini theki lalainga.

¹⁴ “Thomu o ranga ve ini theki lalainga nge tokokoere. Lomumu rum i, rem pomnga ako i men a tete polemi i pavurvur aro i men kineo avele.

¹⁵ Na toko e avele aro i pasiseo theki lalainga lamo i pasopalu i e alal. Aro i sivenga tova i pamena i roro, mo aro i sung pen lalanga nge toko alavusnga ake o voth a vel aken lemi.

¹⁶ I vene re ake lomumu theki lalainga aro i totun tokokoere, mo aro o thepol ur sivesivengare ake thomu o oma ir, naro o risea Titomomu a God ake i voth a Pen a Urvet.”

Jisas i patalor nge a Moses ile patorong.

¹⁷ Lama Jisas i ri mun ve, “Thomu o mothong tova lomumu ve, tho es me ve aro tho eltetpot a Moses ile patorongre na God ile riong elngare ole pamirealing. Tho es me ve aro tho eltetpot ole riong avele. Tho es me ve aro tho panes vengveng ol ole riong.

¹⁸ I nunganga ake aro i mulalu nge Pen a Urvet ome ulue ake ole vusong, aro i pavurvur epee tie avele ake a Moses ile patorong lemi aro i vus. Avele. Moses ile patorong aro i voth i pavurvur ake aro la ur alavusnga i ri nge kene aro o velpol.

¹⁹ I vene re aken, ake aro ve toko e i panes a Moses ile patorong tutunnga aken avele, na i pamireal toko pelie mo o oma mun veno ake i oma i, aro toko aken iion aro ini ur polpolnga inga nge a God ile menonga e nepes a Pen a Urvet, ave toko ake i panes a Moses ile patorong na i pamireal mun toko pelie nge a Moses ile patorong panesnga, aro iion i aolonga ake a God ile menong e nepes a Pen a Urvet lemi.

²⁰ Na tho ri engeng thomu ve, aro ve thomu o panes senu vothung vengvenga, na tova lomumu vothung vengvenga i aoselepot Parisire na pamirealingare nge a Moses ile patorong ole vothung

vengvenga avele, aro thomu o velpol nge a God ile menonga e nepes a Pen a Urvet avele.”

Jisas i ri nge vothung ako nge riong pavengvenga.

21 “Thomu o nongpol lale aka nomenga titovumuere o el tel riong lale ve, ‘Thomu o mothong tova o so rin toko,* aro ve toko e i oma venen aken, aro i mit nge riong.’

22 Ave ponange tho ria thomu, toko e aro ve i vol itein e, aro i mit nge riong. Na toko mun e aro ve i voltitet itein e, aro i mit nge riong aolonga itheki. Na aro ve toko e i ripolal itein itheki ve, ‘Wong ini lemi aolungonga,’ aro i es a won sesenga nge aka aro ile vusonga avele.

23 “Na eve ong monsi nge aka aro ong sung lom sungong a God nge la aka a God ile sungong a lekleka nge, na lomum rum aka teum ilemi kerenga e wong nge ur pelie.

24 Aro ong parongu tel lom sungong totho a sungong a lekleka nge, naro ong es tel a teum nge mo pavengveng riong a teum aken nge, lamo ong es werer ol la mo wong oma lom sungong a God nge.

25 “Aro ve toko e ilemi ve aro i pamit ong e riong, a ur e avele naro ong tongporum i ve aro ong pavengveng tel i tomo nge i. Aro ong oma i nge aka thomu paini rongan o es a riong nongpolnga a vel. Aro vene mo i paesa ong a riong nongpolngare omeni, na riong nongpolngare aro o paeso ong a lososthangare omeni naro o paeso ong a mang a midenga lemi.

26 Na tho ri nunganga a wong nge, aro wong voth a mang a midenga i pavurvur aka la wong olal werer ur alavusnga aken.”

Jisas i ri nge vothung aka nge toko na seng aomnga.

27 Jisas i ri mun ve, “Thomu o nongpol riong nomenga lale aka o ri ve, ‘Thomu o mothong tova o ngo tomo nge seng aka ini ewomu avele.’†

28 Na tho ria thomu ve, aro ve toko e aka i thepol inga seng na ilemi ve aro i ngo tomo e i, toko aken i ranga ve aka i oma

vothung aken nge seng aken a iopo lemi lale.

29 Na aro ve thekum aka a menum sivenga nge anga i patelek wong nge vothung kerenga, aro i sivenga tova ong mon prelpot i mo ases i. Aro i kerenga mos avele tova ve num peti epee omole i voth avele na ong es a Pen a Urvet, aveto aro i kerenga sele tova God i asesu num peti epee alavusnga aka a won sesenga nge aka nge vothung aka num peti epee aken i oma i.

30 Na aro ve menum sivenga i patelek wong nge vothung kerenga, aro ong soropot i mo ases i. Aro i kerenga mos avele tova ve num peti epee omole i voth avele na ong es a Pen a Urvet, ave aro i kerenga selele tova God i asesu num peti epee alavusnga aka a won sesenga nge aka nge vothung kerenga aka num peti epee aken i oma i.”

Jisas i ri nge seng mothonga.

31 Ma Jisas i ria mun ve, “Nomenga o ri ve, ‘Toko aka ve i mothong iewo sengenga, aro i sungu erere aka i ritet nge ole peangeong ile vusong aken a seng aken nge.’‡

32 Ave ponange tho ria thomu, toko aka i mothong iewo sengenga, ave seng aken i aom toko avele. Toko aken i oma seng aken mo ini toko aomnga, eneke aro ve seng aken i peange werer nge toko relnga e, aro seng aken i aom toko. Na toko aka i ewoa seng aka iewo tomonnga i mothong tel i lale, i mun i aom seng.”

Jisas i ri nge riong panunganganga nge a God iion.

33 “Na thomu o nongpol mun riong aka o ria titovumuere nomenga aka ve, ‘Thomu o mothong tova lomu apaltet aka nang aken thomu o apeta God Iion nge lomu riong kinnga. Aro thomu o oma nunganga ur aken thomu o apet a God Iion ve aro thomu o oma i.’§

34 Ave ponange tho ria thomu ve, o mothong tova thomu o panunganga lomu riong. Aro thomu o panunganga i nge Pen a Urvet apetnga avele, eneke ini God ile nepes a menong.

* **5:21:** Kisim Bek 20:13

† **5:27:** Kisim Bek 20:14

‡ **5:31:** Lo 24:1

§ **5:33:** Wok Pris 19:12; Namba 30:2

³⁵ Na thomu o mothong tova o panunganga lomu riong nge ulue apetnga, eneke ulue ini a God ieve le mitonga, ako i pamit ieve nge. Na thomu o mothong tova o panunganga lomu riong nge Jerusalem apetnga, eneke Jerusalem ini Nepes Pongan ile rebo.

³⁶ Na mothong tova ong panunganga lom riong nge poungom, eneke lom engenging i pavurvur aro wong oma poungom thoing e avele mo i veleles eve i pokukurut.

³⁷ Tova lomumu ve aro thomu o ri 'enala' aro thomu o ri 'enala' inga. Na tova lomumu ve aro thomu o ri 'avele' aro thomu o ri 'avele' inga. Na riong pelie mun e ako o pokespot inga e riong ake, aken i es aken a toko kerenga nge me."

Jisas i ri nge vothung kerenga olalnga.

³⁸ "Thomu o nongpol mun i nomenga lale ve, 'Aro ve toko e i pakerenga toko e itheki, aro o pakerenga mun itheki. Na aro ve toko e i so movurpot toko e iwo pupo, aro o so movurpot mun iwo pupo.'**

³⁹ Ave ponange tho ria thomu ve, o mothong tova olal werer vothung kerenga nge toko aka i oma vothung kerenga a thomu nge. Na aro ve toko e i sopthalowom pun a menum sivenga nge anga, aro eksinga mun mo i sopthalowom pun a menum kerenga nge anga.

⁴⁰ Na aro ve toko e i pamit ong nge riong, eneke ilemi nge lom tekruk elnga, aro ong sungu mun lom tekruk seltunnga a i nge.

⁴¹ Na aro ve toko e i engeng ve aro ong potun ile ur elonga pelie mo i mulalu nge kilomita omole, aro ong potun i mo i mulalu nge kilomita or aini.

⁴² Na aro ve toko e i nina wong e ur e, aro ong sungu i a i nge. Na aro ve toko e ilemi ve i el tel ur e a wong nge lamo i olal ol i panen, mothong tova pamumatal i a i nge."

Jisas i ri nge ngarangre oasagunga.

⁴³ Jisas i ria mun or ve, "Thomu o nongpol i nomenga lale ve, 'Aro omu sagu lomungare naro numu silal lomu ngarangre.'††

⁴⁴ Ave ponange tho ria thomu ve, aro omu sagu lomu ngarangre, naro thomu o nong a God mo aro i oma senu nge tokokoe areko o oma vothung kerenga a thomu nge.

⁴⁵ Aken aro tokokoere oleli mire ve, thomu o velpol ol ini Titomomu a God aka i voth a Pen a Urvet itutunre. Aro thomu o oma venen aken, eneke God i pavelpol nang meta aka i oma i, ma i to a toko kerengare nge na i to mun a toko sivengare nge. Na i pavelpol vit ma i molu a toko vengvengare nge, na i molu mun a toko le vothung kerengare nge.

⁴⁶ Aro ve omu sagu inga tokokoe areko oa sagu thomu, aro thomu o el olongomu sivenga kathnga, e? Romre ole takis elngare mun ole vothung i venen mun aken.

⁴⁷ Aro ve thomu o pathokeal inga areko or ini titeumuere, aro lomu vothung i rel nge toko alavusnga ole vothung avele. Na tokokoe areko or ini Judare avele or mun o oma venen aken.

⁴⁸ Maken aro thomu o voth ini toko vengvenga, ranga ve ini Titomomu a God aka i voth a Pen a Urvet ini toko vengvenga.

6

Jisas i ri nge toko le ur avelengare oopoalnga.

¹ "Thomu o naktet senu lomu vothung a tokokoere nge. Na o mothong tova o magon nge lomu vothung sivenga patthengpatnga a tokokoere otheki. Aro ve o oma venen aken, aro Titomomu a God aka i voth a Pen a Urvet aro i sungu olongomu sivenga avele.

² "Na nge aka ong sungu ur e nge tokokoe areko ole ur e avele, wong mothong tova ong thu kuth mo ong palengenglentun lom sungong ranga ve ini aka pokonongare o oma i a Judare ole lotuunga a vel lemi na a sovengalo mun mo aro toko alavusnga o thepol ir. O oma venen aken, eneke oleli ve aro tokokoere o risea or nge ur aken. Tho ri nunganga a thomu nge ve, tokokoe areken o el oana olalnga lale.

** ^{5:38:} Kisim Bek 21:24; Lo 19:21 †† ^{5:43:} Wok Pris 19:18

³ Ave tova ong sungu ur e nge tokokoe areko ole ur e avele, aro i sivenga tova ve toko e avele ilemi mire nge lom sungong aken, i pavurvur mun nge ako menum kerenga ilemi mire nge menum sivenga ile omaing avele.

⁴ Aro lom sungong ake aro o oma kine inga mo aro Tomom a God i thepol ur aken ong oma kine i, naro i sungu olongom sivenga.

Jisas i ri nge vothung ako aro te panes i nge nongong.

(Luk 11:2-4)

⁵ “Tova ong nong, ong mothong tova oma ranga ve ini pokonongare, ako o sis ve aro o nong a Judare ole lotuonga a vel lemi na e mun ako a toko alavusnga otheki nge. O oma venen aken mo oleli ve aro tokokoere o thepol or. Tho ria thomu, tokokoe areko o oma vene aken o el oolonga lale.

⁶ Tova ong nong, aro ong eso a lom vel lemi na ong pupal lom vel thekia na ong nong a Tomom aka ong thepol i avele. Na Tomom aka i thepol ur nekenga aka ong oma kine nge i, aro i sungu olongom sivenga.

⁷ Na aro ve ong nong, mothong tova oma riong puluanga aka i thun inga, ranga ve ini areko oleli mire nge a God avele o nong. O rivenga God aro i nongpol ole nongong, eneke o lilu lila inga ole riong papulua.

⁸ Thomu o mothong tova o panes ole vothung aken, eneke Titomomu ilemi mire lale nge ur nekenga aka lomumu ve aro thomu o nong i a i nge.

⁹ “Naro thomu o nong vene ke:
‘Vovo a God, ong vota Pen a Urvet,
na iom i riri rintet.

¹⁰ Aro lom menong e nepes aro i patea.
Aro them panes lomum ake ru a ulue,
ranga ve aka areko o vota Pen a Urvet o panes i.

¹¹ Aro ong sung emem aning aka i pavurvur nge nang ake.

¹² Aro lomum simikal lemum vothung kerenga,
ranga ve aka lemum simikal areko o oma vothung kerenga nge them.

¹³ Ong mothong tova paeso them a tongporumong engenga lemi,
ave aro ong sivlel ur kerengare a them nge.”

¹⁴ Jisas i ri mun ve, “Aro ve lomumu simikal vothung kerenga aka pelie o oma i a thomu nge, aken aro Titomomu aka a Pen a Urvet aro ilemi simikal mun lomu vothung kerengare.

¹⁵ Na aro ve lomumu simikal ole vothung kerengare avele, aro Titomomu a God aro ilemi simikal lomu vothung kerengare mun avele.

Jisas i ri nge semong a vothung.

¹⁶ “Aro ve thomu o sem nge aning, o mothong tova thomu o oma thomu mo thekumu mesis mesis ranga ve aka pokonongare o oma i. O paateal or nge otheki, eneke oleli ve aro tokokoere oleli mire ve o sem. Tho ri nunganga a thomu nge, tokokoe areken oolonga i ngo lale.

¹⁷ Na aro ve thomu o sem, aro thomu o paut thekumu nge thei, naro thomu o sagar poungomu thoing.

¹⁸ Maken aro tokokoere aro o ate thomu nge lomu semong aken avele. Ave Tomom a God aka ong thepol i avele, aro i thepol i. Na Tomom aka i thepol ur nekenga aka ong oma kine nge i, aro i sungu olongom sivenga.

Jisas i ri nge ur sivesivengare veliloalnaga.

¹⁹ “Thomu o mothong tova o paen tomoal ur sivesivengare ake ru a ulue, eneke aro sa teo nge, eve i keim naro i kerenga, na toko kemongare o turao vel mo o kem i.

²⁰ Ave i sivenga aka aro thomu o paen tomoal lomu ur sivesivengare a Pen a Urvet, aken i pavurvur aro sa teo nge avele na i keim avele, naro toko kemongare o pavurvur aro o turao vel mo o kem nge avele.

²¹ Aro thomu o oma venen aken, eneke aro lomumu i vota ol inga nge pen aka lomu ur sivengare o ngo nge.

Jisas i ri ve thekir ini nir peti ile theki lalainga.

(Luk 11:34-36)

22 “Thekir i ranga ve ini nir peti ile the lalainga na aro ve thekum i sivenga, aro num peti elonga aro i lala.

23 Ave aro ve thekum i kerenga, aro num peti elonga aro i voth a mideng. Na eve the lalainga aken a thomu nge ia mideng, aro mideng aken i voth a thomu nge aro i aolo rintet.

24 “Na toko e i pavurvur aro i velpol ini toko or aini ole umonga, kene avele. Eneke aro ve ia sagu omole, aro ini silalpot aininga, eve aro ve ini silal omole, aro ia sagu aininga. Thomu o pavurvur aro thomu o velpol ini a God ile umonga na tomo mun nge umtun ile umonga, kene avele.”

Jisas i ri ve te mothong tova lemire rit e ur e.
(Luk 12:22-31)

25 Jisas i ria ile wainlangaere ve, “I vene na tho ria thomu. O mothong tova lomumu rit nge omu aning eve omu thei ako thomu o mimi nge. Na o mothong tova lomumu rit nge lomu teunong ako thomu o teun i a numu peti nge. Mimiong i aolonga nge aning, na toko ini peti i aolonga nge ile teunong.

26 Thomu o thepol vet menre, ako o ou oa aning avele na o veliloal mun oa aning a aning a velre avele. Ave Titomomu a God ako a Pen a Urvet i sungu oa aning a or nge. Na thomu tokokoere kene thomu o aolonga nge menre ako a God itheki.

27 Na i vava, aro ve toko e ilemi rit nge ile mimiong, i pavurvur aro toko ile lemi ritong aken aro i pokespot ile mimiong? Aro avele.

28 “Na i vava ake lomumu rit nge lomu teunongre, e? Thomu o thepol vet ine kolkolung punpolngare, o um avele na o oma ole teunong avele.

29 Ave tho ria thomu, Solomon aka ini nepes aolonga na ile ur elonga i pompom rintet, ia nepes a malmaling i sivenga ranga ve ini kolkolung punpolngare areken oa malmaling avele. Kolkolung punpolngare a malmaling i sivenga rintet nge ia.

30 God i pateunu pilil polpolnga areko o voth ponange na lelken tokokoere aro o ongtuna ir. Na i vava, aro ve God

i pateunu pilil polpolnga areken, aro i pateun thomu avele? Lomu lemioong a God nge kene i posngati.

31 Na o mothong tova lomumu rit nge ur kathnga aka aro thomu o an i, na o thin i na o teunu i.

32 Eneke areko oleme mire nge a God avele, or alavusnga oleme pompom nge aning na teunong, ave Titomomu a God aka a Pen a Urvet, ilemi mire nge ur areko thomu o oror nge.

33 Ave aro lomumu rum tel nge a God ile menong e nepes na e mun nge vothung aka i vengveng a itheki. Maken aro God i sungu ur areken a thomu nge.

34 Na thomu o mothong tova lomumu pompom nge nang relnga a matheong, aro lomumu i voth inga nge ur aka i voth ponange. Nang omole omole a matheong i voth re lale.”

7

Mothong tova avrum teum e ile vothung.

(Luk 6:41-42)

1 Ma Jisas i ria mun ve, “Aro ve thomu o avrum toko ile vothung avele, aro God i avrum mun lomu vothung avele.

2 Eneke God aro i avrum mun thomu ranga ve aka thomu o avrum tokokoere. Naro God i olal mun i a thomu nge, ranga ve aka thomu o olal i a tokokoere nge.

3 “I vova aka ong thepol won amum aka i voth a teum itheki, na ong thepol tel avele nge won siva aka i voth a thekum, e?

4 Won siva aken i voth a thekum ma i vova aka ong ria teum ve, ‘Teik, aro tho eltetpot won amum aken i voth a thekum.’

5 Wong ini pokononga. Aro ong eltetpot tel won siva aken i voth a thekum, lamo aro wong the senu na wong eltetpot ol won amum aka i voth a teum aken itheki nge.

6 “Thomu o mothong tova o sungu ur aka o ateal i ve ini a God ile a nanaure nge, eneke aro o eksinga mo o pun thomu. Na o mothong mun tova thomu o ases lomu pengep otoli* sivenga areko olonga i roro rintet a kiere nge, eneke aro o tesuluku ir.”

* **7:6:** O thepol pengep otoli ia sei nge a Matiu 13:45 pes 36.

Aro ve wong nong, aro God i sungu i a wong nge.

(Luk 11:9-13)

⁷ Jisas i ri mun ve, “Tova ong nong na ong nin a God, aro i sungu i a ong nge. Tova ong kath ur e, aro God i pathengal i a ong nge. Na aro ve wong pitroo vel thekia, aro i theppot vel thekia aken nge wong.

⁸ Eneke toko alavusnga ako o nin a God, aro i sungu i a or nge. Na toko alavusnga ako o kath ur e, aro God i pathengal i a or nge. Na toko alavusnga areko o pitroo vel thekia, aro God i theppot i nge or.

⁹ “Om u e aro ve itun i nina i nge bret, aro i sungu anral a i nge?

¹⁰ Na aro ve i nina i nge silang, aro i sungu eli a i nge?

¹¹ Thomu ini toko aka lomu vothung kerenga, ave thomu o sung sungong sivenga a tutumuere nge. Na Titomomu aka i voth a Pen a Urvet, ile vothung i sivenga nge lomu vothung, aro i sung sungong aka i sivenga rintet nge areko o nina i nge.

¹² Vothung aka thomu o sis ve aro tokokoere o oma i a thomu nge, aro thomu o oma inga vothung aken a or nge, eneke Moses ile patorong na God ile riong elngare ole riong o mirenga venen aken.”

Esoong a sovengalo posnga.

¹³ Jisas i ri mun ve, “Aro thomu o koro nge lok thekia posnga atiken, eneke sovengalo aolonga aka i es a pen kerenga nge kene iwo varvar ma i semel inga nge esoong nge, na tokokoe puluangare aro o eso nge.

¹⁴ Ave lok thekia i posngati na soven-galo i klip rintet nge panesnga aka i eso a mimiong nge, na ini inga toko omole omole aka aro i thepol i na i panes soven-galo aken.

Aro thomu o naktet thomu nge riong elngare le apaltetongare.

¹⁵ “Aro thomu o nakalal thomu nge riong elngare le apaltetongare. Aro o es a thomu nge me ranga ve ini nanau pil aka i teunu sipsip ini peti i es a sipsipre nge.

¹⁶ Thomu o ate toko nge ile vothung, ranga ve aka tokokoere o ate won aka nge imonnga. Na i pavurvur aro wong

vurpot vain monnga a we wopuponga nge avele. Na thomu o vur pupos monnga a we wopuponga nge avele.

¹⁷ Maken won sivenga i pavelpol won monnga sivenga, na won kerenga i pavelpol won monnga kerenga.

¹⁸ Won sivenga i pavurvur aro i pavelpol imonnga kerenga avele, na won kerenga i pavurvur aro i pavelpol imonnga sivenga avele.

¹⁹ Na won alavusnga aka o mon senu avele, aro o tetela ir mo o asesu ir a won sesenga nge la.

²⁰ Maken aro lomumu mire nge riong elngare le apaltetongare nge ole vothung kerenga.

²¹ “Aro toko alavusnga aka o apeta tho ve, ‘Toko Pomnga, Toko Pomnga,’ or alavusnga aro o eso a God ile menonga e Nepes a Pen a Urvet avele. Ave ini inga areko o oma ur nekenga aka Vovo aka a Pen a Urvet i sis or ve aro o oma ir.

²² Naro nge riong nongpolnaga a nang aka aro i velpol aro toko pulua aro o ri ve, ‘Toko Pomnga, Toko Pomnga, nge iom them panongpol nge a God ile riong, na nge iom them wistetpot tamata kerengare, na nge iom them oma mun pathepolong or pulua.’

²³ Naro tho ria or ve, ‘Lemik mire nge thomu avele. Thomu o talela nge tho, thomu areko o oma vothung kerengare.’

Riong nge sovengalo or aini nge vel aringa.

(Luk 6:47-49)

²⁴ “Maken aro ve toko e i nongpol lek riongre na i panes senu ir, toko aken i ranga ve ini toko aka ilemi sivenga e ile omaing aka i aria ile vel a anralre nge mo i engeng.

²⁵ Mako vit i molu me ma thei awonga i opopot ma i esa roro na thue aolonga i velpol ma i tik vel aken. Ave i thupthesa i avele, eneke vel aringa aken i patu anralre ma i aria vel aken nge roro.

²⁶ Ave aro ve toko e i nongpol inga lek riong na i panes senu i avele, toko aken i ranga ve ini toko aka ilemi pelekpol aka i aria ile vel a wonwon po.

²⁷ Mako vit i molu me ma thei awonga i esa roro na thue i thu engeng ma i thupthesa vel aken. Ma vel aken ile matuong i kerenga rintet.”

²⁸ Ma Jisas i patorial vus toko na sengre nge ur areken. O nongpol ile riong ma o kukuk nge,

²⁹ eneke ile riong i engeng ma i rel nge tokokoe areko o pamireal nge a Moses ile patorong.

8

Jisas i pasenu werer toko aka ini a putput.

(Mak 1:40-44; Luk 5:12-14)

¹ Jisas i esu a tete polemi me, mako pulua pomnga o panes seleo i.

² Na toko omole aka ini peti a putput i es a Jisas nge. I koru ieve a i nge ma i ria i ve, “Toko Pomnga, ong pavurvur aka aro ong paonolpot tho mo tho riri a God itheki, tova lomum ve aro ong oma i.”

³ Ma Jisas i ronga imeni a i nge na i ria i ve, “Lemik ve aro tho oma i, aro wong riri werer.” Na a ur e avele, nako putput aken i vuspot ol a i nge.

⁴ Na Jisas i ri engeng a i nge ve, “Wong mothong tova ong ria ol toko e nge, ave aro wong es vengveng a pris nge la, mo i thepol aka ve, num peti a putput i vus. Naro ong oma lom sungong ranga ve aro Moses i ri nge lale, mo aro tokokoere ole mi mire aka ve, num multhanga aken i vus.”

Jisas i pasenu werer punonga a mukalinga ile umonga.

(Luk 7:1-10)

⁵ Lama Jisas i eso a rem a Kaperneam. Na punongare ole mukalinga aka ini toko Rom i es a i nge ma i nong mosing a i nge.

⁶ Ma i ria i ve, “Toko Pomnga, lek umonga i ngoo a lek vel ma ini peti elonga i motungtung na sisong aolonga i voth mun a ini peti.”

⁷ Ma Jisas i ria i ve, “Aro tho es mo tho pasenu i.”

⁸ Ave punongare ole mukalinga aken i olal werer ile riong ve, “Toko Pomnga, ong ini Toko Pomnga ma i pavurvur ve aro tho wola ong a lek vel lemi la avele, ave aro

wong ri inga naro lek toko umonga aro i sivenga werer.

⁹ Na tho ri venen aken, eneke tho mun tho voth a areko o mukal nge tho osa thewo, na punongare mun o voth a sek thewo. Ma aro ve tho ria omole ve, ‘Es la,’ aro i es, na aro ve tho ria relnga e ve, ‘Es me,’ aro i es me. Na aro ve tho ria lek um polpolonga ve, ‘Wong oma ur ke,’ aro i oma i.”

¹⁰ Ma Jisas i nongpol toko aken ile riong ma i kukuk. Ma i ria tokokoe areko o panes i ve, “Tho ri nunganga a thomu nge. Tho thepol toko e avele aka a Israel aka ile lemioong i aolonga vene ake.

¹¹ Tho ri nunganga a thomu nge, toko pulua aka or ini Judare avele, aro o plosa a nang le esainga na nang le sivilkuonga naro o vus me mo o men tomo nge a Abraham na Aisak na Jekop oa aning aka nge a God ile menong e nepes aka a Pen a Urvet.

¹² Ave Israelre aka God i pavelpol ile menong e nepes nge or kene aro i asesu or a pen a midenga lemi mo o voth nge naro o tang naro o atitet owo pupo.”

¹³ Ma Jisas i ria punongare ole mukalinga aken ve, “Es a lom pen la. Aro i velpol ranga ve aro lomumo nge.” A ur e avele na ile umonga aken i sivenga werer.

Jisas i pasivenga Pita iwenga.

(Mak 1:29-31; Luk 4:38-39)

¹⁴ Lama Jisas i eso a Pita ile vel ma i thepol a Pita iwenga aka ini multhang, ma ini peti i velvel ma i ngo vet inga aka a ring.

¹⁵ Ma Jisas i krima imeni, mako ia ni multhanging aken i vus, ma i mita mako i monsi ol oa aning.

Jisas i pasivenga toko na seng pulua.

(Mak 1:32-34; Luk 4:40-41)

¹⁶ Ma pen aivuvu ol me na tokokoere o paes tokokoe areko tamata kerengare o voth a or nge. Mako Jisas i wistetpot tamata kerenga areken nge ile riong inga, na i pasivenga toko na seng alavusnga aka ni multhanging i el or.

¹⁷ Na ile omaing aken kene i pavelpol nunganga a Aisaia ile riong, aka ri ve, “I eltetpot ler ni multhangingre tomo nge ler kerengaing.” *Aisaia 53:4*

Jisas i ringe vothung ako nge ipanesnga.
(Luk 9:57-60)

¹⁸ Jisas i thepol pulua pomnga aka o mit kalalual i, mako i sung riong engenga a ile wainlangae nge ve, aro o mon a epee la.

¹⁹ Na pamirealinga nge a Moses ile patorong i ria i ve, "Pamirealinga, aro tho panes ong e pen alavusnga aka aro ong es nge."

²⁰ Ma Jisas i ria i ve, "Nanau pilre ole siklep i voth, na menre ole klure i voth mun. Ave Toko Pomnga Itun imei e avele aro ari i ngo nge."

²¹ Lama ile wainlangae omole mun aka i ria i ve, "Toko Pomnga, aro tho panes wong, ave aro tho tetun tel a vovo."

²² Mako Jisas i olal ile riong ve, "Ini tokokoe areko ooni i rin lale, aro osivenga o tetun olengare aka o rin, aveto wong aro ong es me mo panes tho."

Jisas i akrusal thue aolonga ma i poreng.
(Mak 4:36-41; Luk 8:22-25)

²³ Lamako Jisas i roa a wok nge ma ile wainlangae o ro tomo mun nge i.

²⁴ Na palolo avele, nako thue aolonga i velpol, ma thei i limteto a wok lemi ma pa omole re aka aro o vlu, ave Jisas i nokolkol.

²⁵ Mako o pamimeta i ma o ria i ve, "Toko Pomnga, ong opoesal them, pa omole re ake aro te vlu."

²⁶ Ma i ria or ve, "Lomu lemioong i posngati, i vova aka thomu o ngange rintet, e?" Mako i losa ma i akrusal thue na thei le lolikong, mako thue i vus na thei i ngo thau ol.

²⁷ Ma o kukuk na o ri ve, "Toko ake ini ao ake? Eneke i ria thue na thei le lolikong ma o vus en."

Jisas i wistetpot tamata kerenga areko o voth nge toko or aini.

(Mak 5:1-17; Luk 8:26-37)

²⁸ Lama i velpola a thei a pamonlel a Galili wo epee, nge epee aka a Gadara, na toko or aini aka tamata kerengare o rero or paini, o voth nge ma o thepolo i. Or paini kene o voth vet inga aka a siklep areko o pango vungre nge, ma or paini ole engenging i aolonga rintet na toko e avele i es nge pen aken la.

²⁹ Na o presa viringga ve, "Wong ini a God Itun. Na ong vova ake ong es a them nge me, e? Nang aka ong ateal i ve aro them kerenga nge, kene i velpol rongan na ong es me mo aro ong pakerenga tel them, e?"

³⁰ Na kie avlung mun e aka o voth mela nge or avele ma o an.

³¹ Ma tamata kerengare o nong engeng a Jisas nge ve, "Aro ve ong wistetpot them, aro ong pakepot inga them mo them rero inga a kiere."

³² Mako i ria or ve, "O es la." Mako tamata kerenga areken o lopot a or nge ma o rero kie areken. Ma kie areken o thou thou ol a ruprup la, makola o matu a thei lemi ma o vlu.

³³ Ma kie thealngare o lo viri viri ma o ritet ol nge ur aken a rem lemi ma o ritet mun nge ur alavusnga aka i velpol a toko or aini aken aka tamata kerengare o voth a or nge.

³⁴ Mako toko na seng alavusnga e rem aken o es ol la mo o thepol a Jisas. Ma o velpol ma o thepol i, ma o ri engeng a Jisas nge ve, aro i lo lelpot ole pen.

9

Jisas i pasivenga toko aka ieve na imeni i motungtung.

(Mak 2:3-12; Luk 5:18-26)

¹ Mako Jisas i roa a wok nge ma i mon kora werer a thei wo epee la, ma i es a ile rem aka i voth nge.

² Na tokokoe pelie aka o potuna toko omole tomo nge ile ngosel me. Toko aken ini peti motungtung ma Jisas i thepol aka olemio nge i, ma i ria toko ni peti motungtunga aken ve, "Tuk, lomum aro i sivenga, eneke God ilemi simikal lom vothung kerengare lale."

³ Ma pamirealinga nge a Moses ile patorong pelie o ria e pel ve, "Toko aken i voltet a God, eneke i el a God imei."

⁴ Ave Jisas ilemi mire nge olemi ma i ria ol or ve, "I vova aka lomumu vet nge ur aka i kerenga ma i voth a opomu lemi, e?"

⁵ Riong kathnga i semel aka aro tho ria i a toko ake nge, e? Aro ve tho ria i ve, 'God ilemi simikal lom vothung kerengare lale.' Riong ake i semel, eneke thomu o pavurvur, aka aro o thopol lek riong potoi

avele. Aveto aro ve tho ria i ve, ‘Plosa mo es.’ Riong ake i klip, eneke thomu o pavurvur aro o thopol lek riong potoi.

⁶ Maken aro tho ri riong klipnga aken, eneke tho sis ve aro lomumu mire ako ve, Toko Pomnga Itun ile engenging ake ru a ulue, i voth, ma i pavurvur nge toko na sengre ole vothung kerengare patitepotnga.” Mako i ria toko ni peti motungtunga aken ve, “Ong mita mo ela lom ngosel mo es a lom vel la.”

⁷ Mako i losa ma i es a ile vel la.

⁸ Na toko alavusnga o thepol i veno ako ma o ngeip rintet nge. Ma o paaolonga a God iion, eneke God i sung ile engenging a tokokoere nge lale.

Jisas i lenga a Matiu, na i oma riong agelalnga aka i ranga ve ini vuralinga.

(Mak 2:14-17; Luk 5:27-32)

⁹ Jisas i es la, ma i thepol toko omole aka iion a Matiu aka i menen a takis elnga a vel. Ma Jisas i ria i ve, “Aro wong panes tho.” Mako i mita ma i panes i.

¹⁰ Lamako Jisas ome ile wainlangaere o men nge aning a ile vel lemi, lama takis elngare na toko le vothung kerengare o es mun me ma o men tomo nge or.

¹¹ Parisi pelie o thepol i veno ako ma o nin a Jisas ile wainlangaere ve, “I vova ake lomu pamirealinga i an tomo e takis elngare na toko alavusnga aka ole vothung kerenga, e?”

¹² Ave Jisas i nongpol ole riong ma i ria or ve, “Areko olemi ve o sivenga aro o es a vuralinga nge avele, ini inga areko oni multhang aro o es a i nge.

¹³ Thomu o es la na lomumu rum nge riong ake mirenga, aka God i ri vene, ‘Nik plong nge lomu sungong, aveto tho sis inga aka ve, lemi moring aro i voth a thomu nge.’ *Hosea 6:6*

Eneke tho velpol mo tho leng inga areko ole vothung i vengveng, kene avele. Tho velpol ake na tho leng inga toko na seng areko ole vothung i kerenga.”

Ninong nge semong.
(Mak 2:18-22; Luk 5:33-39)

¹⁴ Lama ini a Jon Paninuonga ile wainlangaere o es a Jisas nge la ma o ria i ve, “Them na Parisire them sem nge aning pa pulua. I vova ake lom wainlangaere o sem nge aning avele, e?”

¹⁵ Ma Jisas i olal ole riong ve, “Aro ve peange ponganga tomonnga i voth tomo nge ilengare nge sungaling a aning, i pavurvur aro o sem nge aning avele. Nang e panen aro i velpol aka aro o eltetpot peange ponganga tomonnga aken a or nge. Aro nge wop lemi aken, aro o sem nge aning.”

¹⁶ Lama Jisas i ri ve, “Aro ve lavlav omole aka i negi na i minra, mothong tova italo i tomo nge lavlav epee ponganga. Aro vene mo i monteto mun lavlav neginga aken naro i minra rintet.

¹⁷ Na toko e i mothong tova aro i save vain ei ponganga nge thei pokin aka ini mekerem peti neginga, eneke i pavurvur aro i lowimpot avele. Aro vene mo aro vain ei i lothunpot mo aro thei pokin aken ru vain ei i voth nge, aro i vupol mo vain ei aken aro i lel pautet na thei pokin mun aro i kerenga. Ave aro i sivenga tova i save vain ei nge thei pokin ponganga naro vain ei na thei pokin o sivenga.”

Jisas i pamimi werer ovote na i pasivenga seng aka ini multhang.

(Mak 5:22-43; Luk 8:41-56)

¹⁸ Jisas rongan i ri nge or, nako Judare ole mukalinga omole aka i eso me ma i koru ieve a Jisas itheki, ma i ri i ve, “Tuk sengenga i rin ponange re atike, ave aro ve ong es me mo ronga menum a i nge, aro i mimi werera.”

¹⁹ Mako Jisas i plosa ma i panes i, ma ile wainlangaere o panes mun i la.

²⁰ Mako seng omole aka i velpol, eneke sengre oa ni multhanging aka o thepol ngov kene i pesrou a i nge avele, ma i pavurvur nge tovu po or mule pa omole pothoi or aini. Ma i sulo tomo i nge toko na sengre, ma patongti i es ma i mito a Jisas ikime, ma i vugir kine inga a Jisas ia teunong ongepo.

²¹ I oma venen aken, eneke patongti ilemi inga ve, “Aro ve tho vugiro inga Jisas ia teunong aro tho sivenga werer.”

²² Na Jisas i eksing ma i thepol i ma i ria i ve, “Tuk, lemi moring aro i voth a wong nge, ong sivenga werer lale, eneke lom lemioong ve aro tho pavurvur ako aro tho pasivenga ong.” Nako seng aken i sivenga werer ol.

²³ Ma o es mala o velpol a mukalinga aken ile vel. Ma Jisas i thepol ol aka tokokoere o thuo bei ma tokokoere ole waling aolonga, eneke olemi kerere nge vung aken.

²⁴ Na i ria ve, “Thomu o espot la, eneke seng wainlanga aken i rin avele, i nokolkol inga.” Ma o nongpol i ma o ngenge lital i.

²⁵ Na i pakealapot or a lalanga, mako i koro a seng aken ile vel epee lemi, ma i krima imeni, nako wainlanga aken i mimia na i mita.

²⁶ Mako Jisas ile omaing aken kene i kima ol a pen elonga nge pen epee aken.

Jisas i vles werer toko theki prosnga or aini otheki.

²⁷ Lama Jisas i plosa nge pen aken ru i pamimi a seng wainlanga aken nge, ma i es, nako toko theki prosnga or aini aka o paneso i ma o presa pres viringa ve, “Devit Itevinga, lomum esal them paini.”

²⁸ Ave Jisas i koro a vel lemi la na theki prosnga or aini aken o eso a i nge la, ma Jisas i nina or paini ve, “Lomu lemioong aka ve, tho pavurvur aka aro tho vles thekumu mo thomu o the werer?”

Mako or paini o ria i ve, “Enala, Toko Pomnga.”

²⁹ Mako Jisas i thobiru or paini otheki, na i ria or ve, “Nge lomu lemioong inga aro thomu o the werer ol.”

³⁰ Nako a ur e avele na or paini otheki vles werer, ma Jisas i ri engeng or paini ve, “Thomu paini o mothong tova o ria toko pelie nge ur ake.”

³¹ Ave or paini o es ma o pakima ol nge a Jisas ile omaing sivenga aken a pen elonga aka nge pen epee aken.

Jisas i pasenu werer toko aka ini rises.

³² Lama toko or aini aken o plos lelpot nge a Jisas mo o es, nako toko pelie o pasong mun toko omole aka a Jisas nge la, eneke tamata kerenga i rero i ma i palav avele.

³³ Na Jisas i wistetpot tamata kerenga aken, mako toko rises aken i leng leng ol. Na toko na sangre o kukuk nge ma o ri ve, “Nomenga ur e avele i vene ake aka i velpol a Israel.”

³⁴ Ave Parisire o ri ve, “I wistetpot tamata kerengare, nge tamata kerengare oa pomnga ile engenging.”

Jisas i sung omaing a ile wainlangaere nge

(Vonge 9:35-10:42)

Jisas ilemi esal tokokoere.

³⁵ Na Jisas i esu esa mun a rumremre, na i pamireal a Judare ole lotuonga a velre, na i panongpol nge Panongpolong Sivenga nge a God ile menong e nepes, na i pasivenga mun tokokoe areko nge ni multhanging alavusnga aka i el or.

³⁶ Ma Jisas i thepol pulua pomnga ma ilemi esal or, eneke i thepol or ma i ranga ve aka o voth pelekpol na olemi kerenga. Ole menong i ranga ve ini sipsipre aka o voth senu avele ma othealngae avele.

³⁷ Na i ria ile wainlangaere ve, “Aning pulua aka i motutet aka a ometa, ave umonga pulua avele aka aro o el aning areken.

³⁸ Aro thomu o nong a ometa tokoninga nge mo aro i pake toko umonga pelie mo o veliloal aning areken.”

10

Ina Jisas ile wainlanga or mule pa omole pothoi or aini aken oionre.

(Mak 3:16-19; Luk 6:14-16)

¹ Lamako i veliloal ile wainlanga or mule pa omole pothoi or aini, ma i sungu ile engenging a or nge, mo aro o wistetpot tamata kerengare nge, naro o pasivenga ni multhangingare nge oa kerengaing.

² Ake ini pakeke or mule pa omole pothoi or aini aken oionre na i vene: Teltelnga ini a Saimon aka tokokoere o apeta mun i ve ini a Pita na itein a Andru, na Jems aka ini a Sebedi itun na itein a Jon,

³ na Pilip, na Bartolomiu, na Tomas, na Matiu aka ini takis elnga, na Jems aka ini a Alpius itun na Tadius,

⁴ na Saimon ini toko omole nge avlunq ako o apeta ir ve ini a Selot,* ome a Judas Iskariot, ini toko aton i sungu a Jisas a ngarangre omeni.

*Jisas i sungu umong a ile wainlangga or mule pa omole pothoi or aini areken nge.
(Mak 6:8-11; Luk 9:3-5; Luk 10:4-12)*

⁵ Lama Jisas i pakepot ile wainlangga or mule pa omole pothoi or aini areken ma o es, ave i pator engeng tel or ve, "Thomu o mothong tova o es nge areko or ini Judare avele, eve nge Samaria angare ole remre.

⁶ Ave aro thomu o es vengveng a Israelre nge la, aka o leklek ranga ve ini sipsipre.

⁷ Aro thomu o es mo o panongpol or ve, 'God ile menong e nepes kene i toth me lale.'

⁸ Aro thomu o pasivenga ni multhangin-gare, naro thomu o pamimi areko o rin lale, naro thomu o pasivenga tokokoe areko oni a putput, naro thomu o wis-tetpot mun tamata kerengare. Ur areke thomu o el i lale kene thomu o ol i avele, naro o ol mun i a thomu nge avele.

⁹ Na thomu o mothong tova o el umtun pelie tomo nge thomu.

¹⁰ Naro thomu o mothong tova o es tomo nge lomu alal na lomu tekruk aininga na lomu esonga tomo mun nge lomu eel. Aro avele. Thomu o um e tokokoere naro o theal thomu.

¹¹ "Aro ve thomu o es a rem e, aro thomu o the nge toko sivenga e aka tova i nongpoo thomu mo aro thomu voth tomo nge i, mola i pavurvur nge aka aro thomu o es mun nge rem relnga e.

¹² Aro ve thomu o koro a vel e nge, aro thomu o ria i ve, 'Lemi moring aro i voth tomo nge thomu.'

¹³ Na aro ve tokokoere olemi sivenga e thomu, aro lomu lemi moring i voth tomo e or, ave aro ve olemi sivenga e thomu avele, aro thomu o el werer lomu lemi moring a or nge.

¹⁴ Na eve toko e avele i nongpoo thomu na oni plong nge lomu riong, aro thomu o tepluspot evomu a vuvus na thomu o plos lelpot nge pen aken.

* **10:4:** Selot i mirenga aka ve, i voth e avlunq aka o sis ve aro o pun tomo nge Romre ole gavman mo osivenga o theal ol or.

¹⁵ Tho ri nunganga a thomu nge, nge nang aka God i ateal i ve aro tokokoere o mit nge riong, matheong aka i velpol a tokokoe areke nge, aro i aolonga nge matheong aka i velpol a toko Sodom ome Gomora angare nge."

*Ine matheong pulua aro i velpol.
(Mak 13:11-13; Luk 21:12-17)*

¹⁶ Ma Jisas i ria or ve, "Thomu o nongpol. Tho pake thomu ranga ve ini sipsipre aka o eso a nanau pilre oa lemimi. Aro lomu vothung i ranga ve ini pilimore ole vothung, aka olemi avrum senu tel e ole omaing lamo o oma i. Naro lomu vothung ranga ve ini pothure ole vothung, aka ilemi nge ur kerenga omanga avele.

¹⁷ Aro thomu o naktet thomu nge tokokoere, eneke aro o pamit thomu e riong, naro o so litlit thomu a Judare ole lotuonga a velre lemi.

¹⁸ Naro o pamit thomu a mukalingare na nepesre otheki, eneke thomu ini lek. Aro i vene aken naro thomu o panongpol nge Panongpolong Sivenga a or nge na nge areko or ini Judare avele mun.

¹⁹ Nang aka o rere thomu mo o pamit thomu nge riong, o mothong tova lomumu i ngo pelekpol ve aro thomu o ria riong kathnga a or nge, eneke nang aken aro God i sungu ile riong e thomu aka aro thomu o ripot i.

²⁰ Aro ini thomu aka o ri kene avele, ave aro ini inga Titomomu Ioni Riringa aka aro i ripot a womu me.

²¹ "Tokokoere aro o pamit otiteinre e riong mo olemi omoletet nge opunrin-ga, na toko pelie mun aka aro o pamit otutunre e riong mo olemi omoletet nge opunrinnga, na otutunre aro o pamita mun otitemaere na oninaere e riong mo olemi omoletet mun nge opunrinnga.

²² Na toko alavusnga aro oni silalpot thomu, eneke thomu ini lek, ave tokokoe areko o mit engeng mo la i pavurvur nge mimiong ake ile vusong, God aro i el werer or.

²³ Aro ve tokokoere nge rem aken o pakerenga thomu, aro thomu o lo a rem relnga e. Tho ria thomu, aro thomu

o pavus lomu umong rongan a rumrem alavusnga a Israel, naro Toko Pomnga Itun aro i es werer me.

²⁴ "Wain ako i men nge pamirealing i pavurvur aro i aolonga nge ile pamirealinga avele, na toko um polpolonga i pavurvur aro i aolonga nge itokoninga avele.

²⁵ Aro i sivenga tova ve wain aken i velpol ranga ve ini ile pamirealinga, na toko um polpolonga ile engengeng i ranga ve ini itokoninga ile engengeng. Aro ve o apeta vel tokoninga aken ve ini a Belsebul,[†] naro o apeta mun itutunre oionre nge ur aka i kerenga rintet.

Tokokoere aro o ngeip inga nge a God ienga.

(Luk 8:2-7)

²⁶ "Maken aro thomu o ngange nge or avele, eneke vothung aka i ngo kine, aro i ngo pat panen. Na riong aka i ngo kine, aro panen aro or alavusnga olemi mire nge.

²⁷ Na riong aka tho ria thomu nge a mideng, panen aro thomu o pamilempot i a pen lalanga. Na riong alavusnga aka tokokoere o pakosisil i, aro thomu o presa pres ol i a rem lemi.

²⁸ Na thomu o mothong tova o ngange nge areko o pun rin numu peti, ave o pavurvur avele aka aro o pakerenga onumu. Aro thomu o ngange inga nge a God, eneke i pavurvur aka aro i pakerenga numu peti tomo mun nge onumu aka a pen aka won sesenga i voth nge.

²⁹ Na tokokoere o ol men tun or aini nge toea omole inga, ranga ve aka or ini ur polpolnga, ave aro ve God isa wom i a or nge avele, aro men tun omole aro i rin avele.

³⁰ Na God ilemi mire senu nge thomu, na i tital poungomu thoing omole omole lale.

³¹ Thomu o mothong tova o ngange, eneke God ile lemi rumong e thomu i aolonga nge men posposenga pulua.

Te mothong tova ler maral aka ve, it ini a Jisas ile.

(Luk 12:8-9)

[†] **10:25:** Belsebul ini tamata kerengare ole mukalinga.

³² "Aro ve toko e i ripot a pulua oa lemimi ve, 'Tho ini a Jisas ile.' Tho mun aro tho ria Temek aka i voth a Pen a Urvet ve, 'Toko aken ini lek.'

³³ Na aro ve toko e i ripot a pulua oa lemimi ve, 'Tho ini a Jisas ile avele.' Tho mun aro tho ria Temek aka i voth a Pen a Urvet ve, 'Toko aken ini lek avele.'

Jisas i pavropol punpeling na i pavropol lemi moring avele.

(Luk 12:51-53)

³⁴ "Thomu o mothong tova lomumu ve, tho es ake me mo aro tho pavropol lemi moring a ulue. Avele, tho pavropol toko ile menong nge lemi moring avele, ave tho pavropol inga punpeling.

³⁵ Tho es ake me ve aro tho pavropol menong le kerengaing. Ranga ve aka God ile erere i ri ve,

'Wain tomonnga aka aro ile ngarang ini itema.

Sengre aro ole ngarang tomo nge oninaere.

Sengre ome otiteviere aro ole ngarang pel.

³⁶ Na lom vel lemiare aro velpol ini lom ngarangre.' *Maika 7:6*

³⁷ "Na aro ve toko e ile asaguong nge itema ome inina i aolonga nge ile asaguong nge tho, aken i pavurvur aro i voth ini lek wainlanga avele. Na aro ve toko e ile asaguong nge itutunre i aolonga nge ile asaguong nge tho, aken i pavurvur mun aro i voth ini lek wainlanga avele.

³⁸ Na aro ve toko e i potuna ia won ngoronga avele, aka o pavurvur aka aro o pun rin i nge, i pavurvur aro i voth ini lek wainlanga avele.

³⁹ Na aro ve toko e i krim engeng isivenga ile mimiong, aro ile mimiong aken i penthal. Ave toko aka isivenga ile mimiong i penthal, eneke ini lek wainlanga, aro i el mimiong aka aro ile vusonga avele.

Toko aka i opoal a Krais ilengare aro i el iolonga sivenga.

⁴⁰ "Na aro ve toko e i elo thomu, aro i elo mun tho. Na toko kathnga aka i elo tho, i elo mun a God aka i pakeu tho me.

⁴¹ Na aro ve toko e i elo a God ile riong elnga e, eneke ini a God ile riong elnga, aro i el iolonga ranga ve ako God ile riong elnga aken aro i el i. Na aro ve toko e i elo toko vengvenga e, eneke ini toko vengvenga, aro i el iolonga ranga ve ako toko vengvenga aken aro i el i.

⁴² Na aro ve toko e i savea thei merirnga mo i sungu i a lek toko vulutnga e nge, eneke ini lek wainlanga, tho ria thomu, toko aken iolonga aro i penthal avele.”

Jisas ini anga?

11

(Vonge 11:1-16:20)

Jon Paninuonga i pake ile wainlangaere a Jisas nge la.

(Luk 7:18-35)

¹ Lama Jisas i sungu riong a ile wainlanga or mule pa omole pothoi or aini ma vus, lamako i es ol ma i pamireal na i panongpol tokokoere ako a rumrem a epee aken.

² Na Jon Paninuonga i voth a mang a midenga lemi na i nongpol ur pulua aka Jisas i oma ir. Mako i sungu ile riong e ile wainlanga pelie ma i pakepot or a Jisas nge la.

³ Ma o nina Jisas ve, “Aro ong ria them, ong ini toko akon God i ateal ong ve aro ong es me, eve aro it alavusnga aro te men total toko relnga e?”

⁴ Mako Jisas i olal ole riong ve, “Thomu o es werer la mo thomu o ria Jon nge ur alavusnga aka thomu o nongpol i lale na thomu o thepol mun i lale.

⁵ Ako toko theki prosngare o the werer, na toko eve lilngare o es ol, na tokokoe areko oni peti a putput o riri, na telnga gutngare o nongpol, na rinongare o mimi werera, na toko le ur avelengare o nongpol Panongpolong Sivenga.

⁶ Aro i sivenga e toko tova ilemi or aini e tho avele.”

⁷ Lama Jon ile wainlangaere o es ol, na Jisas i patea ile riong e a Jon a tokokoere nge, ma i ri ve, “Thomu o es a Jon nge la a pen polpolnga, ma thomu o thepol neke aka a i nge? Thomu o thepol inga lele aka sa thuua thua i?

⁸ Na thomu o es la mo thomu o thepol neke? Thomu o thepol toko aka ia malmaling aka i sivenga rintet? Avele. Toko areko oa malmaling i vene aken o voth inga a nepesre ole pen.

⁹ Thomu o ria tho nge aka thomu o es mala thomu o thepol uneke? Ava ini a God ile riong elnga e? I vene re aken, ave tho ria thomu, thomu o thepol toko aka i mukal nge a God ile riong elnga elonga.

¹⁰ Na Jon ini toko aka God ile erere i ritet nge i ma i ri ve,

‘O thepol, aro tho pakepot tel lek toko mo i mukal nge wong,
mo aro i monsi tel lom so a mukaling.’

Malakai 3:1

¹¹ Na tho ria thomu, Jon Paninuonga i pomnga nge toko alavusnga aka o voth ake ru a ulue, ave toko aka i posngati a God ile menong e nepes a Pen a Urvet, toko aken i aolonga nge i.

¹² Nge wop lemi aka Jon Paninuonga i patea ile omaing nge, ma me i pavurvur ponange, tokokoe areko o engeng nge punong o tongporum aka aro o el a God ile menong e nepes a Pen a Urvet me, mo o ri ve ini ole.

¹³ Na God ile riong elngare tomo nge a Moses ile patorong o sungu riong mala i mulalu nge a Jon ile velpoling.

¹⁴ Na tova lomumuo e ole riong aka o ri ve, aro Elaija i velpol tel, toko aken ini a Jon.

¹⁵ Na aro ve toko e i sis ve aro ilemi mire senu nge lek riong, mo i sivenga aka aro i ta senu itelnga nge lek riong ake.

¹⁶ ‘Na aro ve tho patongrum toko na seng ake ru nge wop lemi ake ole vothung, aro tho oma i nge riong agelalnga le vanga ol, e? O ranga ve ini wainlangaere aka o arongrong pel nge pen aka ini pathunonga. Na wainlanga avlung relnga areko ru o leng a or ve,

¹⁷ ‘Them vo lemi sivengaing a voing a thomu nge,
aveto thomu o ri ve numu plong nge sesing,
eneke lomumu kerere.

Mako them vo voing aka o voal rinongare nge,
aveto thomu o ri ve numu plong mun nge ngilelong,

eneke lomumu sivenga.’

¹⁸ Na thomu o venen aken, eneke Jon i es me, ma i sem e aning na i thin vain avele, na tokokoere o ri ve, ‘Tamata kerenga i voth a i nge.’

¹⁹ Ave Toko Pomnga Itun i es me, ma i an na i thin, ma o ri ve, ‘O thepol vet toko ake, ini toko an rinrinonga na i thin mun vain pompom, na ini takis elngare na toko le vothung kerengare othanga.’ Aveto toko na seng areko o panes vengveng a God ile mire, ole vothung i pathengal it ako ve, o panes a God ile mire ako i vengveng, aveto lomu vothung aken i pathengal it ako ve, thomu o panes toko ulue angare ole mire.”

Rumrem areko olemi kerere nge ole vothung kerenga avele.

(Luk 10:13-15)

²⁰ Jisas i oma ile pathepolong e rem pelie, ave tokokoere olemi kerenga e ole vothung kerengare avele. Lama Jisas i ria ile riong engenga e rem areken.

²¹ Ma i ri ve, “Patong thomu toko Kراسin angare, na patong mun thomu toko بتسايدا angare aro matheong kerenga aro i velpoltun thomu. Aro ve toko e i es la mo i oma pathepolong pelie ako tho oma i a thomu nge, aka a Tair na Saidon, aken aro nomenga rintet o eksing oopo lale e ole vothung kerengare, naro o teun teunong aka ini lemi kerereong a teunong, na o vorvor vuvus a opounga lale, aka aro i paateal ve o lel okime nge ole vothung kerengare lale.

²² Ave tho ri nunganga a thomu nge, nge nang aka God i ateal i ve aro tokokoere o mit nge riong, aro matheong aka i velpol a thomu nge, aro i aolonga nge matheong aka aro i velpol a toko Tair ome Saidon angare nge.

²³ Na thomu Kaperneam angare, ava aro thomu o paesa sivengomu roro a Pen a Urvet la, e? Avele, aro God i asesu thomu a Wali la. Aro ve toko e i es a rem a Sodom la mo i oma pathepolong areko tho oma i a thomu nge, aro Sodom rongan i voth.

²⁴ Ave tho ri nunganga a thomu nge, nge nang aka God i ateal i ve aro tokokoere o mit nge riong, aro matheong aka i velpol a thomu nge, aro i aolonga nge matheong

ako i velpol nomenga a Sodom angare nge.”

Jisas ini thauong tepun.

(Luk 10:21-22)

²⁵ Lama Jisas i ria ve, “Vovo, ong ini Toko Pomnga a Pen a Urvet na ake ru a ulue. Tho ri sivengaing a ong nge, eneke ong parong kine ur areken nge toko powe ninengare, na ong pathengal i nge tokokoe areko oleli ranga ve ini wainlangaere.

²⁶ I re aken, Vovo. Ong panes inga lomum na ong oma re inga venen aken.”

²⁷ Na Jisas i ria mun ve, “Vovo i sung ur alavusnga lale a menik. Vovo inga ilemi mire nge isivenga Itun, na toko relnga e ilemi mire nge i avele. Na toko e avele mun ilemi mire nge a Vovo, ini inga Itun ilemi mire nge i. Itun i ateal mun toko pelie aka i pathengal ia Vovo a or nge, mo or inga aka oleli mire nge a Vovo.”

²⁸ Lama Jisas i ria mun or ve, “Thomu tokokoe areko o molos nge lomu elong mathengare, aro thomu o es a tho nge me mo aro thomu o el thauong.

²⁹ Aro lomumu sivenga nge tho aka tho voth ini omu Pomnga, naro thomu o el mire aka a tho nge. Eneke tho ini toko mosinga na vothung aka nge paruruong i voth a tho nge naro thomu o el thauong.

³⁰ Eneke riong kathnga tho sungu i e thomu, aro i sivenga e thomu, na elong aka tho sungu i a thomu nge, aro i mathe e thomu avele.”

12

Toko Pomnga i mukal nge nang rialonga.

(Mak 2:23-28; Luk 6:1-5)

¹ Lama nge nang rialonga e Jisas tomo e ile wainlangaere o eso a wit a ometa lemi. Na ile wainlangaere kene mesipun or, mako o kulpot wit monngare ma o an ir.

² Ma Parisire pelie o thepol or ma o ria a Jisas ve, “It Judare ler patorong i ri ve, aro te oma ur aken avele e nang rialonga, ave thepol lom wainlangaere o oma ur aken.”

³ Ma Jisas i olal werer ole riong ve, “Ava thomu o tital a God ile erere lale aka nge

a Devit ome ile tokokoere ole omaing ako mesipun or.

⁴ Ma i eso a God ile vel lemi, ma ome ile tokokoere o an bret ako ini sungong a God nge, na bret aken kene Moses ile patorong i ri ve, ini inga prisre oenga inga aro o an bret aken.

⁵ Na ava thomu o tital mun a Moses ile patorong lale ve, aka e nang rialonga elonga prisre aka o voth a Lotu Tepun a Vel o avsa patorong nge nang rialonga, ave ole vothung kerenga avele.

⁶ Na tho ria thomu, ponange toko omole aka i pomnga rintet nge Lotu Tepun a Vel i ake ru i voth.

⁷ Na God ile erere i ri vene:
‘Nik plong nge lomu sungong,
aveto tho sis inga aka ve,
lemi moring aro i voth a thomu
nge.’ *Hosea 6:6*

Na aro ve lomumu mire senu nge a God ile riong ake, aro thomu o ri kerenga avele nge tokokoe areko ole vothung kerenga avele.

⁸ Ma Toko Pomnga Itun i theal mun nang rialonga aken.”

*Nge nang rialonga Jisas i pasivenga
toko aka imeni kerenga.*

(*Mak 3:1-6; Luk 6:6-11*)

⁹ Lama Jisas i plosa nge rem aken, ma i eso a Judare ole lotuonga a vel omole.

¹⁰ Ma toko e aka imeni omkolo i voth. Na toko pelie aka o voth mun kene olemi ve aro o pamit a Jisas e riong, mako o nina i ve, “Aro i sivenga tova te pasivenga toko aka e nang rialonga? Moses ile patorong i ri vava?”

¹¹ Ma Jisas i olal ole riong ve, “Aro i vava tova ve omu e ile sipsip omole i matu a vol lemi nge nang rialonga, e? Aro toko aken aro i krima i mo i monteta i me avele? Avele aro i monteta i.

¹² Na toko aken kene isivenga rintet nge sipsip, maken patorong i ri kerenga e it avele tova te opoesal toko nge nang rialonga.”

¹³ Mako Jisas i ria toko meni omkolonga ve, “Ong pavengvengpot menum.” Mako i pavengvengpot i, na a ur e avele, nako imeni i senu werer, ma i ranga ve ini imeni epee anga.

¹⁴ Lama Parisire o plosa ma o rirum nge a Jisas ipunrinnga.

God ile umonga aka i ateal i.

¹⁵ Jisas ilemi mire nge Parisire olemi aka nge ipunrinnga, mako i plos lelpot nge pen aken, ave pulua pomnga aka o panes i. Ma i pasivenga ni multhanginga alavusnga aka o voth tomo e or,

¹⁶ na i ri engeng tokokoere ve o mothong tova o ria othangangaere nge ile omaing.

¹⁷ Na i oma venen aken ma i pavelpol nunganga riong aka God ile riong elnga a Aisaia i ri nge. Na ile riong vene:

¹⁸ “Ake ini lek umonga aka tho ateal i.
Ok sagu rintet i na lemik sivenga rintet nge i.

Aro tho paeso Onik Riringa a i nge,
mo aro i panongpol nge vothung
vengvenga
a toko alavusnga areko okei rel
rel.

¹⁹ Aro i vol na i presa pres avele,
naro tokokoere o nongpol ile lenga
lenging avele a sovengalo.

²⁰ Aro ile vothung kerenga e avele e
tokokoe areko ole engenging i
pospos,
ranga ve ini lele aka i vulkor,
aro i pavulkor altetpot i avele,
na ranga ve mun aka the lalainga aka
i to senu avele,
aro i parinrin i avele.

Naro ile vothung aro i venen aken
i pavurvur aka aro vothung
vengvenga
aro ile mong ur alavusnga.

²¹ Naro tokokoe areko or ini Judare avele,
aro olelio nge i,
naro o men total ile opoesaling e
or.” *Aisaia 42:1-4*

Jisas na Belsebul.

(*Mak 3:23-27; Luk 11:17-22*)

²² Lama toko pelie aka o paes toko e aka a Jisas nge la aka itheki pros na i palav avele, eneke tamata kerenga i voth a i nge. Jisas i pasivenga toko aken, mako toko aken i palav ol na i the werer.

²³ Na tokokoere o kukuk nge ur ake Jisas i oma i, ma o ri ve, “Ava ini a Devit Itevinga, e?”

²⁴ Lama Parisire o nongpol ole riong ma o ri ve, “I wistetpot tamata kerengare, eneke oa pomnga a Belsebul i sungu engenging a i nge ma i wistetpot or.”

²⁵ Jisas ilemi mire nge olemi ma i ria or ve, “Aro ve rem omole o omreu pel mo o pun pel, aro rem aken aro i vus. Na aro ve rem lemiare eve vel lemiare osivenga o pun pel, aro o voth lollo mun avele.

²⁶ Thomu o ri ve tho wistetpot a Satan ilengare nge a Satan ile engenging. Aro ve lomu riong aken i nunganga, aro i mirenga ve, Satan ilengare osivenga o pun pel, naro o voth palolo avele.

²⁷ Thomu o ri ve, Belsebul i sung engenging a tho nge mo tho wistetpot tamata kerengare a tokokoere nge. Na anga i sung engenging aken a lomu wainlangaere nge mo o wistetpot tamata kerengare a tokokoere nge, e? Mako lomu wainlangaere o pathengal thomu ako ve, lomu riong i nunganga avele.

²⁸ Tho wistetpot tamata kerengare nge a God ile engenging, na omaing aken i pathengal thomu ako ve, God ile menong e nepes i velpol a thomu nge lale.

²⁹ “Aro toko e i kem toko engenga ile ur elonga a vel lemi vava? Aro i kin tel toko engenga aken nge we lamo i kem ile ur elonga aka i ngo a ile vel lemi.

³⁰ “Toko kathnga ini thengek avele, aro ini lek ngarang. Na toko mun e aka i wol tokokoere a tho nge me avele, akennga i wistetpot or.

³¹ Mako tho ria thomu, God aro ilemi simikal tokokoere ole vothung kerenga na ole riong kerenga e a God, ave aro ve toko e aka i ri kerengaing nge a God Ioni Riringa ile omaing, aro God ilemi simikal ile vothung kerenga aken avele.

³² God aro ilemi simikal toko ile vothung kerenga aka i ria riong kerenga nge a Toko Pomnga Itun, ave aro ilemi simikal tokokoere ole riong kerenga aka nge a God Ioni Riringa avele. Aro ilemi simikal i ponange na panen mun avele.”

Won aka i kerenga imonnga i kerenga.

³³ Ma Jisas i ria mun ve, “Won monnga sivenga aro i velpol nge won sivenga, na

won monnga kerenga aro i velpol nge won kerenga. Aro te ate wonre nge omonnga.

³⁴ Thomu ini pilimo kerengare. Lomu vothung i kerenga, naro thomu o pavurvur aka aro o ria riong sivenga avele, eneke ur kathnga aka toko ilemi i vual nge, kene aro i ripot i a iwo.

³⁵ Toko sivenga i paespot ur sivenga aka i voth a ilemi, eneke ilemi i vual nge ur sivengare. Na toko kerenga i paespot ur kerenga aka i voth a ilemi, eneke ilemi i vual nge ur kerengare.

³⁶ Tho ria thomu, nge nang aka God aro i pamit toko alavusnga nge riong, aro o ritet nge ole riong kerenga alavusnga aka o ri nge lale.

³⁷ Na nge lom riong inga, aka aro wong mit nge riong. Mako lom riong aken i pahtengal wong aka ve, wong ini toko vengvenga eve wong ini toko kerenga.”

Pathepolong aolonga nge a Jona. (Luk 11:29-32)

³⁸ Lamako toko pamirealinga nge a Moses ile patorong tomo nge Parisi pelie o ria a Jisas ve, “Pamirealinga, them sis ve aro wong oma omaing aolonga e aka i pathengal them ve, ong oma a God ile omaing.”

³⁹ Ave Jisas i olal ole riong ve, “Toko na seng areko o mimi ponange, ole vothung i kerenga rintet na o nongal a God ile riong avele. O engeng ve aro o thepol pathepolong ake ini a God ile paatealing, ave aro o thepol pathepolong omole inga, ini pathepolong aka God i oma i a Jona nge.

⁴⁰ Jona i voth a silang aolonga iopo lemi nge nang or me na mlik or me, naro i venen mun aka nge a Toko Pomnga Itun, aro i voth mun a vuvepun nge nang na mlik or me inga.

⁴¹ Na panen nge nang aka God aro i pamit tokokoere nge riong, aro tokokoere e rem pomnga a Ninive, aro o mita, mo o teltun mun thomu Juda areko o mimi ponange omu, eneke o nongpola Jona ile panongpolong, mako o lel okime nge ole vothung kerengare. Naro thomu o nongpol, ponange toko omole aka i pomnga rintet nge a Jona, i ake ru i voth.

⁴² Panen nge nang ako God aro i pamit tokokoere nge riong, aro seng ako ini nepes a Seba, aro i mita ma i teltun thomu Juda areko o mimi ponange omu, eneke seng aken i plosa nge rem ako i melanga rintet mo aro i nongpol a Solomon ile riong ninengare. Naro thomu o nongpol, ponange toko omole aka i pomnga rintet nge a Solomon, i ake ru i voth, aveto thomu o nongpol ile riong avele.

*Tamata kerenga i es werer me.
(Luk 11:24-26)*

⁴³ “Na aro ve tamata kerenga i lopot a toko omole nge, aro i esu esa a pen klangklanga mo i kath pen e aka aro i thau i nge, ave i thopolo pen e avele.

⁴⁴ Ma i ria ienga nge ve, ‘Aro tho lo werer a lek vel la.’ Mako i lo werer ma i thepol aka ile vel ilemi pro na o athe senu i lale na ur alavusnga i ngo vengveng.

⁴⁵ Lama i es ma i wol tamata kerenga or limai aka o kerenga rintet nge i, ma or alavusnga o eso a vel aken ma o voth nge. Mako toko aken ile mimiong i kerenga rintet nge ile mimiong teltelinga. Aro i venen mun aka e thomu toko na seng kerengare aka o mimi ponange.”

*Jisas inina ome ititeinre.
(Mak 3:31-35; Luk 8:19-21)*

⁴⁶ Rongan Jisas i sungu ile riong e tokokoere ma inina ome ititeinre o velpol. O mit inga a vel thekia, ma okei song nge i ve aro o leng leng tomo nge i.

⁴⁷ Ma toko omole e aka i ria Jisas ve, “Ninom ome titeumre or aka o mit total ong a lalanga na olemi ve aro o leng leng tomo nge wong.”

⁴⁸ Ave Jisas i olal ile riong ve, “Ninek anga? Na titeik angare?”

⁴⁹ Mako i paninepot a ile wainlangaere ma i ria or ve, “Thepol vet, ninek ome titeikre o voth ake.”

⁵⁰ Toko kathnga aka i panes a Vovo a God a Pen a Urvet ile riong ini teik na luk na ninek.”

13

*Riong agelalnga nge toko aka i ul vatharu wit monnga a ometa.
(Mak 4:1-9; Luk 8:4-8)*

¹ Nang mun aken Jisas i korpot a vel, ma i es ma i men a thei a pamonlel a Galili a wonwon po ma i patea ile patoraling.

² Na pulua pomnga aka o mit kalalual i, na nge ur aken Jisas i roa nge wok ma i men nge, na toko na sangre o mit a wonwon po.

³ Lama Jisas i patorial or nge ur pulua nge riong agelalngare. Ma i ria or ve, “Toko omole aka i voth, ma i ul vatharu ile wit monngare a ia ometa.

⁴ Ma i ul vatharu wit monngare a ometa ma pelie o matu a sovengalo, na menre o an vusa ir.

⁵ Na wit monnga pelie o matu a um pipi nge aka ulue i sivenga nge avele, na wit areken monnga i metaplo viri viri.

⁶ Ave rulpo ma nang i povlesa me ma i in rintet or makola o menine, eneke oriripi i teu la avele.

⁷ Lama wit monnga pelie o matu a kiki lemimi, ma kiki i otun or ma o rin rin.

⁸ Ave wit monnga pelie o matu a ulue sivenga nge, ma o metaplo sivenga, ma o mon senu. Wit monnga pelie omonnga or mule pa mule na pelie omonnga or mule pa limae na pelie omonnga or mule pa me.

⁹ Na aro ve toko e i sis ve aro ilemi mire senu nge lek riong, mo i sivenga aka aro i ta senu itelnga nge lek riong ake.”

Tepun aka Jisas i ri nge riong agelalngare.

(Mak 4:10-12; Luk 8:4-10; Luk 10:23-24)

¹⁰ Lama Jisas ile wainlangaere o es toth a i nge ma o nina i ve, “I vova ake ong sungu inga riong agelalngare a tokokoere nge, e?”

¹¹ Mako Jisas i olal ole ninong ve, “God i ria thomu nge ile riong inkinenga lale nge ile menong e nepes aka a Pen a Urvet, ave i pathengal i a or nge avele.

¹² Toko aka ilemi mire nge a God, aro God i sungu mun mire pomnga a i nge, mo aro ile mire i pompom rintet. Na toko aka ilemi mire nge a God avele, aro God i eltetpot ile mire posnga aka i voth a i nge.

¹³ Lek riong agelalnga a or nge itepun vene:
“Aro o nak theu theaing,
aveto aro o thepol senu i avele.
Naro o ta senu otelnga,

aveto aro olemi mire nge mirenga avele.

¹⁴ I vene ako ma God ile riong elnga a Aisaia ile riong i velpol nunganga a or nge. Na ile riong i vene:

“ ‘Aro thomu o nongpol vet inga,
ave aro lomumu mire nge imirenga
avele.
Aro thomu o thepol vet inga,
ave aro lomumu mire nge imirenga
avele.

¹⁵ Eneke toko na seng areke olemi rit nge
riong nongpolnga,
na otelnga ini plong ol ve aro o nong-
pol ol riong,
ma otheki molok.

Aro ve ole vothung i venen aken avele,
o pavurvur aka aro o thepol ur e,
na o nongpol ur e,
na olemi mire nge ur e,
na eksing olemi

Aken aro tho pasivenga or.’” *Aisaia*
6:9-10

¹⁶ Lamako Jisas i ria ve, “Aro sapase thomu, eneke thomu o thepol i na thomu o nongpol i.

¹⁷ Na tho ria thomu, nomenga God ile riong elngare na toko vengvengare o sis ve aro o thepol ur areko thomu o thepol ir, ave o thepol ol ir avele. Na o sis aka ve, o nongpol riong areko thomu o nongpol ir, ave o nongpol ol ir avele.”

Riong agelalnga nge wit monngare imirenga.

(*Mak 4:13-20; Luk 8:11-15*)

¹⁸ Lama Jisas i ria mun or ve, “Aro thomu o nongpol riong agelalnga mirenga aka nge toko aka i ul vatharu wit monnga a ia ometa lemi.

¹⁹ Tokokoe areko o nongpol Panongpolong Sivenga nge a God ile menong e nepes na olemi mire nge mirenga avele, or ranga ve ini wit monnga aka o matu a sovengalo, ma Satan i es a or nge me, ma i eltetpot a God ile riong a oopo lemi.

²⁰ Na wit monnga areko o matu a um pipi nge, o ranga ve ini toko aka i el viri viri a God ile riong tomo nge lemi sivengaing.

²¹ Ave riong riripi i teu a iopo lemi avele, ma i mit palolo avele. Aro ve matheong na

sisisong i velpoltun i, eneke i el a God ile riong, a ur e avele naro i modopu i.

²² Na wit monngare aka o matu a kiki lemimi, or ranga ve ini toko na seng aka o nongpol a God ile riong, ave olemi pom-pom e vothung ulue anga, na olemi ol nge ur elonga na umtun elnga. Ma ur areken o seltun a God ile riong, ma o ranga ve ini wit monngare aka o pavelpola aning avele.

²³ Na wit monnga areko o matu a ulue sivenga nge, o ranga ve ini toko na seng areko o nongpol a God ile riong ma oleme nine nge. Na monnga sivengare i velpol a ole mimiong, ranga ve ini wit areko o mon rinrina ma pelie omonnga or mule pa mule na pelie or mule pa limae na pelie or mule pa me.”

Riong agelalnga nge ngangovpotnga.

²⁴ Lama Jisas i ria mun or nge riong agelalnga e aka ve, “God ile menong e nepes a Pen a Urvet i ranga ve ini toko aka i ul vatharu wit monnga sivenga a ia ometa.

²⁵ Pemliknga omole tokokoere o nong nong, na toko aken ile ngarang i es ma i ul-vatharu mun ngangovpotnga omonngare a wit a ometa aken lemi, lama i lo.

²⁶ Na wit monnga sivenga aken i metaploa ma pa omole aro i mon, ma ine ngangovpotnga aken i ploa mun.

²⁷ “Mako toko aken ile umongare o es a i nge ma o ria i ve, ‘Toko pomnga, ong ul vatharu inga wit monnga sivenga a om ometa, na i vova aka ngangovpotnga mun aka i ploa tomo mun nge, e?’

²⁸ “Ma i ria or ve, ‘Lek ngarang e aken i oma vothung aken.’

“Ma ile toko umongare o nina i ve, ‘Ong sis ve aro them es la mo them lekris ir?’

²⁹ “Mako i olal ole riong ve, ‘Avele, thomu o mothong ngangovpotnga aken lekrisnga, aro vene mo thomu o lekris tomo ir nge wit sivengare.

³⁰ Aro o voth venen i pavurvur nge aka aning i motu, naro tho ria toko umongare ve o lekris ngangovpotnga areken tel mo o lulual ir mo o ongtuna ir a won sesenga nge, ave wit monnga aro o pangoo i a ok aning le ngoinga a vel.’”

Riong agelalnga nge won monnga ako i posngati.

(Mak 4:30-32)

³¹ Lama Jisas i ria mun or nge riong agelalnga e ako ve, “God ile menong e nepes i ranga ve ini won monnga aka i posngati aka iion ini ‘Mastet.’ Na toko omole i ela i ma i o i a ia ometa.”

³² Na won monnga aken i pospos rintet, ave aro i metaplo ma i aolonga nge aning alavusnga a ometa. Na i velpol ini won aolonga aka menre o oma ole klu a keipunge.”

Riong agelalnga nge yis.

(Luk 13:18-21)

³³ Lama Jisas i ria mun or nge riong agelalnga e aka i ri ve, “God ile menong e nepes i ranga ve ini yis aka seng omole aka i parongu tutunnga a plaua nge aka imathenga i pavurvur nge kilo or mule pa aini, ma i pawima plaua alavusnga aken.”

Jisas i ri inga riong agelalngare.

³⁴ Jisas i panongpol toko na sengre aka nge riong agelalngare. Ile riong alavusnga aka i ria or nge, ini riong agelalnga popepenga.

³⁵ Ile omaing ake kene i pavelpol nun-ganga God ile riong elnga ile riong aka i ri ve,

“Aro tho panongpol inga thomu nge riong agelalnga.

Na nge riong agelalnga areke
aro tho ria thomu nge ur areko i ngo
kine nomenga
ako nge ulue ile velpoling
ma me i pavurvuru ponange.”

Buk Song 78:2

Riong agelalnga nge ngangovpotnga imirenga.

³⁶ Lama Jisas i plos lela nge tokokoere ma i koro a vel lemi, mako ile wainlangaere o eso a i nge la ma o nina i ve, “Aro ong ria them nge lom riong agelalnga nge ngangovpotnga aka i ploa a ometa lemi imirenga.”

³⁷ Mako Jisas i olal ole riong ve, “Toko aka i ul vatharu wit monnga sivenga areken ini a Toko Pomnga Itun.

³⁸ Na ometa kene ini ulue ake, na wit monnga sivenga kene ini toko na seng

areko o ela a God ile menong e nepes. Na ngangovpotnga kene ini toko na seng areko ini a Satan ile.

³⁹ Na ngarang aka i ul vatharu ngangovpotnga omonnga kene ini a Satan, na lelinga a nang kene ini ulue ake ile vusong, na lelongare kene ini enselre.

⁴⁰ “Tokokoe areko o veliloal ngangovpotnga aro o asesu or a won sesenga nge. Aro i venen aken panen nge ulue ake ile vusong.

⁴¹ Toko Pomnga Itun aro i pakepot ile enselre nge ile menong e nepes mo o eltett-pot alavusnga areko o patelek tokokoere nge vothung kerenga omanga, na tokokoe mun re alavusnga aka o oma vothung kerenga.

⁴² Naro o asesu or a won sesenga aolonga nge naro o tang na o atitet owo pupo.

⁴³ Naro toko vengvengare aro oni peti i tolilis ranga ve ini nang le tolilisong a Otema a God ile menong e nepes. Na aro ve toko e i sis ve aro ilemi mire senu nge lek riong, mo i sivenga aka aro i ta senu itelnga nge lek riong ake.

Riong agelalnga nge ur e aka iolonga i roro aka i ngo a ometa lemi.

⁴⁴ “God ile menong e nepes a Pen a Urvet i ranga ve ini ur e aka iolonga i roro aka o tetun kine i a ometa lemi. Ma toko e aka i thepol i, na i parong kine werer mun i. Na i es ol tomo e lemi sivengaing na i sungpot ile ur elonga mo tokokoere o ol i. Lama i lo werer mo i ol ulue tomo e ometa aken.

Riong agelalnga nge pengep otoli aka iolonga i roro rintet.

⁴⁵ “Na God ile menong e nepes a Pen a Urvet i vene ke: Toko e aka i ortet pengep otoli sivengare.

⁴⁶ Lama i sangpolo omole aka iolonga i roro rintet, mako i sungpot ile ur elonga ma tokokoere o ol i. Lama i ol pengep otoli aken nge.

Riong agelalnga nge susua.

⁴⁷ “Na God ile menong e nepes kene i vene mun ke. Toko pelie aka o ulu oa susua a thei mo o ting silang rel relnga pelie.

⁴⁸ Ma susua i vual rintet nge silangre, mako o monteto i a thei wopo, ma o menu

mo o thomre silang areken. Sivesivengare o paenu ir a alal lemi na kerengare o ases ir.

⁴⁹ Naro i vene re aken nge ulue ake ile vusong, enselre aro o es me mo o thomreu toko kerengare a epee na toko sivesivengare a epee,

⁵⁰ naro o asesu kerengare a won sesenga aolonga nge naro o tang na o atitet owo pupo.”

⁵¹ Na Jisas i nina ile wainlangaere ve, “Lomumu mire nge riong areken mirenga?”

Ma o olal ile riong ve, “Nala.”

⁵² Lama i ria mun or ve, “Vene ake na toko pamirealingare nge a Moses ile patorong or omole omole ako olemi mire mun nge riong ako nge a God ile menonga e nepes a Pen a Urvet, or ranga ve ini vel aolonga tokoninga aka i eltetpot ur pelie nge ile ur elonga imei, na i eltetpot ur ponganga tomo e ur neginga.”

Nasaretare o mothongal a Jisas. (Mak 6:1-6)

⁵³ Lama Jisas i pavus ile riong agelangare ringa, ma i plosa ol nge rem aken.

⁵⁴ Ma i es ol a ile rem tepun la, ma i panongpol toko na sangre a Judare ole lotuunga a vel. O nongpol i ma o kukuk nge ile panongpolong, ma o ri ve, “Toko aken i el mire na engenging nge pathepolong omanga a pen kath, e?

⁵⁵ Lemir mire ako ve, toko ake ini vel aringa aton itun e. Na inina ini a Maria, ma ititeinre kene or ini a Jems na Joses na Saimon na Judas.

⁵⁶ Ma ilulunre or mun kene o voth ake tomo e it, na i vova ake i pavurvur nge ur areke omanga, e?”

⁵⁷ Ma oni plongal i.

Mako Jisas i ria or ve, “Riong elnga e kene olemi sivenga nge i nge pen alavusnga aka i es nge, aveto ile pen tepun tomo nge ile vel lemiare, kene avele.”

⁵⁸ Na Jisas i oma pathepolong pulua a or nge avele, eneke olelio nge i avele.

14

*Jon Paninuonga ipunrinnga.
(Mak 6:14-29)*

¹ Nge wop lemi aka Herot ini nepes a epee a Galili, ma i nongpola riong aka nge a Jisas.

² Ma Herot i ria ile toko umongare nge ve, “Aken ini a Jon Paninuonga aka i mimia werer re aken, aken ini tepun aka ile engenging i pavurvur nge pathepolong omanga.”

³⁻⁴ Na nomenga Herot i ewoa a Herodias aka ini itein a Pilip iewo sengenga, aveto i pamuespot i a i nge. Na Jon i ria Herot ve, “Lom peangeong a Herodias i panes patorongre avele.” Na nge ur aken Herot i ria ile punongare mo o rere a Jon na o kin i e sen na o paeso i a mang a midenga.

⁵ Na Herot ilemi ve aro i so rin a Jon, ave i ngange tokokoere, eneke o ri ve, Jon ini a God ile riong elnga e.

⁶ Lamako Herot i oma aning aolonga omole aka, i paateal nang aka inina i pop i nge, na Herodias itun ovotenga aka i sesu a Herot ome tokokoere otheki. Herot i thepol i ma i theseseal rintet i.

⁷ Mako Herot i ria i ve, “Tho ri nunganga a ong nge. Ur kathnga aka ve, aro ong nong i a tho nge, aro tho sungpot inga a ong nge.”

⁸ Ma ovote aken i ri ve, “Aro ong parongu a Jon Paninuonga ipouniga a vituunga lemi naro ong sungu i a tho nge.” Ile riong venen aken, eneke ilemi nge riong aton inina i ria i nge lale.

⁹ Na nepes a Herot i nongpola riong aken ma ilemi kerere rintet, ave ilemi nge riong aka i oma i lale a tokokoere otheki aka o men na o an tomo nge i. Mako i sung riong a ile punongare nge ve aro o oma i rangave aka ovote aken i ri nge.

¹⁰ Ma i ria toko omole mo i ria toko punongare mo o sorotetpot a Jon ikei.

¹¹ Mo o parongu ipouniga a vituunga lemi mo o sungu i e ovote aken, na i el i a inina nge la mo ilemi mire nge ve, Jon kene i rin nunganga lale.

¹² Lama Jon ile wainlangaere o es me ma o potun ol ilopat ienga la, ma o tetun i. Mako o es ol ma o ritet a Jisas nge.

*Jisas i paan totomone or 5,000.
(Mak 6:32-44; Luk 9:10-17; Jon 6:1-13)*

13 Jisas i nongpola riong nge a Jon ako o so rin i, mako i plosa nge rem aken. I roa a wok nge tomo nge ile wainlangaere mo o mon a wop aka tokokoere o voth nge avele. Ave tokokoere nge rumrem areken o nongpol i, mako o plosa ma o es e oeve a i nge la.

14 Lama Jisas i ru e wok ma i thepol pulua pomnga aka o voth. Ilemi esal rintet or, mako i pasivenga areko oni multhang.

15 Penie ol na ile wainlangaere o es a i nge me ma o ria i ve, “Penie rintet re lale ake, na pen ake tokokoere o voth nge avele. Aro ong pake werer or mo o es mo osivenga o ol oa aning a rumrem pelie.”

16 Ma Jisas i olal ole riong ve, “O mothong tova o es. Aro thomu ake o paan ir.”

17 Ma o olal ile riong ve, “Them el inga bret posnga or lim na silang or aini.”

18 Mako Jisas i ria or ve, “Thomu o el i a tho nge me.”

19 Lama i ria toko na sengre ma o men menu a pilil po, na i ela bret posnga or lim na silang or aini, mako i thea a Pen a Urvet la, ma i ri sivengaing a God nge. Lama i inreku bret na i insisau silangre ma i sungu i a ile wainlangaere nge, mo o sung sung i a tokokoere nge.

20 Ma toko na sengre o an, ma osa pup. Mako ile wainlangaere o ela alal aolonga or mule pa omole pothoi or aini ma o inou oa aning uluore nge ma o vual.

21 Na totomonere inga aka o an aning aken kene or 5,000 na o tital tomo sengre ome wainlangaere avele.

*Jisas i es roro a thev stha.
(Mak 6:45-51; Jon 6:15-21)*

22 Aken i vus ma Jisas i ria tel ile wainlangaere ma o roa a wok nge naro o mukal nge i a thei wo epee la, lamako Jisas i ria ol tokokoere ma o es.

23 I ria tokokoere lale ma o es la ma Jisas inga i ro a tete polemi la. Pemlik lale ma ienga i voth ma i nong.

24 Na ile wainlangaere o voth ol a thev stha, nako thue aolonga i velpoltun or a otheki nge anga ma thei i vilvel or.

25 Na i walpau, nako Jisas i es roro a thev stha a ile wainlangaere nge la.

26 Ma ile wainlangaere o thepol i aka i es a thev stha me, ma o ngange rintet ma o ria ve, “Ake va ini mothuk ot!” Na o wal tomo nge ngangeong.

27 Ave Jisas i paviria riong a or nge ve, “Thomu o engeng, akenga ini tho. Thomu o mothong tova o ngange.”

28 Mako Pita i ria i ve, “Toko Pomnga, eve ini ong nunganga re aken, moro ong ria tho mo tho es roro a thev stha a ong nge wot.”

29 Ma Jisas i ria i ve, “Ong es me.”

Mako Pita i plosu nge wok ma i patea ile esong a thei stha ma i es a Jisas nge la.

30 Ave Pita i thepol thue aka i engeng, mako i ngeip na i leringu a thei lemi, nako i avav ve, “Toko Pomnga, opoesal tho.”

31 Na a ur e avele, nako Jisas i paespot imeni ma i krima Pita imeni na i ria i ve, “Lom lemioong i tunti. I vova ake lomum or aini, e?”

32 Mako or paini o roa a wok nge, na thue i poreng.

33 Na areko o voth a wok nge o lotual ol a Jisas, ma o ria ve, “I nunganga, ong ini a God Itun.”

*Jisas i pasivenga ni multhangingare pulua aka a Genesaret.
(Mak 6:53-56)*

34 Jisas ome ile wainlangaere o mon kora thei ma o otuno a epee aka a Genesaret.

35 Ma tokokoere o ate a Jisas, ma okei song ni multhangingare aka o voth a rumrem aka o toth nge pen aken, ma o pasong or a Jisas nge me.

36 Na tokokoere o nong a Jisas nge ve, aro ni multhangingare aro o vugiro inga ia teunong ongepo. Na toko kathnga aka i vugiro ia teunong ongepo i sivenga werer.

15

*God ile patorong i mukal nge titevirre ole riong.
(Mak 7:1-23)*

1 Lama Parisire na pamirealinga pelie nge a Moses ile patorong o es a Jerusalem me ma o nina Jisas ve,

2 “I vova ake lom wainlangaere o avsa titevirre ole patorong, e? Aro ve o an, o paut rir tel omeni avele.”

3 Ma Jisas i olal ole riong ve, “Na i vava ake thomu o nongsa a God ile patorong na thomu o panes inga lomu pamirealing, e?

4 Eneke God i ri ve,
‘Aro lomu vothung sivenga
nge titomomu na ninomu.’ *Kisim Bek*

20:12

Na i ri mun ve,
‘Toko kathnga i oma riong kerenga
nge itema ome inina,
aken aro o so rin i.’ *Kisim Bek*

21:17

5 Ave thomu o ri ve, ‘Aro ve omu e i ria itema eve inina ve, “Ur ako lemik ve aro tho opoesal thomu nge, tho ateal i lale ve, aro tho sungu i a God nge.”

6 Toko aken aro ilemi nge itema na inina na i oma senu nge or avele.’ Na nge lomu riong aken thomu o mothongal a God ile patorong, eneke lomumu pompom nge titovumuere ole patorongre.

7 Thomu ini pokonongare, Aisaia i ritet vengveng nge thomu nomenga aken i ri ve,

8 “God i ri ve,
“Ini tokokoe areke o paaolonga tho nge
owo,
ave olemi i voth mela rintet nge tho.

9 O lotual polpol tho,
eneke o patorial ole patorongre aken
toko i oma ir,
na o rivenga ini lek patorongre.” ’’
Aisaia 29:13

Jisas i ri nge ur areko i paakop toko.

10 Mako Jisas i leng tokokoere a i nge na i ria or ve, “Aro thomu o nongpol lek riong naro lomumu nine nge.

11 Ini ur ako i eso a toko iwo aken i paakop toko e avele a God itheki, ave ur aken i espot a toko iwo, aken i paakop toko.”

12 Ma ile wainlangaere o es a i nge ma o ria i ve, “Lomum mire avele aken Parisire olemi kerenga nge lom riong aken wong ri nge, e?”

13 Ma Jisas i olal ole riong ve, “Ur alavusnga aken Vovo a God a Pen a Urvet i o i avele, aro i lekrisa i.

14 Mothong tova lomumu pompom nge tokokoe areken. O ranga ve ini theki

prosnga e aken i sis ve aro i pathengal toko theki prosngare nge sovengalo. Na aro ve theki prosnga e i mukal nge theki prosnga e nge sovengalo, aro or paini o matu a vol lemi.”

15 Ma Pita i ria Jisas ve, “Aro ong panine lom riong agelalnga aken mirenga a them nge.”

16 Jisas i ria or ve, “I vova aken lomu mire rongan i pospos ranga ve ini or, e?

17 Ava lomumu mire avele aken ur alavusnga aken i eso a toko iwo, aro i esu a iopo la, lamo ini peti i paes selepot mun i.

18 Ave riong aken i mita a toko ilemi me ma iwo i paespot i kene ini ur areko i paakop toko.

19 Na ur areko o espot a toko ilemi me, ranga ve ini lemi rumong kerenga, na toko so rinnga, na toko na seng aomnga, na kemong, na le apaltetong, na voltetong.

20 Ur areke ini ur areko i paakop toko a God itheki, ave toko aken i paut imeni avele na i an, aken i paakop toko avele.”

*Seng Kenan anga ilemio nge a Jisas.
(Mak 7:24-30)*

21 Lamako Jisas i lospot nge wop aken, ma i es a epee aken a rem a Tair na Saidon.

22 Ma seng Kenan anga omole aken i voth nge epee aken, i es a Jisas nge ma ria i ve, “Toko Pomnga, wong ini a Devit Itevinga, aro lomum esal tho. Tuk sengenga i voth ma i kerenga rintet, eneke tamata kerenga i rero i.”

23 Ave Jisas i olal ile riong e avele. Ma ile wainlangaere o es a Jisas nge ma o ria i ve, “Wong pakepot seng aken i panes it, eneke i presa pres pompom sele.”

24 Ma Jisas i olal ole riong ve, “God i pake tho me nge Israelre oenga, mo tho opoesal or ranga ve ini sipsip areko o penthal.”

25 Ave seng aken i es me ma i koru ieve a Jisas itheki nge, na i ri ve, “Toko Pomnga, opoesal tho.”

26 Na Jisas i ri ve, “Aro i sivenga tova ve te ela wainlangare oa aning mo te ulu i a nanaure nge?”

27 Ma seng aken i olal ile riong ve, “Toko Pomnga, i nunganga, ave nanaure mun o

an aning uluore ako o matu a otokoninga ia aning a ring thewo."

²⁸ Ma Jisas i nongpol ile riong aken ma i olal i ve, "Wong patong seng ake, lom lemioong i aolonga rintet. Ur ako ong sis ve aro tho oma i, aro God i oma i." Na a ur e avele, nako itun sengenga aken i sivenga werer.

Jisas i pasivenga werer toko ni multhanginga pulua.

(Mak 7:31-37)

²⁹ Jisas i plosa nge pen aken ma i telthes rum thei a pamonlel a Galili. Mako i roa e tete po ako ma i menu nge.

³⁰ Ma pulua aolonga aka o es a i nge me, ma o pasong tokokoe areko oeve lil, na otheki pros, na areko opokinngare o kerenga, na pepere, na ni multhanginga pulua mun. Ma o pamenu or totho a Jisas ieve tepun, mako i pasivenga werer or.

³¹ Ma toko na seng o thepol pepere aka o ri, na areko opokinngare o kerenga o sivenga, na eve lilngare o es, na theki prosngare aka o the werer, ma o kukuk nge, ma o paaolonga Israelre ole God nge.

Jisas i paan totomone or 4,000.

(Mak 8:1-10)

³² Lama Jisas i lenga ile wainlangaere a i nge me, ma i ria or ve, "Lemik esal rintet tokokoe areke, eneke o voth tomo nge tho e nang or me lale, na oa aning avele. Nik plong ve mesipun or na tho pake or a ole pen la. Aro vene mo otheki vaisis mo o matu a sovengalo."

³³ Ma ile wainlangaere o ria ve, "Te voth ake a pen polpolnga. Aro te ela bret a kath aka aro te paan pulua aolonga vene ake, e?"

³⁴ Ma Jisas i nina or ve, "Omu bret or pova i voth?"

Ma o ri ve, "Ini inga bret posnga or limai ome silang tutunnga posalnga."

³⁵ Mako Jisas i ria tokokoere ve aro o menu a ulue.

³⁶ Ma i ela bret or limai areken na silang areken ma i ri sivengaing a God nge. Lamako i inreku bret ome silang ma i sungu i a ile wainlangaere ma ile wainlangaere o sungu ol i a tokokoere nge.

³⁷ Or alavusnga o an ma osa pup. Ma oa aning uluore aka o ngou ol, o paen tomoal i ma o inou i nge alal aolonga or limai.

³⁸ Na tokokoere inga aka o an aning aken kene or 4,000 na o tital tomo mun sangre ome wainlangare avele.

³⁹ Lamako Jisas i pake werer or a ole pen la. Nako i roa e wok ma o mon telek a epee a Magadan la.

16

O ria Jisas ve aro i oma paatealing.

(Mak 8:11-13)

¹ Parisi na Sadiusi pelie o es a Jisas nge me ma olemi ve aro o tongporum i. Ma o ria i ve aro i oma paatealing e mo aken i pathengal or ve, i oma a God ile omaing.

² Ave Jisas i olal ole riong ve, "Penie aka sepsa i selele, ma thomu o ri ve, 'Rulpo aro ler nang sivenga.'

³ Na rulpoalal tova thomu o thepol sepsa i selele aro thomu o ri ve, 'Ponange aro vit i mol.' Thomu o the ako a sepsa la ma lomumu mire nge aro ur kathnga aro i velpol, ave nge ur alavusnga aka i voth ponange lomumu i nine nge imirenga avele.

⁴ Na toko na seng areko o mimi ponange or ini areko o kerenga, eneke o voth pis a God nge avele. Eveleunga o sis inga ve aro o thepol paatealing pelie, ave aro avele. Paatealing aka aro o thepol i, ini inga a God ile riong elnga a Jona ile." Lama Jisas i plosa nge pen aken mako tokokoere o vothu ol.

Riong agelalnga nge yis aka ini Parisire na Sadiusire oa.

(Mak 8:14-21)

⁵ Jisas ile wainlangaere olemi simikal bret nge ole esong a thei wo epee la.

⁶ Ma Jisas i ria or ve, "Aro thomu o naktet thomu na o the senu nge Parisire na Sadiusire oa yis."

⁷ Ma ile wainlangaere o rirum pel a osivenga nge ve, "Ava i oma riong aken, eneke te el bret pelie me avele?"

⁸ Ave Jisas ilemi mire nge ole riong aken, mako i ria or ve, "Lomu lemioong i posngati. I vova ake thomu o ri pel a sivengomu nge aka thomu o es tomo e bret pelie me avele, e?"

⁹ Ava lomumu i nine rongan! Ava lomumu rum ine bret posnga or lim aton ru tho paan toko or 5,000 nge avele. Na thomu o inou aning uluore nge alal or pov?

¹⁰ Na nge bret posnga mun or limai ako tho paan toko or 4,000 nge. Na alal aolonga or pov ako thomu o inou aning uluore nge?

¹¹ Na i vava ake lomumu mire avele ako tho ria thomu ake nge bret avele, e? Aveto aro thomu o naktet thomu nge Parisire na Sadiusire oa yis."

¹² Ma o nongpol ol riong aken, ma olemi mire ol ako ve, i ri or ake nge yis ako o oma bret nge avele, ave i ri or ako ve, aro o naktet or nge Parisire ome Sadiusire ole patoraling.

*Pita i ritet nge a Jisas ini anga.
(Mak 8:27-29; Luk 9:18-20)*

¹³ Jisas i es a epee a rem a Sisaria Pilipai, ma nge wop aken i nina ile wainlangaere ve, "Thomu o rivenga tokokoere o ri ve Toko Pomnga Itun ini anga?"

¹⁴ Ma o ri ve, "Pelie o ri ve, wong ini a Jon Paninuonga, na pelie o ri ve, wong ini a Elaija, na pelie o ri ve, wong ini a Jeremaia eve God ile riong elnga relnga mun e."

¹⁵ Na i nina or ve, "Na thomu o rivenga tho ini anga?"

¹⁶ Saimon Pita i olal ile riong ve, "Wong ini toko ako God i ateal i ve aro i el werer ile tokokoere. Na wong ini a God aka i mimi evelelga Itun."

¹⁷ Ma Jisas i olal ile riong ve, "Jon itun a Saimon, sapase wong. Tokokoere o patorial ong nge riong ake avele, ave Vovo aka i vot a Pen a Urvet i sungu mire aken a wong nge.

¹⁸ Tho ria wong, wong ini a Pita, ini anral aka aro tho pamita lek lotu nge. Na rinong ile engengeng i pavurvur aro i pavusu i avele.

¹⁹ Aro tho sungu Nepes a Menong aka a Pen a Urvet ile vel thekia thepngare a wong nge. Ur kathnga aka ong thep i a ulue, aro God i thep mun i a Pen a Urvet, na ur kathnga aka ong pupal i a ulue, aro God i pupal mun i a Pen a Urvet."

²⁰ Na Jisas i ri engeng ile wainlangaere ve aro o mothong tova o ria toko e nge aka ve, ini toko aka God i ateal i ve aro i el werer ile tokokoere.

Jisas i monsi lale nge ile rinong na i pamireal ile wainlangaere nge ile vothung panesnga

(Vonge 16:21-20:34)

Jisas i ri nge ile rinong na ile los wereraing.

(Mak 8:31-9:1; Luk 9:22-27)

²¹ Nge nang aken Jisas i patea ol riong a ile wainlangaere aka ve, aro i es a Jerusalem la, ma i el sisong aolonga a Judare oa pompomere na pris kimangare na pamirealingare nge a Moses ile patorong kene omeni. Aro o so rin i, na nang or me aro i vus naro i los werera.

²² Pita i nongpol riong aken ma i paes lelpot a Jisas ma i ri engeng a i nge ve, "Toko Pomnga, aro avele. Mothong tova ur aken i velpol a wong nge."

²³ Ave Jisas i eksinga ma i ria Pita ve, "Satan! Lo lelpot tho. Wong mit rupal tho, eneke wong panes a God ilemi avele. Wong panes inga toko ulue anga ilemi."

²⁴ Mako Jisas i ria ile wainlangaere ve, "Aro ve toko e i sis ve i panes tho, aro i mothong lelu isivenga, naro i potuna isivenga ia won ngoronga mo i panes tho.

²⁵ Eneke aro ve toko aka i sis ve i krim engeng isivenga ile mimiong, aro ile mimiong aken i penthal. Ave toko aka isivenga ile mimiong i penthal nge panesngek, aken aro i el mimiong aka aro ile vusonga avele.

²⁶ Aro i sivenga nge toko vava tova i ela ur alavusnga ake ru a ulue, ave ile mimiong kene i penthal, e? Aro toko e i sungu ur nekenga naro i ol werer ile mimiong nge, e?

²⁷ Pa omole aro Toko Pomnga Itun i esu tomo nge Itema ile engengeng aolonga na ile tolilisong na ile enselre me, naro i sungu tokokoere olonga i pavurvur nge vothung areko o oma i.

²⁸ Na tho ri nunganga a thomu nge, omu pelie ake ru o vot nge pen ake, aro

rongan o mimi naro o thepol Toko Pomnga Itun aro i esu me ma ini Nepes.”

17

*Jisas ini peti i velpol ma i rel.
(Mak 9:2-13; Luk 9:28-36)*

¹ Nang or limae i vus, na Jisas i wol a Pita na titein pel aini ini a Jems na Jon, ma i paesa or nge tete polemi roronga e ako, ma oenga o voth nge.

² Ma o thepol ako Jisas ini peti i eksing ma itheki i tolilis ranga ve ini nang theki na ia teunong i veleles ranga ve ini penlalanga.

³ Ma ile wainlangaere o thepol a Moses ome a Elaija aka o velpola ma o leng leng tomo nge a Jisas.

⁴ Lama Pita i ria Jisas ve, “Toko Pomnga, te voth ake ma i sivenga. Tova lomum sivenga nge, aro tho aria valvale or me, omole aro ini lom na omole aro ini a Moses ile na omole aro ini Elaija ile.”

⁵ Rongan Pita i ri na songen velelesnga aka i tolilis rintet i pavlestun or, na riong i espot a songen lemi me, ma i ri ve, “Ake ini Tuk a urvet, aka lemik sivenga rintet nge i. Aro thomu o nongpol ile riong.”

⁶ Ile wainlangaere o nongpol riong aken ma o ngeip rintet na o ulu osivenga na otheki lelu a ulue la.

⁷ Mako Jisas i es a or nge me ma i vugiro or, na i ria or ve, “Thomu o mita, na o mothong tova thomu o ngange.”

⁸ Mako opo watha ma o thepol toko e avele ol, ini a Jisas ienga.

⁹ Rongan o ruru a tete polemi me, na Jisas i ria riong engenga a or nge ve, “Thomu o mothong tova o ria toko e nge ur ake thomu o thepol i, i pavurvur aka la Toko Pomnga Itun aro i los werera nge rinong.”

¹⁰ Ma ile wainlangaere o nina Jisas ve, “I vova ake pamirealingare nge a Moses ile patorong o ri nge ve Elaija aro i mukal tel me, e?”

¹¹ Ma i olal ole riong ve, “Riong aken i nunganga. Elaija aro i es tel me mo aro i pavengveng werer tel ur elonga.

¹² Ave tho ria thomu Elaija i es me lale, na tokokoere o ate i avele. O panes inga

ako ini olemi ma o oma vothung kerenga a i nge. Naro o oma mun vothung venen aken nge a Toko Pomnga Itun.”

¹³ Jisas i ri venen aken ma ile wainlangaere olemi mire aka ve, i ri aken nge a Jon Paninuonga.

Jisas i pasivenga werer wainlanga aka tamata kerenga i voth a i nge.

(Mak 9:14-28; Luk 9:37-42)

¹⁴ Jisas tomo nge ile wainlanga or me aken o velpol a pulua aolonga aken nge, ma toko omole aka i es me ma i koru ieve a Jisas itheki nge.

¹⁵ Na i ria ve, “Toko Pomnga, aro lomum esal tuk tomonnga. Ile lemi rumong i penthal polpol, na i el kerengaing aolonga nge. Nang pelie i matu a won sesenga nge, na nang pelie i matu a thei lemi.

¹⁶ Ma tho pasong i a lom wainlangaere nge la, ave o pavurvur nge ipasenu wererenga avele.”

¹⁷ Ma Jisas i olal ile riong ve, “O, thomu toko na seng areko lomu lemioong avele. Lomu vothung kerenga vet aka. Aro tho voth tomo nge thomu e nang or pova? Naro tho el lomu matheong e nang or pova? Thomu o pasong wainlanga aken a tho nge me.”

¹⁸ Ma Jisas i vol tamata kerenga aken, mako i lo lelpot wainlanga aken, na a ur e avele na i sivenga werer.

¹⁹ Pan Jisas ile wainlangaere oenga o es ol a i nge la na o nina i ve, “I vova ake them pavurvur ve aro them wistetpot tamata kerenga aken avele, e?”

²⁰ Ma Jisas i olal ole riong ve, “Lomu lemioong i posnga rintet ma thomu o pavurvur nge avele. Tho ri nunganga a thomu nge. Aro ve lomu lemioong i tuni ranga ve ini won ake imonnga i posnga rintet aka iion ini ‘Mastet’, aro thomu o pavurvur ve aro o ri e tete polemi ake ve, ‘Losa e pen aken mo pamu e pen kola,’ naro i pamu la. Ur e avele aro i klip nge thomu.”

²¹ Ave ini inga nongong na semong aka i pavurvur nge ur areke wistetpotnga, na ur relnga e avele ol.”

Jisas ile riong paininga nge ile rinong na ile los wereraing.

(Mak 9:30-32; Luk 9:43-45)

²² Jisas tomo nge ile wainlangaere o veliloalo pel a epee a Galili, na Jisas i ria or ve, “Aro tokokoere o sungu a Toko Pomnga Itun a tokokoere omeni.

²³ Toko areken aro o pun rin i, na nang or me aro i vus naro i los werera.” Ma ile wainlangaere o nongpol ile riong aken ma olemi kerere rintet.

Jisas i ul Lotu Tepun a Vel a takis.

²⁴ Jisas ome ile wainlangaere o velpol a rem a Kaperneam, ma takis elngare nge Lotu Tepun a Vel o es a Pita nge, ma o nina i ve, “Lomu pamirealinga i ul takis a Lotu Tepun a Vel avele?”

²⁵ Ma Pita i olal ole riong ve, “Avele, aro i sungu i.”

Pita i koro a vel lemi me, ma i ria rongan na Jisas i pateltelal ininnga ve, “Lomum vava? Ini nepes ulue angare o el umtun a olengare nge, eve a toko rerelire nge?”

²⁶ Ma Pita i olal ile riong ve, “Toko rerelire nge.”

Na Jisas i ri ve, “Maken nepesre o el umtun a olengare nge avele.

²⁷ Ave o mothong tova olemi kerenga ako e ler vothung. Aro wong es a thei aken nge la mo ulpot konainga. Silang ako wong kona tel i a mukaling, aro ong inua iwo naro ong thepolo umtun alavatharnga omole nge ako i pavurvur nge it aini ler Lotu Tepun a Vel a takis. Aro ong ela i, ma ong es mo ong sungu i a umtun elngare nge mo ini Lotu Tepun a Vel a takis ulnga nge it toko paini.”

18

Anga iion i aolonga a God ile menong e nepes lemi?

(Mak 9:33-37; Luk 9:46-48)

¹ Lamako Jisas ile wainlangaere o es a i nge ma o nina i ve, “Anga iion i aolonga rintet a God ile nepes a menong ako a Pen a Urvet?”

² Mako Jisas i lenga wainlanga omole ako a i nge me, ma i pamita i a oa wop.

³ Ma i ria or ve, “Na tho ri nunganga a thomu nge. Aro ve thomu o eksing avele, na thomu o velpol ranga ve ini wainlanga tutunnga avele, aro thomu o pavurvur aro o eso a God ile menong e nepes a Pen a Urvet avele.

⁴ Na aro ve toko e i paruru isivenga ranga ve ini wainlanga atike, aken aro iion i aolonga rintet a God ile menong e nepes a Pen a Urvet.

⁵ Na aro ve toko e ilemi sivenga e wainlanga e ako i vene ake, eneke ilemi sivenga e tho, toko aken i oma ile vothung aken e tho.

Vothung kerenga i pakerenga ine lemioong.

(Mak 9:42-48; Luk 17:1-2)

⁶ “Aro ve toko e i paleklek wainlanga posnga e ako ilemio a tho nge, nge vothung kerenga omanga, na aro ve o kin anral aolonga a ikei mo o asesu i a thev lemi mo i vlu a thev vuvlunga lemi, ur aken i pospos nge a God ile olaling a i nge.

⁷ Aro ur e ako i kerenga rintet, aro i velpol nge toko ulue angare ako o pamatu toko pelie nge vothung kerenga. I nunganga, ako aro vothung kerenga areken aro i pamatu tokokoere, ave ur e ako i kerenga rintet aro i velpol nge toko aro i pavelpol vothung kerenga areken.

⁸ Na aro ve menum eve evom i patelek ong nge vothung kerenga, aro i sivenga tova ong mon prelpot i mo ases i. Aro i kerenga mos avele tova ve menum omole inga eve evom omole inga i voth na ong el mimiong ako aro ile vusonga avele. Ave aro i kerenga selele nge ong tova menum or aini eve evom or aini i voth na God i asesu ong a pen aro won sesenga i voth nge aro ile vusonga avele, aro nge vothung kerenga aro menum eve evom aken i oma i.

⁹ Na aro ve thekum i patelek ong nge vothung kerenga, aro i sivenga tova ong mon prelpot i mo ases i. Aro i kerenga mos avele tova ve thekum omole inga, na ong el mimiong ako aro ile vusonga avele. Ave aro i kerenga sele nge ong tova ve thekum or aini i voth na God i asesu ong a pen aro won sesenga i voth nge aro ile vusonga avele.

10 “Thomu o mothong tova numu silalpot areko o ranga ve ini wainlanga posposengae areken. Tho ria thomu, or ini ur polpolnga avele, eneke ole enselre evelelnga o voth a Vovo itheki lemi a Pen a Urvet.

11 [Toko Pomnga Itun i velpol mo aro i el werer areko o penthal.]”

Riong agelalnga nge sipsip ako i penthal.

(Luk 15:4-7)

12 Jisas i oma mun riong ve, “Aro ve toko e ile sipsip or mule pa mule na omole i penthal, aro i kath i avele? Avele. Aro i mothong lelu sipsip or mule pa limpenel pothoi or limpenel aken a tete po re nge, na i es mo i kath sipsip omole inga aken ru i penthal.

13 Na tho ri nunganga a thomu nge, aro ve i thepol i, aro ile lemi sivengaing nge ile sipsip omolenga aken, aro i pomnga rintet nge ile lemi sivengaing aka nge sipsip or mule pa limpenel pothoi or limpenel aken o penthal avele.

14 Na i vene mun aka nge Titomomu aka i voth a Pen a Urvet. Ini plong ve ile wainlanga omole aro i penthal.”

Vothung aka nge titeir pavengvenga aka i oma vothung kerenga.

15 “Aro ve teum i oma vothung kerenga nge wong, aro ong es a i nge lamo ong ri tomo nge i nge ile vothung aken a thomu paini engomu nge. Na aro ve i nongal lom riong aken, ong el werer teum aken lale.

16 Ave aro ve i nongal lom riong avele, aro ong el toko mun omole eve or aini mo o es tomo nge wong mo o lo werer mun a i nge. Aken i ranga ve aka God ile erere i ri nge ve,

‘Aro toko or aini eve or me o voth mo o paengeng pel ole riong aken.’ **Lo 19:15**

17 Na aro ve i nongal ole riong avele, aro wong ritet mun i a toko lotuongare nge. Na aro ve i nongal toko lotuongare mun avele, aro lom lemi rumong a i nge aro i ranga ve aka ini toko aka ilemi mire nge a God avele eve ini takis elngka kerenga.”

18 “Tho ri nunganga a thomu nge, ur alavusnga aka thomu o kin i a ulue, aro God i kin mun i a Pen a Urvet. Na ur alavusnga aka thomu o inos i a ulue, aro God i inos mun i a Pen a Urvet.

19 “Tho ri mun nunganga a thomu nge ve, aro ve omu aini ake ru a ulue lomumu omoletet nge ur e, na thomu o nong nge, aro Vovo aka i voth a Pen a Urvet aro i oma i a thomu paini nge.

20 Eneke aro ve toko or aini eve or me o pathun nge iok, tho aken ru tho voth tomo mun nge or.”

Ine riong agelalnga nge umonga aka ilemi simikal ithanga ia thangaroong avele.

21 Lama Pita i es a Jisas nge me ma i nina i ve, “Toko Pomnga, aro teik e i oma vothung kerenga a tho nge pa or pova naro lelik simikal ile vothung aken, e? Ava pa or limai?”

22 Ma Jisas i olal ile riong ve, “Aro pa or limai inga avele, aveto aro lomum simikal ile vothung kerenga mule pa limai pothoi or limai.

23 “Tho ri venen aken e thomu, eneke God ile menong e nepes a Pen a Urvet i ranga ve ini nepes aka ilemi ve aro i thepolrum ile umongare ole thealing nge omaing aka i sungu i a or nge.

24 Na i patea omaing aken na o wolo toko e aka i nge la, aka ia thangaroong a i nge i pavurvur nge 10 milion Kina.

25 Ave ile umonga aken ile umtun e avele aka aro i olal ia thangaroong aken nge. Mako ile nepes aken i pango riong ve, aro toko e i ol toko aken ome iewo sengenga na itutunre mo aro o velpol ini um polpolongare, naro toko mun e aro i ol ile ur elonga alavusnga naro umtun aken aro o el i, aro ini ole nepes ile, nge ia thangaroong aolonga aken olalnga.

26 “Ma ile umonga aken i nongpol riong aken, ma i koru ieve pomusi a nepes itheki nge na i nong a i nge ve, ‘Aro lomum esal tho na ong men tetal tel mun tho tie. Naro tho olal werer ok thangaroong aken a wong nge.’

27 Mako umonga aken ile nepes ilemi esal i, na i eltetpot i nge mang a midenga na ilemi simikal ia thangaroong aken.

²⁸ “Ave toko umonga aken i espot ol a nepes nge la, ma i thopolo ithanga toko umonga e ako ia thangaroong a i nge i pavurvur inga nge 10 Kina. Ma i rere i ma i patea ikei lunga, na i ria i ve, ‘Aro wong olal om thangaroong alavusnga aka wong el i a tho nge.’

²⁹ “Ma ithanga umonga aken i koru ieve pomusi a i nge na i nong a i nge ve, ‘Aro ong men total tel mun tho tie, mo aro tho olal werer ur areken a wong nge.’

³⁰ “Ave toko aken i mothongal i. Na i paeso ithanga umonga aken a mang a midenga i pavurvur aka la i olal werer ia thangaroong aken.

³¹ Ma toko umonga pelie aka o thepol ur aken i velpol, ma oleli kerere rintet nge. Ma o es la ma o ria ole nepes aken nge vothung aka umonga aken i oma i.

³² “Mako nepes aken i leng toko umonga aken a i nge me. Ma i ria i ve, ‘Wong ini umonga kerenga. A mukaling tel wong nong a tho nge, mako lemik simikal om thangaroong aolonga rintetnga aken.

³³ Na i pavurvur aka aro lomum esal mun thongom umonga aken avele, aka ranga ve lemik esal wong?”

³⁴ Ma nepes aken ilemi kling rintet, mako i paeso toko umonga aken a mang a midenga lemi mo aro o paomelal i, i pavurvur aka i olal werer ia thangaroong alavusnga areken.

³⁵ “Na i vene mun re aken nge a Vovo aka a Pen a Urvet, aro i oma mun vothung ake a thomu nge, tova lomumu simikal se lele avele nge vothung kerenga aka teum e i oma i a thomu nge.”

19

Jisas i ri nge peangere ole mothongpel ing.

(Mak 10:1-12)

¹ Jisas i ria riong areken ma vus, ma i lospot a epee a Galili ma i es a epee a Judia a thei a Jordan a wo epee la.

² Ma pulua pomnga o panes i la, ma nge pen aken i pasenu werer or nge oa ni multhangingre.

³ Ma Parisi pelie oleli ve aro o tongporum a Jisas, mako o nina Jisas ve, “Ava ler patorong i ri ve, toko i pavurvur aka aro i mothongpot iewo sengenga nge isivenga ilemi?”

⁴ Na Jisas i olal ole riong ve, “Ava thomu o tital riong aka i voth a God ile erere nge ve, ‘Ako a mukaling aka God i oma ur alavusnga

ma i oma toko na seng.’ *Stat 1:27*

⁵ Na i ri mun ve, ‘Aro toko i lo lelpot itema ome inina na i teo a iewo sengenga nge, naro or paini o velpol mo or omole ol inga.’ *Stat 2:24*

⁶ Mako o voth ol or aini avele, ave or omole ol inga. Na ur aka God i kin i lale, toko e i mothong tova i parerelu ol i.”

⁷ Mako Parisire o nina i ve, “Na i vova aka Moses i sungu patorong e aka i ri ve, ‘Aro toko i watu erere aka ini peangeong ile vusong a erere, na i sungu i a iewo sengenga nge na i pakealalpot i la,’* e?”

⁸ Mako Jisas i olal ole riong ve, “Moses ile riong i venen aken, eneke thomu ini tokokoe areko i klip rintet nge patorangomu ma isa wom thomu nge ewomu sengengaere omothonga. Ave aka a mukaling vothung aken i voth avele.

⁹ Na tho ria thomu, toko aka i mothongpot iewo sengenga aka i ngo tomo e toko relnga e avele, na i peange e seng relnga e, toko aken i aom seng.”

¹⁰ Ma Jisas ile wainlangaere o ria Jisas ve, “Aro ve toko ile peangeong i venen aken, aro i sivenga tova toko i peange avele.”

¹¹ Jisas i olal ole riong ve, “Riong ake aro i nine nge toko alavusnga avele, ave ini inga areko God i sungu i a or nge aro i nine nge or.

¹² Na tepun pulua aka toko pelie o peange avele. Pelie o kerenga nge ole popong na o pavurvur nge wain pavelpolnga avele. Na pelie tokokoere o is ole put ma o pavurvur nge wain pavelpolnga mun avele. Na pelie o mothongal peangeong, eneke oleli ve aro o um nge a God ile menong e nepes

* 19:7: Lo 24:1

a Pen a Urvet a umong, ma osivenga o rial ir ve aro o mothong peangeong. Toko aka i pavurvur nge riong ake elnga, aro i el i.”

Jisas i ronga imeni a wainlangare nge ma i nong.

(Mak 10:13-16; Luk 18:15-17)

13 Toko na seng pelie o wol wainlangare a Jisas nge la, ma olemi ve aro i ronga imeni a or nge mo i nong a God nge, nge or. Ave Jisas ile wainlangaere o vol toko na seng areken.

14 Mako Jisas i ria ile wainlangaere ve, “Aro thomu o mothong tova o mit roal wainlangare aka o es a tho nge me, eneke God ile menong e nepes a Pen a Urvet ini tokokoe areko o ranga ve ini wainlangare ole.”

15 Mako Jisas i ronga imeni a wainlanga areken nge. Lamako i losa nge wop aken ma i es.

Kulpo aka ile ur elonga i pompom i ri tomo nge a Jisas.

(Mak 10:17-30; Luk 18:18-30)

16 Mako toko omole aka i es a Jisas nge me, ma i nina i ve, “Pamirealinga, aro tho oma vothung sivenga kathnga mo tho el mimiiong aka aro ile vusonga avele, e?”

17 Ma Jisas i olal i ve, “I vova aka wong nina tho nge vothung sivenga? Toko omole inga aka i sivenga. Aro ve ong sis ve wong el mimiiong aka aro ile vusonga avele, aro wong panes a Moses ile patorong elonga.”

18 Ma toko aken i nin a Jisas ve, “Wong ri nge patorong le vangare?”

Mako Jisas i ria i ve, “Ong mothong tova ong so rin polpol toko, na ong mothong tova ong ngo tomo nge seng aka ini ewom avele, na ong mothong tova ong kem, na ong mothong tova lom apaltet nge toko aka nge riong omanga.[†]

19 Naro lom vothung sivenga nge tomom ome ninom, na om sagu mun thonggomre ranga ve aka om sagu sivengom.”[‡]

20 Mako kulpo aken i olal ile riong ve, “Tho panes patorong alavusnga areken

lale. Na vothung kathnga aka tho oma i rongan?”

21 Mako Jisas i ria i ve, “Aro ve ong sis ve aro wong vengveng selele, aro ong es la, mo ela lom ur elonga areken mo tokokoere o ol ir, mo ela ol umtun aken mo sungu i nge areko ole ur elonga avele. Na aro ve ong oma venen aken, aro lom ur sivesivenga pom ol a Pen a Urvet. Lamo es me mo panes tho.”

22 Ma kulpo aken i nongpola riong aken, ma ilemi kerere rintet, eneke ile ur elonga i pom rintet.

23 Jisas i ria ile wainlangaere ve, “Tho ri nunganga a thomu nge. I klip rintet nge toko le urngare ve aro o eso a God ile menong e nepes a Pen a Urvet.

24 Tho ri werer mun a thomu nge, i klip nge mekerem aolonga aka ini Kamel aka aro i koro a italonga tiona nge, aveto i klip rintet nge toko le urnga aka aro i eso a God ile menong e nepes.”

25 Ma ile wainlangaere o nongpola riong aken ma o kukuk rintet, ma o ria ve, “Aro God i el werer toko kathngare?”

26 Ma Jisas i the a or nge na i ri or ve, “Tokokoere o pavurvur nge ur aken avele, ave a God nge ur kathnga ilemi ve aro i oma i, aro i oma i.”

27 Mako Pita i olal ile riong ve, “Nongpol. Them modopu ur alavusnga na them panes wong. Aro olongemem ur neke?”

28 Mako Jisas i ria or ve, “Tho ri nunganga a thomu nge. Nge nang aka ur alavusnga aro i velpol ponganga, na Toko Pomnga Itun i mena ol a ile nepes a menonga sivesivenga, aro thomu areko o panes tho, aro thomu o mena mun nge nepes a menonga or mule pa omole pothoi or aini, mo thomu o theal Israelre ole netre or mule pa omole pothoi or aini areken.

29 Na toko na seng areko olelio a tho nge na o lo lelpot oa ometa, na ole vel, na otein, na olun, na otema, na onina ome otutunre, mo aro o panes tho, God aro i sungu werer i a or nge pa pulua, naro o el mimiiong aka aro ile vusonga avele.

[†] 19:18: Kisim Bek 20:12-16 [‡] 19:19: Wok Pris 19:18

³⁰ Ave pulua areko ponange oion kima, aro oion kima avele. Na pulua areko ponange oion kima avele, aro oion kima ol.”

20

Riong agelalnga nge umonga areko o um a vain a ometa.

¹ “Ina God ile menong e nepes ako a Pen a Urvet i ranga ve ini vain a ometa tokoninga aka rulpoalal rintet ma i es mo i nina tokokoere nge umong mo aro o um a ile vain a ometa.

² Na umonga areken olemi omoletet tomo nge i ve aro nge nang omole aro i ol or nge denarius* omole omole. Mako i pake or a vain a ometa la.

³ “Lama aua or me o vus na ometa tokoninga aken i es mun ma i thepol tokokoe areko o mit polpol inga e pen aka tokokoere o pathun nge.

⁴ Ma i ri or ve. ‘Thomu mun aro thomu o es mo o um ol a ok vain a ometa, naro tho sungu olongomu aka lemik ve i pavurvur nge umong aka thomu oma i.’

⁵ Mako o es la.

“Penang na penie mun ometa tokoninga aken i es mun la ma i ria vet inga riong omole aken mun e toko pelie aka i thepol or aka o mit polpol.

⁶ Lama nang i men a ile ring lale ma i es mun la ma i thepol mun toko pelie aka o mit. Ma i nina or ve, ‘I vova ake thomu o mit polpol ol inga e pen ake ponange?’

⁷ “Ma o olal ile riong ve, ‘Eneke toko e avele i sungu umong a them nge.’

Ma ometa tokoninga aken i ria or ve, ‘Aro thomu o es mun la mo thomu o um mun a ok vain a ometa.’

⁸ “Ma pemliko me, nako ometa tokoninga aken i ria ile umongare thealnga ve, ‘Wong lenga ol umongare me mo wong sung ol oolonga a or nge. Wong patea i nge areko o velpol a rumongaling nge umong mola patopalal i nge umonga areko o velpol tel a mukaling nge umong.’

⁹ “Mako umonga areko o velpol nge umong nge nang i men a ile ring lale o es me ma i ol or nge denarius omole omole.

¹⁰ Lama a rumongaling umonga areko o patea tel umong o velpol, ma oleli ve, aro o el umtun pomnga nge or, ave o el mun inga denarius omole omole.

¹¹ Ma o el ole umtun aken, ma o patea ol ri pompomong nge ometa tokoninga aken ve,

¹² ‘Them patea umong nge rulpo i mul nge penieonga na them um a nang ile velvelong lemi, ave tokokoe areko o velpol a rumongaling o um inga nge aua omole, na wong sung mun oolonga ranga ve ini olongemem.’

¹³ ‘Ave ometa tokoninga i olal oa omole ile riong ve, ‘Teik, tho oma vothung kerenga e avele a wong nge. A mukaling it paini lemik omole omole e denarius omole.

¹⁴ Ela olongom mo es. Tho sis ve tho sungu tokokoe areko o patea ol umong a rumongaling oolonga aka i ranga ve ini mun i wong.

¹⁵ Na i vava, tho pavurvur avele aka aro tho panes lemik aka nge omaing kathnga aka tho oma i nge sivengk lek umtun? I vova aka opom i ngo kerere e tho, eneke tho panes vothung sivenga nge lek umtun sunga, e?’”

¹⁶ Na Jisas i ri mun ve, “Aro i vene re aka. Areko oion kima avele, aro oion kima ol. Na areko oion kima, aro oion kima avele.”

Jisas i ri pamenga nge ile rinong na ile los wereraing.

(Mak 10:32-34; Luk 18:31-33)

¹⁷ Ma Jisas i es a Jerusalem, na nge ile esong aken i woltetpot ile wainlanga or mule pa omole pothoi or aini a toko alavusnga nge ma i ria or ve,

¹⁸ “Thomu o nongpol. Ponange te es ol a Jerusalem la. Aro o sungu Toko Pomnga Itun a pris kimangare na pamirealingare nge a Moses ile patorong omeni. Aro o pamit i nge riong, na oleli omole omole ve aro o so rin i.

¹⁹ Aro o sungu i nge areko or ini Judare avele omeni mo o ngenge lital i, na o so litlit i lamo o sotuna i a won ngoronga nge, ave nge nang menga aro i los werera.”

* **20:2:** Denarius ini umtun silva aka i pavurvur nge toko omole iolonga nge nang omole.

Jems ome a Jon o sis ve aro o velpol mun ini toko pomnga.

(Mak 10:35-45)

²⁰ Lamako Sebedi itun or aini ako ome onina o es a Jisas nge me. Ma onina i koru ieve a itheki na i sis ve i nin a Jisas nge ur omole.

²¹ Ma Jisas i nina i ve, “Wong sis neke?”

Ma seng aken i olal ile riong ve, “Thosis ve aro wong ria ve nge nang aken ong velpol ini nepes, aro tuk or aini ake aro e i meno a menum sivenga nge anga, na omole a menum kerenga nge anga.”

²² Ma Jisas ria or ve, “Lomumu mire nge ur aka thomu o nin nge avele. Thomu paini o pavurvur aro o thin nge oto aka aro tho thin nge?”

Ma or paini olal ile riong ve, “Them paini them pavurvur.”

²³ Ma Jisas i ria or paini ve, “I nunganga. Thomu paini aro o thin a ok oto nge. Ave ini lek omaing avele aka aro tho ateal areko aro o men a menik sivenga nge anga, na menik kerenga nge anga. Ine menonga areken ini tokokoe areko Vovo i monsi or lale ve aro ini ole.”

²⁴ Ma nge aka Jisas ile wainlanga or mule o nongpolo titeinpel or aini ole ni-nong, na nge ur aken olemi klingtun or paini.

²⁵ Ave Jisas i leng or a i nge, ma i ria or ve, “Lomumu mire aka ve, ine nepesre aka ini areko or ini Judare avele ole, o pannisole tokokoere, na ole mukalingare o engeng rintet ve aro ole tokokoere aro o panes inga ole riong alavusnga.

²⁶ Na vothung aken i mothong tova i voth a thomu nge. Ave toko e a thomu nge aka i sis ve aro i velpol ini toko pomnga, aro i velpol ini toko umonga nge thomu alavusnga.

²⁷ Na toko e a thomu nge aka i sis ve aro ini mukalinga aro i voth ini lomu um polpolonga.

²⁸ I ranga ve mun nge Toko Pomnga Itun aka i esu me ma i sis ve aro tokokoere o opaal i avele, ave ini inga i aka aro i opaal or, naro i sungu isivenga ile mimiong mo aro i ol werer toko na seng.”

Jisas i pasenu werer theki prosnga or aini.

(Mak 10:46-52; Luk 18:35-43)

²⁹ Nge aka Jisas ome ile wainlangaere o espot a Jeriko, toko na seng pulua aka o paneso or la.

³⁰ Ma toko theki prosnga or aini aka omen a sovengalo wo peti, ma or paini o nongpolo aka Jisas i pun sele or la, ma or paini o presa viringa ve, “Toko Pomnga, aka ini a Devit Itevinga, aro lomum esal them paini.”

³¹ Ma toko na seng o nongpolo aka olenga i ma o vol or paini ve aro o poreng. Ave or paini o presa viringa rintet ve, “Toko Pomnga, aka ini a Devit Itevinga, aro lomum esal them paini.”

³² Lamako Jisas i mitu ma i leng or paini ma i ria or ve, “Thomu paini o sis ve aro tho oma neke a thomu paini nge?”

³³ Ma or paini o olal ile riong ve, “Toko Pomnga, them paini them sis ve aro ong pavles werer thekimem.”

³⁴ Ma Jisas ilemi esal rintet or paini, mako i thobiru otheki. Na a ur e avele, nako or paini the werer. Nako o panes ol a Jisas la.

Jisas i velpol a Jerusalem ma i patoral tokokoere

21

(Vonge 21:1-25:46)

Jisas i eso a Jerusalem ranga ve ini nepes.

(Mak 11:1-10; Luk 19:29-38; Jon 12:12-15)

¹ Jisas ome ile wainlangaere o es totho a Jerusalem, ma o velpol a rem a Betpage a tete a Oliv. Ma Jisas i pake ile wainlanga or aini

² ma i ria or paini ve, “Aro thomu paini o esa nge rem aka te totho nge lale. Naro thomu o es inga, na a ur e avele naro thomu paini o thepolo donki sengenga omole aka o pating i, na itun i mit tomo nge i. Aro thomu o tetrispot ir mo o ti ir a tho nge me.

³ Na aro ve toko e i oma riong e a thomu paini nge, aro thomu paini o ria i ve, ‘Toko

Pomnga ile omaing i voth a or paini nge, naro i pake werer or paini viri viri me.”

⁴ Na ur ake i velpol vene re ake mo i pavelpol nunganga ur aka Toko Pomnga ile riong elnga i ri nge ve,

⁵ “Panongpol riong ake a toko na seng Saion angare nge,
‘Thepol, lomu nepes i es me.

I paruru isivenga
na i men a donki ikime nge ome
itun okime
na i es me.”

Aisaia 62:11

⁶ Ma ile wainlangga or aini aken o oma i ranga ve aka Jisas i ria or paini nge.

⁷ Ma o pasong donki aken tomo nge itun aponga me, ma or paini o ronga ole tekruk seltunnga a donki or aini aken okime. Lamako Jisas i mena ol a okime.

⁸ Ma toko na seng pulua aka o ela ole tekruk seltunnga ma o vlesu ir a sovengalo. Na pelie o soro won menini pothoingthoinga ma o paenu i a sovengalo.

⁹ Ma tokokoe areko o es a mukaling na areko o es a rumongaling o presa ve,
“Te risea a Devit itevinga.”

“Sapase toko aken ru i es me
nge a Toko Pomnga iion.”

Buk Song 118:25-26

“Aro te paaolonga a God iion roro.”

¹⁰ Ma nge a Jisas ile velpoling a Jerusalem toko na sengre o kukuk nge onngaing na leng lenging aka o paaolonga Jisas iion nge, ma o nin pel osivenga ve, “Toko ake ini anga?”

¹¹ Ma tokokoe areko o es tomo nge a Jisas o olal ole riong ve, “Ake ini a Jisas, aka ini a God ile riong elnga aka i es a Nasaret aka a epee a Galili me.”

*Jisas i wistetpot tokokoe areko o men thal ole lulu a Lotu Tepun a Vel a lok lemi.
(Mak 11:15-18; Luk 19:45-47)*

¹² Ma Jisas i eso a Lotu Tepun a Vel a lok lemi ma i wistetpot tokokoe areko o men thal ol lulu na i eksingtunu areko ole ring aka o tepolal umtun relnga* nge, na i wathprepa areko o pamen ole pothu olingare ole menonga.

¹³ Ma i ria or ve, “God ile erere i ri ve,

‘Lek vel aro i voth ini nongonga a vel.’

Aisaia 56:7

Ave thomu o oma ol i mo ini toko kemon-gare ole men kineonga.”

¹⁴ Jisas i voth a Lotu Tepun a Vel a lok lemi, na toko eve lilngare na theki prosngare o es a i nge me, ma i pasivenga werer or.

¹⁵ Ma pris kimangare na pamirealin-gare nge a Moses ile patorong o thepol omaing sivesivenga areko i oma i, na o nongpol mun wainlangare aka o presa a Lotu Tepun a Vel ve,

“Te risea a Devit itevinga.”

Mako oopo lemi i kerenga nge a Jisas.

¹⁶ Ma o nina i ve, “Ava wong nongpol avele nge riong aka ru o oma i, eneke aro ve ong nongpol i aro ong mit roal or.”

Ma Jisas i olal ole riong ve, “Tho nongpol i. Na ava thomu o tital a God ile erere avele aka ve,

‘God, ong ateal povothvothre na wainlan-gare

naro o paesa iom roro.’”

Buk Song 8:2

¹⁷ Mako Jisas lo lelpot oa na i espot ol e rem aolonga aken ma i voth a Betani nge pemliknga aken.

*Jisas i vol ine won aka ini pupos makola i menea.
(Mak 11:12-14, 20-24)*

¹⁸ Rulpoalal nge ile es wererong a rem aolonga aken la, ma mesipun rintet i.

¹⁹ Ma i thepol pupos aka i mit a sovengalo wo peti, ma i es totho nge, ave i thepolal imonnga pelie avele nge, ini inga ithoingre. Mako i ria ol won aken ve, “Aro wong mon werer ol avele ol.” Na a ur e avele, nako pupos aken i menea.

²⁰ Ma ile wainlangaere o thepol aken, ma o kukuk rintet, ma o ri ve, “I vava ake won ake i menea viri viri, e?”

²¹ Ma Jisas i olal ole riong ve, “Tho ri nunganga a thomu nge, aro ve lomu lemioong i omole inga na i mothong tova or aini, aro thomu o oma mun omaing ake ru tho oma i nge pupos ake lale. Naro thomu o oma inga ake avele, ave aro ve thomu o ria tete po ake ve, ‘Wong plosa mo

* **21:12:** O ela Romre ole umtun na o tepolal i nge lotu a umtun, aveto pelie ini ole.

ulu sivengom a thev lemi la,’ aro ur aken aro i velpol ranga ve ako thomu o ri nge.

²² Na aro ve lomu lemioong i omole inga na thomu o nong aken, ur alavusnga aka thomu o nong ve aro thomu o el i, aken aro thomu o el i.”

O nin a Jisas ve, anga i sungu engenging aken a i nge.

(Mak 11:27-33; Luk 20:1-8)

²³ Jisas i eso a Lotu Tepun a Vel a lok lemi ma i patoral toko na sengre nge. Ma pris kimangare na Judare oa pompomere o es a i nge me ma o nina i ve, “Anga i ria wong nge omaing aken omanga, e? Na anga i sungu engenging aken a wong nge?”

²⁴ Ma Jisas i olal ole riong ve, “Tho mun aro tho nin thomu nge ninong e. Aro ve thomu o olal vengveng lek ninong ake, naro tho ria mun thomu nge anga aka i sungu engenging a tho nge, nge omaing ake omanga.

²⁵ Na lek ninong i vene: Jon aka i paninu tokokoere na ile omaing aken i es a pen kathnga me? I es a Pen a Urvet me, eve i es inga ake a tokokoere nge me?”

Ma osivenga o leng lengtun pel nge riong aken ve, “Aro ve te ri ve, ‘I es a Pen a Urvet me,’ aro i nina it ve, ‘Na i vava aka lomumuo nge i avele?’

²⁶ Na aro ve te ri ve, ‘Ine ur aka i es a tokokoe inga re nge me,’ aro te ngeip nge tokokoere, eneke or alavusnga olemio nge a Jon aka ve, ini a God ile riong elnga e.”

²⁷ Mako o olal ol inga Jisas ile riong ve, “Lemimem mire nge avele.”

Ma Jisas i ria or ve, “Tho mun aro tho ria thomu avele nge anga aka i sungu engenging nge tho nge omaing areken omanga.”

Riong agelalnga nge wain tomonnga or aini na otema.

²⁸ Na Jisas i ria mun ve, “Na lomumu vava? Toko omole itun tomonnga or aini, ma i es a pomnga nge ma i ria i vene: ‘Tuk, wong es mo um a vain a ometa nge ponange ake.’

²⁹ “Ma itun i ria i ve, ‘Nik plong,’ ave pan tie i eksing ilemi, mako i es e omaing la.

† 21:34: Vain le motuong i pavurvur nge tovu po or lim. ole vothung aka o so rin a God ile riong elngare nomenga.

³⁰ “Ma otema i es mun a itun posnga nge ma i oma mun re aka ini riong omole, ma itun i ria i ve, ‘Enala vovo,’ ave i es la ma i um vet avele.

³¹ “Na nge wainlanga or aini aken oa kathnga i panes otema ile riong?”

Ma o olal ile riong ve, “Itun pomnga.”

Ma Jisas i olal ole riong ve, “Tho ri nunganga a thomu nge. Takis elngare, na seng areko o aom toko, aro o es tel a God ile menong e nepes lemi nge thomu.

³² Eneke Jon i es a thomu nge ma i pathengal vothung vengvenga a thomu nge, na lomumuo a i nge avele, ave takis elngare tomo nge toko aomngare olemio a i nge. Na thomu o thepol ur aken lale, ave thomu o eksing lomu mimiong avele mo lomumuo a i nge avele.”

Riong agelalnga nge toko kerengare aka o theal vain a ometa.

(Mak 12:1-12; Luk 20:9-19)

³³ Jisas i ria mun or ve, “Aro thomu o nongpol riong agelalnga mun e. Toko e aka i oma vain a ometa, ma i av lok. Na a ometa lemi i tou vol mo ve o teplaso vain monnga mo vain ei i lelu nge la, na i pipera ring roro aka aro tokokoere o voth nge na o theal tetal ometa aken. Lamako i sungu ometa aken a tokokoe pelie nge, mo aro o pavelpol umtun nge naro o sungu vain monnga epee a i nge. Mako toko aken i es a rem gatnga la.

³⁴ Lama nge vain le motuong[†] i pake ile um polpolongare ve aro o el ia vain monnga epee aka ini ia.

³⁵ “Ave tokokoe areko o um a vain a ometa aken, o mita ma o rereu or ma o siso omole na o so rin aininga na o molup omole ipunnga nge um.

³⁶ Lama ometa tokoninga i pakepot mun ile umonga relnga pulua ol la, ave vain a umongare[‡] o oma mun inga aka ini vothung omole a or nge.

³⁷ Lamako a rumongaling i pake ol itun a or nge, ma ilemi ve, ‘Aro o nongpol tuk ile riong.’

³⁸ “Ave tokokoe areko o um a ometa aken o thepol itun aka i es me, ma o ria

‡ 21:36: Vain a ometa umongare i patongrum Israelre

osivenga nge ve, ‘Ken thomu, toko ake ini ometa tokoninga itun ol ake. Ita, te so rin i mo te el ol ia ometa ake ini itema imeni po.’

³⁹ Mako o rereu i ma o asespota ometa a lok kime la, mako o so rin i.

⁴⁰ “Na lomumu vava? Panen aro vain a ometa tokoninga i es me, naro vothung le vanga aro i oma i nge toko umonga areken, e?”

⁴¹ Ma Judare oa pompome areken olal ile riong ve, “Aro i pun rin selele toko kerenga areken, naro i sungu ometa aken a toko relnga ol re nge mo aro ve nge vain po ol aro o sungu ol epee aken ini ia.”

⁴² Ma Jisas i ria or ve, “Ava thomu o tital riong epee ake a God ile erere nge ve,

“Ine um ako vel aringare olemi ve,
i kerenga ma o siv lelpot i,
ake kene i velpol ini um a urvet
ako i paengeng vel
ranga ve ini wovek sapatanga.

Toko Pomnga ini ako i oma i
ma them thepol i nge thekimem
ma i sivenga rintet.” *Buk Song*

118:22-23

⁴³ Jisas i ri or ve, “Lamako tho ria thomu, God aro i eltetpot ile menong e nepes a Pen a Urvet a thomu nge naro i sungu i nge tokokoe areko aro o panes ile riong.

⁴⁴ Na toko ake aro ve i mata a um aken nge aro i mout mout, na aro ve um aken i matu a i nge aro i mopipara.”

⁴⁵ Ma pris kimangare na Parisire o nongpol a Jisas ile riong agelalnga aken ma olemi mire ako ve, i ri aken nge or.

⁴⁶ Mako olemi ve aro o rere a Jisas, ave o ngeip nge tokokoere, eneke tokokoere olemi ve, Jisas ini a God ile riong elnga e.

22

Riong agelalnga nge peangeong a aning.
(Luk 14:16-24)

¹ Lama Jisas i oma mun riong agelalnga omole mun a Judare ole mukalingare ve,

² “God ile menong e nepes i ranga ve ini nepes e aka i monsi aning aka nge itun tomonnga ile peangeong.

³ A mukaling tel i pasong ikei a tokokoe areken nge ve, aro o es e aning aken. Lama nge aning aken a nang i velpol ma i pake ol

ile umongare ve aro o ria tokokoe areken mo o es me nge aning, ave o mothongal esong la.

⁴ “Ma i pake mun ile umonga pelie la, na i sungu riong a or nge ve, ‘Thomu o es a tokokoe areko keik song nge or mo o ria or ve, tho monsi aning lale. Tho so rin lek bulmakau tomonmonengaere lale nge aning tomo mun nge lek bulmakau apongare aka oenanga aolonga. Ur alavusnga tho monsi lale. Aro thomu o es ol me nge peangeong a aning.’

⁵ “Ma ile umongare o es la ma o ria tokokoe areken nge ikei aken, ave o nongal riong aken avele na o es petitel, omole i es a ometa, na aininga i um nge ile umtun a umong

⁶ na pelie o rereu umonga areken ma o paomelal or e osisonga lamako o so rin or.

⁷ Mako nepes aken ilemi kling rintet, ma i pake ile toko punongare mo o pun rin tokokoe areko o so rin ile umongare, mako o ongris ole rebo.

⁸ “Ma i ria ile umongare ve, ‘Peangeong a aning tho monsi i lale, ave tokokoe areko tho pres or lale kene o sivenga mos avele.

⁹ Naro thomu o es a so thekiki elonga la, na toko alavusnga aka thomu o thepolo ir nge, aro thomu o ria or mo o es me nge peangeong a aning ake.’

¹⁰ Ma ile umonga areken o es a so thekiki elonga la ma o wol tokokoe areko o thepolo or nge, ma o wol tokokoe sivesivengare na tokokoe kerekengre mun re. Ma o es me nge peangeong a aning ma vel aken i vual rintet e or.

¹¹ “Lama nepes aken i eso a vel lemi la mo i thepol tokokoe areko o es me nge aning, ma i thepol tetalo toko omole aka i teun vet teunong aka o teun i nge peangeong a aning avele.

¹² Ma i ria i ve, ‘Teik, wong teuna vet teunong sivenga e avele, na ong eso a vel lemi me vava?’ Ave toko aken i ri vet avele.

¹³ “Mako nepes aken i ria ile umongare ve, ‘Aro thomu o kina toko ake imeni na ieve na o asespota i a lalanga la nge pen aka ia mideng rintet na o tang na o atitet owo pupo nge.’

¹⁴ “Thomu o nongpol, God i leng toko pulua, ave i ateal inga or posalnga.”

*Aro o sung takis a Sisar nge eve avele?
(Mak 12:13-17; Luk 20:20-26)*

15 Lamako Parisire o espot ma o rirum sovengalo pelie ako aro o patelek a Jisas nge ile riong pelie mo aro o pamita i nge riong e ile olaling aken.

16 Ma o pake ole wainlangal pelie na tomo mun nge toko avlung pelie ako ini a Herot ilengare, ma o es a Jisas nge ma o ria ve, "Pamirealinga, lemem mire ako, wong ini toko ako ong ri nunganga. Na nge riong nunganga inga wong pamireal tokokoere nge a God ile vothung. Na wong ngeip nge toko e avele na nge lom riong elonga ako wong oma i, ini riong omoletet inga nge toko pompomere na posposere.

17 Naro wong ria them. Lomum vava? I sivenga ako aro te ul takis a Sisar nge eve avele?"

18 Ave Jisas ilemi mire nge oleli kerenga aken lale, ma i ria or ve, "Thomu ini pokonongare, i vova ake thomu o sis ve aro o tongporum tho, e?"

19 Aro thomu o pathengal tho nge umtun ako tokokoere o ul i nge ole takis a Sisar nge." Mako o sungu umtun alavatharnga omole a i nge.

20 Ma i nina or ve, "Anga ia sei na iion ake?"

21 Ma olal ile riong ve, "Sisar ile."

Mako Jisas i ria or ve, "Na ur ako ini a Sisar ile, aro thomu o sung werer i a Sisar nge, na ur ako ini a God ile, aro thomu o sung werer mun i a God nge."

22 Ma o nongpol riong aken ma o kukuk rintet. Mako o lo lelpot i ma o es.

Ine Sadiusire o nin a Jisas nge rinong na los wereraing.

(Mak 12:18-27; Luk 20:27-40)

23 Ave nge nang mun re aken Sadiusire o es a Jisas nge me. Or ini tokokoe areko o ri ve, tokokoe areko o rin lale, o pavurvur aro o los werera ol nge rinong avele. Ma o nina i ve,

24 "Pamirealinga, Moses i ri ve, aro ve toko e i rin na itutun vet pelie avele, aro itein posnga i ewoa ia basu mo i pavelpol ol itein pomnga itutunre.

25 Na nomenga titeinpel or limai o voth tomo nge them. Ma oa tengen i peange ma itun pelie rongan na i rin leltun iewo sengenga. Mako itein opisoinga i ewoa ia basu.

26 Ma itein aken itun mun e rongan, nako i rin mun, ma otein menga i ewoa mun i ma i oma mun re inga vene aken makola i pavurvur nge otein limainga ile rinong.

27 Lamako a rumongaling ol seng aken i rin ol.

28 Ako nge los wereraing aro titeinpel or limai aken kathnga aro i el ol seng aken mo ini iewo, e? Eneke or alavusnga o peange nge i lale."

29 Ma Jisas i olal ole riong ve, "Thomu o leklek lale, eneke lomumu mire nge a God ile riong na ile engenging avele.

30 Ako nge los wereraing toko na sengre aro o voth ranga ve ini ensel Pen a Urvet angare na o peange avele.

31 Ako nge los wereraing ava thomu o titil a God ile riong aken i ria thomu nge ve,

32 'Tho ini a Abraham ile God,
na Aisak ile God,
na Jekop ile God.' *Kisim Bek 3:6,15*

Na God ini toko rinongare ole God avele, ini tokokoe areko o mimi ole God."

33 Ma pulua aolonga aken o nongpol aken, ma o kukuk rintet nge ile pamirealing aken.

God ile patorong kathnga aken i mukal?
(Mak 12:28-31)

34 Parisire o nongpol aken Jisas ile riong i oma ol Sadiusire ma ole riong ol e avele, mako Parisire o veliloa pel na o es a i nge la.

35 Ma oa omole ile mire i aolonga rintet nge a Moses ile patorongre, ma i tongporum a Jisas nge ninong omole ve,

36 "Pamirealinga, patorong kathnga aken i aolonga nge patorong alavusnga?"

37 Ma Jisas i olal ile riong ve, " 'Aro om sagu a God aken i Toko Pomnga nge opom alavusnga na onum alavusnga na lomum alavusnga.'*

* **22:37:** Lo 6:5

³⁸ Patorong ake i aolonga na i mukal nge patorong alavusnga.

³⁹ Na aininga aka i aolonga rintet mun kene i vene, ‘Aro om sagu thongongomre ranga ve aka om sagu sivengom.’[†]

⁴⁰ Na Moses ile patorong alavusnga na God ile riong elngare ole patorialing otepun inga nge riong or aini aken.”

Jisas i nin or ve Krais ini anga?
(Mak 12:35-37; Luk 20:41-44)

⁴¹ Rongan Parisire o veliloal pel na Jisas i nina or ve,

⁴² “Na lomumu vava nge toko aka God i ateal i ve aro i el werer ile tokokoere? Na ini anga itevinga?”

Ma o ri ve, “Ini a Devit itevinga.”

⁴³ Ma Jisas i ria or ve, “Na i vova aka Oni Riringa i menpot a Devit iwo ma i apeta toko aken ini ia Pomnga? Eneke Devit i ri ve,

⁴⁴ “God i ria ok Pomnga ve,
“Aro ong menu ake ru a menik sivenga
nge anga,

i pavurvur aka aro tho paesu lom
ngarangre

a som thewo.”’ *Buk Song 110:1*

⁴⁵ Na thomu o thepol i, Devit i apeta toko aken ve ini ia Pomnga, na toko aken ini a Devit itevinga aka aro i rumongal nge i vava?”

⁴⁶ Ma oa toko e avele i olal ol a Jisas ile riong, nako i patea nge nang aken ole mara ma o ngange ol nge a Jisas ininnga.

23

Jisas i panakal tokokoere nge pokonongare ole vothung.

(Mak 12:38-39; Luk 20:45-46)

¹ Lamako Jisas i ria pulua aolonga aken tomo nge ile wainlangaere.

² Ma i ria or ve, “Ine pamirealingare nge a Moses ile patorong na Parisire o pamireal thomu nge a God ile patorong, ranga ve aka Moses i oma i.

³ Aro thomu o nongal na o panes ur alavusnga aka o ri thomu nge ve aro thomu oma i. Ave thomu o mothong tova o oma vothung aka o oma i, eneke o panes ur aka o panongpol thomu nge avele.

⁴ I ranga ve aka o kina elong mathenga ma o paena i a tokokoere okei po, ave o paesa vet omeni pupo e mo o opoal or nge elong areken potunnga avele.

⁵ “Na ur alavusnga aka o oma i, ini magoning a omaing popepenga na o sis ve aro tokokoere aro o thepol i. O pamalmal ole teloong* aka God ile riong pelie o voth a ilemi. Na e mun e oa teunong lollonga areken o oma we ma i lollo rintet nge toko alavusnga.

⁶ Na nge aning aolilongaere o sis menonga areko toko pompomere o men nge, na a Judare ole lotuonga a vel lemire o sis menonga areko toko pompomere o men nge.

⁷ Na o sis rintet aka ve, aro tokokoere o pathokeal or a pathunonga a penre ranga ve aka or ini toko pompomere, na o sis mun ve aro tokokoere o apet or, ‘Pamirealinga’.

⁸ “Aveto tokokoere o mothong tova o apet thomu ve, ‘Pamirealinga’, eneke thomu alavusnga ini titeinpel na lomu Pamirealinga inga omole.

⁹ Na o mothong tova o apet toko e ve, ‘Vovo’, eneke Titomomu inga omole aka i voth a Pen a Urvet.

¹⁰ Na mothong tova tokokoere o apet thomu ini ‘Mukalinga’, eneke lomu Mukalinga inga omole, aka God i ateal i ve aro i el werer ile tokokoere.

¹¹ Na toko inga aka aro ini omu pomnga, aro ini toko aka ini lomu umonga.

¹² Na toko aka i paaolonga isivenga, aken aro God i paruru i, na toko aka i paruru isivenga, aro God i paaolonga i.

Jisas i ria pokonongare nge vothung kerenga aka o oma i.

¹³ “Patong thomu pamirealingare nge a Moses ile patorong na Parisire, thomu ini pokonongare. Aro matheong kerenga aro i velpoltun thomu, eneke thomu o pupal a God ile menong e nepes a tokokoere nge. Sivengomu thomu o koro nge avele, ave nge tokokoere aka o sis ve aro o es nge, thomu o mit roal ole so.

¹⁴ [Patong thomu pamirealingare nge a Moses ile patorong na Parisire, thomu

* 22:39: Wok Pris 19:18 * 23:5: O thepol teloong aka Parisi i kin i a ipowe aka nge pes 99.

ini pokonongare, aro matheong kerenga aro i velpoltun thomu, eneke thomu o kem basbasuere ole ur elonga a ole vel lemi, na thomu o magon nge lomu non-gong lollongare a tokokoere otheki. Nge lomu vothung areken paomelalngomu aro i kerenga selele.]

15 “Patong thomu pamirealingare nge a Moses ile patorong na Parisire, thomu ini pokonongare, aro matheong kerenga aro i velpoltun thomu. Thomu ini tokokoe areko o monu mona a thev ma o es a pen elonga ake ru a ulue nge toko taornga. Na eve omu manath nge toko omole lale, aro thomu o oma ol i mo ile vothung i kerenga selele nge lomu vothung kerenga, aken aro i velpol ini won sesenga lemia ranga ve ini thomu.”

16 “Patong thomu toko theki prosnga ako o sis ve aro o pathengal tokokoere nge sovengalo. Aro matheong kerenga aro i velpoltun thomu, eneke thomu o ri ve, ‘Aro ve toko e i ri ve i panunganga ile riong na i apet Lotu Tepun a Vel iion, aken ini ur tutunnga na ur e avele tova i panes i avele. Aveto aro ve toko e i ri ve i panunganga ile riong na i apet gol aka ru i voth a Lotu Tepun a Vel lemi iion, akennga aro i panes ur aka i ri lale.’

17 Thomu o ri venen aken na thomu ini toko theki prosngare na lomumu pelekpol. Ur kathnga i riri a God itheki nge? Ava gol i riri eve Lotu Tepun a Vel i riri? Aro lomumu mire nge aka ve, gol i voth a God ile Lotu Tepun a Vel lemi make i velpol ini ur riringa.

18 Na thomu o ri mun ve, ‘Aro ve toko e i ri ve i panunganga ile riong na i apet a God ile sungong a lekleka iion, aken ini ur tutunnga na ur e avele tova i panes i avele. Aveto aro ve i panunganga ile riong na i apet sungong aka i voth a God ile sungong a lekleka we iion, aken aro i panes ur aka i ri lale.’

19 Thomu ini toko theki prosngare. Ur kathnga i riri a God itheki nge? Ava sungong i riri eve God ile sungong a lekleka i riri? Aro lomumu mire nge aka ve, sungong i ngo a God ile sungong a lekleka nge make i velpol ini ur riringa.

20 Na aro ve toko e panunganga ile riong na i apet a God ile sungong a lekleka iion, aken i paengeng ile riong nge a God ile sungong a lekleka tomo mun nge ur alavusnga aka ro i ngo a we.

21 Na toko aka i panunganga ile riong na i apet a Lotu Tepun a Vel iion, aken i paengeng ile riong nge Lotu Tepun a Vel tomo mun nge a God, eneke God i voth a ile vel aken lemi.

22 Na toko aka i panunganga ile riong na i apet a Pen a Urvet iion, aken i paengeng ile riong nge a God ile menonga tomo mun nge a God, eneke God aken ro i men nge.

23 “Patong thomu pamirealingare nge a Moses ile patorong na Parisire, thomu ini pokonongare, aro matheong kerenga aro i velpoltun thomu, eneke lomumu pompom nge ur posposengaere, aveto nge ur pompomengaere, kene avele. Ranga ve aka omu aning rongolina alavusnga aka i pota a ometa, thomu o omreu i nge epee or mule, na epee omole thomu o sungpot i a God nge, ave thomu o modop patorong epee aolongaere aka nge toko ile vothung vengvenga, na lemi esaling, na lemioong. Aro thomu o panes areke na o mothong tova lomumu simikal ur posposengaere.

24 Thomu ini toko theki prosnga aka o sis ve aro o pathengal tokokoere nge sovengalo. Thomu o ranga ve ini toko aka i thepol pounun posnga a ia aning ei lemi ma i eltetpot i, ave i thepol mekerem aolonga aka ini kamel aka i voth a ia aning ei lemi avele, makola i thin i ma i ontet selele i.

25 “Patong thomu pamirealingare nge a Moses ile patorong na Parisire, thomu ini pokonongare, aro matheong kerenga aro i velpoltun thomu. Thomu o naktet senu omu thinonga kime na anonga kime nge paut rirpotnga, ave a olemi i vuual nge kemong na sunsesong.

26 Ong Parisi, thekum pros. Aro wong paut rirpot tel thinonga na anonga lemi a mukaling, naro kime anga aro i riri mun.

27 “Patong thomu pamirealingare nge a Moses ile patorong na Parisire, thomu ini pokonongare, aro matheong kerenga aro i velpoltun thomu. Thomu o ranga ve ini vuvepun aka o favorvor i nge

vorvorong velelesnga, ma itheki sivenga rintet, ave a ilemi i vual nge toko rinrinongare opokikin na ur areko i akop rintet.

28 Thomu o venen mun re aken. Tokokore o thepol numu peti ma olemi ve thomu o sivenga, ave a opomu lemi i vual nge le apaltetong na vothung kerengare.

29 "Patong thomu pamirealingare nge a Moses ile patorong na Parisire, thomu ini pokonongare, aro matheong kerenga aro i velpoltun thomu. Thomu o oma vuvepun sivesivenga ako ini a God ile riong elngare nomengangare oa, na thomu o pamalmal senu senu toko vengvengare oa.

30 Na thomu o ri ve, 'Aro ve them voth mun nomenga nge emem tetere, them pavurvur aro them supo tomo nge areko o pun rin a God ile riong elngare avele, ave them voth nge avele.'

31 Na nge lomu riong inga aken, i pathengal iako ve, thomu ini areko o so rin a God ile riong elngare otiteviere.

32 La, thomu o patopalalpot omaing ako omu tetere o patea i nomenga.

33 Thomu ini pilimo kerengare, aro thomu o voth senu ol avele, eneke God i teltun omu lale aka aro thomu o es a pen aka won sesenga i voth nge aka aro ile vusonga avele.

34 "Lamako tho ria thomu. Aro tho pake a God ile riong elngare, na toko powe ninengare na patoralingare a thomu nge. Aro thomu o so rin pelie naro thomu o pamona pelie a won ngoronga nge, naro thomu o so litlit pelie a thomu Judare lomu lotuonga a vel lemire, naro thomu o wistetpot or a lomu rumremre.

35 Na ini thomu ol areko o so rin toko vengvenga alavusnga areko o voth a ulue, naro oa paomelaling aro i esa ol a thomu nge. Lomu vothung aken i patea a Abel nge, makola i mulal nge a Sekaraia aka ini a Berekia itun nge. Ini toko aka thomu o so rin i a Lotu Tepun a Vel na sungong a lekleka oa wop.

36 Na tho ri nunganga a thomu nge, vothung kerenga areken olalnga aro i es a toko na seng areke ru o mimi ponange."

Jisas i ritet nge Jerusalem angare.

(*Luk 13:34-35*)

37 Lama Jisas i ri mun ve, "Jerusalem angare, Jerusalem angare. Thomu o so rin a God ile riong elngare, na thomu o pun rin a God ile tokokoe areko i pake ir a thomu nge me nge anral. Nang pulua aka tho sis ve aro tho veliloalo tutumre, ranga ve ini vareo sengenga aka i veliloalo itutunre a ini giniti thewo, ave thomu o mothongal i.

38 Na tho ria thomu ponange, lomu pen aro i kerenga selele, naro ilemi pro, e avele aro i voth ol nge.

39 Eneke tho ria thomu ve, i pavurvur aro thomu o thepol a ol tho avele i pavurvur aka la thomu o ri ve, 'Sapase toko ake ru i es nge a Toko Pomnga iion me.' †

24

Jisas i ri nge Lotu Tepun a Vel ile kerengang.

(*Mak 13:1-2; Luk 21:5-6*)

1 Jisas i lospot a Lotu Tepun a Vel a lok lemi ma i espot ol la, ma ile wainlangaere o es a i nge ma o sis ve aro o pathengal i nge velre aka a Lotu Tepun a Vel a lok lemi.

2 Ma Jisas i nina or ve, "Thomu o thepol mun ur areke? Tho ri nunganga a thomu nge. Panen um e avele aro i ngo ol a imei venen aken. Ngarangre aro o tevustetu um alavusnga areke thomu o thepol i ponange."

Jisas i ri nge matheong pulua aka aro i velpol.

(*Mak 13:3-13; Luk 21:7-19*)

3 Jisas i es ma i men a tete po a Oliv, na ile wainlanga inga re o es a i nge me ma o nina i ve, "Aro wong ria them nge ur areken aro i velpol penva? Naro paatealing kathnga aro i velpol tel mo lemimem mire aka ve, lom esong me i toth ol na ulue ake aro i vus ol."

4 Mako Jisas i olal ole riong ve, "Aro thomu o naktet thomu. O mothong tova toko e i patelek thomu.

5 Eneke toko pulua aro o es me mo o apeta iok na o ri ve, 'Tho ini toko aka aro

† **23:39:** Buk Song 118:26

tho el werer a God ile tokokoere.’ Naro o patelek toko pulua.

⁶ Aro thomu o nongpol riong nge punpeling ako i toth na punpeling aka ava i voth mela mun, ave o mothong tova thomu o ngange rintet. Ur areken aro o velpol, ave ulue ake ile vusong rongan.

⁷ Na pen epee or pulua aro o pun pel na tokokoere okei rel rel aro o pun pel. Na mesi aolonga aro i voth e pen pulua na wiring mun re.

⁸ Ur areken i ranga ve ini sisisong aka aro i velpol tel a seng nge aka tova i pop.

⁹ “Naro nge nang aken o rere thomu na o sung paomelaling a thomu nge, naro o so rin rin thomu. Na toko alavusnga aro oni silal thomu, eneke lomumuo nge tho.

¹⁰ Naro nge nang aken aro tokokoe pulua aro o lel okime nge tho, naro oni silal pel, na o teltun pel oa a ole ngarangre nge.

¹¹ Naro riong elnga le apaltetongare aro o velpol mo o paleklek toko na seng pulua.

¹² Naro vothung kerenga aro i velpol mo i aolonga, eneke aro toko pulua aro o modop vothung aka nge otiteinre oasagunga.

¹³ Na tokokoe areko o mit engeng mo la i pavurvur nge mimiong ile vusong, God aro i el werer or.

¹⁴ Naro o panongpol Panongpolong Sivenga aka nge a God ile menong e nepes a pen alavusnga aka ru a ulue, mo aro toko na seng alavusnga aro o nongpol i, lamo a rumongaling aro ur alavusnga i vus.”

Ur ako i kerenga rintet aro i velpol.

(Mak 13:14-23; Luk 21:20-24)

¹⁵ Na Jisas i ria mun ve, “Na aro ve thomu o thepol ur tevivinga aka i mita e pen riringa aken ma i paakop i ranga ve aka nomenga God ile riong elnga a Daniel i ri nge lale.”** Na toko aka i tital riong ake, aro ilemi rum mirenga.

¹⁶ “Aro ve thomu o thepol i, aro tokokoe areko o voth a epee a Judia aro o loa a tete pore nge la.

¹⁷ Na toko aka i thau i a ile vel polemi aka i thatha,[†] i mothong tova i ru ol a ile vel lemi la mo i eltetpot ile ur elonga pelie.

¹⁸ Na toko aka i voth a ia ometa i mothong tova i es werer a ile vel mo i ela ia tekruk seltunnga.

¹⁹ Na nge nang aken aro ini matheong aolonga kerenga nge seng areko oopo na o pasusu otutunre.

²⁰ Aro thomu o nong a God nge mo lomu loong aken i mothong tova aro i vengtun theu po eve nge nang rialonga.

²¹ Na matheong aken i voth nge nang aken aro ini matheong aolonga rintet. Na i patea nomenga ma me i mulalu ponange matheong e avele aka i velpol ma i venen aken, na panen mun aro matheong e avele aro i velpol mun mo i vene ake.

²² Na aro ve God i paoror sisisong a nang areken avele, aro toko e avele aro i mimipot. Ave ilemi nge ile tokokoe areko i ateal ir lale, mako i eltetpot nang areken pelie lale.

²³ “Na nge nang aken aro ve toko pelie o ri ve, ‘Thepol. Toko aton ru God i ateal i ve aro i el werer ile tokokoere, kene i ke.’ Eve o ri ve, ‘I ko la.’ O mothong tova lomumu nge ole riong aken.

²⁴ Eneke toko pelie aro o velpol mo o ri ve, or ini toko aton ru God i ateal i mo i el werer ile tokokoere, na o ri mun ve or ini a God ile riong elngare. Aro o oma paatealing aolonga rintetngare pulua aka tokokoere aro o kukuk nge. Aro o oma vene aken mo aro o paleklek toko na seng, na aro ve i pavurvur aro o paleklek mun tokokoe areko God i ateal or ve or ini ile, aro o paleklek mun or, ave i pavurvur avele.

²⁵ “O nongpol. Tho ritet tel a thomu nge, nge ur aka aro i velpol.

²⁶ Na aro ve toko e i ria thomu ve, ‘Thepol i, i kola i voth nge pen polpolnga.’ O mothong tova thomu o es nge la. Eve o ri ve, ‘Thepol i, i ke i men kine nge vel ake.’ Aken o mothong tova lomumuo nge ole riong.

²⁷ Na Toko Pomnga Itun ile velpoling aro i ranga ve ini pen lemnga aka i kit patea a nang le esainga me, mako i es ma i vusu a nang le esuonga la. Aro toko alavusnga aro o thepol i.

* ^{24:15:} Daniel 9:27; 11:31; 12:11 † ^{24:17:} O thepol vel polemi ia sei nge pes 121.

28 Na nge wop ako aning i ngo nge kene visore o rer kalalualtun i.”‡

*Toko Pomnga Itun ile lo wererong.
(Mak 13:24-27; Luk 21:25-28)*

29 Na Jisas i ri mun ve, “Ako nge math-eong a nang areken okime, a ur e avele, “Aro nang ia mideng naro ngov i tou ol avele.

Na sivemitre aro o mopespot a tava nge. Na ur engenga alavusnga ako o voth a tava nge aro o vaikik.’ *Aisaia 13:10; 34:4*

30 “Na nge nang aken aro Toko Pomnga Itun ile paatealing aro i velpol a tava nge, naro toko na seng alavusnga ake ru a ulue aro o tang. Naro o thepol ile ruong a ulue me, tomo nge engengeng aolonga na ile tolilisong.

31 Naro kuth aro i avvuv na ile avvuvong aro i aolonga, naro i pakepot ile enselre a ulue epee alavusnga nge mo o veliloalo ile tokokoe areko i ategal or. Aro o patea a ulue epee mola o mulal a ulue epee mo o el or a i nge me.”

Aro te el pamirealing sivenga nge won aki ini pupos.

(Mak 13:28-31; Luk 21:29-33)

32 Jisas i ria or ve, “Aro thomu o el pamirealing nge won aki ini pupos. Aro ve imeni ponganga i susuppot na ithoing polnga i espot, aken lomumu mire aki nang po aro i velpol re ol aken.

33 Aro i vene re inga nge aki thomu o thepol ur areke ve o velpol ol lale, naro lomumu mire aki ve, ile esong me i toth ol lale, na i ranga ve aki i mit a vel thekia.

34 Na tho ri nunganga a thomu nge, Judare pelie aro rongan o voth, naro ur areke aro i velpol.

35 Aro tava na ulue aro o vus, ave lek riong aro i vus avele.

E avele ilemi mire nge nang na mlik aki aro ur areke aro i velpol.

(Mak 13:32-37; Luk 17:26-27, 34-36)

36 “Ave toko e avele ilemi mire nge nang na mlik aki aro ur areken aro i velpol. Enselre aki o voth a Pen a Urvet olemi

mire nge avele, na Toko Pomnga Itun mun ilemi mire nge avele, ini inga Vovo ienga ilemi mire nge.

37 Na tokokoere ole vothung nge a Toko Pomnga Itun ile velpoling, aro i ranga ve ini tokokoere ole vothung nge wop lemi aki Noa i voth nge.

38 Nge nang aken tokokoere o an, na o thin, na o peange, i pavurvur aki la Noa i koro a imot lemi.

39 Na oleme mire nge ur e avele aki aro i velpol, na thei awonga aolonga aken i velpol ma i pavusu or alavusnga. Na nge Toko Pomnga Itun ile velpoling aro tokokoere ole vothung venen mun re aken.

40 Toko or aini aro o voth a ometa na Toko Pomnga Itun aro i elteta omole na omole aro i voth reletun.

41 Naro seng or aini mun, aro o omoutut wit monnga mo aro i velpol ini plaua, na Toko Pomnga Itun aro i elteta omole na omole aro i voth reletun.

42 “Maken aro thomu o thealal, eneke lomumu mire nge nang aki aro omu Pomnga aro i velpol nge, kene avele.

43 Aro lomumu rum ur ake. Aro ve vel tokoninga ilemi mire nge aua kathnga aki aro kemonga aro i velpol nge, aro i thealal mo kemonga aken i pavurvur aki aro i koro a ile vel lemi avele.

44 Naro thomu mun aro thomu o thealal, eneke Toko Pomnga Itun aro i velpol nge nang aki lomumu ve aro i velpol nge, kene avele.”

Riong agelalnga nge umonga kerenga na umonga sivenga.

(Luk 12:42-46)

45 Ma Jisas i ria mun ve, “Lama umonga kathnga aki ile lemi rumong i sivenga na ilemi ngo senu e ile omaing, e? Ile toko pomnga aro i pamita toko aken mo aro i theal ile umongare alavusnga, naro i sung vengveng oa aning a or nge e aua areko i ategal i.

‡ **24:28:** Epee aki i mirenga ve, tokokoere oleme mire aki visore oa aning i voth, tova ve o thopol visore o rer kalalualtun wop aken, aken ini ole paatealinga. Ranga ve mun i aki aro tokokoere aki oleme mire nge wop aki Toko Pomnga Itun aro i velpol nge, eneke or alavusnga aro o thopol paatealinga nge Toko Pomnga Itun ile velpoling.

⁴⁶ Aro umonga aken ilemi sivenga rintet tova ia pomnga i velpol na i thepol i ako i oma ile umong aken.

⁴⁷ Tho ri nunganga a thomu nge, ia pomnga aro i papomnga i mo aro i theal ile ur elonga alavusnga.

⁴⁸ Ave aro ve toko aken ini umonga kerenga, aro i ria isivenga nge ve, ‘Ok pomnga aro i lo werer viri viri me avele.’

⁴⁹ Naro i patea ithanga umongare osisonga na i an na i thin tomo nge tokokoe areko o thin rinrin.

⁵⁰ Na umonga aken ia pomnga aro i velpol nge nang ako ilemi ve aro i velpol nge, kene avele, na nge wop lemi kathnga ako ilemi mire nge avele.

⁵¹ Naro ia pomnga aro i pakerenga selele i, naro i paespot i mo i el sisong tomo nge tokokoe areko ole apaltet. Na nge pen aken aro o tang na o atitet owo pupo.”

25

Riong agelalnga nge sang ovote or mule.

¹ Jisas i ria mun ve, “God ile menong e nepes aro i ranga ve ini riong ake. Sang ovote or mule ako o ela ole the lalaongare ma o espot ma o men tetal kulpo ako aro i peange.

² Nge sang ovote or mule aken or lim kene oleli aolung na or lim oleli nine.

³ Ma areko ru oleli aolung o ela ole the lalaongare, ave o el vulutal ole the lalainga ei pelie avele.

⁴ Ave sang or lim aka ru oleli nine o el vulutal mun ole the lalainga ei pelie la.

⁵ Ave kene kulpo aken aka aro i peange i palolo, ma sang areken otheki nokolkol ma o nokolkol.

⁶ “Na nge pemlik lopat ol, toko e aka i lengpot ve, ‘Kulpo aka aro i peange i aka i es ol me. It ol la mo te wol i me.’

⁷ “Mako sang ovote areken o vurpolma o pakrika ol ole the lalaongare otonga.

⁸ Lama sang areko ru oleli aolung o ria sang aka ru oleli nine ve, ‘Ken thomu o palelpot lemlem the lalainga ei tie, eneke lemlem the lalaongare o rin rin.’

⁹ “Ave sang areko ru oleli nine o olal ole riong ve, ‘Avele, lemlem the lalainga ei areke i pavurvur inga ake nge them

na thomu aro avele. Aro thomu o es nge tokokoe areko tokokoere o ol the lalainga ei a or nge mo thomu o olpot lomu pelie nge.’

¹⁰ “Mako sang areko oleli aolung o es ol ma o ol ole the lalainga ei. Nako kulpo aka aro i peange aken i velpol, ma sang or lim aka ru o monsi senu senu o eso tomo ol nge i a vel
ako ru o oma peangeong a aning nge. Nako vel thekia i pupal.

¹¹ “Lamako a rumongaling ol sang ovote areken o velpol ol, ma o presa pres ve, ‘Toko pomnga, toko pomnga, theppot vel thekia nge them.’

¹² “Ave peange ponganga aken i olal ole riong ve, ‘Tho ri nunganga a thomu nge, lemlik mire nge thomu avele.’ ”

¹³ Ma Jisas i ria or ve, “Maken aro thomu o thealal, eneke lomumu mire nge nang na aua aka aro Toko Pomnga aro i velpol nge avele.”

Riong agelalnga nge umonga or me aka o el umtun.

(Luk 19:12-27)

¹⁴ Ma Jisas i ria mun or ve, “God ile menong e nepes i ranga ve ini toko aka ilemi ve aro i es nge pen melanga, ma i lenga ile umongare ma i pathealu or nge ile ur elonga.

¹⁵ Ma i sung umtun aken a or nge, i pavurvur nge ole vothung na ole engeng-ing. Nge omole i sungu kina or 5,000, na nge aininga i sungu Kina or 2,000, na nge menga i sungu kina or 1,000. Ma i oma i vene aken ma i vus, lamako i plosa ma i es ol.

¹⁶ Na a ur e avele na toko aken ru i el 5,000 Kina i es ma i patea umong nge 5,000 Kina aken, mako i pavelpol ol 5,000 Kina mun a we.

¹⁷ Na toko aka ru i el 2,000 Kina i um mun nge umtun aken ma i pavelpol ol 2,000 Kina mun a we.

¹⁸ Ave toko aka i el inga 1,000 Kina, i es mala i to vol a ulue ma i parong kine ia pomnga ile umtun aken nge.

¹⁹ “O voth lollonga lamako umonga areken oa pomnga i es werer me, mo i thepolrum ile umongare ole thealing nge ile ur elonga.

²⁰ Ma toko ako ru i sungu 5,000 Kina a i nge kene i velpol ma i es tomo e 10,000 Kina me, na i ri ve, ‘Lom umtun aton aken, na thepol tho um nge lom umtun aken, mako i pavelpol mun 5,000 Kina mun ake a we.’

21 "Mako ia pomnga i ria i ve, 'Wong ini umonga sivenga na lom lemi rumong i sivenga, aro tho papomnga ong nge ur aolongaere thealnga, eneke wong theal senu ur tutunnga. Aro wong es me mo te men senu tomo nge pel.'

22 "Lamako toko umonga ako i sungu 2,000 Kina a i nge kene i velpol ma i estomo e 4,000 Kina me. Na i ria ve, 'Lom umtun aton ake, na thepol, tho um nge lom umtun aken, mako i pavelpol ol 2,000 Kina mun a we.'

23 "Mako ia pomnga i ria mun i ve, 'Wong ini umonga sivenga na lom lemi rumong i sivenga. Aro tho papomnga ong nge ur aolongaere thealnga, eneke wong theal senu ur tutunnga. Aro wong es me mo te men senu tomo nge pel.'

24 "Na toko umonga ako i sungu 1,000 Kina a i nge kene i es me ma i ri ve, 'Toko Pomnga, lemik mire ako wong ini toko ako ong engeng e tokokoere. Wong ini toko ako ong el tomoal ur oinga nge ometaako toko relngare o o i. Na wong lel aning ako ong ul vathar i avele.

25 Mako tho ngeip ma tho rong kine lom umtun aken a ulue lemi. Thepol, lom umtun ol ake.'

26 "Ave ia pomnga i olal ile riong ve,
'Wong ini umonga kerenga na thekum
namal, lomum mire nge ako
tho ini toko aka tho el tomoal oinga aka
tho o i avele, na tho lel aning aka tho ul
vathar i avele.

²⁷ Na i vova ako wong paeno lek umtun
aken a umtun a vel avele, ma nge lek
lo wererong me aro tho elpot lek umtun
aken tomo mun nge pelie ako aro o rongga
i a we?’

28 "Mako aro thomu o eltetpot 1,000 Kina aken a i nge mo o sungu i nge toko ako ile 10,000 Kina.

29 Eneke areko ole ur elonga lale, aro tho sungu mun ur elonga pulua a or nge, naro ole ur elonga i pom rintet. Na aro ve toko

e ile ur elonga avele, na ur posnga ako i el i lale, aken aro tho eltetpot i a i nge.

³⁰ Na umonga kerenga ake aro thomu o ela i mo ultetpot i a pen a midenga nge la. Na nge pen aken aro o tang na o atitet owo pupo.

Olalnga paosalnga.

31 "Nge nang aken Toko Pomnga Itun
aro i lo werer me tomo nge a God ile
engenging na ile tolilisong na ile enselre,
naro i mena a ile nepes a menonga nge
e toko alavusnga avrumnga. Na tolilisong
Pen a Urvet anga aro i voth a i nge.

32 Naro toko na seng alavusnga ake ru a ulue aro o veliloal pel a itheki. Naro i thomreu or nge avlung or aini ranga ve ini sipsip thealnga ako i omreu sipsipre na memere.

³³ Aro i paes sipsipre a imeni sivenga nge anga, na memere a imeni kerenga nge anga.

34 "Naro nepes aken aro i ria areko o
voth a imeni sivenga nge anga ve, 'Thomu
o es me. Thomu areko Vovo a God i oma
senu nge thomu lale, thomu o es me mo
o el meumu a God ile menong e nepes
lewi ako God i monsi i nge thomu ako a
mukaling nge ulue ile velpoling rongan.

35 Eneke nomenga mesipun tho na thomu o sungu aning a tho nge, na thei i pun tho na thomu o sungu thei a tho nge, na tho velpol ini long a thomu nge na thomu o nongpoo tho a lomu vel nge,

36 na ok neong avele na thomu o sungu teunong a tho nge, na nik multhang na thomu o theal tho, na tho voth a mang a midenga na thomu o porumtet tho.'

37 "Na toko vengvenga areken o olal ile riong ve, 'Toko Pomnga, penva ako them thepolo wong ako mesipun ong ma them sungu aning a wong nge, eve them thepol wong ako thei i pun ong na them sungu thei a wong nge?

38 Na penva ako them thepol wong ako wong velpol ini long a them nge ma them nongpoo wong a lemem pen, eve penva ako them thepol wong ako om neong avele ma them panea wong nge teunong?

39 Na penva ako them thepol wong ako num multhang eve wong voth a mang a midenga ma them porumtet wong?’

⁴⁰ “Ma nepes aken aro i olal ole riong ve, ‘Tho ri nunganga a thomu nge, ur alavusnga ako thomu o oma i nge titeik areko oion kima avele, aken thomu o oma i a tho nge.’

⁴¹ “Lama nepes i ria areko o voth a imeni kerenga nge anga ve, ‘Na thomu toko na seng aro thomu o gatpot nge tho mo thomu o esu nge pen aka won sesenga i voth nge aka aro ile vusonga avele, aka o monsi i nge a tamata kerengare oa pomnga ome ithangangaere.

⁴² Eneke nomenga aka mesipun tho na thomu o sungu aning e avele a tho nge, na thei i pun tho na thomu o sungu thei e avele a tho nge,

⁴³ na tho velpol ini long a thomu nge na thomu o nongpoo tho a lomu vel nge avele, na ok neong e avele na thomu o sungu teunong e avele a tho nge, na nik multhang na tho voth a mang a midenga nge na thomu o porumo tho avele.’

⁴⁴ “Na or mun aro o olal ile riong ve, ‘Toko Pomnga, penva aka them thepol wong aka mesipun wong, eve thei i pun wong, eve wong velpol ini long a them nge, eve om neong avele, eve num multhang, eve ong voth a mang a midenga na them opoal vet ong avele, e?’

⁴⁵ “Naro i olal ole riong ve, ‘Tho ri nunganga a thomu nge, ur alavusnga aka thomu o oma i avele nge tokokoe areko oion kima ol avele, ur areken thomu o oma mun i a tho nge avele.’

⁴⁶ “Na tokokoe areken aro o es mo o el paomelaling aka aro ile vusonga avele. Ave toko vengvengare aro o es mo o el mimiong aka i voth opisleonga naro ile vusonga avele.”

Jisas i el sisisong ma i rin lama i los werera mun

26

(Vonge 26:1-28:0)

Mukalingare o kin riong ve aro o pun rin a Jisas.

(Mak 14:1-2; Luk 22:1-2)

¹ Jisas i ria riong areken ma i vus, ma i ria ol ile wainlangaere ve,

² “Lomumu mire aka nang or aini ol inga i voth naro te pelo nge Punseleainga a Aning, na nge nang aken aro o sungu Toko Pomnga Itun a ile ngarangre omeni mo aro o pamona i a won ngoronga nge.”

³ Nge wop lemi aken pris kimangare na Judare oa pompomere o pathun a Prisre oa Pomnga ile vel. Na Prisre oa Pomnga iion a Kaiapas.

⁴ Ma o pathun ma o oma riong ve, aro o oma sovengalo aka aro ole apaltet a Jisas mo o so rin i.

⁵ Ma o ri ve, “Te mothong tova te oma i nge Punseleainga a Aning, ke aro vene mo aro tokokoere o thepol i mo aro o pavelpola punong.”

*Seng omole i taul sanda a Jisas ipounga.
(Mak 14:3-9; Jon 12:1-8)*

⁶ Jisas i voth a Betani a Saimon ile pen aka nomenga putput i voth a i nge.

⁷ Jisas i men ma i an ma seng e aka i es a i nge me, na i el botol a urvet aka sanda aka i olonga i roro rintet i voth nge, na i taul i a Jisas ipounga nge.

⁸ Ma ile wainlangaere o thepol i ma oleli kling rintet, ma o ri ve, “I vova ake i pautet polpol sanda aken, e?”

⁹ Sanda aken i pavurvur aka aro te paes i mo tokokoere o ol i nge umtun aolonga, mo te sungu umtun aken a toko le ur avelengare nge.”

¹⁰ Ma Jisas ilemi mire nge riong areko o oma i, ma i ria or ve, “I vova ake thomu o sungu matheong aken a seng aken nge, e? I oma ur aka i sivenga rintet a tho nge.

¹¹ Evelelnga aro toko le ur avelengare aro o voth tomo nge thomu, ave aro tho voth tomo nge thomu evelelnga avele.

¹² Na seng aken i taul nik peti nge sanda, na nge ile vothung aken i monsi tho nge lek rinong.

¹³ Ponange tho ri nunganga a thomu nge, pen kathnga aka a ulue aka aro o panong-pol Panongpolong Sivenga ake nge, aro o ri mun nge ur ake seng ake i oma i a tho nge, naro oleli rum mun i nge.”

Judas i ri ve aro i sungu a Jisas a ngarangre omeni.

(Mak 14:10-11; Luk 22:3-6)

¹⁴ Lama Jisas ile wainlangga omole nge ile wainlangga or mule pa omole pothoi or aini aken iion a Judas Iskariot, i es a pris kimangare nge.

¹⁵ Ma i nina or ve, “Aro thomu o sungu ur nekenga a tho nge tova tho sungu a Jisas a menumu?” Mako o titalpot umtun alavatharnga or mule pa me ma o sungu i a nge.

¹⁶ Mako i patea nge nang aken lama Judas i kath ol sovengalo kathnga aken aro i sungu a Jisas a omeni.

Jisas i an tomo nge ile wainlanggaere.

(Mak 14:12-21; Luk 22:7-13, 21-23; Jon 13:21-30)

¹⁷ Nge nang mukalinga nge aning aolongga aken Judare o an bret aken yis i votn nge avele, ma Jisas ile wainlanggaere o es a i nge me ma o ria i ve, “Wong sis ve aro them monsi om Punseleainga a Aning e pen kathnga?”

¹⁸ Ma Jisas i ria or ve, “Aro thomu o es a toko aton nge, aken a rem pomnga mo thomu o ria i ve, ‘Ler pamirealinga i ri ve, lek aua i toth me lale. Aro tho tomo nge lek wainlanggaere aro them an Punseleainga a Aning a lom vel.’”

¹⁹ Mako ile wainlanggaere o oma i ranga ve aken Jisas i ria a or nge, ma o monsi Punseleainga a Aning aken.

²⁰ Ma pemlik lale na Jisas i menu ol a aning a ring tomo nge ile wainlangga or mule pa omole pothoi or aini aken.

²¹ O men ma o an, ma i ria or ve, “Tho ri nunganga a thomu nge, thomu ake omu omole aro i teltun tho a ngarangre omeni.”

²² Ma ile wainlanggaere o nongpola riong aken, ma oopo lemi i ngo kerere rintet, mako oa omole omole o nin i ve, “Toko Pomnga, ava ong ri nge tho avele, e?”

²³ Ma Jisas i olal ole riong ve, “Toko aken i paesu ia bret tomo nge tho a oto lemi, toko aken aro i teltun tho a ngarangre omeni.

²⁴ Toko Pomnga Itun aro i rin ranga ve aken God ile erere i ri nge lale, ave aro matheong kerenga aro i velpol nge toko aken i teltun Toko Pomnga Itun a ngarangre

omeni. Aro i sivenga tova ve inina i pop i avele.”

²⁵ Na Judas ini toko aken i teltun a Jisas a ngarangre omeni, i nina Jisas ve, “Pamirealinga, ava ini tho avele, e?”

Ma Jisas i ria i ve, “Enala, ini ong.”

Jisas i sung bret na vain a ile wainlanggaere nge.

(Mak 14:22-25; Luk 22:17-20; 1 Korin 11:23-25)

²⁶ Ma o men na o an, na Jisas i ela bret omole ma i ri sivengaing a God nge ma i inreku i na i sungu i a ile wainlanggaere nge. Na i ria or ve, “Thomu o ela i mo o an i, ake ini sivangek.”

²⁷ Ma i ela thinonga omole aken vain i mon nge, ma i ri sivengaing a God nge, mako i sungu i a or nge. Na i ria ve, “Thomu alavusnga o thin nge.”

²⁸ Ake ini ok mla aken i lelpot nge toko na seng alavusnga mo aro God ilemi simikal ole vothung kerengare. Ok mla ake i paateal a God ile riong kinnga tomo nge ile tokokoere.

²⁹ Na tho ria thomu, aro tho thin werer vain ei avele i mulalu nge nang aken aro tho thin werer mun vain ei ponganga tomo nge thomu a God ile menong e nepes.”

³⁰ Lama o voa voing omole, nako o espot ol a tete po a Oliv la.

Jisas i ri ve Pita aro ikime lelal i.

(Mak 14:27-31; Luk 22:31-34; Jon 13:38)

³¹ Lama Jisas i ria or ve, “Nge pemliknga aken aro thomu o thepol ur areko aro i velpol a tho nge naro thomu o lo nge tho, eneke God ile erere i ri ve, ‘God aro i so rin sipsip thealnga, mako aro sipsipre o petitel.’ Sekaraia 13:7

³² Ave aro tho los werera nge rinong, naro tho mukal tel nge thomu a Galili la.”

³³ Ma Pita i olal ile riong ve, “Aro ve thengengekre o thepol ur aken i velpol a wong nge mo ole lemioong i matu, na o lo vra leltun om, tho aro tho lou om avele.”

³⁴ Ma Jisas i ria Pita ve, “Aro vareo i tang rongan naro wong ria pa or me ve, ‘Lomum mire nge tho avele.’”

³⁵ Ave Pita i olal ile riong ve, “Aro tho ri riong aken avele i pavurvur aro tho

rin tomo nge wong.” Na ile wainlanga alavusngare o oma mun inga ako ini riong omole.

Jisas i nong a Getsemani.
(Mak 14:32-42; Luk 22:40-46)

³⁶ Jisas i es tomo nge ile wainlangaere nge pen ako o apet i ve Getsemani, ma i ria ile wainlangaere ve, “Thomu o men ake na tho espot aka la mo tho nong.”

³⁷ Ma i wola Pita na Sebedi itun or aini ma o es tomo nge i la. Ma ilemi kerere rintet na ile matheong aolonga.

³⁸ Na i ria or ve, “Lemik i mathe rintet, na i pavurvur re aka aro tho rin nge. Thomu o voth ake mo thomu o thealal tomo nge tho.”

³⁹ Ma i espot inga tunti na i ulu isivenga a ulue na itheki ru na i nong ve, “Vovo, tova i pavurvur ve aro ong eltetpot sisong a oto ake a tho nge, aro ong oma i, ave aro ong panes lemik avele, aro ong panes inga lomum.”

⁴⁰ Ma i lo werer a ile wainlanga or me aken nge, ave o nokolkol, ma i ria Pita ve, “I pavurvur avele aka aro thomu o thealal tomo nge tho nge aua omole inga, e?”

⁴¹ Aro thomu o thealal na thomu o nong mo aro thomu o pelo nge tongporumong avele. Lomumu i engeng, ave numu peti i engeng avele.”

⁴² Ma i es mun paininga la ma i nong ve, “Vovo, tova sisong a oto aken i pavurvur aro i avar a tho nge avele, na lomum ve aro tho thin i, aro wong panes inga lomum.”

⁴³ Ma i lo werer mun a ile wainlangaere ma i thepol or aka ru o nokolkol vet inga, eneke otheki i mathe rintet.

⁴⁴ Lamako Jisas i es lelpot mun nge or ma i nong mun pamenga, na i nong inga aka nge nongong omole ranga ve a mukaling i nong tel i lale.

⁴⁵ Lamako Jisas i lo werer a ile wainlangaere nge la ma i ria or ve, “Thomu rongan o nong nong na thomu o thau thomu, e? Thepol, aua i velpola lale aka aro o teltunu Toko Pomnga Itun a tokokoe areko o oma vothung kerenga.

⁴⁶ Thomu o mita, mo te es. Thepol, teltunngeka i toth lale ol.”

O rere a Jisas.

(Mak 14:43-50; Luk 22:47-53; Jon 18:3-11)

⁴⁷ Rongan i ri, na Judas aka ini ile wainlanga omole i velpol. Toko pulua aka o es tomo nge i me, ma o el bainat na tongtong. Ine pris kimangare na Judare oa pompomere o pake toko areken me.

⁴⁸ Na toko aken ru ilemi ve i teltun a Jisas a omeni, i ria or nge paatealing e aka ve, “Thomu o thepol ve toko e aka aro tho angongoal i, i re aken aro thomu o rere i.”

⁴⁹ Ma i es vengveng a Jisas nge la ma i ria i ve, “Pemlik pamirealinga.” Lamako i angongoal i.

⁵⁰ Ma Jisas i ria i ve, “Teik, ur aka ong sis ve aro ong oma i, aro ong oma i viri viri.”

Lamako tokokoere o es me ma o rere a Jisas.

⁵¹ Mako toko omole aka i voth tomo nge a Jisas i turusa ile bainat ma i soropot Prisre oa Pomnga ile um polpolonga itelunga.

⁵² Ma Jisas i ria i ve, “Patus werero lom bainat a imei la, eneke areko o pun nge bainat aro o rin nge bainat.

⁵³ Ava lomum mire avele aka aro ve tho leng a Vovo nge la, a ur e avele aro i pakeu ensel or 1,200 me, mo o opoesal tho.

⁵⁴ Aro tho oma i avele, eneke tova tho oma i, aro riong aka i voth a God ile erere nge aro i velpol nunganga vava?”

⁵⁵ Ma Jisas i ria pulua aolonga aken nge la ve, “Ava tho ini kemonga, make thomu o es tomo nge bainat na tongtong mo thomu o rere tho, e? Nang elonga tho men a Lotu Tepun a Vel a lok lemi ma tho patorial nge, na thomu o rere vet tho avele.

⁵⁶ Ave ur alavusnga ake aro i velpol mo i pavelpol nunganga ur alavusnga aka God ile riong elngare o wat i a ile erere nge lale.”

Lamako ile wainlangaere o es lelpot nge i ma o lo.

Jisas i mit nge riong a mukalingare otheki.

(Mak 14:53-65; Luk 22:67-71; Jon 18:12-13, 19-24)

⁵⁷ Lamako tokokoe areko o rere a Jisas o pasong i a Prisre oa Pomnga a Kaiapas

ile pen la, ako mukalingare na pamireal ingare nge a Moses ile patorong o pathun nge.

⁵⁸ Ma Pita i paneso a Jisas ma i o ieve e or, ma i eso a Prisre oa Pomnga ile vel a lok lemi, ma i men tomo nge Lotu Tepun a Vel a punongare, na i sis ve aro i thepol ur nekenga ako aro o oma i a Jisas nge.

⁵⁹ Na pris kimangare na mukalingare elonga o kath riong le apaltetongaa pelie ako aro o ripot i nge a Jisas ile omaing. Olemi ve aro o thepol a Jisas ile vothung kerenga e ako i pavurvur aka aro o so rin i nge.

⁶⁰ Toko pulua o mita a otheki nge ma ole apaltet nge a Jisas, ave ole riong e avele aka i pavurvur ve aro o pun rin a Jisas nge.

A rumongaling toko or aini o mita ma o ri ve,

⁶¹ “Toko aken i ri ve, ‘Tho pavurvur aka aro tho teu a Lotu Tepun a Vel ake lamo tho ari werera mun i nge nang or me inga.’”

⁶² Ma Prisre oa Pomnga i mita ma i ria Jisas ve, “Aro wong olala kek riong e avele e riong areko ru olemi otun ong nge?”

⁶³ Ave Jisas i ria vet riong e avele.

Ma Prisre oa Pomnga i ria i ve, “Nge a God iion aka i mimi tho nong ong ve, aro ong ria nunganga a them nge ve, wong ini toko aka God i ateal wong ve aro ong el werer ile tokokoere? Na ong ini a God Itun?”

⁶⁴ Ma Jisas i olal ile riong ve, “Enala, i vene re aka ong ri nge, ave tho ria thomu alavusnga, panen aro thomu o thepol Toko Pomnga Itun aka aro i men a God Ako i Engeng e Ur Alavusnga imeni sivenga nge anga.”

⁶⁵ Ma Prisre oa Pomnga i nongpola ile riong aken ma i inrau ile tekruk lollonga aken, na i ria ve, “Ake ini voltetong nge a God. Aro te leng ol toko mun pelie mo o ripot ol ia riong pelie avele. Te nongpol re ake i oma voltetong lale.

⁶⁶ Lomumu ve aro te oma ur neke a i nge?”

Na or alavusnga o olal ile riong ve, “Ile vothung i kerenga rintet, i pavurvur aka aro i rin nge.”

⁶⁷ Lamako pelie o osuklel itheki na o siso i, na pelie o sivlak i

⁶⁸ na o ri ve, “Ong toko aka God i ateal ong, aro ong ate rum vet toko aken ru i so ong kene ini anga?”

*Pita i lela ve ilemi mire nge a Jisas avele.
(Mak 14:66-72; Luk 22:55-62; Jon 18:16-18, 25-27)*

⁶⁹ Pita rongan i men a lalanga aka ru a lok lemi, na Prisre oa Pomnga ile seng umonga omole i es a i nge ma i ria i ve, “Wong mun ake wong voth tomo nge a Jisas aka ini Galili anga.”

⁷⁰ Ave i ngange ma i lela a or alavusnga otheki, ma i ri ve, “Lemik mire nge riong aken ru wong ri nge, kene avele.”

⁷¹ Ma i espot a lok thekia nge ma seng umonga mun e aka i thepol i ma i ria areko ru o mit toth a i nge ve, “Toko ake i mun i voth tomo nge a Jisas aka ini Nasaret anga.”

⁷² Ma Pita i olal mun ile riong ve, “Tho ri engeng a God itheki ve, lemik mire nge toko aken avele.”

⁷³ Ma palolo mun avele, nako tokokoe areko ru o mit totho a i nge, o es a Pita nge me ma o ria i ve, “I nunganga. Wong mun ake ini ithanga, keum mun i ranga ve ini or.”

⁷⁴ Ma Pita i ria viringa ve, “I nunganga ake. Aro ve tho ri nunganga avele, aro God i sungu kerengaing aolonga a tho nge. Lemik mire nge toko aken avele.”

A ur e avele, nako vareo i tang.

⁷⁵ Mako Pita ilemi rum a riong aka Jisas i ria i nge ve, “Aro vareo i tang rongan naro wong ria pa or me ve, ‘Lomum mire nge tho avele.’” Ma i espot ol a lalanga la ma ilemi kerere rintet ma i tang ol.

27

*O paes a Jisas a Pailat nge la.
(Mak 15:1; Luk 23:1; Jon 18:28)*

¹ Rulpoalal pris kimangare na Judare oa pompomere o pango ol riong ve aro o so rin a Jisas.

² Mako o kin i ma o tipot ol i la ma o paes ol i a Pailat imeni aka ini gavana.

*Judas ile rinong.**(Pakeke 1:18-19)*

³ Ma Judas ini toko ako i sungu a Jisas a ngarangre omeni, i thepol ol ako o paes ol a Jisas nge kerengaing aolonga. Lama i eksing ol ilemi ma i el werer umtun alavatharnga or mule pa me areken a pris kimangare na Judare oa pom pomere nge la.

⁴ Ma i ri ve, “Tho oma vothung kerenga lale aka tho teltunu toko aka i oma vothung kerenga e avele a menumu.”

Ave o olal ile riong ve, “Lemem omaing ol e avele nge, aken ini lom omaing ol.”

⁵ Ma Judas i asesu umtun alavatharnga areken a Lotu Tepun a Vel a lok lemi, nako i es ol makola isivenga i mona ol* na i rin.

⁶ Mako pris kimangare o ela ol umtun aken ma o ri ve, “Umtun ake ini umtun aka toko i rin nge, mo i mothong tova i vugiro lotu a umtun. Aro te pango tomo nge i avele.”

⁷ Ma o rirum i ma ole mi omoletet ve aro o ol ulue aka nge toko aka i viv saka, mo wop aken aro i velpol ol ini toko rem gatngare oa vuvepun.

⁸ Mako ulue epee aken o apet ol i ve ini “Mla a Ulue” na ponange rongan o apet ol i vene aken.

⁹ Mako riong e aka God ile riong elnga a Jeremaia i ri nge nomenga, i velpol nunganga aka i ri ve,

“O ela umtun alavatharnga or mule pa me aken.

Ini umtun aka Israelre o atealpot i ve, aro o ol toko aken nge.

¹⁰ Ma o el umtun aken
ma o sungu i a toko aka i viv saka
mo o ol ia ulue nge,
ranga ve aka Toko Pomnga i ria
tho nge.” *Jeremaia 32:6-9*

O nin a Jisas ve, “Wong ini Judare ole nepes?”

(Mak 15:2-5; Luk 23:2-3; Jon 18:33-38)

¹¹ Lama Jisas i mit a gavana itheki, ma Pailat aka ini gavana i nin a Jisas ve, “Wong ini Judare ole nepes?”

Ma i ri ve, “I vene re aka ong ri nge.”

¹² Ave pris kimangare na Judare oa pom pomere o pun i nge riong pulua, ave i olal ole riong e avele.

¹³ Lama Pailat i ria i nge ve, “Ava wong nongpol riong puluanga ake ru o pun ong nge avele?”

¹⁴ Ave i olal a Pailat ile riong omole avele, ma Pailat ilemi pelekpol rintet nge.

Pailat isa wom ve aro o pun rin a Jisas a won ngoronga nge.

(Mak 15:6-15; Luk 23:18-25; Jon 18:39-19:16)

¹⁵ Na tovu po elonga aka nge Punse leainga a Aning gavana ile vothung aka ve, i pavthopot toko omole aka i vot h a mang a midenga aka aro tokokoere osivenga o apetpot iion mo i pavthopot i a or nge la.

¹⁶ Na nge wop lemi aken toko omole aka toko na sengre ole mi mire nge i ve ini toko aka i kerenga rintet i vot h mun a mang a midenga, ma iion a Barabas.

¹⁷ Ma tokokoe pulua or aka ru o pathun, mako Pailat i nina or ve, “Thomu o sis ve, aro tho pavthopot toko kathnga a thomu nge wot, e? Barabas eve Jisas, aka tokokoere o ri ve ini toko aka God i ateal i ve aro i el werer ile tokokoere?”

¹⁸ Pailat i oma riong venen aken, eneke ilemi mire aka ve, oopo i sivenga nge a Jisas avele, ma o pamita i e riong.

¹⁹ Ma rongan Pailat i men a riong nong polnga a menonga na iewo sengenga i pasong ikei a i nge me ve, “Mothong tova oma ur e nge toko vengvenga aken, eneke pemlik tho thepol oni theong aka nge i ma tho el matheong aolonga rintet nge.”

²⁰ Ave pris kimangare na Judare oa pom pomere o ri engeng e tokokoere ve aro o ri engeng nge a Pailat mo i pavthopot a Barabas na i so rin a Jisas.

²¹ Ma Pailat i nin pulua aolonga aken ve, “Thomu o sis ve aro tho pavthopot toko or aini ake kathnga a thomu nge, e?”

Ma tokokoe areken o olal ile riong ve, “Ini a Barabas.”

²² Na Pailat i nina or ve, “Lama thomu o sis ve aro tho oma ur nekenga nge a Jisas, aka o ri ve God i ateal i ve aro i el werer ile tokokoere, e?”

* ^{27:5:} Ava Judas i ulu isivenga a peang nge na i mon nge, eve i lu isivenga nge we na i mon a won nge.

Lama or alavusnga o olal ile riong ve, “Pamona i a won ngoronga nge.”

²³ Ave Pailat i nina or ve, “Na vothung kerenga kathnga aka i oma i, e?”

Ave o presa viringa ve, “Pamona i a won ngoronga nge.”

²⁴ Mala Pailat ilemi mire aka o pavurvur aro o nongal ile riong avele, na pa omole re aka punpelina aolonga aro i velpol. Mako i ela thei ma i papispot imeni a toko na sengre otheki, na i ria or ve, “Lek omaing ol e avele nge toko ake ile rinong. Ini lomu omaing ol.”

²⁵ Ma pulua aolonga aken o olal ile riong ve, “Ile rinong aken, tepun aro i voth a them nge na tutumemre nge.”

²⁶ Mako Pailat i pavthopot ol a Barabas a or nge la, ma i ria punongare ve, aro o so litlit a Jisas, lamo aro o pamona i a won ngorongā nge.

Punongare o ri silil nge a Jisas.

(Mak 15:16-20; Jon 19:1-3)

²⁷ Ma Pailat ile punongare o wolo a Jisas a gavana ile vel la, ma punonga othangan-gaere alavusnga o es me ma o pathun ol a i nge.

²⁸ Mako o eltetpot ia teunong na o paneau ol i nge teunong aka i selele.

²⁹ Ma o ela we wopuponga ma o oma i ranga ve ini nepesre oa vevea ma o paunu ol i nge, na o ela lele omole ma o pamontunu i a imeni sivenga nge ranga ve nepesre o el i. Lamako o koru oeve na o ri silil nge i ve, “Judare ole nepes. Them risea wong.”

³⁰ Ma o osuklel i, na o el lele aka ru a imeni nge ma o so ipounga nge.

³¹ Na o oma vothung alavusnga aka nge ri sililaling a i nge ma vus, mako o teuntetpot neong selelenga a i nge na o pateun werera i nge isivenga ia. Lamako o paes ol i la mo o pamona ol i a won ngorongā nge.

O pamona ol a Jisas a won ngorongā nge.

(Mak 15:22-32; Luk 23:26-43; Jon 19:17-24)

³² Ma o espot ol la ma o thepolo toko Sairini anga aka iion a Saimon, ma punongare o papotunu i nge a Jisas ia won ngorongā.

³³ Makola o velpola nge pen aka o apet i ve ini a “Golgota.” Ioning aken i mirenga ve, toko po a kikil imei.

³⁴ Na nge pen aken o sungu vain a i nge ma vain aken o sul tomo i nge ur aka aro i opoal i nge sisisong. I thin rumo i, ave i vene aka ma i mothonglel ithinnga.

³⁵ Ma o pamona ol a Jisas a won ngorongā nge ma i vus, lamako o asisal nge satu mo aro o omre ia teunong aken a osivenga nge.

³⁶ Lamako o menu ol ma o theal tetal ol a Jisas.

³⁷ Na roro a ipounga o wat riong aka o tel tun ia nge ma o wat i ve,

Ake ini a Jisas aka ini Judare ole nepes

³⁸ Ma o pamona mun toko kemonga or aini a won ngorongā nge. Omole o pamona i a imeni sivenga nge anga, na omole o pamona i a imeni kerenga nge anga.

³⁹ Ma tokokoe areko o es la na o es me o thepolo i na o ri silil i na opo titet.

⁴⁰ Na o ri ve, “Wong ini toko aka aro wong teu Lotu Tepun a Vel ma wong ari werera mun i nge nang or me. Tova ong ini a God Itun, aro ong opoesal sivengom. Aro ong moluspot a won ngorongā nge mo esu me.”

⁴¹ Na pris kimangare na pamirealingare nge a Moses ile patorong na Judare oa pompomere o ri silil mun i.

⁴² Ma o ri ve, “I opoesal toko rel relngare, ave i pavurvur nge isivenga opoesalnga avele. Tova ini Israelre ole nepes, aro i esu vet a won ngorongā nge me, moro aken aro lemiro nge i.

⁴³ Ilemio a God nge na i ri ve, ‘Tho ini a God Itun’, aro ve God ia sagu i, aro i opoal i ponange ake.”

⁴⁴ Na toko kemonga or aini aka o pamona mun or paini tomo nge i, o ria mun ri sililaling a i nge.

Jisas i rin.

(Mak 15:33-41; Luk 23:44-49)

⁴⁵ Nge penang lopat, mideng aolonga i seltun pen alavusnga aka makola i pavurvur nge aua or me.

⁴⁶ Ma pa omole aua or me i vus na Jisas i presa viringa ve, “Eli, Eli lema sabaktani?” Na riong aken mirenga ve, “Lek God, lek God, i vova ake wong lo lelpot tho, e?”[†]

⁴⁷ Ma toko pelie aka ru o mit toth a i nge o nongpol i ma o ri ve, “I pres a God ile riong elnga a Elaija.”

⁴⁸ A ur e avele na oa omole i tho viri viri la, ma i ela ur aka i tum vus thei ma i paesu i a vain le masesnga nge la. Vain i vual ol nge lele ma i somo i a lele ongepo ma i osea i a Jisas nge ve aro i tumo i.

⁴⁹ Ave oa pelie o ria ve, “O mothong tel, na te thepol tel tova aro Elaija i es me mo i opoesal i.”

⁵⁰ Ma Jisas i presa viringa mun ma i rin ol.

⁵¹ Lama vengtun nge ile rinong lavlav epee aolonga aka i mon rupal a Lotu Tepun a Vel lemi i minra, i patea roro makola mulal a thewo ma i or ainiu ol,[‡] ma wiring i velpol, na umre o merekrek.

⁵² Na vuvepunre o thep, na God ile tokokoere or pulua aka o rin nomenga, o mimi werera.

⁵³ Na nge nang aka Jisas i los werera lale ma o lo lelpot vuvepunre na o es a God ile rebo a Jerusalem la, ma toko or pulua o thepol or.

⁵⁴ Ma punongare ole mukalinga na punongare aka o voth tomo nge i mo o theal total a Jisas, o thepol wiring i velpol na ur areko i velpol, ma o ngeip rintet na o ri ve, “I nunganga, ake ini a God Itun.”

⁵⁵ Seng pulua aka o panes a Jisas a Galili me ma o opoal i, o voth mun aka. O mit melapot tie ma o the.

⁵⁶ Ma seng pelie aka ru o voth tomo nge or, ini a Maria Makdala anga na Maria aka ini a Jems ome a Joses onina na Sebedi iewo sengenga.

*O paeno ol a Jisas ini peti a siklep lemi.
(Mak 15:42-47; Luk 23:50-56; Jon 19:38-42)*

[†] 27:46: Buk Song 22:1 [‡] 27:51: Aken i mirenga ve ur e avele i voth aka aro i mit roal tokokoere nge ole esoong a God nge.

⁵⁷ Ma penie sivenga ol na toko le urnga omole aka ile rem a Arimatea iion a Josep i es me, na i mun ini a Jisas ile wainlanga.

⁵⁸ Ma i es a Pailat nge la mo i nina i ve aro i el a Jisas ini peti, ma Pailat i ria punongare ma o elu ini peti ma o sungu i a Josep nge.

⁵⁹ Mako Josep i el ol ini peti ma i auvala i nge seltun riringa aka i veleles.

⁶⁰ Ma i el ol ini peti la ma i paeno ol i a isivenga ia vuvepun aka i topot i ponganga a um nge. Lamako i sing rupu ol vuvepun aken thekia nge um aolonga lamako i es ol.

⁶¹ Na Maria Makdala anga tomo nge a Maria aininga mun o men ma o the a vuvepun la.

Punongare o mitit ma o theal total vuvepun.

⁶² Nang aka o monsi ur alavusnga nge nang rialonga i vus, ma nge nang aininga ol aka nge nang rialonga, pris kimangare na Parisire o es ma o thepol a Pailat.

⁶³ Ma o ria i ve, “Toko pomnga, lemimem rum toko le apaltetonga aken rongan i mimi na i ri ve, ‘Nge nang menga aro tho mimi werera.’

⁶⁴ Aro ong ria mo aro punongare o theal total senu vuvepun aken i pavurvur aka la nge nang or me i vus. Mothong tova ile wainlangaere o es la mo o kempot ini peti. Ke aro vene mo o es la mo o ria tokokoere ve, ‘I mimi werera lale.’ Naro ole le apaltetong aken aro i kerenga selele ol nge ile riong mukalinga.”

⁶⁵ Mako Pailat i ria or ve, “Sivengomu o es la mo thomu o ela punongare mo o theal total ine vuvepun aken. Thomu o es la mo panes sovengalo kathnga aka aro thomu o oma i mo i pavurvur aka aro i paengeng vuvepun thekia.”

⁶⁶ Ma o es ol la ma o pupal rit rit senu senu vuvepun aken thekia ma o rongu mun paatealing a um aken ru o sing rupal vol aken thekia nge, na o pamitu punongare ma o theal total vuvepun aken.

28

Jisas i mimi werera.

(Mak 16:1-8; Luk 24:1-10; Jon 20:1-10)

1 Na nang rialonga i vus, na rulpoalal nge wik aken a nang mukalinga, Maria Makdala anga na Maria aininga mun or paini olemi ve aro o thepol vet vuvepun aken.

2 Na pa omole na wiring aolonga i velpol, eneke Toko Pomnga ile ensel i esu a Pen a Urvet me ma i sing lelpot um aken na i mena ol a we.

3 Na ithepolnga i ranga ve ini pen kitnga na ia neong i veleles ranga ve ini songen.

4 Ma punongare o thepol i ma sawir or na o ngeip rintet, ma o velpol ol ranga ve ini toko rinngare.

5 Ave ensel aken i ria seng aini aken ve, “Thomu paini o mothong tova o ngange. Lemik mire ako thomu paini o kath a Jisas ako o pamona i a won ngoronga nge.

6 I voth ol ake avele, eneke i los werera lale, ranga ve aka i ri nge. Thomu paini o es me mo o thepol imei aka i ngo nge.

7 Naro thomu paini o paviri la mo o ria ile wainlangaere ve, ‘I mimi werera lale na i aka i mukal nge thomu a epee a Galili lale, na aka la aro thomu o thepol i nge.’ Tho es me ponange ake na tho ritet thomu nge.”

8 A ur e avele na seng or aini aken o lospot nge vuvepun aken. O ngeip rintet, ave or paini olemi sivenga rintet mun na o tho la mo o ria ile wainlangaere.

9 Ma o tho, nako pa omole Jisas i velpoltuna or paini, na i ri ve, “Lomu rulpo.” Ma or paini o es a i nge la ma o koru oeve na o krimu i a ieve na o lotual i.

10 Ma Jisas i ria or paini ve, “Mothong tova thomu o ngange. Thomu o es la mo o ria titeikre ve, aro o es a epee a Galili la mo o thepolo tho nge.”

Punongare ole ritetong.

11 Seng or aini aken rongan o es, na punonga areken o eso a rem pomnga la ma o ria pris kimangare nge ur alavusnga areko i velpol.

12 Ma pris kimangare o pathun tomo nge Judare oa pompomere na o rirum i ve aro

o sungu umtun aolonga a punonga areken nge.

13 Na o ria or ve, “Aro thomu o ria tokokoere ve, ‘Ile wainlangaere o es me ma o kem i pemlik aka them nokolkol lale.’

14 Na aro ve gavana i nongpol riong aken, aro them pavengveng riong tomo nge i ve, thomu o oma ur kerenga e avele.”

15 Mako o ela umtun areken ma o panes inga riong aka o ria or ve aro o oma i. Na Judare rongan o pakomkomes riong aken o ri nge, mako la i pavurvur ponange.

Jisas i ria ile wainlangaere nge omaing aka aro o oma i.

(Mak 16:14-18)

16 Ma Jisas ile wainlanga or mule pa omole pothoi omole areken o es a epee a Galili la nge tete po aka Jisas i ria or ve aro o es nge.

17 Ma o thepol i, mako o lotual i, ave oa pelie olemi or aini aini.

18 Ma Jisas i es totho a or nge me, na i ria or ve, “God i sungu engenging Pen a Urvet anga alavusnga na ulue anga a tho nge.

19 Lamo thomu o es mo o panongpol toko na seng a pen alavusnga ake ru a ulue mo o velpol ini lek wainlangaere. Naro thomu o paninu or nge a Vovo iion, na Itun iion, na nge Oni Riringa iion.

20 Naro thomu o pamireal or mo o panes patorong alavusnga aka tho ria thomu nge lale. Na thomu o nongpol, aro tho voth tomo nge thomu evelelnga i pavurvur aka la nge ulue ake ile vusong.”

Na i re aken. I vus.

Panongpolong Sivenga ako Mak i wat i Mak Ritetong nge a Mak

Panongpolong Sivenga ako Mak i wat i, kene i ri papulua nge a Jisas ile pamirealing avele. (Aro o thepol ritetong aka i voth a mukaling a Matiu ile erere nge.) Mak i wat papulua nge a Jisas ile omaing engengare mo aro i pathengal aka ve, God ile engenging i votha i nge, maken i pavurvur aka aro i ol werer it, na i patitepot ler vothung kerenga mo te vthopot nge a God ile paomelaling panen anga. (Aro o thepol a Mak 10:45) Mak i watu mun a Jisas ile riong pulua aka i ri nge matheong aka aro i velpoltun toko lemioongare. Aken ava i mirenga ve, nge wop lemi aka Mak i wat iana, tokokoere o sung matheong a toko lemioongare nge lale, na Mak i palemi rumal or nge a Jisas ile riong nge matheong areken.

Jisas i velpol mo aro i ritet tokokoere nge a God ile menong e nepes ile velpoling

(Vonge 1:1-3:6)

Jon aka ini toko paninuonga i mukal e a Jisas ma i panongpol tel or mo aro o monsi e a Jisas ile velpoling.

(Matiu 3:1-11; Luk 3:2-16; Jon 1:19-28)

¹ Ake ini pateanga nge Panongpolong Sivenga nge a Jisas Krais aka ini a God Itun.

² Nomenga aka God ile riong elnga nomenganga aka iion a Aisaia i wat a God ile riong a erere nge. Ma God i ria Itun ve, "Thopol, aro tho pakepot lek pakeke, mo aro i mukal mo aro i monsi lom esong la." *Malakai 3:1*

³ "Ma ile lenging kene i lenga lengpot aka a pen polpolnga me. Ma i ri vene, 'Thomu o monsi nge a Toko Pomnga ile esong me

na thomu o pavengveng ile sovengalo elonga.'"
Aisaia 40:3

⁴ I pateanga i ranga ve aka Aisaia i wat i nomenaga. Mako Jon aka ini toko paninuonga, i voth a pen polpolnga ma i lengpot nge a God ile riong. Ma i panongpol or vene, "Aro ve thomu o eksing lomu mimiong na o modop lomu vothung kerenga, aro God i patitepot lomu vothung kerengare, mo i sivenga aka aro thomu o es me, mo tho paninu thomu."

⁵ Tokokoere aka ole a epee a Judia na tokokoe mun pulua aka ole a rem pomnaga a Jerusalem, o es ma o nongpol a Jon ile panongpolong. Ma o pamilimlem ole vothung kerengare, ma Jon i paninu or a thei a Jordan.

⁶ Na Jon, ini toko aka i rel, na i ne inga aka ini mekerem aka ini kamel ini thoing na ia let mun aka ini mekerem peti. Na i esu esa inga aka a pen polpolnga, ma ia aning aka ini sis, na i thin inga aka ini sthong ei.

⁷ Na Jon i ria or ve, "Toko aka aro i rumongal nge tho panen, ile engenging kene i mukal nge tho. Na i pavurvur aro tho es totho a ilo sei mo tho inospot ile esonga a we, kene avele.

⁸ Tho paninu thomu nge thei, aveto toko aka aro i rumongal ol nge tho, aro i paninu thomu nge a God Ioni Riringa."

*Jon i paninu a Jisas.
(Matiu 3:13-17; Luk 3:21-22)*

⁹ Lama ina Jisas i plosa a Nasaret e epee aka a Galili, ma i es a Jon nge me. Ma Jon i paninu i nge thei a thei a Jordan.

¹⁰ Jon i paninu i ma vus, lama Jisas i plosteta a thei lemi, ma ipo watha a sepsa ma i thopol aka Pen a Urvet i thep. Ma God Ioni Riringa i esu a Jisas nge me, ma i thopol i ma i ranga ve ini pothu.

¹¹ Na God ile lenging i espot a Pen a Urvet lemi me, ma i ri ve, "Wong ini tuk aka ok sagu rintet wong, na lelik sivenga rintet nge wong."

*Satan i tongporum a Jisas.
(Matiu 4:1-11; Luk 4:1-13)*

¹² Na a ur e avele na Oni Riringa i pakepot a Jisas a pen polpolnga la.

¹³ Ma Jisas i voth a pen polpolnga aken nge nang mule pa penel, ma Satan i tongporum i nge. Na wop aken kene ini mekerem wengare ole vothinga, ave God ile enselre o theal i.

Jisas i patea ile omaing.

(Matiu 4:12-17; Luk 4:13-15)

¹⁴ Na nge wop lemi ako o paeso a Jon a mang a midenga lemi. Ma Jisas i velpol a epee a Galili ma i panongpol nge a God ile Panongpolong Sivenga.

¹⁵ I ria or vene, "Thomu o eksing na o modop lomu vothung kerengare, eneke i toth lale aka aro God ile menong e nepes aro i velpol a it nge, na lomumuo nge Panongpolong Sivenga ake."

Jisas i lenga toko or penel mo o panes i.

(Matiu 4:18-22; Luk 5:2-11; Jon 1:35-42)

¹⁶ Na Jisas kene i es a thei a pamonlel a Galili wopo ma i thopol a Saimon ome itein a Andru, na or paini o men a oa wok nge, ma o rongu oa susua, eneke ake ini or paini ole omaing, aka o el umtun nge.

¹⁷ Na Jisas i leng or paini ma i ria or ve, "Thomu paini o es me mo o panes tho. Aro tho patoral thomu paini nge toko na sangre oelinga."

¹⁸ Na a ur e avele na or paini o modip-dopu oa susuare na o panes ol a Jisas.

¹⁹ Lama o espot mun lollo avele, na o sangpolo mun titein pel aini aka ini a Jems na Jon, aka ini a Sebedi itutunre. O men a oa wok lemi ma o monsi oa susua.

²⁰ Jisas i thopol or paini ma i lenga or, mako or paini o los lelpot otema a Sebedi tomo nge ile toko umongare aka o voth a oa wok lemi, ma or paini o panes mun a Jisas.

Jisas i wistetpot tamata kerenga.

(Luk 4:31-37)

²¹ Na o es a Kaperneam. Na nge nang rialonga Jisas i eso a Judare ole lotuonga a vel lemi ma i patea opamirealnga.

²² Na o nongpol ile riong avera ma o kukuk nge, eneke ile riong i engeng ma i rel nge tokokoe areko o panongpol nge a Moses ile patorong.

²³ Na a ur e avele na toko omole aka tamata kerenga i voth a i nge, i mita ma i pres a Jisas viringa.

²⁴ Ma i ria i ve, "Wong ake ini a Jisas aka lom a Nasaret. Wong es ake me mo ong oma neke e them, wong es re ake me mo wong ri ve wong pakerenga them, e? Lemik mire nge wong. Wong ini toko riringa aka ong esu a God nge me."

²⁵ Lamako Jisas i prestun tamata kerenga aken ve, "Wong poreng, na lopot a toko aken nge."

²⁶ Na a ur e avele nako tamata kerenga aken ru i voth a toko aken nge, sawirwir i ma i wal kerere, mako i lo lelpot sele i.

²⁷ Toko na sangre kene or alavusnga o kukuk nge, ma o ri ve, "O ken, ur ake i rel." Ma osivenga o nin ol pel nge ma o ria ve, "Ur ake kene i vava? Ake ranga ve ini patoraling ponganga, e? Toko ake ile riong i engeng rintet, i pavurvur aka aro i wistetpot tamata kerengare, nako o nongal i."

²⁸ Lamako Jisas iion i kima ol a pen elonga aka a Galili, nge ile omaing aken.

Jisas i pamimi a Saimon iwenga.

(Matiu 8:14-15; Luk 4:38-39)

²⁹ Lama Jisas ome ile toko or penel o korpot a lotuonga a vel aken lemi, ma o es aka a Saimon ome a Andru ole vel. Ma Jems ome a Jon o es tomo e or.

³⁰ Na Saimon iwenga ini multhang, ini peti i velvel rintet, ma i ngo vet inga aka a ring. Ma Jisas i velpol, ma o ria i nge a Saimon iwenga aka ini multhang.

³¹ Ma Jisas i es a i nge, ma i krima imeni lamako i pamita i. A ur e avele, nako ini multhanga aken i vus, mako i monsi ol oa aning.

Jisas i pamimi toko pulua.

(Matiu 8:16-17; Luk 4:40-41)

³² Ma nang i sivluk na pen aivuvu ol, ma tokokoere o pasong ol ni multhangingare a Jisas nge me, ma o pasong tomo mun tokokoe areko tamata kerengare o voth a or nge.

³³ Na tokokoere aka o voth a rem pomonga, o vus me ma o men a vel thekia.

³⁴ Mako Jisas i pamimi toko na seng pulua aka ni multhanging rel relnga i el or, na i ria tamata kerengare mo o poreng lamako i wistetpot or, na Jisas mit roal or

mo o mothong leng lenging, eneke olemi mire ako ve, ini ao.

*Jisas i nong a God nge na i panongpol tokokoere a rumrem.
(Luk 4:42-43)*

³⁵ Lama rulpotetu inga, nako Jisas i opatalalo a pen epee ako toko e avele i voth nge. I es ma i voth nge, ma i nong a God nge.

³⁶ I nong, na Saimon rea o es ma o ortet i.

³⁷ Mako o thopol i, ma o ria i ve, "Toko alavusnga or aka o ortet wong."

³⁸ Jisas i olal ole riong ve, "Avele, te es ol inga nge rem relnga pelie aka i toth, mo tho panongpol nge, eneke ake ini lek omaing aka aro tho oma i."

³⁹ Lama i eso a wop elonga aka a epee a Galili, ma i wistetpot tamata kerengare na i eso mun a Judare ole lotuonga a velre aka a rumrem, mako i panongpol nge.

*Jisas i pamimi toko ni akolikloknga.
(Matiu 8:2-4; Luk 5:12-14)*

⁴⁰ Na ine toko omole aka ini peti a putput, i es a Jisas nge ma i koru ieve ma ipo tiru a i nge, ma i nong a i nge, ma i ria i ve, "Ong pavurvur aka aro wong paonolpot tho mo tho riri a God itheki, tova lomum ve aro ong oma i."

⁴¹ Jisas kene ilemi esal rintet i, ma i montuna ini peti na i ria ve, "lemik ve aro tho oma i, aro ong riri werer."

⁴² Lama a ur e avele nako ini a putput i vus. Na ini peti elonga i riritet werer.

⁴³ Lama Jisas i pator engeng toko aken e riong,

⁴⁴ ma i ria i ve, "Nik plong ve wong ria toko e nge, aveto aro wong es alpo a prisre aka o oma sungong a God nge mo wong pathengal num peti a or nge. Na sung sungong, aka ranga ve Moses ile patorong i ri nge, eneke wong onol werer lale, maken aro toko na seng alavusnga aro o thopol i mo olemi mire nge aka ve, num akolikloknga i vus." Mako i pake ol i la.

⁴⁵ Aveto toko aken i nong sirik ma i panongpol toko na sengre nge. Ma toko na sengre o nongpol i ma i pavurvur aro Jisas i es ol a rem pomnga avele ol, eneke aro

toko na sengre o vustuno i, mako i voth ol inga a pen polpolnga, aveto toko pelie aka a rem alavusnga o es ol a i nge la.

2

Jisas i pamimia toko omole aka ini peti elonga i motungtung.

(Matiu 9:2-8; Luk 5:18-26)

¹ Lama nang pelie i lutetu, lama Jisas i lo werer aka la a rem a Kaperneam. Lama toko na sengre o nongpol aka Jisas i lo werer a ile vulonga.

² Na or vusnga kene o velilo pel nge vel aken. O men velilo pel a vel aken lemi ma vel aken kene i vual, ma i alpopot a vel thekia na wop ol e avele aka aro o es ol nge, lamako Jisas i panongpol or nge a God ile riong.

³ Lama toko pelie aka o pasong ni multhanginga aka a Jisas nge la. Na toko aken, ini peti elonga i motungtung, i es ol avele, ma i ngo vet inga a ring, na toko or penel kene o potun tomo i nge ile ngosel.

⁴ Na vel i vual rintet nge toko na sengre, ma wop e avele aka aro o paeso toko aken a Jisas nge la. Ma o sorau vel powe roro e wop aka ru Jisas i voth vengtun nge, ma o patio we a ni peti motungtunga ile ngosel ma o pamonlolol u ruru a Jisas nge la.

⁵ Na Jisas i thopol ole lemioong, ma i ria ni peti motungtunga aken ve, "Tuk, God ilemi simikal lom vothung kerengare lale."

⁶ Na toko pamirealinga pelie nge a Moses ile patorong or mun aka ru o men, na a or nge kene, olemi vene,

⁷ "I vova ake i oma riong venen aken, e? Aken i voltet a God. Toko e i pavurvur avele, God inga i pavurvur aka aro i patitepot toko ile vothung kerenga."

⁸ Na Jisas ilemi mire nge olemi, ma i nina or ve, "I vova ake lomumu i venen aken, e?" Ma i ria mun or ve,

⁹ "Riong kathnga i semel aka aro tho ria i a ni peti motungtunga ake nge, e? I klip avele aka aro tho ria toko e ve, 'God ilemi simikal lom vothung kerengare lale.' Eneke thomu o pavurvur aro o thopol lek riong potoi avele. Aveto i klip nge aka aro tho ria toko e ve, 'Plosa mo ela lom ngosel

mo wong es.' Eneke thomu o pavurvur aka aro o thopol lek riong potoi.

¹⁰ Maken aro tho ri riong klipnga aken, eneke tho sis ve aro lomumu mire aka ve, Toko Pomnga Itun ile engenging ake ru a ulue i voth, na i pavurvur nge toko na sengre ole vothung kerengare patitepotnga."

¹¹ Mako i ria ni multhanginga aken ve, "Tho ria wong, ong mita, mo ela lom ngosel, mo wong es a lom vel."

¹² A ur e avele nako toko aken i mita, ma i ela ile ngosel, ma i es ol. Ma or vusnga o thopol i, ma o kukuk. Na or alavusnga o risea a God nge. Ma o ria ve, "Nomenga aka me i pavurvur ponange ake, te thopol ur e avele i vene ake."

Jisas i leng a Livai, na i oma riong agelalnga aka i ranga ve ini vuralinga.

(Matiu 9:9-13; Luk 5:27-32)

¹³ Na Jisas i lo werer mun a thei a pamonlel a Galili, na toko na sengre pom aka o velpoltun mun i, ma i patorial or.

¹⁴ Na i es la, ma i thopol a Livai* aka ini a Alpius itun, i menen a takis ulnga a vel. Ma i ria i ve, "Aro wong panes tho." Na a ur e avele, nako toko aken i mita, ma i panes ol a Jisas.

¹⁵ Lama Jisas ome ile wainlangaere o es a Livai ile vel. Na toko pulua mun o panes i lamako o meno a Livai ile vel, ma o an tomo e takis elngare na toko le vothung kerenga mun pelie.

¹⁶ Na Parisire, na toko pamirealingare nge a Moses ile patorong, o thopol a Jisas aka i men, ma i an tomo e takis elngare na toko le vothung kerengare. Ma o nin a Jisas ile wainlangaere ve, "I vova ake Jisas i an tomo e takis elngare na toko mun pelie aka or alavusnga ole vothung kerenga, e?"

¹⁷ Ma Jisas i nongpol i, ma i ria or ve, "Areko olemi ve o sivenga aro o es a vuralinga nge avele, ini inga areko oni multhang aka aro o es a i nge. Tho velpol ake ve aro tho leng inga areko ole vothung i vengveng, kene avele. Tho velpol ake aro tho leng inga toko na sengre aka ole vothung kerenga, mo aro o eksing ole mimiong."

Jisas i ranga ve ini toko aka i peange ponganga.

(Matiu 9:14-15; Luk 5:33-35)

¹⁸ Na nge nang omole aka ina Jon aka ini toko paninuonga ile wainlangaere, ome Parisire, o sem. Na toko pelie o nin a Jisas ve, "Ake ini a Jon ile wainlangaere na ine Parisire mun, o sem, ake vene na o panes ake ini pompomere ole vothung. Na i vova ake lom wainlangaere o sem avele, e?"

¹⁹ Ma Jisas i olal ole riong e riong agelalnga ve, "Aro ve toko na sengre o es nge sungaling a aning, aro o an eve o sem? Avele, i pavurvur aro o sem avele. Aro ve toko peange ponganga i voth tomo e or, aro o an inga naro o sem avele.

²⁰ Na nge nang e aka panen aro o eltet-pot peange ponganga aken a or nge. Aro nge nang aken, aro o sem, eneke olemi kene i kerere."

Jisas i patorial or nge aka ile pamirealing ponganga i pavurvur aro i es tomo nge patorialing neginga avele.

(Matiu 9:16-17; Luk 5:36-38)

²¹ Lama i patongrum mun i a or nge, e riong agelalnga ve, "Aro ve lavlav omole aka i negi naro i minra, mothong tova italalo tomo i nge lavlav epee ponganga aka i wolo rongan, aro vene mo i monteto mun lavlav neginga aken mo i minra rintet.

²² Na toko e i mothong tova aro i save vain ponganga nge thei pokin aka ini mekerem peti neginga, eneke i pavurvur aro i lowimpot avele. Aro vene mo aro vain i lothunpot mo aro thei pokin aken ru vain i voth nge, aro i vupol mo vain i lel pautet. Naro or paini o kerenga. Aveto i sivenga aka aro i save vain ponganga nge thei pokin ponganga aka aro or alaini aro o sivenga."

Jisas ile pamirealing nge nang rialonga aka aro i pavurvur toko aro i el opoesaling nge.

(Matiu 12:1-8; Luk 6:1-5)

²³ Nge nang rialonga omole aka Jisas ome ile wainlangaere, o es a ometa lemi. Na ile wainlangaere o avtha ole sovengalo na o surpot wit monnga, na o eses, ma o an rum so i.

* **2:14:** Livai iion aininga ini a Matiu

²⁴ Lama Parisi pelie o ria Jisas ve, “Wong thopol vet lom wainlangaaere, o vova ake o avsa a Moses ile patorong nge nang rialonga, e?”

²⁵ Lama Jisas i ria or ve, “Thomu o tital tenesing a God ile erere lale, nge ur ako ler nepes a Devit i oma i nomenga, aveto ava lomumu mire senu nge avele. Nge wop lemi aken Devit ome ile tokokoere mesipun or, eneke oa aning avele.”

²⁶ Lama o velpol a Lotu Tepun a Vel, nge wop lemi aka Abiatar i voth ini prisre oa pomnga. Ma Devit i eso nge, ma i an bret aka ini sungong aka a God nge. Na bret aken kene i riri rintet na o pavothal nge na ini inga prisre oenga o anan i. Aveto Prisre oa Pomnga aken i sungu i a Devit nge, ma i an i, ma i sungu mun pelie a ile tokokoere nge, ma or alavusnga o an i. Na God i paomelal vet or avele.”

²⁷ Lama Jisas i ria Parisire ve, “God i pamien it ve aro te opoesal nang rialonga avele, aveto i pamien nang rialonga ake ve aro i opoesal inga it.

²⁸ Mako Toko Pomnga Itun, ini mukalinga mun nge nang rialonga.”

3

Jisas i pamimi toko omole aka imeni morungrung nge nang rialonga.

(Matiu 12:9-14; Luk 6:6-11)

¹ Jisas i eso mun a Judare ole lotuonga a vel lemi, ma i thepol toko omole aka imeni morungrung, imeni morungrung ma i omkolo.

² Na Parisi pelie aka o voth mun, oa pun aka ve, o thopol senu a Jisas, aro i naktet werer toko aken imeni nge nang rialonga eve aro avele. Aro ve Jisas i pamimi toko aken nge nang rialonga, aro o teltun ia.

³ Lamako Jisas i ria toko meni morungrunga ve, “Espot me mo mitpot a mukaling ake.”

⁴ Lamako i nina or ve, “Nge ler patorong aro te oma vava nge nang rialonga, e? Aro te pamimi nge, eve aro te pun rin nge?” Aveto o men porengreng ol inga, na o ria ol avele.

⁵ Na Jisas i theu thea ma ilemi kling rintet nge or. Ilemi kerere rintet, eneke

olemi mire nge lemi esaling avele. Na Jisas i ria toko meni morungrunga aken ve, “Menum vengvengpot mo menum savelvelu.” A ur e avele, nako imeni savelvela ol, na imeni morungrunga aken i sivenga werer mun.

⁶ A ur e avele na Parisire o mita, lama o es. O es ma o men tomo nge a Herot ithangangaere, or alavusnga o rirum nge sovengalo aka aro o so rin a Jisas nge.

Jisas i pangopat ile engenging, ave ile pen lemiare ole mio nge i avele

(Vonge 3:7-6:6)

Toko pulua o mumrongtun a Jisas.

(Matiu 12:15-16; Luk 6:17-19)

⁷ Jisas ome ile wainlangaaere o es werer a thei a pamonlel a Galili ma pulua pomnga o paneso ir, pelie ole a epee a Judia, na pelie ole a Galili,

⁸ na pelie a Jerusalem, na pelie mun ole a epee a Idumea, na pelie ole a epee aka a thei a Jordan, pelie mun aka ole rem or aini aka a Tair ome a Saidon. Toko na seng pulua o panes a Jisas, eneke o nongpol nge pathepolong areko Jisas i oma i.

⁹ Aveto Jisas i ria ile wainlangaaere ve, “Tho sis wok e. Na aro ve toko na sengre o pasipsopal tho, aro tho roa nge.”

¹⁰ Eneke Jisas nomenga, i pamimi ni multhanginga pulua, na ni multhanginga mun pelie o engeng ve aro o krim a i nge.

¹¹ Na aro ve tamata kerengare o thepol a Jisas, ma o koru oeve na o ria i ve, “Wong ake ini a God Itun.”

¹² Aveto Jisas i pator engeng or ve, o mothong tova o pamilem aka ini ao.

Jisas i therum ile wainlanga or mule pa omole pothoi or aini.

(Matiu 10:2-4; Luk 6:14-16; Pakeke 1:13)

¹³ Jisas ome ile wainlangaaere o esa e tete omole, mo i therum pelie a or nge.

¹⁴ Ma i therumpot mule pa omole pothoi or aini aka a or nge mo aro o voth tomo nge i, naro i pake or nge panongpolong.

¹⁵ Naro i sungu engenging a or nge, i pavurvur aka aro o wistetpot tamata kerengare.

16 Na or re ake ini toko mule pa omole pothoi or aini ma oion vene: I eksing a Saimon iion ve ini ol i a Pita.

17 Na Sebedi itun aini, Jems ome a Jon, Jisas i apetpot or paini oion ponganga Boanerges, or paini oion mirenga aken ve or ini toko multhanga ranga ve ini sepsa ile akrungong.

18 Lamako Jisas i apetpot mun toko or limpenel aka ini a Andru, na Pilip, na Bartolomiu, na Matiu, na Tomas, na Jems aka ini a Alpius itun, na Tadius, na Saimon aka i voth a toko avlung aka o apet i ve ini Selot.*

19 ome a Judas Iskariot aka aro panen i eksingu ilemi mo i sungpot a Jisas a ngarangre omeni.

*Pelie kene o ri ve Satan i opoesal a Jisas.
(Matiu 12:25-29; Luk 11:17-22)*

20 Lamako Jisas i es a rebo ma i eso a vel omole lemi ome ile wainlangaere, na o an vet avele, eneke toko na sengre pom aka o mit kalual or.

21 Lama Jisas ilengare o nongpol mun aka Jisas i velpol mun lale. Ma o es a i nge, eneke o rivenga sapang ngongong i mo o rere i.

22 Na toko pamirealingare nge a Moses ile patorong, o plosa a Jerusalem ma o es mun a i nge, ma o ri ve, "Ina Satan aka o apet i ve ini a Belsebul i rero a Jisas." Ma ole riong omole mun vene, "I wistepot mun tamata kerengare, nge tamata kerengare ole mukalinga ile engenging."

23 Lama Jisas i leng or a i nge me ma i patongrum i a or nge vene, "I vava, Satan i pavurvur aka aro i wistepot mun a Satan, e? Avele, i pavurvur avele.

24 Aro ve rem omole aka o omreu pel mo o or ainiu mo o pun werer mun pel, vene aken aro rem aken i vus.

25 Na ranga ve ini mun i net omole aka aro o pun werer mun pel osivenga, aro net aken aro o vus.

26 Na aro ve Satan ilengare o pun werer mun pel osivenga, aro o engeng ol avele, aro or alavusnga o vustetu.

* **3:18:** Selot i mirenga aka ve, i voth e toko avlung aka o sis ve aro o pun tomo nge Romre ole gavman mo osivenga o theal ol or

27 Na aro ve toko e i koro a toko engenga e ile vel lemi, aro i kin tel i lamoko aro i kem ol ile ur elonga."

28 Lama Jisas i ria mun or ve, "O nongpol senu, God i pavurvur aka aro i patitepot toko na seng ole vothung kerengare, na ole voltetong nge tokokoere.

29 Aveto aro ve toko e i voltet nge Oni Riringa ile omaing, i pavurvur aro God ilemi simikal ile vothung kerengare aken avele. Ile vothung aken aro i ngo reletun ol."

30 Jisas i ri vene re aken, eneke ilemi rum riong aka o valel i nge aka o ri ve tamata kerengare i rero i.

Ina Jisas inina ome ititeinre o es a i nge la.

(Matiu 12:46-50; Luk 8:19-21)

31 Lamako Jisas inina ome ititeinre o velpol a i nge ma o mit inga a vel thekia, okei song nge i ve aro i espot tel a or nge me.

32 Toko na seng avlung aolonga o mit kalual a Jisas, ma o ria i ve, "Ninom ome titeumre or aka o mit tetal ong a lalanga."

33 Ma Jisas i olal ole riong ve, "Tho ria thomu, thomu o rivenga ninek anga? Na titeik angare?"

34 Mako i the a toko na sengre aka ru o men kalutun i, ma i ria or ve, "Thopol vet, thomu aken ru o men, thomu re ake ini ok ninaere na titeikre,

35 eneke areko o panes a God ilemi or alavusnga aken or ini titeikre, lulukre na ok ninaere."

4

Riong agelalnga nge toko oinga.

(Matiu 13:1-9; Luk 8:4-8)

1 Na nge nang omole aka Jisas i voth a thei a pamonlel a Galili, ma i patea ile pamirealingare nge toko na seng pom aka o mit kalual i. Na o mit kalual i vene aken, mako i roa nge wok ma i mona mon inga aka a thei wopo, na toko na sengre o mit a wonwon po.

2 Ma Jisas i patongrum mun or nge riong agelalnga pulua. I pamireal or ve,

³ “Aro thomu o nongpol i, toko omole i es a ia ometa mo aro i thas ine wit monnga. Ma i ela ile wit monngare ma i ulvathar i.

⁴ I ulvathar i a ometa ma pelie o matu a sovengalo, aveto menre o an ir.

⁵ Na wit monnga pelie o matu mun a um pipo ako ulue sivenga nge avele. Wit aken monnga i metaplo viri viri inga.

⁶ Ave nang i in or makola o menine, eneke oriripi i teu la avele.

⁷ Lama wit monnga pelie mun o matu a kiki lemimi. Ave kiki i otuntunu or ma o rin rin, ma o mon ol avele.

⁸ Ave wit monnga pelie o matu a ulue sivenga nge, ma o metaplo senu. Ma o mon senu. Wit monnga pelie o mon ma omonnga mule pa me inga, na pelie o mon pompom tie ma omonnga or mule pa limae, na pelie o mon rintet ma omonnga or mule pa mule.”

⁹ Jisas i rirum i a or nge vene aken lama i pator mun or nge ve, “Na aro ve toko e i sis ve aro ilemi mire senu nge lek riong, mo i sivenga aka aro i ta senu itelnga nge lek riong ake.”

Tepun aka Jisas i ri riong agelalngare a tokokoere nge.

(Matiu 13:10-15; Luk 8:9-10)

¹⁰ Lama Jisas iengga i men ol, na ile wainlangaere na tokokoe pelie o velilou mun pel. O es a i nge la, ma o nin a Jisas nge ile riong agelalngare mirenga, aka i patongrum i a or nge.

¹¹ Lama Jisas i ria or ve, “Aro tho ritet thomu nge a God ile riong tepun aka i ngo kine nomenga aka nge ile menong e nepes. Aveto areko o men mela e tho, o nongpol inga aka ini lek riong agelalngare aka tho patongrum i a or nge, olemi mirenga mirenga avele.

¹² Mako i ranga ve aka God ile erere i ri nge, ma i ri ve,

“O thopol ur pelie,

aveto o thopol senu i avele.

Ma o nongpol riong ti pelie,

ave o nongpol senu mirenga avele.

Aro ve olemi rit venen aken avele,

aro o eksing olemi,

naro God i patitepot ole vothung kerenga.”

(Aisaia 6:9-10)

Riong agelalngare mirenga nge toko oinga.

(Matiu 13:18-23; Luk 8:11-15)

¹³ Jisas i ria or ve, “Lomumu mire senu nge lek riong agelalngare mirenga nge toko oinga avele, e? Na aro ve lomumu mire nge avele, i pavurvur aro lomumu mire senu mun nge lek riong agelalngare pelie mun avele.

¹⁴ O nongpol i, toko oinga, i o aka ini a God ile riong.

¹⁵ Na wit monnga aka i matu a sovengalo, o ranga ve ini toko na sengre aka o nongpol a God ile riong, ave Satan i velpol virial, ma i eltetpot riong aken i ngo a oopo lemi.

¹⁶ Ranga ve ini mun i wit monnga aka i matu a um pipo, i ranga ve ini areko o nongpol virial riong na olemi sivenga virial mun nge.

¹⁷ Aveto i teo a oopo lemi avele, mako i voth palolo avele. A ur e avele na matheong na sisong i velpoltun or, eneke o panes vet inga Panongpolong Sivenga, mako o modopu i.

¹⁸ Na wit monnga mun pelie o matu a kiki lemimi, o ranga ve ini toko na sengre aka o nongpol tel riong,

¹⁹ ave mimiong ulue anga ake i velpoltun or, na i otuntun or na o theseal ur elonga na umtun. Ma ur elonga areke i seltun a God ile riong kena aro i penthal mo aro i mon ol a oopo lemi avele.

²⁰ Na toko na sengre pelie, o ranga ve ini wit monnga aka i matu a ulue sivenga. O nongpol riong na o papomnga i na olo wom nge ma ranga ve aka o mon, pelie o mon ma omonnga mule pa me inga, na pelie o mon pompom tie ma omonnga or mule pa limae, na pelie o mon rintet ma omonnga or mule pa mule.”

Isivenga aka aro te pamona the lalainga roro.

(Luk 8:16-18)

²¹ Jisas i ria or ve, “Aro ve toko e aka i pasiseo ile the lalainga e, i mothong tova i pasopalu i, na i mothong tova i pamien kineo i a ring thewo, avele i sivenga aka aro i pamona i roro mo aro i lala senu a pen elonga.

²² Ranga ve ini riong sivenga ako olemi mire senu nge mirenga avele. Panen aro olemi mire senu ol nge.

²³ Na aro ve toko e i sis ve aro ilemi mire nge lek riong, mo i sivenga ako aro i ta senu itelnga nge lek riong ake.”

²⁴ Lama Jisas i ria or ve, “Aro lomumu rum senu lek riong akaong nongpol i. Aro ve lomumu avrumal senu i, aro God i sung werer mun ile mire aolonga a wong nge.

²⁵ Na aro ve toko e aro i krim engeng a God ile riong, aro God i sungu mun mire pom a i nge, nge ile riong. Na aro ve toko e i nongal nge a God ile riong avele, aro God i eltetpot werer ile mire nge a God ile riong aken a i nge.”

Jisas ile riong agelalnga nge won monnga aken i metaplo.

²⁶ Jisas i ria mun or ve, “God ile menong e nepes, i ranga ve ini toko omole aken i o won monnga a ulue.

²⁷ I ou i lama i es a rebo. I nokolkol, lama i oma, lama i thopol won monnga aken i metaplo lale. Na i metaplo vava? Toko aken ilemi mire ol nge ole metaploing pelie ol avele.

²⁸ Ulue inga aken i pametaplo i ma i poma. Ma i parongpot ithoing lama imeninire o tepot ol. Mako i mon ol lama monnga i vunvun.

²⁹ Lama toko aken i thopol i aken i motu, mako i es ol ma i vur i.”

Jisas i ria or nge riong agelalnga nge won monnga posnga atiko.

(Matiu 13:31-32; Luk 13:18-19)

³⁰ Lama Jisas i ria mun or ve, “Aro tho panineu mun thomu nge a God ile menong e nepes kene i vava, e? Aro tho patongrum ol i e uneke ol, e?”

³¹ God ile menong e nepes i ranga ve ini won monnga posngaingati aken i apet i ve ini ‘Mastet.’ Ine won monnga aken aken i wipot ma i matu a ulue, i posngaingati nge won monnga elonga.

³² Lamako i metaploa ma i aolonga nge won oinga elonga. I parongpot imenini elonga, ma men elonga o vus me ma o oma ole ring nge.”

Jisas i panongpol nge riong agelalnga inga.

(Matiu 13:34)

³³ Jisas i panongpol inga toko na sengre nge riong agelalnga. I patongrum i nge or, nge a God ile riong aken i pavurvur nge ole mire.

³⁴ Jisas i ri inga riong agelalnga a or nge, aveto aro ve i men tomo nge ile wainlangaere oenga aro i ria or nge ile riong agelalnga mirenga.

Jisas i ria thue na thei le lolikong ma o poreng.

(Matiu 8:23-27; Luk 8:22-25)

³⁵ Nge penienga wopo e nang aken Jisas i ria ile wainlangaere ve, “Aro te mon a thei a pamonlel a wo epee.”

³⁶ Lama Jisas ome ile wainlangaere o plos lelpot toko na sengre oa, ma o ro a wok nge. Jisas i menu na ile wainlangaere o sauth. Na wok pelie aken i o paneso wok aken i men nge.

³⁷ Lama thue aolonga na thei le lolikong i velpoltun or ma i engeng, i sivalu sivala wok ma pa omole tova o vlu.

³⁸ Jisas i nokolkol a rumongaling a wok lemi ma i lung a ia lung. Mako ile wainlangaere o pamimeta i, ma o ria i ve, “Lomum i voth nge it avele? Pa omole re ake aro te vlu.”

³⁹ Ma Jisas i mita ma i vol thue ome thei le lolikong mo o porengu na i akriral thei ve, “Wong mothong ol na wong poreng na wong ngo thau.” A ur e avele nako thue i porengu na thei i ngo thau.

⁴⁰ Ma Jisas i ria ile wainlangaere ve, “O mothong tova o ngange. Ava lomu lemioong kek tie avele aken i aro tho pamimi thomu, e?”

⁴¹ Mako o ria werer mun pel osivenga ve, “Ini toko le vanga ake, thue ome thei, o nongal i, e?” Mako o kukuk rintet nge i.

5

Jisas i wistetpot tamata kerenga a toko ngongong nge.

(Matiu 8:28-34; Luk 8:26-39)

¹ Jisas ome ile wainlangaere o velpol a thei a pamonlel wo epee, a epee a Gerasa angare nge.

² (v 2b) Na toko omole ako i voth, aka tamata kerenga i voth a i nge.

³ Na i vul vet inga aka a vuvepun. Na tokokoere o pavurvur aro o kin i avele,

⁴ Aveto nomenga o tongporum ieve na imeni kinnga nge sen, aveto i uriro i re lale, eneke i engeng rintet ma i pavurvur aro toko e aro i theal tetal ile avele.

⁵ Na nge nang elonga na pemliknga i men inga a vuvepun na i es mun a tete, na i wal kerere na i el mun um ma i soriro isivenga nge.

(v 2a) Lamako Jisas i ru a wok nge na toko aken i es aka a vuvepun me,

⁶ ma i thepol a Jisas melanga ma i tho tuntun i ma i koru ieve nge i na ipo tiru.

⁷ Ma i lenga viringa a i nge la ve, "Jisas wong ini a God Itun aka a Pen a Urvet. Wong es ake me mo o oma neke e tho, e? Nge a God iion tho nong tangosing a ong nge ve, mothong tova pakerenga tho."

⁸ Ma tamata aken i ria vene aken, eneke i ngange rintet nge a Jisas ile riong aka i ria i nge ve, "E tamata, ong lopot a toko aken nge."

⁹ Lama Jisas i ria i ve, "Iom anga?" Ma i olal i a i nge ve, "Iok a Pulua, eneke engek avele them pulua."

¹⁰ Ma i nong a Jisas nge mo i mothong tova i wistetpot tamata kerenga areken a wop relnga e.

¹¹ Na kie avlung aka o an a pen sa thewo.

¹² Na ine tamata kerengare o nong a Jisas nge ve, "Aro wong wistetpot inga them mo them eso a kiere nge."

¹³ Lamako Jisas i ri ve i sivenga, mako o korpot ol, ma o eso ol a kiere nge, mako kie avlung aken o lo. Na oa titaling i pavurvur nge or 2,000, ma o lou a pen kei thewo ma o opthou la, mako o vlu a thei lemi, ma or alavusnga o es mo o porumtet vet ur aken Jisas i oma i.

¹⁴ Lamako ine kie theal tetalngare o lo, makola o ria rem lemiare na areko o voth a rem pomnga. Mako toko na sangre, or alavusnga o es mo o porumtet vet ur aken Jisas i oma i.

¹⁵ Na o es makola o velpol a Jisas nge, ma o thopol toko aka nomenga tamata kerengare o voth a i nge, aka i men pisu ol

ma i teunu ol teunong, na ilemi nineu ol. Lamako o es ma o thopol i, ma o ngange rintet nge ur aka Jisas i oma i.

¹⁶ Lamako areko o thopol a Jisas aka i wistetpot tamatare, o rurum ol i a toko na sangre nge, nge ur aka Jisas i oma i a toko aken nge, ma o rurum mun nge kie areko o vlu.

¹⁷ Lamako areko ole a epee aken, o nongpol i, ma o nong engeng a Jisas nge ve aro i lostetpot a ole epee.

¹⁸ Mako, Jisas i ro a wok nge. Ave toko aton ru nomenga tamata kerengare o voth a i nge, i nong engeng a Jisas nge ve, "Thosis ve aro tho panes wong."

¹⁹ Aveto Jisas ini plong ve aro i panes i. Ma i ria i ve, "Ong lo werer a lom vel la, mo ong panongpol lomngare, na panongpol or nge opoesaling ake Toko Pomnga i oma i a ong nge, mo wong ruruma mun ile lemi esaling nge wong."

²⁰ Mako toko aken i es, ma i panongpol ol a epee aka a Dekapolis.* Ma i panongpol ol or nge a Jisas ile opoesaling nge i. Mako toko na sangre o nongpol i ma o kukuk nge.

Jisas i pamimi sang or aini.

(Matiu 9:18-26; Luk 8:41-56)

²¹ Lama Jisas ome ile wainlangaere o roa e wok. Ma o sauth mala o volil werer mun a thei a pamonlel a wo epee. Mako toko na sangre pom aka o mit kalalual a Jisas a wonwon po.

²² Na toko omole aka i es a Jisas nge me, ma iion a Jairus, aka ini lotu a mukalinga, ma i thopol a Jisas, ma i koru ieve na ipo tiru a i nge.

²³ Ma i nong mos inga a Jisas nge ve, "Tuk posnga omole aka, ini seng, toth aro i rin. Aro ve ong es la mo ronga menum a i nge aro i mimi werer mun."

²⁴ Lamako Jisas i nongpol i ma i mita ma i paneso i.

Na toko na sangre pom aka o paneso mun i ma o mit kalalual i.

²⁵ Mako seng omole aka i voth tomo nge or, kene sangre oa ni multhanging aka o thopol ngov i pesrou a i nge avele, ma i

* ^{5:20:} Dekapolis i mirenga aka ve, rem pomnga or mule pa omole o voth nge

pavurvur nge tovu po or mule pa omole pothoi or aini.

²⁶ Nomenga vet ako me i es eveleng a toko vuralinga nge, ma i pavustetpot ile umtun lale, aveto ni multhanging aken a i nge kene i vus vet avele. Ma ia ni multhanging aken i aolo inga la.

²⁷ Lamako seng aken kene i nongpol a Jisas ile omaing kimanga, ma i kene i sulotomo nge toko na sengre, ma patongti i es ma i mito a Jisas ikime, ma i vugir kine inga Jisas ia teunong.

²⁸ Eneke patongti ilemi inga ve, “Aro ve tho vugiro inga a Jisas ia teunong aro tho sivenga werer.”

²⁹ Mako i vugiro a Jisas ia teunong, na a ur e avele nako ia ni multhanging aken i vus. Ma i rov ol ini peti ako i vthopot ol.

³⁰ I vene re aken, na Jisas ilemi mire ako ile engeng pelie i espot a i nge. Mako i the singal werer a toko na sengre oa wop. Ma i nina ve, “Anga i vugiro lek teunong, e?”

³¹ Na ile wainlangaere o nina i ve, “I va, pulua ake o mit kalual ong na ong nina ve, ‘Anga i vugiro tho, e?’ ”

³² Aveto Jisas rongan i theu thea, eneke ia pun ako ve, ilemi mire nge anga ako i vugiro i.

³³ Na seng aken i rov mimiong, ma i ngange rintet, ma i es mala i koru ieve a Jisas itheki lemi, ma i pamilempot ia ni multhanging aken a Jisas itheki.

³⁴ Ma Jisas i ria i ve, “Tuk, ong mimi werer lale, eneke lomumo ve tho pavurvur ako aro tho pamimi ong. Na ong es la na opom lemi aro i vual nge a God ile lemi moring. Na om ni multhanging aken i vus re aken.”

³⁵ Na Jisas rongan i ri, na tokokoe pelie ako o losa a Jairus ile vel o velpol, ma o ria Jairus ve, “Tum i rin ol lale. E, mala o mothong tova o patheki postun ol toko patoralinga aken.”

³⁶ Aveto Jisas i nongal or avele. Ma i ria lotu a mukalinga ve, “Ong mothong tova lomum kerere. Aro lom lemioong i engeng a God nge.”

³⁷ Ma Jisas i rialal wereru toko na sengre ve aro o mothong tova o panes i la. Mako

Pita na Jems ome itein a Jon, or toko me inga ako aro o panes i.

³⁸ Ma o es mala o velpol a vel. Ma Jisas i nongpolpot ole keking ako pelie o tang na pelie o walal.

³⁹ Ma Jisas i eso a vel, ma i nina or ve, “Thomu o kektun pel na o wal nge neke? Wainlanga atiken i rin avele, i nokolkol inga aken.”

⁴⁰ Na o nongpol i venen aken ma o ngenge lital i.

Aveto Jisas i pakealalpot or a lalanga na i velilo inga wain itema na inina na ile wainlanga or me, mako o eso a vel lemi epee ako wain atiken i ngo nge.

⁴¹ Ma Jisas i krimu imeni ma i ria i nge Judare okei ve, “Talita kumi,” riong aken i mirenga ve, “Tho ria wong seng wainlanga aken, ong mita.”

⁴² Mako seng wainlanga atiken i mita. Ma i esu esa ol. Na areko o thopol i, kene o kukuk. Na seng wainlanga atiken ia tovu po or mule pa omole pothoi or aini.

⁴³ Aveto Jisas i pator engeng mun or ve, “O mothong tova o pamilempot ur ake tho oma i lale.” Ma i ria or ve, “Thomu o sungu aning tie a seng wainlanga atiken nge mo i an i.”

6

Toko na sengre a Nasaret o pilalpot a Jisas.

(Matiu 13:54-58; Luk 4:16-30)

¹ Jisas ome ile wainlangaere o plospot nge rem aken, ma o es ol a ile rem tepun a Nasaret.

² Lamako nge nang rialonga, Jisas i patea ile pamirealing a Judare ole lotuunga a vel lemi. Na toko pulua o nongal inga ile pamirealing. Ma o kukuk nge ile pamirealing ako o nongpol i.

Ma o nin pel osivenga ve, “Anga i pamireal i nge mire aolonga aken? Ile mire aolonga aken i es vanath me? Na i oma mun omaing engenga vava?”

³ Toko ake ini vel aringa aka ini a Maria itun, na ititeinre ini a Jems na Joses na Judas na Saimon ome ilulunre kene o voth tomo mun nge it.” Mako or vusnga o kelelal i.

⁴ Ma Jisas i ria or ve, “God ile riong elnga kene o papomnga i a pen elonga. Aveto ile pen lemiare na ile netre na ititeinre, or vusnga o pavthongal i.”

⁵ Ma Jisas i pavurvur aro i oma omaing engenga pelie a ile pen avele. Aveto i montun inga ni multhanginga pelie na i pamimi or.

⁶ Ma Jisas i kukuk nge ile pen lemiare, aka ole mio nge i avele.

Jisas i pangopat ile engenging, ave ile wainlangaere ole mi mire mos nge avele

(Vonge 6:6–8:21)

Jisas i pakeot ile wainlangaere nge omaing.

(Matiu 10:9-14; Luk 9:1-5)

Na Jisas i plos lelpot ile pen aken, ma i panongpol a rumrem, na i pamireal nge a God ile riong.

⁷ Lamako i leng veliloalo ile wainlanga or mule pa omole pothoi or aini, ma i pakepot toko or aini aini, na i sungu ile engenging a or nge, aka aro o wistetpot tamata kerengare nge.

⁸ Ma i rial or vene, “Aro ve thomu o es, thomu o mothong tova o el ur pelie nge lomu esong. I sivenga aka aro thomu o el inga lomu eel, na o mothong tova o el aning, na o mothong tova o teloval lomu alal, na lomu umtun.

⁹ Na i sivenga aka aro o uno lomu esonga a evomu, naro o teunu inga lomu tekruk omole.

¹⁰ Na aro ve thomu o velpol a rem e, na aro ve toko e i nongpoo thomu, i sivenga aka aro thomu o voth inga e vel aken mola i pavurvur aka aro thomu o lospot e rem aken.

¹¹ Na aro ve toko na seng nge rem pelie, o nongpoo thomu avele, eve o nongpol lomu riong avele, i sivenga aka aro thomu o plos lelpot rem aken, naro thomu o tepluspot rem aken a vuvus a evomu salemi a tokokoere otheki, mo ini ole paatealinga aka o nongal nge a God ile riong avele, mako aro ole vothung kerenga aro i ngo reletun a or nge.”

¹² Lamako, Jisas ile wainlanga or mule pa omole pothoi or aini, o es, ma o panongpol toko na sangre, mo aro o eksing ole mi, naro o modop ole vothung kerengare.

¹³ Na o wistetpot tamata kerengare. Na o taul ni multhanginga pom oni peti mako o pamimi ni multhanginga areken.

Herot i nongpol a Jisas ile omaing ma ilemi ngo pelekpol nge.

(Matiu 14:1-2; Luk 9:7-9)

¹⁴ Ina Herot ini mukalinga na ini nepes. I nongpol a Jisas ile wainlangaere ole omaing aka i kima, eneke i nongpol tel a Jisas ile omaing kimanga aka i song a pen elonga. Ma pelie kene o ri ve va ini a Jon aka ini toko paninuonga. Ma o ri ve va i mimi werera a vuvepun. Ako ini toko aka i oma pathepolong engenga areken.

¹⁵ Na toko pelie, kene o ri ve ake va ini a Elaija. Na toko pelie mun, o ri ve avele, i ranga ve aka ini a God ile riong elnga omole aka i velpol nomenga nge toko pompomere.

¹⁶ Herot i nongpol i ma i ri ve, “Ake ini a Jon. Nomenga aka tho pakepot lek tokokoere ma o soropot ikei, i mun re aken i mimi werera mun.”

Tenesing nge a Jon aka ini toko paninuonga ile rinong.

(Matiu 14:3-12)

¹⁷ (v 17b) Nomenga aka Herot i ewoa itein a Pilip iewo sengenga, aka iion a Herodias, aka itein i ewoa tel i, aveto Herot i pamuespot i a itein nge.

¹⁸ Lama Jon i ria Herot ve, “I sivenga avele ake ewoma mun teum iewo sengenga, vothung aken i sivenga avele.”

¹⁹ (v 19a) Na Herodias i nongpol i ma ilemi klingtun a Jon, (v 17a) mako Herot i pakepot ile tokokoere mo o es mo o rere a Jon mo o paeso i a mang a midenga lemi. (v 19b) Aveto Herodias i ri ve aro i so rin a Jon. Aveto i pavurvur avele.

²⁰ Eneke iewo tomonnga i ngange nge a Jon, na ilemi mire nge a Jon aka ini toko vengvenga na ini toko riringa. Na Herot ilemi sivenga nge a Jon ma i ri ve mo i nongpol vet inga ile riong. Aveto Herot ilemi i ngo pelekpol nge a Jon ile riong.

²¹ Mako nge nang relnga e, Herodias ilemi rumu sovengalo e ako aro i pun a Jon nge. Na iewo tomonnga i oma aning aolonga aka i paateal nang aka inina i pop i nge. Ma ikei song ile tokokoe pulua na ile omainga a mukalingare, na punongare ole mukalingare ome toko pompomengaere aka a epee aka a Galili.

²² Lama Herodias itun ovotenga i velpol ma i sesu a Herot ome tokokoe areko o men nge aning aken a otheki ma ole sivenga.

I ses ma vus mako Herot i ria i ve, “Ong ria tho nge, nge uneke aka ong sis ve aro tho sung i nunganga a ong nge. Na tho ri nunganga,

²³ aro ve ong nong ur kathnga, aro tho sung i nunganga a ong nge.” Ma i ria ve, “I nunganga aka aro tho sungpot inga a wong nge. Tova ong ria tho nge mo tho omreuu ok ulue ake nge it aini aro om epee, na ok epee, aro tho oma i nunganga aka aro tho sungu inga a wong nge.”

²⁴ Lama ovote aken i korpot a on, ma i nina inina ve, “Aro tho nonga ur nekenga aka aro i sung i a tho nge, e?”

Mako inina i ria i ve, “Ong ria inga mo i sungu inga Jon ipounga a wong nge.”

²⁵ Ma ovote aken i lo werer mun viri a Herot nge, ma i ria i ve, “Ponange re ake aro ong sungu a Jon ipounga a tho nge. Aro ong rongu i a vituonga nge, mo ong sungu i a tho nge me.”

²⁶ Ma Herot i nongpol i, ma ilemi ngo kerere rintet, eneke ini plong ve aro i so rin a Jon. Aveto ilemi ovolil werer mun nge ile riong aka i ria ovote aken nge lale, i ria ve i nunganga na ilemi rum mun nge tokokoere aka o men tomo nge i nge ia aning, o nongpol ile riong aka i oma tel i lale. Ma i pavurvur ol aro i wathalal ol ovote aken ile riong avele.

²⁷ A ur e avele na Herot i pakepot toko punonga mo i ela Jon ipounga. Lamako toko punonga aken i es a mang a midenga ma i sorotetpot a Jon ikei ma i ela Jon ipounga.

²⁸ Ma i rongu i a vituonga nge, lamako i pasong ol i a ovote aken nge, lama ovote

aken i sungu i a inina nge, mo aro inina, ilemi mire nge ve, Jon kene i rin nunganga lale.

²⁹ Lamako Jon ile wainlangaere, o nongpol i, ma o es ma o potun a Jon ilopat ol inga aka la a vuvepun ma o tetun i.

Jisas i paan tokokoere aka oa titaling i aoselea 5,000.

(Matiu 14:13-21; Luk 9:10-17; Jon 6:5-13)

³⁰ Na Jisas ile wainlangaere aka i pake or nge ile omaing nomenga kene o lo werer, ma o men tomo e a Jisas. Ma o ritet ole omaing nge a Jisas aka o oma i, na nge ole riong areko o ria toko na sangre nge.

³¹ Ma Jisas i ria or ve, “Thomu o es me, mo te es tel a wop e mo te men kine mo te thau it nge.” Jisas i ria or venen aken, eneke toko na sangre kene o velpol rin opisleonga a or nge, ma Jisas rea kene omei e avele aka aro o men nge mo o paengengo oopo lemi nge aning.

³² Lamako Jisas na ile wainlangaere oenga o roa a wok nge ma o sauth a wo epee aka i meninin.

³³ Aveto toko pulua aka o atetet a Jisas rea, nge nang re aken, toko na sangre, nge rumremre o plosa, ma o es vengveng nge wop aka Jisas i ri ve i es nge, ma o tho tel, ma o velpol tel a mukaling nge a Jisas rea.

³⁴ Lamako Jisas ome ile wainlangaere o sauth mala o otuno. Ma Jisas i rive i thealo, ma itheki postun nge toko na seng areko o vual, ma i thepol inga or ma ilemi esal rintet nge or. Eneke o ranga ve ini sipsip areko othealnga avele, lamako i patea mun ile pamirealing nge ur puluanga a or nge.

³⁵ Lama penieo, ma nang i men a ile ring, ma ile wainlangaere o nina i ve, “Nang i sivluk lale na te voth kek inga a pen polpolnga,

³⁶ mola i sivenga aka aro ong pake werer tokokoere, mo aro o es a rumrem mo o ol oa aning tie.”

³⁷ Aveto Jisas i ria or ve, “Thomu re aken aka aro thomu o sungu oa aning.”

O olal ile riong ve, “O, aro ve them ol oa aning aro i pavurvur nge Denarius* or 200

* **6:37:** Denarius omole i pavurvur nge toko omole iolonga nge nang omole

moro aken i pavurvur nge or, ave umtun ake i pavurvur avele."

³⁸ Lama Jisas i nina or ve, "Omu bret or pova? Thomu o thopol vet i."

O es mala o thopol i, lama o lo werer me ma o ria i ve, "Emem bret or lim inga ake, na silang or aini."

³⁹ Ma Jisas i ria ile wainlangaere mo o ria toko na sengre, mo o men avlunq avlunq.

⁴⁰ Lamako o oma i ranga ve aka Jisas i ria or nge. Mako o menu, ma avlunq pelie mule pa lim, na avlunq pelie mule pa mule.

⁴¹ Ma Jisas i ela bret or lim ma i velilo tomo i nge silang or aini, ma ipo watha ro a sepsa, ma i ri sivengaing a God nge. Lama i rek reku i nge ile wainlangaere, lamako o sung sung i a toko na sengre nge, na silang mun i veno mun aka, i pasisa i tutun tutun nge toko na sengre.

⁴² Or vusnga o an, ma osa pup leltun oa aning uluo.

⁴³ Jisas ile wainlangaere o ela alal aolongga or mule pa omole pothoi or aini ma o inou bret na silang uluo aka osa pup leltun i.

⁴⁴ Na o tital inga totomonere aka o aning aken ma oa titaling i mul nge 5,000.

Jisas i es roro a thei stha.

(Matiu 14:22-32; Jon 6:15-21)

⁴⁵ Jisas i ria ile wainlangaere ve, "Thomu o roa a wok nge mo o mukal a epee aka la a Betsaida." Ma Jisas i pakealalpot toko na sengre aka o voth tomo nge i na i sis ve aro ienga aro i voth tel.

⁴⁶ A ur e avele na i pakealalpot toko na sengre ma o es ol, ma Jisas kene i roro a tete polemi ma i nong.

⁴⁷ Pen aivuvu ol me, na Jisas ile wainlangaere o mon ol a thei stha rinrinnga, Jisas ienga inga aka i voth a thei wopo.

⁴⁸ Ma i thopolpot or la, ole engenging ol avele nge sauthong, eneke thue i mit telek a thei stha nge anga me, rongan pen ia midingdeng tie na i toth ol aka aro i walpau, lama Jisas i es ol a or nge la, ma i es inga roro a thei stha na ilemi ve aro i pun selepot inga or.

⁴⁹ Aveto ile wainlangaere o thopol tet i aka la i es wot, o rivenga ini mothuk, ma o walal.

⁵⁰ Eneke or vusnga o thopol i, ma o ngange rintet.

Aveto Jisas i ria or ve, "O mothong tova saluk thomu, ake ini tho, o mothong tova o ngange."

⁵¹ Ma i roa a wok nge ma i men tomo ol nge or, lamako thue i poreng, na Jisas ile wainlangaere o thopol aken ma o kukuk nge.

⁵² Eneke o thopol senu a Jisas ile omaing avele nge aning aolonga aken, eneke olemi mire senu mun nge ile engenging rongan.

Jisas i pamimi ni multhanginga pom a Genesaret.

(Matiu 14:34-36)

⁵³ Jisas ome ile wainlangaere, o mon a thei a pamonlel a wo epee, ma o otuno a epee aka a Genesaret, ma o otunu oa wok.

⁵⁴ Ma o ru ma toko na sengre nge epee aken o thopol a Jisas, olemi mire ve ake ini a Jisas re ake i velpol a or nge.

⁵⁵ Lamako o thotitet ol a rumrem aka a epee aken ma o ritet nge a Jisas ile esu esaing a ole rumremre, na aro ve Jisas i eso a rem e aro o potuntun ni multhangingare tomo e ole ringre, mo aro o pasong or a i nge me.

⁵⁶ Na nge rumrem areko Jisas i es nge, aro o potuntunpot ni multhangingare mo o pango or a rem lemi, o nong engeng a Jisas mo aro i es, mo ni multhangingare o krimo inga ia teunong ongupo. Aro ve o vugiro inga Jisas ia teunong ongupo, aro oa ni multhangingare i vus, mo o mimi werer.

7

God ile vothung kene i mukal nge pom-pomere ole vothung.

(Matiu 15:1-9)

¹ Na nge nang omole aka ine Parisi pelie ome toko pamirealinga nge a Moses ile patorong pelie, o plosa a Jerusalem ma o velpol, ma o velilo pel a Jisas nge.

² Ma o thopol a Jisas ile wainlanga pelie aka o an polpol inga na o paut tel omeni avele. Aken o panes ine Parisire ole patorong avele.

³ (Parisire na Juda alavusngare o panes oa pompomere ole vothung aro o paut tel omeni lamo o an, aken olemi ve o paonol or mo o riri a God itheki.

⁴ Na aro ve o olpot aning a pen e me, lamo aro o paut omeni. Aken ini ole vothung vet ako o panes oa pompomere ole vothung alavusnga. Ma ranga ve mun nge oa ur elonga aro o paut tel ir aka ranga ve ini thinonga na thei pokin na posongga.)

⁵ Lamako Parisi pelie na toko pamirealinga nge a Moses ile patorong pelie, o nin a Jisas ve, “I vova ake lom wainlangaere o panes toko pompomere ole vothung avele, e? Ako o paut tel omeni avele, na o an inga, e?”

⁶ Lamako, Jisas i olal ole riong ve, “God ile pakeke nomenganga, ina Aisaia, ilemi mire senu nge thomu ve, thomu ini toko le apaltitetongare, ma i wat a God ile riong vene:

‘Tokokoe areke o risea tho nge ole riong, aveto a oopo lemi kene i melanga rintet nge tho.

⁷ Ole lotuong a tho nge ini ur polpolnga inga, eneke tepun kene o pamireal toko na sengre nge pamirealing ulue anga.

Ole apaltet inga ve, ole riong aken ini a God ile riong.’”

Aisaia 29:13

⁸ Lama Jisas i ria mun or ve, “Thomu o modopu a God ile patorong lale, na thomu kene o krim ol inga ake ini tokokoere ole vothung.

⁹ Thomu o ri ve thomu ini toko powe ninengare, aveto lomu mire aken kene ini a God ile riong asisesalnga, na thomu o ri ve mo o krim vet inga aka ini omu pompomere ole vothung.

¹⁰ Eneke Moses i ri nge ar pompomere ve, ‘Thomu aro o pavothal nge titomomuere na ninomuere.’ *Kisim Bek 20:12*

Na i ria mun ve, ‘Aro ve omu e i voltet itema eve inina, i sivenga aka aro thomu o so rinpot toko aken.’ *Kisim Bek 21:17*

¹¹ Aveto lomu pamirealing kene i venen aken avele, i rel. Lomumu kene i vene: Aro ve toko e i ri ve i opoal inina ome

itema nge umtun tie ome aning, thomu o ri ve, i pavurvur aro toko aken aro i ria inina ome itema ve, ‘Lek opoaling posnga atike tho ri ve aro tho opoal thomu paini nge, aro tho sung ol i a thomu paini nge avele, eneke tho monsi nge aka aro tho sungu i a God nge mo i opoal ile lotu nge.’

¹² Mako thomu o ri ve i sivenga nge toko aken, aka aro i opoal ol inina ome itema avele ol.

¹³ I nunganga, thomu o panes ake ini pompomere ole vothung nomenganga, make thomu o pavthongal a God ile riong. Na lomu vothung pulua rin ake thomu o oma i.”

Jisas ile pamirealing nge vothung kathunga aka aro i paakop toko a God itheki.
(Matiu 15:10-20)

¹⁴ Jisas i leng werer mun toko na sengre a i nge, ma i ria or vene, “Thomu vusnga aro o nongpol lek riong, naro lomumu rum senu nge imirenga.

¹⁵ Aro ve ur e i eso a toko e iopo lemi, i pavurvur aro i paakop toko aken a God itheki avele. Aveto ini inga ur aka i voth a toko ilemi, ma i espot a lalanga, aken ko i paakop toko a God itheki.

¹⁶ Na aro ve toko e i sis ve aro ilemi mire nge lek riong, mo i sivenga aka aro i ta senu itelnga nge lek riong ake.”

¹⁷ Lamako Jisas i los lelpot nge pulua aka o nongpol ile riong, ma i eso nge vel omole aka. I men nge vel aken, ma ile wainlangaere o eso a i nge, ma o nina i nge ile riong agelalnga aken mirenga aka i ria Parisire nge.

¹⁸ Ma Jisas i olal ole riong ve, “Thomu mun lomumu kene i oror, e? Lomumu mire nge avele, aka ur aka i voth a lalanga mo i eso a toko iopo lemi, i pavurvur aro i paakop ilemi avele, e?

¹⁹ Eneke, aning aken i eso a toko ilemi la avele, i eso inga a iopo lemi ma i voth nge. Aveto aro i ngo reletun nge avele, aro i lo wererpot mun.” Nge riong aken Jisas i ri ve aning elonga i riri, na e avele aro i paakop toko a God itheki.

²⁰ Lama Jisas i ria mun or ve, “Aro ve ur omole aka i voth a toko ilemi ma i espot, aken inga aro i paakop i a God itheki.

²¹ Ole vothung elonga areko i velpolpot a olemi kene i vene. Ine lemi rumong kerenga, na theki sering, na kemong, na toko so rinnga, na ngo tomoing nge toko na seng areko ini oewo avele,

²² na thesealing, na vothung le kerengaing, na riong le apalitetonga, na telnga plaing, na ri tangatunong, na magoning.

²³ Ine vothung kerenga elonga aken, o velpolpot aka a toko ilemi ma o paakop i a God itheki.”

Seng omole aka ini Juda avele ile lemioong i nunganga a Jisas nge.

(Matiu 15:21-28)

²⁴ Lamako, Jisas i plos lelpot nge rem aken, na i es nge epee aka a Tair* ma i meno nge vel omole aka. Na ini plong ve aro toko e ilemi mire nge ve i voth nge vel aken. Aveto i pavurvur avele aka aro i men kineo.

²⁵ Ma seng omole aka itun kene ine tamata kerenga i voth a i nge, i nongpol aka Jisas i voth nge vel aken, mako i mita, ma i es alpo a Jisas nge, ma i koru ieve na ipo tiru a Jisas nge.

²⁶ Aveto seng aken ini seng Juda avele ini seng Grik, nge rem aka a Ponisia nge epee a Siria, na i nong a Jisas nge ve aro i wistetpot tamata kerenga aken a itun nge.

²⁷ Aveto Jisas i ate i ma ini seng Juda avele, mako i olal senu ile nongong avele, na i ria inga i nge riong agelalnga ve, “I sivenga aka aro them sung aning nge tutumemre mo o an tel i mo osa pup. Na i sivenga avele aka aro them ela tutumemre oa aning, mo them asesu i a nanaure nge.”

²⁸ Aveto seng aken ilemi mire nge a Jisas ile riong agelalnga mirenga nge nanaure, i mirenga aka ve, or ini Judare avele, ma i olal ile riong ve, “Toko Pomnga, lom riong kene i nunganga, aveto nanaure o voth a ring thewo ma o an mun wainlangaere oa aning epipeere.”

²⁹ Ma Jisas i nongpol seng aken ile riong, ma i ria i ve, “I sivenga rintet ake lomum mire senu nge lek riong kene i nunganga. Na ong lo werer la, ine tamata kerenga aken i lo lelpot tum lale.”

* **7:24:** Tair ini rem pomnga aka tokokoe areko or ini Judare avele o voth nge. † **7:31:** Dekapolis i mirenga aka ve, rem pomnga or mule pa omole o voth nge.

³⁰ Mako seng i es werer a ile vel, ma i thopol aka itun i nong nong a ile ring, ma ilemi mire aka ve, itun i senu lale, ine tamata kerenga aken i lo lelpot i lale.

Jisas i pamimi toko telnga gutnga omole.

(Matiu 15:29-31)

³¹ Ma Jisas i plosa mun ma i los lelpot nge a Tair, ma i es a Saidon lama i es a remre aka a Dekapolis† lamako i velpol a epee aka a thei a pamonlel a Galili.

³² Na ine toko pelie aka nge epee aken o pasong toko omole aka itelnga gut a Jisas nge la, na ile riong tangathngath. O pasong i a Jisas nge mo aro Jisas i ronga imeni a i nge mo aro i mimi.

³³ Lamako Jisas i wol lelpot toko aken a toko na sangre nge, ma i oselo imeni pupo a toko aken itelnga kokolonga, lama i romo imeni pupo lamako i monthes toko aken ile muma.

³⁴ Ma Jisas i monthes toko aken ile muma lama ipo watha a sepsa, na i thangaposa viringa. Na i tang a iopo lemi ma i ria toko aken ve, “Evata,” ake ini Judare ole riong lopat na ake i mirenga ve, “O thep”.

³⁵ A ur e avele nako toko aken itelnga i nine werer na iwo i thep ma i leng leng senu ol.

³⁶ Ma Jisas i pator engeng or nge ve o mothong tova o rimilem i. Aveto avele, o engeng inga, mako o pamilem i.

³⁷ Eneke o kukuk nge, ma o ria ve, “Omaing elonga areke i oma i kene i sivenga rintet. I pamimi areko otelnga gut ma o nongpol werer, na areko o leng leng ses kene o leng leng werer mun.”

8

Jisas i paan toko na sangre or 4,000.

(Matiu 15:32-39)

¹ Nang omole aka toko na sangre pom o men velilo pel tomo e a Jisas. Na oa aning avele ma Jisas i leng veliloalo ile wainlangaere ma i ria or ve,

² “Lemik esal rintet nge toko na seng areke, eneke nang or me ake o men nge ake na oa aning avele aka aro o an i.

³ Na aro ve tho pakealalpot or a ole rumremre, aro o rin rum so a sovengalo, nge mesipuniong. Eneke pelie o es nge rem melanga me.”

⁴ Lamako Jisas ile wainlangaere o ria ve, “Ake ini pen polpolnga inga, aro te el aning e wop kathnga mo te sungu i a or nge, e?”

⁵ Aveto Jisas i nina or ve, “Thomu kene, bret or pova i voth a thomu nge, e?”

Ma o ria i ve, “Ini inga bret or limai.”

⁶ Ma Jisas i ria toko na sengre ve, “Thomu o menu.” Mako o menu ol. Ma Jisas i ela ol bret or limai aken ma i nong a God nge, ma i ri sivengaing a i nge. Lamako Jisas i rek rek ol bret or limai aken a or nge, ma i sungu i a ile wainlangaere nge mo o sung sung i a toko na seng alavusnga nge, mako o sung ol i.

⁷ Lama i ela mun silang tutun pelie aka o el i, ma i ri sivengaing a God nge, lamako i insisau silang areken, lamako i ria ile wainlangaere ve, “Thomu o ela silang atiike mo o sung sung i a toko na sengre nge.”

⁸ Lamako or vusnga o an, ma osa pup leltun oa aning uluo. Lamako Jisas ile wainlangaere o el veliloalo oa aning uluo, ma o inou i nge alal aolonga or limai ma o vual.

⁹ Na totomonere inga kene oa titaling i pavurvur nge or 4,000. O an ma vus lamako Jisas i pake werer or a ole rumremre.

¹⁰ Lamako Jisas ome ile wainlangaere o prolu ma o roa e wok ma o mon ol a epée aka a Dalmanuta la.

Parisi pelie olemi ve, Jisas i es a God nge me avele.

(Matiu 16:1-4)

¹¹ Na Parisi pelie, o es a Jisas nge, ma o nin ororo i nge ninong pulua. O sis ve aro o tongporum ile engenging mo o patelek i, mo o ri ve o thopol paatealing engenga aka i es a God nge me.

¹² Aveto Jisas ini silala ol or, mako i thangapos, ma i ria or ve, “I vava ake thomu tokokoe areko o mimi nge wop lemi

ake, thomu o ri ve o thopol ine paatealing ake, e? Tho ri nunganga a thomu nge aro tho oma paatealing e avele.”

¹³ Lamako Jisas i plos lelpot nge Parisire, na i roa nge wok, ma ome ile wainlangaere o mon alpo a thei a pamonlel wo epee la.

Jisas ile wainlangaere olemi mire senu rongan aka, Jisas ile engenging i es a God nge me.

(Matiu 16:5-12)

¹⁴ Na Jisas ile wainlangaere, olemi simikal aning elnga, ma o el inga bret omole nge ole moning a wok nge.

¹⁵ Ma Jisas i tor ole ve, “Thomu o naked senu thomu, nge Parisire ole yis na Herot ile yis mun. Aro vene mo o ri ololo thomu. Ole vothung i ranga ve ini yis aka i seltun bret lemi alavusu, kena aro ole yis aken aro i seltun lomumu.”

¹⁶ Lamako o ulu ula a Jisas ile riong aken mirenga, ma o ria ve, “I ri vene aken, eneke it ake bret e avele.”

¹⁷ Aveto Jisas i nongpoltet ole riong, mako i ria or ve, “I vova ake thomu o ulu ula pel e riong aken na it kene bret e avele, e? Lomumu nine avele, e? Na lomumu mire senu rongan aka tho pavurvur aro tho paan thomu, e?”

¹⁸⁻¹⁹ Thekumu kene i voth, aveto thomu kene o thopol senu avele. Telngomu mun kene i voth, aveto thomu kene o nongpol senu riong avele. Ava lomumu simikal toko or 5,000 aton tho paan or nge bret or lim inga, e? Thomu o inou oa aning uluo nge alal or pova ma i vual, e?”

Ma o olal a Jisas ile riong ve, “Alal or mule pa omole pothoi or aini.”

²⁰ Lamako Jisas nin werer mun or ve, “Nge nang aton tho paan toko na seng or 4,000 nge bret or limai, ma thomu o inou oa bret uluo nge alal or pova ma i vual, e?”

Ma o olal ile riong ve, “Alal or limai.”

²¹ Mako Jisas i ria or ve, “Aveto ava lomumu mire senu nge lek omaing ake tho oma i, kene avele, e?”

Jisas i pamireal ile wainlangaere

(Vonge 8:22-10:52)

Jisas i vles werer toko theki prosnga a rem aka a Betsaida.

²² Ina Jisas ome ile wainlangaere o es mala o velpola nge rem ako a Betsaida, ma tokokoere ako nge rem aken o pasong toko omole ako a Jisas nge me. Na itheki kene i pros ma o ri engeng a Jisas nge ve aro i ronga imeni a toko aken nge.

²³ Mako Jisas i krima imeni ma i tio i a sopopoa la, ma i osuko a toko aken itheki, lama i ronga imeni a i nge, ma i nina i ve, "Thekum vles lale?"

²⁴ A ur e avele na toko aken itheki kene i vles werer, ave rongan itheki vaisis, mako i ria Jisas ve, "Tho thopol tokokoere ako o esu esa ma o ranga ve ini wonre."

²⁵ Lamako Jisas i krimo a itheki, mako toko aken itheki kene i senu ol ma i thopol pat ol ur elonga.

²⁶ Mako Jisas i pake werer ol i a ile vel la. Ma i ria i ve, "Ong mothong tova ong espot a rem lemi."

Pita i ate senu ol a Jisas ve, ini toko pamimionga aka God i ateal i.

(Matiu 16:13-16; Luk 9:18-20)

²⁷ Na Jisas ome ile wainlangaere o es nge rumrem areko o toth aka a Sisaria Pilipai. O eses na Jisas i nina or ve, "Tokokoere kene o rivenga tho ini ao?"

²⁸ Ma o olal ile ninong ve, "Pelie kene o ri ve ong ini a Jon aka ini toko paninuonga, na pelie mun o ri ve ong ini a Elaija, na pelie mun o ri ve, ong ini a God ile riong elnga nomenganga."

²⁹ Ave Jisas i nina mun or ve, "Na thomu mun, thomu o rivenga tho ini ao?"

Ma Pita i olal ile ninong ve, "Ong ini a Krais aka God i ateal ong ve aro ong el werer toko na sengre."

³⁰ Lamako Jisas i nongpol aka o ria i veno aka, ma i pator or ve, "O mothong tova o rimilimlem riong aken a toko na sengre nge."

Jisas i ritet nge ile rinong na ile los wereraing.

(Matiu 16:21-28; Luk 9:22-27)

³¹ Ma Jisas i patea werer mun ile pamirealing nge ile wainlangaere, ma i ria or ve, "Na Toko Pomnga Itun aro i rov sisong aolonga. Na ine Judare oa pompomere, na pris kimangare aro o velilo tomo nge toko pamirealingare nge a Moses ile patorong,

ma or alavusnga aro o pilalpot i mo o ri nge ipunnga mo aro i rin. Naro nang or me aro i vus aro i mimi werera."

³² Mako Jisas i ri molusu i a or nge vene re aken, na Pita i wol a Jisas la ma i vol i nge aka i rimilemu nge ile rinong.

³³ Aveto Jisas i the singal werer ma i thopol ile wainlangaere, mako i vol ol a Pita ve, "Ong ranga ve ini a Satan, wong lo lelpot tho. Ong panes a God ilemi avele, ong panes inga toko ulue angare olemi."

³⁴ Lamako Jisas i leng toko na sengre, na ile wainlangaere a i nge me, ma i patorial or vene, "Aro ve toko e i sis ve aro i panes tho, i mothong tova i panes ol isivenga ilemi. Na aro ve i rov sisong, ur mun e avele aro i rov mun sisong ranga ve aka aro tho rov mun i a won ngoronga nge. I sivenga aka aro i panes inga tho.

³⁵ Eneke toko aka aro ve i sarinal ile mimiong, ile mimiong aken aro i penthal. Na aro ve toko e aka aro i sungpot ile mimiong a tho nge, na nge Panongpolong Sivenga ipanongpolunga, i re inga aken ko aro i krim mimiong aka aro ile vusonga avele.

³⁶ Aro ve toko e ile ur elonga pom, aveto nge ile rinong ioni aro i kerenga, aro ile ur elonga aken i pavurvur aro i opoal i avele.

³⁷ Aro te elo werer onir vava? I pavurvur avele.

³⁸ Na tokokoere nge wop lemi ake o mothong oa Vovo a God na ole vothung i kerenga ol. Na aro ve toko e ile maral nge tho, na ile maral mun nge lek riong, aro Toko Pomnga Itun ile maral mun nge i panen aka tova aro i esu a Titemer a God nge me tomou nge ile tolilisong na ensel riringare."

9

¹ Jisas i ria mun or ve, "Tho ri nunganga a thomu nge, thomu areken ru o voth e, omu pelie aro o rin rongan, naro thomu pelie aro o thopol a God ile menong e nepes aka aro i es tomou me nge ile engengeng aolonga."

Ina Jisas ini peti i eksing ma i relu ol nge a Pita rea ole thopolong.

(Matiu 17:1-13; Luk 9:28-36)

² Lamako nang or limae i lutetu, lama Jisas i wola Pita, na Jems, na Jon ma o roro a tete omole ako polemi, oenga inga ako o men nge. Ma o men ol a tete polemi aken, mako Jisas ini peti i eksing, ma i rel ol nge a Pita rea ole thopolong.

³ Ia teunong kene i veleles ma i tolilis rintet, na i pavurvur aro it toko ulue anga aro te paponganga teunong e veno ako avele, i pavurvur avele.

⁴ Lama ina Elaija ome a Moses o esu a Pen a Urvet me ma o velpoltun a Jisas, na o leng leng tomo e pel na toko or me aken o thopol or.

⁵ Ma Pita ilemi rum senu tel rongan na i ri teltelpot riong e ako a Jisas nge ve, "Pamirealinga, i sivenga aka them me ake them voth, aro them aria valvale or me ake omole aro ini lom, na omole aro ini a Moses ile, na omole aro ini a Elaija ile."

⁶ Pita i ri veno aka, eneke toko or me aken o ngange lale, naro patongti aro i ria ol uneke.

⁷ Na a ur e avele na sepsa a songen i esu me ma i pavlestun or. Lama God ile lenging i espot a songen lemi me ma i ri ve, "Ake ini tuk aka ok sagu rintet i, mo thomu o nongal ikei."

⁸ Lamako, a ur e avele nako toko or me aken, aka ini a Pita rea, otheki mala mala, aveto o thopol toko e avele, Jisas ienga aka ru i voth tomo ol nge or.

⁹ Mako Jisas ome ile wainlanga or me aken, o plosa a tete polemi ma o ruru wereru mun a pen kei thewo me, ma Jisas i pator or, nge ur aka o thopol i lale mo o mothong tova o rimilimlem i mo i pavurvur nge Toko Pomnga Itun ile mimi wereraing nge rinong.

¹⁰ Mako Pita rea o krim inga Jisas ile riong aken, e avele i pamilem ur aka o thopol i na osivenga o nin werer pel nge a Jisas ile riong mirenga aka i ri nge ile mimi wereraing nge rinong.

¹¹ Mako o nin a Jisas ve, "I vova ake toko pamirealingare nge a Moses ile patorong o ri ve Elaija, aro i velpol werer tel lamo Krais aka God i ateal i kene aro i velpol ol a rumongaling, e?"

¹² (v 12a) Na Jisas i olal ole riong ve, "I nunganga, ina Elaija aro i velpol tel a

mukaling, mo aro i paponganga werer ur elonga, lamoko aro Krais i velpol.

¹³ Aveto, tho ria thomu, ina Elaija i velpollale, ave o panes olemi ma o pilalpot i, ranga ve aka God ile erere i ri nge." [Na Jisas ile riong agelalnga aken i ri nge a Jon aka ini toko paninuonga aka i ranga ve ini a Elaija.] (v 12b) Ma Jisas i ria mun ve, "Lomumu rum senu i, God ile erere i ri nge a Toko Pomnga Itun ve aro i rov tel sisison, lamo toko na sengre aro o pilalpot i."

Jisas i pamimi wainlanga omole aka tamata kerenga i rero i.

(Matiu 17:14-19; Luk 9:37-42)

¹⁴ Lamako, Jisas, Pita, Jems, na Jon o lo werer a Jisas ile wainlangaere nge, ma o thopol toko na sengre pulua aka o mit kalual or, na toko pamirealingare nge a Moses ile patorong mun o nin ororo na okei paenal pel.

¹⁵ Lamako Jisas i velpoltun or, ma o thopol i, ma o kukuk. Pelie o song tuntun i ma o pathokeal i.

¹⁶ Ma Jisas i nin a ile wainlangaere ve, "Keumu paenal pel nge uneke?"

¹⁷ Toko omole aka i voth tomo nge or, i olal a Jisas ile riong ve, "Toko pamirealinga, tho pasong tuk tomonnga a ong nge me, aka ine tamata kerenga i voth a i nge, ma i leng leng ol avele, na ini ol i pepe ol.

¹⁸ Tamata ake, i rero i ma i vilvel i a ulue, iwo pupo i tel pel, ma iwo ei i palalas, mako i bebtheng ol. Na tho nong tel lom wainlangaere ve aro o wistetpot tamata ake, aveto o pavurvur nge iwistetpotnga avele."

¹⁹ Lamako, Jisas i ria or ve, "O ken, thomu toko na seng ake o mimi nge wop lemi ake, lomu lemioong tie avele. Thomu o pavus vet inga lek riong, na nang pova aka aro tho voth tomo mun e thomu mo aro lomu lemioong aro i engeng, e? O wol wainlanga atiken me."

²⁰ Mako, o wol ol i a Jisas nge me, ma tamata aken i thopol a Jisas, ma i vurpol a wain aken nge, ma patongti, i matu a ulue, ma i tekther ol, na i kok palalat ol ia molpipere.

²¹ Ma Jisas i nina itema ve, “Na ur ake i patea a i nge penva?”

Wain aken itema i olal ile riong ve, “I patea vet ako nge ile posngaing.

²² Nang pelie ako tamata kerenga aken i soptun i, ma i sis ve i asesa i a won sesenga nge, eve a thei mo i pun rin i. Na aro ve lomum esal them paini mo ong opoal them tova eve ong pavurvur.”

²³ Ma Jisas i ria i ve, “Lomum vava nge riong aken wong ria tho ve, ‘Tova eve ong pavurvur?’ Na aro ve toko e ile lemioong i engeng nge a God, i pavurvur ako aro i oma omaing elonga aken.”

²⁴ Mako ine wainlanga aken itema i olal mun a Jisas ile riong ve, “Lek lemioong i posngaingati, aveto aro ong opoal tho mo ong paengeng lek lemioong.”

²⁵ Lama Jisas i thopol toko na sengre pom ako o tho tuntun i me mo o ri ve o thopol i, ma i vol tamata aken ve, “Ken, ong tamata wo tumnga na telnga gutnga aken, ong lo lelpot nge wainlanga aken, na ong mothong tova lo werer ol a i nge me.”

²⁶ Ma tamata i wal kerere ma i wira wain aken ini peti na a ur e avele na i lopot a i nge, mako tamata aken i alpo selele, na wain aken i ranga ve ini toko rinonga, na toko na sengre ako o thopol i, pulua aka a or nge o ri ve va i rin lale.

²⁷ Ave Jisas i krima imeni ma i pamita i, mako wainlanga aken i mita ol.

²⁸ Lamako Jisas ome ile wainlangaere o eso a vel omole lemi, ma o men nge, ma o nin kine a Jisas ve, “I vova ake them pavurvur aka aro them wistetpot tamata kerenga aken avele, e?”

²⁹ Ma Jisas i olal ole riong ve, “Nongong inga aka i pavurvur nge tamata wistetpot-nga.”

Jisas ile riong aininga nge ile rinong na ile los wereraing.

(Matiu 17:22-23; Luk 9:43-45)

³⁰ Jisas ome ile wainlangaere o losa nge rem aka o voth nge, ma o patea ole esong, ma o es thes a epee aka a Galili. Ma Jisas ini plong ve tokokoere aro olemi mire nge pen aka aro o voth nge.

³¹ Eneke i patoral ile wainlangaere, ma i ria or ve, “Aro o rere a Toko Pomnga Itun,

naro o sungu i a ngarangre omeni mo aro o so rin i, lamo nang or me aro i vus naro i mimi werera mun.”

³² Aveto Jisas ile wainlangaere olemi mire senu nge ile riong aken mirenga avele, aveto o nina i nge avele, eneke o ngange nge i.

Jisas ile wainlangaere o nin pel ve, anga i pomnga nge or.

(Matiu 18:1-5; Luk 9:46-48)

³³ Lama Jisas ome ile wainlangaere o es mala o velpola nge rem aka ini a Kaperneam. O eso nge vel omole lama Jisas i nin ile wainlangaere ve, “Te es a sovengalo na riong kathnga aton keumu paenal pel nge, e?”

³⁴ Ave o olal ile ninong avele, eneke ole mara, eneke a sovengalo o ri nge aka anga aro i pomnga nge or.

³⁵ Lama Jisas i menu, na i leng veliloalo ile wainlanga or mule pa omole pothoi or aini aken ma i ria or ve, “Aro ve omu e i sis ve aro i mukal, i sivenga aka aro i paposngau i na i velpol ini tokokoere ole umonga.”

³⁶ Lama Jisas i ti wain omole atiko me ma i pamitu i a oa lemimi ma i rekukalo i, Na i ria or vene:

³⁷ “Na aro ve toko e i nongpoo wain e atiko i vene ake, eneke ia sagu tho, aken kene i nongpoo ake ini tho. Na toko aka i nongpoo tho kene i nongpoo engek avele, i nongpoo mun a God aka i pakeu tho me.”

Toko aka ile ngarang a Krais avele, aro i opoal i.

(Luk 9:49-50)

³⁸ Jon i ria Jisas ve, “Pamirealinga them thopol toko omole e aka i el engengeng nge iom na i wistetpot tamata kerenga nge, aveto them rial i, eneke i voth tomo nge it avele.”

³⁹ Ma Jisas i ria or ve, “Thomu o mothong tova o rial i. Na aro ve toko e i el engengeng nge iok mo i oma pathepolong, aro i eksing viri viri ilemi mo i ri moluplup tho, kene avele.

⁴⁰ Eneke toko aka ile ngarang it avele, aken ini thenger.

⁴¹ Tho ri nunganga a thomu nge, aro ve toko e i ri ve i opoal thomu, eneke ilemi

mire ve thomu ini lek, naro ile opoaling tie a thomu nge ve aro i sung thei tie a thomu nge mo thomu o thin i, aken aro God ilemi simikal i avele, eneke panen aro i el iolonga nge.”

Thomu o modoppot ur aka i paleklek thomu, eneke aro o mit e riong aolonga a God itheki.
(Matiu 18:6-9; Luk 17:1-2)

⁴² Ma Jisas i ri ve, “I sivenga avele nge toko aka i paleklek wainlanga pelie aka o nongal keik. Na toth aka aro toko aro i paleklek wainlanga areko o venen aken, i sivenga nge i aka aro thomu o kino we a anal aolonga nge, na o ato i a ikei mo o asesu i a theyv stha mo i vlu. Moro aken i paleklek wain areken avele, naro God i sung paomelaling aolonga a i nge avele.

⁴³ Aro ye menum omole i toth aka aro i paleklek ong, i sivenga aka aro ong vanropot i mo ases i. Mo i sivenga aka aro menum ia potom ol moro aken aro ong krim mimiong sivenga aka aro ile vusonga avele. Na aro ve menum alaini i sivenga mo i paleklek ong kena o asesu ong a pen aka won sesenga aolonga i voth nge aka aro ile vusonga avele.

⁴⁴ [Na ine vuvepun a nuet aro i an toko aken ini peti, naro ile vusonga avele, na ranga ve mun nge sisong nge won sesenga, aro ile vusonga mun avele.]

⁴⁵ Na aro ve evom omole i toth aka aro i paleklek ong, i sivenga aka aro ong vanropot i mo ases i. I sivenga aka aro evom omole ia potom ol, aveto aro ong krim mimiong sivenga aka aro ile vusonga avele. Na aro ve evom alaini i sivenga mo i paleklek ong kena o asesu ong a pen aka won sesenga i voth nge aka aro ile vusonga avele.

⁴⁶ [Na ine vuvepun a nuet aro i an toko aken ini peti, naro ile vusonga avele, na ranga ve mun nge sisong nge won sesenga, aro ile vusonga mun avele.]

⁴⁷ Aro ve thekum omole i toth aka aro i paleklek ong, i sivenga aka aro ong mon prelpot i mo ases i. I sivenga aka aro thekum epee kek inga maken aro panen aro ong eso a God ile menong a nepes lemi. Na aro ve thekum alaini i sivenga mo o paleklek ong, aro o asesu ong a pen

ako won sesenga i voth nge aka aro ile vusonga avele.

⁴⁸ ‘Na ine vuvepun a nuet aro i an toko aken ini peti
aro ile vusonga avele,
na ranga ve mun nge sisong nge won sesenga,
aro ile vusonga mun avele.’ *Aisaia 66:24*

⁴⁹ Tokokoere o pasivenga aning nge au, ranga ve ini mun i tongporumong i pasivenga mun tokokoere.

⁵⁰ “Au aka ini ur aka i sivenga nge aning palemanga, aveto aro ve imosisennga i vus i pavurvur ol avele aka aro toko e i pamosisen werer mun i. I sivenga aka aro lomu vothung i ranga ve ini aning aka au i palema i mo aro lomu vothung aro i sivenga nge pel e titeumuere.”

10

Jisas ile patoraling nge toko iewo mothongpotngka.

(Matiu 19:1-9; Luk 16:18)

¹ Jisas i los lelpot nge pen epee aka ru i voth nge, ma i es nge epee aka a Judia, na i mon kora a thei a Jordan, ma i mona a wo epee la. Lama toko na sangre pom aka o es me ma o velilo pel a Jisas nge me, na i panongpol or nge a God ile riong. Na Jisas ile vothung i vene re aken, i patoral toko na sangre a pen elonga.

² Lama Parisi pelie o es a Jisas nge me, ma o tongporum i mo o rive o patelek i nge ile mire, na o nina i ve, “Nge Judare ole patorong, i pavurvur aka aro toko e i mothongpot iewo sengenga eve avele?”

³ Lama Jisas i olal ole riong ve, “Moses ile patorong i ria thomu vava nge riong aken, e?”

⁴ Lama o olal ile ninong ve, “Moses i ri ve,
‘Aro ve toko e i mothongpot iewo sengenga,
aro i watu erere
mo i ritet nge ole pagatalpeeling
nge ole peangeong.’” *Lo 24:1-4*

⁵ Aveto Jisas i ri werer mun a or nge la ve, “Moses i wat venen aken, eneke i mrela ol nge lomungare ole telnga plaing

nomenga, mako i watu ol riong ake nge thomu.

⁶ Aveto nge ur alavusnga opateanga nomenga God i ripot nge peangeong le kerengaing avele. I vene re inga ako God ile erere i ripot i lale ve,
'I pavelpol totomone na seng.' *Stat 1:27; 5:2*

⁷ Make nomenga ma me i pavurvur ol ponange

'Toko na seng o lo lelpot onina na otema, naro or paini o men tomo ol nge pel,
⁸ na menong nge ewopeling aro i omole ol inga' *Stat 2:24*

I vene re aken na or paini or or aini ol avele, or kene or omole ol inga.

⁹ Mako peangeong ako God i kin i lale, toko e i mothong tova i parerelu ol i."

¹⁰ Lamako Jisas ome ile wainlangaere, o eso werer mun a vel aken nge, mako o nin i nge ile pamirealing nge peangeong.

¹¹ Ma Jisas i ria or ve, "Na aro ve toko e i mothongpot iewo, na i peange mun nge seng relnga e, toko aken kene i oma vothung kerenga nge iewo teltelnga, eneke i ngo tomo nge seng ponganga ma toko aken i aom seng.

¹² Na seng mun e, aro ve i mothongpot iewo na i peange werer mun nge toko relnga e, seng aken kene i oma vothung kerenga nge iewo teltelnga, eneke i ngo tomo e toko ponganga ma seng aken kene i aom toko."

Jisas ilemi sivenga nge wainlangaere.

(*Matiu 19:13-15; Luk 18:15-17*)

¹³ Toko na seng pelie o pasong otutunre a Jisas nge la, mo aro Jisas i ronga imeni a or nge mo i sungu riong sivenga a or nge. Aveto Jisas ile wainlangaere o vol or.

¹⁴ Ma Jisas i thopol i veno ako, ma ilemi kene i sivenga avele nge ile wainlangaere ma i ria or ve, "Somu wom wainlanga tutunre mo o es a tho nge me, na o mothong tova o mit roal or, eneke tokokoere ako olemio a tho nge, ranga ve ini wainlanga tutun areke olemio a tho nge, God ile menong e nepes i voth a or nge.

¹⁵ Na tho ri nunganga a thomu nge, aro ve toko ako i el inga a God ile menong e nepes ranga ve ini wain aken i ela itema

ile sungong, ma ilemi pelekpol nge avele, aken aro i pavurvur aka aro i eso a God ile menong e nepes, aveto aro ve i el i ranga ve ini wain aken avele, aro i eso nge avele."

¹⁶ Ma Jisas i ri vene re aken, lama i rekukalo wainlanga atiiken ma i ronga imeni a or omole omole nge na i ria or ve, "God aro i paengeng thomu."

Jisas ile pamirealing nge toko aka ile ur elonga pom.

(*Matiu 19:16-30; Luk 18:18-30*)

¹⁷ Jisas i los lelpot nge rem aka i voth nge, na i patea inga ile esong, nako toko omole e aka i tho a i nge la, ma i koru ieve ma ipo tiru a i nge ma i nin a Jisas ve, "Pamirealinga sivenga, ur nekenga aka aro tho oma i mo tho krim mimiong aka aro ile vusonga avele, e?"

¹⁸ Lama Jisas i olal ile ninong ve, "Lommum rum senu tel nge lom riong aka ong apet tho ve tho ini toko sivenga, eneke toko e avele aka i sivenga, ini inga a God ienga inga aka i sivenga.

¹⁹ Na lomum mire nge a Moses ile patorong lale, mothong toko so rinnga na mothong tova ong ngo tomo e seng relnga e, na kemong na riong le apaltitetonga, na mothong tova ong theseal tokokoere ole ur elonga, naro ong papomnga inga ninom ome tomom." *

²⁰ Mala toko aken i ria Jisas ve, "Pamirealinga, Moses ile patorong alavusnga areken tho panes i nomenga nge lek kulpoaing ma me i pavurvur ponange."

²¹ Ma Jisas i nongpol i veno aka, mako i the rengrengtun i, ma ilemi esal i, ma i ria i ve, "Aveto ur omole aka kene ong oror nge, i sivenga aka aro ong tepolal lom ur alavusnga nge umtun na sungu i a toko le ur avelengare nge, na aro ve ong oma i venen aken, aro lom ur elonga pom ake ro a Pen a Urvet lemi. Lamo ong es me mo ong panes tho."

²² Aveto toko aken i nongpol i veno aka ma ipowe ruru nge, ma ilemi kerere nge, ma i es lelpot nge a Jisas, eneke ini toko le urnga.

* **10:19:** Kisim Bek 20:12-16

²³ Lama Jisas i the werer a ile wainlangaere nge ma i ria or ve, “I klip rintet nge toko le urngare ako aro o eso a God ile menong e nepes lemi.”

²⁴ Mako ile wainlangaere o kukuk nge ile riong, aveto Jisas i ria mun or ve, “Titeikre, i klip nge toko e ako aro i eso a God ile menong e nepes lemi.”

²⁵ Na i klip nge mekerem aolonga ako ini Kamel aka aro i koro a italonga tiona nge, aveto i klip rintet nge toko le urnga aka aro i eso a God ile menong e nepes lemi.”

²⁶ Aveto Jisas ile wainlangaere o kukuk rintet nge ile riong aken ma o nina i ve, “Na aro ve i vene aken ma aro God i pamimi ol anga, e?”

²⁷ Mako Jisas i the vengveng a or nge la ma i ria or ve, “Nge ur ake tokokore osivenga ole engengeng i pavurvur avele, aveto a God nge, i engeng avele, i pavurvur aka aro i oma ur alavusnga aken.”

²⁸ Lamako Pita i mita ma i ria i ve, “Thopol, them ovru lemem ur elongare, nako them panes ol ong.”

²⁹ Ma Jisas i olal werer ile riong ve, “Tho ri nunganga a thomu nge, aro ve toko e i los lelpot nge ile vel na ititeinre na ilulunre na inina ome itema na itutunre na ia ometare, aka nge panesngek na nge Panongpolong Sivenga panongpolnga,

³⁰ aro nge wop lemi ake, God aro i olal ile ur elonga areken, mo aro i pom rintet, ranga ve ini velre na ititeinre, na ilulunre na ininaere, na itemimaere na itutunre na ia ometare. Na tomo e ur areken aro i rov matheong aolonga nge tokokoere, aveto panen aro i krim mimiong aka aro ile vusonga avele.

³¹ Na tokokoe areko ponange o mukal na o pomnga, panen aro o rumongal na or ini toko vulutnga, na areko o rumongal, panen aro o mukal ol.”

Jisas ile riong menga nge ile rinong na nge ile los wereraing.

(Matiu 20:17-19; Luk 18:31-33)

³² Jisas ome ile wainlangaere o eses a Jerusalem a sovengalo, ma Jisas i mukal ole, aveto ile wainlangaere kene olemi ngo pelekpol na toko na sengre aka o panes or kene o ngange, eneke o rivenga aro

ngarangre o so rin a Jisas a Jerusalem. Ma Jisas i wol ile wainlanga or mule pa omole pothoi or aini lama oenga o men rel, ma i ria or, nge ur areko aro i velpol a i nge.

³³ Ma i ria or ve, “O nongpol i, te esa ol ake a Jerusalem la na toko e aro i sung Toko Pomnga Itun a pris kimangare na toko pamirealingare nge a Moses ile patorong omeni, naro o pamit i nge riong mo aro o so rin i. Naro o sungu i a toko relnga pelie omeni.

³⁴ Naro o ri silil nge i. Naro o osuklilel i na o so litlit i, naro o so rin i. Naro nang or me aro i lutetu lamoko i mimi werera mun.”

*Jems ome a Jon o sis ve aro o pomnga.
(Matiu 20:20-28)*

³⁵ Lamako Sebedi itun aini aka ini a Jems ome a Jon or paini o es a Jisas nge ma o ria i ve, “Pamirealinga them sis ve aro them nong ur omole a ong nge mo ong mothong tova pamumatal i a them paini nge.”

³⁶ Mako Jisas i nina or paini ve, “O sis ve aro tho oma ur nekenga nge thomu paini?”

³⁷ Mako or paini o ria i ve, “Panen aro ong meno a lom menonga nge, nge lom menong e nepes, them sis ve aro ong papomnga them paini mo emem e i men a menu sivenga nge anga, na emem e i men a menu kerenga nge anga.”

³⁸ Ma Jisas i tongporum or paini olemi nge sisong aka aro i el i na nge ile rinong ma i ria or paini ve, “Thomu paini lomumu mire senu nge ur aka thomu paini o nong i, kene avele. I pavurvur aka aro thomu paini o el sisong aka ranga ve tho el i? Naro thomu o rin mun ranga ve ini tho? Aro thomu paini o pavurvur avele.”

³⁹ Aveto or paini o el senu a Jisas ile riong mirenga avele, ma or paini o olal a Jisas ile riong ve, “Them paini them pavurvur.”

Mako Jisas i ria or paini ve, “Sisong aka aro tho el i, aro thomu paini aro o el mun i, na thomu paini aro o rin mun ranga ve ini tho.

⁴⁰ Aveto ake ini lek omaing avele aka aro tho sirum toko e aka aro i men a menik sivenga nge anga na e aro i men a menik

kerenga nge anga, God isivenga vengveng ako aro i sungu menong aken nge areko i monsi or nge lale.”

⁴¹ Lama othangangaere or mule pa omole aken o nongpola nge riong aken, ma olemi klingtun titein pel aini aken.

⁴² Mako Jisas i leng veliloalo or a i nge, ma i ria or ve, “Lomumu mire nge tokokoe areko o panes a God avele, ole vothung i vene, ole mukalingare o panisisis or na oa pompomere ole patorong engenga i kin or.

⁴³ Aveto lomu vothung aro i venen aken avele, aro ve omu e i sis ve aro i pomnga nge thomu, i sivenga aka aro i oma ranga ve ini thomu vusnga lomu umonga.

⁴⁴ Na aro ve omu e i sis ve aro ini thomu vusnga lomu mukalinga, i sivenga aka aro i paposnga isivenga naro i velpol ini thomu vusnga lomu omainga.

⁴⁵ Aro thomu o paposnga thomu vene re aken, eneke tho ini omu pomnga na tho ini lomu umonga, Toko Pomnga Itun i velpol ake ve aro toko na sengre o opoal i avele, i es inga ake me ve aro i opoal or naro i sungpot ile mimiong mo aka aro i el werer or mo i pavthopot or.”

Jisas i pamimi toko theki prosnga aka iion a Bartimeus.

(Matiu 20:29-34; Luk 18:35-43)

⁴⁶ Jisas ome ile wainlangaere o es mala o velpol a rem a Jeriko, lama o plosa ma o espot tomo e Jeriko anga pelie, mala o sangpolo toko theki prosnga aka iion a Bartimeus, na itema iion a Timeus, i men inga a sovengalo wo peti. Ma i nong ur elonga a tokokoere nge.

⁴⁷ Ma i nongpol aka Jisas aka ini toko Nasaret anga aka i es me, ma i lenga viringa a i nge ve, “Jisas, lemik mire nge ve ong ini a Devit itevinga, aro lomum esal tho mo opoal tho.”

⁴⁸ Mako toko pelie o ria i ve, “Ong men poreng.” Ave i kenkeno inga nge lenging ma i presa viringa ve, “Devit itevinga aro lomum esal tho mo opoal tho.”

⁴⁹ Mala Jisas i mitu ma i ria or ve, “Oleng toko aken me.”

Mako o leng theki prosnga aken ve, “Sapase ong lale aken, mita Jisas i leng ong lale.”

⁵⁰ Mako i mit viriala ma i asespote tekruk seltunnga na i es a Jisas nge.

⁵¹ Ma Jisas i nina i ve, “Ong sis ve aro tho oma ur nekenga nge wong?”

Mako toko theki prosnga aken i ria i ve, “Pamirealinga tho sis ve aro thekik alaini i lema mo tho the ol.”

⁵² Mako, Jisas i ria i ve, “Es la, lom lemioong inga aka i pamimi ong lale.” Na a ur e avele, nako i the ol ma i panes ol a Jisas a sovengalo la.

Jisas i el sisisong na i rin lama i los werera mun

11

(Vonge 11:1-16:20)

Jisas i eso a Jerusalem ranga ve ini nepes.

(Matiu 21:1-9; Luk 19:29-38; Jon 12:12-15)

¹ Jisas ome ile wainlangaere o es mala o totho a rem pomnga a Jerusalem, o es mala o velpol e rem or aini aka oion a Betpage na Betani, aka o voth a tete a Oliv sa thewo. Ma Jisas i pakepot ile wainlanga or aini.

² Ma i ria or paini ve, “Thomu paini o es inga nge rem tothnga aken, mo o thopolo donki aponga omole aka tova o pating i ma i mitit, ma donki aken, toko e i men ruma nge rongan, mo thomu paini o inospot i mo o ti i me.”

³ Na aro ve e i nina thomu paini ve, ‘‘Thomu o vo neke aken?’’ Mo o ria i ve, ‘‘Toko Pomnga ile omaing nge, naro i pasong werer mun i a ong nge me.’’

⁴ Lamako o es ma o thopol donki aponga aka i mit tothpot a sovengalo, aka o kino ipatinga a vel thekia ma or paini o es mala o inospot i.

⁵ Areko o mit kene o nina or paini ve, “O vo neke aken o inospot donki aken, e?”

⁶ Mako or paini o ria or nge riong aka Jisas i ria or paini nge, mako o nongpol i vene aken, ma o ria or paini ve, “I sivenga.”

⁷ Mako or paini o inospot donki aponga aken, ma o ti i a Jisas nge la, ma o pavlesa ole tekruk seltunnga pelie a donki ikime, lamako Jisas i thoteta ol nge.

⁸ Lamako toko na sengre pom o ela ole tekruk seltunnga pelie ma o vlesu i a sovengalo, na pelie o tokor won meni thoing thoinga a ometa lemi ma o ul ul i a sovengalo mo Jisas i es selal nge.

⁹ Na toko na sengre pelie o mukal na pelie o rumongal ma o anuepot i a sovengalo, ma olemi sivenga na o onnga onnga na o ri ve,

“Te risea God iion roro.”

“Sapase toko ake i velpol aka nge a Toko Pomnga iion.” *Buk Song 118:25-26*

¹⁰ “Sapase toko ake aro i velpol ini ler nepes

ranga ve ini titevir nomenganga aka ini a Devit.”

“Te risea God iion roro a Pen a Urvet.”

¹¹ Lamako Jisas ome ile wainlangaere o es mala o velpol a Jerusalem, ma o eso a Lotu Tepun a Vel a lok lemi ma o theu thea nge ur elonga aka ru i voth nge, ave penieo lale, mako o losa ma o es werer nge rem aka ini a Betani.

Jisas ilemi klingtun pupos.

(*Matiu 21:18-22*)

¹² Ma erangu ve lelken ol, ma Jisas ome ile wainlangaere o plosa a Betani ma o es, ma Jisas mesipun i.

¹³ Ma i thopol pupos* omole aka la, ma i eso totho nge ma i sis aka ve, i vurpot monnga mo i an i, aveto avele, ini inga thoing popepenga, eneke e wop lemi aken ini pokin po avele.

¹⁴ Mako Jisas i ria won aken ve, “I pavurvur ponange na panen aro ong mon ol avele ol.” Ma i ria venen aken na ile wainlangaere o nongpol i.

Jisas i wistetpot areko o tepolal pel e ur elonga a Lotu Tepun a Vel a lok lemi.

(*Matiu 21:12-16; Luk 19:45-47; Jon 2:13-16*)

¹⁵ Jisas ome ile wainlangaere o velpol a Jerusalem ma o eso a Lotu Tepun a Vel a lok lemi ma Jisas i es ol ma i wistetpot areko o tepolal pel e ole ur elonga, ma i patheki ru areko ole ring aka o tepolal umtun relnga nge,[†] na i patheki ru mun areko o pamen ole pothu olingare ole menonga.

* **11:13:** Pupos aka i paateal Israelre. † **11:15:** O ela Romre ole umtun na o tepolal i nge lotu a umtun, aveto pelie ini ole

¹⁶ Ma i rial or nge ve, o mothong ol tova o elo ol ole ur elonga a epee aka ru Lotu Tepun a Vel i mit nge.

¹⁷ Na i pamireal or ve, “God ile erere i ri vene:

‘Lek lotuonga a vel aro ini nongonga a vel, nge tokokoere aka a pen elonga.’ *Aisa 56:7*

Aveto thomu o oma i ranga ve ini toko kemongare ole vel.”

¹⁸ Lamako, pris kimangare na toko pamirealingare nge a Moses ile patorong o nongpola i venen aken, ma oni plong ve aro Jisas iion i pomnga nge or, mako o ortet sovengalo e aka aro o so rin a Jisas nge, eneke toko na sengre pom aka olemi sivenga nge a Jisas ile pamirealing.

¹⁹ Ma penieo me, lamako Jisas ome ile wainlangaere o losa mun a Jerusalem, ma o es.

Aro ve ler lemioong i omoletet, aro te thopol ler nongong olalnga.

²⁰ Erangu ve nge lelken rulpoalal, na Jisas ome ile wainlangaere o lo mun a Jerusalem la, ma o thopol mun pupos aka Jisas ilemi klingtun i ma won aken kene ithoing molitu lale.

²¹ Mako Pita i thopol i ma ilemi rumtetu a Jisas ile riong nine anga ma i ria Jisas ve, “Pamirealinga, thepol, won ake tomo lomum klingtun i nine, i ke ro, i mene ol lale.”

²² Mako Jisas i ria i ve, “Lom lemioong aro i voth a God nge.

²³ Tho ri nunganga a wong nge ve, aro ve toko e i ria tete aka mo i ria i ve, ‘Ong talela mo ong pamupot a rua.’ Make God aro i opoal i nge ur aken, aveto toko aken i mothong tova ilemi pelekpol, na aro ve ile lemioong i engeng nge a God, aro ile omaing aken aro i velpol mo i nunganga.

²⁴ Thomu o nongpol senu i, aro ve thomu o nong ur omole aka a God nge, na lomu lemioong i engeng ve ur aken aro i velpol, maken aro o thopol lomu nongong olalnga.

²⁵ Aro ve wong oma nongong, na aro ve lomum rum toko e aka i oma vothung kerenga a ong nge, i sivenga aka aro

lomum simikal toko aken ile vothung kerenga ako i oma i a ong nge, na aro ve i vene aken, aro om Vovo ake ro a Pen a Urvet lemi aro i patitepot lom vothung kerenga.

²⁶ [Aro ve lomumu simikal titeumuere nge ole vothung kerenga aken avele, aro Titemer ake ro a Pen a Urvet lemi, aro ilemi simikal lomu vothung kerenga mun avele.]

Toko pelie o nin a Jisas ve, “Anga i ateal wong aka aro ong oma omaing aken, e?”

(Matiu 21:23-27; Luk 20:1-8)

²⁷ Ma Jisas ome ile wainlangaere o lo werer mun a Jerusalem, ma o eso a Lotu Tepun a Vel a lok lemi. Mako pris kimagare na toko pamirealinga nge a Moses ile patorong pelie tomo nge Judare oa pompomere, or alavusnga o es a Jisas nge me.

²⁸ Ma o nina i ve, “Omaing elonga areko ong oma i, anga i ateal ong ve aro ong oma i? Na anga i sung engenging a ong nge, e?”

²⁹ Mako Jisas i ria or ve, “Aro tho nin mun thomu nge lek ninong omole, na aro ve thomu o olal lek ninong, tho mun aro tho ria thomu nge lek omaing tepun ake tho um nge.

³⁰ Lek ninong kene i vene, Anga i pake a Jon aka aro i paninu toko na seng, e? God i pake i, eve toko ulue anga i pake i? Thomu o olal vet i a tho nge me.”

³¹ Mako o nin werer pel osivenga vene: “Aro ve te olal i a i nge ve, ‘God i pake a Jon,’ mako aro i nin werer it ve, ‘Na i vova ake thomu o nongal nge i avele, e?’”

³² O ri ve aro o olal werer i a i nge ve, “Jon ile paninuong ake ini ur ulue anga.” (Aveto o ngange nge toko pulua, eneke toko pom aka o papomnga a Jon, ke o rivenga ini a God ile riong elngae e.)

³³ Mako o olal i a Jisas nge ve, “Lemimem mire nge avele.”

Mako Jisas i ria werer mun a or nge ve, “Na i pavurvur mun aro tho ria thomu nge lek omaing tepun ake tho um nge avele.”

12

*Riong agelalnga nge Judare aka o rangga ve ini ometa theal tetalnga areko o kerenga.**

(Matiu 21:33-46; Luk 20:9-19)

¹ Ma Jisas i ria ile riong agelalnga a toko na sangre nge ve, “Toko omole aka i lesu vain a ometa, ma i avalalo i ma i tou vol aka aro o tepiplas vain monnga nge mo ei i lelu nge la. Lama i pipera mun mavupo aka mo ini vain a ometa theal tetalnga ile. Ma i pathealu tokokoe pelie mo o theal ia ometa aken. Naro i es nge rem relnga e mo i voth tel nge.

² Lama nge vain le motuong[†] ma i pakepot ile umonga omole ma i es a tokokoere aka o theal tetal ia ometa aken, eneke i sis ve aro i ela aning epee mo ini imeni olonga.

³ Aveto o rere umonga aken ma o siso i, lamako o wispot i ma i es polpol werer inga la.

⁴ Lama ometa tokoninga i pake mun e la, aveto o sobilepu ipounga lamako o palemarau i.

⁵ Lama ometa tokoninga i pakepot mun ile umonga omole, makola o pun rin ol i, lama i pakepot mun ile umonga pelie na i pakepot or omole omole la, ave o someng pelie na o so rin pelie.

⁶ Omole ol rongan i voth aka ini itun aka ia sagu rintet i, na i pakepot mun itun a or nge lama i ri ve, ‘Aro o wen ol i, ke ini tuk’.

⁷ “Aveto ometa thealngare, o rirum pel nge ve, ‘Toko aken aro i rorol itema nge ile ur elonga ma ini ile ol. Ita, aro te so rin i mo ile ur elonga ake aro ini ler ol.’

⁸ A ur e avele na o rere i, ma o pun rin i ma o asespot i a lok kime.”

⁹ Na Jisas rongan i ri, ma ria ve, “Ur nekenga aka aro ometa tokoninga aro i oma i, e? Aro i es mun a ometa mo i pun rin tokokoe areken mo i sungu ol ia ometa aken a toko rerelire nge.”

¹⁰ Ma Jisas i ri riong agelalnga ve, “Lomumu rum senu nge riong aka a God ile erere i ri vene:

‘Um aka vel aringare o rivenga

* 12:: RP Nge riong agelalnga ake ometa tokoninga ini a God, na ile umongare ini a ile riong elngare, na toko rerelire ini it † 12:2: Vain le motuong i pavurvur nge tovu po or lim

i kerenga ma o siv lelpot i,
ake kene i velpol ini um a ur vet
ako i paengeng vel
ranga ve ini wovek sapatanga.

11 Toko Pomnga i papomnga um aken,
ma te thopol i
ma te ri ve i sivenga rintet.’ ” *Buk Song 118:22-23*

12 Lama pris kimangare na toko pamire-alingare nge a Moses ile patorong, o nongpol riong agelalnga aken Jisas i ri nge, ma olemi mire ako ve, Jisas i oma riong aken nge or, mako o ortet sovengalo aka aro o rere a Jisas nge, ave o ngange nge toko na sengre, mako o los lelpot ol nge a Jisas, mako o es.

O tongporum a Jisas nge ninong.
(Matiu 22:15-22; Luk 20:20-26)

13 Lama mukalinga areken o pakepot Parisi pelie na Herot ile tokokoe pelie ma o es a Jisas nge, ma olemi aka ve, o olotet i nge riong pelie.

14 Ma o es a i nge me ma o pawomwomal i ve, “Pamirealinga, lemimem mire aka ve, lom riong kene i nunganga, ma wong nongal nge toko kimanga na toko vulutnga ole ri ololoing avele, na ong pamireal nunganga aka nge a God ile riong. Naro ong ria them, i vava, nge ler patorong i pavurvur aka aro te ul inga takis a nepes a Sisar nge, eve avele?

15 Aro te ul i eve te mothong?”

Aveto Jisas ilemi mire nge ole le apaltite-tong ma i olal ole riong vene, “I vova ake thomu o ri ve o tongporum tho, e? O sungu umtun alavatharnga omole me mo tho thopol vet i.”

16 O sungu omole a i nge lama i nina or ve, “Anga ia sei ake na anga iion ake?”

Ma o olal ile riong ve, “Ina nepes a Sisar ile.”

17 Lamako Jisas i ria or ve, “Ur aka ini a Sisar ile aro thomu o sung werer i a Sisar nge, na ur aka ini a God ile aro thomu o sung werer i a God nge.”

O nongpol i ma o kukuk nge ile riong olalnga.

Sadiusire o nin a Jisas nge toko aro i rin lamo i mimi werera.
(Matiu 22:23-33; Luk 20:27-38)

18 Ma ine Sadiusi pelie aka o es a Jisas nge me, na ini tokokoe areko olemi aka ve, toko aro ve i rin, i pavurvur aro i mimi werera ol avele. Mako o sis ve aro o olotet a Jisas nge ninong ve,

19 “Pamirealinga, nomenga aka, Moses i wat patorong omole aka ve, ‘Aro ve toko i rin petetun iewo, na otun e avele, aken aro itein posnga aro i ewo werera mun itein pomnga ia basu, mo aro i pavelpol wain e mo ini itein pomnga ile mo ilengare o mothong tova o vus.’ ”[‡]

20 Mako o rirum ol i ve, “Na titein pel or limai o voth, na otein pomnga i ewoa tel seng lama i rin petetun iewo sengenga aken na otun e avele.

21 Lama otein aininga i ewoa mun seng aken, ave i rin petetun mun i na otun mun e avele, na otein menga i ewoa mun seng aken ma a vothung re inga aka ini omole.

22 Na or alalimaipot o ewoa seng aken, na otutun e avele, lamako patopalalnga ol seng aken kene i rinpot mun.

23 Ken, them ri ve them nina ong, na aro ve panen nge los wereraing aro seng aken aro ini ol i kathnga iewo ol, e? Eneke or alalimaipot o ewoa i.”

24 Ma Jisas i olal i a or nge ve, “Ava lomumu mireo vet tie avele nge God ile erere ile riong, na lomumu mire mun nge a God ile engenging avele. Taro aken lomu lemi rumong i kerenga.

25 Na nge los wereraing panen anga, aro peangeong ol avele, aro o men ol inga ranga ve ini a God ile enselre ake ro a Pen a Urvet lemi.

26 Aveto lomu pamirealing nge areko o rin lale ve aro o mimi werer ol avele, aro tho ria mun tie nge aken. Thomu o total erere nomenganga aka Moses i wat i, aveto lomumu mire senu nge avele. Nge tenesing aka e won pok a vutvutnga aka won sesenga i apola nge, ma God i ria Moses vene:

‘Tho ini a God aka ini a Abraham ile na Aisak ile na Jekop ile.’

Kisim Bek 3:6

[‡] 12:19: Lo 25:5

²⁷ Toko or me aken o rin nomenga, aveto ooni rongan i mimi, mako God ini toko mimingare ole God na ini toko rinongare ole avele. Thomu o leklek rintet nge lomu riong aken ve toko aro i rin naro ion i vus.”

*God ile patorong mukalinga.
(Matiu 22:34-40; Luk 10:25-28)*

²⁸ Lama toko pamirealinga nge a Moses ile patorong omole i nongpol ako Jisas ome tokokoere o pun pel nge riong, ma i nongpol ako Jisas i olal senu Sadiusire ole riong, mako i nin a Jisas ve, “Na nge a God ile patorong, kathnga aka i mukal nge patorong elonga?”

²⁹ Ma Jisas i olal ile riong ve, “Patorong aka i mukal rintet kene i vene: ‘It toko na sengre a Israel, o nongpol me. God, aka ini ar Pomnga, ienga inga aka ini a God.

³⁰ Naro omu sagu a God, aka ini ar Pomnga, nge opomu alavusnga na onumu alavusnga na lomumu alavusnga na nge lomu engenging alavusnga.’ §

³¹ Na God ile patorong aininga nge it, kene i vene: ‘Aro omu sagu thongongo-muere ranga ve aka omu sagu sivengomu.’ ** Patorong ol e avele ol aka aro i mukal nge patorong or aini ake.”

³² Lama toko pamirealinga aken i ria Jisas ve, “Pamirealinga, lom riong aken kene i nunganga, God ienga inga aka ini a God, na e avele ol ini ar God.

³³ I nunganga aka aro ar sagu i nge opor alavusnga, na nge nir alavusnga, na nge ler engenging alavusnga, naro ar sagu mun thengengerre ranga ve aka ar sagu sivenger, na aro ve te panes riong or aini ake, ake ini vothung sivenga aka i mukal nge sungong elonga aka it Judare te pavothal ler lotu nge.”

³⁴ Ma Jisas i nongpol aka i olal senu ile riong ranga ve ini toko aka ile mire i sivenga. Mako i ria i ve, “Wong toth lale aka aro ong velpol ini a God ilenga.” Mako toko alavusnga aken kene o ngangeal ol a Jisas ma i pavurvur ol aro e i nina ol i nge ninong ol e avele.

§ **12:30:** Lo 6:4-5 ** **12:31:** Wok Pris 19:18

Krais ini pamimionga aka God i ateal i, na ini a Devit ilenga eve avele?

(Matiu 22:41-46; Luk 20:41-44)

³⁵ Jisas i men a Lotu Tepun a Vel a lok lemi, ma i patorial toko na seng alavusnga, ma i ria or ve, “Toko pamirealingare nge a Moses ile patorong o ri ve Krais ini pamimionga aka i velpol a Devit ikime mo aro ini nepes ranga ve ini a Devit. Na i vava ake o ri vene ake, e?

³⁶ Eneke nomenga aka, Oni Riringa i meno a Devit nge, mako Devit i wat riong ve,

“‘God i ria ok Pomnga ve,
“Ong meno a lok seik me,
a menik sivenga nge anga,
i pavurvur aka aro la
tho paesu lom ngarangre a som
thewo,
mo aro lom mong or.”’ *Buk Song 110:1*

³⁷ Na nge riong inga aken, Devit i apet a Krais ini ‘ia Pomnga.’ Na ile riong ake i pathengal it ve, Krais i voth tel lale. Na i vova ake o ri ve Krais ini inga a Devit itevinga na i velpol a rumongaling nge i, e?”

Na tokokoere pom o nongpol i veno aka ma oleli sivenga nge a Jisas ile riong aken.

Toko pamirealingare nge a Moses ile patorong ole vothung.

(Matiu 23:1-7; Luk 20:45-47)

³⁸ Na Jisas i pamireal or ve, “Thomu o nakalal thomu nge toko pamirealingare nge a Moses ile patorong ole vothung, eneke o sis ve o magon tomo nge oa teunong lolloinga, naro toko na sengre o pathokeal or a rem lemi.

³⁹ Na o sis ve aka aro o men nge menonga aka i voth a mukaling, a toko na sengre otheki a Judare ole lotuonga a vel lemire, na nge menong nge aning aolongaere o sis vet aka ve, aro o men nge menonga mukalinga.

⁴⁰ Aveto o pavus vet inga patong seng basbasuere ole ur elonga, na ole nongong mun kene i lollo mo o ri ve tokokoere o pasea or nge, aveto tokokoe areko o venen aken aro God i paomelal rintet or panen.”

*Seng basu ile sungong a God nge.
(Luk 21:1-4)*

⁴¹ Lama Jisas i men gatpot tie nge umtun mei ako aro o ulu ole sungong nge, ma i the toko na sengre ako o ul ul ole umtun a lemi, na toko le urnga pom aka o ul ul umtun aolonga a umtun le ngoing aken.

⁴² Aveto patong seng basu atiko i es me ma i ulu umtun aini aka i posngaingati.

⁴³ Ma Jisas i thopol i veno aka, ma i leng veliloalo ile wainlangaere, ma i ria or ve, "Tho ri nunganga a thomu nge, seng basu atike, ile sungong kene i mukal nge toko na seng elonga ole sungong aka o ul i."

⁴⁴ Eneke toko le urngare o ul inga ole umtun pothoingare, aveto patong basu atiken, ile ur e avele, na i ul vustetpot ile umtun aini atiken. Na ile umtun ol e avele aka aro i olol ia aning nge."

13

*Jisas i ritet nge Lotu Tepun a Vel aka a Jerusalem aka aro ngarangre aro o teu i.
(Matiu 24:1-2; Luk 21:5-6)*

¹ Lamako, Jisas ome ile wainlangaere o loslelpot a Lotu Tepun a Vel a lok lemi, lama ile wainlanga omole aka i ria i ve, "Pamirealinga, thepol vet, um sivesivengare aka o ari velre nge kene o sivenga rintet."

² Aveto Jisas i olal ile riong ve, "Ine vel sivesivenga areke thomu o thepol i ponange, panen um e avele ake aro i ngo ol a imei venen aken. Ngarangre aro o tevustetu um alavusnga areke."

*Sisisong ome matheong aro i velpol.
(Matiu 24:3-14; Luk 21:7-19)*

³ Lamako Jisas i es ma i men a tete a Oliv polemi, i thealu ma i thopol Lotu Tepun a Vel. Na Pita, Jems, Jon na Andru, o nin kine i nge ninong pelie ve,

⁴ "Aro ong ria them, nge ur aton ong ria tel them nge lale, aro i velpol penva? Mo aro lemimem mire nge paatealing kathnga aka aro i toth nge ur aken ile velpoling."

⁵ Lamako Jisas i ria or ve, "Aro thomu o naktet thomu nge toko le apaltitetongare, aro vene mo o paleklek thomu.

⁶ Eneke toko pulua aro o velpol naro o ria ve, 'Tho es me ake nge iion.' Naro o ri mun ve, 'Tho ini a Krais aka God i ateal tho.' Naro o paleklek toko na sengre venen aken.

⁷ Panen aro ve thomu o nongpol ine punpeling ile kimaing, na ile aminong, mo thomu o mothong tova saluk thomu, ur eloelongare aro o velpol tel, aveto ur alavusnga ole vusong kene i rongan.

⁸ Na pen epee or pulua aro o pun pel, na tokokoere okei rel rel aro o pun pel. Na wop pelie aro wiring i tok nge, na mesi aolonga mun aro i velpol. Na ur alavusnga aken aro o velpol tel a mukaling, ranga ve ini sisisong aka i velpol tel a mukaling nge sengre ole popong.

⁹ "Thomu o naktet thomu, aro lomu ngarangre aro o pamit thomu e riong, naro o so litlit thomu a Judare ole lotuunga a velre lemi, naro o pamit thomu a mukalingare na nepesre otheki, eneke thomu ini lek. Aro i vene re inga aken, naro thomu o panongpol nge Panongpolong Sivenga a or nge.

¹⁰ Naro tokokoere o panongpol tel Panongpolong Sivenga a toko alavusngare nge lamo aro ur alavusnga ile vusong aro i velpol ol.

¹¹ Na aro ve o rere thomu mo aro o pamit thomu nge riong, thomu o mothong tova lomumu i ngo pelekpol ve aro lomu riong e avele aka aro thomu o ria or nge, thomu o ripot inga God ile riong aka i sungu i a thomu nge. Eneke ini thomu aka aro o ri nge avele, ini inga Oni Riringa aka aro i ri.

¹² "Toko pelie aro o sungpot otiteinre mo ngarangre aro o pun rin or, na toko pelie mun aka aro o sungpot otutunre mo aro ngarangre o pun rin or, na otutunre aro o mita mo o sungpot mun otitemaere na oninaere ve aro ngarangre aro o pun rin mun or.

¹³ Toko na sengre pulua aro oni silalpot thomu, eneke thomu ini lek, na tokokoe areko o mit engeng mo la i pavurvur nge mimiong ake ile vusong, aro o el mimiong aka aro ile vusong a avele.

*Sisisong aolonga aro i velpol.
(Matiu 24:15-28; Luk 21:20-24)*

14 “Panen aro thomu o thopol ur tevivinga ako i mita e pen ako i pavothal nge ma i paakop i. (Na aro ve toko e i tital riong ake, i sivenga aka aro ilemi mire senu nge mirenga.) Lama nge nang aka o thopol ur aken, i sivenga aka areko ole a Judia aro o mita mo o loa a tetere.

15 Na aro ve toko e i thau i a ile vel polemi aka i thatha, i mothong tova ilemi rumal mun ile ur elonga mo i ru mo i elpot i, i sivenga aka aro i lo inga.

16 Ranga ve ini mun i, toko aka i voth a ometa, i mothong tova ilemi werer nge ile teunong, i sivenga aka aro i lo inga.

17 Patong seng areko oopo nge nang aken na seng areko o mane povothevoth, aro i engeng nge or aka aro o lo.

18 Na i sivenga aka aro thomu o nong mo sisong aken i mothong tova i velpoltun thomu nge vit po.

19 Eneke wop lemi aken kene aro i kerenga. Nomenga aka nge a God ile pameng patenga ma me mulu ponange ake, toko na sengre o el sisong vene aken avele. Na panen mun aro sisong e avele aro i aolonga ranga ve ini sisong aken.

20 Aro ve God i eltetpot sisong a nang aken pelie avele, e aro i mimi avele. Aveto God i ri nunganga lale aka aro i paororo sisong aken, eneke i sirumpot toko pelie lale a or nge aka aro i pamimi or.

21 Na nge nang aken aro ve toko e aka aro i ria thomu ve, ‘Thopol vet, Krais ke, aka God i ateal i.’ Eve ‘I kola.’ O mothong tova lomumuo nge.

22 Aro toko le apaltetonga pelie aka aro o velpol mo o ri ve or ini a Krais, na pelie mun aro o velpol mo o ri ve or ini a God ile riong elnga. Aro o oma pakukukaling pelie na pathepolong mun pelie na olemi aka ve, tova o pavurvur, aro ole apaltetpot tokokoe areko God i sirum or lale.

23 Naro thomu o naktet thomu, eneke tho ritet thomu lale, nge ur aka aro i velpol panen.

*Toko Pomnga Itun ile lo wererong.
(Matiu 24:29-31; Luk 21:25-28)*

24 “Panen aro sisong aken aro i vus, “‘Na nang theki aro ia mideng na ngov aro i to ol avele.

25 Na ur areko o voth a sepsa aro sawir mun or na sivemitre aro o matmatpot.’ *Aisaia 13:10*

26 “Na nge nang aken tokokoere aro o thopol a Toko Pomnga Itun aka aro i espot tomou nge songen ake ro a sepsa tomou nge engengna tolilisong.

27 Lama aro i pake enselre mo o veliloalo toko na sengre aka i sirum or lale aka o voth a ulue epee alavusnga naro o veliloalo or a i nge.

*Pamirealing nge pupos aka i pol.
(Matiu 24:32-35; Luk 21:29-31)*

28 “Aro tho pamireal thomu tie nge pupos aka i pol. Na aro ve i pol, aken lomumu mire aka ve, nang po re ake.

29 I vene re aken, aro ve thomu o thopol ur areko tho rirum i a thomu nge lale, aken aro lomumu mire aka ve, Toko Pomnga Itun ile velpoling kene i toth me lale.

30 Tho ri nunganga a thomu nge, Juda pelie aka aro o rin rongan na ur areken aro i velpol.

31 Sepsa ome ulue aro o vus, aveto lek riong i pavurvur aro i penthal avele.

Toko e avele ilemi mire nge nang aka aro ur aken aro i velpol.

(Matiu 24:36-44; Luk 21:32-35)

32 “Toko e avele ilemi mire nge nang aka aro ur areken i velpol nge. Na ensel areko a Pen a Urvet lemi na Toko Pomnga Itun mun olemi mire nge avele, Vovo ienginga aka ilemi mire nge.

33 O naktet thomu, na thomu o thealal. Eneke lomumu mire nge nang aken ile velpoling avele.

34 Lek esong la, na lek lo wererong me, i ranga ve ini toko aka i plosa nge ile rem ma i es nge rem relnga e, na i ria ile tokokoere ve aro o theal senu ile ur elonga alavusnga a rebo. Na i sung vur omaing a ile tokokoere nge, na i ria mun toko e aka aro i theal total ile vel naro i thealal.

35 “I vene re aken, tho pamireal thomu nge, ve aro thomu o thealal, eneke lomumu mire avele nge nang aka aro vel tokoninga aro i velpol. Aro i velpol nge penie, eve aro i velpol nge pemlik lopat, eve nge kauk le tanging, eve nge rulpoalal.

³⁶ Aro ve i pakukukala inga nge ile velpoling, i sivenga avele ako aro i pakuktun thomu tova o nokolkol.

³⁷ Riong aken tho ria thomu nge lale, kene i pavurvur nge toko na seng alavusnga. I sivenga aka aro thomu alavusnga o thealal.”

14

Lotu a mukalingare o rirum nge a Jisas isorinnga.

(Matiu 26:2-5; Luk 21:1-2)

¹ Nang ol inga or aini rongan i voth, naro Judare o men nge Punseleainga a Aning aka o apet i ve ini Pasova. Na nge aning aken, o an bret aka ipawimpotnga i voth nge avele, aken ini ole vothung vet aken, aveto pris kimangare na toko pamirealingare nge a Moses ile patorong, o veliloalo pel mo o kath sovengalo aka aro o rere kine a Jisas mo o so rin i nge.

² Aveto o ria ve, “Te mothong tova te rere i nge Punseleainga a Aning, eneke aro vene mo tokokoere o pavurpola punong a it nge.”

Seng omole i taultun a Jisas ipounga nge sanda.

(Matiu 26:6-13; Jon 12:1-8)

³ Na Jisas i voth nge rem a Betani aka a Saimon ile vel. Ine toko aton, nomenga putput i voth a ini peti elonga. Ma Jisas i men, na i anan, na seng omole aka i es me, ma i el tomo sanda aka i una vro. Ma i mon nge botol aka o oma i nge anral, na sanda aken kene iolonga i roro rintet. Na seng aken i pit korpot ithekia ma i odoroka i a Jisas ipounga.

⁴ Aveto toko pelie o thopol i ma olemi klingtun i, ma o ri pel osivenga nge ve, “I vava ake i odorok pautet sanda aken, e?”

⁵ Aro ve te pasong i a tokokoe areko o ol ur elonga, i pavurvur aka aro te el 3,000 Kina* nge, mo i opoal areko ole ur elonga avele.” Mako o vol ol seng aken nge.

⁶ Lama Jisas i ria or ve, “O mothong patongti ivolnga, i vova ake thomu o vol i venen aken, e? I oma omaing sivenga a tho nge.”

* **14:5:** Grik 300 Denarius, aken ini umtun aka i pavurvur nge toko omole aka i um nge tovu po omole na i el iolonga

⁷ Toko le ur avelengare aro o voth tomo e thomu nge nang elonga. Na aro ve thomu o sis ve o opoal or, aro thomu o opoal inga or, aveto aro tho voth tomo e thomu nge nang elonga avele.

⁸ Ur aka seng aken i pavurvur nge omanga, i re aken ranga ve i oma i lale. I oma ur aken a mukaling nge aka i monsi tho nge lek rinong.

⁹ Tho ri nunganga a thomu nge, nge pen elonga aka aro o panongpol Panongpolong Sivenga nge, aro o ri mun nge ur aken seng aken i oma i a tho nge. Ile omaing aken aro i penthal avele.”

Judas i ri ve aro i sungu a Jisas a ngarangre omeni.

(Matiu 26:14-16; Luk 22:3-6)

¹⁰ Na Judas Iskariot aka ini a Jisas ile wainlanga omole nge ile wainlanga or mule pa omole pothoi or aini aken, i es a pris kimangare nge, mo i ri ve aro i sungu a Jisas a omeni nge.

¹¹ Mako mukalinga areken o nongpola, mako olemi sivenga nge, ma o kin ole riong tomo nge i ve aro o sung umtun a i nge. Mako Judas i kath sovengalo aka aro i sungu a Jisas a omeni nge.

Jisas ome ile wainlangaere o an ine Punseleainga a Aning.

(Matiu 26:17-25; Luk 22:7-14; Jon 13:21-30)

¹² Mako nge nang pateanga aka Judare o an bret aka ipawimpotnga i voth nge avele. Nge nang aken Judare o so rin rin sipsip tutunre nge Punseleainga a Aning. Lama Jisas ile wainlangaere o nina i ve, “Na ong sis ve aro them monsi om Punseleainga a Aning a kath?”

¹³ Mako Jisas i pakepot toko aini, ma i ria or paini ve, “Thomu paini aro o es a rem pomnga a Jerusalem, na toko omole aka i potun thei pokin aolonga, aro i thopol thomu paini mo o paneso i.

¹⁴ Aro i es a vel omole aka nge, na thomu paini o nin rum vel aken tokoninga ve, “Them paini lemem pamirealinga i pake them paini a ong nge me. Ma i nin ve, “Wop e i voth a lom vel mo i pavurvur

ako aro them longre aro them voth nge, kene i kala? Eneke tho sis ve aro tho an Punseleainga a Aning tomo nge lek wainlangaere.”,

¹⁵ Mako aro toko aken aro i pathengal thomu paini nge vel lemi ako i voth roro ako i aolonga. Na aning a ur elonga i voth nge, mo aro thomu paini aro o monsi ar aning nge.”

¹⁶ Mako Jisas ile wainlanga aini ako o es ol a rem pomnga, ma o sangpolo ur alavusnga ako Jisas i ria or paini tel nge lale, ma or paini o monsi Punseleainga a Aning nge.

¹⁷ Na toth ol nge pemliknga, na Jisas ome ile wainlanga or mule pa omole pothoi or aini o velpol.

¹⁸ Ma rongan o menen ma o anan, ma Jisas i ria or ve, “Tho ri nunganga a thomu nge, omu e ake aro i teltun tho a ngarangre nge. Tho tomo e toko ake, them paini them an tomo nge pel.”

¹⁹ Ma or vusnga o nongpola venen aken, ma olemi kene i ngo tangatun, ma or omole omole o nina i ve, “Tho avele, e?”

²⁰ Mako Jisas i olal i a or nge ve, “Omole inga nge thomu or mule pa omole pothoi or aini aken, i re ake them paini them pamolok bret nge oto omole.

²¹ I vene re inga ako God ile erere i ri nge lale, aka Toko Pomnga Itun aro i rin, aveto toko aken i teltun i aro i el matheong aolonga, na i sivenga tova inina i pop i avele aken aro toko aken aro i teltun i avele, aveto inina i pop i lale.”

Jisas ome ile wainlangaere o men patopalal nge ia aning.

(Matiu 26:26-30; Luk 22:14-20; 1 Korin 11:23-25)

²² O men velilo pel nge Punseleainga a Aning, lamako Jisas i ela bret omole, ma i ri sivengaing a God nge lama i rek reku i ma i sung sung i a ile wainlangaere nge na i ria or ve, “Thomu o ela i mo o an i ake ini sivangek.”

²³ Lama i ela mun thinonga omole ako vain i mon nge, ma i ri sivengaing mun a God nge, lama i sungu mun i a ile wainlangaere nge, mako or vusnga o thin i.

²⁴ Lama i ria or ve, “Ake ini ok mla ako i paateal nge a God ile riong kinnga ponganga. Ako aro ok mla i palalas nge toko na seng pulua.

²⁵ Tho ri nunganga a thomu nge, aro tho thin ol vain ake avele ol, i pavurvur ako aro tho thin vain ponganga a God ile menong e nepes lemi.”

²⁶ Jisas i ria or vene aken, lama o vo voing omole ma i vus, lamako o plosa ma o es a tete a Oliv ma o voth nge.

Jisas i ritet nge a Pita ile lelaing.

(Matiu 26:31-35; Luk 22:33; Jon 13:36-38)

²⁷ Ma Jisas i ria ile wainlangaere ve, “Thomu alavusnga aro o lo vra leltun tho ranga ve aka God ile erere i ri nge. Ma i ri vene, ‘Tho ini Toko Pomnga

aro tho so rin sipsipre othealnga
mo sipsip alavusnga aro o lo vra.’

Sekaraia 13:7

²⁸ Aveto aro tho mimi werera mun naro tho mukal lomu a Galili la.”

²⁹ Ma Pita i mita ma i ria i ve, “Aro ve toko alavusnga aro o lo om, aro tho avele.”

³⁰ Ma Jisas i ria Pita ve, “Tho ri nunganga a wong nge, pan pemlik re ake, aro vareo i tang paini rongan naro wong ria pa me ve, lomum mire nge tho avele.”

³¹ Aveto Pita i ri engeng ve, “Aro tho ri vene aken avele, aveto tho pavurvur ako aro tho rin tomo nge wong.” Na Pita ithangangaere ole riong vene mun re aken.

Jisas i nong a Getsemani.

(Matiu 26:36-46; Luk 22:40-46)

³² Na Jisas ome ile wainlangaere o espot a lempopo aka iion a Getsemani, lama Jisas i ria or ve, “Aro thomu o menu ake, naro tho es tel veno la mo tho nong.”

³³ Ma i wolpot toko or me aka oion a Pita, Jems na Jon. Aveto Jisas ilemi i ngo senu avele, eneke lemi kerereong i velpol a i nge.

³⁴ Mako Jisas i ria or ve, “Lemi kerereong ake i voth a tho nge, i aolonga rintet, ini ol i rinong. Thomu o men ake vene mo o thealal.”

³⁵ Lamako Jisas i es ma i es melapot e or avele, ma i ulu isivenga a ulue ma i nong

a God nge ve i sivenga ako aro i mothong tova i voth nge matheong nge nang epee aken.

³⁶ Ma i nong a Itema nge ve, “Vovo wong pavurvur nge ur alavusnga omanga. Na i sivenga ako aro ong eltetpot matheong ake i voth a tho nge. Aveto ong mothong tova panes lemik, ong panes inga ako ini sivengom lomum.”

³⁷ Lamako Jisas i lo werer mun a ile wainlangga or me aken nge, ma i thopol or, ave o nong nong inga ma i leng a Pita ve, “Saimon, ong nong nong inga, e? I vava, ong pavurvur avele aka aro ong thealal lek nge nang theki epee omole inga, e?

³⁸ Aro thomu o thealal na o nong mo aro ve tongporumong i velpoltun thomu, aro o matu avele. Lomumu kene ava i sivenga, aveto numu peti i sia avele.”

³⁹ Ma i lo werer ma i nong mun ma ile nongong i ranga ve ini ile nongong teltelnga.

⁴⁰ Lama i lo werer mun a ile wainlangga or me aken nge, aveto o nong nong vet inga, eneke otheki nong nong rintet. Ma Jisas i pamimeta or, ave e avele i pesa iwo.

⁴¹ Lama Jisas i es mun pa menga ma i nong mun ma i lo werer mun a ile wainlangga or me aken nge, aveto o nong nong vet mun inga, mako i ria or ve, “Thomu rongan o nong nong vet inga? Ur mun e avele, nang meta i velpol lale aka aro o sungu Toko Pomnga Itun a toko kerengare omeni.

⁴² O mita mo te es. O thopol vet toko aka aro i sungu tho a ngarangre omeni, kene i velpol lale.”

*Judas i sungu a Jisas a ngarangre omeni.
(Matiu 26:47-56; Luk 22:47-50; Jon 18:3-11)*

⁴³ Jisas rongan i ri tomo e ile wainlanggaere, na Judas i velpoltun or. Na Judas ini a Jisas ile wainlangga omole nge ile wainlangga or mule pa omole pothoi or aini aken. Na pulua o velpol tomo e a Judas, o elel tongtong na bainat, na o velpol polpol avele, eneke pris kimangare

na toko pamirealingare nge a Moses ile patorong na Judare oa pompomere, o pake or mo o rere a Jisas.

⁴⁴ Na Judas i ria tel or ve, “Aro ve thomu o thopol toko e tova tho angongoal i, i re aken mo thomu o rere senu i mo o paes i la.”

⁴⁵ Mako Judas i es vengveng a Jisas nge, ma i ria i ve, “Pamirealinga.” Na i angongoalo i.

⁴⁶ Lamako tokokoere o rere ol i.

⁴⁷ Na toko aka i mit toth a Jisas nge, i turusa ile bainat ma i sorotetpot Prisre oa Pomnga ile umonga itelnga epee.

⁴⁸ Ma Jisas i ria or ve, “Na thomu o velpol tomo nge bainat na tongtong na thomu o sis ve o rere tho ake ranga ve aka tho pavurpol punong a gavman nge, e?

⁴⁹ Na nge nang elonga tho men tomo e thomu na tho patorial thomu a Lotu Tepun a Vel a lok lemi, na thomu o rere vet tho avele, aveto i sivenga aka aro te panes riong aka God ile erere i ri nge lale.”

⁵⁰ A ur e avele na ile wainlanggaere o lo vratunu i.

⁵¹ Na kulpo omole[†] aka i paneses a Jisas, na ia neong omole inga aka i veleles ma o rereu i,

⁵² na ia neong i moluspot ma i lopot ol alalilanga la.

*Mukalingare o pamit a Jisas nge riong.
(Matiu 26:57-68; Luk 22:67-71; Jon 18:12-14, 19-24)*

⁵³ Mako o paes a Jisas a Prisre oa Pomnga aka i men a ile riong nongpolnga a vel. Na Judare oa pompomere na toko pamirealingare nge a Moses ile patorong na pris kimangare, aka o velilo pel.

⁵⁴ Na Pita i o ieve nge a Jisas ma i eso a rionga a lok lemi a Prisre oa Pomnga ile vel, ma i men tomo nge mit tetalongare ma i peo ini a won sesenga nge.

⁵⁵ Na pris kimangare tomo e mukalinga alavusnga, o sis ve aro o kath a Jisas ia tepun e aka aro o so rin i nge. Aveto o sangpolo ia tepun e avele.

⁵⁶ Na okime mitngare o pom, aveto ole riong e avele i omolepot nge a Jisas.

[†] 14:51: Toko powe ninengare o ri ve kulpo ake ini a Jon Mak aka i wat Panongpolong Sivenga ake

⁵⁷ Na toko pelie o mit ma o ri riong le apalitetonga nge a Jisas ve,

⁵⁸ “Them nongpol i ako i ri ve, ‘Aro tho teu a Lotu Tepun a Vel ake, aka tokokoere o oma i, na nge nang or me aro i vus rongan aro tho pamita mun omole aka tokokoere o oma i avele.’”

⁵⁹ Aveto ole riong elonga aken i omoletet avele.

⁶⁰ Ma Prisre oa Pomnga i mitpot a otheki lemi ma i nin a Jisas ve, “Lom riong e avele aka aro ong olal ole riong nge, e?”

⁶¹ Aveto Jisas i porengreng inga na i ripot riong lopat e avele.

Ma Prisre oa Pomnga i nina mun i ve, “Wong ini toko pamimionga aka ini a God Itun, e?”

⁶² Ma Jisas i olal i ve, “Tho re ake. Naro thomu o thopol a Toko Pomnga Itun aro i men a God engenga imeni sivenga nge anga, naro o thopol mun nge aka aro tho es tomou nge Pen a Urvet a songen me.”

⁶³ Ma Prisre oa Pomnga ilemi kling rintet nge a Jisas ile riong aken, mako i ururopot ia teunong ma i ri ve, “Te mothong tova kimer mitnga ol e.”

⁶⁴ Eneke thomu o nongpol i lale aka ve, aken i voltet a God, na lomumu vava, aro te oma neke a i nge, e?”

Na or vusnga olemi omoletetpot nge isorinnga.

⁶⁵ Mako pelie o vurpol ma o patea a Jisas iosuklilelnga ma o kin rupo itheki lama o so i ma o paate i ve, “God Itun, anga aka i so ong?” Lama mit tetalongare o wol i la mako o inriprap i.

Pita i lela ve, ilemi mire nge a Jisas avele.

(Matiu 26:69-75; Luk 22:56-62; Jon 18:16-18, 25-27)

⁶⁶ Pita rongan i voth a lok lemi, na seng aka ini Prisre oa Pomnga ile umonga i es me,

⁶⁷ Ma i thopol a Pita, ke i pe ini peti a won sesenga nge, ma seng aken i the rinrin i, ma i ria i ve, “Ken, ong mun ake tomo ong voth tomo nge a Jisas aton ini Nasaret anga.”

⁶⁸ Ma Pita i lela ve, “Lemik mire nge i avele, na lemik mire mun nge lom riong

aken avele.” Pita i olal ile riong ma i mita ma i espot a lok thekia.

⁶⁹ Lama seng umonga aken i thopol mun a Pita, ma i kenkentuno mun i ma i ria areko o mit tothal i ve, “Na toko mun re ake, aka i paneses a Jisas.”

⁷⁰ Ma Pita i nongpol mun i ma i lela nge.

Ma palolo avele na areko ru o mit tothal i o akristun i ma o ria i ve, “Mothong tova lela, ong mun ake ini othanga, eneke ong ini Galili anga.”

⁷¹ Ma Pita i ri engeng ve, “Tho ri nunganga a thomu nge, lelik mire nge toko aken thomu o ri nge, kene avele. Aro ve lek apaltet thomu aro God i sungu sisison a tho nge.”

⁷² A ur e avele na vareo i tang paininga. Ma Pita ilemi rumu a Jisas ile riong aka i ria i nge ve, “Aro vareo i tang paini rongan, naro ong ria pa me ve lomum mire nge tho avele.” Ma ilemi kerere rintet, mako i tang ol.

15

O ti a Jisas a Pailat nge la.*

(Matiu 27:1-2, 11-14; Luk 23:1-5; Jon 18:28-38)

¹ A rulpounga pris kimangare na toko pompomere na toko pamirealingare nge a Moses ile patorong na mukalinga alavusunga ole riong omolepot aka aro o kin a Jisas, lama o ti i, ma o sungu i a Pailat nge.

² Lamako Pailat i nina i ve, “Ong re ake ini Judare ole nepes, e?”

Ma Jisas i olal ile riong ve, “I venen re aken ong ri nge.”

³ Lamako pris kimangare o pamilempot ia tepun pom nge omaing areko i oma ir.

⁴ Lama Pailat i nina mun i ve, “Aro ong olala kek riong e avele? Nongpol vet om tepun pom aka o ria ong nge.”

⁵ Aveto Jisas i olal ole riong e avele, ma Pailat ilemi ngo tangatun.

Pailat i ri nge a Jisas isorinnga.

(Matiu 27:15-26; Luk 23:18-25)

⁶ Na nge Punseleainga a Aning nge tovu po elonga tokokoere osivenga aro o apetpot toko e aka i voth a mang a midenga

* 15:: RP Pailat ini Gavana

lemi mo aro Pailat i sungpot i mo i vthopot nge kinong.

⁷ Na nge wop lemi aken, toko ako iion a Barabas, i voth a mang a midenga. Eneke i supo tomo nge tokokoe areko o pavurpolo punong a gavman nge, ma rinong i velpol nge.

⁸ Na toko na sengre pom o mita ma o vustun a Pailat ma o ria i ve, “Them sis ve aro wong oma i ranga ve aka wong oma vet i nge nomenga, ve aka aro ong sungpot toko e aka i voth a mang a midenga lemi.”

⁹⁻¹⁰ Na Pailat ilemi mire aka pris kimangare o sungu a Jisas a i nge, eneke olemi es nge a Jisas ile omaing. Lamako i nina or ve, “Thomu o sis ve aro tho sungpot Judare ole nepes a thomu nge wot, e?”

¹¹ Aveto pris kimangare o paketun toko na sengre ve aro o nin a Pailat ve aro i tepol a Jisas nge a Barabas mo i sungpot i a or nge.

¹² Na Pailat i nin werera mun tokokoere ve, “Na lomumu vava nge toko aka thomu o apet i ve ini Judare ole nepes, aro tho oma ol neke a i nge, e?”

¹³ Ma o pres werer mun la ve, “Pamona i a won ngoronga nge.”

¹⁴ Mako Pailat i nongpol i, ma i nina or ve, “I vava, i oma vothung kathnga aka i kerenga, e?”

Aveto o pres mun viringa ve, “Pamona i a won ngoronga nge.”

¹⁵ I vene re ake na Pailat i sis aka ve, aro i pawomwomal tokokoere, mako i sungpot a Barabas a or nge la, na ile tokokoere o so litlit a Jisas lama i sungpot i a punongare omeni ve aro o pamona i a won ngoronga nge.

Toko punongare o panea a Jisas mo i ranga ve ini nepes ma o ri sililal i na o ngenge lital i.

(Matiu 27:27-31; Jon 19:2-3)

¹⁶ Ma toko punongare o paeso a Jisas a Pailat ile lok lemi (ako o apet i ve ini Praitorium)[†] lama o leng veliloalo othangangaere alavusnga me.

¹⁷ Lama o panaklesu a Jisas nge seltun klenga, lama o ela ine we wopuponga ma

o mol a i ma o paunu i a ipounga, mako ia malmaling i ranga ve ini nepes.

¹⁸ Lama o magonal i ma o ria i ve, “Them papomnga ong ini Judare ole nepes.”

¹⁹ Lamako o ela lele ma o siso ipounga nge, na o osuklilel i, ma o koru oeve na ole apaltet nge iriseanga.

²⁰ Ma o ngenge lital i ma vus, lama o oun wererpot seltun klenga a i nge, na o pateunu i nge ia teunong, lama o tipot i a lalanga mo aro o pamona i a won ngoronga nge.

O sotuna a Jisas a won ngoronga nge.

(Matiu 27:33-44; Luk 23:33-43; Jon 19:17-24)

²¹ Na toko omole aka iion a Saimon, i es me ma i ri ve i es alpo a Jerusalem. Toko ake kene ile a Sairini, na ini a Aleksander ome a Rupus otema. Lama toko punongare o pamita i ma o papotunu i nge a Jisas ia won ngoronga. Ma i potun i.

²² Lama o paesa a Jisas a pen aka iion a Golgota, aka i mirenga ve i thepol ranga ve ini toko po a kikil.

²³ Na punonga pelie, kene o ri ve aro o sungu vain aka o rongol i nge ur pelie aka aro i opoal i nge sisisong, aveto Jisas i mothong i.

²⁴ Lama punongare o pamona i a won ngoronga nge, lama o ela satu ma o asisal nge mo aro i paateal nge oa kathnga aka aro i ela tel ia teunong e.

²⁵ Nge nang theki or limpenel aka rulpo o paesa a Jisas a won ngoronga nge.

²⁶ Na roro a ia won ngoronga nge, o wat ritetong nge vothung kerenga aka o ri ve i oma i, ma o wat riong aken ve,

AKE INI JUDARE OLE NEPES.

²⁷ Na a Jisas ilo sei o pamona mun toko keminga or aini, ma e i mon a imeni sivenga nge anga, na e i mon a imeni kerenga nge anga.

²⁸ [Na i vene re inga aka ranga ve God ile erere i ri nunganga nge ve, “Aro olemi ve i ranga ve ini tokokoe areko ole vothung kerenga.”]‡

† 15:16: Praitorium ini nepes a vel aolonga a urvet aka Herot Pomnga i ari i, na punongare pulua o voth a vel aken a lok lemi, naro o thepol i nge pes 672. ‡ 15:28: Aisaia 53:12

²⁹ Ma tokokoere ako o eses a sovengalo o ri sililal i na o potetet ma o ria i ve, “Ken, ong ake tomo ong ri ve aro ong teu Lotu Tepun a Vel lamo ong pamit werera mun i nge nang or me inga,

³⁰ ponange ake, aro sivengom ong pamimi ong mo ong lostetpot a won ngoronga nge me.”

³¹ Lamako pris kimangare na toko pamirealingare nge a Moses ile patorong, o ngenge lital i, ma o ri werer pel osivenga ve, “I pamimi pelie na i pavurvur aro i pamimi isivenga avele,

³² I sivenga aka aro Krais aka ini Israelre ole nepes aro i lostetpot a won ngoronga nge me, na aro ve i oma i venen aken, aro it alavusnga aro te thopol i mo aro ler lemioong nge i aka ve, ini toko aka God i ateal i ve aro i el werer it.” Na toko or aini mun aken, aka o pamon tomoa mun or nge i, kene o ri mun riong kerenga a i nge.

Jisas ile rinong.

(*Matiu 27:45-56; Luk 23:44-49; Jon 19:28-30*)

³³ Ma nge nang le mitpoaing mideng aolonga i velpol ma i seltun pen elonga, i pavurvur aka la nge nang theki i el or me nge penie.

³⁴ Na nge nang theki or me Jisas i presa viringga ma i avav Itema nge Judare okei ve, “Eloi, Eloi, lama sabaktani?” Riong aken mirenga ve, “Lek God, lek God, i vova ake ong lo lelpot tho, e?”

³⁵ Na toko pelie aka o mitit a ilo sei o nongpol senu i avele ma o ri ve, “O nongpol vet, i leng a Elaija.”

³⁶ Lama toko omole aka i tho me ma i ela ur omole aka i tum vus thei, ma i palelo vain le masesnga nge ma i kino i a lele ongepo ma i osea i a Jisas iwo mo i tumo i, lama toko aka i ria ve, “Aro te men ken, mo aro te thopol vet i, Elaija aro i velpol mo i elu i eve aro avele.”

³⁷ Na Jisas i wal viringga lamako i rin ol.

³⁸ Lamako lavlav velvelnga aka Judare o pamon rupalu Lotu Tepun a Vel lemi pat nge, kene i minra roro ma i alpou, ma epee ainiu. §

§ **15:38:** Lavlav aken ile minraueng i mirenga ve, sovengalo a God nge i thep ol

³⁹ Lamako punongare ole mukalinga aka i mit a Jisas itheki nge, i thopol i aka Jisas ile rinong kene i rel ma i ri ve, “I nunganga toko ake ini a God Itun.”

⁴⁰ Na seng pelie aka o mit mela mun tie ma o the, aka ini a Salome na Maria Makdala anga, na Maria aka ini a Joses ome a Jems posnga onina.

⁴¹ Nomenga aka Jisas kene rongan i voth a Galili, na seng areken o panes i, ma o opoal i. Na seng pulua mun aka nomenga o panes a Jisas a Jerusalem la, o voth tomo mun nge or.

O tetun a Jisas.

(*Matiu 27:57-61; Luk 23:50-56; Jon 19:38-42*)

⁴² Na Jisas i rin nge nang monsionga, na penieo na i toth me lale aka aro nang rialonga i patea.

⁴³ Na Josep aka ile a Arimatea ini Judare ole mukalinga mun, na ini toko aka tokokoere o papomnga i, na ini mun i toko aka i men tetal nge a God ile menong a nepes aka aro i velpol. Ma Josep kene i esa a Pailat nge, ma ilemi a ngeipong avele, ma i es mala i nin a Pailat nge a Jisas ini peti, eneke Judare olemi sivenga avele tova vung ini peti aro i mon a won ngoronga nge nang rialonga.

⁴⁴ Ma Pailat i nongpolo aka Jisas i rin lale ma i kukuk, eneke ile rinong kene i lollo vet avele. Lama ikei song e punongare ole mukalinga, ma i nina i ve, “Jisas i rin nunganga lale eve rongan?”

⁴⁵ Lama mukalinga aken i ria i ve, “Jisas i rin nunganga lale.” Ma Pailat i nongpol i veno aka, mako i ria Josep ve, “I sivenga aro ong elu a Jisas ini peti.”

⁴⁶ Mako Josep i olpot ine seltun velesnga lama i osu a Jisas ini peti, ma i soala i nge seltun aken ma i paeso i nge siklep aka o monsi tonga nomenga a pen tepun aka aro o paeso rinonga ini peti nge. Ma Josep ile tokokoere o sing um aolonga aka aro o sing rupalo ia siklep thekia nge.

⁴⁷ Na Maria Makdala anga, na Maria aka ini a Joses inina, or paini o mit na o thopol pen aka o paeso a Jisas ini peti nge.

16

Jisas i mimi werera nge rinong.

(Matiu 28:1-8; Luk 24:1-10; Jon 20:1-10)

¹ Na nang rialonga i vus, ma Maria Makdala anga, ome a Maria ako ini a Jems inina na Salome, or alame o es ma o olpot won ei una vrunga mo aro o taul i a Jisas ini peti nge.

² Ma rulpou inga a nang mukalinga na nang i avsua mesi ma o es a vuvepun la.

³ Ma o nin pel ve, “Anga aro i opoal it nge um aken singlelpotnга, e?”

⁴ O ria pel vene aken, ma o thopol um ako i aolonga rintet, aveto i ngo ruptetal siklep thekia aken avele ol, i ngo lelpot lale.

⁵ Lamako o koro a silkep lemi ma o thopol kulpo ako i men a epee a omeni sivenga nge anga, na ile teunong i veleles rintet, ma sengre o kukuk nge i.

⁶ Aveto toko aken kene i ria or ve, “Thomu o mothong tova o kukuk, lemk mire nge thomu, ako o kath a Jisas ako ini Nasaret anga, ako o pamona i a won ngoronga nge, aveto i mimi werera lale. I votoh ol ake avele, o thepol i, ini inga imei ako o pangou i nge.

⁷ I sivenga ako aro thomu o es mo o ria ile wainlangaere, na Pita mun, ve, ‘Jisas aro i mukal a epee a Galili la, mo aro o thopol i ranga ve ako i ria tel or nge lale.’ ”

⁸ Mako sengre o kukuk ma o korpot ma o lo. Na sawir or, ma o es na owo tum inga ma o leng lenga vet avele, eneke o ngeip rintet.

Maria Makdala anga i thopol a Jisas.

(Matiu 28:9-10; Jon 20:11-18)

⁹ [Na nge rulpo lemi nge nang mukalinga Jisas i mimi werera a vuvepun ma i velpol tel a Maria Makdala anga nge, ine seng aken kene nomenga Jisas i wistetpot tamata kerenga or limai a i nge.

¹⁰ Ma seng aken i ria toko na sengre ako nomenga o paneses a Jisas, ako or vusnga o men ma olemei kerere na o tang, ma i ria or ve, “Jisas i velpol a tho nge.”

¹¹ Na o nongpola Maria ile riong ako ve, Jisas i mimi werera na i thopol i lale, aveto olemei nge avele.

Jisas ile wainlanga or aini ako o thopol a Jisas a sovengalo.

(Luk 24:13-25)

¹² Na nge nang mun re aken, Jisas ile wainlanga or aini ako o plosa a Jerusalem ma o rive o es nge rem omole ako, na or paini o eses a sovengalo, nako Jisas i velpoltun or, aveto itheki ate rel ol.

¹³ Ma or paini o lo werer mun a Jerusalem la, ma o ria othangangaere nge, aveto olemei mun nge or paini ole riong avele.

Jisas i velpoltun ile wainlangaere.

(Matiu 28:16-20; Luk 24:36-49; Jon 20:19-23; Pakeke 1:6-8)

¹⁴ Lama Jisas i velpoltun mun ile wainlanga or mule pa omole pothoi omole ako o men velilo pel ma o anan. I velpol ma i vol or, eneke ole lemioong e avele nge ole riong ve ako o thopol i aka i mimi werera lale.

¹⁵ Ma i ria or ve, “Aro thomu o es a rumrem elonga mo o panongpol nge Panongpolong Sivenga a toko na sengre nge.

¹⁶ Na aro ve toko e ilemeio nge, mo thomu o paninu i, maken aro i el mimiong sivenga a God nge. Na aro ve toko e ile lemioong e lomu riong avele, aro i el sisongs aolonga a God nge.

¹⁷ Na tokokoe areko o nongal lek riong, aro o oma pathepolong aka aro i paateal nge a God ile engenging. Naro o wistetpot tamata kerenga nge iok, naro o ri nge keiong rel relnga aka olemei mire nge avele.

¹⁸ Na aro ve pilimo i atet omeni eve aro o kukuk nge thei kerenga aka o rin nge thinninga, i pavurvur aro o rin nge avele, naro o ronga mun omeni a ni multhangingare nge naro o senu werer.”

God i ela a Jisas a Pen a Urvet lemi.

(Luk 24:50-53; Pakeke 1:9-11)

¹⁹ Na Jisas aka ini ar Pomnga i ri ile riong a or nge ma vus, lamako God i ela i a Pen a Urvet la, ma i men vengveng a God imeni sivenga nge anga, ini pen aka o papompom tokokoere nge.

²⁰ Lamako Jisas ile wainlangaere, o es a pen elonga, ma o panongpol toko na

sengre. Na God i um tomo nge or, ma i papomnga mun ole riong nge pathepolong pulua a toko na sengre otheki.]

Na i re aken. I vus.

Panongpolong Sivenga aka Luk i wat i Luk Ritetong nge a Luk

Panongpolong Sivenga aka Luk i wat i, kene i wat i mo aro i opoal toko omole aka iion a Tiopilus, ini toko pomnga omole. (Aro o thepol a Luk 1:1) Ava ini toko pomnga omole aka a Rom. Na Luk i sis ve aro Tiopilus ilemi nine nge a Jisas imanenga, na ile mimiong, na ile rinong, na ile los wereraing. Na i sis mun ve aro ilemi mire senu aka ve, Jisas ini toko aka God i ateal i ve aro i el werer ile tokokoere, na i pavurvur aka aro i pamimi Judare na areko or ini Judare avele mun. Ini toko alavusnga ake ru a ulue, opamimingaa. Na Luk i wat rirumong pulua tie nge a Jisas aka i voth a Matiu na Mak lemi avele. (Aro o thepol ritetong aka i voth a mukaling a Matiu ile erere nge.) Na Panongpolong Sivenga aka Luk i wat i, kene ini ile riong pateanga aka aro i wat i a Tiopilus nge, na i patopalal i nge ile erere aka te apet i ve ini "Pakekere ole Omaing." (Pakeke 1:1,2) Na nge a Luk ile riong patopalal nge ile erere ake, te thepol aka ve, Jisas i ria ile wainlangaere ve, aro o men tetal nge a God ile sungong aka ini Oni Riringa. (Luk 24:29) Na nge Pakekere ole Omaing pateanga i ri vene mun re aken, aken i pathengal it aka ve, Panongpolong Sivenga aka Luk i wat i, tomo mun nge Pakekere ole Omaing aka Luk i wat mun i, kene or paini ini rirumong omole inga aka i ritet nge a Jisas na ile pakekere ole panongpolong nge i.

Luk i wat Panongpolong Sivenga aka a Tiopilus nge.

¹ Ine toko pulua aka o tongporum nge aka aro o wat tenesing nge ur areko i velpol aka ru a them nge aka nge a Jisas ile omaing.

² Ma o wat i ranga ve aka them nongpol i, na them tital i nge areko o thepol ipateanga ma o panongpol nge riong sivenga aken.

³ Make ranga ve i sivenga nge tho aka tho wat tenesing ake mo tho pa-song i a wong a Tiopilus nge wot, aka ini mukalinga pomnga. Eneke nomenga vet aka me, tho nin senu nge ur alavusnga areken opateanga. Make tho wat vengveng ur areken ole velpoling.

⁴ Make tho wat ake mo aro lomum mire senu nge riong areton ong nongpol i kene i nunganga.

Jon aka ini toko paninuonga inina ome a Jisas inina oa tenesing

(Vonge 1:5-2:52)

Ensel i ritet nge a Jon aka ini toko paninuonga ile velpoling.

⁵ Na nge wop lemi aka Herot ini nepes a Judia. Na Sekaraia ini pris omole aka i voth nge pris avlung aka o apet i ve ini a Abija ile. Na iewo sengenga ini a Aron aka ini pris tel a mukaling, ilenga, ma iion a Elisabet.

⁶ Na or paini o vengveng a God itheki. Na o panes senu a God ile patorong na ile riong alavusnga. Na o oma vothung kerenga e avele a God itheki.

⁷ Aveto otutun e avele, eneke Elisabet i sarit. Ma or paini kene, e i tolok na e i kimeitu lale.

⁸ Ma nang omole aka pris avlung aka Sekaraia i voth nge, o oma pris a omaing a Lotu Tepun a Vel aka, na Sekaraia i oma mun pris a omaing nge.

⁹ Na prisre o panes ole vothung ma o otiktok um ma Sekaraia ile i prilpot, mako o ateal i mo i eso a Toko Pomnga ile Lotu Tepun a Vel lemi aka o pavothal nge, mo aro i ongtun sungong una vrunga a God nge la.

¹⁰ Na nge wop lemi aken toko na seng pulua aka ru o voth a lalanga ma o nong.

¹¹ Na Toko Pomnga ile ensel omole e aka i velpol a Sekaraia nge. Ma i mit telek a epee a imeni sivenga nge anga, a sungong a lekleka aka o oma sungong una vrunga nge.

¹² Ma Sekaraia i thepol ensel aken ma i kukuk ma i ngange i.

¹³ Aveto ensel i ria Sekaraia ve, "Sekaraia wong mothong tova wong

ngange. God i nongpol lom nongong lale. Na ewom sengenga a Elisabet aro i pop itun tomonnga e. Naro wong apeta iion a Jon.

¹⁴ Naro opom lemi aro i ngo senu naro lomum sivenga nge, naro toko na seng pulua ako aro oleli sivenga mun nge ile velpoling.

¹⁵ Eneke aro i velpol ini toko kimanga a God itheki. Na i mothong tova aro i thin vain na thei engenga. Naro i vual nge a God Ioni Riringa na i patea nge ako rongan i voth a inina iopo lemi.

¹⁶ Naro i wol werer toko na seng pulua ako ru a Israel, mo o lo werer a God nge ako ini oa pomnga.

¹⁷ Naro i mukal a Toko Pomnga nge, mo aro i oma tokokoere mo aro o monsi nge a Toko Pomnga ile esong me. Naro i eksing oa vovoere oleli mo aro oleli esal otutunre. Naro i eksing tokokoe areko o avsa a God ile riong mo aro o el lemi rumong sivenga ranga ve ini toko vengvengare. Na God aro i sungu Ioni Riringa na ile engenging a i nge ranga ve nomenga ako i sungu i a Elaija nge.”

¹⁸ Na Sekaraia i ria ensel ve, “Aro lelik mire nge vava ako lom riong aken i nun-ganga, e? Eneke tho toluku lale, na ewok sengenga i kimeitu mun lale.”

¹⁹ Na ensel i olal ile riong ve, “Tho ini a Gabriel aka tho mit a God itheki. Ma i pake tho me ve aro tho ria wong nge ritetong sivenga ake.

²⁰ Na wong nongpol. Aro wong rises ol naro wong ri avele, i pavurvur nge nang aka aro ur elonga areken aro i velpol. Eneke lomumo e lek riong avele. Na lek riong aro i velpol vengveng nge nang aka God i ateal i lale.”

²¹ Ma rongan o mit total a Sekaraia aka i voth palolo a Lotu Tepun a Vel lemi, ma oleli pelekpol, eneke oleli ve, “I vova ake Sekaraia i voth palolo a Lotu Tepun a Vel lemi, e?”

²² Ma nge aka i korpot, i pavurvur aro i ria a or nge avele, ma oleli mire aka ve, i thepol ur relnga e lale a God ile Lotu

Tepun a Vel lemi, na i paateal inga or aka nge imeni, eneke i rises.

²³ Ma nge aka Sekaraia ile omaing i vus, mako i lo werer ol a ile vel la.*

²⁴⁻²⁵ Ma palolo avele, nako Elisabet iopo. Mako i ria ve, “Nomenga lek maral nge aka tho sarit, aveto ponange Toko Pomnga ilemi esal tho, mako i oma ur ake a tho nge ma i eltetpot ur aka lek maral nge nomenga a toko na sengre otheki.” Ma i men kine inga a vel lemi i pavurvur nge ngov or lim aka tokokoere o ate i aka iopo lale.†

Ensel i ria Maria ve, “God i ateal ong ve aro wong pop Itun.”

²⁶ Ma nge aka Elisabet kene iopo ma ia ngov or limae, na God i pakepot ile ensel omole aka iion a Gabriel, a rem aka a epee a Galili aka iion a Nasaret.

²⁷ Ma i es a seng ovote omole aka o ateal i ve aro iewo a toko omole aka iion a Josep, ini nepes a Devit ilenga. Na seng ovote aken iion a Maria.

²⁸ Ma ensel a Gabriel i es a i nge la. Ma i ria i ve, “Toko Pomnga i voth tomo nge wong, na opom aro i ngo pis naro Toko Pomnga aro i oma senu nge wong.”

²⁹ Ma Maria i nongpol riong aken ma ilemi pelekpol nge, ma ilemi rum riong aken kene, i mirenga vava.

³⁰ Ma ensel i ria i ve, “Maria wong mothong tova wong ngange, eneke God i themosal ong.

³¹ Wong nongpol, aro opom mo aro wong pop totomone e mo aro wong apeta iion mo ini a Jisas.

³² Aro i velpol ini toko kimanga. Naro o apet i ve ini a God aka i roro rintet Itun. Na God aro i pamena i ini nepes, ranga ve ini itevinga a Devit.

³³ Aro i velpol ini nepes nge a Israelre evelelenga, naro nge ile menong e nepes aro ile vusonga avele.”

³⁴ Na Maria i nin a ensel ve, “Ur ake aro i velpol vava? Eneke tho ngo tomo e toko e avele.”

³⁵ Ma ensel i olal ile riong ve, “God Ioni Riringa aro i eso a wong nge, naro God aka i roro rintet ile engenging aro i seltun ong,

* ^{1:23:} Sekaraia i um nge wik omole. † ^{1:24-25:} Na nge Judare ole vothung aro ve seng i kimeit lale na iopo aro ile mara avele. Aro or alavusnga o risea nge aken.

maken aro wain riringa ako aro ong pop i aro o apet i ve ini a God Itun.

³⁶ Wong nongpol, lomnga e ako iion a Elisabet ako i kimeitu lale na o ri ve i pavurvur aro i pop ol wain e avele, aveto ponange ia ngov or limae lale aka iopo nge.

³⁷ Eneke ur e avele i klip nge a God aka aro i oma i.”

³⁸ Na Maria i ria ve, “Nongpol, tho ake ini a God ile umonga, aro i oma i a tho nge ranga ve aka wong ri nge.” Mako ensel aken i los lelpot i.

Maria i losa ma i es mo i porum a Elisabet.

³⁹ Na nge wop lemi aken Maria i losa ma i es viri viri a rem a wop epee a Judia aka ini pen polemire.

⁴⁰ Ma i eso a Sekaraia ile vel ma i ria ve, “Elisabet, ong kath?”

⁴¹ Ma Elisabet i nongpol a Maria ikei, ma povothvoth aken i siu sia rintet a iopo lemi. Na Elisabet i vual nge a God Ioni Riringa.

⁴² Ma i presa viringa ma i ri ve, “Sapase wong, na God ile omaing nge wong, i aolonga nge seng alavusnga aka i oma i nge or. Na sapase mun wain aken ru opom nge.

⁴³ Na tho ini seng ao aka ok Pomnga inina i es me mo i porumtet tho, e?

⁴⁴ Na lemk mire aka ong ini ok pomnga inina, eneke aka tho nongpol keum ma ine povothvoth ake a opok lemi, ilemi sivenga ma i siu sia.

⁴⁵ Na lom lemi sivengaing i aolonga, eneke lomumo nge ur aka Toko Pomnga i ri nge wong aka aro i velpol nunganga.”

Maria ia voing aka i risea a God nge.

⁴⁶ Ma Maria i ri vene:
“Lemik i papomnga Toko Pomnga.

⁴⁷ Na onik ilemi sivenga nge a God aka ini lek pamimionga.

⁴⁸ Eneke ilemi esal tho ini ile umonga vulutnga.

Ma i patea ponange na panen
naro toko na seng alavusnga,
aro o apet tho ini seng aka God i oma
senu nge tho.

⁴⁹ Eneke God aka i pomnga rintet,

ile omaing a tho nge,
i aolonga na iion kene i riritet.

⁵⁰ Na i kene i themosal toko na seng areko
o papomnga i
ranga ve nge toko alavusnga
ako o mimi nomenga na ponange
na panen.

⁵¹ Na God i oma omaing aolonga
ako i athepu areko olemi i vual nge
magoning.

⁵² Ma i paesu nepesre aka ru a ole menon-
gare nge,
na i paposnga or.
Na i papomnga toko vulutngare.

⁵³ Na areko o men mesi,
i pavual or nge ur sivesivengare.
Na i pakepot toko le urngare
ma o es ol alapronga la.

⁵⁴ Na nomenga i kin riong tomo nge ar
pompomere
na ponange i oma ol i lale.
Na i opoal mun ile umonga Israelre
lale.

⁵⁵ Ma ilemi rum ile themosaling nge a
Abraham
tomo mun nge ititeviere aka aro o
velpol panen.
Na ile themosaling aken aro ile vu-
songa avele.”

⁵⁶ Na Maria i voth tomo nge a Elisabet
i pavurvur nge ngov or me. Lamako i lo
werer mun a ile pen la.

Elisabet i pop a Jon aka aro i paninu tokokoere.

⁵⁷ Ma ine nang i velpol nge aka aro Elis-
abet i pop itun ma itun aken ini totomone.

⁵⁸ Na ile pen lemiare na ilengare o
nongpola aka God ilemi esal i ma i oma
omaing sivenga rintetnga nge i, mako or
alavusnga olemi sivenga tomo nge i.

⁵⁹ Lama nge nang or limmenga o es mo
aro o is ile, ma o ri ve o apet iion a Sekaraia
mo ini itema iion.

⁶⁰ Aveto inina i ri ve, “Avele! Aro iion a
Jon.”

⁶¹ Na o ria i ve, “Aveto lomnga e avele
ako iion venen aken.”

⁶² Ma o oma inga paatealing aka nge
omeni a itema nge, aka o nin i ve, i sis ve
aro i apeta ol wain aken aro iion ol vava.

⁶³ Mako i nong a or nge ur e ako aro i watu i nge. Mako i watu ve, "Iion a Jon." Ma or alavusnga o kukuk nge.

⁶⁴ A ur e avele na Sekaraia iwo i thep werer, nako i palav ol. Na i patea ol nge a God iriseanga.

⁶⁵ Ma ile pen lemiare o thepol ur aken i velpol ma o kukuk rintet nge. Ma ur aken i kima a pen elonga aka ru a wop a Judia epee aka ini pen polemire.

⁶⁶ Ma tokokoere o nongpol ur aken, ma olemi pelekpol nge, ma o nin pel ve, "Naro wainlanga aken panen aro i velpol aro ini toko le vanga?" Eneke o ate aka ve, Toko Pomnga ile engenging i voth a i nge.

Sekaraia i ripot a God ile riong.

⁶⁷ Ina Sekaraia aka ini a Jon itema i vual nge a God Ioni Riringa na i ripot a God ile riong ve,

⁶⁸ "Aro te risea Toko Pomnga
aka ini Israelre ole God,
eneke i es me lale
na i el werer ilengare.

⁶⁹ Na i sungpot ler pamimionga engenga
ako ini ile umonga a Devit itevinga

⁷⁰ ranga ve nomenga i ripot i
a ile riong elnga riringare owo.

⁷¹ Na i sungpot ler pamimionga
mo aro i el werer it
a ler ngarangre omeni,
na nge tokokoe areko oni silal it.

⁷² Mako i oma nunganga
ile themosaling
a ititeviere nge.
Na i oma ile riong kinnga riringa
ako i oma tomo i nge or nomenga.

⁷³ Na nge ile riong kinnga aken
i ri nunganga a titevir a Abraham nge
ve,

⁷⁴ 'Aro i el werer it
a ler ngarangre omeni,
mo aro te oma ile umong
tomo nge ngangeong avele.'

⁷⁵ Maken aro e nang elonga aka aro te
mimi nge,
aro te voth toko vengvenga
na toko riringa a itheki.

⁷⁶ Na wong, tuk.
Panen aro o apet ong ini a God aka i
roro rintet ile riong elnga.

Eneke aro wong mukal e a Toko Pom-
nga
mo wong monsi ile sovengalo.

⁷⁷ Naro wong ria ile toko na sengre
mo olemi mire nge aka
aro ilemi simikal ole vothung
kerenga
naro i pamimi or.

⁷⁸ Eneke ler God i vual nge themosaling
na i ranga ve ini nang le tolilisong
ako i esu a Pen a Urvet me.

⁷⁹ Ma i totun it
tomo nge areko o voth a mideng
na a rinong lemi
mo aro i pathengal it
nge ler sovengalo aka nge lemi
moring."

⁸⁰ Na wainlanga aken i poma ol ma God
Ioni Riringa i paengeng i, na i voth a pen
polpolnga, makola i pavurvur nge nang
ako i velpol pat ol a toko Israelre otheki.

2

Maria i pop a Jisas.

¹ Nge wop lemi aka Jon rongan i
povothvoth, nepesre ole nepes aka iion a
Sisar Ogastus i sung riong engenga aka
ve, aro o el toko na sengre oion, nge pen
alavusnga aka Rom a gavman i theal i.

² Na nomenga gavman i oma venen
aken avele. Na ake ini ole omaing teltel-
nga aka o el toko na sengre oion. Nge wop
leme aken Kvirinius aka ini toko Rom, ini
mukalinga nge wop aka a Siria.

³ Mako toko na sengre o es a ole pen
tepun omole omole mo o watu oion.

⁴ Ma ina Josep i lospot a rem a Nasaret a
epee a Galili ma i es aka la a Betlehem, aka
a epee a Judia, ini wop aka o pop a nepes
a Devit nge. Na Josep i es nge la, eneke ini
a Devit ilenga.

⁵ Ma i es tomo nge a Maria aka o ateal i
nge i ve aro ini iewo, na i kene iopo ma o
es mo aro o watu oion.

⁶ Na rongan o voth a Betlehem na i
vengtun nang aka aro Maria i pop itun
nge.

⁷ Ma i pop itun tengen aka ini totomone.
Ma i auval i na i pangou i a mekeremre oa
aning le ngoinga. Eneke omei ol e avele
ako ru a ngoaloinga a vel.

Enselre o panongpol sipsip thealngare nge aka Maria i pop a Jisas.

⁸ Na nge epee aken sipsip thealngare o theal ole sipsipre pemlik nge wop aka pililre nge.

⁹ Ma Toko Pomnga ile ensel i velpol a or nge. Na Toko Pomnga ile tolilisong i totun or ma o ngeip rintet.

¹⁰ Na ensel i ria or ve, “Thomu o mothong tova o ngeip. Nongpol, tho pasong panongpolong sivenga ake a thomu nge me, aka aro i pavelpol lemi sivengaing aolonga a toko na seng alavusnga nge.

¹¹ Nge nang ake ponange aka ru a rem aka ini a Devit ile, seng omole aka i pop lomu pamimionga, ini toko aka God i ateal i ve aro i el werer thomu. Na ini Toko Pomnga.

¹² Naro thomu o ate i tova o thopol povothvoth aka o auval i na i ngo a mekeremre oa aning le ngoinga, aken ini lomu paatealinga.”

¹³ Na a ur e avele na ensel avlung aolonga aka a Pen a Urvet o velpol ma o voth tomo nge ensel aken. Ma o vo na o risea a God ve,

¹⁴ “Te risea a God
ako i voth roro a Pen a Urvet.
Na toko na seng areko a ulue
ako ilemi sivenga nge or,
o vual nge lemi moring.”

Sipsip thealngare o es ma o thepol a Jisas.

¹⁵ Ma enselre o plos lelpot or, ma o es werer a Pen a Urvet la. Na sipsip thealngare o ria ol pel ve, “Ita! Te es a Betlehem mo te thepol vet ur aken ru i velpol.”

¹⁶ Ma o losa ma o es viri viri la, ma o kath ma o thepol a Maria ome a Josep na wain aken i ngo a mekeremre oa aning le ngoinga.

¹⁷ Ma o thopol i, lamako o es la ma o ritet nge uneke aka ensel i ria or nge wain aken.

¹⁸ Ma toko alavusnga aka o nongpol riong aka sipsip thealngare o ri nge, ma olemi pelekpol nge.

¹⁹ Aveto ur alavusnga areken Maria i pango i a iopo lemi ma ilemi voth ol inge.

²⁰ Na sipsip thealngare o lo werer mun a sipsipre nge la, ma o vo na o risea a God nge ur alavusnga areko o thepol i na o nongpol i aka ranga ve ensel i ria or nge.

Maria i apeta ol itun iion a Jisas.

²¹ Ma nge nang limmenga, nge nang aka aro o is ile, o apet iion a Jisas. Ion aken ensel i ria Maria nge nomenga aka iopo nge i rongan.

²² Lamako nang i velpol aka aro o pariri osivenga a God itheki* aka ranga ve Moses ile patorong i ri nge. Mako itema ome inina o mane tomo i a Jerusalem la mo aro o pariri osivenga, na e mun i aka aro o sungu i a Toko Pomnga imeni.

²³ Na or paini o panes a Toko Pomnga ile patorong aka i ri vene:

“Na otun tomonnga elonga aka ini tengen aro o sungu i a Toko Pomnga nge mo ini ile.” *Kisim Bek 13:2,12,15*

²⁴ Na or paini o ol pothu or aini ma o oma mun ole sungong nge, aka ini ole paririonga ranga ve aka Toko Pomnga ile patorong i ri nge.

Simeon i thepol a Jisas.

²⁵ Na nge wop lemi aken toko omole aka i voth a Jerusalem, iion a Simeon. Ini toko aka ile vothung i vengveng na ini toko aka i lotual a God. Na i thealal toko aka aro i eltetpot Israelre ole lemi kerereong. Na Oni Riringa i voth a i nge.

²⁶ Na Oni Riringa i ria tel i lale aro i rin tel avele i pavurvur tova i thepol tel Toko Pomnga ile toko aka i ateal i ve aro i el werer ile tokokoere.

²⁷ Ma Oni Riringa i palosa i ma i eso a Lotu Tepun a Vel a lok lemi ma Jisas itema ome inina o pasong i mo aro o oma vothung aken a i nge aka ranga ve Moses ile patorong i ri nge.

²⁸ Na Simeon i manea i na i ri sivengaing a God nge.

²⁹ Na i ri ve,
“Toko Pomnga,
ponange wong oma i

* **2:22:** Seng i riri a God itheki avele i patea nge aka i pop na i pavurvur nge nang mule pa penel.

ranga ve aka ong ria tho nge nomenga.
 Na tho ini lom umonga na modop tho mo tho rin tomo ol nge lemi mor-ing.
 30 Eneke thekik i thepol lom toko lale aka aro i pamimi them
 31 aka ong pavelpol i lale a lom toko na seng alavusnga oth-eki.
 32 Na ini the lalainga aka aro i pathengal lom sovengalo nge tokokoe areko ini Judare avele.
 Naro o paesa lom toko Israelre oion roro nge i.”
 33 Na Jisas itema ome inina ole mi pelekpol a lemi sivengaing we nge riong areko Simeon i oma i nge i.

34 Ma Simeon i ri ve aro God i oma senu nge or, na i ria Maria, aka ini wain aken inina, ma i ria i ve, “Nongpol, God i ateal wain ake ve aro i paru toko Israel pelie a God itheki naro i paro pelie. Naro i ranga ve ini paatealing aka a God nge, naro toko pulua aro okei enal i.

35 Mako ole lemi rumong aka i ngo kine aro i velpol pat ol. Na lemi kerereong aka i ranga ve ini peang wowonga aka aro i pun sivengom lomum.”

Ana i thepol a Jisas.

36 Ma seng omole e aka i voth, ini a God ile riong elnga, iion a Ana. Na ini a Panuel itun aka ini a Aser ilenga. Na i kimeit rintet lale, na nomenga aka i peange ma i voth tomo inga nge iewo nge tovu po or limai.

37 Lamako iewo tomonnga i rin, na i voth basu na ia tovu po or mule pa limme pothoi or penel. Na i lo lelpot Lotu Tepun a Vel a lok lemi avele. Na nge nang na mlik i sem na i nong na i lotual a God.

38 Na Simeon ile riong i vusu inga na Ana i velpola ma i ri sivengaing a God nge, na i ri mun nge wain aken, nge areko o thealal nge a God mo i el werer a Jerusalem a ngarangre omeni.

Jisas ome itema na inina o lo werer a Nasaret la.

39 Ma nge aka Josep ome a Maria o oma vus ur elonga areko ranga ve aka Toko Pomnga ile patorong i ri nge, lamako o lo werer a ole rem a Nasaret aka a epee a Galili.

40 Ma wainlanga aken i poma, ma i engeng, na ile mire i aolonga, na God ile themosaling i voth a i nge.

Jisas i voth tomo nge patoralingare aka a Lotu Tepun a Vel a lok lemi.

41 Na nge tovu po elonga Jisas itema ome inina o es a Jerusalem nge aning ako o apet i ve ini “Pasova”.

42 Na Jisas ia tovu po or mule pa omole pothoi or aini ma o panes ole vothung aka o eses nge aning aolonga aka ro a Jerusalem.

43 Lamako aning aolonga aken i vus, mako o lo werer ol, aveto wainlanga a Jisas rongan i voth a Jerusalem, na itema ome inina ole mi mire avele aka rongan i voth.

44 Na or paini o rivenga i aka ru i es tomo nge toko na sengre aka o es tomo nge or la. Ma or paini o es e nang alarolnga na or paini o kath i a olengare nge na o thangangaere nge.

45 Ma or paini o kath, ma o kath, ave o thepolo i avele. Mako or paini o lo werer mun a Jerusalem la mo o ortet mun i nge.

46 Ma nang menga o thopol i aka i men a Lotu Tepun a Vel a lok lemi. Na i men tomo nge pamirealingare nge a Moses ile patorong, ma i nongpol ole riong ma i nin mun or e ninong pelie.

47 Ma tokokoere aka o nongpol ile riong, o kukuk nge ile mire na nge ile riong olalngare.

48 Ma or paini o thepol i ma o kukuk rintet nge. Ma inina i ria i ve, “Tuk, ong vova ake ong oma ol vene ake nge them paini, e? Na them e tomom, lemimem kerere nge wong make them kath ong.”

49 Ma i olal ole riong ve, “I vava ake thomu paini o kath tho, e? Thomu paini lomumu mire avele? Wop omole aka aro tho voth inga nge aka ini ok Vovo ile vel.”

50 Aveto or paini ole mi mire nge ile riong aken mirenga e avele.

⁵¹ Lamako Jisas i lo werer tomo ol nge or paini a Nasaret la. Na i nongal senu ole riong. Na ur alavusnga areken inina i pango pis i a iopo lemi.

⁵² Ma Jisas i poma na ile mire kene i aolonga. Na God tomo nge tokokoere olemi sivenga nge i.

Tenesing nge ur areko i velpol tel a mukaling ako i monsi sovengalo nge a Jisas ile omaing

3

(Vonge 3:1-4:13)

Jon aka ini toko paninuonga i panongpol nge riong.

(Matiu 3:1-12; Mak 1:3-8)

¹ Ine tovu po mule pa omole pothoi or limnga aka Taiberius Sisar i voth ini nepes. Na Pontius Pailat ini gavana nge a epee a Judia. Na Herot i theal epee aka a Galili, na iteinnga a Pilip i theal epee aka ru a Ituria na Trakonitis. Na Lisanias i theal a Abilene.

² Na Anas ome a Kaiapas or paini ini Prisre oa Pomnga. Na nge wop lemi aken Jon aka ini a Sekaraia itun i voth a pen polpolnga na God ile riong i velpol a i nge.

³ Ma Jon i esu esa e pen elonga aka i toth a thei a Jordan, ma i panongpol toko na sengre ve, "Naro thomu o pathengal or nge aka o lel kimomu nge lomu vothung kerengare, nge paninuong elnga mo aro God ilemi simikal lomu vothung kerengare."

⁴ Na Jon ile omaing aken i ranga ve ini wating aka i voth a God ile riong elnga a Aisaia ile erere nge, ma i ri vene:

"Toko e aka i leng a leng a pen polpolnga
ma i leng ve,
'Monsi Toko Pomnga ile sovengalo,
na pavengveng ile sovengalo
mo aro i es nge.'

⁵ Na ruprup alavusnga
aro ultunnga,
na pengene tomo nge tete alavusnga
aro tounga,
na lomolire
aro o pavengveng i,
na sovengalo areko i gurikrok

aro i sathamtet.

⁶ Naro toko alavusnga ake ru a ulue
aro o thepol omaing aka God i
pamimi or nge.' " *Aisaia 40:3-5*

⁷ Na toko na seng pulua aka o espot a Jon nge la aka aro o el paninuong a i nge. Ma i ria or ve, "Thomu ini ingop kerenga itutunre, na thomu o eksing senu rongan na thomu o ri ve o el polpol paninuong mo aro o lo nge a God ile paomelaling aka aro i velpol panen.

⁸ Na o oma tel vothung aka i pathengal aka ve, thomu o lel kimomu nge lomu vothung kerenga lale. Na thomu o mothong tova o pakukukala a lomu riong pelie ve, 'Aro them ela God ile paomelaling avele, eneke nomenga God i kin ile riong tomo nge a Abraham, na Abraham ini titievimem.' Eneke tho ria thomu ve, God i pavurvur aka aro i oma um areke mo o velpol ini a Abraham ititeviere.

⁹ Na God ile paomelaling i ranga ve ini telenga wowonga aka i totho lale aka aro i vairo i a thomu nge aka o ranga ve ini won. Na won alavusnga areko omonnga i sivenga avele, aro o tetela ir mo o asesu or a won sesenga nge."

¹⁰ Ma Jon i ria vene aken, ma toko alavusnga o nina i ve, "Aro them oma vava?"

¹¹ Ma i olal ole riong ve, "Omu e ile tekruk or aini, aro i sungu omole e a toko aka ile avele. Na toko aka ia aning i voth, aro i sung mun i."

¹² Na toko pelie aka ini umtun elngare o es mo o el mun paninuong ma o nina i ve, "Pamirealinga, aro them oma vava?"

¹³ Ma i ria or vene, "Aro thomu o el inga umtun ranga ve aka gavman i ria thomu nge. Naro o el polpol mun pelie avele."

¹⁴ Na toko punongare pelie aka o nin mun i ve, "Na them, aro them oma vava?"

Ma i olal ole riong ve, "Thomu o mothong tova o siso polpol tokokoere na o pamit or nge riong mo o el polpol umtun a or nge. Naro lomumu i sivenga inga nge olongomu elnga."

¹⁵ Ma toko na sengre o nongpol a Jon ile riong ma olemi ve aro ur sivenga aro i velpol. Na olemi pelekpol aka ve, "Ava ini

toko aton ru God i ateal i ve aro i el werer it eve ava avele.”

¹⁶ Mako Jon i olal ole riong ve, “Tho paninu thomu nge thei, aveto toko e ako aro i rumongal me, kene ile engenging i aolonga nge lek engenging, na i pavurvur aro tho es totho a ilo sei mo aro tho inospot ile esonga a we, kene avele. Naro i paninu omu pelie nge a God Ioni Riringa, aveto omu pelie nge won sesenga.

¹⁷ Naro i nongpol toko alavusnga ole riong, naro i thomreu areko o sivenga na areko o kerenga, ranga ve ini toko pen lesnga i thomreu wit monnga sivenga na wit peti kerenga. Naro i veliloalo ur sivesivengare a ile pen sivenga, aveto ur kerekerekengare aro i asesu ir a won sesenga nge ako aro ile vusonga avele.”

¹⁸ Na Jon i oma riong relnga mun pelie aka aro i pavurpol olemi nge, mako i panongpol nge panongpolong sivenga a toko na sengre nge.

Herot i paeso a Jon aka ini toko paninuonga a mang a midenga lemi.

(Matiu 14:3-5; Mak 6:17-18)

¹⁹ Na Jon i vol a Herot aka ini nepes, eneke i pamues a Herodias aka ini itein posnga iewo tomo mun nge vothung pulua kerenga mun aka i oma i.

²⁰ Ma Herot i rong esa mun ile kerenggaing aka ranga ve i paeso a Jon a mang a midenga lemi.

Jon i paninu a Jisas.

(Matiu 3:13-17; Mak 1:9-11)

²¹ Na Herot i paeso a Jon a mang a midenga rongan, na nge aka toko alavusngare o el paninuong, na Jisas mun i el paninuong, ma rongan i nong, nako sepsa i thep.

²² Na Oni Riringa i esu a i nge me, ma i ranga ve ini pothu, ma i men a i nge. Na lenging aka i espot a sepsa lemi me ma i ri ve, “Wong ini tuk aka ok sagu rintet wong, ma lelik sivenga rintet mun nge wong.”

Jisas ititeviere oion.

(Matiu 1:1-17)

²³ Na nge wop lemi aka Jisas i patea ile omaing ma ia tovu po mule pa me. Ma toko na seng olemi aka ve, ini a Josep itun.

Na Josep ini a Heli itun.

²⁴ Na Heli ini a Matat itun.

Na Matat ini a Livai itun.

Na Livai ini a Melki itun.

Na Melki ini a Janai itun.

Na Janai ini a Josep itun.

²⁵ Na Josep ini a Matatias itun.

Na Matatias ini a Amos itun.

Na Amos ini a Nahum itun.

Na Nahum ini a Esli itun.

Na Esli ini a Nagai itun.

²⁶ Na Nagai ini a Mat itun.

Na Mat ini a Matatias itun.

Na Matatias ini a Semen itun.

Na Semen ini a Josek itun.

Na Josek ini a Joda itun.

²⁷ Na Joda ini a Joanan itun.

Na Joanan ini a Resa itun.

Na Resa ini a Serubabel itun.

Na Serubabel ini a Sealtiel itun.

Na Sealtiel ini a Neri itun.

²⁸ Na Neri ini a Melki itun.

Na Melki ini a Adi itun.

Na Adi ini a Kosam itun.

Na Kosam ini a Elmadam itun.

Na Elmadam ini a Er itun.

²⁹ Na Er ini a Josua itun.

Na Josua ini a Elieser itun.

Na Elieser ini a Jorim itun.

Na Jorim ini a Matat itun.

Na Matat ini a Livai itun.

³⁰ Na Livai ini a Simeon itun.

Na Simeon ini a Juda itun.

Na Juda ini a Josep itun.

Na Josep ini a Jonam itun.

Na Jonam ini a Eliakim itun.

³¹ Na Eliakim ini a Melea itun.

Na Melea ini a Mena itun.

Na Mena ini a Matata itun.

Na Matata ini a Natan itun.

Na Natan ini a Devit itun.

³² Na Devit ini a Jesi itun.

Na Jesi ini a Obet itun.

Na Obet ini a Boas itun.

Na Boas ini a Salmon itun.

Na Salmon ini a Nason itun.

³³ Na Nason ini a Aminadap itun.

Na Aminadap ini a Atmin itun.

Na Atmin ini a Arni itun.

Na Arni ini a Hesron itun.

Na Hesron ini a Peres itun.

Na Peres ini a Juda itun.

³⁴ Na Juda ini a Jekop itun.

Na Jekop ini a Aisak itun.

Na Aisak ini a Abraham itun.

Na Abraham ini a Tera itun.
 Na Tera ini a Nahor itun.
³⁵ Na Nahor ini a Seruk itun.
 Na Seruk ini a Reu itun.
 Na Reu ini a Pelek itun.
 Na Pelek ini a Eber itun.
 Na Eber ini a Sela itun.
³⁶ Na Sela ini a Kainan itun.
 Na Kainan ini a Arpaksat itun.
 Na Arpaksat ini a Siem itun.
 Na Siem ini a Noa itun.
 Na Noa ini a Lamek itun.
³⁷ Na Lamek ini a Metusela itun.
 Na Metusela ini a Enok itun.
 Na Enok ini a Jaret itun.
 Na Jaret ini a Mahalalel itun.
 Na Mahalalel ini a Kenan itun.
³⁸ Na Kenan ini a Enos itun.
 Na Enos ini a Set itun.
 Na Set ini a Adam itun.
 Na Adam ini a God itun.

4

Satan i tongporum a Jisas.

(Matiu 4:1-11; Mak 1:12-13)

¹ Na Jisas i vual nge Oni Riringa, ma i losteta a thei a Jordan. Mako Oni Riringa i wolu wola i a pen polpolnga.

² Ma i voth nge wop aken, i pavurvur nge nang or mule pa penel. Ma Satan i tongporum i nge, na nge nang alavusnga aken Jisas i an vet avele. Ma nang or mule pa penel aken i vus, mako i rova ol mesipuniong.

³ Na Satan i ria i ve, “Tova ve ong ini a God Itun, mo wong ria um ake mo i eksing mo ini bret.”

⁴ Ma Jisas i olal ile riong ve, “God ile erere i ri vene:
 ‘I pavurvur aro toko i mimi inga nge aning avele.’” *Lo 8:3*

⁵ Ma Satan i paesa i roro, na a ur e avele, nako i pathengalpot i nge rumrem elonga ake ru a ulue.

⁶ Na i ria i ve, “Naro tho sungu ur alavusnga aken a wong nge mo ong theal i, mo aro iom i kima nge. Na aro ve tho sungu i nge toko e, aro tho sungu i inga nge i, eneke ur alavusnga aken i voth a menik.

⁷ Na aro ve ong lotual tho, aro ur alavusnga ake ini lom.”

⁸ Na Jisas i olal ile riong ve, “God ile erere i ri vene:

‘Aro ong lotual inga Toko Pomnga ako ini lom God,
 naro wong oma inga ile omaing.’” *Lo 6:13*

⁹ Na Satan i wol a Jisas a Jerusalem la, ma i paesa i a Lotu Tepun a Vel, ma i pamita i roro a vel polemi. Ma i ria i ve, “Tova ve wong ini a God Itun, aro wong ophou la,

¹⁰ eneke God ile erere i ri vene:
 ‘God aro i ria ile enselre
 mo o theal senu wong.

¹¹ Naro o monteta la wong nge omeni,
 mo aro evom i tup nge um e avele.’”
Buk Song 91:11-12

¹² Na Jisas i olal ile riong ve, “God ile erere i ri vene:
 ‘Mothong tova tongporum Toko Pomnga
 ako ini lom God ile engenging.’” *Lo 6:16*

¹³ Na Satan i oma tongporumong pulua lale nge a Jisas, ma i lo lelpot i mo aro i men tetal mun nge nang relnga e.

Jisas i eso a Galili ma Oni Riringa i paengeng i nge ile omaing pateanga

(Vonge 4:14-9:50)

Jisas i patea ile omaing a Galili.

¹⁴ Na Jisas i lo werer a Galili la na Oni Riringa ile engenging i voth a i nge. Na ikimanga i song a pen elonga aka i toth a Galili.

¹⁵ Na i patoral or aka ru a Judare ole lotuonga a velre, ma or alavusnga o paesa iion roro.

Nasaret angare o kelelal a Jisas ile omaing.

(Matiu 13:53-58; Mak 6:1-6)

¹⁶ Na Jisas i es a Nasaret aka ini rem aka i poma nge. Na nge nang rialonga i panes ile vothung, na i eso a Judare ole lotuonga a vel, ma i mita mo aro i tital a God ile erere.

¹⁷ Ma o sungu a God ile riong elnga a Aisaia ile erere a i nge. Ma i thep i, na i ortet riong e aka aro i tital viringa a tokokoere nge, ma i ria ve,

¹⁸ “Toko Pomnga Ioni Riringa i voth a tho nge,
 eneke i ategal tho ve aro

tho panongpol Panongpolong Sivenga
a toko le ur avelengare nge.
Na i pake tho me ve aro
tho panongpol areko o voth a mang a
midenga
mo aro o vthopot.
Na i pake tho me ve aro
tho panongpol mun areko otheki pros
mo aro o the werer.
Na i pake tho me ve aro
tho pavthopot areko ole ngarangre o
paomelal or.

19 Na i pake tho me ve aro
tho panongpol nge ako,
tovu po aka Toko Pomnga i the-
mosal toko na sengre nge,
kene i velpol lale.” *Aisaia 61:1-2*

20 Ma Jisas i mol werera erere aken ma
i sung wereru i a toko aka i theal erere
areken. Lamako i men wereru. Ma toko
na seng alavusnga aka ru a vel lemi o the
rinrin ol inga aka ini i.

21 Lamako i patea ol riong a or nge, ma i
ri ve, “Na ponange thomu o nongpol riong
aken kene i velpol nunganga lale.”

22 Ma or alavusnga o ri riong sivenga
nge i ma o kukuk nge riong sivenga aka
i velpolpot a iwo. Ma o ri ve, “Ake ini a
Josep Itun inga na ile riong sivenga aken i
es vanath me?”

23 Ma i ria or ve, “Lemik mire aka ve,
aro thomu o ria riong agelalnga a tho nge
me ranga ve, ‘Vuralinga, aro ong pamimi
sivengom.’ Naro thomu o ri mun ve, ‘Ur
areko them nongpol aka wong oma i a
Kaperneam, aro wong oma werer mun i
ake ru a lom rem tepun.’”

24 Ma i ria mun or ve, “Tho ri nunganga
a thomu nge, God ile riong elnga e, aro ve
i lo werer a ile rem tepun, tokokoere aro o
nongal ile riong avele.

25 O nongpol, tho ri nunganga a thomu
nge, nomenga nge wop lemi aka Elaija i
votu, seng basu pulua aka o votu mun a
Israel. Na nge wop lemi aken sepsa i pupal
rintet ma vit i mol vet avele nge tovu po
or me na ngov or limae. Na mesi aolonga
i velpol a pen elonga a ulue.

26 Aveto God i pake a Elaija a seng basu
e nge avele aka ru a Israel aka ini ile rem

tepun. Aveto i pake inga i a seng basu e
ako a rem a Sarepat aka a epee a Saidon.

27 Na nomenga nge wop lemi mun aka
God i pake ile riong elnga a Elisa a Israelre
nge, toko pulua aka a Israel kene putput i
el or. Aveto oa e avele i senu werer. Ave
ini inga Naman aka ini Siria anga i senu
werer.”

28 Na toko alavusnga aka a Judare ole
lotuonga a vel lemi, o nongpol riong aken
ma olemi kling rintet nge a Jisas ile riong,
ako i oma i a or nge.

29 Ma o losa ma o titpopot a Jisas a rem
pomnga wopo a tete polemi mo o wola i la
ma o ri ve o asesu i a ruprup la.

30 Aveto Jisas i eksing ma i es werer a oa
lemimi, mako i es la.

*Jisas i wistetpot tamata kerenga a toko
ako nge.*

(Mak 1:21-28)

31 Ma Jisas i esu a rem a Kaperneam aka
a epee a Galili. Na nge nang rialonga i
patalor toko na sengre.

32 Ma o nongpol ile riong ma o kukuk
nge, eneke ile patoraling aken i ranga ve
ini toko aka ile engenging i aolonga.

33 Na toko e aka i votu a Judare ole
lotuonga a vel lemi kene tamata kerenga
i votu a i nge. Ma i wal na i presa viringa
ve,

34 “Wong ake ini a Jisas aka ini Nasaret
anga. Lom neke i votu a tho nge? Na wong
es ake me mo ong ri ve wong pakerenga
them, e? Na lemik mire nge wong, wong
ini toko riringa aka ini a God ile.”

35 Aveto Jisas i vol i ma i ria i ve, “Wong
poreng, na wong lopot a toko aken nge.”
Ma tamata kerenga aken i asesu toko aken
a ulue aka ru a otheki lemi. Ma i lopot a i
nge na i pakerenga i avele.

36 Ma tokokoere o kukuk. Na o ria
osivenga nge ve, “Ake ini riong le vanga
ake? Eneke ile riong i mathe na i ranga ve
ini toko aka ile engenging i aolonga. Na i
ri pompom nge tamata kerengare, mako o
lopot.”

37 Mako ritetong nge a Jisas i kima ol a
pen elonga aka i toth a Kaperneam.

Jisas i pamimi toko pulua.

(Matiu 8:14-17; Mak 1:29-34)

38 Ma Jisas i plosa ma i espot a Judare ole lotuonga a vel, ma i es a Saimon ile vel lemi. Ma Saimon iewo inina ini multhang ma ini peti i vel rintet. Ma o leng a Jisas ve aro i opoal i.

39 Mako i mit totho a ni multhanging aken nge, ma i vol ni peti velonga aken, mako i lo lelpot i, na a ur e avele na seng aken i plosa ma i monsi nge oa aning.

40 Ma nang i mena ol a ile ring, na tokokoe areko olengare o el ni multhanging rel relngare, o pasong or a Jisas nge, ma i ronga imeni a or omole omole nge, mako i pamimi werer or alavusnga.

41 Ma tamata kerengare o lopot a tokokoere nge. Ma tamata kerengare o lopot na o walal na i ria ve, "Wong ini a God Itun." Aveto i vol or na i rial or ve, o mothong tova o ri, eneke ini plong ve aro o ritet tokokoere ako ve, ini toko aka God i ateal i ve aro i el werer toko na sengre.

*Jisas i panongpol a rem elonga.
(Mak 1:35-39)*

42 Na totho rulpounga na Jisas i lospot nge rem aken ma i es nge wop aka tokokoere nge avele. Ma tokokoere o ortet i. Lamako o sangpolo i ma o ri ve o rialalu i mo i mothong tova i lo lelpot oa.

43 Aveto i ria or ve, "Aro tho panongpol nge Panongpolong Sivenga aka nge a God ile menong e nepes, nge rem rel relngar munre, eneke God i pake tho ve aro tho oma omaing aken."

44 Ma i panongpol a Judare ole lotuonga a velre a pen elonga aka ru a epee a Judia.

5

Jisas i leng a Pita mo aro i velpol ini ile wainlanga.

(Matiu 4:18-22; Mak 1:16-20; Jon 1:40-42)

1 Nge nang omole aka Jisas i mit a thei a pamonlel a Galili wo peti, ma toko pulua aka o es a i nge ma o mumrongtuno i, ve aro o nongpol a God ile riong.*

2 Ma Jisas i thepol wok or aini aka o wetea i a thei wo peti. Aveto wok tokoninga aka ini silang elngare o voth nge avele, eneke o sopol oa susua.

* **5:1:** Galili iion mun a Genesaret.

3 Mako Jisas i ro a wok nge aka ini a Saimon ia. Ma i ria Saimon ve aro i osthongpot wok a sthapot la tie. Na Jisas i men a wok lemi na i patorial toko na sengre.

4 Ma i patorial or ma i vus, lamako i ria Saimon ve, "Aro wong na thongongomre aro o sauthpot a thei stha la, mo o ulu omu susua mo o ting silang."

5 Ma Saimon i ria ve, "Toko Pomnga, them um polpol inga nge pemlik lollonga ake ma them tinga vet silang e avele. Aveto aro them ulu wereru mun emem susua, eneke wong ria vene aken lale."

6 Ma o oma venen aken ma o tinga silang pulua, na pa omole re aka aro oa susua aro i minrira.

7 Mako omeni wit othangangaere aka nge wok aininga mo o es me mo o opoal or. Na o asesa silangre nge wok alaini aken ma i vuala ma pa omole tova aro wok alaini o vlu.

8 Ma Saimon Pita i thepol aken. Ma ilemi kerere ma i koru ieve a Jisas itheki lemi ma i ria ve, "Toko Pomnga, aro wong lo lelpot tho, eneke tho ini toko aka lek vothung kerenga."

9 Ma i ria ol venen aken, eneke i thepol silang pulua ma i kukuk nge. Ma areko o voth tomo nge i o kukuk mun nge.

10 Ma Sebedi itun or aini aka ini a Jems na Jon, or paini ini a Saimon ithanga, ma or paini mun kene o kukuk.

Lama Jisas i ria Saimon ve, "Wong mothong tova ong ngeip, nomenga ong el silang, aveto ponange na panen aro ong el toko na sengre a tho nge me."

11 Ma o monteta oa wokre a thei wo peti la, na o modipdopu ur alavusnga na o panes a Jisas.

Jisas i pamimi werera toko aka putput i voth a i nge.

(Matiu 8:2-4; Mak 1:40-44)

12 Na Jisas i voth a rem pomnga omole na toko omole aka i voth nge, kene ini peti i vustetu nge putput. Ma i thopol a Jisas ma i koru ieve ma ipo tiru a ulue na i nong a i nge ma i ria i ve, "Toko Pomnga, ong pavurvur aro ong paonolpot tho mo tho

riri a God itheki, tova lomum ve aro ong oma i.”

¹³ Ma Jisas i ronga imeni a i nge na i ria i ve, “Lemik ve aro tho oma i, aro wong riri werer.” Na a ur e avele, nako putput aken i vuspot ol a i nge.

¹⁴ Ma Jisas i ri engeng a i nge ve, “Wong mothong tova ong ria ol toko e nge. Aveto aro wong es vengveng a pris nge la, mo i thopolrum num peti, mo aro i panunganga riong nge wong ve, ‘Putput i vus.’ Na oma lom sungong ranga ve Moses i ria nge lale, mo ako tokokoere olemi mire ako ve, num multhanga aken i vus.”

¹⁵ Aveto ur areko Jisas i oma i, i kimapot a pen elonga. Mako toko puluanga o es a i nge, mo o nongpol ile riong, naro i eltetpot oni multhanga.

¹⁶ Aveto nang pulua ako, i es nge wop aka toko e nge avele, ma i nong nge.

Jisas i pamimi werer toko aka ini peti motungtung.

(Matiu 9:2-8; Mak 2:3-12)

¹⁷ Nge nang e aka Jisas i patorial toko na sengre, na pokononga pelie aka o apet or ini Parisire tomo nge pamirealingare nge a Moses ile patorong aka o es e pen elonga aka ru a Galili na Judia na Jerusalem, or aka o men tomo mun. Na Toko Pomnga ile engenging, i voth tomo nge a Jisas, mo aro i pamimi ni multhangingare.

¹⁸ Ma tokokoe pelie aka o potuna toko omole aka tomo nge ile ngosel. Ma toko aken ini peti motungtung. Ma o ri ve o potuno i a vel lemi la, mo o parong i a Jisas itheki lemi.

¹⁹ Aveto vel lemi i vual rintet nge toko na sengre, na ole sovengalo avele aka aro o paesa ni multhanginga aken a vel lemi la. Mako o paesa i a vel powe la, ma o eltetpot vel pothoi aka ini um. Na toko aken o pamonlolou tomo i nge ile ngosel la, aka ru a toko na sengre oa lemimi, aka ru a Jisas itheki lemi.

²⁰ Ma Jisas i thepol ole lemioong ma i ria ve, “Teik, tho ria wong God ilemi simikal lom vothung kerengare lale.”

²¹ Na Parisire tomo nge pamirealingare nge a Moses ile patorong osivenga olemi

pompom ve, “Toko aken ini ao ake i kelelal a God, e? Toko e i pavurvur avele, God inga i pavurvur aka aro i patitepot toko ile vothung kerenga.”

²² Ma Jisas i ate ole lemi rumong ma i ria ol or ve, “I vova ake lomumu i voth vene ake?”

²³ Riong kathnga i semel aka aro tho ria i? Aro ve tho ria i ve, ‘God ilemi simikal lom vothung kerengare lale.’ Riong ake i semel, eneke thomu o pavurvur, aka aro o thopol lek riong potoi avele. Aveto aro ve tho ria i ve, ‘Plosa mo es.’ Riong ake i klip, eneke thomu o pavurvur aro o thopol lek riong potoi.

²⁴ Maken aro tho ri riong klipnga aken, eneke tho sis aka ve, lomumu mire aka ve, Toko Pomnga Itun ile engenging ake ru a ulue, i voth, ma i pavurvur nge toko na sengre ole vothung kerengare patitepotnga.” Mako i ria toko ni peti motungtunga ve, “Tho ria wong, ong mita mo ela lom ngosel mo es a lom vel.”

²⁵ Na a ur e avele, nako i losa a toko na sengre otheki, na i ela ile ngosel aka ru i ngo nge na i es a ile vel la, na i paesa God iion roro.

²⁶ Ma toko alavusnga o kukuk rintet nge. Ma o paesa God iion roro. Na o papomnga i. Ma o ria ve, “Na ponange them thepol ur aka i rel rintet.”

Jisas i leng a Livai mo aro i panes i, na i oma riong agelalnga aka i ranga ve ini vuralinga.

(Matiu 9:9-13; Mak 2:14-17)

²⁷ Lamako Jisas i espot ol, ma i thepol toko aka kene ini umtun elnga aka i men a ile umtun elnga a vel. Na iion a Livai,[†] ma Jisas i ria i ve, “Wong panes tho.”

²⁸ Mako Livai i mita na i mothongelu ile ur elonga, na i panes a Jisas.

²⁹ Na Livai i oma Jisas ia aning aolonga aka a ile vel. Na umtun elnga puluanga tomo mun nge tokokoe pelie, o voth ma o an tomo nge or paini.

³⁰ Na Parisire tomo nge pamirealingare nge a Moses ile patorong, oni plong nge omaing aken, ma o ria ria nge a Jisas ile wainlangaere. Ma o ria ve, “I vava

[†] 5:27: Livai iion aininga ini a Matiu.

ake thomu o an tomo na o thin tomo nge tokokoe areko ini umtun elngare na areko ole vothung kerenga, e?”

³¹ Ma Jisas i olal ole riong ve, “Areko olemi ve o sivenga, aro o es a vuralinga nge avele, ini inga areko oni multhang aro o es a i nge.

³² Tho velpol ako aro tho leng toko vengvengare mo aro o eksing ole mimiong, kene avele. Tho velpol ako aro tho leng tokokoe areko ole vothung kerenga, mo aro o eksing ole mimiong.”

Jisas i ranga ve ini toko aka i peange ponganga.

(Matiu 9:14-15; Mak 2:18-20)

³³ Na tokokoe areken o ria mun a Jisas ve, “Na Jon ile wainlangaere o sem nge aning, na o nong mo o lotual nge a God. Na Parisire ole wainlangaere o oma mun venen aken. Aveto lom wainlangaere o an na o thin na o sem avele.”

³⁴ Ma Jisas i ria or nge riong agelalnga ve, “Aro ve toko peange ponganga, i voth tomo nge ilengare nge sungaling a aning, i pavurvur aro o sem avele.”

³⁵ Aveto panen aro o eltetpot toko peange ponganga aken a or nge. Naro nge wop lemi aken aro o sem ol e aning.”

Jisas i patorial or nge aka ile pamirealing ponganga i pavurvur aro i es tomo nge ole patorialing neginga avele.

(Matiu 9:16-17; Mak 2:21-22)

³⁶ Ma Jisas i oma mun riong agelalnga omole aka a or nge. Ma i ria ve, “Toko e aro i inrapot tekruk epee ponganga, naro i italalo i nge tekruk neginga avele, aro vene mo i pakerenga tekruk ponganga aken na epee ponganga aken i ang tomo nge tekruk neginga avele.”

³⁷ Na toko e i mothong tova aro i save vain ponganga, nge thei pokin aka ini mekerem peti neginga, eneke i pavurvur aro i lowimpot avele, aro vene mo aro vain i lothunpot mo aro thei pokin aken aro i vupol, mo vain i lel pautet na thei pokin aro i kerenga.

³⁸ Aveto i sivenga aka aro o save vain ponganga nge thei pokin ponganga.

³⁹ Na aro ve toko e i thin vain neginga lale, aro i mothong ol vain ponganga thinninga, eneke aro i ri ve, ‘Negininga i sivenga nge thinong.’ ”

6

Jisas i ria or ve ienga inga aka i mukal nge nang rialonga.

(Matiu 12:1-8; Mak 2:23-28)

¹ Na nge nang rialonga omole Jisas i es a wit a ometa lemi. Na ile wainlangaere o vurpot wit monnga pelie na o sisa i nge omeni na o an i.

² Ma Parisi pelie o ri ve, “Na i vava ake thomu o oma ur areko ler patorong i rial i nge nang rialonga, e?”

³ Ma Jisas i olal ole riong ve, “Na thomu o tital tenesing nge ur areko Devit i oma i nomenga, nge wop lemi aka ome ile tokokoere mesipun or.”

⁴ Ma Devit i eso a God ile vel lemi, ma i elpot bret aka o oma i ma ini sungong a God nge. Na Moses ile patorong i ri ve, bret aken tokokoere o rial nge, ini inga prisre oenga aro o an i. Aveto Devit i an i na i sungu mun i a ile tokokoere nge, aveto God i paomelal or avele.”

⁵ Ma Jisas i ria or ve, “Na Toko Pomnga Itun i pavurvur aka aro i panes ilemi nge nang rialonga.”

Nge nang rialonga Jisas i oma senu toko aka imeni morungrung.

(Matiu 12:9-14; Mak 3:1-6)

⁶ Na nge nang rialonga mun e aka Jisas i eso a Judare ole lotuonga a vel, ma i patorial toko na sengre. Na toko omole aka i voth aka imeni sivenga nge anga i morungrung, ma imeni omkolo.

⁷ Ma ine pamirealingare nge a Moses ile patorong, tomo nge Parisire o thopolrum senu nge a Jisas, eneke o kath ia tepun e aka aro o teltun ia nge tova ve i pamimi toko nge nang rialonga, akennga i leklek lale.

⁸ Aveto Jisas ilemi mire nge olemi, mako i ria toko meni morungrunga aken ma i ria i ve, “Wong mita mo espot a mukaling me.” Mako toko aken i mita ma i espot a mukaling.

⁹ Ma Jisas i ria areko o thopolrum i, ma i ria or ve, "Tho sis aka ve, tho nina tel thomu, aro te oma uneke nge nang rialonga aka i panes ler patorong, aro te oma omaing sivenga, eve aro te oma omaing kerenga? Naro te pamimi toko nge, eve aro te pakerenga toko nge?"

¹⁰ Na Jisas i theu thea a toko alavusnga nge, lamako i ria toko aken ve, "Pavengvengpot menum mo menum savelvelu." Ma i oma i ranga ve aka Jisas i ria i nge, mako imeni i sivenga werer sele.

¹¹ Aveto Parisire olemi kling rintet nge i, ma osivenga o ria pel ve, "Aro te oma vava nge a Jisas?"

Jisas i paateal nge ile wainlanga or mule pa omole pothoi or aini.

(Matiu 10:2-4; Mak 3:16-19; Pakeke 1:13)

¹² Nge nang omole aka Jisas i espot ma i esa a tete mo i nong a God nge. Ma i mosal inga nongong nge pemlik lollonga aken makola rulpopou.

¹³ Ma nang i toa ol me, ma i leng ile wainlangaere a i nge me. Ma i ateal or mule pa omole pothoi or aini a or nge mo o velpol ini ile pakekere, aka o apet or ini aposelre.

¹⁴ Ma oion vene: Na omole ini a Saimon, na Jisas i sungu mun iion aininga a Pita. Na Andru aka ini a Saimon itein. Na Jems na Jon na Pilip na Bartolomiu.

¹⁵ Na Matiu na Tomas na Jems aka ini a Alpius itun, na Saimon aka i voth a toko avlung aka o apet i ve ini a Selot.*

¹⁶ Na Judas aka ini a Jems itun. Na Judas Iskariot aka aro panen i sungu a Jisas a ngarangre omeni.

Jisas i pamimi werer toko na seng pulua.
(Matiu 4:23-25)

¹⁷ Ma Jisas ome ile pakeke areken, o esu a tete me. Ma o esu ma o mitu a pen vovovngra. Na ile wainlangaere pulua aka ru o voth mun. Ma tokokoe pulua aka ini Judia angare na pelie ini Jerusalem angare na pelie aka o es telek a thev epee aka a Tair ome a Saidon, o voth mun.

* **6:15:** Selot i mirenga aka ve, i voth e toko avlung aka o sis ve aro o pun tomo nge Romre ole gavman mo osivenga o theal ol or.

¹⁸ Ma o es aka me ve aro o nongpol ile riong naro i pamimi werer or nge oa ni multhanging. Na toko na sengre aka tamata kerengare o voth a or nge, o es mun a i nge ma i wistetpot tamata kerengare a or nge.

¹⁹ Ma toko alavusnga o tongporum aka aro o vugiro i, eneke ile engenging aolonga i eso e areko o vugiro i, mako o senu werer.

Jisas i ri nge sapaseong na lemi kerereong.

(Matiu 5:3-12)

²⁰ Ma Jisas i the a ile wainlangaere nge, na i ria ve,
"Sapase thomu toko le ur avelengare,
eneke God i theal thomu na ini lomu
Nepes lale.

²¹ Sapase thomu tokokoe areko o men
mesi ponange,
eneke panen aro God i sung ur elonga
a thomu nge,
naro osa pup ol.

Sapase thomu tokokoe areko o tang
ponange,
eneke panen aro thomu o ngenge sise
ol.

²² Sapase thomu tova ve,
tokokoere aro oni silal thomu
na okime lelal thomu,
na o voltet thomu,
na o apet tangatun iomu,
na o oma venen aken,
eneke thomu o panes a Toko Pom-
nga Itun.

²³ "Na nge nang aka aro o oma ve-
nen aken nge thomu, aro lomumu i ngo
sivenga rintet nge, na lomumu aro i ngo
pis. Eneke God aro i olal i a thomu nge,
nge sungong a urvet aka ro a Pen a Urvet.
Naro o oma vene ake a thomu nge, eneke
nomenga otiteviere o oma mun re venen
aken nge a God ile riong elngare.

²⁴ Aveto
"Patong thomu toko le urngare,
na panen marati aro thomu o el ol
kerengaing,
eneke thomu o el mimiong sivenga
lale.

²⁵ Patong thomu tokokoe areko o an na osa
pup ponange,

eneke panen aro thomu o men mesi.
Patong thomu tokokoe areko thomu o
ngenge sise nge thomu ponange,
eneke panen aro thomu o tang
na thekumu einga aro i lel.

²⁶ Patong thomu tokokoe areko, toko
alavusnga o paesa iomu roro,
eneke nomenga otiteviere o oma mun
vene aken
nge riong elnga le apaltetongare."

Vothung ako ar sagu ler ngarangre.
(Matiu 5:39-42)

²⁷ Na Jisas i ria or vene: "Aveto tho ria thomu areko o nongpol lek riong. Aro omu sagu lomu ngarangre. Naro thomu o oma vothung sivenga nge areko oni silal thomu.

²⁸ Naro thomu o ria God mo aro i oma senu nge tokokoe areko o oma tungtang nge thomu. Naro thomu o nong a God nge, nge tokokoe areko o ri tangatun e thomu.

²⁹ Na aro ve toko e i so wom pun, aro eksing mun wom pun epee mo i so mun i. Na aro ve toko e i elteta lom seltun, ong mothong tova pamumatal i nge i, tova ve i elteta mun lom tekruk.

³⁰ Na aro ve toko e i nong ur e a wong nge, aro o sungu inga a i nge. Na aro ve toko e i ela lom ur e, o mothong tova nin werer mun i nge.

³¹ Na vothung ako wong sis ve aro tokokoere o oma i a wong nge, aro wong oma inga vothung aken a or nge.

³² Na aro ve omu sagu inga tokokoe areko oa sagu thomu, aro o paesa iomu nge vothung aken avele. Eneke tokokoe areko ole vothung kerenga, oa sagu mun tokokoe areko oa sagu mun or.

³³ Na aro ve thomu o oma vothung sivenga inga nge tokokoe areko o oma vothung sivenga nge thomu, aro o paesa iomu nge vothung aken avele. Eneke tokokoe areko o oma vothung kerenga o sung mun thangaroong nge tokokoe areko o oma vothung

kerenga mo aro o el werer mun oa thangaroong aken.

³⁵ Aveto thomu, aro omu sagu lomu ngarangre. Naro thomu o oma vothung sivenga a or nge. Naro thomu o sungu thangaroong a or nge. Naro thomu o mothong tova lomumu ve aro o olal werer i. Na aro ve thomu o oma venen aken, God aro i olal i a thomu nge, nge sungong a urvet. Naro thomu o velpol ini a God, aka i aolonga rintet, itutunre. Eneke i oma vothung sivenga mun nge tokokoe areko o ri sivengaing a i nge avele, na nge areko ole vothung kerenga.

³⁶ Aro thomu o themosal tokokoere ranga ve aka Titemer i themosal tokokoere."

Thomu o mothong tova o avrum toko relnga pelie ole vothung ako i sivenga eve i kerenga.

(Matiu 7:1-5)

³⁷ Ma Jisas i ria mun ve, "Na aro ve thomu o avrum toko ile vothung avele, aro God i avrum mun lomu vothung avele. Na aro ve thomu o paomelal toko avele, aro God i paomelal mun thomu avele. Na aro ve lomumu simikal tokokoere ole vothung kerenga, aro God ilemi simikal mun lomu vothung kerenga.

³⁸ Aro ve thomu o sung menumu a tokokoere nge, aro God i olal mun sungong aken a thomu nge. Na ile sungong aro i mengmeng avele, aro i vual taktak rintet na i pavurvur aro o mit roal i avele. Sungong aka ong sung i a tokokoere nge, aro God i sung mun i a ong nge, ranga ve aka ong sung i a tokokoere nge."

³⁹ Ma Jisas i sung mun riong agelalnga omole a or nge ve, "I pavurvur aro theki prosnga e aro i wol rum theki prosnga e, kene avele, aro vene mo or paini o matu a vol lemi.

⁴⁰ Na wain aka i men nge pamirealing i pavurvur aro i aolo leltun ile pamirealinga avele. Aveto aro ve i pavus senu ile pamirealing kena aro i velpol, mo i rangave ini mun i ile pamirealinga.

⁴¹ "Na mothong tova wong thepol won amum i vota teum itheki, aveto ong kene ong thopol tel wong avele aka won epee i ngo sopal thekum.

⁴² Na aro ve wong thepol won epee aken avele, ong mothong tova ong ria teum ve, ‘Teik, aro tho eltetpot won amum atiken i ngo a thekum.’ Wong ini pokononga. Aveto i sivenga ako ong eltetpot tel won epee aken ru i ngo sopal thekum, lamo aro wong the senu, moro aken wong eltetpot won amum ako i ngo a teum itheki.”

Won kerenga aro imonnga i kerenga mun.

(Matiu 7:16-20)

⁴³ Na Jisas i ria mun ve, “Won sivenga i pavurvur aro imonnga i kerenga avele. Ranga ve mun i aka won kerenga i pavurvur aro imonnga i sivenga avele.

⁴⁴ Na tokokoere o ate won aka nge imonnga. Naro i pavurvur aro wong vurpot pupos monnga a we wopuponga nge, kene avele. Na o vur vain monnga a we wopuponga nge avele.

⁴⁵ Na toko sivenga i paespot ur sivenga aka i voth a ilemi. Na toko kerenga mun i paespot ur kerenga aka i voth a ilemi. Eneke toko iwo i ripot vengveng ur aka i voth a ilemi.”

Riong agelalnga nge toko or aini aka or ini vel omangare.

(Matiu 7:24-27)

⁴⁶ Na Jisas i ria mun ve, “I vova ake thomu o apet tho ve Toko Pomnga, Toko Pomnga, aveto thomu o panes lek riong avele, e?”

⁴⁷ Na aro ve toko i es a tho nge me, na i nongpol lek riong na i panes i, moro aken aro tho ria thomu nge toko aken ile vothung.

⁴⁸ Na toko aken i ranga ve ini toko aka i ri ve aro i ari vel. Na a mukaling i to vol lukulukunga, aka i esu a ulue lemi. Lamako i aria vel nge roro, ma thei awonga aolonga i velpol ma i es a vel aken nge ma i tik i, ma vel aken i vulpesa vet avele, eneke toko aken i ari vel sivenga aka i engeng.

⁴⁹ Aveto toko aka i nongpol lek riong na i panes i avele, i ranga ve ini toko aka i aria vel, na i men polpolinga a ulue nge. A ur e avele na thei awonga i velpol ma i opthesa vel aken, ma i matu, mako i kerenga selele.”

7

Jisas i pasenu werer Rom a punongare ole mukalinga ile umonga.

(Matiu 8:5-13)

¹ Ma Jisas i patalor vus toko na sengre nge ur areken. Lamako i eso a rem a Kaperneam.

² Na punongare ole mukalinga aka ini toko Rom i voth, ma ile toko umonga omole aka ia sagu rintet i, ini multhang ma i toth ol aka aro i rin.

³ Ma punongare ole mukalinga aken i nongpolo aka Jisas i voth a Kaperneam. Mako i pake Judare oa pomponere mo o ria i mo i es a i nge la, mo aro i pasenu werer ile umonga aken.

⁴ Ma o velpol a Jisas nge ma o nong engeng a i nge. Ma o ri ve, “Na mukalinga aken ini toko sivenga na i pavurvur aro aro wong opoesal i,

⁵ eneke ia sagu it Judare. Mako ranga ve i aria ler lotuonga a vel.”

⁶ Lamako Jisas i es tomo nge or la.

Lama nge aka i totho ol a vel aken nge, ma punongare ole mukalinga aken i pakepot ithangangaere, mo o el riong a Jisas nge la ve, “Toko Pomnga, wong mothong tova sabrepal wong nge esoong a lek vel lemi, eneke tho ini toko sivenga avele.

⁷ Na e mun e aka tho pavurvur aro tho es a wong nge wot avele, aveto aro wong ria inga, naro lek umonga aro i sivenga werer.

⁸ Na tho ri vene ake, eneke tho voth mun a tokokoe pelie osa thewo. Na tho mun, punonga pelie aka o voth a sek thewo. Na aro ve tho ria toko e ve, ‘Wong es la.’ Aro i es la. Na aro ve, tho ria toko e ve, ‘Wong es me.’ Aro i es me. Na aro ve tho ria lek, toko umonga ve, ‘Wong oma omaing ake.’ Aro i oma i.”

⁹ Ma Jisas i nongpol riong aken ma i kukuk rintet nge. Ma i eksinga ma i ria toko na seng pulua aka ru o panes i ve, “Na tho ria thomu, tho thopol toko Juda e avele aka ile lemioong i aolonga ranga ve ini toko ake.”

¹⁰ Na tokokoe areko punongare ole mukalinga i pake or, o lo werer a ile vel la, ma o thopol aka Jisas i pasenu werer ile umonga aken lale.

Jisas i palos werera kulpo ako i rin.

¹¹ Na palolou tie, lamako Jisas i es nge rem pomnga a Nain. Na ile wainlangaere tomo nge toko na seng pulua aka o es tomo nge i la.

¹² Na aka i velpola ol a rem pomnga aken a lok thekia. Ma o thepol tokokoe pelie aka o potun vung ma o espot me. Na kulpo aken ru i rin lale, i re inga aka ini seng basu aken itun. Na toko na seng puluanga aka ru nge rem pomnga aken, o es tomo nge seng basu aken.

¹³ Ma Toko Pomnga i thepol seng basu aken, ma ilemi esal rintet i. Ma i ria i ve, "Wong mothong tanging."

¹⁴ Ma i es totho la, ma i krima ring aka ru o potun vung aken nge. Ma tokokoe areko ru o potun i, o mitu. Ma Jisas i ria ve, "Wong kulpo ake, tho ria wong, ong losa."

¹⁵ A ur e avele, na vung aken i mimi werera, mako i mena ol, ma i patea ol leng lenging, mako i voth tomo werer ol a inina nge.

¹⁶ Ma tokokoere o kukuk na o risea God. Na o ri ve, "God ile riong elnga aolonga e ake i velpol a it nge lale. Na God i velpol lale aka aro i opoa ile tokokoere."

¹⁷ Ma Jisas ile omaing aken i kima ol a pen elonga, aka ru a epee a Judia, na a rem mun pelie aka o voth tothal i.

Jon aka ini toko paninuonga i voth a mang a midenga, mako i pake ile wainlanga or aini a Jisas nge la.

(Matiu 11:2-19)

¹⁸ Ma Jon ile wainlangaere o ria i, nge ur alavusnga aka Jisas i oma i. Ma Jon i lenga ile wainlanga or aini,

¹⁹ ma i pake or paini a Toko Pomnga nge mo o nina i ve, "Wong re ake ini toko aka God i ateal wong ve aro ong es me, eve them thealal ake ini toko relnga, e?"

²⁰ Lamako o velpol a Jisas nge, ma or paini o ria i ve, "Jon aka ini toko paninuonga i pake them paini a wong nge me, ma i sis aka ve, i nina wong ve, 'Wong re ake ini toko aka God i ateal wong ve aro ong es me, eve them thealal ake ini toko relnga, e?'"

²¹ Na nge nang aken Jisas i pamimi werer toko na seng puluanga aka ni

multhanging kerenga i voth a or nge. Na i wistetpot tamata kerengare aka o voth a or nge. Na toko theki prosnga pulua aka i vles otheki ma o the werer mun.

²² Mako Jisas i olal werer a Jon ile wainlanga or aini aken ole riong ve, "Naro thomu paini o lo werer mo o ria Jon, nge ur alavusnga aka thomu paini o thepol i na o nongpol i. Ako ranga ve theki prosngare o the werer, na toko eve lilngare o senu werer, na tokokoe areko putput i voth a oni peti, oni peti i riri werer, na tokokoe areko otelnga gut o nongpol werer, na tokokoe areko o rin lale, o mimi werer mun. Na toko le ur avelengare, o nongpol Panongpolong Sivenga.

²³ Na sapase tokokoe areko o thepol lek omaing na ole lemioong i matu avele."

²⁴ Na Jon ile pakekere o lo werer lale, lamako Jisas i patea ile riong nge a Jon a tokokoere nge, ma i ria or ve, "Nge wop lemi aton thomu o es a Jon nge a pen polpolnga la, na thomu o es la mo o thepol uneke, e? Thomu o es la mo o thepol inga pilil aka thue i thuu thua i? Avele.

²⁵ Na thomu o es la mo o thepol uneke, e? Thomu o es la mo o thepol toko i teun tekruk sivesivengare? Avele, tokokoe areko oa malmaling i vene aken na ole ur elonga pom o voth inga aka ro a nepesre ole velre.

²⁶ Na thomu o es la mo o thepol uneke, e? Thomu o es la mo o thepol a God ile riong elnga omole, e? I re aken, na tho ria thomu, ina God ile riong elnga aken i aolo leltun a God ile riong elnga alavusnga.

²⁷ Na Jon ini toko aton ru nomenga God ile erere i ri nge vene:

'God i ri vene:

Aro tho pake lek pakeke
mo i mukal tel nge wong.
Naro i monsi nge lom sovengalo.'

Malakai 3:1

²⁸ Na tho ria thomu, Jon ile panongpolong i aolonga nge toko alavusnga ake ru a ulue ole panongpolong, aveto toko aka i posnga rintet nge areko o voth a God ile menong e nepes, toko aken ile panongpolong, i aolonga nge a Jon ile panongpolong."

²⁹ Na toko na seng tomo nge umtun elngare, or alavusnga o nongpol riong aken ma o ri ve, “God ile sovengalo kene i vengveng rintet.” Na o ri venen aken, eneke o panes a God ile sovengalo, ako o el paninuong a Jon nge lale.

³⁰ Aveto Parisire na pamirealingare nge a Moses ile patorong, o el paninuong a Jon nge avele, mako ranga ve okime lelpot sovengalo aka God i pathengal i a or nge lale.

³¹ Na Jisas i ria mun ve, “Na aro ve tho patongrum toko na seng ake ru nge wop lemi ake ole vothung, aro tho oma i nge riong agelalnga le vanga ol, e? Na o ranga ve ini toko le vanga, e?

³² O ranga ve ini wainlangare aka o arongrong nge pen aka ini pathunonga. Na wainlanga avlung relnga areko ru o leng a or ve,

‘Them vo lemi sivengaing a voing a thomu nge,

aveto thomu o ri ve numu plong nge sesing,

eneke lomumu kerere.

Mako them vo voing aka o voal rinongare nge,

aveto thomu o ri ve numu plong mun nge ngilelong,

eneke lomumu sivenga.’

³³ Na thomu o venen aken, eneke Jon aka ini toko paninuonga i velpol, ma i an bret avele na i thin mun vain avele, aveto thomu o ri ve, ‘Tamata kerenga i voth a i nge.’

³⁴ Lamako Toko Pomnga Itun i velpol, ma i an na i thin, aveto thomu o ri ve, ‘O thopol toko aken! Ini toko aka i an rinrin na i thin rinrin vain. Na ini umtun elngare tomo nge toko le vothung kerengare othangga.’

³⁵ Aveto toko na seng areko o panes vengveng a God ile mire, ole vothung i pathengal it aka ve, o panes a God ile mire aka i vengveng, aveto lomu vothung aken i pathengal it aka ve, thomu o panes toko ulue angare ole mire.”

Jisas i voth a Saimon ile vel aka ini Parisi.

* ^{7:41:} Grik 500 Denarius. † ^{7:41:} Grik 50 Denarius.

³⁶ Ma ine Parisi omole i nongpoo a Jisas mo i an tomo nge i, ma Jisas i eso a ile vel la ma i menu ma i an.

³⁷ Ma seng omole aka i oma vothung kerenga i voth nge rem pomnga aken, ma i nongpol aka Jisas i an a Parisi aken ile vel, mako seng aken i ela botol sivenga aka o oma i nge anral aka sanda i voth nge, na i una vro rintet ma i es tomo nge i la.

³⁸ Ma i es la ma i mitu a Jisas ikime totho aka ru a ieve tepun, na i tang ma i papis a Jisas ieve nge itheki einga, ma i girtet i nge isivenga ipounga thoi. Na i angongoal a Jisas ieve, na i ela sanda aken ma i taul i a Jisas ieve.

³⁹ Ma Parisi aken ru i nongpoo a Jisas, i thopol i, ma ilemi aka ve, “Aro ve toko ake ini a God ile riong elnga nunganga, aro ilemi mire nge seng aken ru i vugir i, ini seng aka i oma vothung kerenga pulua.”

⁴⁰ Ma Jisas ilemi mire nge toko aken ilemi, ma i ria i ve, “Saimon, lek riong omole ake ru i voth, aka aro tho ria wong nge.”

Ma Saimon i ria ve, “Pamirealinga, i sivenga aka aro ong ria tho nge.”

⁴¹ Ma Jisas i ria i ve, “Na toko or aini aka oa thangaroong nge umtun a toko aka ini umtun sunga. Ma omole aka ia thangaroong or 5,000^{*} Kina, na toko aininga ia thangaroong i pavurvur inga nge 500[†] Kina.

⁴² Na or paini o pavurvur aro o olal werer oa thangaroong areken avele. Mako toko aken i ria or paini ve, ‘Aro thomu o mothong tova olal werer omu thangaroong nge umtun areken.’ Na lomum vava? Or paini aken, kathnga aro ia sagu rintet i?”

⁴³ Ma Saimon i olal ile riong ve, “Lemik aka ve, ini toko aka ru ia thangaroong kene i aolonga, ma toko aken i ria ve aro i mothong ol olalnga.”

Ma Jisas i ria ve, “Lom riong aken i nunganga.”

⁴⁴ Ma Jisas itheki lel a seng aken nge, na i ria Saimon nge ve, “Wong thepol seng ake? Na tho eso a lom vel lemi, na wong theal senu tho avele, ranga ve aka

wong sung thei avele aro ari ini ekek pautnga, aveto seng ake, kene i paut ekek nge isivenga itheki einga. Na i girtet ekek nge isivenga ipounga thoi.

⁴⁵ Na wong nongpoo tho, aveto ong papomnga tho avele, aro ranga ve wong angongoal tho avele, aveto aro tho eso nge me, na seng ake i mosal inga aro ini ekek angongoalnga.

⁴⁶ Na wong taul poungk avele, aveto seng ake i taul ekek nge sanda.

⁴⁷ Na tho ria wong ve, seng ake kene ia sagu rintet tho na i pathengal i aro ve, God ilemi simikal ile vothung kerenga puluanga aken lale. Aveto toko aro ile vothung kerengare i pospos, ma God ilemi simikal i, aken ile asaguong i pospos mun inga.”

⁴⁸ Ma Jisas i ria seng aken ve, “Tho ria wong, God ilemi simikal lom vothung kerenga lale.”

⁴⁹ Na tokokoe areko ru o men tomo nge i ma o an, o nongpol riong aken ma o ri ol pel a osivenga nge ve, “Toko ake ini ao, aro i ri ve God ilemi simikal lom vothung kerenga lale, e?”

⁵⁰ Na Jisas i ria seng aken ve, “Na lom lemioong inga aro i pamimi wong, nge a God ile paomelaling lale. Na wong es na lomum i ngo pis.”

8

Seng pelie aro o panes a Jisas ma o es tomo nge i.

¹ Na nge kimenga mun e aro, Jisas i esu esa mun a rem pomngare na rumremre nge, na i panongpol nge Panongpolong Sivenga aro nge a God ile menong e nepes. Na ile wainlanga or mule pa omole pothoi or aini aton o es tomo mun nge i.

² Na seng pelie aro nomenga Jisas i wistetpot tamata kerenga a or nge, na pelie i pamimi or nge ni multhanging, aro o es tomo nge i. Na omole aro ini a Maria Makdala anga. Na nomenga Jisas i wistetpot tamata kerenga or limai a i nge.

³ Na Kusa aro ini thealinga nge a Herot ile vel iewo sengenga aro iion a Joana, ome a Susana na seng mun pelie aro o es tomo mun nge a Jisas. Ma ine seng areken

o sung ole ur elonga mo aro o opaal a Jisas tomo nge ile wainlangaere.

Jisas i oma riong agelalnga nge toko aro i o wit monnga a ometa.

(Matiu 13:2-9; Mak 4:1-9)

⁴ Ma toko na seng pulua a rem pomngae elonga o velpol a Jisas nge. Ma toko na seng pulua rintet o pathun a i nge. Na Jisas i oma riong agelalnga a or nge ve,

⁵ “Na toko omole aro i es mo i ul vathar wit monnga a ia ometa. Ma i es na i ul vathar i, ma pelie o matmatu a sovengalo, ma tokokoere o tepetuntun i na menre o koktet i, ma o an i.

⁶ Na wit monnga pelie aro o matmatu a wop aro ini um pipo ma wit monnga areken o metaploa, aveto o menine, mako o rin rin, eneke o metaploa a ulue aro thei nge avele.

⁷ Na wit monnga pelie aro o matmatu a kiki lemimi, ma kiki areken o plo tomoa nge or, ma o otuntun or.

⁸ Na wit monnga pelie aro o matmatu a ulue sivenga, ma o plo senu, ma o mon ma omonnga pulua. Ma or omole omole omonnga or mule pa mule nge or alavusnga.” Ma Jisas i oma riong agelalnga aken ma i vus, mako i pator mun or nge ve, “Na aro ve toko e i sis ve aro ilemi mire senu nge lek riong, mo i sivenga aro aro i ta senu itelnga nge lek riong ake.”

Jisas i ritet riong agelalnga aro nge wit monnga mirenga a ile wainlangaere nge.

(Matiu 13:10-23; Mak 4:10-20)

⁹ Ma Jisas ile wainlangaere o nina i nge riong agelalnga aken mirenga.

¹⁰ Ma i ria or ve, “Na God i ri ve, i sivenga aro aro tho panine lomumu nge riong aro i ngo kine, nge a God ile menong e nepes, aveto tho panine toko na sengre oleli avele, mako tho ria or, nge riong aro i ngo kine, nge riong agelalnga inga mo aro Aisaia ile riong aro i velpol nunganga na ile riong i vene:

‘Aro o nak theu theaing,

aveto aro o thepol senu i avele.

Naro o ta senu otelnga,

aveto aro oleli mire nge mirenga avele.’ ”

Aisaia 6:9

¹¹ Ma Jisas i ria ve, “Riong agelalnga aken mirenga i vene: Ine wit monnga ake i paateal ako ini a God ile riong.

¹² Na ine wit monnga pelie ako o matmatu a sovengalo, ma o ranga ve ini toko na seng areko o nongpol a God ile riong, aveto Satan i es ma i eltetpot riong aken a or nge. Mako o pavurvur aro ole mio ol nge avele, aken aro God i pamimi or avele.

¹³ Na wit monnga pelie ako o matmatu nge wop aka ini um pipi, ma o ranga ve ini toko na seng areko o nongpol a God ile riong na o el i ma ole mi sivenga nge, aveto riong aken i teu avele a oopo lemi, mako ole lemioong i voth palolo vet avele. Na nge nang aka tongporumong i es a or nge ma o matu selele.

¹⁴ Na wit monnga pelie ako o matmatu a kiki lemimi, ma o ranga ve ini toko na seng areko o nongpol a God ile riong, aveto palolo avele na vothung ulue anga i velpoltun or, ranga ve ole mio ol nge ur elonga na umtun na lemi sivengaing. Na ur areken i pasidal werer ole lemioong a God nge, ma o ranga ve ini wit monnga aka i vunvun avele.

¹⁵ Na wit monnga areko o matmatu a ulue sivenga, o ranga ve ini toko na seng areko ole mi i nine na o nongpol a God ile riong, na o krim senu i. Na i ngo thau a oopo lemi na o nongal i na o mit engeng, ranga ve ini wit aka i mit engeng, na omonnga i voth.”

God ile riong i ranga ve ini the lalainga aka o pamona i roro mo tokokoere o thepol i.

¹⁶ Ma Jisas i ria mun or ve, “Na aro ve toko e i pasise the lalainga, i mothong tova i pasopalu i nge alal, na i mothong mun tova i pango kineu i a ring thewo. Avele, aro o pamona i roro, na aro ve tokokoere o eso a vel lemi, aro o thepol inga the lalainga aken.

¹⁷ Eneke panongpolong nge a God ile menong e nepes i ngo kine nomenga, aveto panen aro i ngo pat a lalanga. Na ur areko tokokoere ole mi mire nge avele, panen aro i ngo patu mo toko alavusnga aro ole mi mire nge.

¹⁸ Maken aro thomu o naktet thomu mo o nongpol senu riong, eneke aro ve toko

e i krim engeng a God ile riong, aro God i sungu mun mire pom a i nge, nge ile riong. Na aro ve toko e i nongal a God ile riong avele, mire aka ile mi ve i voth a i nge, God aro i eltet werer i a i nge.”

Areko o nongal a Jisas ile riong, ini ilengare.

(Matiu 12:46-50; Mak 3:31-35)

¹⁹ Ma nge nang aken Jisas inina ome ititeinre o es a i nge mo o thepol i, aveto toko na seng pulua aka ru o mit kalual i ma o pavurvur aro o eso a i nge avele.

²⁰ Ma toko omole aka i ria Jisas ve, “Ninom ome titeumre or aka ru o mit a lalanga, ma o ri ve aro o thepol wong.”

²¹ Aveto i ria or ve, “Na tokokoe areko o nongpol a God ile riong mo o panes i, or re aken ini ok ninaere na titeikre.”

Jisas i akrisal thue, mako thei i ngo thau.
(Matiu 8:23-27; Mak 4:36-41)

²² Ma nge nang omole aka Jisas i ro a wok nge tomo nge ile wainlangaere, ma i ria or ve, “Aro te mon a thei a pamonlel wo epee.” Mako o patea ol moning.

²³ Ma o mon makola Jisas i nokolkol a wok lemi. Ma palolo avele na thue aolonga i mita telek a thei stha nge anga me. Ma thei i limteto a wok lemi ma pa omole re aka aro o vlu.

²⁴ Mako o pavurpolo a Jisas, ma o ri ve, “Toko Pomnga, Toko Pomnga, toth re ake aro te rin.”

Ma Jisas i losa ma i akrisal thue na thei le lolikong, ma thue ome thei le lolikong o poreng na thei i ngo thau ol.

²⁵ Ma i nina or ve, “I vava, lomu lemioong i voth a kath?”

Ma o kukuk na o ngeip na o ria ol pel ve, “Na toko ake ini ao ake i akrisal thue na thei le lolikong ma o nongal inga ile riong, e?”

Jisas i wistetpot tamata kerenga a toko omole nge.

(Matiu 8:28-34; Mak 5:1-20)

²⁶ Lamako Jisas ome ile wainlangaere o mon, makola o velpol a epee a Gerasa, wop aken ini Judare ole avele. Na pen epee aken i voth a thei a pamonlel wo epee na pen epee a Galili i voth a wo epee.

²⁷ Lamako Jisas i ru a wok nge ma i mitu a thei wopo, na toko omole aka nge pen epee aken i es ma i velpol a i nge. Na tamata kerenga pelie aka o voth a toko aken nge. Na nomenga vet aka me, i ne vet teunong e avele na i lila inga. Na i voth nge vel e avele, i voth inga aka a vuvepun a silkep.

²⁸⁻²⁹ Na nge nang pulua tamata kerengare o rero toko aken. Na nomenga tokokoere o tongporum imitroalnga, na o kin ieve na imeni nge sen, na mit tetalongare o theal tetal i, aveto i uriro ur alavusnga areken. Ma tamata kerengare o paes i a pen polpolnga aka toko e i voth nge avele. Ma toko aken i thepol a Jisas. Na Jisas i ria i ve, "Thomu tamata kerengare o lopot a toko aken nge." Ma toko aken i wal na i matu toth a Jisas ieve tepun, na i presa viringa ve, "Jisas, wong ini a God aka i aolonga rintet kene Itun. Na lom neke i voth a tho nge? Na tho nong ong ve mothong tova pakerenga tho."

³⁰ Ma Jisas i nina i ve, "Iom anga?"

Ma i olal ile riong ve, "Iok a Pulua." Eneke tamata kerenga pulua o voth a i nge.

³¹ Ma tamata kerenga areken o tangoso a Jisas nge ve, i mothong tova i pakeu or a paomelalinga a pen.

³² Na kie avlung aka o an toth a pen sa thewo. Ma tamata kerengare o nong engeng a Jisas nge ve, "Aro ong pakeo inga them mo them rero inga a kiere nge." Mako Jisas i pakepot or, ma o es.

³³ Lamako tamata kerenga areken o lopot a toko aken nge ma o rero kie areken. Ma kie areken o thou thou a ruprup, makola o matu a thei a pamonlel lemi ma o vlu, mako ini ole rinong.

³⁴ Ma kie thealngare o thepol ur aken aka i velpol, mako o lo ma o pakima ol ur aken a rem pomnga na nge pen elonga areko o toth nge rem pomnga aken.

³⁵ Mako toko na sengre o es mo o thopol ur nekenga aka i velpol. Ma o velpol a Jisas nge, ma o thepol toko aka tamata kerengare o lopot a i nge aka i men a Jisas ieve tepun na i teunu ol teunong na ilemi nineu ol, mako o ngeip nge.

³⁶ Ma tokokoe areko o thepol ur areko i velpol, o rurumpot i a toko na sengre nge, nge ur aka Jisas i oma i, aka i pamimi toko aka nomenga tamata kerengare o voth a i nge.

³⁷ Lamako toko na seng areko ru a pen epee a Gerasa, o ri engeng nge a Jisas ve, aro i lo lelpot or, eneke o ngeip rintet nge i. Mako Jisas i ro a wok nge mo aro i lo werer.

³⁸ Na toko aken ru tamata kerengare o lopot a i nge, i tangoso a Jisas nge ve, "Aro tho panes wong!" Aveto Jisas i pake werer i, na i ria i ve,

³⁹ "Wong es werer a lom rebo, na wong es mo wong panongpol toko na sengre nge ur alavusnga areko God i oma i a wong nge." Mako toko aken i es ol, ma i panongpol riong a toko na seng alavusnga a ile pen. Ma i ri nge ur alavusnga areko Jisas i oma i a i nge lale.

Jisas i pamimia seng or aini.

(Matiu 9:18-26; Mak 5:22-43)

⁴⁰ Lamako Jisas i mon werer a thei a pamonlel wo epee. Ma toko na seng olemi sivenga nge ile velpoling, eneke or alavusnga o men tetal re aka ini i.

⁴¹ Na toko omole aka i velpol, iion a Jairus. Na ini Judare ole lotu a mukalinga e. Ma i es la ma i koru ieve na ipo tiru totho aka ru a Jisas ieve tepun. Ma i tangoso a Jisas nge ve aro i es tomo nge i a ile vel la.

⁴² Eneke itun omole inga aka ini seng i toth re aka aro i rin. Na ia tovu po or mule pa omole pothoi or aini.

Mako Jisas i es ol la. Ma toko na seng pulua aka o es tomo nge i ma o mumrongtuno i.

⁴³ Mako seng omole aka i voth tomo nge or, na sengre oa ni multhanging aka o thopol ngov i pesrou a i nge avele. Ma i pavurvur nge tovu po or mule pa omole pothoi or aini. Na toko e avele i pavurvur aka aro i pavus ia ni multhanging aken.

⁴⁴ Na seng aken i es ma i mito a Jisas ikime, ma i vugiro a Jisas ia teunong ongepo. Na a ur e avele, nako ia ni multhanging aken i vus.

⁴⁵ Mako Jisas i nina ve, "Anga i vugir tho?"

Aveto or alavusnga o lela. Mako Pita i ria ve, "Toko Pomnga, pulua pomnga ake o mumrongtun ong."

⁴⁶ Aveto Jisas i ria ve, "Toko omole i vugir tho, lemik mire ako engengeng pelie i espot a tho nge lale."

⁴⁷ Mako seng aken i thopol i aka i pavurvur aka aro i mit kine avele, ma sawir i, mako i espot ma i koru ieve a Jisas ieve tepun. Ma i pamilempot a tokokoere otheki nge tepun aka i vugiro i ma i ria ve, "A ur e avele, nako nik multhanga aton i vus."

⁴⁸ Ma Jisas i ria i ve, "Luk, ong mimi re lale aken, eneke lomumo ve, tho pavurvur aka aro tho pamimi ong. Na ong es la na opom lemi aro i vual nge a God ile lemi moring."

⁴⁹ Ma rongan Jisas i ri, na toko omole aka i plosa a Jairus ile vel ma i velpol, ma i ria Jairus ve, "Mothong tova kenkeno ol nge pamirealinga aken, eneke tum kene i rin lale."

⁵⁰ Ma Jisas i nongpola riong aken, ma i ria Jairus ve, "Mothong tova wong ngeip, lomumo inga nge tho naro tum aro i mimi werer."

⁵¹⁻⁵³ Na Jisas i velpola ol a Jairus ile vel. Na toko na seng alavusnga aka ru o voth a vel aken ma o tang ma o walal nge wain aken. Aveto Jisas i ria or ve, "Thomu o mothong tova o tang. Wain atiken i rin avele, i nokolkol aken."

Na tokokoere o nongpol riong aken ma o ngenge lital i, eneke olemi mire aka ve, wainlanga atiken i rin lale. Aveto Jisas i wenalo toko na seng e avele aka aro i es tomoo nge i a vel lemla. Aveto i wolo inga aka ini a Pita na Jems na Jon na wain aken inina ome itema, or inga aka o es tomoo nge i.

⁵⁴ Na i krima wain aken imeni na i lenga i ve, "Wainlanga, losa!"

⁵⁵ A ur e avele na wainlanga aken ion i lo werero mun a i nge. Mako i losa, mako Jisas i ria or ve aro o sungu aning pelie a i nge mo i an i.

⁵⁶ Ma itema ome inina o kukuk rintet nge, aveto Jisas i pator engeng or paini ve, "Na thomu o mothong tova o ria toko pelie nge ur ake i velpol."

9

Jisas i sung omaing a ile wainlanga or mule pa omole pothoi or aini nge.

(Matiu 10:9-15; Mak 6:8-11)

¹ Na Jisas i leng ile wainlanga or mule pa omole pothoi or aini a i nge me. Ma i sungu engengeng aolonga a or nge, mo aka aro o wistetpot tamata kerengare na o pamimi ni multhanging kerengare.

² Na i pakepot or mo o panongpol nge a God ile menong e nepes, mo o pamimi ni multhangingare.

³ Ma i ria or ve, "Na thomu o mothong tova o el ur pelie nge lomu esong, aka ranga ve ini eel, na alal, na aning, na umtun. Na thomu o mothong tova o el mun lomu teunong pelie.

⁴ Na aro ve thomu o velpol a rem e, na toko i nongpoo thomu a ile vel, aro thomu o ngo inga nge vel aken, i pavurvur nge nang aka aro thomu o plos lelpot nge rem aken.

⁵ Na aro ve tokokoere o nongpoo thomu avele, aro thomu o los lelpot nge rem aken. Na o tepluspot rem aken a vuvus a evomu salemi a tokokoere otheki, mo ini ole paatealinga aka o nongal nge a God ile riong avele, mo aro ole vothung kerenga i ngo reletun a or nge."

⁶ Lamako Jisas ile wainlanga areken o losa ma o esu esa a rumremre. Na o panongpol nge Panongpolong Sivenga na o pamimi ni multhangingare a pen elonga.

Herot i nongpola a Jisas ile omaing ma ilemi ngo pelekpol nge.

(Matiu 14:1-2; Mak 6:14-16)

⁷ Na Herot aka ini Galili angare ole nepes, i nongpola ur alavusnga aka i velpol ol. Ma ilemi ngo pelekpol, eneke toko pelie aka o ri ve, "Jon aka ini toko paninuonga i mimi werera a vuvepun."

⁸ Na oa pelie aka o ri ve va ini a Elaija i velpol werer. Na oa pelie o ri mun ve, "Ava ini a God ile riong elnga nomenganga omole aka i mimi werera mun."

⁹ Mako Herot i ri ve, "Na Jon ake tomo tho ria mo o sorotetpot ikei lale, na toko aken kene ini ol i anga aka tho nongpol omaing engenga aka i oma i, e?" Na i kath sovengalo aka aro i thepol a Jisas nge.

Jisas i paan tokokoere ako oa titaling i aoselea 5,000.

(Matiu 14:13-21; Mak 6:32-44; Jon 6:5-13)

¹⁰ Ma Jisas ile pakekere o lo werer ol, ma o ria Jisas nge ur alavusnga aka o oma i. Ma Jisas i wola or ma oenga inga aka o es a pen polpolnga aka i toth nge rem pomnga aka iion a Betsaida.

¹¹ Aveto toko na seng o nongpol i aka i es lale, mako o paneso sele i, ma o velpol a i nge. Ma i nongpoo or, ma i panongpol or nge a God ile menong e nepes. Na i pamimi toko na seng areko oni multhang.

¹² Na toth nge nang le sivlukong na Jisas ile wainlanga or mule pa omole pothoi or aini aken o es a i nge, ma o ria i ve, "Na i sivenga aka aro wong pakepot toko na seng a rumremre la mo aro o el aning nge, na o nokolkol nge, eneke wop ake te voth nge ini pen polpolnga."

¹³ Aveto Jisas i ria or ve, "Thomu re ake aro o sungu aning a or nge."

Ma o olal ile riong ve, "Aveto emem aning pom avele. Na ini inga bret or lim na silang or aini. Na aning ake i pavurvur avele tova them es mo them ol pulua pomnga ake oa aning."

¹⁴ Eneke totomonere inga oa titaling i mul nge 5,000.

Ave Jisas i ria ile wainlangaere ve, "Thomu o ria or mo o men nge avlung avlung mo mule pa lim nge avlung omole omole."

¹⁵ Mako Jisas ile wainlangaere o ria or venen aken, lamako o menu ol.

¹⁶ Lamako Jisas i ela bret or lim aken, na silang or aini aken, ma ipo watha a sepsa la ma i ri sivengaing a God nge. Mako i inreku bret na i insisau silang ma i sungu i a ile wainlangaere nge, mo o sung sung ol i a toko na sangre nge.

¹⁷ Ma or alavusnga o an, ma osa pup. Ma oa aning uluo o patu i nge alal aolonga or mule pa omole pothoi or aini.

Pita i ritet nge a Jisas aka ini toko aka God i ateal i ve aro i el werer ile tokokoere.
(Matiu 16:13-16; Mak 8:27-29)

¹⁸ Ma nge nang omole aka Jisas ienga i voth ma i nong. Na ile wainlangaere o

velpoltun i. Ma i nina or ve, "Na toko na sangre o ri ve va, tho ini ao?"

¹⁹ Ma o olal ile riong ve, "Na oa pelie o ri ve, wong ini a Jon aka ini toko paninuunga. Na pelie mun o ri ve, wong ini a Elaija. Na pelie mun o ri ve, wong ini a God ile riong elngga nomenganga omole aka i mimi werera mun."

²⁰ Ma i nina or ve, "Na thomu kene o rivenga, tho ini ao?"

Ma Pita i olal ile riong ve, "Wong ini toko aka God i ateal ong mo aro ong el werer ile tokokoere."

²¹ Ma Jisas i ri engeng a or nge ve, o mothong tova o rimilimlem riong aken a tokokoere nge.

Jisas i ritet nge ile rinong na nge ile los wereraing.

(Matiu 16:21-28; Mak 8:31-9:1)

²² Na Jisas i ri ve, "Naro Toko Pomnga Itun aro i el sisong puluanga. Naro Judare oa pompomere, na pris kimangare, na pamirealingare nge a Moses ile patorong, aro o pilalpot i naro o pun rin i. Naro nang or me aro i vus lamo i los werera mun a vuvepun."

²³ Ma i ria or alavusngare ve, "Na aro ve toko i sis ve i panes tho, aro i paesu i ruru na i mothong tova i panes isivenga ilemi, naro i potun isivenga ia won ngoronga nge nang elonga mo aro i panes tho.

²⁴ Eneke toko aka i krim engeng isivenga ile mimiong, aken aro ile mimiong aro i penthal. Aveto toko aka i mothong isivenga ile mimiong panesnga, mo aro i panes tho, aro i el mimiong aka aro ile vusonga avele.

²⁵ Na aro ve toko e i el ile ur elonga pulua ake ru a ulue, aveto panen nge ile rinong, aro ve ion i kerenga, aro ile ur elonga aro i opao i vava?

²⁶ Na aro ve toko e aka ile maral nge tho na lek riong, aro Toko Pomnga Itun ile maral mun nge toko aken, tova i velpol ini nepes tomo nge ile engenging na ile tolilisong na tomo mun nge Itema na ensel riringare ole engenging and ole tolilisong mun.

²⁷ Na tho ri nunganga a thomu nge, thomu pelie ake ru o mit aro thomu o

rin rongan naro thomu o thopol a God ile menong e nepes aken."

Jisas ini peti i eksing rintet ma i tolilis.
(Matiu 17:1-8; Mak 9:2-8)

²⁸ Ma Jisas i oma riong aken, lama nang or limme i vus, ma i wola a Pita, Jems na Jon ma o esa a tete polemi la, mo aro o nong nge.

²⁹ Ma i nong na itheki lemi i eksing ma i rel rintet na ia teunong i velpol ma i tolilis na i veleles rintet.

³⁰ Na a ur e avele na toko or aini ako o velpoltun i ma o ri tomo nge i. E ini a Moses na e ini a Elaija.

³¹ Na or paini o velpol tomo nge a God ile tolilisong. Na or paini o ri tomo nge a Jisas nge ile rinong ako i toth aro i velpol a Jerusalem.

³² Na Pita ome ithangangaere otheki nong nong, mako o nokolkol. Ma o vurpol werera na o thepol a God ile tolilisong aka i velpol a Jisas nge na o thopol mun toko or aini ako o mit tomo nge i.

³³ Na toth ol aka aro toko or aini aken o los lelpot ol nge a Jisas mo o es, na Pita i ria Jisas ve, "Pamirealinga, i sivenga ake them voth inga ake, naro them aria valvale or me, naro omole ini lom na omole ini a Moses ile na omole ini a Elaija ile." Na Pita ilemi mire senu nge uneke aka i ri nge, kene avele.

³⁴ Na rongan Pita i ri na songen aolonga aka i pavlestun or ma o ngeip rintet, eneke i vlestunu or.

³⁵ Ma lenging aka i espot a songen aken lemi ma i ri ve, "Ake ini Tuk, aka tho ateal i lale ve aro i oma lek omaing. Naro thomu o nongal ile riong."

³⁶ Na lenging aken i vusu, lamako o thepol a Jisas ienga aka ru i mit ol. Na nge wop lemi aka Jisas rongan i mimi, ile wainlanga or me aken o ria toko e avele nge uneke aka o thepol i lale.

Jisas i pamimi wainlanga aka tamata kerenga i voth a i nge.

(Matiu 17:14-18; Mak 9:14-27)

³⁷ Na nge erangunga ma o losa a tete aken ma o esu me. Ma toko na seng pulua aka o thepolo or.

³⁸ Na toko omole aka ru nge toko avlung aken i presa ve, "Pamirealinga, tho nong

wong, wong thepol tel tuk tomonnga ake, eneke tuk re inga omole ake.

³⁹ Na tamata kerenga e aka i rero i nge nang elonga ma i walal kerere, ma tamata kerenga aken i rero i ma sawirwir i na ia molpe i palalas a iwo. Na i pakerenga rintet ini peti, na i lopot virial a i nge avele.

⁴⁰ Na tho tangoso a lom wainlangaere nge ve, aro o wistetpot tamata kerenga aken, aveto o pavurvur avele."

⁴¹ Ma Jisas i olal ile riong ve, "Na thomu toko na seng ake o mimi nge wop lemi ake, lomu lemioong tie avele. Na lomu vothung i kerenga. Na tho potun lomu matheong evelelenga naro tho voth tomo e thomu palolo avele. Na penva aro lomu lemioong aro i engeng?" Na i ria wain aken itema ve, "Wol tum aken a tho nge me."

⁴² Na wainlanga atiken i es toth ol a Jisas nge me, ma tamata kerenga aken i pamatu i ruru ma sawirwir rintet i, aveto Jisas i vol tamata kerenga aken, ma i pamimi werer wainlanga aken, mako i pake werer i a itema nge la.

⁴³ Ma or alavusnga o kukuk rintet nge a God ile engengeng aolonga aken.

Jisas i ri mun paininga nge ile rinong.
(Matiu 17:22-23; Mak 9:30-32)

Ma toko na seng rongan olemi pelekpol nge ur alavusnga aka Jisas i oma i. Ma Jisas i ria ile wainlangaere ve,

⁴⁴ "Naro thomu o ta senu telngomu mo o nongpol riong ake, aro o sung Toko Pomnga Itun a toko kerengare omeni."

⁴⁵ Aveto ile wainlangaere olemi mire nge riong aken tepun mirenga e avele. Eneke God i parong kine riong aken mirenga a or nge. Ma o ngeip nge ininnga, aka aro i ria or nge riong aken mirenga.

Jisas ile wainlangaere o ser pel nge anga aka aro i mukal ole.

(Matiu 18:1-5; Mak 9:33-37)

⁴⁶ Ma nge nang omole e aka Jisas ile wainlangaere o ser pel nge aka aro oa kathnga aro i aolonga nge or.

⁴⁷ Ma Jisas ilemi mire nge olemi, mako i wola wain atiko ma i pamitu i totho a ilo sei.

48 Ma i ria ile wainlangaere ve, “Na toko ako i paruru isivenga na i nongpoo wain ti e ranga ve ini wainlanga atike, eneke ilemio nge tho, akennga kene i nongpoo ako ini tho. Na toko aka i nongpoo tho, kene i nongpoo aka ini a God aka i pake tho me, eneke toko aka ilemi ve ini toko polpolnga aka ru a thomu nge, aken ini toko aolonga a God itheki.”

Jisas i ri ve toko aka ini lomu ngarang avele, aken ini thongomu.

(Mak 9:38-40)

49 Ma Jon i ria ve, “Toko Pomnga, them thepol toko e aka i wistetpot tamata kerenga nge iom, ma them rial vet i nge, eneke i voth tomo nge it avele.”

50 Aveto Jisas i ria i ve, “Na thomu o mothong tova o rial i nge, eneke toko aka ini lomu ngarang avele, aken aro ini thongomu.”

Jisas i patea ile esong a Jerusalem la, tomo nge ile wainlangaere

(Vonge 9:51-19:27)

Samaria angare oni plong ve aro Jisas i eso a ole pen.

51 Na i toth lale aka aro Jisas i esa a Pen a Urvet la, mako ile lemi rumong i engeng ol aka aro i esa a Jerusalem.

52 Mako i pake tokokoe pelie mo aro o mukal mo o eso a rem e aka a Samaria mo aro o thopol vet vel pelie aka aro o ngo nge.

53 Aveto rem lemiare, oni plong ve aro o nongpoo a Jisas. Eneke oleme mire aka aro i es a Jerusalem la, mo i lotu nge.*

54 Na ile wainlanga or aini aka ini a Jems ome a Jon o thepol tokokoe Samaria angare ole vothung aken, ma or paini o nin a Jisas ve, “Toko Pomnga, wong sis aka aro them paini them lengu won sesenga a sepsa me mo i ongtun tokokoe areke?”

55 Aveto Jisas i eksing werera ma i vol or paini.

56 Mako o es ol a rem relnga ol la.

Jisas i ri nge vothung aka tokokoere aro o oma i mo aro o panes i.
(Matiu 8:19-22)

57 Na Jisas tomo nge ile wainlangaere o es a sovengalo la. Na toko omole aka i ria i ve, “Na pen alavusnga aka aro wong es nge, aro tho panes wong nge.”

58 Ma Jisas i ria i ve, “Na nanau kleng lemimi anga ile silkep i voth. Na menre ole ring i voth. Aveto Toko Pomnga Itun imei avele aka aro i ngo nge.”

59 Ma Jisas i ria toko relnga mun e aka ve, “Wong es me mo panes tho.”

Aveto toko aken i ria ve, “Toko Pomnga, som wompot tel tho, mo tho es mo tho tetun tel ok vovo.”

60 Ma Jisas i olal ile riong ve, “Na tokokoe areko ooni i rin lale, aro osivenga o tetun olengare aka o rin mun. Aveto aro wong es mo wong panongpol nge a God ile menong e nepes.”

61 Na toko relnga mun e aka i ria mun a Jisas ve, “Toko Pomnga, aro tho panes wong, aveto aro som wompot tel tho, mo tho lo werer mo tho paioal tel lek vel lemiare.”

62 Na Jisas i olal ile riong ve, “Na aro ve toko e i patea ia ometa omanga, aveto ilemi rum mun omaing relnga mun e, toko aka i venen aken i pavurvur aro i oma omaing nge a God ile menong e nepes, kene avele.”

10

Jisas i pakepot toko or 72 nge ile omaing.

1 Lamako Jisas i atealpot ile wainlanga or mule pa limai pothoi or aini, ma i pakepot or mo o es aini aini mo o mukal tel nge rem pomnga na rumrem areko ilemi ve aro i es nge.

2 Na i ria or ve, “Na aning pulua aka i motutet aka a ometa, aveto umonga pulua avele aka aro o el aning areken. Naro thomu o nong engeng nge ometa tokoninga mo aro i pake toko umonga pelie mo o veliloala aning areken.

* **9:53:** Samaria angare ole Lotu Tepun a Vel i voth a Gerisim. Aveto Judare ole Lotu Tepun a Vel i voth a Jerusalem. O thopol a Jon 4:20. Na Samaria angare o ri ve Judare o panes vengveng lotuong avele, mako oni plong ve aro o opaal toko e aka i es a Jerusalem mo aro i lotu nge.

³ Naro thomu o es! Tho pakepot thomu ranga ve ini sipsip tutun areko o voth a nanau kleng angare oa lemimi.

⁴ Naro thomu o mothong tova o el umtun le ngoinga, na alal na evomu salemia. Naro thomu o mothong tova o pathokeal tokokoere a sovengalo aro vene mo o mit roal thomu.

⁵ “Na aro ve thomu o eso a vel e lemi, aro a mukaling aro thomu o ri vene, ‘Aro God ile lemi moring aro i voth a thomu nge.’

⁶ Na aro ve toko lemi mornga e i voth nge vel aken, aro lemi moring aken ru thomu o ri nge, aro i es a toko aken nge. Aveto aro ve toko lemi mornga e avele aro i voth, aro lemi moring aken ru thomu o ri nge, aro i lo werer a sivengomu nge me.

⁷ Naro thomu o voth inga nge vel aken, naro thomu o an na o thin ur inga areko o sungu i a thomu nge, eneke toko umonga aro i el iolonga. Na thomu o mothong tova o koru kora a vel elonga, mo o theo theo oa ur pelie.

⁸ “Na aro ve thomu o eso a rem pomnga e, na aro ve o nongpoo thomu, aro thomu o an inga aning aro ru o sungu i a thomu nge.

⁹ Naro thomu o pamimi ni multhangin-gare aro ru o voth nge, naro thomu o ria or ve, ‘God ile menong e nepes, i toth ol a thomu nge lale.’

¹⁰ Aveto aro ve thomu o eso a rem pomnga e, naro o nongpoo thomu avele, aro thomu o es a rem pomnga aken lemi pat na o ria or ve,

¹¹ Na lomu rem pomnga a vuvus i tetuno a evemem, aro them tepluspot i mo them pathengal thomu aro vothung aken thomu o oma i kene i sivenga avele. Aveto aro lomumu mire aro ve, God ile menong e nepes, i toth ol a thomu nge lale.’”

¹² Na Jisas i ria mun ile wainlangaere ve, “Na tho ria thomu, nge nang aro God i ateal i lale ve aro i pamit toko na seng nge riong, paomelaling aro God i sungu i nge rem pomnga aken, aro i aolo leltun paomelaling aro i sungu i nge rem pomnga a Sodom.” *

* **10:12:** Nomenga Sodom angare ole vothung i kerenga rintet, mako God i pakerenga sele or alavusnga. O thopola Luk 17:29 na Stat 19:24-28, na Jut 1:7. † **10:13:** Judare o rivenga Tair na Saidon angare ole vothung alavusnga i kerenga selele.

Jisas i ritet nge paomelaling aro i velpol nge rem pomnga areko o lel okime nge i.

(Matiu 11:21-23)

¹³ Mako Jisas i ria mun ve, “Patong toko na seng Korasin angare, na tomo mun nge toko na seng Betsaida angare. Eneke tova ve toko e i es a rem pomnga a Tair na Saidon† na i oma pathepolong pulua aro rangga ve tho oma i ake ru a thomu nge lale, aken aro palolo vet avele na Tair na Saidon angare aro o eksing olemi, na o teuna teunong aro ini lemi kerereong a teunong na o vor vor vuvus a opounga aro i paateal ve, o lel okime nge ole vothung kerengare lale. Aveto thomu, kene avele.

¹⁴ Na nge nang aro God i pamit toko na seng alavusnga nge riong, paomelaling aro God i sungu i a thomu nge, aro i aolo leltun paomelaling aro i sungu i a toko na sengre nge aro a Tair na Saidon.

¹⁵ Na thomu tokokoe Kaperneam angare aro God i papomnga thomu mo o roro rintet avele, aro i paesu rintetu thomu ruru!”

¹⁶ Ma Jisas i ria mun ile wainlanga or mule pa limai pothoi or aini aken ve, “Toko aro i nongal thomu, akennga i non-gal ake ini tho. Na toko aro ikime lelapot thomu, akennga ikime lelapot ake ini tho. Na toko aro ikime lelapot tho, akennga ikime lelapot ake ini a God aro i pake tho me.”

Toko or 72 aro Jisas i pake or, o lo werer.

¹⁷ Lamako tokokoe or mule pa limai pothoi or aini aro Jisas i pake or, o lo werer ma oleli sivenga rintet, ma o ri ve, “Toko Pomnga, ine tamata kerengare o nongal mun inga them aro i wistetpot or nge iom.”

¹⁸ Ma Jisas i olal ole riong ve, “Tho thopol a Satan aro God i asespot i a sepsa me ranga ve ini pen kitnga.

¹⁹ Na o nongpol, tho sung engenging a thomu nge lale. Na thomu o pavurvur aro aro o tepe-tuntun pilimo kerenga na telenga. Na thomu o pavurvur aro aro

lomu mong lomu ngarangre ole engenging alavusnga. Na ur e avele i pavurvur aro i pakerenga thomu.

²⁰ Aveto thomu o mothong tova lomumu sivenga nge ako tamata kerengare o nongal thomu, aro lomumu sivenga ako God i watu iomu a ile erere nge lale aka a Pen a Urvet."

Jisas ilemi sivenga rintet ma i paesa a God iion roro.

(Matiu 11:25-27; Matiu 13:16-17)

²¹ Na nge ole lo wererong Oni Riringa i pavual a Jisas nge lemi sivengaing ma i ria ve, "Vovo, ong ini Toko Pomnga nge Pen a Urvet na ulue. Na tho ri sivengaing a ong nge, eneke ong parong kineal ur areken nge toko powe ninengare tomo nge areko ole mire i aolonga. Na ong pathengal inga i nge toko areke o es nge pamirealing avele. I nunganga, Vovo, ong panes inga aka ini lomum, mako ong oma i venen aken."

²² Na Jisas i ria ile wainlangaere ve, "Na Vovo i sungu ur alavusnga a menik lale. Na toko e avele ilemi mire nge Itun, Itema inga ilemi mire nge i. Na toko e avele ilemi mire nge ok Vovo aken, ini Itun tomo nge tokokoe areko Itun i ateal or ve aro i pathengal i a or nge. Na or inga aka aro olemi mire nge ok Vovo."

²³ Lamako Jisas i eksing a ile wainlangaere nge, ma i ria inga oenga nge ve, "Sapase thomu, eneke thomu o thepol ur areko thomu o thepol i lale.

²⁴ Na tho ria thomu, nomenga God ile riong elngare na nepesre o sis aka ve, o thepol ur areko thomu o thepol i, aveto o thepol ol i avele. Na o sis aka ve, o nongpol riong areko thomu o nongpol i, aveto o nongpol ol i avele."

Jisas i oma riong agelalnga nge toko Samaria anga aka i oma vothung sivenga.
(Matiu 22:34-40; Mak 12:28-31)

²⁵ Nge nang omole e aka toko omole aka ini pamirealinga nge a Moses ile patorong, i mita ma ia pun aka ve, i tongporum a Jisas, ma i nina i ve, "Pamirealinga, aro tho oma neke aka aro tho el mimiong aka aro ile vusonga avele, e?"

²⁶ Na Jisas i nina i ve, "Moses ile patorong i ri neke? Na ong tital i ma i ria ong vava?"

²⁷ Na toko aken i olal ile riong ve, " 'Aro omu sagu a God, aka ini omu Pomnga, nge opomu alavusnga, na nge onumu alavusnga, na nge lomumu engenging alavusnga, na nge lomumu alavusnga.' [‡] Naro 'Om'u sagu thongongomuere ranga ve aka omu sagu sivengomu.' " §

²⁸ Ma Jisas i ria i ve, "I nunganga, ong olal vengveng re i aken. Na aro ve ong oma i venen aken, aro ong el mimiong."

²⁹ Aveto pamirealinga nge a Moses ile patorong aken ini plong ve ile maral nge ile ninong aken, mako i nin a Jisas ve, "Na anga aka ini thengengekre, e?"

³⁰ Na Jisas ilemi ve aro i pathengal or nge toko kathnga areko aro oa sagu or, mako i ri riong agelalnga ake a or nge ve, "Toko Juda omole aka i lospot a Jerusalem, ma i esu a rem pomnga a Jeriko la. Ma i thopolo toko kemongare a sovengalo ma o siso i, ma o kem ile ur elonga na o lo, na i ngo a sovengalo ma i toth ol nge ile riong.

³¹ Na ur aken i velpol vengtun nge nang aka Juda a pris omole aka i es rum nge sovengalo aken. Ma i thepolo toko aken, aveto i geltet inga a sovengalo wo peti epee na i es la.

³² Na nge sovengalo mun re aken lotuunga a omainga aka ini toko Juda, i es mun nge, ma i velpol nge wop aken, ma i thepol toko aken ma i geltet mun a sovengalo epee ma i es la.

³³ Aveto toko Samaria** omole aka i panes mun sovengalo aken, ma i velpol a toko aken nge. Ma i thepol i ma ilemi esal rintet i.

³⁴ Ma i eso a i nge la, ma i odorok wel tomo nge vain a ia soroing areken nge, na i wistuno i re. Ma i visloa toko aken, ma i pangoa i a isivenga ia donki nge. Ma i pasong i a ngoaloinga a vel omole aka nge, ma i theal senu i nge.

³⁵ Lama nge erangunga i ela 20^{††} Kina ma i sungu i a ngoaloinga a vel aken tokoninga nge, ma i ria i ve, 'Aro ong theal senu toko ake, na aro ve ong ulpot lom

[‡] 10:27: Lo 6:5 § 10:27: Wok Pris 19:18 ** 10:33: Samaria angare na Judare oni silal pel. †† 10:35: Grik 2 Denarius.

umtun pelie nge ithealnga, panen aro tho lo werer mun vene ake me, aro tho olal werer mun lom ur elonga areken.”

³⁶ Ma Jisas i pavus ile riong agelalnga, mako i nina mun pamirealinga nge a Moses ile patorong aken ve, “Lomum vava? Nge toko or me aken oa kathnga i thanga aken ru kemongare o siso i, e?”

³⁷ Ma i olal a Jisas ile riong ve, “Ine toko ako ru ilemi esal rintet i ma i opoal i.”

Ma Jisas i ria ve, “Ong es mo ong oma mun vothung ako i venen aken.”

Jisas i voth a Marta ome a Maria ole vel.

³⁸ Na Jisas ome ile wainlangaere o es la. Ma o eso e rem e. Ma seng omole aka iiion a Marta i nongpoo or a ile vel la.

³⁹ Na Marta itein omole aka iiion a Maria i es me ma i menu totho aka ru a Toko Pomnga ieve tepun mo i nongpol ile pamirealing.

⁴⁰ Aveto Marta ilemi ngo pelekpol, eneke ienga inga aka i monsi aning omanga. Mako i es a Jisas nge ma i ria i ve, “Toko Pomnga, teik posnga i lo lelpot ok, ma ini inga engek ake ru tho oma aning. Na lomum nge ake avele? Na ong ria i mo i es mo i opoal tho.”

⁴¹ Aveto Toko Pomnga i olal ile riong ve, “Marta, Marta, lomum i ngo pelekpol na lomum pompom nge ur puluangare omanga.

⁴² Aveto ur omole inga aken aro i pavurvur. Na Maria i sis aka ve, i oma ur aka i sivenga, na toko e aro i eltetpot ol i a i nge avele.”

11

Jisas i pamireal nge nongong.

(Matiu 6:9-13; Matiu 7:7-11)

¹ Nge nang omole aka Jisas i nong nge pen e aka, ma i nong ma i vus ma ile wainlanga omole i ria i ve, “Toko Pomnga pamireal them nge nongong ranga ve aka Jon i pamireal ile wainlangaere nge.”

² Ma Jisas i ria or ve, “Na nge lom nongong aro ong ri vene,

‘Vovo, aro tokokoere o papomnga iom.

Na lom menong e nepes aro i esu me mo i theal toko ulue angare.

³ Na nge nang omole omole aro ong sung emem aning aka i pavurvur nge lemem mimiong.

⁴ Na lomum simikal lemem vothung kerenga, eneke lemimem simikal toko alavusnga ole vothung kerenga aka o oma i a them nge. Na mothong tova sung tongporumong a them nge.’”

⁵ Na Jisas i ri mun a or nge ve, “Na aro ve omu e i es a ithanga e ile vel la, nge pemlik lopat, mo i ria i ve, ‘Teik, sungu tel bret or me a tho nge me,

⁶ eneke thengek i es me nge sovengalo lollonga, ma i velpol a tho nge, ave ok aning avele aka aro tho sungu i a i nge.’

⁷ Na ithanga aka i voth a vel lemi i olal ile riong ve, ‘Mothong tova pavothal tho. Vel thekia i pupal lale, ma them e tutukre them ngo a ngoinga lale. I pavurvur aro tho plosa ol avele, mo tho sungu ur e a wong nge.’

⁸ Na tho ria thomu, i nunganga toko aka ini thongom, aveto aro i plosa avele mo i sung ur e a wong nge, aveto aro i plosa mo i sungu ur alavusnga aka ong oror nge, tova ong nin ororo i nge, na lom maral avele.

⁹ “Mako tho ria thomu, nin a God naro i sungu i a ong nge. Kath ur e naro God i pathengal i a wong nge. Na leng leng tomo nge a God naro i theppot vel thekia mo i opoal wong.

¹⁰ Eneke toko alavusnga aka o nin a God, aro i sungu i a or nge. Na toko e aka i kath ur e, aro God i pathengal i a i nge. Na toko aka i leng leng tomo nge a God, aro i theppot vel thekia mo i opoal i.

¹¹ “Om u e aka ini wain a vovo, aro ve tum i nina wong nge silang, aro wong sung eli a i nge avele.

¹² Na aro ve i nina wong nge otel, aro ong sung telenga* mun a i nge avele.

¹³ Thomu ini toko aka lomu vothung kerenga, aveto thomu o pavurvur aro thomu o sung sungong sivenga a tutumuere nge. Na omu Vovo aka i voth a Pen a Urvet ile vothung i sivenga nge lomu vothung, naro i sung sungong aka

* **11:12:** O thepol telenga ia sei nge a Luk 10:19 nge pes 172.

i sivenga rintet ako ini Oni Riringa nge areko o nina i nge."

Toko pelie o ri ve Satan i opoesal a Jisas nge ile omaing.

(Matiu 12:22-29; Mak 3:23-27)

¹⁴ Na Jisas i wistetpot tamata kerenga ako i rises, lamako tamata kerenga i lopot a toko risesnga aken nge, mako i leng leng werer, na toko na sengre o kukuk nge.

¹⁵ Aveto toko pelie a or nge o ri ve, "I wistetpot tamata kerengare nge a tamata kerengare oa pomnga ako ini a Belsebul,[†] ile engenging."

¹⁶ Na pelie mun a or nge, o ri ve o tongporum i, ma o nina i ve aro i oma pathepolong aka i pathengal or ve God i ateal i.

¹⁷ Aveto Jisas ilemi mire nge olemi ma i ria or ve, "Aro ve rem omole o thomreu osivenga mo o pun werer mun pel, aro rem aken aro o vus. Na aro ve vel lemiare o pun werer mun pel osivenga, aro i vus mun."

¹⁸ Na aro ve Satan ilengare o siso werer mun pel osivenga, aro o voth palolo avele. Thomu o ri ve tho wistetpot tamata kerengare nge a Belsebul ile engenging.

¹⁹ Na aro ve i nunganga aka Belsebul i sung engenging a tho nge mo tho wistetpot tamata kerengare a tokokoere nge, anga i sung engenging aken a lomu wainlangaere nge mo o wistetpot tamata kerengare a tokokoere nge, e? Mako lomu wainlangaere o pathengal thomu aka ve, lomu riong i nunganga avele.

²⁰ Aveto tho wistetpot tamata kerengare nge a God ile engenging, na omaing aken i pathengal thomu aka God ile menong e nepes i velpol a thomu nge lale.

²¹ "Na aro ve toko engenga tomo nge ile punonga alavusnga i theal tetal ile vel, aro ile ur elonga aro i ngo senu.

²² Aveto, aro ve toko aka ile engenging i aolonga rintet, i pun tomo nge toko aken, aro ile mong i, naro i potunpot toko aken ile punonga alavusnga aka o opoesal i,

naro i kem ile ur elonga mo aro i sung sung i a ithangangaere nge.

²³ "Toko e aka ini thengek avele, ini lek ngarang. Na toko e aka i um tomo e tho na i wol tokokoere a tho nge me, kene avele, akennga i wistet or.

Tamata kerenga ile lo wererong.

(Matiu 12:43-45)

²⁴ "Na aro ve tamata kerenga i lopot a toko omole nge, aro i esu esa a pen klangklanga mo i kath pen e aka aro i thau i nge. Ave i thopolole avele ma i ria ienga nge ve, 'Aro tho lo werer a lek vel la.'

²⁵ Mako i lo werer ma i thepol aka ile vel ilemi pro na ur alavusnga i ngo vengveng.

²⁶ Lama i es ma i wol tamata kerenga or limai aka o kerenga rintet nge i, ma or alavusnga o rero a vel aken ma o voth nge. Mako toko aken ile mimiong i kerenga rintet nge ile mimiong nomenganga."

Jisas i patalor or nge lemi sivengaing nunganga.

²⁷ Ma Jisas ile riong aken i vusu inga, mako seng omole aka a lemi pat i ripot, ma i ria i ve, "Sapase seng aka i pop wong na i pasusu wong."

²⁸ Aveto Jisas i olal ile riong ve, "Ena, aveto sapase rintet areko o nongal a God ile riong na o panes i."

Jisas ini plong nge pathepolong omanga.
(Matiu 12:39-42)

²⁹ Na toko na seng pulua o mit kalalual a Jisas ma i ria or ve, "Toko na seng alavusnga aka o mimi ponange, ole vothung i kerenga rintet, eneke o engeng ve aro o thepol pathepolong aka ini God ile paatealing, aveto paatealing e avele aro i velpol, ini inga paatealing omole aka God i oma i a Jona nge.

³⁰ Uneke aka i velpoltun a Jona[‡] kene, ini paatealing a Ninive angare nge, ranga ve ini mun i, uneke aka aro i velpoltun a Toko Pomnga Itun, aro ini paatealing a toko na seng alavusnga aka o mimi ponange.

[†] 11:15: Belsebul iion mun a Satan. [‡] 11:30: Na Jona i voth a silang aolonga iopo lemi nge nang or me, lamako i velpol werer ma i panongpol Ninive angare. Na Jisas aro i voth a vuvepun lemi nge nang or me mun, lamako i plos werera na toko pulua o thopol i. Ake ini paatealing aka i pathengal tokokoere aka God i ateal a Jisas ve aro i el werer tokokoere. § 11:31: Tenesing nge seng aka ini nepes a Seba i voth a 1 King 10:1-10.

³¹ Na panen nge nang ako God aro i pamit tokokoere nge riong, aro seng ako ini nepes a Seba§ aka ini seng Juda avele, aro i mita mo i kenkeno nge thomu Juda areko o mimi ponange teltunngomu, nge lomu nong rerong. Eneke nomenga seng aken i es nge rem melanga rintet mo i nongpol a Solomon ile riong ninenga aka God i sungu i a i nge. Na o nongpol, ponange toko omole aka i pomnga rintet nge a Solomon, i aka ru i voth, ake ini tho, aveto thomu o ri ve o nongpol tho avele.

³² Na e mun e aka, panen nge nang aka God aro i pamit tokokoere nge riong, aro toko Ninive angare aka or ini Judare avele, aro o mita, mo o kenkeno mun nge thomu Juda areko o mimi ponange, nge lomu nong rerong. Eneke nomenga o nongpol a Jona ile panongpolong, mako okime lelal ole vothung kerenga. Naro thomu o nongpol, ponange ur omole aka i pomnga rintet nge a Jona, i aka ru i voth, ake ini tho, aveto thomu o ri ve o nongpol tho avele.”

Jisas ile riong i ranga ve ini the lalainga aka i panine toko ilemi.

(Matiu 6:22-23)

³³ Na Jisas i ria ve, “Na aro ve toko e i pasise the lalainga, i mothong tova i parong kineu i a wop e, na i mothong tova i pasopalu i nge alal. Aveto aro i pamona i a imei mo aro tokokoere aro o thopol iannga tova o eso a vel lemi.

³⁴ The lalainga i eso a thekum na ong ate a lomum. Na aro ve thekum i nine, aro lomum alavusnga i nine. Aveto aro ve thekum i mideng, aro lomum alavusnga ia mideng.

³⁵ Naro wong naktet wong, mo aro lomum i nine inga na i mothong tova ia mideng.

³⁶ Na aro ve lomum alavusnga i nine, na lomum epee tie ia mideng avele, aro ong ate ur alavusnga ranga ve ini the lalainga aka i totun ur elonga aka a vel lemi.”

Jisas i kenkentuno Parisire tomo nge pamirealingare nge a Moses ile patorong.

** **11:44:** Judare ole patorong i ri ve, aro ve toko e i tepelos vuvepun, aken i paakop i a God itheki. Na aro ve toko e i panes a Parisire ole vothung, i lelek mun lale, eneke ur kerenga i voth kine a olemi, ranga ve aka vung i ngo kine a vuvepun lemi, na or paini o paakop toko a God itheki.

³⁷ Ma Jisas i pavus ile riong lama Parisi omole i nongpoo i mo i an tomo nge i. Mako i eso a vel lemi ma i menu mo aro i an.

³⁸ Na Parisi aken i kukuk nge aka Jisas i paut imeni avele ma i an.

³⁹ Mako Jisas i ria i ve, “Thomu Parisire o papis omu thinonga ome anonga okime mo thomu o riri a God itheki, aveto lomumu i vual nge vothung kerenga tomo nge pamumutaling.

⁴⁰ Thomu ini pepere, God i oma ikime tomo nge ilemi.

⁴¹ Aveto aro thomu o sung lomu ur elonga, aka ranga ve ur aka i ngo a omu thinonga ome anonga lemi a toko le ur avelengare nge. Naro lomu omaing aken aro i pariripot thomu a God itheki, ma lomu ur elonga aro i riri mun.

⁴² “Patong thomu Parisire, thomu o rivenga aka thomu ini toko riringa a God itheki, eneke omu aning rongolinga alavusnga aka i pota a ometa, thomu o omreu i nge epee or mule, na epee omole thomu o sungpot i a God nge mo ini lomu sungong. Aveto thomu o oma vothung vengvenga a tokokoere nge avele, na omu sagu a God avele. Na i sivenga aka aro thomu o oma vothung vengvenga a tokokoere nge, naro omu sagu a God, na o mothong tova o modop vothung sivenga aka thomu o oma i lale.

⁴³ “Patong thomu Parisire, eneke thomu o sis aka ve, aro thomu o men nge menonga mukalinga, aka toko mukalingare o men nge aka ru a Judare ole lutuunga a vel lemi. Na thomu o sis aka ve, aro tokokoere o pathokeal thomu a rem lemi.

⁴⁴ “Patong thomu, eneke thomu o ranga ve ini vuvepun aka tokokoere o ate i avele na o tepelos i, aveto olemi mire nge avele, aken i paakop toko aken a God itheki.” **

⁴⁵ Na pamirealinga omole nge a Moses ile patorong i ria i ve, “Pamirealinga, ong ri venen aken a Parisire nge, ma ong pakerenga mun iomem.”

46 Ma Jisas i olal ile riong ve, “Patong thomu mun pamirealingare nge a Moses ile patorong, eneke thomu o oma a Moses ile patorong panesnga ma i klipalaltun na sivengomu o opoescal tokokoere nge patorong panesnga avele.

47 “Patong thomu, eneke titovumuere olemi mire nge a God ile riong elngare, aveto o pun rin or. Na thomu mun, thomu o oma vuvepun sivenga a or nge, aveto thomu o nongal mun ole riong avele.

48 Mako sivengomu o pathengal ako lomumu ve, titovumuere ole vothung i sivenga, eneke o ate or ini a God ile riong elngare, aveto o nongal ole riong avele, mako o pun rin or. Na thomu o oma oa vuvepun mo i sivenga rintet, aveto thomu mun o nongal ole riong avele.

49 Mako God ile lemi rumong sivenga i ri vene: ‘Aro tho pake lek riong elngare tomo nge lek pakekere, a Israelre nge, mo o panongpol or nge lek riong, aveto aro o nongal or avele, mako aro o pun rin pelie na o pakerenga pelie.’

50-51 Na titovumuere o pun rin a God ile riong elnga pulua aka i patea nge ulue ile pateaing aka nge a Abel ipunrinnga, mako o patopalal i nge a Sekaraia ipunrinnga aka o pun rin i a sungong a lekleka na Lotu Tepun a Vel a wop lemi. Na paomelaling nge a God ile riong elnga alavusngare opunrinnga aro thomu tokokoere aka o mimi ponange aro o el paomelaling aken panen. Eneke lomu lemi rumong i ranga ve ini titovumuere ole lemi rumong.

52 “Patong thomu pamirealingare nge a Moses ile patorong, eneke thomu o eltett-pot vel thekia thepnga lale aka i es a God ile mire elnga nge. Na sivengomu thomu o eso nge avele. Na thomu o mit roal tokokoe areko o ri ve o eso a lemi.”

53 Na Jisas i lo lelpot vel aken, mako pamirealingare nge a Moses ile patorong tomo nge Parisire olemi kerenga rintet nge i, mako o nin ororo i mo i ri nge ur pulua.

54 Eneke o sis aka ve, aro i ripot riong aka i vengveng avele mo o pamita i nge riong.

12

*Jisas i ri ve o mothong tova lomu apaltet, eneke ur alavusnga aro i ngo pat panen.
(Matiu 10:26-27)*

1 Na tokokoere o veliloalo pel ma o pom rintet ma o tepetuntun osivenga. Ma Jisas i panakal ile wainlangaere ve, “Thomu o nakalal thomu nge pokonongare aka ini Parisi ole le apaltetetong aka i ranga ve ini yis aka o parong posngati a bret nge, aveto i pawima pen elonga, aro vene mo ole pamirealing a thomu nge, aro i paaolonga lomu vothung kerenga.

2 Na vothung aka i ngo kine, aro i ngo pat panen, na riong aka i ngo kine, aro panen aro or alavusnga olemi mire nge.

3 Na lomu riong alavusnga aka thomu o ria i nge pemliknga, panen aro o nongpol i nge eranga, na lomu riong alavusnga aka thomu o ri ngunngun a engomu nge a vel lemi, panen aro o panongpol i a rem lemi pat.”

*Jisas i ri ve o mothong tova o ngange nge toko ulue anga, aro thomu o ngange nge a God.
(Matiu 10:28-31)*

4 Na Jisas i ria ile wainlangaere ve, “Tho ria thomu thengengekre, o mothong tova o ngange nge areko o pun rin numu peti, aveto aro o oma ur e avele mun a thomu nge.

5 Aveto aro tho pathengal thomu nge toko aka aro thomu o ngange nge i. Aro thomu o ngange nge a God, eneke i pavurvur aka aro i pun rin toko ini peti, na nge ile engenging i pavurvur aka aro i asesa iona a won sesenga nge aka aro ile vusonga avele. I nunganga aro thomu o ngange nge i.

6 Na tokokoere o ol men posnga or lim nge toe ari aini, ranga ve or ini ur polpolnga. Aveto God ilemi simikalu men omole e avele.

7 Na God ilemi mire senu nge thomu, i pavurvur nge poungomu thoi omole omole titalnga. Na thomu o mothong tova o ngange nge tokokoere, eneke thomu toko omole omole o aolonga nge men puluanga a God itheki.”

Mothong tova lom maral ve ong ini a Krais ile toko.

(Matiu 10:32-33)

⁸ Na Jisas i ria ile wainlangaere ve, “Tho ria thomu, aro ve toko e i ripot a pulua oa lemimi na i ri ve, ‘Tho ini a Jisas ile’ aro Toko Pomnga Itun aro i ria God ile enselre ve, ‘Toko aken ini lek.’

⁹ Aveto aro ve toko e ikime lelaltun tho, aro Toko Pomnga Itun aro ikime lelaltun mun toko aken a God ile enselre otheki.

¹⁰ Toko e ako i ri riong kerenga nge a Toko Pomnga Itun, panen i pavurvur aro God ilemi simikal ile vothung kerenga aken. Aveto toko e ako i kelelal a God Ioni Riringa, panen aro God ilemi simikal ile vothung kerenga aken avele.

¹¹ Nge wop lemi aro tokokoere o pamit thomu nge riong, aro a Judare ole lotuonga a vel lemi eve a gavman ole mukalingare otheki, thomu o mothong tova lomumu rit nge lomu lelong aro thomu o ri.

¹² Eneke nge wop lemi aro thomu oma lelong, God Ioni Riringa aro i opoesal thomu nge riong aro thomu o ria or nge.”

Riong agelalnga nge toko le urnga ako ilemi rum a God avele.

¹³ Na toko omole aro ru a pulua oa lemimi i ri a Jisas ve, “Pamirealinga, ria teik pomnga mo aro i omreu emem vovo aro i rin lale ile ur elonga mo i sungu lek.”

¹⁴ Na Jisas i olal ile riong ve, “Teik, lek engenging avele aro tho omreu ur areken a thomu paini nge.”

¹⁵ Lama Jisas i ria or alavusnga ve, “Thomu o nakalal thomu na o mothong tova o theseal, eneke i pavurvur aro thomu o el mimiong nge lomu ur le pomong avele.”

¹⁶ Na i ri riong agelalnga a or nge ve, “Toko omole aro i voth kene ia ometa i pavelpol wit monnga pulua.

¹⁷ Lama i ria isivenga ma i ri ve, ‘Pen e aro i pavurvur avele aro tho parong lek wit monnga nge. Naro tho oma vava?’

¹⁸ “Aro tho oma vene, aro tho teu lek wit a velre mo aro tho ari mos or alavusnga mo i aolonga. Naro tho parong lek wit monnga nge, tomo nge lek ur elonga.

¹⁹ Mako aro tho ria sivengek ve, “Lek ur elonga pom rintet aro i pavurvur nge tovu po pulua. Naro tho thau ol tho nge omaing naro tho an ol inga, na tho thin ol inga, na lemi sivengaing aolonga aro i voth a tho nge.”

²⁰ “Aveto God i ria i ve, ‘Wong ini ngongong, pan pemlik aro tho eltetpot lom mimiong. Lamo toko e aro i el lom ur elonga aro ong krim tuntun i.’”

²¹ Na Jisas i patopalal ile riong vene, “I vene re aro nge tokokoe areko o parong velilo ole ur elonga na o krim tuntuno i, aveto or ini toko le ur avelengare a God itheki.”

God i theal senu itutunre.

(Matiu 6:25-33)

²² Lamako Jisas i ria ile wainlangaere ve, “Na tho ria thomu, o mothong tova lomumu rit nge omu aning aro thomu o el mimiong nge. Na o mothong tova lomumu rit nge lomu teunong aro thomu o teun i a numu peti.

²³ Na mimiong i aolonga nge aning, na toko ini peti i aolonga nge ile teunong.

²⁴ Thomu o thopol vet kakrotre, aro o o won monnga avele na o veliloal won monnga avele, na ole vel avele, aro o parong oa aning nge. Aveto God i sung aning a or nge. Na thomu tokokoere o aolonga nge menre aro ro a God itheki.

²⁵ Aro ve toko e ilemi rit nge mimi lolloing, i pavurvur aro ile lemi ritong aken aro i pokespot ile mimiong nge nang omole avele.

²⁶ Na mimiong pokespotnga nge nang omole, ini ur posngati, aveto thomu o pavurvur omanga avele. Maken o mothong tova lomumu rit nge ur relnga pelie.

²⁷ “Thomu o thopol vet ine won punpolngare ole mitong, aro o um avele na o oma ole teunong avele. Aveto tho ria thomu, Solomon ia nepes a malmaling i pavurvur nge won punpolnga omole ia malmaling avele.

²⁸ Na God i pateun pilil polpolnga aro i voth ponange, na i penthal lelken, eneke tokokoere o ongtuna i. Na aro ve God i pateun pilil polpolnga aken, aro i pateun rintet senu thomu. Lomu lemioong a God nge kene i posngaingati.

²⁹ Na o mothong tova lomumu rit nge ur kathnga ako aro thomu o an i, na o thin i.

³⁰ Eneke toko ulue angare ako o lemo a God nge avele, or alavusnga olemi rit nge aning na thinong, aveto omu Vovo ilemi mire nge thomu, aro ve thomu o el ur areken avele, aro thomu o mimi senu avele.

³¹ Aveto aro lomumu rum nge a God ile menong e nepes, naro i sung ur areken a thomu nge."

Jisas i patoral nge ako aro o pango ur pulua a Pen a Urvet.

³² Na Jisas i ria ile wainlangaere ve, "Tho theal tetal thomu ranga ve ini sipsipre, na o mothong tova o ngange, eneke omu Vovo ilemi sivenga ve aro i sungu ile menong e nepes a thomu nge.

³³ Thomu o sungu lomu ur elonga a toko le ur avelengare nge, mo lomu ur sivesivenga ako ro a Pen a Urvet aro i penthal avele, eneke aro i ngo nge umtun le ngoinga ako aro i minra avele. Naro lomu ur sivesivenga aro i vus avele, eneke toko kemonga aro i eso nge avele, naro inan i ariris i avele.

³⁴ Aro thomu o oma venen aken, eneke lomumu i voth nge pen aka lomu ur sivenga i ngo nge.

Jisas i ria ile wainlangaere ve aro o thealal.

(Matiu 25:1-13; Mak 13:33-37)

³⁵ "Na thomu o teun engeng omu teunongre, mo thomu o monsi nge umong, naro lomu the lalainga aro i to

³⁶ ranga ve ini umongare aka o men tetal ole mukalinga aka i lo werer nge sungaling a aning, aro ve i velpol a vel thekia, aro o theppot vel thekia nge i viri viri.

³⁷ Na sivengaing i voth nge umongare aka ole mukalinga i thopol or aka o the inga, makola i velpol. Tho ria thomu, aro i eltetpot ile tekruk seltunnga naro i ria ile umongare ve aro o menu naro i sung aning a or nge.

³⁸ Na aro ve i velpol nge pemlik lopat, ma i thopol ile umongare aka o monsi lale, aro sivengaing i voth nge umongareken.

³⁹ Naro lomumu rum lek riong ake, aro ve vel tokoninga ilemi mire nge nang aka toko keminga aro i es me, aro i mit roal toko keminga mo i eso a ile vel lemi avele.

⁴⁰ Na thomu mun, thomu o thealal, eneke Toko Pomnga Itun aro i es me nge nang aka lomumu rum ve aro i velpol nge, kene avele."

Thomu mukalingare o oma senu, i mulal aka aro omu Pomnga i lo werer:
(Matiu 24:45-51)

⁴¹ Na Pita i nin a Jisas ve, "Toko Pomnga, ong ri riong agelalnga aken a them nge eve a toko alavusngare nge?"

⁴² Na Jisas i olal ile riong ve, "Anga ini toko umonga aka ile lemi rumong i sivenga na i nongal nge ile mukalinga ile riong, e? Ini toko aka ile mukalinga i ria i ve, aro i theal senu ile vel lemiare naro i sung aning a toko umongare nge, nge nang aka i paateal i a or nge.

⁴³ Na aro ve ile mukalinga i lo werer na i thopol aka toko aken i panes senu ile riong, aro i oma vothung sivenga nge toko umonga aken.

⁴⁴ Tho ri nunganga a thomu nge, aro i sung omaing a toko umonga aken nge mo aro i theal ile ur elonga alavusnga.

⁴⁵ Aveto aro ve toko umonga aken i ria iengga nge ve, 'Lek mukalinga i voth palolo naro i lo werer viri viri avele.' Mako i siso toko umongare tomo nge seng umongare, na i an na i thin thei engenga, mako itheki vaisis.

⁴⁶ Na aro ve ile mukalinga i lo werer nge nang aka toko umonga ilemi rum ile mukalinga ile velpoling nge avele, aro ile mukalinga aken aro i paomelal rintet i naro i pasong i a toko kerengare ole pen.

⁴⁷ "Toko umonga aka ilemi mire nge ur aka ile mukalinga i sis ve aro i oma i, aveto i monsi nge ur aken omanga avele, aro i el paomelaling aolonga rintet nge.

⁴⁸ Aveto toko umonga aka ilemi mire nge ur aka ile mukalinga i sis ve aro i oma i, kene avele, na i oma vothung kerenga, aro i el paomelaling posngati. Na aro ve God i sung ur pulua a toko e nge, aken aro God i engeng ve aro toko aken i olal werer i, nge ur pulua. Na aro ve God i sung ur pulua rintet a toko e nge, aken aro God i

engeng ve aro toko aken i olal werer i, nge ur pulua rintet.”

Jisas ile pamirealing i pakerenga tokokoere ole menong sivenga.

(Matiu 10:34-36)

⁴⁹ Jisas i ria or ve, “Tho velpol mo aro tho sungu a God ile won sesenga a tokokoere nge ake ru a ulue. Na lemk ake ve, won sesenga aken i anlel lale.

⁵⁰ Naro matheong i seltun tho ranga ve ini thei ake i seltun toko ake i el paninuung. Na lemk kerere, i pavurvur aro aro matheong areken i vus.*

⁵¹ Lomum rum ake ve, tho velpol mo aro tho pavelpol lemi moring a ulue ake? Avele, aro tho omreku tokokoere.

⁵² Na i patea ponange na evelelnga ol, ake a vel omole toko or lim ole ngarang pel naro or me oa epee na or aini oa epee na or aini ole ngarang or me, eneke pelie olemio a tho nge, na pelie avele.

⁵³ Avovoengaere aro ole ngarang otutunre, naro otutunre ole ngarang otitemaere. Na aninaengaere ole ngarang otutun sengengaere, na otutun sengengaere ole ngarang oninaere. Na sengre ome otiteviere aro ole ngarangtun pel.”

Tokokoere o ate senu nge ur ake God i oma i, kene avele.

(Matiu 16:2-3)

⁵⁴ Na Jisas i ria toko puluangare ve, “Thomu o thopol vit theki ake i esa me, na thomu o ate i ma o ri ve, ‘Aro vit i mol.’ Mako vit i molu.

⁵⁵ Na thomu o rov thue ake i thu me, na thomu o ate ake ini nang po, ma o ri ve, ‘Aro pen i velvel.’ Mako i velpol ma i velvel.

⁵⁶ Thomu ini toko le apaltetongare, thomu o thopol ulue na sepsa ma o ate ur ake aro i velpol. Na thomu o thopol lek omaing, aveto numu plong ve aro o ate ur ake God aro i oma i, nge wop lemi ake.”

Pavengveng tel riong tomo nge a God ake aro i pamit ong nge riong.

(Matiu 5:25-26)

⁵⁷ Jisas i ria or ve, “Numu plong ve aro thomu o panes vothung vengvenga.

* **12:50:** Matheong areko i seltun a Jisas ini matheong ake i el i nge ile rinong.

⁵⁸ Aro ve toko e i ri ve i pamit ong nge riong, na i wol ong a rionga a vel, aro ong pavengveng rum so lom riong tomo nge i. Aro vene mo, aro i ti wong a rionga a vel la, naro riong nongpolnga aro i sung wong a lososthonga imeni, naro i paeso wong a mang a midenga lemi.

⁵⁹ Tho ria wong, aro wong voth nge, i pavurvur ake aro, sivengom, wong pavus umtun ake o paateal i a wong nge.”

13

Aro ve toko ikime lel ile vothung kerenga avele, aro i rin.

¹ Na nge wop lemi aken tokokoe pelie o voth, ma o ritet a Jisas nge tokokoe Galili angare, ake o oma ole sungong a God nge, mako Pailat ile punongare o pun rin or.

² Na Jisas i olal ole riong ve, “Lomumu ve tokokoe areko o rin venen aken, eneke ole vothung kerenga i mukal nge Galili alavusngare?”

³ Avele, tho ria thomu, aro ve kimomu lel lomu vothung kerengare avele, aro o pun rin rin mun thomu alavusnga.

⁴ Na lomumu rum nge toko or mule pa omole pothoi or limme ake o voth a Jerusalem a wop epee ake o apet i ve ini Siloam. Na vel roronga i mata a or nge, mako o rin rin. Na lomumu vava? Lomumu ve ur kerenga ake i velpoltun or i pathengal thomu ve, ole vothung kerenga i mukal nge Jerusalem alavusngare?

⁵ Avele, tho ria thomu, aro ve kimomu leltun lomu vothung kerengare avele, aro thomu alavusnga o rin rin mun venen aken.”

Riong agelalnga nge pupos ake i mon avele, i ranga ve ini toko ake i eksing ile mimiong avele.

⁶ Na Jisas i ria riong agelalnga a or nge. Na i ria ve, “Toko omole ake i o pupos a ia omata. Lamako i sis ve aro i kath pupos aken monnga. Aveto i thopolon monnga e avele.

⁷ Mako i ria ia omata thealnga nge ve, ‘Thopol, tovu po or me i vus lale, ake tho kath pupos ake monnga, aveto tho thopol

e avele. Na tetela i mo i pua. Eneke i an polpol ulue.'

⁸ "Aveto ia ometa thealnga i olal ile riong ve, 'Toko Pomnga, aro i mit tel venen, nge tovu po omole mun aro tho to kalalual i mo tho parong vareo tan pelie nge.'

⁹ Na aro ve i mon nge tovu po aken aro i sivenga, na aro ve avele aro o tetela i mo i pua.'"

Jisas i pamimi werera seng ako ikime loo nge nang rialonga.

¹⁰ Nge nang rialonga omole Jisas i pamireal tokokoere a Judare ole lotuonga a vel lemi.

¹¹ Na seng omole aka i voth aka tamata kerenga i voth a i nge, i pavurvur nge tovu po or mule pa omole pothoi or limme. Na tamata kerenga aken i oma i ma ikime i loo, ma i pavurvur aro i pavengveng ikime avele.

¹² Na Jisas i thopol seng aken, ma i lenga i, ma i ria i ve, "Wong seng aken, num multhanga i vus re aken."

¹³ Na i ronga imeni alaini a i nge, na a ur e avele na seng aken ikime i vengveng werer, ma i risea God iion roro.

¹⁴ Aveto mukalinga nge Judare ole lotuonga a vel aken, ilemi klingtun a Jisas, eneke i pamimi werera seng aka nge nang rialonga. Mako i ria tokokoere ve, "Nang or limae aka i voth aka aro te um nge, naro thomu o es mo o pamimi thomu nge nang elonga, aveto nge nang rialonga avele."

¹⁵ Mako Toko Pomnga i olal ile riong ve, "Thomu ini le apaltetongare, nge nang rialonga thomu omole omole o kekrispot lomu bulmakau ome donki mo o ti or a thei mo o thin."

¹⁶ Na seng ake ini a Abraham itevinga aka tamata kerenga i kintuntun i, i pavurvur nge tovu po or mule pa omole pothoi or limme. I vova aka aro tho kekrispot i nge nang rialonga avele, e?"

¹⁷ Na ile riong olalnga i palemara ile ngarangre. Na tokokoere olemi sivenga nge ile omaing a urvet aka i oma i.

Jisas ile riong agelalnga nge won monnga aka i posnga rintet.

(Matiu 13:31-32; Mak 4:30-32)

¹⁸ Lamako i nina or ve, "God ile menong e nepes i ranga ve ini neke? Naro tho patongrum ol i nge uneke ol e, mo aro lomumu mire nge, e?

¹⁹ God ile menong e nepes i ranga ve ini won monnga, aka i posnga rintet aka o apet i ve ini 'Mastet'. Na toko omole i ela i mo i o i a ia ometa. Ma i metaplo, makola i velpol ini won aolonga aka menre o oma ole klu a imeninire nge."

Jisas ile riong agelalnga nge yis aka o parong posngati a bret nge, aveto i pawima pen elonga.

(Matiu 13:33)

²⁰ Na Jisas i nina mun or ve, "Aro tho patongrum a God ile menong e nepes e ur nekenga ol e, mo aro lomumu mire nge, e?

²¹ I ranga ve ini yis aka seng omole i parong posngati a plaua aka i mathenga i pavurvur nge 20 kilo lemi, mako i pawima pen elonga."

Toko pelie inga aro o eso a God ile menong e nepes nge lok thekia aka i tuni.

²² Na Jisas i es nge ile esong a Jerusalem ma i patoral tokokoere a rumrem areko i es nge.

²³ Na toko e i nina i ve, "Toko Pomnga, aro ini toko pelie inga aka aro o el mimiong aka aro ile vusonga avele?"

Na Jisas i ria or ve,

²⁴ "Aro thomu o um engeng mo aro o eso nge vel thekia aka i posngati, eneke toko pulua o engeng ve aro o eso nge, aveto o pavurvur avele.

²⁵ Na nge wop lemi aka vel tokoninga i mita ma i pupal bibim vel thekia, aro thomu o mit a lalanga mo o sis ve aro o eso nge, mo o lenga ve, 'Mukalinga, thepu vel thekia nge them.'

"Aveto aro i olal lomu riong ve, 'Lemik mire nge thomu avele.'

²⁶ "Ma aro thomu olal ile riong ve, 'Nomenga them an, na them thin tomo nge wong, na wong patoral them a lemem rebo.'

²⁷ "Aveto aro i olal mun lomu riong ve, 'Lemik mire nge thomu avele. Thomu alavusnga lomu vothung kerenga aro thomu o lo lelpot tho.'

28 “Naro thomu o thopol ol a Abraham, Aisak, Jekop na God ile riong elngare ako o men nge a God ile menong e nepes, aveto aro thomu o vota a lalanga. Naro thomu o wal na o atitet womu pupo, eneke thomu o rov sisong aolonga.

29 Naro tokokoere o plosa nge rem elonga ake ru a ulue, naro o eso a God ile menong e nepes mo o men nge aning aolonga.

30 Na toko Israel pelie ako o mukal tel nge a God ile riong nongpolnga aro ole ol a rumongaling, naro o eso a God ile menong e nepes avele, aveto toko pelie ako o rumongal nge a God ile riong nongpolnga, aro ole ol a mukaling, naro o eso ol a God ile menong e nepes lemi.”

*Jisas ilemi esal Jerusalem angare.
(Matiu 23:37-39)*

31 Na nge wop lemi aken Parisi pelie o es a Jisas nge na o ria i ve, “Lolelpot pen ake mo es a pen relnga e, eneke Herot i sis ve aro i pun rin wong.”

32 Na Jisas i olal ole riong ve, “Thomu o es la mo o ria toko le apaltetonga aken ve, ‘Aro tho wistetpot tamata kerengare naro tho pamimi tokokoere, nge nang pelie i pavurvur aka aro tho pavus lek omaing nge nang aka God i ateal i.’

33 Aveto aro tho es nge lek esong ponange na lelken na lela, eneke i sivenga aka aro God ile riong elngare aro o rin inga a Jerusalem, na nge rem ol e avele.

34 “Jerusalem angare, Jerusalem angare patong thomu, God i pake ile riong elngare a thomu nge, aveto thomu o so rin or, na i pake ile tokokoere a thomu nge, aveto thomu o pun rin or nge um. Nang pa pova aka tho sis ve aro tho rekolo thomu a tho nge me, ranga ve ini vareo ninanga aka i rekolo itutunre a ini giniti thewo, aveto numu plong.

35 Naro lomu velre aro ilemi meninin na tho ri nunganga a thomu nge, aro thomu o thopol tho avele, i pavurvur nge nang aka aro thomu o ria tho ve, ‘Sapase toko aka i velpol, aka Toko Pomnga i sung ile engenging a i nge.’ ”*

14

Jisas i pamimi werer toko omole nge nang rialonga.

1 Nge nang rialonga omole, Jisas i eso a Parisire ole mukalinga omole ile vel, mo aro i an tomo nge i. Na tokokoere o thopolrum senu i nge ile omaing.

2 Na toko ari ini peti elonga i wim wim, i es ma i mitu a Jisas itheki lemi.

3 Na Jisas i nina pamirealingare nge a Moses ile patorong, tomo nge Parisire ma i nina or ve, “Nge a Moses ile patorong, i pavurvur aka aro te pamimi toko nge nang rialonga eve avele?”

4 Aveto o men porengreng. Na Jisas i krima toko aken ma i pamimi werera i, ma i pake i la.

5 Lama i ria or ve, “Aro ve omu e itun eve ile bulmakau i matu a volo lemi nge nang rialonga, aro wong monteta i viri viri nge nang rialonga eve avele?”

6 Aveto o pavurvur aro o olal ile ninong avele.

I sivenga aka aro toko i paruru isivenga.

7 Na Jisas i ate tokokoe pelie aka o serial nge menonga mukalinga. Mako i ria riong agelalnga a or nge ve,

8 “Aro ve toko e i nongpoo wong nge sungaling a aning, wong mothong tova serial nge menonga mukalinga, eneke aro ve i nongpoo toko aka i pomnga nge wong, na i velpol,

9 aro toko aka i nongpoo thomu paini aro i es me mo i ria wong ve, ‘Sungu menonga ake a i nge.’ Naro lom mara na wong men ol nge menonga rumongalinga.

10 Aveto aro ve o nongpoo wong nge aning, aro wong men nge menonga rumongalinga. Mako toko aka i nongpoo wong aro i es me mo i ria wong ve, ‘Teik, es me mo men a mukaling.’ Aro i papomnga wong a tokokoe areko o es nge aning otheki.

11 Na tho ri venen aken, eneke tokokoe areko o papomnga osivenga, aro God i paruru or. Na tokokoe areko o paruru osivenga, aro God i papomnga or.”

12 Lama Jisas i ria aning tokoninga ve, “Nge nang aka wong oma aning, mothong

* **13:35:** Buk Song 118:26

tova nongpoo thongongomre eve titeumre eve lom netre eve toko le ur pomngare, eneke aro o nongpoo werer wong mo wong el om aning olalnga.

¹³ Aveto nge nang ako ong oma aning, aro wong nongpoo toko le ur avelengare tomo nge toko kime lotorngare tomo nge toko eve lilngare, tomo nge toko theki prosngare,

¹⁴ naro God i oma senu nge wong, eneke o pavurvur aro o olal werer om aning avele. Naro God i olal werer i a wong nge, nge nang ako aro toko vengvengare o plos werera nge rinong.”

God inongpoo tokokoere nge ile menong e nepes, ranga ve ini toko aka i nongpoo tel Israelre nge ia aning aolonga.

(Matiu 22:2-14)

¹⁵ Na toko omole aka i men tomo nge or nge aning, i nongpol a Jisas ile riong ma i ria i ve, “Sapase tokokoe areko o men nge aning aka a God ile menong e nepes lemi.”

¹⁶ Na Jisas i olal ile riong ve, “Na toko omole i monsi nge aning aolonga na i nongpoo toko pulua.

¹⁷ Na nge nang aka i monsi ia aning lale, i pake ile toko umonga mo aro i ria tokokoere aka i nongpoo or mo i ria or ve, ‘O es me, ur alavusnga tho monsi i lale.’

¹⁸ Aveto or alavusnga oni plong. Na toko teltelnga i ria vene, ‘O, ponange re ake tho ol ulue epee naro tho es mo tho thopolrum i. Tho pavurvur aro tho es wot avele.’

¹⁹ Na toko mun e i ria vene, ‘O, ponange re ake tho ol bulmakau or mule aka ini lek umongare, naro tho es mo tho tongporum vet or nge omaing. Tho pavurvur aro tho es wot avele.’

²⁰ Na toko mun e i ria vene, ‘O, ponange re ake tho peange. Tho pavurvur aro tho es wot avele.’

²¹ Na toko umonga aken i lo werer a ile mukalinga nge, na i ritet i nge or alavusnga ole riong. Na aning tokoninga ilemi kling rintet na i ria ile toko umonga ve, ‘Paviripot nge sovengalo elonga aka a rem pomnga na wong wola werer toko le ur avelengare tomo nge toko kime looloongare tomo nge toko eve lilngare tomo nge toko theki prosngare.’

²² Lamako ile toko umonga i ria i ve, ‘Toko Pomnga tho oma ur alavusnga aka wong ri nge, aveto pen pelie aken ru rongan i voth.’

²³ Lama aning tokoninga i ria ile toko umonga ve, ‘Espot a rumrem a sovengalo tomo nge ometa a sovengalo na ri engeng tokokoere mo aro o eso a lek vel lemi mo i vuual.

²⁴ Na tho ria wong, tokokoe areko tho nongpoo tel or, e avele aro i an rum ok aning aolonga aka tho monsi i.’ ”

Toko aro ilemi rum senu tel nge uneke aka aro i mothong i, mo i velpol ini a Jisas ile wainlanga.

(Matiu 10:37-38)

²⁵ Na nge nang omole toko puluanga rintet o es tomo nge a Jisas, na Jisas i eksinga ma i ria or ve,

²⁶ “Na toko e aka i sis ve aro i panes tho, aro ile asaguong nge tho, aro i aolonga rintet nge ile asaguong aka nge itema, inina, iewo sengenga, itutunre, ititeinre, ilulunre na isivenga ile mimiong mun, aro vene mo i velpol ini lek wainlanga avele.

²⁷ Na toko e aka i panes tho, aveto ini plong ve aro i potun isivenga ia won ngoronga, toko aken i pavurvur aro i velpol ini lek wainlanga avele.

²⁸ “Na aro ve omu e aka ilemi rum nge vel omanga aro i men tel mo i oma senu tel vel olonga mo ilemi mire nge ile umtun, i pavurvur aka aro i pavus vel aken eve avele.

²⁹ Na toko e aro ve i oma senu tel vel olonga avele, aro i patea vel aringa, aveto i pavurvur aro i pavus i avele. Naro tokokoere o thopol ile vel aringa naro o ri sililal i.

³⁰ Naro o ria ve, ‘Toko aken i patea vel aringa, aveto i pavurvur aro i pavus i avele.’

³¹ “Na aro ve nepes omole i es tomo nge ile toko punonga or 10,000 mo aro i pun tomo nge nepes aka i estun i nge punong tomo nge ile toko punonga or 20,000 aro i men tel mo ilemi rum senu tel ile punongare, o pavurvur nge punong eve avele.

³² Na aro ve o pavurvur avele, aro i pake ile riong elnga mo i sangpolo nepes

aken rongan i voth melanga naro i nina i ve, ‘Aro them oma neke mo te voth lemi moring?’ ”

³³ Na Jisas i patopalal ile riong na i ri ve, “I venen re aken nge thomu. Aro ve omu e i sis ve aro i velpol ini lek wainlanga aro i mothonglelu ur alavusnga ako ini ile.”

Toko aka i panes senu a Jisas avele i ranga ve ini au aka i mosisen avele.

(Matiu 5:13; Mak 9:50)

³⁴ Na Jisas i ria mun or ve, “Au ini ur sivenga, aveto aro ve imosisennga i vus, i pavurvur aro i mosisen werer ol avele.

³⁵ Au aka imosisennga avele ol, i pavurvur aro i opoal ur e avele. Aro te asespot i.

“Na aro ve toko e i sis ve aro ilemi mire nge lek riong, mo i sivenga aka aro i ta senu itlenga nge lek riong ake.”

15

Riong agelalnga nge sipsip omole aka i penthal.

(Matiu 18:12-14)

¹ Na nge nang omole, tokokoe areko or ini umtun elngare tomo nge areko ole vothung kerenga o es mo o nongpol a Jisas ile riong.

² Aveto Parisire tomo nge pamirealingare nge a Moses ile patorong o ri pom-pom nge a Jisas na o ri ve, “Toko ake i vova ake i nongpoo tokokoe areko ole vothung kerenga ma i an tomo nge or, e?”

³ Lama Jisas i ri riong agelalnga a or nge, ma i ri ve,

⁴ “Aro ve omu e ile sipsip or mule pa mule i voth, na aro ve omole i penthal, aro i oma i va? Aro i mothonglelu tel sipsip or mule pa limpenel pothoi or limpenel a pen lalanga naro i es mo i ortet sipsip omole aka i penthal, i pavurvur aro aro i thopolo i.

⁵ Ma nge aka i thopolo i, na ilemi sivenga rintet na i potuna i.

⁶ Na i lo werer a ile vel. Lamako i leng veliloalo ithangangaere na i ria or ve, ‘Aro lemire sivenga, eneke tho thopolo werer lek sipsip aka i penthal.’

* **15:15:** Judare o pavothal nge kie annga na theal tetalnga, aveto toko aken kene mesipun rintet i, mako i el inga omaing aken.

⁷ Na tho ria thomu, i vene re aka a Pen a Urvet, olemi sivenga rintet nge toko omole aka ikime lelal ile vothung kerenga, na lemi sivengaing aken i aolonga rintet nge lemi sivengaing aka nge toko or mule pa limpenel pothoi or limpenel aka ole vothung i sivenga.

Riong agelalnga nge umtun aka i penthal.

⁸ “Na aro ve seng omole ile umtun or mule i voth na omole i penthal, aro i oma i va? Aro i pasise the lalainga, naro i athe ile vel, naro i the senu senu a pen elonga i pavurvur aro la, i tha i.

⁹ Na nge aka i tha i lale, lamako i leng veliloalo ithangangaere na i ria or ve, ‘Aro lemire sivenga, eneke tho tho werera lek umtun aka i penthal.’

¹⁰ Na tho ria thomu, i vene re aka nge a God ile enselre, aka olemi sivenga rintet nge toko omole e aka ikime lelaltun ile vothung kerenga.”

Riong agelalnga nge wainlanga aka i penthal.

¹¹ Jisas rongan i ri na i ri mun ve, “Toko omole i voth aka itun or aini.

¹² Na itun opisoinga i ria itema ve, ‘Vovo, ong rin rongan, aveto tho sis aka ve, aro wong thomreu lom ur elonga na sungu lek a tho nge.’

¹³ “Na nang pelie i lutetu na itun opisoinga i ela ile ur elonga na i teporal i nge umtun, mako i lo lelpot ole rebo, na i es nge rem melanga. Na nge rem aken i pavus polpol ile umtun nge magoning.

¹⁴ Ma ile umtun i vus lale, ma mesi aolonga i velpoltun rem aken ma i men polpol na ia aning avele.

¹⁵ Mako i es mo i ri ve i velpol ini umonga nge toko omole aka nge rem aken. Na toko aken i pake i mo i paan ile kiere.*

¹⁶ Aveto aning aka o sungu i a i nge i aolonga avele, na mesipun i ma i pavurvur aro aro i an kiere oa aning, aveto toko e avele i sung ur e a i nge.

¹⁷ “Lamako lemi rumong sivenga i velpol werer a i nge, ma i ria isivenga nge ve, ‘Ok vovo ile toko umonga alavusngare

osa pup nge oa aning, na oa aning uluo i ngo, aveto tho voth ake, na toth aro tho rin nge mesipuniong.

¹⁸ Aro tho plosa mo tho lo werer a vovo nge, naro tho ria i ve, "Vovo, tho oma vothung kerenga nge a God tomo nge wong."

¹⁹ Na tho ini toko sivenga avele, ako aro wong apet tho ini tum. Oma lom vothung a tho nge ranga ve ini lom toko umonga."

²⁰ Mako i plosa ma i lo werer a itema nge la.

"Ave rongan i voth melanga nge itema ile vel, na itema i thopol i melanga ma ilemi esal i, ma i thopot a i nge, mako i rekukalo i ma i angongoalo i.

²¹ "Na itun i ria i ve, 'Vovo, tho oma vothung kerenga nge a God tomo nge wong. Na tho ini toko sivenga avele, ako aro wong apet tho ini tum.'

²² "Aveto itema i ria ile umongare ve, 'Paviri, ela tekruk seltunnga sivenga rintetnga mo seltuna i nge. Na pateunu paspas a imeni. Na pateunu i nge esonga a ieve.

²³ Na ela bulmakau tun sivenga rintetnga mo pun rin i. Naro lemir sivenga nge aning aolonga.

²⁴ Eneke tuk ake i ranga ve i rin lale, aveto i mimi werer, na i penthal, aveto i lo werer.' Mako o patea ol nge aning.

²⁵ "Na itun apamukong i oma a ometa lemi. Na nge ile lo wererong i es totho a vel ma i nongpol voing na sesing.

²⁶ Mako i lenga toko umonga omole ma i nina i ve, 'O oma neke?'

²⁷ Na i olal ile ninong ve, 'Teum i lo werer, na tomom i pun rin bulmakau tun sivenga rintetnga omole, eneke teum i lo werer senu inga.'

²⁸ "Na itun apamukong ilemi kling ma i mothong esoong a vel lemi. Na itema i espot a i nge ma i ri riong mosnga a i nge, mo aro i eso a vel lemi.

²⁹ Aveto i ri werer a itema nge ve, 'Thopol, nge tovu po pulua tho um a wong nge ranga ve ini toko umonga, na tho nong sirik lom riong e avele. Aveto wong sung meme tun e a tho nge avele, mo aro tho oma aning tomo nge thengengekre.'

³⁰ Aveto tum kerenga ake i pavus lom ur elonga tomo nge seng sovengalo angare. Na nge ile lo wererong wong pun rin bulmakau tun sivenga rintetnga nge i.'

³¹ "Na itema i olal ile riong ve, 'Tuk, nge nang elonga wong voth a tho nge na ur alavusnga ako ini lek ini lom.

³² Aveto i sivenga ako aro te oma aning aolonga mo lemir sivenga, eneke teum posnga i ranga ve aka i rin lale, aveto i mimi werer, na i penthal, aveto i lo werer.'

16

Riong agelalnga nge vel ololonga thealnga le apaltetonga aka i theal senu nge ile menong.

¹ Na Jisas i ria ile wainlangaere ve, "Na vel ololonga tokoninga omole e aka i voth na ile toko umonga i theal tetal ile vel ololonga aken. Na tokokoere o ri ve ine vel ololonga theal tetalnga i kem vel aken tokoninga ile umtu."

² Mako i leng i ma i ria i ve, 'Ole riong i nunganga aka wong kem? Sung lom erere aka i ritet tho nge lom omaing. Eneke i pavurvur aro wong theal tetal ol lek vel ololonga aken avele.'

³ "Na toko umonga aken i ria isivenga nge ve, 'Aro tho oma ol va? Eneke lek mukalinga aro i eltetpot tho, nge lek omaing. Na lek engenging i pavurvur nge ulue tonga avele, na lek mara nge ur pelie nonga.'

⁴ Lemik mire ol nge ur aka aro tho oma i mo aro tokokoere o nongpoo tho a ole vel, tova tho vus nge omaing.'

⁵ "Mako i leng toko omole omole aka oa thangaroong i voth a ile mukalinga nge. Na i nina toko aka i velpol tel ve, 'Om thangaroong or pova i voth a lek mukalinga nge?'

⁶ "Na i olal ile ninong ve, 'Wel imei aolonga or mule pa mule.'

"Ma i ria i ve, 'Ake ini erere aka om thangaroong i voth nge, na menu mo ong wat or mule pa lim viri viri.'

⁷ "Lama i nina toko aininga ve, 'Na wong, om thangaroong or pova?'

“Na i olal ile ninong ve, ‘Ok wit a alal or 1,000.’

“Ma i ria i ve, ‘Ela lom erere ake na pakriku ol i nge 800.’

⁸ “Na ile mukalinga i risea ile theal tetalonga ako ini le apaltetonga, eneke i oma omaing ako i paesa ile mukalinga iion roro tomo nge ako aro i theal senu ile menong panen.” Na Jisas i ria or ve, “Tokokoe areko o panes vothung ulue anga, olemi mire senu nge sovengalo aka aro o sung umtun a tokokoere nge mo o velpol ini othanga, aveto tokokoe areko o panes vothung aka ini a God ile, olemi mire nge vothung aken avele.

⁹ Na tho ria thomu, thomu o opoal tokokoere nge lomu ur ulue anga mo o elo a Toko Pomnga a ole mimiong, mo aro o velpol ini thongomu, naro panen tova lomu ur elonga i vus, God aro i nongpoo thomu nge rem aka mimiong i voth nge naro ile vusonga avele.

¹⁰ “Na toko aka i theal senu ur posalnga, aro i theal senu mun ur aka i pulua. Na toko aka i theal senu ur posalnga avele, aro i theal senu ur aka i pulua avele.

¹¹ Na aro ve thomu o theal senu ur ulue anga avele, aro thomu o pavurvur avele mun nge a God ile ur sivesivenga ithealtetalnga.

¹² Na aro ve thomu o theal senu toko relnga ile ur elonga avele, aro toko e aro i sung ur e mo ini lomu, kene avele.

¹³ “Toko umonga omole i pavurvur aro i velpol ini toko or aini ole umonga, kene avele, eneke aro ia sagu omole, naro ini silal aininga, eve aro ini silal omole, naro ia sagu aininga. Thomu o pavurvur aro o velpol ini a God ile umonga na tomo mun nge umtun ile umonga, kene avele.”

¹⁴ Na Parisire o nongpol a Jisas ile riong aken, na o ri sililal i, eneke oa sagu rintet umtun elnga.

¹⁵ Na Jisas i ria or ve, “Thomu ini tokokoe areko o oma thomu ve thomu ini toko vengvenga a tokokoere otheki, aveto God ilemi mire nge lomumu aka i vengveng avele. Eneke ur aka i pomnga rintet a tokokoere otheki, ur aken kene God ini silal rintet i.”

God ile patorong nge ile menong e nepes i sivenga nge a Moses ile patorong.

(Matiu 5:8; 11:12-13; Mak 10:11-12)

¹⁶ Na Jisas i ria or ve, “Moses ile patorong tomo nge a God ile riong elngare ole wating a erere nge, kene tokokoere o patorial or nge ma i mulal nge a Jon aka ini toko paninuonga ile velpoling. Aveto Panongpolong Sivenga aka nge a God ile menong e nepes, i patea ol nge a Jon ile velpoling na i es ol la. Na toko alavusnga olo vurtun inga nge esoong nge.

¹⁷ Aveto Moses ile patorong rongan i sivenga. Ulue na sepsa aro i penthal, aveto wating epee tie nge a Moses ile patorong aro i penthal avele.

¹⁸ “Ranga ve nge patorong ake. Toko e aka i mothongpot iewo sengenga na i peange werer mun nge seng relnga e, aken i aom seng. Na toko e aka i peange nge seng aka iewo teltelnga i mothongpot i, aken i aom mun seng.”

Riong agelalnga nge a Lasarus tomo nge toko le urnga.

¹⁹ Na Jisas i ri vene, “Toko le urnga e aka i voth. Na nge nang elonga i malmal nge teunong sivesivengare, na i an aning sivesivengare evelelnga.

²⁰ Na aka ru a ile vel thekia, toko ni akolikloknga aka iion a Lasarus, i men na ile ur e avele.

²¹ Na i men mo i an toko le urnga ia aning epipeere aka i matmatpot a ia aning le ngoinga thewo. Na nanaure o es me ma o aromal ini akoliklokre.

²² “Lamako toko aka ile ur e avele i rin na God ile enselre o ela i a Pen a Urvet la, na o pamenu i a Abraham ilo sei. Na toko le urnga aken i rin mun ma o tetun i.

²³ Ma i eso a toko kerengare ole pen ma i el sisong aolonga nge. Na i thea la, ma i thopol a Abraham aka i voth melanga na Lasarus i men a ilo sei.

²⁴ Ma i lenga a i nge ve, ‘Vovo Abraham, lomum esal tho, na pake a Lasarus mo i paesu imeni pupo a thei lemi, mo aro i pameriru lek muma, eneke tho voth nge sisong aolonga ake ru a won sesenga lemi.’

²⁵ “Aveto Abraham i olal ile riong ve, ‘Tuk, aro lomum rum werer nge lom

mimiong ako nomenga ako wong el ur sivesivengare, na Lasarus i el ur kerek-erengare, aveto ponange ol i voth ol nge lemi sivengaing, na wong, wong voth ol nge sisisong.

²⁶ Na e mun e ako ruprup lukulukunga i voth a ar wop lale, na areko o sis ve aro o plosa ake ru a them nge mo o es a thomu nge wot, aro o pavurvur avele, na omu e i pavurvur avele aro i es kora ol a them nge me.’

²⁷ “Na toko le urnga i olal ile riong ve, ‘I vene re aken, na tho nong engeng a wong nge Vovo Abraham, pake a Lasarus a ok vovo ile pen la.

²⁸ Eneke teik or lim aken ru o voth. Na Lasarus aro i es mo i panakal ole nge ve, o mothong tova o es nge rem ake ru sisisong i voth nge.’

²⁹ “Na Abraham i ria i ve, ‘God ile riong elngare tomo nge a Moses, ole riong i ngo lale, na i sivenga aka aro titeumre o nongal ole riong.’

³⁰ “Na toko le urnga i olal ile riong ve, ‘Aken i pavurvur avele, Vovo Abraham, aveto aro ve toko e aka i los werera nge rinong naro i es a or nge, aken aro o lel okime nge ole vothung kerenga.’

³¹ “Aveto Abraham i ria i ve, ‘Aro ve o nongal a God ile riong elngare tomo nge a Moses, ole riong avele, i pavurvur mun avele aka aro o nongal toko aka i los werera nge rinong, ile riong mun.’”

17

God aro i paomelal areko o oma vothung kerenga.

(Matiu 18:6-7, 21-22; Mak 9:42)

¹ Na Jisas i ria ile wainlangaere ve, “Ur puluanga aka aro i velpol mo i pamatu tokokoere nge vothung kerenga omanga. Aveto patong toko aka i pavelpol ur areken, aro matheong aolonga aro i el i.

² Na aro ve toko aken i toth aka aro i paleklek toko aka ile lemioong i motu rongan, i sivenga inga nge i tova ve tokokoere o kino anral aolonga a ikei na o asesu i a thev lemi, mo i vlu, moro aken i paleklek or avele, naro God i sung paomelaling aolonga a i nge avele.

³ Na thomu o naktet sivengomu!

“Na aro ve teum e i oma vothung kerenga, aro wong vol i nge ile vothung aken, na aro ve i pamilem ile vothung aken, aro lomum simikal ile vothung kerenga aken.

⁴ Na aro ve i oma vothung kerenga a wong nge pa or limai nge nang omole, na pa or limai i es a wong nge na ilemi kerere na i ri mosing a wong nge, aken aro lomum simikal ile vothung aken.”

Lemioong aka i posngati na i panes a God ilemi, i pavurvur nge omaing aolonga.

⁵ Na Jisas ile pakekere o ria Toko Pomnga ve, “Aro wong oma lemem lemioong mo i aolonga.”

⁶ Na Toko Pomnga i ria or ve, “Aro ve lomu lemioong i posnga ranga ve ini won monnga aka i posnga rintet aka iion a ‘Mastet’, aken thomu o pavurvur aka aro o ria vero ve, ‘Lelrisa sivengom alariripia mola o sivengom a thev.’ Naro won aken aro i panes inga aka ini lomu riong.”

Jisas i ri nge toko umongare ole vothung.

⁷ Na Jisas i ria tokokoere ve, “Aro ve omu e ile toko umonga aka i oma a ometa eve i theal sipsipre, na aro ve toko umonga aken i lo werer a lom vel, aro wong ria i ve, ‘Paviri me, mo ong an?’

⁸ Avele, aro ong ria i ve, ‘Aro ong monsi ok aning na ong nea om teunong sivenga na theal tetal tho, tova tho an na tho thin, lamo wong an ol na wong thin ol.’

⁹ Na toko umonga i nongal inga ile mukalinga ikei, aveto ile mukalinga i ri sivengaing a i nge avele, na aka ini ole vothung vet aken.

¹⁰ Na i venen re aken nge thomu, tova ve thomu o oma ur alavusnga aka tho ria thomu nge, aro thomu o ri ve, ‘Them ini toko umonga inga na them oma inga ur areko ong ria them nge.’”

Jisas i pamimi toko or mule pa omole aka putput i el or.

¹¹ Na Jisas i es nge sovengalo aka i es a Jerusalem, nge sovengalo aka i thopot a Samaria na Galili oa wop.

¹² Na i es totho nge rem omole na toko or mule pa omole aka putput i voth a or nge,

o es na o thopol total a Jisas na o mit mela nge i.

¹³ Na o pres a i ve, "Jisas, Toko Pomnga lomum esal them."

¹⁴ Na Jisas i thopol or ma i ria or ve, "Thomu o es a prisre nge mo o pathengal numu peti a or nge, mo aro o panunganga riong nge thomu ve, 'Putput i vus.' " Ma o es. Na rongan o voth a sovengalo lopat na oni peti i sivenga werer na o riri werer a God itheki.

¹⁵ Na oa omole ako a or nge i thopol ako ini peti i sivenga werer, mako i lo werer a Jisas nge, na a sovengalo i pres viringa na i risea a God iion roro.

¹⁶ Na toko aken i lo werer a Jisas nge ma i ulu isivenga a ulue a Jisas ieve tepun na i ri sivengaing a i nge. Na toko aken ini toko Samaria anga.

¹⁷ Na Jisas i thopol toko aken, ma i ria ve, "Toko or mule ako o sivenga werer, na thongom or limpenel kala?

¹⁸ I vava ake toko rem relnga inga ake i lo werer a tho nge me, ma i ri sivengaing a God nge, e?"

¹⁹ Mako Jisas i ria toko aken ve, "Mita mo wong es. Lom lemioong inga ako i pasenu wong."

Tokokoere aro o mostun inga nge ur elonga omanga i pavurvur nge nang ako aro Toko Pomnga Itun aro i velpol nge.

(Matiu 24:37-39)

²⁰ Na Parisi pelie o nin a Jisas ve, "God ile menong e nepes aro i velpol penva?" Ma Jisas i olal werer Parisire ole ninong ve, "God ile menong e nepes, ile velpoling i pavurvur aro te thopol ur pelie ako i paateal ile pateaing, kene avele.

²¹ Na toko e avele aro i ria nge ve, "Thopol i, i voth ake, eve i voth ako la." Nongpol i, God ile menong e nepes, i voth a thomu nge lale."

²² Na i ria ile wainlangaere nge ve, "Matheong aolonga aro i velpoltun thomu, ma i oma thomu mo o sis rintet ve aro thomu o thopol inga Toko Pomnga Itun ile nang omole aken, aveto thomu o pavurvur aro aro thomu o thopol i tova i es me, kene avele.

²³ Naro tokokoere o ria thomu ve, 'Toko Pomnga Itun i lo werer lale, thopol i, i aka la, eve i ke me.' Aveto thomu o mothong tova o espot mo o panes or.

²⁴ Eneke nang aka aro Toko Pomnga Itun aro i velpol nge, aro i velpol ranga ve ini pen lemnga aka i kit ma i lala a sepsa elonga, ma toko alavusnga aro o thopol i.

²⁵ Aveto aro a mukaling nge nang aken, Toko Pomnga Itun aro i el matheong pulanga naro tokokoe areko o mimi nge wop lemi ake aro o lel okime nge i.

²⁶ "Na nomenga nge wop lemi aka Noa i mimi nge, tokokoere olemi tuntun inga ole omaingre na olemi simikal a God, naro i vene mun re aken nge a Toko Pomnga Itun ile nang.

²⁷ Na nge wop lemi aken toko na sengre o anan na o thinin na o peange, i mul nge nang aka Noa i eso a imot lemi nge, mako thei awonga aolonga i velpol ma i pavusu or alavusnga.

²⁸ "Na i vene mun nomenga nge wop lemi aka Lot i mimi nge, tokokoere o mosal inga aning na thinong, na o olol pel ole lulu na o o aningre na o ari velre,

²⁹ makola i pavurvur nge nang aka Lot i lospot a Sodom, na a ur e avele nako won sesenga na uk aka ini misep anga i matmatpot a sepsa lemimi me ma i pavusu or alavusnga.

³⁰ "Naro i vene mun re aken nge Toko Pomnga Itun ile nang, aro o oma ole omaingre i mul nge nang aka Toko Pomnga Itun aro i velpol a pen lalanga.

³¹ Naro nge nang aken, toko aka i thau i a ile vel polemi aka i thatha,* i mothong tova ilemi rum werer ile ur elonga aka i voth a ile vel lemi. Naro i vene mun nge toko aka i voth a ometa, i mothong tova i es werer a ile vel nge la, i sivenga aka aro ilemi simikal ur ulue anga na i panes inga Toko Pomnga Itun.

³² Naro lomumu rum werer nge ur aka i velpol a Lot iewo sengenga nge. Nge aka ilemi rum werer nge ile menong nomen-ganga ma i the singal werer, mako i rin.[†]

³³ Na aro ve toko i krim engeng isivenga ile mimiong, aken aro ile mimiong aken

* **17:31:** O thepol vel polemi ia sei nge pes 121. † **17:32:** Tenesing ake i voth a Stat 19:26.

aro i penthal. Aveto toko aka i mothong isivenga ile mimiong panesnga, aro i el mimiong aka aro ile vusonga avele.

³⁴ Na tho ria thomu ve, ‘Nge pemliknga aka Toko Pomnga Itun i velpol nge, na toko or aini aka o ngo nge ring omole, aro God i elteta omole na omole aro i ngo reletun.

³⁵ Na seng or aini aka o omlotun oa aning omanga, naro God i elteta omole na omole aro i voth reletun.

³⁶ [Na toko or aini aka o um a ometa, aro God i elteta omole na omole aro i voth reletun.][‡]

³⁷ Na ile wainlangaaere o nina i ve, “Toko Pomnga, ur areken aro i velpol a kala?”

Na Jisas i olal ole ninong nge riong agelalnga ve, “Nge wop aka aning i ngo nge kene visore o rer kalalualtun i.”[‡]

18

Riong agelalnga nge sang basu na riong nongpolnga kerenga.

¹ Mako Jisas i ripot riong agelalnga a ile wainlangaaere nge, mo aro i patoral or nge ve aro o nong evelelnga na o mothong tova oleli i ngo pelekpol nge ole nongong.

² Ma i ria ve, “Nge rem pomnga e aka, riong nongpolnga e aka i voth, ma i papomnga a God avele, na i pavothal mun tokokoere avele.

³ Na seng basu mun e aka i voth mun nge rem pomnga aken, opisleonga i es la ma i tangos nge riong nongpolnga aken, ve aro i opoal i nge tokokoe areko o teltun ia.

⁴ “Ma nge nang elonga riong nongpolnga aken i oma vet ur e avele nge ile nonging aken, aveto nge nang e aka i ria isivenga ve, ‘I nunganga aka ve, tho papomnga a God avele, na tho pavothal mun tokokoere avele.

⁵ Aveto seng basu aken i sung matheong puluanga a tho nge. Naro i sivenga aka aro tho opoal i nge ia teltunong aken. Aro vene mo evelelnga aro i esu esa me, mo i oma tho mo i pamolosal tho.’”

[‡] **17:37:** Epee ake i mirenga ve, Tokokoere oleli mire aka visore oa aning i voth, tova ve o thopol visore o rer kalalualtun wop aken, aken ini ole paatealinga. Ranga ve mun i aka aro tokokoere aro oleli mire nge wop aka Toko Pomnga Itun aro i velpol nge, eneke or alavusnga aro o thopol paatealinga nge Toko Pomnga Itun ile velpoling.

⁶ Na Toko Pomnga i ria mun ve, “Aro thomu o nongpol inga riong nongpolnga kerenga ile riong.

⁷ Na God i ranga ve ini riong nongpolnga kerenga aken avele! Aro ve ile tokokoere o avav i nge nang na mlik aro i opoal or, naro i opoal or viri viri.

⁸ Aveto nge nang aka Toko Pomnga Itun i lo werer nge, i sis aka aro i thopol toko na seng areko olelio a i nge, kene rongan o mit engeng nge nongong.”

Riong agelalnga nge toko aka ini Parisi na toko aka ini takis elnga

⁹ Na Jisas i sung riong agelalnga nge toko pelie aka oleli ve, or ini toko vengvenga na o paruru toko alavusngare.

¹⁰ Na i ria ve, “Toko or aini aka o es a Lotu Tepun a Vel mo o nong, oa omole ini Parisi na omole ini takis elnga.

¹¹ Na Parisi aken i mita ma i nong nge isivenga ve, ‘God, tho ri sivengaing a wong nge, aka tho sung ses avele, na tho avsa patorong e avele, na tho aom seng mun avele ranga ve ini tokokoere. Na tho ri sivengaing a wong nge aka tho ranga ve ini takis elnga ake avele.

¹² Na tho sem nge nang or aini nge wikk omole omole. Na nge ur elonga aka tho el i, tho panes a Moses ile patorong, mako tho omreuu i mo epee or mule na tho sung epee omole a wong nge.’

¹³ “Aveto toko aka ini takis elnga i mit gat na ini plong ve aro i thea roro a Pen a Urvet na ilemi kerere nge ile vothung kerenga, mako i so ipakei ma i ria ve, ‘God, tho ini toko aka lek vothung kerenga, aro lomum esal tho.’”

¹⁴ Ma Jisas i ria or ve, “Tho ria thomu, takis elnga aken aka i lo werer a ile pen, iengga inga aka i riri a God itheki, na Parisi aken aro avele. Eneke areko o papomnga osivenga, aro God i paruru or, na areko o paruru osivenga, aro God i papomnga or.”

Jisas i ronga imeni a wainlanga tutunre nge.

(Matiu 19:13-15; Mak 10:13-16)

¹⁵ Na ine tokokoe pelie ako o mane povothvothre a Jisas nge mo i ronga imeni a or nge. Aveto Jisas ile wainlangaere o thepol or ma o vol or.

¹⁶ Aveto Jisas i leng wainlanga tutunre a i nge me, na i ria ile wainlangaere ve, "Somu wom wainlanga tutunre mo o es a tho nge me, na o mothong tova o mit roal or, eneke tokokoe areko ole mio a tho nge, ranga ve ini wainlanga tutun areke ole mio a tho nge, or kene o vot h a God ile menong e nepes lemi.

¹⁷ Na tho ri nunganga a thomu nge, na aro ve toko aken i el inga a God ile menong e nepes ranga ve ini wain aka i ela itema ile sungong, ma ilemi pelekpol nge avele, aken aro i pavurvur aka aro i eso a God ile menong e nepes, aveto aro ve i el i ranga ve ini wain aken avele, aro i eso nge avele."

Jisas i ri tomo nge mukalinga aka ile ur elonga i pom.

(Matiu 19:16-29; Mak 10:17-30)

¹⁸ Na Juda a mukalinga e aka i nin a Jisas ve, "Pamirealinga sivenga, aro tho oma neke aka aro tho el mimiong aka aro ile vusonga avele, e?"

¹⁹ Ma Jisas i ria i ve, "Lomum rum senu tel nge lom riong mirenga aka wong apet tho ve tho ini toko sivenga, eneke toko e avele aka i sivenga, ini inga a God iengga inga aka i sivenga.

²⁰ Na lomum mire nge patorong alavusnga lale, aka ve: Thomu peangere o mothong tova o ngo tomo nge areko or ini ewomu avele. Na o mothong tova o so rin polpol toko. Na o mothong tova o kem. Na thomu o mothong tova lomu apaltet tova ve toko e i mit nge riong. Naro o papomnga titomomuere na ninomuere, naro o panes inga ole riong." *

²¹ Ma mukalinga i olal ile riong ve, "I patea nge lek kulpoaing ma i pavurvur ponange, tho panes patorong alavusnga aken."

²² Ma Jisas i nongpol i veno aka, ma i ria i ve, "Aveto ur omole aka kene ong oror nge, aro ong teporal lom ur alavusnga nge

umtun na sungu i a toko le ur avelengare nge, na aro ve ong oma i venen aken, aro lom ur elonga pom, aka a Pen a Urvet lemi. Lamo ong es me mo ong panes tho."

²³ Aveto toko aken i nongpol riong aken ma ilemi kerere rintet, eneke ini toko aken ile ur elonga i pom rintet.

²⁴ Ma Jisas i thepol i aken toko aken ilemi kerere rintet, mako i ria ve, "I klip rintet nge toko le urngare aka aro o eso a God ile menong e nepes.

²⁵ Na i klip nge mekerem aolonga aken i Kamel aken aro i koro a italonga tiona nge, aveto i klip rintet nge toko le urnga aken aro i eso a God ile menong e nepes."

²⁶ Ma tokokoere o nongpol riong aken ma o ri ve, "Na aro ve i vene aken, anga ol i pavurvur aka aro i el mimiong aka aro ile vusonga avele, e?" †

²⁷ Ma Jisas i olal ole riong ve, "Ur aken tokokoere o pavurvur nge omanga avele, aken aro God i oma i."

²⁸ Ma Pita i ria ve, "Them mothonglel lemlem ur alavusnga a rebo lale, na them panes wong."

²⁹ Ma Jisas i ria or ve, "I nunganga, toko aken i mothonglel ile vel, eve iewo sengenga, eve ititeinre, eve ilengare na itutunre mo aro i opoal tokokoere mo ole mio nge a God ile menong e nepes,

³⁰ aken aro i el ur puluanga nge mimiong ake ponange i vot h nge, naro panen i el mun mimiong aka aro ile vusonga avele."

Jisas i ritet mun pa menga nge ile rinong.

(Matiu 20:17-19; Mak 10:32-34)

³¹ Ma Jisas i wol lelpot ile wainlanga or mule pa omole pothoi or aini aken ma i ria or ve, "O nongpol! Aro te esa a Jerusalem na ur alavusnga aka nomenga God ile riong elngare o wat i ma o ri nge a Toko Pomnga Itun, aro i velpol nunganga.

³² Aro o sungu i a tokokoe areko or ini Judare avele omeni, mo aro o ri sililal i, naro o oma riong kerenga puluanga nge i, na o osuklel i.

³³ Naro o so litlit i, naro o so rin i, aveto nang or me aro i vus, naro i mimi werera mun."

* **18:20:** Kisim Bek 20:12-16 † **18:26:** Na o kukuk nge a Jisas ile riong aken, eneke o rivenga God i oma senu nge toko mo i velpol ini toko le urnga.

³⁴ Aveto ile wainlangare olemi mire nge riong areken mirenga avele. Ine riong areken mirengare God i pango kine i nge or, ma olemi mire nge ur areko Jisas i ria or nge avele.

Jisas i pasenu werer toko omole ako itheki pros ma i the werer.

(Matiu 20:29-34; Mak 10:46-52)

³⁵ Na Jisas i es ma i toth a rem pomnga a Jeriko, ma toko omole ako itheki pros i men a sovengalo wo peti na i nong ur elonga nge tokokoe areko o esu esa nge sovengalo aken.

³⁶ Ma i nongpol pulua aolonga ako o es me ma i nina or ve, “Thomu o oma ur nekenga ake?”

³⁷ Ma o ria i ve, “Jisas ako ini Nasaret anga i ake ru i es me.”

³⁸ Ma toko theki prosnga aken i lenga ve, “Jisas ako ini a Devit itevinga, aro lomum esal tho.”

³⁹ Ma tokokoe areko o mukal a Jisas ile, na o es toth a i nge, o vol i ma o ria i ve, “Wong poreng!” Aveto i lenga viringa rintet mun ve, “Ina Devit itevinga, aro lomum esal tho.”

⁴⁰ Mako Jisas i mitu ma i ria ve, aro o pasong toko aken a i nge me. Na toko aken i es totho inga ma Jisas i nina i ve,

⁴¹ “Wong sis nekenga ako aro tho oma i a wong nge, e?”

Na i olal ile riong ve, “Toko Pomnga, tho sis ve aro thekik i vles werer.”

⁴² Mako Jisas i ria i ve, “Wong the werer, lom lemioong inga i pasenu wong.”

⁴³ A ur e avele, nako i the werer, mako i panes ol a Jisas ma i risea a God. Ma tokokoere o thopol ur aken i velpol venen aken, mako o risea mun a God.

19

Jisas i es a Sakius ile vel.

¹ Ma Jisas i eso a Jeriko ma i sis ve aro i alpo selele.

² Ma toko omole i voth nge rem aken iion a Sakius, ini mukalinga nge takis elngare na ini toko le urnga.

³ Na i sis aka ve, i thepol a Jisas aka i ate vava, aveto ini toko orornga na pulua o pasipsopal a Jisas ma i pavurvur aro i thepol i avele.

⁴ Mako i lo lelpot pulua aolonga aken, ma i tho a mukaling ma i roa nge pupos mo aro i thepol a Jisas aka aro i es rum nge sovengalo aken me.

⁵ Ma Jisas i es me ma i es vengtunpot wop aken, na i thea roro ma i thopol a Sakius, ma i ria i ve, “Sakius, wong ru me viri viri, eneke ponange aro tho voth tomo nge wong a lom vel.”

⁶ Mako i ru me viri viri ma i vual nge lemi sivengaing ma i wol ol i a ile vel la.

⁷ Ma tokokoere o thepol ur aken ma o ri pompom nge. Ma o ri ve, “Toko aken i es long, ma i eso a toko aken i oma vothung kerenga ile vel.”

⁸ Ma o voth ol a vel lemi ma Sakius i mita ma i ria Toko Pomnga ve, “Wong nongpol Toko Pomnga, aro tho thomreu lek ur elonga mo theki or ainiu, naro tho sungu epee nge toko le ur avelengare. Na nomenga lek apaltetpot toko pelie ma tho kem ole umtun naro tho olal werer ol i a or nge pa or penel.”

⁹ Ma Jisas i ria or ve, “Ponange God ilemi simikal toko na sengre nge vel ake ole vothung kerenga lale. Na tho es a toko ake ile vel, eneke toko mun ake ini a Abraham itevinga nunganga.”

¹⁰ Na Toko Pomnga Itun i es me aken i or tokokoe areko o penthal mo i el werer or.”

Riong agelalnga nge toko umonga or mule pa omole aka o el umtun.

(Matiu 25:14-30)

¹¹ Ma toko na seng o ta otelnga nge riong areken. Na Jisas i toth ol aro i velpol ol a Jerusalem, na o rivenga God ile menong e nepes i toth aken i velpol. Mako Jisas i ria mun riong agelalnga a or nge.

¹² Ma i ri ve, “Ine toko pomnga omole e aken i es nge rem gatnga mo ia pomnga i papompom i mo i velpol ini nepes. Lamo i lo werer mun a ile rem tepun mo i theal ol ile tokokoere.”

* ^{19:13:} Umtun gol ake i pavurvur nge toko omole iolonga nge ngov or me eve nge nang or mule pa mule.

¹³ Na toth ol ako aro i es, ma i lenga ile toko umonga or mule pa omole ma i sung umtun gol* omole omole a or nge. Na i ria a or nge ve, ‘Aro thomu o um nge umtun ake mo o pavelpol umtun nge mo i pavurvur nge nang ako aro tho velpol werer nge.’

¹⁴ Aveto ile pen lemiare oni silal i, mako o pake riong elnga pelie ma o tho rum i a ikime ma o ria oa pomnga ve, ‘Nimem plong toko aken ve aro ini lemem nepes.’

¹⁵ Ma i papompom i mo ini nepes. Lamako i lo werer. Ma ikei song ol ile umonga areton ru i sungu umtun a or nge nomenga, ve aro o es a i nge me. Eneke i sis ve aro i thepol umtun or pova ako o el i lale nge umtun ake i sungu i a or nge ma o um nge.

¹⁶ Ma toko omole ake i mukal tel me ma i ri ve, ‘Toko Pomnga lom umtun aton ong sungu i a tho nge, tho um nge ma i pavelpol ol umtun gol or mule mun a we.’

¹⁷ Ma nepes aken i ria i ve, ‘Wong ini umonga sivenga! Wong theal senu umtun atiken, make ponange aro tho papomnga ol ong, mo wong theal rem pomnga or mule.’

¹⁸ Lama toko aininga i es me ma i ri ve, ‘Toko Pomnga lom umtun aton wong sungu i a tho nge, ma tho um nge ma i pavelpol ol umtun gol or lim mun a we.’

¹⁹ Ma nepes aken i ria i ve, ‘Aro wong theal rem pomnga or lim.’

²⁰ Lama toko mun e ake i es mun me ma i ri ve, ‘Toko Pomnga, lom umtun aton ru wong sungu i a tho nge, i ke. Tho soala i ma tho paen kine senu senu i.’

²¹ Na tho oma venen aken, eneke tho ngeip nge wong, eneke wong ini toko ake lomum esal avele. Na wong el ur areko wong o i avele.’

²² Ma i ria i ve, ‘Wong ini umonga kerenga. Na lom riong ake wong ri kene aro tho paomelal wong nge! Na lomum mire nge ake tho ini toko ake lemik esal avele, na tho el ur ake ini lek avele, na tho lel ur ake tho o i avele.’

²³ Maken i vava ake wong paeno lek umtun aken a umtun a vel nge avele, e? Aro ve ong paeno i nge, na aro ve tho lo

werer, aro tho el tomo i nge umtun pelie ake aro o rong esa i nge.’

²⁴ Ma i ria tokokoe areko o mit toth ve, ‘Thomu o elteta umtun aken a i nge, mo o sungu i nge toko umonga ake ile umtun or mule.’

²⁵ Aveto o ria i ve, ‘Toko Pomnga, toko aken ile umtun pom lale.’

²⁶ Ma nepes aken i ria or ve, ‘I nunganga, tokokoe areko o el ur pelie lale, aro God i sungu mun ur puluanga a or nge. Na tokokoe areko ole ur posalnga, ur areken aro God i elteta i a or nge.

²⁷ Na tokokoe areton ru ini lek ngarangre ake oni plong ve aro tho velpol ini ole nepes. Aro thomu o wol or me mo o pun rin or ake ru a thekik.’ ”

Jisas i velpol a Jerusalem na i pamireal toko na sengre ako a Lotuonga Tepun a Vel a lok lemi

(Vonge 19:28-21:37)

*Jisas i eso a Jerusalem ranga ve ini
nepes.*

(Matiu 21:1-9; Mak 11:1-10; Jon 12:12-15)

²⁸ Ma Jisas i ri nge riong agelalnga areken ma i vus, lamako i plosa mun ma i mukal mun ole a Jerusalem la.

²⁹ Ma i es ma i toth ol a Betpage na Betani, nge tete ake o apet i ini a Oliv, ma i pake ile wainlanga or aini mo o mukal tel.

³⁰ Ma i ria or paini ve, “Aro thomu paini o es nge rem ake la na thomu o eso inga naro thomu paini o thepol donki aponga omole ake o pating i ma i mit na toko e i ro rum nge rongan. Aro thomu paini o inospot i mo o ti i ake me.”

³¹ Na aro ve toko e i nin a thomu paini ve, ‘I vava ake thomu paini o inospot i, e?’ Aro thomu paini o ria i ve, ‘Ar Pomnga ile omaing i voth nge.’ ”

³² Ma Jisas i pake or paini ma o es ma ur alavusnga ake o thepol i, i velpol ranga ve ake Jisas i ria or paini nge.

³³ Ma or paini o inosos donki aponga aken patinga na itokoningare o nina or ve, “I vava ake thomu o inos donki aken, e?”

³⁴ Ma o olal ole riong ve, “Ar Pomnga ile omaing i voth nge.”

³⁵ Mako o pasong donki aponga aken a Jisas nge la. Ma o ela ole teunongre ma o vlesa i a donki iwe. Ma o opoal a Jisas nge iparonga a donki aken nge.

³⁶ Ma i eses na tokokoere o ela oa teunong ma o vlesu i a sovengalo.

³⁷ Na Jisas i es totho a Jerusalem ma i ruru a tete a Oliv ma ile wainlangaere puluanga o patea lemi sivengaing na o onnga na o risea a God nge pathepolong alavusnga ako o thopol i.

³⁸ Ma o ri ve,

“Sapase nepes ake i es nge Toko Pomnga iion me!” *Buk Song 118:26*

“Te risea a God iion roro nge
ile omaing sivenga a it nge,
na nge men senuong aka i sungu
i a it nge.” *Aisaia 56:7*

³⁹ Lamako Parisi pelie aka a or nge o ria Jisas ve, “Pamirealinga, vol lom wainlangaere mo o poreng, o mothong tova o ri vene aken.”

⁴⁰ Ma Jisas i olal ole riong ve, “Tho ria thomu, aro ve o poreng, aro anralre osivenga aro o onnaga.”

Jisas i ritet nge a Jerusalem ile kerenggaing panen.

⁴¹ Na Jisas i es totho a Jerusalem ma i thopol i ma ilemi esal tokokoe areko o voth nge ma i tang ol nge or.

⁴² Ma i ria ve, “Tho sis ve aro thomu mun lomumu mire nge aka tho pavurvur aro tho pamensenu thomu! Aveto ponange i ngo kine na thomu o pavurvur aka aro o thopol i avele.

⁴³ Nang e aka aro i es me aka aro lomu ngarangre aro o re pen nge thomu, mo aro o mit riroala thomu, naro o avalalo thomu.

⁴⁴ Naro o pakerenga selele thomu alavusnga aka o voth a Jerusalem a lok lemi, naro o teu lok, naro o nangseal anral e avele aka aro i ngo a anral relnga e iwe. Na Jerusalem aro ong vus selele, eneke ong ate nang e aka aro God i es me mo i el werer ong nge, kene avele.”

Jisas i wistetpot areko o tepopal pel nge ole lulu a Lotu Tepun a Vel a lok lemi.

(Matiu 21:12-16; Mak 11:15-18; Jon 2:13-16)

⁴⁵ Na Jisas i eso a Lotu Tepun a Vel a lok lemi na i patea nge areko o tepopal pel nge ole lulu owistetpotnga.

⁴⁶ Ma i ria or ve, “Nge a God ile erere i ri vene:

‘Lek Lotuonga a Vel aro ini nongonga a vel.’ *Aisaia 56:7*

Aveto thomu oma i ranga ve ini toko kemongare ole pen.”

⁴⁷ Na nge nang elonga Jisas i patoral toko na seng a Lotu Tepun a Vel a lok lemi. Na pris kimangare tomo e pamirealingare nge a Moses ile patorong tomo e toko na sengre ole mukalingare, o sis aka ve, o pun rin a Jisas.

⁴⁸ Aveto o pavurvur avele, eneke toko na seng alavusnga o engeng nge ile riong nongpolnaga ma oa pun aka ve, o nongpol ile riong alavusnga.

20

Toko pelie o nin a Jisas ve, “Anga i ateal wong aka aro ong wistetpot areken, e?”
(Matiu 21:23-27; Mak 11:27-33)

¹ Na nge nang omole aka Jisas i patoral toko na sengre aka a Lotu Tepun a Vel a lok lemi. Na i panongpol o nge Panongpolong Sivenaga. Na pris kimangare tomo nge pamirealingare nge a Moses ile patorong na toko na sengre ole mukalingare o es a i nge me.

² Na o nin a Jisas ve, “Wong ria them nge, anga i ateal wong aka wong wistetpot areken, e?”

³ Ma Jisas i olal ole riong ve, “Tho mun tho sis aka ve, tho nina mun thomu nge ninong omole mo o olal i a tho nge me.

⁴ Anga i ateal a Jon mo aro i paninu tokokoere? God eve toko ulue anga?”

⁵ Mako mukalingare o ria pel ve, “Aro ve te ri ve, ‘God i ateal i,’ ma aro i ria it ve, ‘Na i vava ake lomumuo nge i avele, e?’

⁶ Aveto aro ve te ri ve, ‘Toko ulue anga i ateal i.’ Aken aro tokokoere o kras leltun it nge umre, eneke olemio nge a Jon aka ini a God ile riong elnga.”

⁷ Mako o olal a Jisas ile ninong ve, “Lemimem mire nge avele.”

⁸ Mako Jisas i ria or ve, “Tho mun aro tho ria mun thomu nge avele, ako anga i ateal tho ve aro tho oma omaing ake.”

*Riong agelalnga nge Judare aka o ranga
ve ini ometa theal tetalngare.*

(Matiu 21:33-46; Mak 12:1-12)

⁹ Mako Jisas i sung riong agelalnga a toko na sengre nge vene, “Toko omole aka i lesu vain a ometa, ma i pathealu tokokoe pelie ma o theal ia ometa aken. Na toko aken i es nge rem melanga ma i voth palolo nge.

¹⁰ Lama nge vain le motuong,* ma i pakepot ile umonga omole ma i es a tokokoere nge aka o theal tetal ia ometa aken, eneke i sis ve aro i ela aning epee mo ini imeni olonga. Aveto ometa theal tetalngare o siso i ma o wispot i na i es polpol werer inga la.

¹¹ Mako i pake mun ile umonga omole mun e la. Aveto o siso mun i na o palemara i. Na o pake werer i ma i es polpol mun inga la.

¹² Mako i pake mun ile umonga menga ma i es. Aveto tokokoere o siso mun i na ini peti ia mimla ma o ela i ma o asespot i a lalanga la.

¹³ “Vene aka ma ometa tokoninga i ria vene, ‘Aro tho oma ol va? Aro tho pake tuk tomonnga omolenga aka ok sagu rintet i, eneke aro o nongal ol ile riong.’

¹⁴ “Aveto ometa theal tetalngare o thopol i aka i es me, ma o ria pel ve, ‘Toko aken i es me aro i ele spot itema ile ur elonga, aro te so rin i, mo aro te ela ile ur elonga areke mo ini ler ol.’

¹⁵ Mako o rere i a ometa aken lemi, ma o asespot i a lalanga, mako o so rin i.

“Na thomu o rivenga, aro ometa tokoninga aro i oma or va?

¹⁶ Aro tho ria thomu ve, aro ometa tokoninga aro i so rin or naro i sungu ia ometa nge toko relnga pelie mo aro o theal ol i.”

Ma tokokoere o nongpol a Jisas ile riong aken, ma o ria ve, “I mothong tova aro i oma vene aken.”

¹⁷ Aveto Jisas i the a or nge, na i ria or ve, “Ta, thomu o ria tho nge riong ake mirenga aka o wat i a God ile erere nge aka i ri vene:

“Um aka vel aringare o rivenga
i kerenga ma o siv lelpot i,
ake kene i velpol ini um a urvet aka i
paengeng vel
ranga ve ini wovek sapatanga.”

Buk Song 118:22

¹⁸ Na toko alavusnga aro ve o mata a um aken nge, aro o mout mout. Na aro ve um aken i mata a toko e nge, aro i mopipara.”

¹⁹ Na pamirealingare nge a Moses ile patorong tomo nge pris kimangare ole mi mire aka ve, Jisas i ri aken nge or, nge ile riong agelalnga aken. Na o ranga ve ini ometa theal tetalngare. Mako o ri ve o rere sele i, aveto o ngange nge toko na sengre.

*Judare oni plong nge takis ulnga, mako
o nin a Jisas ve, aro o ul takis a nepes a Sisar
nge, eve avele?*

(Matiu 22:15-22; Mak 12:13-17)

²⁰ Mako pris kimangare tomo nge pamirealingare nge a Moses ile patorong, o the senu senu nge a Jisas. Na o ol toko pelie mo aro ole apaltet ve or ini toko sivenga. Na o sis ve aro ole olo i mo i ripot nge riong pelie aka tova i avsa Romre ole patorongre mo aro o teltun ia mo Romre o rere i mo aro o pamit i nge riong.

²¹ Mako toko le apaltetongare o nin a Jisas ve, “Pamirealinga, lemimem mire aka ve, lom riong kene i vengveng, na lom patoraling kene i nunganga. Na wong sung riong omole inga a toko na sengre nge, na lomum nge toko kimanga na toko vulutngare mo ong eksing lom riong a or nge, kene avele. Wong patorial vengveng or alavusnga, nge sovengalo aka aro o panes a God nge.

²² Na lemimem ninong i vene: Na nge ler patorong, i vengveng aka aro te ul takis a nepes a Sisar nge, eve avele?”

²³ Aveto Jisas ilemi mire aka ve, aro ole olo i, mako i ria or ve,

²⁴ “Pathengalu umtun alavatharnga omole a tho nge. Na anga ia sei ake na iion ake i voth nge, e?”

* **20:10:** Vain le motuong i pavurvur nge tovu po or lim.

²⁵ Mako o ri ve, “Ini a nepes a Sisar ile.”

Mako Jisas i ria or ve, “Ur ako ini a Sisar ile, aro thomu o sungu vengveng i a Sisar nge. Na ur aka ini a God ile, aro thomu o sungu vengveng mun i a God nge.”

²⁶ Ma o kukuk nge aka i olal i a or nge. Na o pavurvur aro ole olo i avele, aka a tokokoere otheki. Ma o men porengeng-galtun ol inga.

Sadiusire o nin a Jisas nge toko aka aro i rin lamo i mimi werera mun.

(Matiu 22:23-33; Mak 12:18-27)

²⁷ Ma ine Sadiusi pelie aka o es a Jisas nge me. Na Sadiusire ini tokokoe areko o ri ve, tokokoe areko o rin lale, o pavurvur aro o mimi werera ol avele. Na o nin a Jisas ve,

²⁸ “Pamirealinga, nomenga aka Moses i wat patorong omole aka ve, aro ve toko omole i peange na i rin petetun iewo na otutun e avele, maken aro itein posnga aro i ewo werera mun itein pomnga ia basu mo aro i pavelpol wain e mo ini itein pomnga aka i rin lale ile, mo ilengare o mothong tova o vus.[†]

²⁹ Na nomenga titeinpel or limai o voth. Na otein pomnga aka ini oa tengen i ewoa tel seng omole. Ma i rin petetun iewo sengenga na otutun e avele.

³⁰ Mako itein opisoinga i ewoa i, ave i velpol venen mun re aken a i nge,

³¹ na otein menga i venen mun re aken, ma or alalimaipot oewo seng aken, na otutun e avele, nako o rin rin.

³² Lamako patopalalnga seng aken i rinpott mun.

³³ Na lemem ninong i vene: Panen nge los wereraing, seng aken aro ini ol i kathnga iewo, eneke toko or alalimaipot o ewoa i?”

³⁴ Ma Jisas i olal ole riong ve, “Na nge wop lemi ol ake, toko na sengre o peange.

³⁵ Aveto toko na seng areko God i ategal or mo i apet or ini toko sivenga, aro i palos werera mun or mo o voth tomo nge i a Pen a Urvet, naro o peange ol avele.

³⁶ Naro o rin ol avele ranga ve ini a God ile enselre. Na or ini a God itutunre, eneke i palos werera or nge rinong.

³⁷ Na tenesing nge a Moses i pathengal it nge areko o rin, aka aro o los werera mun. Na nge tenesing aka e won pok a vutvutnga aka won sesenga i apola nge, God i ria Moses vene:

‘Ponange tho ini a God aka ini a Abraham ile,

na Aisak ile,

na Jekop ile.’ [‡]

Kisim Bek 3:6

³⁸ Na ake i pathengal i a it nge aka God ini rinongare ole God avele. Ini toko mimingare ole God. Na toko na seng alavusnga o mimi a itheki.”

³⁹ Na toko pamirealingare nge a Moses ile patorong pelie, o nongpol aka Jisas i ripot riong aken, mako o ria i ve, “Pamirealinga, ong olal senu ole ninong.”

⁴⁰ Mako tokokoere o ngeip ol nge ninong pelie aka aro o nin a Jisas nge.

Toko aka God i ategal i ve aro i el werer ile tokokoere, ini ao?

(Matiu 22:41-46; Mak 12:35-37)

⁴¹ Lamako i ria or ve, “O ri ve Krais ini pamimionga aka i velpol a Devit ikime mo aro ini nepes ranga ve ini a Devit. Na i vaya ake o ri vene ake?

⁴² Eneke Devit isivenga i watu riong ake a Buk Song nge, ma i ri vene:

“God i ria ok Pomnga ve:

“Ong meno a lok seik me, a menik sivenga nge anga,

⁴³ i pavurvur aro aro tho paesu ol lom ngarangre a som thewo, mo aro lom mong or.”’ *Buk Song 110:1*

⁴⁴ Na nge riong inga aken, Devit i apet a Krais ini ‘ia pomnga.’ Na ile riong ake i pathengal it ve, Krais i voth tel lale. Na i vova ake o ri ve Krais ini inga a Devit itevinga na i velpol a rumongaling nge i, e?”

Jisas i panakal tokokoere nge toko pamirealingare nge a Moses ile patorong ole vothung.

(Matiu 23:1-7; Mak 12:38-40)

⁴⁵ Na toko alavusnga o nongpol ile riong na Jisas itheki lel a tokokoe areko o panes i ma i ria or ve,

[†] **20:28:** Lo 25:5 [‡] **20:37:** Nge wop lemi aka Moses i mimi nge, Abraham, Aisak na Jekop o rin lale, aveto rongan ooni i voth.

46 “Thomu o nakalal thomu nge toko pamirealingare nge a Moses ile patorong, eneke o sis ve aro o magon tomo nge oa teunong lolloinga. Na oa sagu rintet ako ve, tokokoere o papomnga or mo o pathokeal or a pathunonga a pen. Na o sis ve aro o men inga nge menonga aka i voth a mukaling aka a Judare ole lotuonga a vel lemire, na nge menong nge aning aolonga, o sis vet aka ve, aro o men nge menonga aka aro o papomnga or nge.

47 Aveto o pavus vet inga patong seng basbasuere ole ur elonga, na a toko puluanga otheki o sis ve aro o papomnga osivenga mo o oma ole nongong mo i lollo. Naro God ile paomelaling a or nge, aro i aolonga rintet.”

21

Seng basu aka i oma ile sungong a God nge.

(Mak 12:41-44)

1 Lama Jisas i theu thea ma i thopol toko le urninga pom aka o ulu umtun aolonga a umtun le ngoinga nge.

2 Ma i thopol aka patong seng basu aka i ulu ile umtun aini aka i posngaingati.

3 Ma Jisas i ria ve, “Tho ri nunganga a thomu nge, seng basu atike ile sungong i aolonga nge sungong alavusnga.

4 Eneke toko le uringare o ul inga ole umtun pothoingare, aveto patong seng basu atiken ile ur e avele, na i ul vustetpot ile umtun aini atiken. Na ile umtun ol e avele aka aro i olol ia aning nge.”

Jisas i ritet nge Lotu Tepun a Vel aka a Jerusalem, panen aka aro ngarangre aro o teu i.

(Matiu 24:1-2; Mak 13:1-2)

5 Na tokokoe pelie o ri nge um sivesivengare aka o ari Lotu Tepun a Vel nge, na nge ur sivesivenga areko o pamalmal i nge. Na Jisas i ria ve,

6 “Um areke ru thomu o thopol i ponange, nang e aka panen aro i velpol aka aro e avele aro i ngo ol a imei venen aken. Aro ngarangre aro o tevustetu um alavusnga areken.”

Jisas i ritet nge matheong pulua aka aro i velpol panen.

(Matiu 24:3-14; Mak 13:3-13)

7 Lamako tokokoere o nin a Jisas ve, “Pamirealinga, ur aken wong ri nge aro i velpol penva? Na pathepolong kathnga aka aro i velpol tel, e?”

8 Na Jisas i ria or ve, “Aro thomu o nakalal thomu, aro vene mo o paleklek thomu, eneke toko pulua aro o velpol mo o ri ve or ini tho na o ri ve, ‘Nang le vusonga i velpol lale.’ Aveto o mothong tova o panes or.”

9 Na aro ve thomu o nongpol nge punpel ing na matheong o velpol, thomu o mothong tova o kukuk nge, eneke ur areken aro i velpol tel, aveto nang le vusonga ile velpoling rongan.”

10 Lamako i ria mun a or nge ve, “Na pen epee or pulua aro o pun pel, na tokokoere okei rel rel aro o pun pel.”

11 Naro wiring aolonga aro i velpol ake ru a ulue, naro nge rem pulua aro mesi i velpoltun or, na mousong mun. Na a sepsa lemi aro thomu o thopol ur aolonga pelie aka ranga ve ini pathepolong pelie aka aro i oma thomu mo o ngeip nge.

12 Na nge nang areken aro ur areken i velpol rongan, aro lomu ngarangre aro o pakerenga thomu na o rere thomu mo o pamit thomu nge riong a Judare ole lotuonga a vel lemire. Naro o paeso thomu a mang a midenga lemi, naro o pamit thomu nge riong, a mukalingare na nepesre otheki, eneke thomu ini lek.

13 Na aken ini so aka aro thomu o panongpol nge Panongpolong Sivenga a or nge.

14 Na nge wop lemi aka o pamit thomu nge riong rongan, o mothong tova lomumu rit nge riong aka aro o olal i a or nge.

15 Eneke aro tho ripot a womu, naro tho sungu mun mire aolonga a thomu nge. Naro areko olemi otun thomu, aro o pavurvur aro o kelelal na o paruru lek riong aka tho sungu i a thomu nge, kene avele.

16 Naro titomomu na ninomuere na ti- teumuere tomo nge lomungare na thon- gongomuere, or mun aka aro o sungu

thomu a ngarangre omeni. Naro o pun rin omu pelie.

¹⁷ Na tokokoere alavusnga aro oni silalpot thomu, eneke thomu ini lek.

¹⁸ Aveto omu e avele aro i penthal.

¹⁹ Naro thomu o mit engeng nge lomu lemioong, naro thomu o el mimiong ako aro ile vusonga avele."

*Jisas i ri nge a Jerusalem ile kerengaing.
(Matiu 24:15-21; Mak 13:14-19)*

²⁰ Na Jisas i ria mun ve, "Aro ve thomu o thopol tova punongare o mit kalalual a Jerusalem, aken i mirenga ve, i toth aro o pakerenga a Jerusalem.

²¹ Lama nge nang ako o thopol ur aken, i sivenga nge areko ole a Judia aro o lo a tete la. Na tokokoe areko o voth a Jerusalem aro o lo lelpot rem pomnga aken. Na areko o voth a rem pomnga kime, aro o eso a lemi avele.

²² Na nge nang areken aro God i paomialal toko ulue angare mo ako i panunganga ile riong alavusnga aka i voth a ile erere lemi.

²³ Patong seng areko oopo na seng areko o mane povothvothre, eneke panen math-eong aolonga aro i velpol ake ru a ulue. Na God ile lemi klingong aro i vlestun toko na seng areken.

²⁴ Naro ngarangre aro o es mo o pun rin pelie nge peang, na pelie aro o woltet or mo o voth ol ini loomere a rumrem elonga ake ru a ulue. Naro tokokoe areko or ini Judare avele aro o tepetuntun a Jerusalem. Naro i voth a osa thewo i pavurvur nge nang ako God i ategal i lale."

Jisas i ritet nge nang ako Toko Pomnga Itun aro i lo wereru nge me.

(Matiu 24:29-31; Mak 13:24-27)

²⁵ Na Jisas i ria mun vene, "Panen aro paatealing pelie aro i velpol nge nang theki, na nge ngov, na nge sivemitre. Na ake ru a ulue, toko pulua aro olemi kerere rintet. Naro o nongpol rua le punong aolonga ma olemi pelek pelek nge na o ngeip rintet nge.

²⁶ Aro toko na seng pulua aro o thopol ur aka i seltunu ulue alavusnga, mako o ngeip rintet nge, mako o matu ma o rin

penges nge, eneke sawirwir sivemitre ako ro a sepsa.

²⁷ Naro nge nang aken aro toko na sengre aro o thopol a Toko Pomnga Itun aka aro i espot tomou nge songen ake ro a sepsa me tomo nge ile engengeng aolonga na ile tolilisong.

²⁸ Na nge nang aken aro ur areken i patea nge, aro thomu o mit engeng na o thea la a sepsa, eneke i toth aro Toko Pomnga i velpol mo aro i el werer thomu."

*Pamirealing nge pupos aka i pol.
(Matiu 24:32-35; Mak 13:28-31)*

²⁹ Mako Jisas i ria or nge riong agelalnga. Na i ria ve, "Thomu o thopolrum pupos ake na won elonga,

³⁰ na aro ve thomu o thopol aka ve, pupos aken i pol, lomumu mire aka ve, nang po aro i velpol.

³¹ Ranga ve aka, aro ve thomu o thopol ur areken ile velpoling, aro lomumu mire aka ve, i toth aro God ile menong e nepes aro i velpol.

³² "Na tho ri nunganga a thomu nge, Judare pelie aro rongan o voth, naro ur areken aro i velpol.

³³ Sepsa tomo nge ulue aro o vus, aveto lek riong aro i penthal avele."

Jisas i tor ole mo o nakalal or.

³⁴ Jisas i ria or ve, "Thomu o nakalal thomu na o mothong tova lomumu es nge thinong na aning na vothung ulue anga, aro vene mo Toko Pomnga Itun aro i pakuktun thomu nge ile velpoling ranga ve ini susua aka i pakuktun silangre tinga.

³⁵ Eneke ile velpoling aro i velpoltun toko na seng alavusnga ake ru a ulue.

³⁶ Na nge nang elonga aro thomu o thealal. Naro thomu o nong engeng inga a God nge mo i sung ile engengeng a thomu nge, mo aro thomu o lo rispot nge ur areko aro i velpol. Na o nong mun ve aro thomu o mit engeng nge nang aken aro thomu o mit nge riong, a Toko Pomnga Itun itheki."

³⁷ Nge nang elonga Jisas i pamirealing toko na sengre a Lotu Tepun a Vel a lok lemi, aveto nge pemliknaga i es ma i nokolkol a tete aken a apet i ve ini a Oliv.

³⁸ Na rulpoalal elonga toko alavusnga o es a Lotu Tepun a Vel a lok lemi mo aro o nongpol ile riong.

Jisas i el sisisong na i rin lama i los werera mun

22

(Vonge 22:1-24:53)

Judas i sungu a Jisas a Judare ole mukalingare omeni.

(Matiu 26:2-5; Mak 14:1-2, 10-11)

¹ Na toth nge Judare oa Punseleainga a Aning ako o an bret ako yis aka ini pawimpotnga i voth nge avele, aka o apet i ve ini “Pasova”.

² Na pris kimangare tomo e pamirealingare nge a Moses ile patorong, o ri ve aro o so rin a Jisas, aveto o ngange nge tokokoere, mako o kath Sovengalo aka aro o so rin kine a Jisas nge.

³ Lama Satan i rero a Judas Iskariot ilemi. Na ini a Jisas ile wainlanga omole nge ile wainlanga or mule pa omole pothoi or aini aken.

⁴ Mako Judas i es a pris kimangare tomo mun nge Lotu Tepun a Vel a mit tetalongare ole mukalingare, mo i leng leng tomo nge or nge Sovengalo kathnga aka aro i sungu a Jisas a omeni nge.

⁵ Ma o nongpol ile riong ma olemi sivenga nge. Ma o ri nunganga a i nge mo aro o sungtun i nge umtun.

⁶ Mako Judas i ri ve, “I sivenga.” Mako i kath Sovengalo aka aro i sung kine a Jisas a mukalingare omeni.

Jisas ile wainlanga or aini o monsi nge aning aka o apet i ve ini Pasova.

(Matiu 26:17-19; Mak 14:12-16)

⁷ Nge aning aolonga aka Judare o an bret aka pawimpotnga i voth nge avele, nang i velpol aka aro o so rin rin sipsipre nge, mo o oma oa Punseleainga a Aning nge.

⁸ Mako Jisas i pakepot a Pita ome a Jon ma i ria or ve, “O es mo o monsi Punseleainga a Aning aka aro te an i.”

⁹ Ma o nina i ve, “Aro them monsi aning aken a kath?”

¹⁰ Ma i olal ole riong ve, “Aro thomu paini o eso a rem pomnga, na toko omole aka i potun thei pokin aolonga, aro i

sangpolo thomu paini a so. Mo thomu o paneso i a vel aka i eso nge.

¹¹ Mo o ria vel tokoninga ve, ‘Ler pamirealinga i nin ve: Wop kathnga aka aro them e lek wainlangaere, them an Punseleainga a Aning nge?’

¹² Aro i pathengal thomu paini nge vel lemi ronganga aka i aolonga aka menongare i ngo nge mo thomu o monsi aning nge wop aken.”

¹³ Mako or paini o es, mako o thopol ur alavusnga ranga ve aka Jisas i ri or paini nge. Mako o monsi Punseleainga a Aning nge.

Jisas i sung aning a ile wainlangaere nge ma i ritet or nge a God ile riong kinnga ponganga.

(Matiu 26:21-29; Mak 14:18-25; Jon 13:21-30; 1 Korin 11:23-25)

¹⁴ Na nang i sivluk, mako Jisas i men tomo ol nge ile pakekere nge aning.

¹⁵ Ma i ria or ve, “Tho sis rintet ve aro tho an Punseleainga a Aning ake tomo nge thomu, lamoko aro tho el ol sisong.”

¹⁶ Na tho ria thomu, aro tho an Punseleainga a Aning relnga e avele i pavurvur aka aro God ile menong e nepes i velpol a ulue.”

¹⁷ Lama Jisas i ela thinonga aka vain i mon nge, ma i ri sivengaing a God nge lama i ria ve, “Ela thinonga ake mo thomu alavusnga o thin i.”

¹⁸ Na tho ria thomu, aro tho thin ol vain avele i pavurvur aka aro God ile menong e nepes i velpol.”

¹⁹ Lama i ela bret ma i ri sivengaing a God nge, lamako i reku i ma i sungu i a or nge, ma i ria or nge ve, “Ake ini sivangek aka aro tho sungu i a God nge, ranga ve ini sungong aka aro i opoa thomu. Panen tova aro thomu o an Punseleainga a Aning, aro lomumu rum tho.”

²⁰ Ma o an ma i vus, mako i sung mun thinong a or nge ma i ria mun or ve, “Na God i kin ile riong ponganga tomo nge tokokoere, na ile riong kinnga ponganga aro i patea tova ok mla i palalas. Na vain ake kene ini ok mla aka aro i palalas mo aro i opoa thomu.”

²¹ Aveto o thopol toko ake i an tomo e tho, aro i teltun tho a ngarangre omeni!

²² Toko Pomnga Itun aro i rin ranga ve ako God ilemi nge lale, aveto patong toko ake i teltun ia a ngarangre omeni.”

²³ Lama o nin pel osivenga ve, toko kathnga a or nge aro i oma aken?

Anga aro i mukal?

(Matiu 20:25-28; Mak 10:42-45)

²⁴ Ma Jisas ile wainlangaere o ri pel nge toko kathnga a or nge aro tokokoere o ri ve i pomnga nge or.

²⁵ Na Jisas i ria or ve, “Na nepesre ako or ini Judare avele o panisisis ole tokokoere mo aro o nongal ole riong, aveto o ri ve aka aro ole tokokoere o apet or ini othanga.

²⁶ Aveto aro i vene aken a thomu nge avele. Aro omu pomnga aro i velpol ranga ve ini toko polpolnga a thomu nge. Na omu mukalinga aro i velpol ranga ve ini toko umonga.

²⁷ Eneke tho oma venen aken nge thomu. Na lomumu rum tel, anga i pomnga? Toko aka i men nge aning eve toko aka i sung aning a i nge? Ini toko aka i men nge aning. Aveto tho voth a thomu nge ranga ve tho ini toko umonga.

²⁸ Na thomu ini areko o mit tomo nge tho nge nang areko tho el matheong nge lale.

²⁹ Na ranga ve aka Vovo i ateal tho ini nepes, aro tho ateal mun thomu ini nepesre.

³⁰ Aro tho velpol ini nepes naro thomu o an na o thin tomo nge tho. Naro thomu o men nge nepes a menonga mo aro thomu o theal Israelre ole net or mule pa omole pothoi or aini.”

Jisas i ritet nge a Pita aka aro i kelelal i.

(Matiu 26:33-35; Mak 14:29-31; Jon 13:37-38)

³¹ Na Jisas i ria Pita ve, “Saimon, Saimon, nongpol, Satan i sis ve aro i tongporum thomu mo i thopolrum thomu, anga aro i mit engeng na anga i mit engeng avele. Na God i ria Satan ve, ‘La, tongporum or.’

³² Aveto Saimon, tho nong nge a God mo aro lom lemioong aro i matu avele. Na nge nang aka aro ong eksing werer a tho nge me, aro wong paengeng thongongomre!”

³³ Na Pita i olal ile riong ve, “Toko Pomnga, tho pavurvur aka aro tho es tomo nge wong aka a mang a midenga lemi na tho pavurvur mun aka aro tho rin tomo nge wong.”

³⁴ Na Jisas i ria i ve, “Tho ria ong a Pita, pan pemlik vareo aro i tang rongan naro ong ri pa or me ve lomum mire tho avele.”

Jisas i panakal ile wainlangaere.

³⁵ Lama Jisas i ria ile wainlangaere ve, “Nge wop lemi aka nomenga tho pake thomu mo o panongpol nge Panongpolong Sivenga ma thomu o el tomo umtun le ngoinga, na alal, na esonga, kene avele. Na nge wop lemi aken thomu o oror nge ur pelie?”

Na o olal ile riong ve, “Avele, them oror nge ur e avele.”

³⁶ Ma Jisas i ri ve, “Aveto ponange, aro ve toko e ile umtun le ngoinga eve ile alal i voth, aro i el tomo i. Na aro ve toko e ile bainat avele, aro i ela ia teunong mo aro i tepolal i nge bainat omole.

³⁷ Eneke God ile erere i ri vene, “Tokokoere o ri ve
ini toko kerenga
ako i avsa patorong.”

Aisaia 53:12
Na riong ake i ri nge tho, naro i velpol nunganga a tho nge. Eneke God ile erere alavusnga aka i ri nge tho, aro i velpol nunganga.”

³⁸ Na ile wainlangaere o ria i ve, “Toko Pomnga, thepol, bainat or aini ke.”

Ma i olal ole riong ve, “Aken i pavurvur.”

Jisas i nong a tete a Oliv.

(Matiu 26:36-46; Mak 14:32-42)

³⁹ Ma Jisas i lospot a rem pomnga ma i es a tete a Oliv, ake ini ile vothung vet aka i es nge tete aken, mako ile wainlangaere o panes i.

⁴⁰ Ma o velpola nge wop aken, ma i ria or ve, “Aro thomu o nong mo o mothong tova o matu nge tongporumong.”

⁴¹ Lama i los lelpot nge or, na ile melanggaing a or nge i pavurvur nge um aka ranga ve toko i ul i. Ma i koru ieve ma i nong.

⁴² Ma i ria ve, “Vovo, tova ve lomum ve aro ong oma i, aro eltetpot matheong ake a tho nge, aveto mothong tova panes lemik, aro panes inga ako ini lomum.”

⁴³ Ma ensel omole aka i esu a Pen a Urvet me, ma i velpol a i nge, ma i paengeng i.

⁴⁴ Ma Jisas i rov matheong aolonga ma i nong engeng rintet na ia inin aka i velpol a i nge, ma i lelu a ulue ranga ve ini mla.

⁴⁵ Ma i nong ma i vus lama i mita ma i es werer a ile wainlangae nge, ma i thepol aka o nokolkol, eneke lemi kerereong i omelal or.

⁴⁶ Ma i ria or ve, “I vava ake thomu o nokolkol kek inga, e? Aro thomu o losa mo o nong mo aro thomu o matu nge tongporumong avele.”

Judas i sungu a Jisas a ngarangre omeni.
(Matiu 26:47-56; Mak 14:43-50; Jon 18:3-11)

⁴⁷ Na Jisas rongan i ri na pulua aolonga aka o velpol, ma ina Judas i mukal ole, na ini a Jisas ile wainlangae omole nge ile wainlangae or mule pa omole pothoi or aini. Na i es a Jisas nge ma i angongoal i.

⁴⁸ Ma Jisas i ria ve, “Judas, i vava ake wong teltun Toko Pomnga Itun tomo nge angongoaling, e?”

⁴⁹ Ma Jisas ile wainlangae aka o voth tomo nge i, o thopol ur aken aka aro i velpol, ma o nin a Jisas ve, “Toko Pomnga, aro them pun or nge lemem bainat areke?”

⁵⁰ Ma oa omole aka i sorotetpot Prisre oa Pomnga ile umonga itelnga aka a imeni sivenga nge anga.

⁵¹ Aveto Jisas i ria ve, “Thomu o mothong tova o oma ol venen aken.” Ma i vugiro inga toko aken itelnga, nako i sivenga werer.

⁵² Lama Jisas i ria pris kimangare, na Lotu Tepun a Vel theal tetalngare, na Ju-dare oa pompongore aka o es me mo o rere i, ma i ria or ve, “Ava thomu o es tomo nge bainat na tongtong, ava thomu o rivenga tho ini toko multhanga?

⁵³ Na evelelga tho voth tomo nge thomu a Lotu Tepun a Vel a lok lemi, na thomu o rere vet tho avele. Aveto ponange ini nang aka ini lomu, aka aro o oma

omaing ake, eneke mideng ile engenging i mukal ol lale.”

Pita i ria ve, ilemi mire nge a Jisas avele.
(Matiu 26:69-75; Mak 14:66-72; Jon 18:16-18, 25-27)

⁵⁴ Ma o rere a Jisas ma o paeso i a Prisre oa Pomnga ile vel, ma Pita i o ieve nge or.

⁵⁵ Na won sesenga e aka o papola i a lok lemi nge wop aka o pathun nge. Ma Pita i supo tomo mun nge tokokoe areko o men kalalual won sesenga aken.

⁵⁶ Ma seng ovote aka ini umonga i thepol i aka ru i men aka ru a won sesenga nge, ma i the rinrin i na i ri ve, “Ine toko mun ake i voth tomo nge a Jisas!”

⁵⁷ Aveto Pita i kelelal i ma i ria seng aken ve, “Lemik mire nge toko aken avele.”

⁵⁸ Ma palolou avele lama toko e aka i thepol a Pita ma i ri ve, “Ae! Wong mun aken, ong ini a Jisas ithanga.”

Aveto Pita i olal ile riong ve, “Tho ini ilenga avele.”

⁵⁹ Lama palolou mun tie, nako toko mun e aka i ria viringga ve, “Ini ur kelelalonga avele, toko ake i voth tomo mun nge a Jisas, eneke i mun ake ini Galili anga!”

⁶⁰ Aveto Pita i olal ile riong ve, “Lemik mire nge riong aken ru wong ri nge, kene avele.” Na rongan i ri, nako vareo i tang.

⁶¹ Na Toko Pomnga i eksinga ma i the vengveng a Pita nge, ma Pita ilemi rum werera mun riong aka Toko Pomnga i ria i nge ve, “Nge pemliknaga ake, vareo aro i tang rongan, naro wong ria tel pa or me ve lomum mire nge tho avele.”

⁶² Ma Pita i espot a lalanga la ma ilemi kerere rintet ma i tang.

Tokokoere o ri sililal a Jisas na o siso i.
(Matiu 26:67-68; Mak 14:65; Jon 18:22-23)

⁶³ Na tokokoe areko o rere a Jisas, o ri sililal i na o siso i.

⁶⁴ Na o kin sopal itheki na o nina i ve, “Aro ve ong ini a God ile riong elnga e, aro ria them, toko anga ake i siso wong, e?”

⁶⁵ Na o oma riong kerenga puluanga nge i aka i paruru i.

Jisas i mit nge riong a lotu a mukalingare othekei.

(Matiu 26:63-66; Mak 14:61-63; Jon 18:19-21)

⁶⁶ Ma erangu ol na Judare oa pom-pomere na pris kimangare na pamirealingare nge a Moses ile patorong, o pathunu lamako o wol ol a Jisas mo i mit nge riong a othekei.

⁶⁷ Ma o ria i ve, “Wong ria them, Wong ini toko aka God i ateal ong ve aro ong el werer ile tokokoere?”

Ma i olal ole riong ve, “Aro ve tho ria thomu, aro lomumuo nge lek riong avele.

⁶⁸ Na aro ve tho nin thomu nge ninong e, aro thomu o olal mun i avele.

⁶⁹ Aveto i patea ponange naro i mulal panen, Toko Pomnga Itun aro i meno a God aka ile engenging i aolonga rintet, imeni sivenga nge anga.”

⁷⁰ Ma or alavusnga o ria i ve, “Na wong re ake ini a God Itun?”

Ma i ria or ve, “I re aken ranga ve aka thomu o ri lale.”

⁷¹ Ma o ri ve, “Na i pavurvur ol aro te leng ol tokokoe pelie mo o pamilempot toko ake ia theki pelie avele, eneke riong ake te nongpol i, i velpol vengveng a isivenga iwo.”

23

Jisas i mit nge riong a Pailat itheki.

(Matiu 27:11-14; Mak 15:2-5; Jon 18:29-37)

¹ Ma ine mukalinga alavusnga areken o losa ma o pasong a Jisas ma o pamit i nge riong a Pailat itheki.

² Ma o patea ol iteltunnga, ma o ri ve, “Them thepol toko ake i paleklek lemem tokokoere nge vothung pulua. Na i rial or nge umtun ulnga a nepes a Sisar nge, na i ri ve i ini nepes omole aka God i ateal i ve aro i el werer ile tokokoere.”

³ Na Pailat i nin a Jisas ve, “Wong ini Judare ole nepes, e?”

Ma Jisas i olal ile riong ve, “I venen re aken ong ri lale.”

⁴ Lama Pailat i ria pris kimangare na pulua alavusnga aken ve, “Tho thepol vothung kerenga e avele aka toko ake i oma i, aka aro tho paomelal i nge.”

⁵ Aveto o ri viringa mun ve, “Toko ake i pavurpola tokokoere olemi nge ile pamirealing aka a pen alavusnga a Judia. I patea a Galili na i espot e pen ake.”

Jisas i mit nge riong a Herot itheki.

⁶ Na Pailat i nongpol venen aken ma i nina or ve, “Toko ake ini Galili anga?”

⁷ Na i nongpol aka Jisas ile rem tepun i voth a epee aka Herot i theal i, mako i pake i a Herot nge, eneke Herot i voth mun a Jerusalem nge wop lemi aken.

⁸ Ma Herot i thepol aka Jisas i velpol a i nge, ma ilemi sivenga rintet, eneke i nongpola Jisas ile kimaing. Na nge nang pulua i sis ve i thopol a Jisas na ia pun aka ve, i thopol pathepolong pelie aka aro Jisas i oma i.

⁹ Mako Herot i nin a Jisas nge ninong pulua, aveto Jisas i olal vet riong tie avele.

¹⁰ Na pris kimangare tomo e toko pamirealingare nge a Moses ile patorong o tipot i a mukaling ma o ripot ia theki puluanga aka olemi otun i nge.

¹¹ Na Herot tomo nge ile punongare o ri sililal a Jisas ma o oma riong aka i paruru i. Lamako o asisaltun i, mako o pateunu i nge seltun a urvet aka ini nepes a malmaling, ma o pake werer i a Pailat nge la.

¹² Ma nge nang aken Herot ome a Pailat othanga ol pel. Na nomenga or paini ole ngarang pel.

Pailat i ritet nge aka aro o pun rin a Jisas.

(Matiu 27:15-26; Mak 15:6-15; Jon 18:39-19:16)

¹³ Na Pailat i leng veliloalo pris kimangare tomo nge Judare oa pompomere na tokokoere.

¹⁴ Ma i ria or ve, “Thomu o wol toko ake a tho nge me na thomu o ri ve i pavelpol punong tomo e gavman, na thomu o mit a thekik na tho nongpol lomu riong aka lomumu otun i nge, aveto tho thopol i aka, e avele i nunganga.

¹⁵ Na Herot mun i thopol ur e avele aka i kerenga a i nge, eneke i pake werer i a it nge me. Na toko ake i oma ur e avele aka aro te pun rin i nge.

¹⁶ Mako aro tho ria or mo aro o so litlit i lamo o modop i mo i vthopot.”

¹⁷ [Na nge Punseleainga a Aning nge tovu po elonga tokokoere osivenga aro o apetpot toko e ako i voth a mang a midenga lemi mo aro Pailat i sungpot i mo i vthopot nge kinong.]

¹⁸ Na pulua aken okei omolepot na o presa viringa ve, “Pun rin i! Na sungpot a Barabas a them nge me.”

¹⁹ Na Barabas ini toko aka nomenga o paeso i a mang a midenga, eneke i supo tomo nge areko o pavurpola punong aka a rem pomnga ma rinong i velpol nge.

²⁰ Na Pailat i sis ve aro i modop a Jisas mo i vthopot. Mako i lengpot mun a pulua aolonga aken nge.

²¹ Aveto o pres werer mun ve, “Pamona i a won ngoronga nge, pamona i a won ngoronga nge.”

²² Na Pailat i ria or nge pa or menga ol ve, “Aveto vothung kerenga kathnga aka i oma i? Tho thopol vothung e avele aka i kerenga aka aro te so rin i nge! Aro tho ria or mo aro o so litlit i lamo o modop i mo i vthopot.”

²³⁻²⁴ Aveto o mosal inga presing ve aro o pamona a Jisas a won ngoronga nge. Makola ole presing i oma a Pailat ma i panes olemi.

²⁵ Na i modoppot toko aka osivenga o apetpot i aka nomenga o paeso i a mang a midenga, eneke i supo tomo nge punongare aka o pavelpol rinong. Na i sung a Jisas a punongare omeni ranga ve aka o ri nge.

Rom a punongare o pamona a Jisas a won ngoronga nge.

(Matiu 27:33-44; Mak 15:22-32; Jon 19:17-24)

²⁶ Na punongare o wolpot a Jisas la na o eses a sovengalo la ma o sangpolo toko omole aka iion a Saimon na ini toko aka ile a Sairini na ia sele ometare lale, na i es alpo a rem pomnga. Na o rereu i ma o papotunu i nge a Jisas ia won ngoronga, ma i rumongal nge a Jisas.

* ^{23:30:} Hosea 10:8 † ^{23:38:} Romre ole vothung i vene, aro ve o pun rin toko a won ngoronga nge, aro o wat vothung kerenga aka toko aken i oma i, na o sotuna i a ia won ngoronga mo aro tokokoere olemi mire nge vothung aka toko aken i oma i ma i rin nge.

²⁷ Na pulua aolonga o panes i, na oa pelie ini sangre na o wal na o tang nge a Jisas.

²⁸ Na Jisas itheki lel werer a or nge na i ri ve, “Seng Jerusalem angare o mothong tova o tang nge tho, aveto aro o tang nge sivengomu tomo nge tutumuere,

²⁹ eneke nang e aka aro i velpol aka aro tokokoere o ri ve, ‘Sapase seng areko otun e avele.’

³⁰ Na nge wop lemi aken tokokoere aro o ria tetere ve, ‘Mata a them nge.’ Naro o ria pengenere ve, ‘Tetun them.’ *

³¹ Eneke Romre olemi mire aka tho oma vothung kerenga e avele na thomu o thopol vet paomelaling aka o oma i a tho nge, na anga aro i thopol ol paomelaling aolonga aka aro o sungu i nge thomu aka o oma vothung kerengare?”

³² Na o wol mun toko kerenga or aini aka o avsa patorong, na o wol or mo aro o pun rin or tomo nge a Jisas.

³³ Na o velpol a pen e aka o apet i ve ini “Toko po a kikil.” Mako o pamona ol a Jisas a won ngoronga nge. Na o pamona mun toko kerenga or aini aken. Na omole i mon a Jisas imeni sivenga nge anga, na omole i mon a Jisas imeni kerenga nge anga.

³⁴ Ma Jisas i ri ve, “Vovo, lomum simikal ole vothung ake, eneke olemi mire nge ur aka o oma i, kene avele.” Na punongare o asisal nge satu mo aro i pathengal oa kathnga aken aro i el tel a Jisas ia teunong epee.

³⁵ Na toko na sangre o mit ma o the, aveto Judare oa pompomere o ri sililal i ve, “I pamimi pelie na aro ve ini toko aka God i ateal i mo aro i el werer ile tokokoere, aro i pamimi werer vet isivenga.”

³⁶ Na punonga munre o pasililalo itheki, mako o sung mun vain welnga a i nge,

³⁷ na o ria ve, “Pamimi sivengom tova ve wong ini Judare ole nepes.”

³⁸ Na roro a ipounga o wat riong† epee aka ve,

AKE INI JUDARE OLE NEPES.

³⁹ Na toko kerenga omole ako i mon totho a i nge, i ri riong kerenga a i nge ako i paruru i ma i ri ve, "Ava wong ini toko aka God i ateal wong mo aro wong el werer ile tokokoere, e? Na pamimi sivengom na them paini mun!"

⁴⁰ Aveto ia aininga i vol i, ma i ria i ve, "Wong papomnga a God avele? It alame te el inga paomelaling aka i vur e pel inga,

⁴¹ na it aini te el paomelaling aka i pavurvur nge omaing kerenga aka te oma i, aveto i kene, i oma omaing kerenga e avele."

⁴² Ma i ria Jisas ve, "Na aro lomum rum tho tova ve ong velpol ini nepes."

⁴³ Ma Jisas i ria i ve, "Tho ri nunganga a wong nge, ponange aro wong voth tomo e tho ake ro a Pen a Urvet."

Jisas i rin a won ngoronga nge.

(Matiu 27:45-56; Mak 15:33-41)

⁴⁴ Na nge penang lopat, mideng aolonga i velpol ma i seltun pen elonga, i pavurvur aka la nang meta i el or me nge penie.

⁴⁵ Na nang i to ol avele na lavlav velvelnga aka i mon rupalu a Lotu Tepun a Vel lemi pat, i minra ma epee ainiu.

⁴⁶ Na Jisas i wala viringa ma i ri ve, "Vovo, onik i voth ol a menum nge." Ma i ri venen aken lamako i rin.

⁴⁷ Na punongare ole mukalinga i thopol ur aka i velpol ma i risea a God nge ma i ri ve, "I nunganga, toko ake ini toko sivenga."

⁴⁸ Na tokokoe alavusnga areko o pathun mo o the nge ur aken, o thopol ur aken i velpol ma o lo werer a ole vel omole omole, ma o so opakei, eneke olemi kerere rintet.

⁴⁹ Na tokokoe areko olemi mire nge a Jisas tomo nge seng areko o panes i a Galili me, or mun aka o mit mun mela tie na o thopol ur areko i velpol.

O tetun ol a Jisas.

(Matiu 27:57-61; Mak 15:42-47; Jon 19:38-42)

⁵⁰⁻⁵¹ Na toko omole aka i voth ma iion a Josep ma ile a Arimatea aka ini Judare ole rem. Na ini toko sivenga aka ile vothung i vengveng. Na i menetal a God ile menong e nepes, ile velpoling. Na ini a Judare oa

pomnga mun, aveto ilemi i vur e pel tomo nge areko o teltun a Jisas avele.

⁵² Na i es a Pailat nge nai i nongpot a Jisas ini peti.

⁵³ Lamako i osu a Jisas ini peti ma i soa i nge seltun na i pango i a vuvepun aka o monsi tonga nomenga a pilpeli tepun. Na o pangoo vung e nge rongan.

⁵⁴ Na ini nang monsinga aka nge nang rialonga na nang rialonga i toth ol aka aro i patea ol.

⁵⁵ Na seng areko o panes a Jisas a Galili me, o panes a Josep na o thopol a Jisas ini peti aka o pangoo i a vuvepun aken.

⁵⁶ Lamako o lo werer a ole pen ma o monsi nge ur una vrunga aka aro o taul a Jisas ini peti nge. Aveto nge nang rialonga o panes a Moses ile patorong na o thau or nge.

24

Jisas i los werera nge rinong.

(Matiu 28:1-8; Mak 16:1-8; Jon 20:1-8)

¹ Na nge nang mukalinga aka nge rulpoalal, seng areken o es a ia vuvepun aken na o es tomo ur una vrunga aka o monsi i lale.

² Ma o velpol ma o thopol um aolonga aka o singelpot i a vol thekia lale.

³ Mako o koro a vuvepun, aveto o thopol a Jisas ini peti avele.

⁴ Na o mit ma olemi pelekpol nge. Na a ur e avele na toko or aini aka ole teunong i tolilis rintet, o mit totho a or nge.

⁵ Ma sengre o ngeip rintet ma opo tiru a ulue na toko or aini aken o ria or nge ve, "Na i vava ake thomu o or toko aka i mimi, ake ru a vuvepun, e?

⁶ I voth ake avele, i los werera lale. Ma lomumu rum ile riong aka i ria thomu nge, aka a Galili avele,

⁷ aka i ri ve, 'Aro o sungu Toko Pomnga Itun a toko kerengare omeni naro o pamaona i a won ngoronga nge, na nge nang or me i vus naro i los werera mun.' "

⁸ Na sengre olemi rum a Jisas ile riong.

⁹ Na o plos lelpot vuvepun aken na o lo werer na o ritet a Jisas ile wainlanga or mule pa omole pothoi omole na tokokoere, nge ur alavusnga aka i velpol a or nge.

¹⁰ Na seng areken or ini a Maria Makdala anga, na Joana, na Maria ako ini a Jems inina, tomo mun nge seng pelie, ako o ritet ur alavusnga aken ako a pakekere nge.

¹¹ Aveto pakekere olemi ve ole riong aken ini ur polpolnga, na olemio ol nge ole riong aken avele.

¹² Aveto Pita i plosa ma i tho a vuvepun aken ma i lotoru ma i theo na i thopol inga seltun ako o soal a Jisas ini peti nge, aveto i thopol mun ur e avele. Lama i lo werer a ile vel ma ilemi pelekpol nge ur ako i velpol.

Jisas ile wainlanga or aini o thopol a Jisas a Emeus a sovengalo.

(Mak 16:12-13)

¹³ Na nge nang aken Jisas ile wainlanga or aini o es a rem ako iion a Emeus ako i voth mela tie a Jerusalem na i pavurvur nge kilomita or mule pa omole pothoi omole.

¹⁴ Na o ri pel nge ur alavusnga aken i velpol.

¹⁵ Ma o es na o ri pel nge osivenga na Jisas i velpol a or nge ma i es tomo nge or.

¹⁶ Aveto o ate i avele.

¹⁷ Ma Jisas i ria or paini ve, “Na thomu o es na thomu paini o ri pel nge uneke?”

Ma o mitu ma otheki a tanging.

¹⁸ Na oa omole aken iion a Kliopas na i nina Jisas ve, “Ava wong ini long aken wong voth a Jerusalem na engom inga ake lomum mire nge ur areko i velpol nge nang areko o vus lale, kene avele.”

¹⁹ Na Jisas i nina i ve, “Ur nekere?”

Na o ria i ve, “Ur areko i velpol nge a Jisas aken ini Nasaret anga, aken ini a God ile riong elnga, na ile riong na ile omaing i engeng rintet aken a God itheki tomo mun a tokokoere otheki.

²⁰ Na ler pris kimangare na ar pom-pomere o sungu i a Romre omeni mo aro i mit nge riong aken aro i rin nge, na o pamona i a won ngoronga nge.

²¹ Na them the nge i aken aro i ol werer Israelre a ole ngarangre nge. Na e mun e aken ponange ini nang menga aken ur areken i velpol nge.

²² Na seng pelie aken a them nge, o palemi vurpol them nge ur areko i thopol i aken rulpoalal ponange o es a ia vuvepun,

²³ aveto i thopol aken peti avele. Na o lo werer a them nge me, ma o ri ve i thopol a God ile enselre aken o ria or ve, ponange i mimi werera lale.

²⁴ Na tokokoe pelie aken a them nge, o es mun a ia vuvepun la na o thopol i ma i ranga ve aken sangre o ri nge. Aveto aken ol inga aken i thopol ol a Jisas ol avele.”

²⁵ Lama Jisas i ria or ve, “Lomu mire i oror, na lomu lemioong i el viri ur areko God ile riong elngare o ri nge, kene avele.

²⁶ Na God i ri ve toko aken i ateal i mo aro i el werer ile tokokoere, aro i el tel matheong lamo i el ol engengeng aolonga a God ilo sei.”

²⁷ Na Jisas i panine mun or paini oleme nge riong alavusnga aken i ri nge isivenga, na i patea nge a God ile riong aken Moses i wat i na i mulal nge a God ile riong aken ile riong elngare o wat i.

²⁸ Na o es toto a rebo aken o es nge, aveto Jisas i oma ranga ve aken aro i es alpo,

²⁹ aveto or paini o rialalu i ma o ri ve, “Aro ong voth tomo tel nge them, eneke penie rintet lale.” Mako i nongal inga or paini okei ma i voth tomo e or.

³⁰ Ma i menu mo i an tomo nge or, mako i ela bret na i ri sivengaing a God nge na i reku i lamako i sungu i a or paini nge.

³¹ Mako oleme rumnga i thep na o ate ol i, aveto i penthal rusa a olo sei.

³² Ma o ria pel nge osivenga ve, “I nunganga, ile riong aken i panine a God ile riong a it nge, a sovengalo, i ranga ve ini won sesenga.”

³³ Na a ur e avele, na o plosa ma o es werer a Jerusalem la. Na o thopol Jisas ile wainlanga or mule pa omole pothoi omole aken i pathun tomo mun nge tokokoe mun pelie.

³⁴ Na o ria or paini ve, “I nunganga, Toko Pomnga i los werera lale. Na i velpoltun a Saimon.”

³⁵ Na or paini o ria mun or nge ur alavusnga aken i velpol a or paini nge a sovengalo, nako or paini o ate senu ol Toko Pomnga aken i reku bret.

Jisas i velpoltun ile wainlangaere.
(Mak 16:14-18; Jon 20:19-23; Pakeke 1:3-

5)

³⁶ Na rongan or paini o ri, na Jisas i velpoltun or, ma i ria or ve, "Lemi moring aro i voth tomo nge thomu."

³⁷ Ma or alavusnga o kukuk nge ma o ngeip, eneke olemi ve o thopol ake ini toko oni.

³⁸ Ma i ria or ve, "Mothong tova o kukuk, na o mothong tova lomumu pelekpol.

³⁹ Na o thopol menik salemi na o thopol mun evek naro lomumu mire ako ini tho re ake. Na o krim rum tho, tho ranga ve ini toko oni avele, eneke nik peti na pokinngek ake ru i voth."

⁴⁰ Na i ri venen aken lama i pathengal or nge imeni salemi na ieve.

⁴¹ Na olemi sivenga rintet, aveto rongan olemi pelekpol na olempio nge i ako ini neneanga rongan. Mako i nina or ve, "Aning pelie aken ru i voth?"

⁴² Mako o sungu silang menenga epee a i nge.

⁴³ Ma i ela i ma i an i a otheki.

⁴⁴ Lama i ria or ve, "Na nge wop lemi ako tho voth tomo nge thomu nomenaga, tho ria mun thomu nge ur areke. Na ur alavusnga aka i ri nge tho, aka a God ile riong aka Moses na God ile riong elngare o wat i, i velpol nunganga lale."

⁴⁵ Mako i panine ole mire, nge ur areko i voth a God ile erere nge.

⁴⁶ Ma i ria or ve, "Riong ake i voth a God ile erere nge, 'Toko aka God i ateal i mo aro i el werer ile tokokoere, aro i el tel matheong naro i los werera nge rinong tova ve nang or me i vus."

⁴⁷ Naro tokokoere o el engenging nge iion naro o panongpol nge vothung kerenga onolpotnga na nge sovengalo aka aro God ilemi simikal vothung kerengare nge. Naro ole panongpolong aro i patea a Jerusalem na i mulal nge pen alavusnga ake ru a ulue.'

⁴⁸ Naro thomu o panongpol nge ur areko thomu o thopol i.

⁴⁹ Naro tho pakeu Oni Riringa a thomu nge me. Ini ur aka Vovo i kin ile riong nge lale ve aro i sungu i a thomu nge. Aveto aro thomu o men inga a rem pomnga i

pavurvur aka la nge nang aka aro thomu o el a God ile engenging nge."

God i ela Jisas a Pen a Urvet la.
(Mak 16:19; Pakeke 1:9-11)

⁵⁰ Lama i wolpot or a Betani la. Na i paesa imeni alaini roro ma i nong a God nge mo aro i oma senu nge or.

⁵¹ Na rongan i nong na God i elteta i a or nge, ma i paesa i a Pen a Urvet la.

⁵² Ma o lotual i ma o lo werer a Jerusalem tomo nge lemi sivengaing aolongga.

⁵³ Na evelelnga ol, o pathun a Lotu Tepun a Vel a lok lemi na o mosal ol inga aka ini a God iriseanga.

Na i re aken. I vus.

Panongpolong Sivenga aka Jon i wat i Jon Ritetong nge a Jon

Panongpolong Sivenga aka Jon i wat i, kene Jon aka ini a Jisas ile pakeke i wat i mo aro areko o tital i aro olemio aka ve, Jisas ini toko aka God i ategal i ve aro i el werer ile tokokoere. Na Judare o apet toko aken ini Mesaia eve Krais. Na ini mun i a God Itun, naro i pamimi tokokoere nge ole vothung kerenga. (Jon 20:31) Na Jon i pathengal aka ve, Jisas aka ini a God nunganga, i velpol ini toko neneanga, na i mimi ake ru a ulue mo aro i pathengal it nge a God. (14:7-11) Na i venen aken, mako Jon i apet a Jisas ini "Riong", eneke ile mimiong i pathengal it nge a God. (1:1-18) Na Jon i ri papulua aka ve, Jisas i velpol mo aro i sung mimiong aka aro ile vusonga avele a tokokoe areko olemio nge i. (1:12; 3:16; 3:36; 5:24; 6:40; 10:28) Na i ri mun aka ve, Jisas ini a God Itun na so ol e avele aka aro tokokoere o es a God nge la, ini a Jisas ienga inga. (5:19-27; 10:30; 11:27; 14:6)

I ranga ve aka God ile riong i velpol ini toko, na i voth ake ru a tokokoere oa lemimi

(Vonge 1:1-51)

Jisas i ranga ve ini Riong na theki lalainga.

¹ Na nomenga nge wop lemi aka ulue i velpol rongan, Riong i voth tel lale, ma Riong aken i voth tomo nge a God, na Riong aken ini a God.

² Na nomenga vet aka nge patenga, kene i voth tomo nge a God.

³ Na God inga i ria Riong aken mo aro i pamenu ur alavusnga, na ur e avele i velpol polpol. Avele! Ur alavusnga aka i voth, ienga inga aka i pamenu ir.

⁴ Na ienga inga ini mimiong tepun, na mimiong aken i ranga ve ini theki lalainga aka i pathengal tokokoere nge ur aka i nunganga.

⁵ Na theki lalainga aken i totun mideng, na mideng i pavurvur aro i seltun i avele.

⁶ Lamako God i pakepot ile pakeke, ini toko omole aka iion a Jon.

⁷ Na i es me mo aro i panongpol tokokoere nge theki lalainga aken mo aka aro or alavusnga aro o nongpol ile panongpolong aken naro olemio ol nge i.

⁸ I kene ini theki lalainga aken avele, i es me mo aro i panongpol nge theki lalainga aken.

⁹ Na theki lalainga aken ini theki lalainga nunganga, aka i esu a ulue me mo aka aro i totun toko alavusngare mo olemi mire nge ur aka i sivenga.

¹⁰ Na Riong aken kene i voth ake ru a ulue, na nomenga God i ria i mo aro i pavelpol ulue ake, aveto toko na seng ake ru a ulue, o ate senu i avele.

¹¹ Ma i eso a ile rem tepun, aveto ilengare o elo i avele.

¹² Aveto pelie kene, o elo i ma olemio nge i, mako i sung engenging a or nge mo aro o velpol ini a God itutunre.

¹³ Na o velpol ini a God itutunre ranga ve aka tokokoere o pavelpol otutunre nge, kene avele, na nge otitemaere olemi avele. Aveto God ienga inga i oma or mo o velpol ini itutunre.

¹⁴ Na Riong aken i velpol ini toko, na i vual nge lemi esaling na riong nunganga na i mimi tomo nge it. Na te thopol aka God i papomnga i, eneke ini a God Itun re inga aken aka i esu me.

¹⁵ Ma Jon i panongpol nge i na i presa viringa ve, "Toko ake ini toko aton tho ria thomu nge ve, 'Toko aka i rumongal nge tho, kene i pomnga nge tho, eneke i voth tomo nge a God nomenga lamako nina i maneu ol tho.'

¹⁶ Na it alavusnga te elel ile sungong sivengare opisleonga, eneke i vual nge lemi esaling nge it.

¹⁷ Na God i sung ile patorong a Moses nge mo aro i sungu i a it nge. Aveto God ile lemi esaling na ile riong nunganga o es a it nge me, nge a Jisas Krais.

¹⁸ Na toko e avele aka i thopol a God, aveto Itun omole inga aken i mun re inga ake ini a God na i voth a Itema ilo sei, i kene, i panine tokokoere olemi nge i.

Jon aka ini toko paninuonga i ritet nge isivenga.

(Matiu 3:1-12; Mak 1:1-8; Luk 3:1-18)

19 Mako Judare oa pompomere ako o voth a Jerusalem o pakepot pris pelie na ole opoalingare mo aro o nin a Jon ve, “Ong ini ao?”

20 Aveto Jon i wotum avele, i ritetu i a or nge ve, “Tho ini toko aka God i ateal i ve aro i el werer ile tokokoere, kene avele.”

21 Mako o nina mun i ve, “Ong ini ao? Ong ini a Elaija?”

Ma i olal ole riong ve, “Avele! Tho ini a Elaija avele.”

Mako o ria i ve, “Na ong ini a God ile riong elnga aka them men tetal i?”

Ave Jon i olal ole riong ve, “Avele!”

22 Na o ria mun i ve, “Aro ong ria them, ong ini ao, mo aka aro them el lom riong olalnga a tokokoe areko o pake them me, na ong ri senu a them nge sivengom.”

23 Mako Jon i olal ole riong ma i ripot riong aka God ile riong elnga a Aisaia i wat i nomenga ve,

Tho ini toko omole

ako tho presa pres a pen polpolnga ve, ‘O pavengveng Toko Pomnga ile sovengalo mo aro i es nge me.’” *Aisaia 40:3*

24 Lamako, Parisi pelie aka ole mukalin-gare o pake or a Jon nge la,

25 o nina mun i ve, “Na eve ong ini toko aka God i ateal i ve aro i el werer ile tokokoere avele, na eve ong ini a Elaija avele, na ong ini a God ile riong elnga aka them men tetal i, kene avele, na i vova aka ong paninu tokokoere, e?”

26 Na Jon i olal ole riong ve, “Tho paninu tokokoere nge thei, aveto toko e aka i mit tomo nge thomu na lomumu mire nge i avele,

27 aro i rumongal ol a kimek, na tho ini toko sivenga avele na tho pavurvur avele aka aro tho es totho a ilo sei mo tho inospot ile esonga a we.”

28 Na ur areke i velpol a thei a Jordan wo epee aka a Betani, ini wop aka Jon i paninu tokokoere nge.

Jisas ini toko aka i eltetpot tokokoere ole vothung kerenga.

29 Na nge erangunga Jon i thopol a Jisas aka i es me, ma i ria ve, “O thopol, ake ini a God ile Sipsip Tun* aka aro i rin mo aro i eltetpot toko na seng ake ru a ulue ole vothung kerenga.

30 Toko ake tomo tho ri nge ve, ‘Toko aka i rumongal nge tho, kene i pomnga nge tho, eneke i voth tomo nge a God nomenga lamako nina i maneu ol tho.’

31 Na nomenga sivengek lemik mire nge toko kathnga aka i rumongal nge tho avele, aveto tho es ake me, ve aro tho paninu tokokoere nge thei, mo aka aro thomu Israelre aro lomumu mire nge i.”

32 Lamako Jon i ritet i a or nge ve, “Tho thopol Oni Riringa aka i esu a Pen a Urvet lemi me, ma i ranga ve ini pothu, ma i mena a i nge.

33 Na nomenga sivengek lemik mire nge i avele, aveto God aka i pake tho me ve aro tho paninu tokokoere nge thei, i ria tho ve, ‘Naro ong thopol Oni Riringa aka aro i esu me, mo i mena a toko e nge, i re aken ini toko aka aro i paninu tokokoere nge Oni Riringa.’

34 Na tho thopol i lale, na tho ritet thomu ve, ake ini a God Itun.”

Jisas i ateal tel toko or me aka aro o velpol ini ile wainlangaere.

(Matiu 4:18-22; Mak 1:16-20; Luk 5:2-11)

35 Na erangu mun, na Jon i mit mun e pen aken tomo nge ile wainlanga or aini.

36 Ma Jon i thopol a Jisas aka i es me, ma i ria ve, “O thopol, ake ini a God ile Sipsip Tun.”

37 Na ile wainlanga aini o nongpol ile riong venen aken, mako or paini o panes ol a Jisas.

38 Mako Jisas i the singal werer ma i thopol or paini aka o panes i, ma i nina or paini ve, “Thomu paini o vo neke?”

Ma or paini o olal ile riong ve, “Rabai, lom vel kath?” Na Rabai ake mirenga aka ve, “Pamirealinga.”

* 1:29: Na Judare ole vothung vet aka aro o sungu sipsip a prisre nge mo o so rin i, maken aro ia mla i seltun ole vothung kerenga. Aveto Jisas ile rinong aro i patitepot ole vothung kerenga areken ru i ngo tomoal a God itheki.

³⁹ Ma Jisas i olal or paini ole riong ve, “O es me mo o thopol i.” Mako or paini o es tomo ol nge i ma o thopol vel ako i voth nge. Na or paini o voth tomo nge i, na i patea nge nang theki i el or penel nge penie ma i pavurvur aka la nge nang le sivlukong.

⁴⁰ Na oa omole kene iion a Andru, aka ini a Saimon Pita itein.

⁴¹ A ur e avele, nako Andru i ortet itein a Saimon, ma i ria i ve, “Them thopol Mesaia lale.” (Na Mesaia mirenga aka ve, toko aka God i ateal i ve aro i el werer ile tokokoere.)

⁴² Lamako Andru i wol a Saimon a Jisas nge.

Ma Jisas i thopol i ma i ria i ve, “Iom a Saimon aka ini a Jon itun, aveto aro tho leng ol ong nge a Sipas.” (Nge Grikre okei ini a Pita, aka i mirenga ve ini um aolonga.)

Jisas i leng a Pilip ome a Nataniel.

⁴³ Na erangu mun ma Jisas ilemi ve aro i es a Galili, ma i es a pen aka Pilip i voth nge, ma i ria i ve, “Es me mo ong panes tho.”

⁴⁴ Na Pilip ile a Betsaida, nge rem pomnga aka Andru ome a Pita o voth nge.

⁴⁵ Na Pilip i kath a Nataniel ma i thopol i ma i ria i ve, “Them thopololo toko aton Moses i ri nge aka nge ile patorong nomen-ganga na God ile riong elngare o wat mun nge i, ini a Jisas aka ini a Josep itun, ile a Nasaret.”

⁴⁶ Na Nataniel i olal ile riong ve, “Ken, i pavurvur aka aro ur sivenga aro i velpol a Nasaret, e?”

Na Pilip i olal ile riong ve, “Es me mo thopol i.”

⁴⁷ Na Jisas i thopol a Nataniel aka i es i me, ma i ria ve, “Toko ake ini toko Israel nunganga, ini toko le apaltetonga avele.”

⁴⁸ Ma Nataniel i nina i ve, “Lomum mire nge tho vava?”

Ma Jisas i olal ile riong ve, “Na Pilip i lenga ong rongan, na tho thopol tel ong lale aka ong men a pupos tepun.”

⁴⁹ Lamako Nataniel i olal a Jisas ile riong ve, “Pamirealinga, ong ini a God Itun, na ong ini Israelre ole nepes.”

⁵⁰ Lamako Jisas i ria mun i ve, “Lomumo ol nge tho, eneke tho ria ong nge aka ve, tho thopol ong aka a pupos tepun. Aro ong thopol ol ur aka i aolonga nge ake.”

⁵¹ Na i ria mun or ve, “Tho ri nunganga a thomu nge, aro thomu o thopol Pen a Urvet lemi aro i thep naro God ile enselre aro o esa la na o esu me a Toko Pomnga Itun nge.”

Jisas i pathengal ile engenging nge pathepolong omanga, aken i mirenga ve God i ateal i

2

(Vonge 2:1–4:54)

Jisas i eksing thei mo ini vain.

¹ Na nang or aini i lutetu ma o oma peangeong a aning aka a rem pomnga a Kana a epee aka a Galili. Ma Jisas inina i voth nge.

² Na o leng mun a Jisas ome ile wain-langaere mo o supo mun nge peangeong a aning aken.

³ Ma nge aka oa vain i vus, lama Jisas inina i ria Jisas ve, “Ken, oa vain aton i vus.”

⁴ Ave Jisas i olal ile riong ve, “Nina, i vova ake ong ria tho nge, e? Nang aka aro tho patea lek omaing nge i velpol rongan.”

⁵ Lama Jisas inina i ria toko umongare ve, “O oma omaing ranga ve aka i ria thomu.”

⁶ Na thei pokin aolonga or limae aka o oma i nge anral o ngo, aka Judare o pariri osivenga nge mo o riri a God itheki, ake ini ole vothung vet aken, ma or omole omole ole aolongaing o pavurvur nge lita or mule pa mule.

⁷ Lama Jisas i ria umongare ve, “Thomu o saveu thei nge thei pokin areke mo o vual.” Mako o palelu thei nge ma o vual sipsip.

⁸ Lamako i ria or ve, “O savea thei pelie mo el i a aning tokoninga nge la.”

Ma o oma i vene re aken.

⁹ Na thei aken i eksing ma ini vain lale. Ma aning tokoninga i tongporumo vain aken thinnga, na ilemi mire avele nge

wop kathnga aka o el i nge me. Aveto umongare aka o save thei aken, olemi mire nge. Lama i leng ol toko aka i peange a i nge me,

¹⁰ ma i ria i ve, “Toko alavusnga, aro ve o oma aning, aro o pamukal tel vain sivenga aka a tokokoere nge, mo aro o thin tel i a mukaling mo aro otheki weng weng, lamoko aro o sung vain le masesnga a or nge, aveto wong, wong paen sise vain aka i sivenga rintet ake, makola i pavurvur ol ake wong elpot ol i.”

¹¹ Ake ini ine pathepolong mukalinga aka Jisas i oma i. Ma i oma i a rem pomnga a Kana a epee aka a Galili. Na nge ile omaing aken i pathengal aka God i papomnga i, mako ile wainlangaere ole mio ol nge i.

¹² Lamako Jisas ome inina na ititeinre tomo nge ile wainlangaere o es a Kaperneam. Na o voth nge pen aken nge nang pelie.

God ile Lotu Tepun a Vel i voth mo aro tokokoere o nong nge, naro Prisre o ongtu tokokoere ole sungong nge.

(Matiu 21:12-13; Mak 11:15-17; Luk 19:45-46)

¹³ Na Judare oa aning aka o apet i ve ini Punseleainga a Aning i toth lale, mako Jisas i es ol a Jerusalem la.

¹⁴ Ma i eso a Lotu Tepun a Vel a lok lemi ma i thopol tokokoere aka o men tomo nge ole lulu aka ini bulmakaure, na sipsipre na pothure, na i thopol mun tokokoere aka ru o men a ole ring ma o tepopal Romre ole umtun nge Judare ole umtun.*

¹⁵ Lamako Jisas i ela we ma i oma solitlinga nge, mako i wistetpot or alavusnga a lalanga tomo nge bulmakau na sipsipre. Na i vurpoltun mun tokokoere aka o tepopal pel nge umtun ma i eksingtunu ole ringre ma ole umtun i vathathar.

¹⁶ Mako i ria tokokoe areko o tepopal men nge umtun ve, “Thomu o elpot lomu lulu areken a lalanga la. O mothong tova oma Vovo ile vel mo ini olinga a vel!”

* **2:14:** Nge aka o tepopal umtun areken o kem pelie mo ini ole. † **2:24:** Jisas ilemi mire nge a Jisas.

¹⁷ Na ile wainlangaere o nongpol ile riong aken, mako ole mi rumu riong e aka i nunganga nge a Jisas aka i voth a God ile erere nge aka i ri ve,

Lek asaguong nge lom vel Vovo, i rangga ve ini won sesenga aka i anlel a lemik.” *Buk Song 69:9*

¹⁸ Lama Judare ole mukalingare o ri werer a i nge ve, “Na pathepolong kathnga aka aro ong oma i mo i pathengal them nge aka God i ria wong ve aro ong oma i venen aken, e?”

¹⁹ Lamako Jisas i olal ole riong ve, “Aro ve thomu o teu Lotu Tepun a Vel ake, aro nge nang or me inga naro tho pamit werera mun i.”

²⁰ Mako Judare o olal werer ile riong ve, “Ken, vel ake o ari i nge tovu po or mule pa penel pothoi limae, na ong pavurvur aka aro ong pamit werera mun i nge nang or me inga?”

²¹ Aveto Lotu Tepun a Vel aken Jisas i patongrum i aka nge isivenga ini peti.

²² Na nge wop lemi aka God i palos werera i nge rinong, ile wainlangaere ole mi rum werer ile riong aka i ri nge, na ole mio nge a God ile riong aka i voth a ile erere nge, tomo mun nge a Jisas ile riong.

Jisas ilemi mire nge toko alavusnga ole mi.

²³ Na nge wop lemi aka Jisas i voth a Jerusalem nge Punseleainga a Aning, toko na sangre pom o thopol pathepolong pom aka i oma i, mako ole mio nge i.

²⁴ Aveto Jisas ilelemioong i voth a or nge avele, eneke ilemi mire nge or alavusnga oopo lemi.†

²⁵ Na toko e avele i pavurvur aro i ritet i nge tokokoere ole mi, eneke ilemi mire nge or alavusnga ole mi lale.

3

Nikodemus i leng leng tomo nge a Jisas.

¹ Toko omole e aka ini Parisi, na ini mun i Judare oa pompomere or mule pa limai e, iion a Nikodemus.

² Na i es a Jisas nge pemlik, ma i ria i ve, "Pamirealinga, lemimem mire ako ong ini pamirealinga e ako i es a God nge me. Toko e avele i pavurvur aka aro i oma pathepolong aka ong oma ir, tova God i opoal i nge avele."

³ Lamako Jisas i ria i ve, "Tho ri nunganga a wong nge, aro ve toko e i velpol ponganga werer mun avele, i pavurvur aro i thopol a God ile menong e nepes lemi avele."

⁴ Ma Nikodemus i kukuk ma i nin werer a Jisas ve, "Aro i vava nge toko aka tova i poma lale? I pavurvur aro i eso werer mun a inina iopo lemi mo i velpol ponganga werer?"

⁵ Ma Jisas i olal ile riong ve, "Tho ri nunganga a wong nge, aro ve toko e i velpol ponganga nge thei tomo nge Oni Riringa avele, i pavurvur aro i eso a God ile menong e nepes lemi avele.

⁶ Ur aka toko ulue anga i pavelpol i, aken ini ur ulue anga vet aken, na ur aka Oni Riringa i pavelpol i, aken ini Oni Riringa iana.

⁷ Mothong tova kukuk nge aka tho ria ong ve, varo thomu o velpol ponganga werer mun.

⁸ Thue kene i panes vengveng aka ini ile so, ma i thu a pen elonga. Na ong nongpol inga aka ini ile avvuvong, na lomum mire nge ile velpolainga tomo nge ile thuuthuainga, kene avele. Toko alavusnga aka o velpol ponganga nge Oni Riringa kene o vene mun aken. Oni Riringa i oma ile omaing a or nge, aveto o thopol i avele."

⁹ Lamako Nikodemus i olal ile riong ve, "Ur aken aro i velpol vava?"

¹⁰ Ma Jisas i olal ile riong vene: "Ong ake ini Israelre ole pamirealinga e, na i vova ake lomum mire nge ur ake avele, e?

¹¹ Tho ri nunganga a wong nge, them panongpol nge ur aka lemimem mire nge, na them ripot ur aka ranga ve them thopol i, aveto omu e avele i nongala lemem panongpolong.

¹² Na tho tongporum lomumu panninga nge ur ulue anga, ave lomumuo nge avele, na aro ve tho ria thomu nge ur Pen a

Urvet anga, i pavurvur mun aro lomumuo nge avele.

¹³ Na toko e avele i esa a Pen a Urvet lemla, ini inga Toko Pomnga Itun aka i esu a Pen a Urvet me.

¹⁴ Na nomenga Moses i viv pilimo ma i pamita a won lonungnunga a pen polpolnga, ma i pamona pilimo aken nge roro,* na i ranga ve ini mun i Toko Pomnga Itun aro o pamona mun i venen aken

¹⁵ mo aka aro tokokoe areko olemio nge i, aro o el mimiong aka aro ile vusonga avele.

¹⁶ "Eneke God ia sagu rintet toko ulue angare, mako i sungpot Itun omole inga aken mo aka tokokoe areko olemio nge i, aro o penthal avele, naro o el mimiong aka aro ile vusonga avele.

¹⁷ Eneke God i pakeu Itun a toko ulue angare nge me, ve aro i paomelal or nge ole vothung kerenga, kene avele, i pakeu i me mo aro i velpol ini ole pamimionga.

¹⁸ Na tokokoe areko olemio nge i, o voth ol a God ile paomelaling lemi avele, aveto areko olemio nge i avele, o voth ol a God ile paomelaling lemi, eneke olemio nge a God Itun omole inga aken avele.

¹⁹ Na paomelaling tepun kene i vene: Pen lalanga i esu a ulue me lale, aveto tokokoere o sis mideng na oni plong nge pen lalanga, eneke ole vothung i kerenga.

²⁰ Areko o oma vothung kerenga, kene oni silal pen lalanga ma oni plong ve aro o eso a pen lalanga lemi, eneke oni plong ve aro ole vothung kerenga aro i ngo patu a lalanga.

²¹ Aveto tokokoe areko o panes a God ile riong aka i nunganga, aro o eso a pen lalanga lemi mo aro tokokoere aro o thopol ur aka o oma i, aka o oma i a God nge."

Jon aka ini toko paninuonga i ritet nge a Jisas ini ao.

²² Lamako, Jisas ome ile wainlanguaere o es a epee aka a Judia, ma i esu esa tomo nge or nge nang pelie, na nge wop lemi aken i oma paninuong.

²³ Na Jon mun i oma paninuong aka a Ainon aka i totho a Salim, eneke thei i pom

* ^{3:14:} Na tenesing ake i voth nge a Namba 21:8-9.

nge pen aken. Na toko na sengre pom o es a i nge, ma i paninu or.

²⁴ (Na nge wop lemi aken Herot i paeso a Jon a mang a midenga rongan.)

²⁵ Na Jon ile wainlanga pelie tomo nge toko Juda omole ako o pun pel nge riong nge Judare ole paririong a vothung.

²⁶ Lama o es a Jon nge, ma o ria i ve, "Pamirealinga, lomum rum mun toko aton thomu paini o voth a Jordan wo epee, toko aton ong ritet nge? Ken, i vava mun ake toko aken i oma mun paninuong na toko elonga o wilal a i nge la, e?"

²⁷ Na Jon i olal ole riong ve, "Toko e aro i oma polpol omaing e avele, ini inga God aka aro i sungu i a i nge.

²⁸ Ma i vene re aka tho ria thomu nge lale ve, 'Tho ini toko aka God i ateal tho ve aro tho el werer ile tokokoere, kene avele, aveto God i pake tho mo aro tho mukal tel nge i.'

²⁹ Na seng aka o suntun i lale, ini toko aken ile. Na toko aken ithanga i men tetal i nge ile peangeong. Na aro ve i nongpol aka i velpol, aro ilemi sivenga. Na i vene mun re aken aka lemik sivenga rintet nge i.

³⁰ Naro iion i esa roro, na tho aro iok aro i esu ruru.

³¹ "Toko aka i esu a Pen a Urvet me, kene i pomnga nge toko alavusnga. Na toko aka ini ulue anga, kene ini toko ulue anga vet aken, ma i ri aka nge ur ulue anga. Na toko aka i esu a Pen a Urvet me, kene i pomnga nge toko alavusnga.

³² Na i re inga aka i panongpol nge ur areko i nongpol i na i thopol i aka a Pen a Urvet, aveto e avele i nongal ile riong.

³³ Na toko e aka i nongal ile riong, i pathengal aka ve, ilemi ve, God ile riong i nunganga.

³⁴ Na toko aka God i pakeu i me, i panongpol inga aka nge a God ile riong, eneke God i pavual rintet i nge Ioni Riringa.

³⁵ Na Vovo a God ia sagu rintet Itun aken ma i sungu ur alavusnga a imeni.

³⁶ Na tokokoe areko olemio nge Itun o el mimiong lale aka aro ile vusonga avele. Na tokokoe areko o avsa Itun aken ile riong, i pavurvur aro o el mimiong aken

avele, eneke God ile lemi klingong rongan i voth a or nge."

4

Jisas i ri tomo nge sang Samaria anga.

¹ Na Parisire o nongpol aka toko na sengre pom o es a Jisas nge, na o el paninuong na o velpol ini ile wainlangaere na oa titaling i aolonga nge a Jon ile wainlangaere.

² Aveto Jisas kene i oma ol paninuong nge toko e avele, ini inga ile wainlangaere aka o oma ol paninuong.

³ Na Jisas ilemi mire nge aka Parisire o nongpol ile kimaing ve toko pulua aka o panes i, mako i plospot a Judia ma i lo werer a epee a Galili la.

⁴ Na i panes a God ilemi, mako i panes so aka i eso a epee a Samaria lemi pat.

⁵ Mako i velpol nge rem aka iion a Sikar aka a epee a Samaria. Na rem aken i toth inga nge ulue epee aka Jekop i sungu i a itun a Josep nge.

⁶ Na Jekop ia thei meta aka i to i, i voth nge. Na nang theki i mitpoa, na Jisas i molos nge esong, mako i thau i nge thei meta aken.

⁷ Na seng Samaria anga aka i es me mo i save, ma Jisas i ria i ve, "Sungu thei me mo tho thin."

⁸ Na ile wainlangaere o es a rem pomnga lale mo o ol aning.

⁹ Ma seng Samaria anga aken kene i olal ile riong ve, "I vova ake ong nonga thei a tho nge, e? Ong aken kene ini Juda na tho ake ini Samaria anga." Na i ri venen aken, eneke Judare oni silal Samaria angare.

¹⁰ Na Jisas i olal ile riong ve, "Aro ve lomum mire senu nge a God ile sungong, na nge toko aka i nonga thei a ong nge, maken aro ong nong a i nge, naro i sungpot thei aka i sung mimiong a ong nge."

¹¹ Lamako seng aken kene i olal werer mun a Jisas ile riong ve, "Om thei pokin avele, na thei ake i voth a volo lemi aka i lukuluku, naro ong save thei aka i sung mimiong a pen kath ol, e?

¹² Na titevime a Jekop i toa thei meta ake ma i sungu i a them nge. I mun kene ome itutunre o thin mun nge nomenga ome ole mekerem areko o theal ir, or

vusnga o thin nge. Ava lomum aken ake, ong pomnga nge a Jekop?"

¹³ Lama Jisas i olal ile riong ve, "Tokokoe areko aro o thin nge thei ake, aro thei i pun werer mun or."

¹⁴ Aveto areko o thin thei ake aro tho sung i a or nge, i pavurvur aro thei i pun werera ol or avele. Na thei ake aro tho sungu i a or nge, aro i velpol ranga ve ini thei povovloainga a olemin na thei aken aro i sung mimiong ake aro ile vusonga avele a or nge."

¹⁵ Na seng aken i ria Jisas nge ve, "Tho sis ve aro ong sung thei aken a tho nge, maken aro thei i pun ol tho avele. Naro tho es me mo tho save werer thei avele ol."

¹⁶ Lama Jisas i ria ve, "Es mo ria tel ewom tomonnga mo o es me."

¹⁷ Mako seng aken i olal ile riong ve, "Tho ake ewok e avele." Ma Jisas i ria i ve, "Ong ri nunganga ake ewom avele,

¹⁸ ewom or lim tel lale na toko aken ru thomu paini o voth tomo ol nge pel, aken kene ini ewom nunganga avele. Na lom riong aken i nunganga."

¹⁹ Na seng aken i ria Jisas ve, "Toko Pomnga, lemik mire ake, ong ini a God ile riong elnga e."

²⁰ Na nomenga titevimevre o lotual a God a tete ake, aveto thomu Judare o ri ve Jerusalem ini pen ake aro te lotual a God nge."

²¹ Lama Jisas i ria i ve, "Tho ri nunganga a wong nge, nang e ake aro i es me ake tokokoere aro o lotual ol Titemer a tete ake avele ol, na ake la a Jerusalem mun avele.

²² Thomu Samaria angare o ri ve thomu o lotual a God, aveto lomumu mire nge i avele. Aveto them Judare, them lotual a God ake lemimem mire senu nge i, eneke them pavurvur aro them ritet nge soven-galo ake aro God i el werer ile tokokoere nge.

²³ Na nang e ake aro i es me, na i velpol lale, ake tokokoere ake o lotual a God, aro o lotual i nge a Oni Riringa ile engengeng aken ini lotuong nunganga, aken ranga ve ake God i sis ve aro tokokoere aro o lotual i.

²⁴ Eneke God Ioni inga ake i voth, na tokokoere ake o lotual i, aro o lotual i

nge a Oni Riringa ile engengeng, aken ini lotuong nunganga."

²⁵ Ma seng aken i olal ile riong ve, "Lemik mire ake, toko ake God i ateal i ve aro i el werer ile tokokoere, aro i es me, na nge wop lemi ake i velpol nge, aro i ritet it nge ur alavusnga."

²⁶ Na Jisas i olal ile riong ve, "Na tho re ake tho palav tomo nge wong."

Jisas i ri riong agelalnga ake tokokoere o ranga ve ini ometa lemia.

²⁷ Na a ur e avele, nako Jisas ile wainlangaere o lo werer ma o thopol ake i leng leng tomo nge seng aken ma o kukuk nge. Aveto oa e avele i nina i ve, "Ong sis neke a i nge?" Eve "I vova ake ong leng leng tomo nge seng aken, e?"

²⁸ Lama seng aken i mothong lelu ia thei pokin na i lo werer a rem pomnga la ma i ria toko na sangre ve,

²⁹ "Thomu o es me mo o thopol toko omole ake i ripot ur alavusnga ake tho oma i nomenga. Ava ini toko aton God i ateal i ve aro i el werer ile tokokoere?"

³⁰ Mako o plospot a rem pomnga aken ma o es a Jisas nge la.

³¹ Lama ile wainlangaere o ri engeng a i nge ve, "Pamirealinga, i sivenga ake aro ong an tel."

³² Aveto i olal ole riong ve, "Ok aning i voth ake aro tho an i, ake lomumu mire nge avele."

³³ Na ile wainlangaere o nin werer pel osivenga ve, "Ava toko e i sungu ia aning lale?"

³⁴ Lama Jisas i ria or nge ve, "Ok aning kene i vene: Aro tho panes inga God ilemi ake i pakeu tho me, naro tho pavus ile omaing elonga ake i sungu i a tho nge.

³⁵ Na lomu riong omole i voth ake i ri ve, 'Aro ngov or penel i vus tel lamo aning i pavurvur nge lelnga.' Ave tho ria thomu, o the senu senu tel tokokoere areko o ranga ve ini ometa lemiare, o pavurvur nge lelnga lale.

³⁶ Na lelinga i el iolonga lale, na ranga ve ake i paen tomoal aning, i paen tomoal tokokoere mo aro o el mimiong ake aro ile vusonga avele. Na toko oinga tomo

nge toko lelinga aro or paini olemi sivenga tomo e pel.

³⁷ Na riong ake i nunganga na i vene: ‘Toko omole i o aning a ometa, na toko relnga e i lel i.’

³⁸ Na tho pake thomu a God ia ometa ako thomu o oma nge avele, mo o lel nge. Na toko relnga pelie o les tel i, na thomu o el opoaling nge ole omaing aken.”

Samaria anga pulua olemio nge a Jisas.

³⁹ Lama Samaria anga pom ako a rem pomnga aken o nongpola seng aken ile riong veno ako, “I ripot ur areko tho oma i nomenga.” Mako olemio ol nge a Jisas.

⁴⁰ Lama Samaria angare pom o es a i nge, ma o nong a Jisas nge ve aro i voth tel a or nge. Mako Jisas i voth a or nge, nge nang or aini.

⁴¹ Na pulua mun ako olemio nge i, eneke o nongpol ile panongpolong.

⁴² Ma o ria seng aken ve, “Lemimemo nge i, nge lom riongre, kene avele. Sivengemem them nongpol ile riong ma lemimem mire ako ve, toko re ake ini toko ulue angare ole pamimionga.”

Jisas i pamimia mukalinga omole itun.

⁴³ Na Jisas i voth tomo nge Samaria angare nge nang or aini aken, lamako i losa ma i es a epee a Galili.

⁴⁴ Na nomenga Jisas i ri vene, “God ile riong elnga e, aro ve i lo werer a epee ako i poma nge, tokokoere aro o papomnga i avele.”

⁴⁵ Aveto nge wop lemi ako Jisas i velpol a Galili, toko Galili angare o nongpoo i, eneke o voth tomo mun nge Punseleainga a Aning ako a Jerusalem ma o thopol omaing elonga aka i oma ir.

⁴⁶ Lama Jisas i lo werer a Kana a epee a Galili, nge rem ako i eksing tel thei mo i velpol ini vain. Na toko omole mun aka i voth mun a epee a Galili aka a Kaperneam, ini nepes ile umongare ole mukalinga, na itun tomonnga ini multhang.

⁴⁷ Na mukalinga aken i nongpol aka Jisas i lospot a Judia ma i velpol a Galili, mako i es a i nge mo i nong tangosing ve aro i es mo i pamimia itun, aka i toth aro i rin.

⁴⁸ Lama Jisas i ria i ve, “Aro ve thomu tokokoere o thopol paateeling na pathep-olong avele, aro lomumuo ol nge tho avele ol.”

⁴⁹ Aveto mukalinga aken i ria Jisas ve, “Toko Pomnga, te paviri la i toth aro tuk i rin.”

⁵⁰ Ma Jisas i ria i ve, “Ong es la, tum aro i mimi.” Na toko aken i rongo ile lemioong a Jisas ile riong nge, mako i lo werer.

⁵¹ Na nge ile esong a ile pen la, ile umongare o thopol i a sovengalo ma o ria i ve, “Tum aton i mimi lale.”

⁵² Ma i nina or ve, “I mimia nge nang theki or povaa?” Mako o ria i ve, “Nine nge nang meta i el omole nge penie, mako ini peti velnga i vus.”

⁵³ Mako wain aken itema ilemi rumtetu ve, nine kene nang meta i el omole na Jisas i ria i ve, “Tum aro i mimi.” Mako ome ile vel lemiare olemio ol nge a Jisas.

⁵⁴ Na ake ini a Jisas ile losaing paininga a Judia ma i es a Galili aka i oma pakukukaling paininga nge.

Jisas i oma ile omaing nge nang rialonga, aken i pamireal tokokoere nge omaing kathnga aka God ilemi sivenga nge

5 (Vonge 5:1-10:42)

Jisas i pamimia toko omole.

¹ Lamako Jisas i es mun a Jerusalem, eneke Judare o oma oa aning aolonga e aka.

² Na aka a Jerusalem thei povovloainga omole aka i aolonga i voth nge, na i voth totho inga a Jerusalem a lok thekia e aka o apet i ve ini “Sipsipre Ole.” Na nge Hibrure okei o apet thei aken ve ini a Betesda, na nge thei povovloainga wo peti aken valvale or lim o voth nge.

³ Na valvale or lim areken o vual nge areko oni multhang na areko otheki pros na areko oeve lil. [Or vusnga kene o men tetal re aka ini thei povovloainga aka tova aro i sia.

⁴ Eneke nang pelie Toko Pomnga ile ensel kene i esu a thei povovloainga lemi na i pasia thei. Na aro ve thei i sia, toko ni multhanginga ako i esu tel a thei aken lemi, aro i senu werer nge ni multhanging kathnga aka i voth a i nge.]

⁵ Na toko omole aka i ngo vet inga a valvale na ia ni multhanging kene i nomenga vet aka i pavurvur nge tovu po or mule pa me pothoi or limme.

⁶ Na Jisas i thopol i aka ru i ngo, na ilemi mire aka ia ni multhanging aken ini nomenganga vet, ma i nina i ve, "Ong sis ve aro ong senu werer?"

⁷ Lamako toko ni multhanginga aken i olal ile riong ve, "Toko Pomnga, aro ve thei i sia, lek toko e avele aka aro i manea tho mo i pavluku tho nge la. Na tho tongporum aka ve, tho esu nge la, aveto tokokoere o serpot tho ma o esu tel nge."

⁸ Ma Jisas i ria i ve, "Ong mita, mo ong ela lom ngoinga mo ong es."

⁹ A ur e avele na toko aken i senu werer, lama i mita ma i ela ile ngoinga ma i es. Na ur areke i velpol aka nge nang rialonga.

¹⁰ Mako Judare ole mukalingare o ria toko aka i senu werer ve, "Ake ini nang rialonga, na nge ler patorong i pavurvur aro ong el tomo lom ngoinga avele."

¹¹ Aveto i olal ole riong ve, "Toko aka i vural tho kene i ria tho ve, 'Ong ela lom ngoinga mo ong es.'"

¹² Lamako o nina mun i ve, "Toko anga aka i ria ong ma ong ela lom ngoinga ma ong es, e?"

¹³ Ave toko aka ru i senu werer kene ilemi mire nge toko anga aka i pamimi i, kene avele, eneke toko na seng pulua aka o voth nge pen aken ma Jisas i pasulalo nge or.

¹⁴ Lama Jisas i thopolo mun i a Lotu Tepun a Vel a lok lemi ma i ria i ve, "Nongpol, ong senu re lale aken na mothong tova oma ol vothung kerenga pelie, aro vene mo matheong aka i aolonga nge num multhanging aken aro i velpoltun mun ong."

¹⁵ Lamako toko aken i es ol ma i ria Judare ole mukalingare ve, "Ina Jisas re aton i pamimi werer tho."

¹⁶ Taro aka o patea ol nge a Jisas inisilangga, eneke Jisas i oma ur areke nge nang rialonga.

¹⁷ Aveto Jisas i ria or ve, "Ok Vovo i pesrou avele nge tokokoere oopoalnga, na tho mun aro tho oma mun venen aken."

¹⁸ Na ile riong aken i palemi vel rintet Judare olemi ma o engeng rintet ve aro o pun rin i, eneke i avsa ole patorong nge nang rialonga ienga avele, aveto i ri mun ve, God ini itema, na nge ile riong aken i ri ve i vur e pel tomo nge a God.

God i sungu engenging a Itun nge mo aro i oma omaing.

¹⁹ Na Jisas i olal Judare ole mukalingare ole riong ve, "Tho ri nunganga a thomu nge, God Itun i pavurvur aro i oma polpol ur e avele aka nge isivenga ilemi, na i oma inga ur aka i thopol i a Itema nge aka i oma ir. Na ur aka Itema i oma i, Itun mun aro i oma i.

²⁰ Eneke Itema ia sagu Itun, na i pathengal i nge ur alavusnga aka isivenga aro i oma i. Naro i pathengal mun i nge ur mun pelie aka aro Itun aro i oma i aka i aothelpot nge ur areko i oma i lale, naro thomu o kukuk nge.

²¹ Na ranga ve aka God i sung werer mimiong nge areko o rin lale, na Itun mun, aro i sung mun mimiong nge tokokoe areko i sis ve aro i sung i a or nge.

²² Na Itema aro i velpol ini tokokoere ole riong nongpolnга avele, eneke i sungu omaing aken a Itun nge lale, mo aro i velpol ini tokokoere ole riong nongpolnга,

²³ ve aro toko alavusnga aro o papomnга Itun aken ranga ve aka o papomnга mun Itema. Na areko o papomnга Itun avele, kene o papomnга mun Itema aka i pakeu i me, kene avele.

²⁴ "Tho ri nunganga a thomu nge, tokokoe areko o nongpol lek riong na olemio nge a God aka i pakeu tho me, o el mimiong lale aka aro ile vusonga avele, naro o mit nge riong avele, ke o sele ol rinong na o el mimiong lale.

²⁵ Tho ri nunganga a thomu nge, nang e aka aro i es me, kene i velpol lale, na tokokoe areko i ranga ve aka ooni o rin

lale, aro o nongpol a God Itun ikei na areko o nongal ile riong aken aro o el mimiong.

²⁶ Na ranga ve ako Vovo ini mimiong tepun, i sung engenging a Itun nge mo ini mimiong tepun.

²⁷ Na i sung ur alavusnga a Itun imeni mo i velpol ini riong nongpolnga, eneke ini Toko Pomnga Itun.

²⁸ “Thomu o mothong tova o kukuk nge lek riong ake, nang e aka aro i velpol aka toko alavusnga aka o rin na o voth a oa vuvepunre, aro o nongpol ikei,

²⁹ naro o plos werera a oa vuvepunre. Na areko o oma vothung sivenga, aro o los werera mo o el mimiong. Aveto areko o oma vothung kerenga, aro o los werera mo o mit nge riong mo aro God i paomelal or.”

Toko pulua mun aka o ritet mun nge a Jisas.

³⁰ Na Jisas ria mun or ve, “Na tho oma polpol ur e avele aka nge sivengek lemik. Na aro ve toko e i mit nge riong a thekik, aro tho sung riong a i nge ranga ve aka God i ria tho nge, aken kene lek riong i vengveng, eneke tho panes lemik avele, tho panes inga a God aka i pakeu tho me kene ilemi.

³¹ “Na aro ve tho ritet nge sivengek, aro lek riong aken ini ur polpolnga inga.

³² Aveto toko e aka i voth aka i ritet nge tho, na lemik mire aka ile ritetong aken kene i nunganga.

³³ “Na nomenga thomu o pake lomu tokokoere a Jon nge aka ini toko paninuunga ma i ritet nge tho na ile ritetong aken i nunganga.

³⁴ Lemik i voth nge tokokoere ole ritetong nge tho, kene avele, ave tho palemi rumal thomu nge a Jon ile ritetong nge tho, eneke tho sis ve aro God i pamimi thomu.

³⁵ Na Jon i ranga ve ini theki lalainga aka i an ma i to, na ile panongpolong i ranga ve ini the lalainga aka lomumu sivenga nge, aveto lomumu aken i palolo vet avele.

³⁶ “Aveto ritetong nge tho i voth aka i aolonga nge a Jon ile ritetong nge tho. Eneke omaing alavusnga aka tho oma i, ini omaing aka Vovo i sungu i a tho nge ve aro

tho pavus i alavusspot. Na lek omaing aken i ritet thomu ve, Vovo i pakeu tho me.

³⁷ Na Vovo aka i pakeu tho me, isivenga i ritet mun nge tho, na nge ikei, thomu o nongal vet i avele. Na itheki lemi, thomu o thopol mun i avele.

³⁸ Na ile riong, thomu o rongo vet i a lomumu avele, eneke lomumuo nge toko aka i pakeu i me avele.

³⁹ Na thomu o engeng nge a God ile erere ititalnga, eneke lomumu ve aro thomu o el mimiong aka aro ile vusonga avele nge, aveto God ile erere aken i ritet nge tho,

⁴⁰ aveto numu plong nge esong a tho nge mo aro o el mimiong aka aro ile vusonga avele.

⁴¹ “Na tokokoere ole riseaing nge tho kene nik plong i.

⁴² Aveto lemik mire nge thomu, asaguong nge a God, i voth a opomu lemi avele.

⁴³ Na Vovo i sung ile engenging a tho nge ma tho es me, aveto omu e avele i elo lek riong a ilemi, aveto aro ve toko e i papomnga isivenga na i es me, aro thomu o elo ile riong a lomumu.

⁴⁴ Na lomumu sivenga nge aka lomungare o paesa iomu, aveto thomu o tongporum vet tie avele nge aka aro o elo riseaing aka i esu a God nge me aka iengga inga ini a God. Taro ake thomu o pavurvur aka aro lomumuo nge tho avele.

⁴⁵ “Thomu o mothong tova lomumu ve, aro tho teltun omu a Vovo nge. Avele, toko aka aro i teltun omu ini a Moses, ini toko aka thomu o parong lomu lemioong a i nge ve aro i opaal thomu.

⁴⁶ Na aro ve lomumuo nunganga nge a Moses ile riong, aro lomumuo mun nge tho, eneke ile riong aka i wat i, i ri nge tho.

⁴⁷ Aveto lomumuo nge ile riong aka i wat i, kene avele, aken, naro lomumuo nge lek riong vava?”

6

Jisas i paan tokokoere aka oa titaling i aoselea 5,000.

(Matiu 14:13-21; Mak 6:32-44; Luk 9:10-17)

¹ Lamako Jisas i plosa ma i es a thei a pamonlel a Galili wo epee, na iion aininga mun a Taiberias.

² Ma toko na sengre pom ako o panes i, eneke o thopol pathepolong pom ako i pamimi ni multhangingare lale.

³ Lamako Jisas ome ile wainlangaere, o roro a tete polemi, ma o men nge.

⁴ Na Judare oa Punseleainga a Aning kene i toth me lale.

⁵ Na Jisas ipo watha ma i thopol toko na seng pulua aka o es tuntun i me, mako i ria a Pilip ve, “Aro te ol aning aka aro o an i, nge pen kath?”

⁶ Na i tongporum aka ini a Pilip nge ile ninong aken, aveto ilemi mire nge ur aka aro i oma i.

⁷ Lamako Pilip i olal ile riong ve, “Aro ve toko e i um nge nang or 200* na i el umtun nge, umtun aken i pavurvur avele aka aro te ol bret nge mo te sung i tutun tutunti a pulua aolonga ake nge.”

⁸ Lamako Jisas ile wainlanga mun e aka ini a Andru, aka ini a Saimon Pita itein, i ria Jisas ve,

⁹ “Wainlanga atike, ia bret or lim aka o oma i nge bali tomo nge silang tun or aini, aveto aro i pavurvur nge toko puluanga ake vava?”

¹⁰ Lamako Jisas i ria ile wainlangaere ve, “Thomu o ria or mo o men menu.” Na nge pen aken kene pilil i pom nge, mako o men menu nge. Na o tital inga aka ini tomonmonengaere ma oa titaling i pavurvur nge 5,000.

¹¹ Mako Jisas i ela bret or lim aken ma i ri sivengaing a God nge, lamako i sung vur i a toko na sengre nge aka o men men, na i oma venen aken mun nge silang tun or aini aken. Ma i sung vur i a or nge ma o an i ma osa pup.

¹² Ma or vusnga o an ma osa pup leltun i, lamako Jisas ria ile wainlangaere ve, “Thomu o el veliloalo oa aning uluo areken, aro vene mo i pautet.”

¹³ Mako o veliloalo bret or lim epipeere aka o an i ma ini oa uluo, ma o inou i nge alal aolonga or mule pa omole pothoi or aini ma o vual.

¹⁴ Na toko na sengre o thopol pathepolong ake i velpol, ma o ri ve, “Ake ini a God ile riong elnga aton, Moses i ri nge i aro i velpol ake a ulue.”[†]

¹⁵ Na Jisas ilemi mire nge olemi, aka o sis ve aro o rere i mo o panepes i, mako i plos lelpot nge or ma ienga i esa mun a tete polemi.

Jisas i es roro a thei stha.

(Matiu 14:22-33; Mak 6:47-51)

¹⁶ Mako penieo, ma Jisas ile wainlangaere o esu a thei a pamonlel a Galili.

¹⁷ Ma o ro a wok nge, ma o ri ve o mon aka la a epee a rem a Kaperneam, aveto pemliko na Jisas i velpol a or nge rongan, mako o losa ma o sauthpot ol.

¹⁸ Aveto thue aolonga i velpol, ma thei i lolik.

¹⁹ Mako o sauthpot ma i pavurvur nge kilomita or lim eve or limae, nako o thopolpot a Jisas aka i es a thei stha aka i es tuntun or me, ma o ngange rintet.

²⁰ Aveto Jisas i ria or ve, “O mothong tova o ngange, ake ini tho.”

²¹ Mako o ri ve o paroa i a wok nge, na a ur e avele, nako o otuno a pen aka o sis ve aro o mon nge.

Toko na sengre pom aka o or a Jisas.

²² Ma erangu mun na toko na sengre aka rongan o voth a thei a pamonlel wo epee, olemi mire aka ve, nine kene wok omole inga aka i voth nge, na Jisas i ro tomo vet nge ile wainlangaere avele, oenga inga aka o sauthpot la.

²³ Na wok pelie mun aka a Taiberias o otuno totho nge wop aka Toko Pomnga i ri sivengaing nge bret na tokokoere o an i.

²⁴ Lamako pulua pomnga aken o ortet a Jisas, makola olemi mire aka i voth nge wop aken avele, tomo mun nge ile wainlangaere, mako o ro a wokre nge, mako o sauthpot ol a Kaperneam mo o ortet a Jisas nge.

Jisas i ranga ve ini bret aka i sung mimiong a tokokoere nge.

²⁵ Na o thopol a Jisas a thei a pamonlel wo epee, mako o nina i ve, “Pamirealinga, ong es mun me penva?”

* **6:7:** Grik 200 denarius. † **6:14:** Lo 18:15

26 Mako Jisas i olal ole riong ve, “Tho ri nunganga a thomu nge, thomu o thopol pathepolong pelie ako tho oma i nge menik, aken ini lomu atealinga, aveto thomu o panes tho nge ur ake avele, thomu o panes inga tho ake, eneke thomu o an sapuponga nge bret ako tho sung i a thomu nge, taro ake thomu o ortet tho.

27 Thomu o mothong tova o um nge aning ako i voth palolo avele, nako i plot, aveto i sivenga ako aro thomu o um nge aning ako i voth palolo na i sung mimiong ako aro ile vusonga avele, aka Toko Pomnga Itun aro i sungu i a thomu nge, ini toko aka Vovo a God i pango ile paatealing a i nge.”

28 Mako o nina i ve, “Naro them oma neke ve aro them oma omaing aka God i sis ve aro them oma i?”

29 Lamako Jisas i olal ole riong ve, “God i sis ve aro lomumuo nge toko aka i pakeu i me.”

30 Lamako o nin werer mun i ve, “Pathepolong kathnga aka aro ong oma i ve aro them thopol i mo aro lemimemo nge wong, e? Naro ong oma neke?”

31 Nomenga aka titevirre o an ine aning ako o apet i ve ini ‘Mana’ aka a pen polpolnga, aka ranga ve God ile erere i ri nge na i ri ve,

‘I sungu bret aka i esu a Pen a Urvet me a or nge mo o an i.’” *Kisim Bek 16:4*

32 Lama Jisas i ria or ve, “Tho ri nunganga a thomu nge, ina Moses aka i sungu bret aka i esu a Pen a Urvet me a thomu nge, kene avele, ini inga ok Vovo aka i sungu bret nunganga aka i esu a Pen a Urvet me, a thomu nge.

33 Eneke bret aton God i sungu i, ini toko aka i esu a Pen a Urvet me mo aro i sungu mimiong a toko ulue angare nge.”

34 Mako o nong a Jisas ve, “Toko Pomnga, aro ong sung bret aken evelelnga a them nge me.”

35 Lamako Jisas i ria mun or ve, “Tho ini bret aka tho sung mimiong, na aro ve toko e i es a tho nge me, i pavurvur aro i rova ol mesipuniong avele, na aro ve toko e ilemio nge tho, i pavurvur aro thei i pun ol i avele.

36 I vene re aka tho ria tel i a thomu nge lale, aka thomu o thopol tho lale, aveto lomumuo nge tho avele.

37 Na areko Vovo i sungu or a tho nge, aro o es a tho nge me, na areko o es a tho nge, aro tho wistetpot or avele.

38 Eneke tho esu a ulue ake me ve aro tho panes sivengek lemik avele, tho esu a ulue ake me ve aro tho panes inga aka ini a Vovo ilemi aka i pakeu tho me.

39 Na God aka i pakeu tho me ilemi ve aro tokokoe areko i sungu or a tho nge, i pavurvur aro tho modoppot e avele. Aveto aro tho palosa or alavusnga nge ulue ake ile vusong.

40 Eneke Vovo ilemi aka ve, tokokoe areko o thopol Itun na olemio nge i, aro o krim mimiong aka aro ile vusonga avele, naro tho palosa or, nge ulue ake ile vusong.”

41 Ma Judare o ri pompom nge i, eneke i ri ve, “Tho ini bret aka i esu a Pen a Urvet me.”

42 Mako o ria ve, “Toko ake ini a Jisas aka ini a Josep itun aka lemir mire nge itema ome inina, na i vova ake i ri ve i esu a Pen a Urvet me, e?”

43 Lamako Jisas i olal ole riong ve, “Thomu o mothong tova o ri pompom nge pel.

44 Toko e i pavurvur aro i panes inga ilemi mo i es a tho nge me, kene avele, aveto Vovo aka i pakeu tho me, aro i palosa ilemi mo i wol i a tho nge me, maken aro tho palosa i nge ulue ake ile vusong.

45 Na nomenga God ile riong elnga e i watu ve,

‘Toko alavusnga aro o el pamirealing a God nge.’ *Aisaia 54:13*

Na toko alavusnga aka o nongpol a Vovo ikei na o el pamirealing a i nge, aken o es a tho nge me.

46 Aveto toko e avele i thopol a Vovo, ini inga toko aka i esu a God nge me, iengga inga aka i thopol i.

47 Na tho ri nunganga a thomu nge, toko e aro ve ilemio nge tho, aro i el mimiong aka aro ile vusong avele.

48 Tho ini bret aka i sung mimiong.

⁴⁹ Nomenga ako titovumuere o an aning ako o apet i ve ini ‘Mana’ aka a pen polpolnga, aveto o rin lale.

⁵⁰ Aveto bret aka i esu a Pen a Urvet me, aro ve toko e i an i, aro i rin ol avele.

⁵¹ Tho re ake ini bret aka i esu a Pen a Urvet me aka i sung mimiiong, na aro ve toko e i an bret ake, aro ile ini mimiiong aka aro ile vusonga avele, na bret aken ini sivangek aka aro tho sungpot i mo aro toko na sangre ake ru a ulue, aro o mimi nge.”

⁵² Na Judare okei paenal pel nge osivenga ve, “Toko ake aro i sungu isivanga a it nge mo aro te an i vava?”

⁵³ Lamako Jisas i ria mun or ve, “Tho ri nunganga a thomu nge, aro ve thomu o an Toko Pomnga Itun isivanga avele, na aro ve thomu o thin mun ia mla avele, aro thomu o mimi avele.

⁵⁴ Na toko e aro ve i an sivangek na i thin mun ok mla, aro ile ini mimiiong aka aro ile vusonga avele. Naro tho palosa i nge ulue ake ile vusong.

⁵⁵ Eneke sivangek ini aning nunganga, na ok mla ini thei nunganga aka aro o thin i.

⁵⁶ Na aro ve toko aka aro i an sivangek na i thin ok mla, aro i teo a tho nge, na tho mun aro tho teo a i nge.

⁵⁷ Na tho mimi, eneke Vovo aka ini mimiiong tepun, aka i pakeu tho me, i teo a tho nge, na ranga ve mun i thomu, toko aka i an sivangek aro i mimi, eneke tho teo a i nge.

⁵⁸ Na ake ini bret aka i esu a Pen a Urvet me, na i ranga ve ini bret aka titovumuere o an i nomenga ma o rin lale nge, kene avele. Na aro ve toko e i an bret ake, aro ile ini mimiiong aka aro ile vusonga avele.”

⁵⁹ Na Jisas i ri riong aken, aka i patorial or aka a Judare ole lotuonga a vel aka a Kaperneam.

Toko pulua o lel okime nge a Jisas.

⁶⁰ Lamako toko pom aka o panes a Jisas kene o nongpol riong aken ma o ri ve, “Riong ake kene i engeng rintet, anga aro i nongala i, e?”

⁶¹ Na Jisas ilemi mire nge olemi aka o ri pompom nge riong aken, ma i ria or ve, “I vava, riong ake i pamatu lomumu?

⁶² Na aro ve thomu o thopol Toko Pomnga Itun aro i esa werer a rem aka i voth tel nge nomenga, aro lomumu i vava?

⁶³ God Ioni i sung mimiiong, aveto toko ulue anga i pavurvur aro i sung mimiiong avele, lek riong ake tho ria thomu nge kene i ranga ve ini a God Ioni aka i sung mimiiong.

⁶⁴ Aveto omu pelie kene lomumuo nge avele.” I ri venen aken, eneke nge wop lemi aka i patea ile omaing, ilemi mire lale nge tokokoe kathnga areko aro olemio nge i avele na nge toko e aka aro i sungu i a ngarangre omeni.

⁶⁵ Lama i ria mun or ve, “Na tho ria thomu nge lale ve, ‘Aro ve Vovo i sungu engenging a toko e nge avele, i pavurvur aro i es ol a tho nge avele.’ Na ake ini riong tepun aka tho ri ve, ‘Omu pelie kene lomu lemioong avele.’ ”

⁶⁶ Na riong aken i oma toko pulua aka o panes i ma o lel okime nge i ma o panes ol i avele.

⁶⁷ Lamako Jisas i ria ile wainlanga or mule pa omole pothoi or aini aka ve, “Ava thomu mun ake o sis ve aro o lo lelpot mun ok?”

⁶⁸ Lamako Saimon Pita i olal ile riong ve, “Toko Pomnga, aro them es ol a anga nge, e? Eneke lom riong inga aka i sung mimiiong aka aro ile vusonga avele.

⁶⁹ Na lemem lemioong na lemimem mire aka ve, engom inga ini a God ile toko riringa.”

⁷⁰ Na Jisas i ria mun or ve, “I nunganga aka tho ateal thomu toko or mule pa omole pothoi or aini ve aro thomu ini lek, aveto omu omole ini a Satan ile.”

⁷¹ Jisas i ri aken nge a Judas aka ini a Saimon Iskariot itun. I mun kene ini a Jisas ile wainlanga or mule pa omole pothoi or aininga aka aro panen i sungu a Jisas a ngarangre omeni.

7

Jisas i es nge Judare oa aning aka o an i valvalere lemi.

¹ Lamako Jisas i esu esa a pen elonga aka a Galili, na ini plong ve aro i es ol a epee a Judia, eneke Judare oa pompomere nge pen aken, o sis ve aro o so rin i.

² Na Judare oa aning ako o an i a valvalere lemi i toth me lale.

³ Mako Jisas ititeinre o ria i ve, "Aro ong los lelpot nge pen ake mo ong es a epee a Judia la, mo aro lom wainlangaere aro o thopol pathepolong areko aro ong oma ir."

⁴ Aro ve ong sis ve iom i kima, ong mothong tova parong kinealo lom omaing. Na ong pavurvur nge pathepolong omanga na i sivenga ako aro ong oma i a lalanga a tokokoere otheki mo aro olemi mire nge wong."

⁵ Na ititeinre mun kene olemio nge i avele.

⁶ Mako Jisas i ria or ve, "Aveto lek nang kene i velpol rongan. Aveto nang elonga aka ini lomu nang."

⁷ Na tokokoe areko o panes vothung ulue anga o pavurvur aka aro oni silal thomu avele, aveto oni silal tho, eneke tho ripolal or nge ole vothung kerenga.

⁸ Engomu o es nge aning aken, aro tho es nge aning aken avele, eneke lek nang i velpol rongan."

⁹ I ria or nge riong areken, na i voth a epee a Galili.

¹⁰ Lamako Jisas ititeinre o es ol nge aning aken la, ma i mun i plosa ma i es, aveto i es patat avele, i es kinine inga nge la.

¹¹ Na Judare oa pompomere o kath i nge aning aken. Ma o nina ve, "Toko aton i kala?"

¹² Lamako toko na seng pom aka o pakosil pel nge i, ma pelie o ri ve, "Aken ini toko sivenga."

Ave pelie o ri ve, "Avele, ile apaltet tokokoere."

¹³ Aveto toko e avele i ri pat ol nge i, eneke o ngange nge Judare oa pompomere.

Ako nge Judare oa aning Jisas i patoral toko na sengre.

¹⁴ Na aning aken o voth nge, makola i metasa na Jisas i eso a Lotu Tepun a Vel a lok lemi ma i patea ol ile pamirealing.

¹⁵ Na Judare oa pompomere o kukuk ma o nina ve, "Na toko ake i es nge pamirealing avele na i el mire ake a kala?"

¹⁶ Lama Jisas i olal ole riong ve, "Ine riong elonga ake tho pamireal thomu nge

ini lek riong avele. Ake ini a God aka i pakeu tho me ile riong.

¹⁷ Aro ve toko e i sis ve aro i panes a God ilemi, aro ilemi mire nge lek pamirealing, aka i esu a God nge me, eve i espot a lemik.

¹⁸ Na toko e aka i ri nge isivenga ile lemi rumong, kene i papomnga isivenga iion, aveto toko aka i sis ve aro i papomnga toko aka i pake i iion, kene ini toko aka ile riong i nunganga, na le apaltetong e avele i voth a i nge.

¹⁹ Na nomenga Moses i sungu a God ile patorong a thomu nge, aveto omu e avele i panes i. Na i vava ake thomu o ri nge sorinngek, e?"

²⁰ Lamako pulua pomnga o olal ile riong ve, "Ava tamata kerenga i rero ong, them i ri nge sorinngom avele."

²¹ Lamako Jisas i olal ole riong ve, "Na tho oma pathepolong e ken aka tho pamimi toko nge nang rialonga, nako thomu o kukuk ma o ri ve tho pavothal nge nang rialonga avele.

²² Na nomenga Moses i sung riong a thomu nge vene: Aro ve o pop tutumuere, na aro ve oa nang or limme lamo o is ole, aveto i patea nge a Moses avele, i patea vet aka nge titovumuere, na aro ve nang aken i vengtun nge nang rialonga, aro vava? Thomu o is ole nge nang rialonga.

²³ Na thomu o ri ve i sivenga aka aro te is ole nge nang rialonga, mo aro te panes a Moses ile patorong, na i vova ake lomumu klingtun tho nge lek omaing aka tho pamimi toko ini peti elonga nge nang rialonga, e?

²⁴ Thomu o mothong tova o the polpol nge lek omaing na o teltun ok, aveto lomumu rum senu tel i mo o pavurvur aro lomumu mire nge ve, lek omaing aken kene i vengveng a God itheki eve avele."

Tokokoere o sis ve aro olemi mire nge a Jisas ini anga.

²⁵ Lamako toko pelie aka a Jerusalem o nina ve, "Ava ini toko aton Judare oa pompomere o ri nge isorinnga ot?"

²⁶ O thopol vet! I ri a lalanga a pulua otheki, ave o ria ol ur e avele a i nge. Ava olemi mire aka ini toko aka God i ateal i ve aro i el werer ile tokokoere, eve avele.

²⁷ Aveto nge nang e ako aro God ile toko aton aro i velpol, toko e avele aro ilemi mire nge ile rem tepun, aveto lemir mire nge toko ake ile rem tepun.”

²⁸ Na Jisas rongan i patoral a Lotu Tepun a Vel a lok lemi ma i presa viringa ve, “Thomu o ri ve lomumu mire nge tho na nge lek rem tepun, aveto tho es me nge sivengek lemk avele. Na God ako i pakeu tho me i voth, na lomumu mire nge i avele.

²⁹ Aveto tho, lemk mire nge i, eneke tho esu aka a i nge me na i pakeu tho me.”

³⁰ Mako o tongporum aka aro o rere i, aveto toko e avele i krimu i, eneke ile nang i velpol rongan.

³¹ Aveto toko na seng pulua aka a or nge olelio nge i ma o ri ve, “Na toko aka God i ateal i ve aro i el werer ile tokokoere, aro ve i velpol, aro i oma pathepolong aka aro i aolo leltun toko ake iana? Aro avele. I re aken ini toko aka God i ateal i.”

Mukalingare o ri ve aro o rere a Jisas.

³² Na Parisire o nongpol venen aken aka tokokoere o pakosil pel nge i, mako tomo nge pris kimangare o pake Lotu Tepun a Vel a mit tetalongare mo o rere i.

³³ Lama Jisas ria or ve, “Aro tho voth palolo tomo nge thomu avele. Lamo tho lo werer mun a toko aka i pake tho me.

³⁴ Naro thomu o kath tho, aveto aro thomu o thopolo tho avele, eneke thomu o pavurvur aro o es nge rem aka aro tho es nge, kene avele.”

³⁵ Ma Judare oa pompomere o ria pel osivenga ve, “I ri ve aro i es nge pen kathnga aka aro te thopolo ol i nge avele, e? Ava aro i los lelpot ler pen epee ma i es a tokokoere areko or ini Judare avele mo i patoral or?”

³⁶ Na i ri ve, ‘Aro thomu o kath tho, aveto aro thomu o thopolo tho avele.’ Na i ri mun ve, ‘Thomu o pavurvur aro o es nge rem aka aro tho es nge, kene avele.’ Na ile riong areken i mirenga vava?”

Jisas i ri nge thei aka i sung mimiong.

³⁷ Na nge aning aken a nang patopalalnga aka o papomnga i, Jisas i mita ma i presa viringa ve, “Aro ve thei i pun toko e, aro i es a tho nge me mo i thin.”

³⁸ I ranga ve aka God ile erere i ri nge, toko e aka ilemio nge tho, aro thei aka i sung mimiong aro i lel a ilemi mo i espot a lalanga.”

³⁹ Na thei aken Jisas i ri nge, ini Oni Riringa aka aro toko lemioongare aro o el i panen, aveto nge wop lemi ake, God i sungu Ioni Riringa me rongan, eneke i papomnga a Jisas rongan.

Tokokoere oleli omole avele nge a Jisas.

⁴⁰ Lamako tokokoere pelie o nongpol ile riong aken ma o ri ve, “I nunganga, toko ake ini a God ile riong elnga aton te men total i.”

⁴¹ Ave pelie o ri ve, “Ake ini toko aka God i ateal i ve aro i el werer ile tokokoere.” Aveto pelie aka a or nge o ri ve, “Avele, toko ake ini Galili anga na toko aka God i ateal i ve aro i el werer ile tokokoere, aro ini Galili anga avele.”

⁴² God ile erere i ri ve toko aka God i ateal i ve aro i el werer ile tokokoere aro ini a nepes a Devit ilenga naro o pop i a Betlehem nge rem aka nomenga Devit i voth nge.”

⁴³ Mako tokokoere oleli or aini nge a Jisas.

⁴⁴ Na pelie oleli ve aro o rere i, aveto toko e avele i krimu i.

Judare oa pompomere olelio nge a Jisas avele.

⁴⁵ Lamako Lotu Tepun a Vel a mit tetalonga areken o lo werer, na pris kimangare tomo nge Parisire o nina or ve, “I vova ake thomu o wol i me avele, e?”

⁴⁶ Na mit tetalongare o olal ole riong ve, “Toko e avele ile riong i ranga ve ini toko ake ile riong.”

⁴⁷ Na Parisire o olal ole riong ve, “Ava ile apaltet mun thomu aken ot?

⁴⁸ Judare oa pompomere e avele na Parisire e avele aka ilemio nge i.

⁴⁹ Ini inga areko oleli mire nge a Moses ile patorong avele, or re aken olelio nge i. Na God aro i paomelal or nge ole lemioong aken.”

⁵⁰ Lama Parisi omole aka iion a Nikodemus aka nomenga i es a Jisas nge, i ria or ve,

⁵¹ “Na nge ler patorong i pavurvur avele aka aro te paomelal tel toko e na i mit nge

riong rongan, na lemir mire nge ur aka i oma i kene rongan.”

⁵² Ma o olal ile riong ve, “Na toko aken ini Galili anga na ong mun ake ini Galili anga? Aro ong tital senu a God ile erere mo aro lomum mire aka God ile riong elnga e avele aro i velpol a Galili.”

⁵³ [Lama toko alavusnga o es a ole vel omole omole.

8

O pamit seng aka i aom toko a Jisas itheki.

¹ Aveto Jisas i esa a tete a Oliv.

² Lama rulpou ma i lo werer a Lotu Tepun a Vel a lok lemi ma toko na seng pulua o vustuno i, mako i menu ma i patoral or.

³ Na pamirealingare nge a Moses ile patorong tomo nge Parisire o wol seng peange omole aka olemi mire aka i aom toko ma o pamitu i a tokokoere otheki.

⁴ Mako o ria Jisas ve, “Pamirealinga, them thopol seng ake aka i aom toko aka ini iewo avele.

⁵ Na Moses ile patorong i ri ve, na aro ve seng e i oma venen aken, aro te ela umre mo te pun rin i nge. Naro ong ri vava nge?”

⁶ Na o ri venen aken mo o ri ve o patelek i mo aro o teltun ia nge.

Ave Jisas i lotoru ma i watu a ulue nge imeni pupo.

⁷ Ave o nin ororo i, mako Jisas i mit vengveng werera ma i ria or ve, “Na omu e aka i oma vothung kerenga e avele, aro i ula tel um a i nge.”

⁸ Lamako i lotoru mun ma i watu mun a ulue.

⁹ Na o nongpol veno aka ma o korpot omole omole, i patea nge toloklokere makola or alavuspot, na Jisas ienga aka i voth tomo nge seng aken aka i mit a itheki.

¹⁰ Ma i mita ma i ria i ve, “Or ol kala? E avele i voth mo i teltun om, e?”

¹¹ Ma i olal ile riong ve, “Toko Pomnga, e avele.”

Mako Jisas i ria i ve, “Na tho mun, aro tho teltun om avele. Na ong es la, na ong mothong tova oma ol vothung kerenga e.”]

Jisas i ranga ve ini theki lalainga aka i to.

¹² Ma Jisas i ria mun tokokoe areko o voth a Lotu Tepun a Vel a lok lemi ve, “Engek, tho ini toko aka tho sung pen lalanga a toko ulue angare nge. Na areko o panes tho, aro o el pen lalanga aka i pathengal or nge mimiong a so, naro o es ol a mideng lemi avele.”

¹³ Lamako Parisire o ria i ve, “Lom riong kene ini ur polpolnga, eneke sivengom, wong ritet aka nge wong.”

¹⁴ Mako Jisas i olal ole riong ve, “Avele, ur aka tho ritet nge sivengek i nunganga, eneke lemik mire nge pen aka tho es nge me, tomo mun nge pen aka aro tho es nge la. Aveto lomumu mire nge pen aka tho es nge me, kene avele, tomo mun nge pen aka aro tho es nge la.

¹⁵ Sivengomu, thomu o panes inga vothung ulue anga ma o pamit toko nge riong, aveto engek inga, tho pamit toko e avele nge riong.

¹⁶ Na aro ve tho pamit toko e nge riong, aro lek omaing aken i vengveng, eneke tho panes sivengek lemik avele. Vovo aka i pakeu tho me, i voth tomo e tho.

¹⁷ Na lomu patorong i ri vene: ‘Aro ve toko or aini o teltun toko ia na o ripot nge riong omole inga, aken kene ole riong aken i nunganga.’*

¹⁸ Na tho kene tho ritet nge sivengek, na Vovo aka i pakeu tho me i ritet mun nge tho.”

¹⁹ Mako Parisire o nina i ve, “Tomom aken i voth a kala?”

Na Jisas i olal ole riong ve, “Lomumu mire nge tho avele, na lomumu mire mun nge ok Vovo avele. Aro ve lomumu mire nge tho, aro lomumu mire mun nge ok Vovo.”

²⁰ Na Jisas i ri riong aken, aka i patoral toko na sangre, aka a Lotu Tepun a Vel a lok lemi, toth nge pen aka o sungu ole sungong nge. Ave toko e avele i rere i, eneke ile nang i velpol rongan.

Jisas i ri ve, o pavurvur aro o es nge pen aka aro i es nge, kene avele.

²¹ Na Jisas i ria mun or ve, “Aro tho es, naro thomu o kath tho, aveto aro thomu

* ^{8:17:} Lo 19:15

o rin tomo nge lomu vothung kerenga ako rongan i voth a thomu nge. Na thomu o pavurvur aro o es nge pen ako aro tho es nge, kene avele.”

²² Mako Judare oa pompomere o ria ve, “I vava ake i ri ve, ‘Na thomu o pavurvur aro o es nge pen ako aro tho es nge, kene avele, e?’ Ava i mirenga ve aro i pun rin isivenga?”

²³ Lama Jisas i olal ole riong ve, “Thomu ini ulue anga na tho ini ulue anga avele, tho ini Pen a Urvet anga.

²⁴ Na tho ria tel thomu nge lale ve, ‘Aro thomu o rin tomo nge lomu vothung kerenga ako rongan i voth a thomu nge.’ Na aro ve lomumu nge tho ake tho ini toko ake tho ritet thomu nge lale, kene avele, aro thomu o rin tomo nge lomu vothung kerenga ako rongan i voth a thomu nge.”

²⁵ Ma o nina mun i ve, “Ong ini ao?”

Ma i olal ole riong ve, “Tho ini toko re ake tho ria tel thomu nge lale, i patea nge ake tho patea nge lek omaing.

²⁶ Na i pavurvur aro tho teltun omu nge ur puluanga, aveto aro tho oma i avele, toko ake i pakeu tho me ile riong kene i nunganga na tho ri inga riong ake tho nongpol i a inge a thomu toko ulue angare nge.”

²⁷ I ri venen aken a or nge, aveto olemi mire avele ake i ri nge Itema ake a Pen a Urvet.

²⁸ Mako i ria or ve, “Aro thomu o pamona Toko Pomnga Itun, maken aro lomumu mire ake tho ini toko ake tho ritet thomu nge lale. Naro lomumu mire ol nge ake tho oma polpol ur e avele ake nge sivengek lemik, aveto tho ri inga riong ake Vovo i patoral tho nge.

²⁹ Na toko ake i pakeu tho me, i kene i voth tomo nge tho, na i modoppot yet tho avele, eneke tho oma inga omaing ake ilemi sivenga nge.”

³⁰ Na i ri venen aken ma toko na seng pulua olemio ol nge i.

Toko Pomnga Itun aro i pavthopot tokokoere.

³¹ Ma Jisas i ria Juda areko olemio nge i lale, ma i ria or ve, “Areko o nongal lek patoraling, or ini lek wainlanga nungangare.

³² Na aro ve thomu o oma venen aken, aro lomumu mire nge riong nunganga, na riong nunganga aro i pavthopot thomu.”

³³ Ma o olal ile riong ve, “Them ini a Abraham ititeviere, na nomenga i pavurvur ponange them um polpol nge toko e avele. Na i vova ake ong ri ve aro them vthopot, e?”

³⁴ Ma Jisas i olal ole riong ve, “Tho ri nunganga a thomu nge, toko ake i oma vothung kerenga, aken ini vothung kerenga ile um polpolonga.

³⁵ Na toko um polpolonga i voth tomo nge ia pomnga ile vel lemiare evelelnga avele, aveto toko itun ini itema itun evelelnga.

³⁶ Maken aro ve God Itun i pavthopot thomu, aro thomu o vtho selele.

³⁷ Na lelik mire lale ake thomu ini a Abraham ititeviere, aveto thomu o sis ve aro o so rin tho, eneke thomu o krim lek patoraling avele.

³⁸ Na tho ria thomu nge ur ake Vovo i pathengal i a tho nge, aveto thomu o oma omaing ake omu vovo i ria thomu nge.”

³⁹ Na o olal ile riong ve, “Emem vovo ini a Abraham.”

Ma Jisas i olal ole riong ve, “Aro ve thomu ini a Abraham itutun nungangare, aro thomu o oma mun omaing ranga ve ake i oma i.

⁴⁰ Na evelelnga tho ritet thomu nge riong nunganga ake tho nongpol i a God nge, ave thomu o engeng ve aro o so rin tho. Na Abraham kene i oma venen aken avele.

⁴¹ Na thomu o oma ranga ve ake omu vovo i oma i.”

Ma o olal ile riong ve, “Na God ienga inga ake ini emem Vovo, na them ini itutun nungangare.”

⁴² Ma Jisas i olal ole riong ve, “Aro ve God ini omu Vovo nunganga, aro omu sagu tho, eneke tho esu a God nge me, na ponange tho voth ol ake. Na tho es me nge sivengek lemik avele, aveto God i pakeu tho me.

⁴³ Na i vova ake lomumu mire nge ur areko tho ri nge, kene avele, e? Eneke numu plong ve aro o nongal lek riong.

⁴⁴ Na thomu ini a Satan itutunre na ini omu vovo. Make thomu o sis ve aro thomu o panes vet inga ako ini ilemi. Na nomenga vet ako me, i so rin rin toko, na i pavurvur aro i ri riong nunganga avele, eneke riong nunganga i voth a i nge avele. Aken ini ile vothung vet ako ile apaltet, eneke ini toko le apaltetonga na ini vothung le apaltetonga itema.

⁴⁵ Aveto lomumuo vet nge lek riong avele, eneke tho ri nge ur aka i nunganga.

⁴⁶ Na i vava, thomu o pavurvur aro o ripot lek vothung kerenga, e? Avele! Na aro ve lek riong i nunganga, i vova aka lomumuo nge tho avele, e?

⁴⁷ Na toko e aka ini a God ile, i nongal a God ile riong. Aveto thomu o nongal lek riong avele, eneke thomu ini a God ile avele.”

Jisas i velpol tel nge a Abraham.

⁴⁸ Na Judare o olal ile riong ve, “Na them ri ve, ong ini Samaria anga ma tamata kerenga i rero ong. Na lemem riong aken i nunganga, e?”

⁴⁹ Ma Jisas i olal ole riong ve, “Tamata kerenga i rero tho avele. Na tho papomnga a Vovo, aveto thomu o paruru tho.

⁵⁰ Na tho sis ve aro tokokoere o papomnga tho avele. Aveto toko omole aka i voth aka i sis ve aro i papomnga tho, na ini tokokoere ole riong nongpolnga.

⁵¹ Na tho ri nunganga a thomu nge, areko o nongal lek riong, i pavurvur aro o rin ol avele.”

⁵² Na Judare o ria i ve, “Na lemimem mire senu ol lale aka ve, tamata kerenga i rero ong! Eneke Abraham i rin nomenga lale tomo mun nge a God ile riong elngare, ave ong ri ve, ‘Areko o nongal lek riong, i pavurvur aro o rin ol avele.’

⁵³ Na emem vovo a Abraham i rin lale, na ong ini ao aka ong ri ve, ong aolonga nge a Abraham, e? Na God ile riong elngare o rin mun lale, na ong ini ao aka ong ri venen aken, e?”

⁵⁴ Ma Jisas i olal ole riong ve, “Aro ve tho papomnga sivengk, aro lek omaing aken

ini ur polpolnga. Na toko aka i papomnga tho, ini a Vovo aka thomu o ri ve ini lomu God.

⁵⁵ Aveto lomumu mire vet nge i avele, aveto lelik mire nge i. Na aro ve tho ri ve, lelik mire nge i avele, aro tho ini toko le apaltetonga ranga ve ini thomu. Aveto lelik mire nge i na tho panes ile riong.

⁵⁶ Na omu vovo a Abraham ilemi sivenga rintet ve aro i thopol lek velpol, na i thopol i lale ma ilemi sivenga nge.”

⁵⁷ Mako Judare o ria mun i ve, “Om tovu po or mule pa lim rongan, na ong ri ve ong thopol a Abraham, e?”

⁵⁸ Mako i olal ole riong ve, “Tho ri nunganga a thomu nge, Abraham o pop i rongan, na tho voth tel lale.”

⁵⁹ Mako o ela umre ma o ri ve o pun rin i nge, ave Jisas i es kinepot a or nge ma i korpot a Lotu Tepun a Vel a lok lemi ma i es ol.

9

Jisas i thopol toko aka itheki pros ma i vles werer itheki.

¹ Lama Jisas i eses na i thopol toko omole aka itheki pros, i kene itheki pros vet aka inina i poppot i nge.

² Lamako Jisas ile wainlangaere o nina i ve, “Pamirealinga, anga ile vothung kerenga i oma i mo itheki pros aka inina i pop i nge? Ini isivenga ile vothung kerenga eve inina ome itema ole vothung kerenga?”

³ Mako Jisas i olal ole riong ve, “Toko ake ile vothung kerenga i oma i mo itheki pros, kene avele, tomo mun nge itema ome inina. Toko ake itheki pros mo aro tokokoere o thopol a God ile engenging aka aro i oma i a i nge.

⁴ Na rongan erang i voth aro te oma toko aka i pake tho me ile omaing, eneke pemliknga i toth me lale, aka i pavurvur aro toko e i um nge avele.

⁵ Na rongan tho voth ake ru a ulue, ma tho ini toko ulue angare ole theki lalainga.”

⁶ Na i ri venen aken lamako i osuku a ulue ma i sula i mo i velpol ini patpat ma i mota i ma i sisao i a toko aken itheki.

⁷ Lamako i ria i ve, “Es la, mo paut rirpot thekum a thei povovloainga aka o apet i ve ini a Siloam.” Na Siloam mirenga ve, “Pake”. Mako toko aken i es la ma i paut rirpot itheki, mako itheki vles ol ma i lo werer a ile vel la.

⁸ Ma ile rem lemia tomo nge areko o thopol i nomenga aka i menen ma i nong ur elonga a tokokoere nge, kene o nin pel osivenga ve, “Toko ake tomo i menen mo i nong ur elonga a tokokoere nge, e?”

⁹ Na pelie o ri ve, “I re aken.”

Ave pelie mun o ri ve, “Avele, ini toko relnga, ave itheki lemi rangga ve ini mun i toko aken.”

Mako toko aken isivenga i ria ve, “Na thore ake.”

¹⁰ Mako o nina i ve, “Ong vova ake thekum i sivenga ol, e?”

¹¹ Ma i olal ole riong ve, “Toko aton o apet i ve ini a Jisas, i viv patpat ma i sisao i a thekik ma i ria tho ve aro tho es a thei a Siloam mo tho paut rirpot thekik nge. Mako tho es nge la ma tho paut rirpot thekik nge, mako tho thepolpot ol.”

¹² Na o nina i ve, “Toko aken i kala?” Ma i olal ole riong ve, “Lemik mire nge avele.”

Parisire o sir a Jisas ia tepun nge aka i pamimi toko nge nang rialonga.

¹³ Lamako o wol ol toko aka itheki pros tel nomenga a Parisire nge la.

¹⁴ Na Jisas i viv patpat ma i pasenu werer toko theki prosnga aken aka nge nang rialonga.

¹⁵ Mako Parisire mun aka o nina i ve, “Thekum aken i sivenga vava?” Ma i olal ole riong ve, “Toko aton i sisao patpat a thekik, mako tho paut rirpot i ma tho thepolpot ol.”

¹⁶ Na Parisi pelie o ria ve, “Toko aken i es a God nge me avele, eneke i pavothal nge nang rialonga avele.” Ave pelie o ri ve, “Na toko aka ile vothung kerenga i pavurvur aka aro i oma pathepolong venen aken avele.” Mako o thomreu ol pel.

¹⁷ Lamako o nin werer mun toko aken itheki pros tel nomenga ve, “Aro ong ri vava nge toko aken i vles werer thekum, e?” Ma i olal ole riong ve, “Ini a God ile riong elnga e.”

¹⁸ Ave Judare oa pompomere olemi ve, toko aken itheki pros tel nomenga, ma ponange i the werer, kene avele. Mako okei song inina ome itema mo o es a or nge.

¹⁹ Ma o nina or paini ve, “Ake ini tutumu? Na thomu o ri ve, itheki pros nomenga vet aka ong poppot i nge. Na i vova ake itheki vles werer, e?”

²⁰ Mako or paini o olal ole riong ve, “Lemimem mire aka ve, ini tutumem. Na lemimem mire mun aka ve, itheki pros nomenga vet aka ipoppotnga nge.

²¹ Aveto lemimem mire nge tepun e avele aka ponange itheki vles werer. Na toko aka i oma i, lemimem mire mun nge i avele. Aro thomu o nina i, eneke i pomnga lale na i pavurvur aka aro isivenga aro i olal i a thomu nge.”

²² Na or paini o ri venen aken, eneke o ngange nge Judare aka o rong riong lale ve, aro ve toko e i ri ve, Jisas ini toko aka God i ateal i ve aro i el werer ile tokokoere, aro o mit roal or nge koroong a Judare ole lotuonga a vel.

²³ Aken kene ini tepun aka o ria or nge ve, “I pomnga lale, mo o nina i.”

²⁴ Lamako Parisire o leng werer mun paininga toko aka itheki pros tel nomenga, ma o ria i ve, “Aro ong kin lom riong tomo nge a God mo ong ripot riong nunganga! Lemimem mire aka toko aka i pamimi ong, ini toko aka ile vothung kerenga.”

²⁵ Na toko aken i olal ole riong ve, “Na eve ini toko aka ile vothung kerenga, eve avele, lemik mire nge avele. Ur omole inga aka lemik mire nge kene i vene: Nomenga thekik pros, aveto ponange tho thepolpot ol.”

²⁶ Mako o nina mun i ve, “I oma ur nekenga nge wong, make i vles werer thekum, e?”

²⁷ Ma i olal ole riong ve, “Tho ritet thomu nge lale, ave thomu o nongpol lek riong avele. Na i vava ake thomu o sis ve o nongpol mun i, e? Ava thomu mun o sis ve aro o velpol ini ile wainlangaere, e?”

²⁸ Mako Parisire o akrisal i ma o ri ve, “Wong re ake ini ile wainlanga, aveto them ini a Moses ile wainlangaere.

²⁹ Na lemimem mire ako ve, God i ri tomo nge a Moses, aveto toko aken ini toko vulutnga, na lemimem mire nge wop kathnga aka i es nge me, kene avele."

³⁰ Lamako i olal ole riong ve, "Na tho kukuk nge lomu riong aken, God ile engenging i voth a toko aken nge ma i vles werer thekik, aveto lomumu mire nge ile rem tepun avele.

³¹ Na lemir mire ako ve, God i nongal toko aka ile vothung kerenga ile riong, kene avele, ave i nongal tokokoe areko o lotual i na o panes ilemi.

³² Na nomenga ma me i pavurvur ponange, toko e avele i nongpol kimaing e tova toko e i vles werer toko itheki aka inina i poppot i ma theki pros.

³³ Aro ve toko aken i es a God nge me avele, i pavurvur aro i oma ur e avele."

³⁴ Na Parisire o olal ile riong ve, "Na vothung kerenga i teo a ong nge a ninom iopo lemi ma i pop tomopot ong nge, make i pavurvur ponange, na ong ini ao aka ong ri ve ong patalor them, e?" Mako o sivpot i a lalanga la.

Tokokoe areko olemio nge a Jisas avele o ranga ve ini toko theki prosnga.

³⁵ Lamako Jisas i nongpol aka o sivpot toko aken, mako i kath i ma i thopol i ma i nina i ve, "Lomumuo ol nge a Toko Pomnga Itun?"

³⁶ Ma i olal ile riong ve, "Toko Pomnga Itun ini ao? Riteta tel tho nge i mo aro lemiko nge i."

³⁷ Ma Jisas i ria i ve, "Ong thopol i lale, i re ake i leng leng tomo nge wong."

³⁸ Ma i ria i ve, "Toko Pomnga, lemiko ol nge wong." Ma i koru ieve ma i lotual i.

³⁹ Ma Jisas i ria ve, "Tho es a ulue me mo aro tho sirum tokokoere, naro toko theki prosngare aro o the werer, naro tokokoe areko o the aro theki pros ol."

⁴⁰ Na ine Parisi pelie o voth tothal i ma o nongpol ile riong aken ma o nina i ve, "Na ong ri ve thekimem pros mun?"

⁴¹ Lama Jisas i olal ole riong ve, "Aro ve thekumu pros, aro lomu vothung kerenga aro i teo a thomu nge avele, aveto thomu o rivenga thomu o the, make lomu vothung kerenga rongan i voth."

10

Jisas i ranga ve ini sipsipre othealnga.

¹ Ma Jisas i ria mun or ve, "Tho ri nunganga a thomu nge, tokokoe areko o koro a sipsipre ole lok thekia avele, na o ro a pen relnga e ma o eso a lemi, tokokoe areken kene ini toko kemongare na toko kerengare.

² Na toko aka i koro vengveng a lok thekia, i re aken ini sipsipre othealnga.

³ Na lok thekia mit tetalonga i theppot lok thekia nge i, na sipsipre olemi mire nge ikei aka i leng ile sipsipre oion omole omole, ma i wolpot or la.

⁴ Na aro ve i wolpot or a lalanga, aro i mukal sipsipre ole, naro o panes i, eneke olemi mire nge ikei.

⁵ Na i pavurvur aro o paneso toko relnga e avele, aro o lo nge i, eneke olemi mire nge ikei avele."

⁶ Na Jisas i ria or nge riong agelalnga ake, aveto olemi mire nge mirenga avele.

⁷ Mako Jisas ria mun or ve, "Tho ri nunganga a thomu nge, tho ranga ve ini sipsipre ole lok thekia.

⁸ Na areko o es tel me a mukaling nge tho, or ini toko kemongare na toko kerengare, aveto sipsipre o nongal okei avele.

⁹ Na tho ranga ve ini lok thekia, na toko e aka i eso a tho nge na i koro a lok lemi, aro tho pamimi i. Na toko aken aro i eso me, naro i espot la, naro i el ia aning, na ur e avele aro i pakerenga i.

¹⁰ Na toko kemongare o es aka me mo aro o kem, na o so rin, na o pakerenga, sipsipre. Aveto tho, tho es ake me mo aro o el mimiong naro o oror nge ur e avele.

¹¹ "Na tho ini sipsipre othealnga sivenga, aka aro tho sungpot lek mimiong mo aro tho opoal or.

¹² Na toko aka i um nge iolonga, kene ini sipsipre othealnga nunganga avele, na ini otokoninga avele. Na aro ve i thopol nanau pil aka i es me, aro i lo sipsipre oa, naro nanau pil aro i pun sipsipre na i wis meresu or.

¹³ Na toko aken i lo sipsipre oa, eneke i um na ilemi nge iolonga na ilemi nge sipsipre othealnga avele.

¹⁴ “Na tho ini sipsipre othealnga sivenga, na lemik mire nge lek sipsipre, na olemi mire nge tho,

¹⁵ ranga ve ako Vovo ilemi mire nge tho na lemik mire nge i. Naro tho sungpot lek mimiong mo aro tho opoal sipsipre.

¹⁶ Na lek sipsip relnga mun pelie ako o voth a lok ake lemi avele. Naro tho velilo mun or me. Naro o nongal mun keik mo aro o velpol omole ol inga naro othealnga omole.

¹⁷ Na Vovo ia sagu tho, eneke lemik altetpot nge lek mimiong sungpotnga naro tho el werer mun i.

¹⁸ Toko e avele i eltetpot lek mimiong a tho nge, lemik omoletpot nge isungpotnga. Na tho pavurvur aka aro tho sungpot i na tho pavurvur mun aka aro tho el werer mun i. Ake kene Vovo i pator tho nge ve aro tho oma i.”

¹⁹ Na Judare o nongpol ile riong aken ma o thomreu pel ma or ainiu.

²⁰ Ma oa pelie o ri ve, “Tamata kerenga i rero i ma ini ngongong, na i vova aka o ta telngomu nge ile riong, e?”

²¹ Aveto oa pelie o ri ve, “Toko aka tamata kerenga i rero i, i pavurvur aro i ri venen aken avele! Na tamata kerenga i pavurvur aka aro i vles werer toko theki prosnga, kene avele.”

Judare olemio nge a Jisas avele.

²² Na nang aolonga omole aka Judare olemi rum Lotu Tepun a Vel thepnga, i velpol a Jerusalem na i vengtun nge theu po.

²³ Na Jisas i esu esa a Lotu Tepun a Vel a lok lemi aka a Solomon ile sawak lemi.

²⁴ Ma Judare o mit kalutuno i ma o nina i ve, “Penva ol aro ong panine lemimem nge wong? Aro ve ong ini toko aka God i ateal ong ve aro ong el werer ile tokokoere, aro ong ritet senu i a them nge.”

²⁵ Ma Jisas i olal ole riong ve, “Tho ritet thomu nge lale, ave lomu lemioong tie avele nge tho. Na pathepolong aka tho oma i ranga ve ako Vovo i ria tho nge, ma i pathengal thomu nge aka ve, tho ini ao.

²⁶ Aveto thomu, lomumuo nge avele, eneke thomu ini lek sipsipre avele.

²⁷ Lek sipsipre o nongal keik na lemik mire nge or na o panes tho.

²⁸ Na tho sung mimiong aka aro ile vusonga avele a or nge, na i pavurvur aro o penthal avele. Na toko e avele i pavurvur aro i eltetpot or a menik.

²⁹ Na ok Vovo aka i sungu or a tho nge, ile engenging i aolonga nge ur alavusnga, na toko e avele i pavurvur aro i eltetpot or a ok Vovo imeni.

³⁰ Them e a Vovo them omole inga.”

³¹ Mako Judare o ela mun umre mo o pun rin i nge.

³² Lamako Jisas i ria or ve, “Na tho oma omaing sivenga pulua aka a thekumu aka ranga ve Vovo i ria tho nge. Na kathnga ol aka o ri ve o pun rin tho nge, e?”

³³ Ma o olal ile riong ve, “Them sis ve aro them pun rin ong nge lom omaing sivenga omanga, kene avele. Them sis ve aro them pun rin ong, eneke ong ri tangatun nge a God, na ong ini toko ulue anga, ave ong ri ve ong ini mun i a God.”

³⁴ Na Jisas i olal ole riong ve, “Na wating aka ru a lomu patorong lemi i ri ve, ‘God i ri ve, thomu ini godre.’*

³⁵ Na lemir mire aka God ile erere i nunganga rintet, na tokokoe areko God i sung ile riong a or nge kene, i apet or ini godre.

³⁶ Na toko aka God i ateal i mo i riri na i pakeu i ake ru a ulue me kene i pomnga nge or, na aro ve i apet or ini godre, i vova ake thomu o ri ve tho ri tangatun nge a God nge aka tho ri ve, ‘Tho ini a God Itun,’ e?

³⁷ Na aro ve tho oma Vovo ile omaing avele, make aro lomumuo nge tho avele.

³⁸ Aveto aro ve tho oma ile omaing, aro lomumuo nge lek omaing aken. Na aro ve lomumuo nge lek riong avele, ur e avele, aro lomumuo inga nge lek omaing, maken aro lomumu mire senu aka Vovo i teo a tho nge, na tho teo a Vovo nge.”

³⁹ Ma Judare o tongporum ve aro o rere mun i, ave i lo lelpot nge or.

⁴⁰ Na Jisas i apola werer thei a Jordan ma i es nge pen aka nomenga Jon i paninu tokokoere nge, ma i voth ol nge.

* 10:34: Buk Song 82:6

⁴¹ Ma toko pulua o es a i nge, na o ria ve, “Na Jon i oma pathepolong pelie avele, aveto ur alavusnga ako i ri nge toko ake, kene i nunganga.”

⁴² Na nge wop aken toko pulua olemio nge a Jisas.

Jisas i es a Judia na Jerusalem na mukalingare o rirum nge isorinnga

11

(Vonge 11:1-12:50)

Lasarus ile rinong.

¹ Na toko omole aka iion a Lasarus, kene i ngoo. Na i voth nge rem pomnga aka iion a Betani, aka ini a Maria ome iteinnga a Marta ole rem tepun.

² Na Maria ake ini seng aka aro i odorkutn a Jisas ieve nge sanda una vrunga, ma i taulpot i a ieve nge ipouniga thoing, na ilun re aton ini a Lasarus aka i ngoo.

³ Lamako ilun alaini o pasong okei a Jisas nge ve, “Toko Pomnga, toko aton om sagu rintet i, kene ini multhang.”

⁴ Na Jisas i nongpola i ma i ria ve, “Ni multhanging aken i potoipot nge rinong avele. Ur aken i velpol mo aro tokokoere o papomnga a God, naro God i papomnga Itun nge.”

⁵ Na Jisas ia sagu a Marta ome itein na olun a Lasarus.

⁶ Na i nongpola a Lasarus ia kimaing aka ini multhang, aveto i voth vet inga nge pen aka ru o voth nge ma i voth nge nang or aini.

⁷ Lamako i ria ile wainlangaere ve, “Aro te lo werer a Judia la.”

⁸ Ave o olal ile riong ve, “Pamirealinga, worse re atike Judare aka a epee a Judia o ri nge pun rinngom nge umre, nake ong ri ve te lo werer mun a epee a Judia la, e?”

⁹ Ma Jisas i ria ve, “Na nang i to nge aua or mule pa omole pothoi or aini nge nang omole omole. Na toko aka i es erang i pavurvur aro i omrang pelekpol avele, eneke i thopol pen lalanga aka i to a ulue.

¹⁰ Aveto aro ve i es pemlik, aro i omrang pelekpol, eneke ile the lalainga avele.”

¹¹ Na Jisas i ria or venen aken, lama i ria mun or ve, “Thenger a Lasarus i nokolkol, ave aro tho es la mo tho pamimeta i.”

¹² Ma ile wainlangaere o olal ile riong ve, “Toko Pomnga, aro ve i nokolkol, aro i senu werer.”

¹³ Na Jisas ile riong aken mirenga ve, Lasarus i rin lale, aveto ile wainlangaere o el ile riong aken mirenga avele, ma o rivenga Lasarus i nokolkol inga.

¹⁴ Mako Jisas i ritet ole ve, “Lasarus i rin lale,

¹⁵ aveto lemik sivenga nge aka tho voth tomo nge i avele, eneke aro tho oma omaing aka aro i opoal thomu mo aro lomumuo nge tho. Naro te es a i nge.”

¹⁶ Na Tomas aka iion aininga a Didimus, kene i ria ithangangaere ve, “Aro te es tomo nge ler pamirealinga mo aro te rin tomo nge i.”

Jisas ini toko aka i palos werera tokokoere ma i sung mimiiong a or nge.

¹⁷ Ma Jisas i velpol ma i nongpola aka Lasarus kene i ngotet nge nang or penel lale a vuvepun.

¹⁸ Na Betani kene a wop mela avele nge a Jerusalem, i pavurvur nge kilomita or me inga.

¹⁹ Na toko pulua aka a epee a Judia o es mo o thopol a Marta ome a Maria mo o okup or paini, ke olunnga i rin.

²⁰ Na Marta i nongpola aka Jisas i es me, mako i korpot mo i thopol i a so, aveto Maria i voth a vel lemi.

²¹ Lama Marta i ria Jisas ve, “Toko Pomnga, aro ve ong voth ake, aro luk aro i rin avele.

²² Aveto lemik mire aka ve, ur nekenga aka ong nong i a God nge ponange, aro i sungu i.”

²³ Ma Jisas i ria i ve, “Lum aro i los werera.”

²⁴ Lama Marta i olal ile riong ve, “Lemik mire aka ve, aro i los werera nge ulue ile vusong.”

²⁵ Ma Jisas i ria i ve, “Tho ini toko aka tho palos werera tokokoere na tho sung mimiiong a or nge. Areko olemio nge tho, aro ve o rin a ulue, aro o mimi a Pen a Urvet.

²⁶ Na areko o mimi a ulue na olemio nge tho, aro o penthal avele ol. Na Marta lomumo nge lek riong ake?"

²⁷ Ma i olal ile riong ve, "Ena, Toko Pomnga, lemik ako ve, wong ini toko aka God i ateal ong ve aro ong el werer ile tokokoere, na wong ini a God Itun, aka i kin ile riong ve aro i pakeu ong a ulue me."

Jisas i tang nge a Lasarus.

²⁸ Na Marta i ri venen aken lama i lo werer a iteinnga a Maria nge, ma i leng i mo i ri kine a i nge na i ri ve, "Ler pamirealinga ake i velpol, ma i nin nge wong."

²⁹ Na Maria i nongpola i ma i espot viri viri la mo i thopol a Jisas.

³⁰ Na Jisas i velpol a rebo rongan, aveto rongan i voth nge pen aka Marta i thopol i nge.

³¹ Na Judare aka o okup a Maria a vel lemi, ma o thopol aka Maria i espot viri viri, mako o paneso i, eneke o rivenga aro i es a vuvepun mo i tang nge.

³² Na Maria i velpol nge pen aka Jisas i voth nge ma i thopol i, mako i koru ieve ma ipo tiru a i nge ma i ria i ve, "Toko Pomnga, aro ve ong voth ake, aro luk aro i rin avele."

³³ Na Jisas i thopol aka Maria i tang, na i thopol mun aka Juda pelie aka o panes i kene o tang tomo mun nge i, ma ilemi kerere rintet.

³⁴ Ma i nina ve, "Thomu o rongo i a kath?"

Ma o olal ile riong ve, "Toko Pomnga, es me mo thopol i."

³⁵ Mako Jisas i tang.

³⁶ Lama Judare o ria ve, "Thopol vet, ia sagu rintet re i ake."

³⁷ Aveto pelie o ri ve, "Na i vles werer toko theki prosnga aton itheki, na aro ve i voth ake i pavurvur aka aro i pamimi mun a Lasarus mo i rin avele."

Jisas i palos werera a Lasarus.

³⁸ Ma Jisas ilemi kerere rintet mun ma i es a vuvepun la. Na vuvepun aken ini silkep aka o sing rupo ithekia nge um aolonga.

³⁹ Ma Jisas i ria or ve, "O singtetpot um aken."

Ave Marta aka ini rinonga ilun i ria i ve, "Toko Pomnga, i una plot lale, eneke i ngotet nge nang or penel lale."

⁴⁰ Ma Jisas i ria i ve, "Na tho ria ong lale aka, aro ve lomumo nge tho, aro ong thopol a God ile engenging aolonga."

⁴¹ Lamako o singtetpot um aken, lama Jisas ipo watha ma i ria ve, "Vovo, tho ri sivengaing a ong nge aka ong nongpol lek nongong lale.

⁴² Lemik mire aka ve, evelelnga ong nongpol tho, ave tho ri nge ake mo aro tho opaal tokokoe areke o mit mo aro olemio aka ve, ake ini wong aka ong pakeu tho me."

⁴³ Ma i ri venen aken ma i vus, lama i presa viringa ve, "Lasarus, espot me!"

⁴⁴ Mako rinonga i losa ma i espot me. Ma i es tomopot nge ia pupo aka o papupoala i nge a imeni mala mulpot a ieve, tomo mun nge itheki sorupalonga.

Mako Jisas i ria or ve, "O inospot ipapupoalnga mo i es."

Mukalingare o rirum nge a Jisas isoringga.

(Matiu 26:1-5; Mak 14:1-2; Luk 22:1-2)

⁴⁵ Na Juda pom aka o es me ma o okup a Maria kene o thopol ur aka Jisas i oma i, mako olemio a i nge.

⁴⁶ Ave oa pelie o lo werer a Parisire nge la, ma o ritet or nge ur aka Jisas i oma i.

⁴⁷ Lama Parisire tomo nge pris kimangare o velilo tomo nge Judare oa pom-pomere or mule pa limai ma o ri ve, "Aro te oma neke? O thopol vet pathepolong pulua aka toko ake i oma ir!

⁴⁸ Aro ve ser wenal i, aro toko alavusnga aro olemio nge i. Naro Romre aro o es me mo o pakerenga ler Lotu Tepun a Vel na ler tokokoere mun."

⁴⁹ Na ole mukalinga, aka iion a Kaiapas, aka ini Prisre oa Pomnga nge tovu po aken, i ri ve, "Lomumu mire nge ur e avele.

⁵⁰ O thopol vet, i sivenga nge thomu aka aro toko omole aro i el toko alavusnga omei mo i rin, maken Romre aro o pakerenga ler toko alavusnga avele."

⁵¹ Na Kaiapas i ri riong aken nge isivenga ile lemi rumong avele. Aveto i

ripot a God ile riong, eneke ini Prisre oa Pomnga nge tovu po aken, ma i ri nge a Jisas ako aro i rin leltun Judare.

⁵² Na ini Judare oenga avele, ave aro i rin leltun mun a God itutunre ako o men a pen elonga mo aro i velilo ir mo aro or omole ol.

⁵³ Na i patea nge nang aken ako Judare oa pompomere o rirum nge a Jisas isoringga.

⁵⁴ Mako Jisas kene i es patpot ol avele, i es kinine ol inga nge Judare oa. Mako i es ol nge pen ako i toth nge pen polpolnga ako a rem ako iion a Epraim, ma i voth tomo ol nge ile wainlangaere nge.

⁵⁵ Makola i toth nge Judare oa Punseleainga a Aning a nang. Na nge wop lemi aken, toko pulua aka a rumremre o es a Jerusalem mo aro o pariri tel or a God itheki lamo o es ol nge aning aken.

⁵⁶ Na o kath a Jisas ma o theu thea i, na nge aka o voth a Lotu Tepun a Vel a lok lemi, o nin pel osivenga ve, “Lomumu vava? Aro i es mun me nge aning eve avele?”

⁵⁷ Na pris kimangare tomo nge Parisire o sung riong engenga lale ve, “Aro ve omu e ilemi mire nge wop aka Jisas i voth nge, aro i pamilempot i, mo them rere i.”

12

Maria i odorok sanda una vrunga a Jisas ieve.

(*Matiu 26:6-13; Mak 14:3-9*)

¹ Na nang or limae rongan i voth aka aro Punseleainga a Aning i velpol, ma Jisas i es a Betani, aka ini a Lasarus ile pen, ini toko aton i palos werera i nge rinong.

² Ma o monsi ia aning nge. Na Marta i mota oa aning na Lasarus i men tomo nge a Jisas rea nge aning aken.

³ Lamako Maria i ela sanda una vrunga a botol aolonga aka iolonga i roro rintet ma i odoroka i a Jisas ieve nge, ma i girtet i nge ipounga thoing. Na iunanga i vual a vel lemi.

⁴ Na Jisas ile wainlanga omole aka iion a Judas Iskariot, na ini toko aka aro i sungu a Jisas a ngarangre omeni, kene i ri ve,

⁵ “I vova ake te tepopal sanda aken nge umtun avele, e? I olonga i pavurvur nge

toko omole iolonga nge tovu po omole mo te sungu i a toko le ur avelengare nge.”

⁶ I ri venen aken, eneke ilemi rum toko le ur avelengare, kene avele, aveto i ri venen aken, eneke ini toko kemonga na i theal a Jisas ile wainlangaere ole umtun a kole, na evelelnga i elpot pelie nge mo ini ile.

⁷ Ma Jisas i olal ile riong ve, “Mothong! I voth venen, sanda epee aken aro i voth mola i pavurvur nge nang aka aro o tetun tho nge.

⁸ Toko le ur avelengare aro o voth tomo nge thomu evelelnga, aveto tho, aro tho voth tomo nge thomu evelelnga avele.”

Pris kimangare o ri nge a Lasarus isoringga.

⁹ Na Juda pulua o nongpol aka Jisas i voth a Betani, mako o es la, aveto o sis ve aro o thopol a Jisas ienga avele, o sis ve aro o thopol mun a Lasarus, ini toko aka Jisas i palos werera i nge rinong.

¹⁰ Mako pris kimangare o rirum mun a Lasarus isoringga,

¹¹ eneke Juda pulua o suptun or avele ma olemio ol nge a Jisas, eneke o thopol a Lasarus aka i mimi werer.

Jisas i eso a Jerusalem ranga ve ini nepes.

(*Matiu 21:4-9; Mak 11:7-10; Luk 19:35-38*)

¹² Na erangu mun na toko na seng pom aka o es nge Punseleainga a Aning, o nongpol aka Jisas aro i es a Jerusalem me.

¹³ Mako o tokor pakao menini ma o es mo o thopol i ma o anuepot i ma o presa viringa ve,

““Te risea a God!”
Sapase toko aka i es nge Toko Pomnga iion me.”

Buk Song 118:25-26
“Sapase Israelre ole Nepes ake.”

¹⁴ Lama Jisas i thopol donki aponga ma i mena nge, aka ranga ve God ile erere i ritet nge nomenga na i ri vene:

¹⁵ “Thomu Jerusalem angare, o mothong tova o ngange,

o thopol vet lomu nepes ake i es me ma i men a donki aponga nge.”

Sekaria 9:9

¹⁶ Na ile wainlangaere kene olemi mire senu nge ur areko i velpol a i nge, kene

avele. Aveto panen aro God i papomnga ol a Jisas, aro olemi rumtetu ur areko o oma i a Jisas nge na i ranga ve aka God ile erere i ri nge lale.

¹⁷ Na toko na seng areko o voth tomo nge a Jisas nge nang aka i lengpot a Lasarus a vuvepun me ma i palos werera i nge rinong, kene o panongpol nge.

¹⁸ Mako toko pulua o es a i nge ma o thopol i, eneke o nongpol aka i oma pathepolong aken.

¹⁹ Mako Parisire o ria pel osivenga ve, "Te pavurvur aro te oma ur e avele ol. O thopol vet toko alavusnga o panes i lale!"

Toko pelie aka or ini Judare avele, o kath a Jisas.

²⁰ Na toko pelie aka or ini Judare avele, o supo tomo nge areko o es a Jerusalem mo aro o lotu aka nge Punseleainga a Aning aken.

²¹ Mako o es a Pilip nge, aka ile a Bet-saida a epee a Galili, ma o ria i ve, "Them sis ve aro them thopol a Jisas."

²² Mako Pilip i es ma i ria Andru, ma or paini o es ma o ria ol a Jisas.

²³ Ma Jisas i olal ole riong ve, "Lek nang i velpol lale aka aro Toko Pomnga i papomnga Itun.

²⁴ Tho ri nunganga a thomu nge, aro ve wit monnga omole i matu a ulue avele na i rin avele, aro ienga inga i voth, aveto aro ve i matu a ulue na i rin, aro i mon mo imonnga i pom.

²⁵ Na toko aka i sarinalo isivenga ile mimiong, aro ile mimiong aken aro i penthal. Na toko aka i sungpot isivenga ile mimiong ake ru a ulue, aro ile mimiong aken aro ile vusonga avele.

²⁶ Na aro ve toko e aka i sis ve aro i velpol ini lek umonga, aro i panes tho nge wop elonga aka aro tho es nge, mo aro i voth tomo nge tho nge pen aka aro tho voth nge. Naro Vovo i papomnga tokokoe areko or ini lek umongare.

Jisas i ritet nge ile rinong.

²⁷ "Na ponange ake lemik i sivenga ol avele. Naro tho ria ol vava? Aro tho ri ve, 'Vovo, eltetpot ur aka i toth aka aro i velpol a tho nge'? Avele! Aro tho el inga

matheong aken, eneke tho es re me ake, mo aro tho el i.

²⁸ Vovo, papomnga sivengom!"

Na Jisas i ri venen aken lama lenging i espot a Pen a Urvet me, ma i ri ve, "Tho papomnga sivengek lale, naro tho oma mun i."

²⁹ Na pulua pomnga aka o mit tomo nge i, o nongpol lenging aken ma pelie o ri ve, "Ini pen akrunga." Ave pelie o ri ve, "Ensel omole i ri tomo nge i."

³⁰ Ave Jisas i olal ole riong ve, "Na lenging aken i espot me mo aro i opoal tho avele, i espot me mo aro i opoal thomu.

³¹ Na nge wop lemi ake God aro i velpol ini toko alavusnga ole riong nongpolnga. Naro i eltetpot a Satan aka i theal areko o panes vothung ulue anga ile engenging.

³² Na nge aka o pamona tho roro, aro tho palosa toko alavusnga olemi mo tho wol or a tho nge me."

³³ Na nge ile riong aken i ritet nge sovengalo kathnga aka aro i rin nge.

³⁴ Na pulua pomnga o olal ile riong ve, "Na them nongpol aka ler patorong i ri ve, 'Toko aka God i ateal i ve aro i el werer ile tokokoere, aro i voth naro ile vusonga avele.' Na i vova ake ong ri ve aro o pamona Toko Pomnga Itun, e? Na Toko Pomnga Itun aka ong ri nge, ini ao?"

³⁵ Lama Jisas i olal ole riong ve, "Na pen lalanga aro i voth tomo nge thomu palolo tie. Naro thomu o es nge aka pen lalanga rongan i voth tomo nge thomu, maken aro mideng i seltun thomu avele, eneke toko aka i es nge mideng, ilemi mire nge wop kathnga aka i es nge, kene avele.

³⁶ Aro lomumuo nge toko aka i sung pen lalanga, aka rongan i voth tomo nge thomu, maken aro thomu ini tokokoe areko o mimi nge pen lalanga." Na Jisas i ri venen aken ma i vus, mako i es lelpot nge or ma i mit kinealo i nge or.

Juda pulua aka ole mio nge a Jisas avele.

³⁷ Na Judare o thopol pathepolong pulua aka Jisas i oma i, aveto ole mio nge i avele.

³⁸ Mako ur aka God ile riong elnga a Aisaia i ri nge, i velpol nunganga. Ma Aisaia i ri vene:
"Toko Pomnga, tho thopol toko e avele

ako ilemio nge lemem panongpolong. Na ong pathengal lom engenging a or nge, ave olemio nge avele.” *Aisaia 53:1*

39 Na o pavurvur aro olemio nge a Jisas avele, eneke itepun ranga ve ako riong mun ako Aisaia i wat i nomenga ako i ri ve,

40 “God i mon sopal tokokoere otheki mo o the ol avele.

Na i pasulung olemi, mo aro olemi nine ol avele.

Maken o pavurvur aro o eksing a God nge, mo aro i pamimi or, kene avele.”

Aisaia 6:10

41 Na Aisaia i wat riong aken nomenga, eneke i thopol tel nang aro God i papomnga a Jisas nge, mako i ritet nge.

42 Aveto Judare oa pompome pulua olemio nge a Jisas, ave o rimilempot i avele, eneke o ngange nge Parisire aro vene mo o mit roal or nge koroong a Judare ole lotuonga a vel.

43 Eneke ole lemi sivengaing nge tokokoere ole riseaing nge or, i mukal nge ole lemi sivengaing nge a God ile riseaing nge or.

Jisas ile riong aro i pamit tokokoere nge riong.

44 Lama Jisas i presa viringa ve, “Toko aro ilemio nge tho, ilemio nge engek avele, ilemio mun nge a Vovo aro i pakeu tho me.

45 Na toko aro i thopol tho, i thopol mun a Vovo aro i pakeu tho me.

46 Na tho esu a ulue ake me ranga ve ini pen lalanga, mo aro tokokoe areko olemio nge tho, aro o voth ol a mideng avele.

47 Na aro ve toko e i nongpol lek riong, na i nongal i avele, aro tho pamit i nge riong avele. Eneke tho es me mo aro tho pamit tokokoere nge riong avele, tho es me mo aro tho pamimi tokokoere ake ru a ulue.

48 Na tokokoe areko o lel okime nge tho na o avsa lek riong, ole riong nongpolnaga i voth, ake ini lek riong, na nge ulue ile vusong, riong aro tho ripot i lale aro i sung paomelaling a or nge.

49 Ur ake i nunganga, eneke tho ripot riong nge sivengek lemik avele, aveto Vovo aro i pakeu tho me, i pator tho nge riong aro tho

ripot i.

50 Na lemik mire aro ve, ile patorong aken i sung mimiong aro ile vusong avele, mako riong alavusnga aro tho ripot i, ini inga riong aro Vovo i ria tho nge.”

Jisas i ria ile wainlangaere ve aro i lo lelpot or mo aro i lo werer a Itema nge la

13

(Vonge 13:1-17:26)

Jisas i paut ile wainlangaere oeve.

1 Na nang omole ol inga aro Punseleainga a Aning i patea. Na Jisas ilemi mire aro i toth lale aro i losa a ulue ake mo i lo werer a Itema nge la. Na evelelnga ia sagu rintet toko elonga ake ru a ulue aro ini ile, na ponange aro i pathengal or nge aro ile asaguong aken i aolonga rintet.

2 Penieo ol ma Jisas ome ile wainlangaere o an. Na Satan i ri ololo a Judas Iskariot aro ini a Saimon Iskariot itun, ilemi lale mo aro i sungu a Jisas a ngarangre omeni.

3 Na Jisas ilemi mire aro Itema i sungu ur alavusnga a imeni lale, na ilemi mire mun aro i es a God nge me, naro i lo werer mun a God nge la.

4 Lama Jisas i mita ma i teuntetpot ile teunong na i kino ni peti girtetnga a ilopat.

5 Lama i odoroku thei a thei mei nge, na i patea ile wainlangaere oeve pautnga na i paklangklang oeve nge ni peti girtetnga aro i kino i a ilopat.

6 Mako me i eso a Saimon Pita nge, ma Pita i nin i ve, “Toko Pomnga, aro ong paut evek?”

7 Lama Jisas i olal ile riong ve, “Lomum mire nge ur aro tho oma i ponange, kene avele, aveto aro panen aro lomum mire nge.”

8 Ma Pita i ria i ve, “Avele, i pavurvur aro ong paut evek avele.”

Aveto Jisas i olal ile riong ve, “Aro ve tho paut evom avele, aro wong ini lek wainlanga avele.”

9 Mako Pita i olal ile riong ve, “Toko Pomnga, aro ong paut evek inga avele, aro ong paut mun menik na poungek.”

¹⁰ Ma Jisas i ria ve, “Na toko e ako i nunu lale, ini peti elonga i riri, ave ieve inga i pavurvur nge pautpotnga. Na thomu alavusnga o riri lale, aveto omu omole avele.”

¹¹ Na Jisas ilemi mire lale nge toko aro i sungu i a ngarangre omeni, taro ake i ri ve, “Na thomu alavusnga o riri lale, aveto omu omole avele.”

¹² Lama Jisas i paut oeve ma i vus, lamako i teunu werer ile teunong ma i men wereru a imei ma i ria or ve, “Lomumu mire nge ur aka tho oma i a thomu nge kene mirenga?”

¹³ Na thomu kene o apet tho ve, ‘Pamirealinga’ na ‘Toko Pomnga’ aken i vengveng re aken, eneke tho vene re aken.

¹⁴ Na tho ini omu pomnga na lomu pamirealinga, ave tho paposnga tho na tho paut evomu, maken i sivenga aka aro thomu mun o paut pel evomu.

¹⁵ Tho oma omaing ake mo aro thomu oma i ranga ve aka tho oma i a thomu nge lale.

¹⁶ Tho ri nunganga a thomu nge, toko um polpolonga e avele i pomnga nge ia pomnga, na pakeke e avele i pomnga nge toko aka i pake i.

¹⁷ Na lomumu mire lale nge ur areke, na aro ve thomu o oma ir, aro lomumu sivenga rintet.

¹⁸ “Na tho ri nge thomu alavusnga avele. Lemik mire nge areko tho ateal or lale. Aveto God ile erere aro i velpol nunganga aka i ri ve,

‘Toko aka i an tomo nge tho kene ikime lelalpot tho.’ *Buk Song 41:9*

¹⁹ “Na tho ritet thomu nge ur areko i velpol rongan, mo aro ve i velpol, aro lomumuo aka ve, tho ini toko aka tho voth evelelnga.

²⁰ Tho ri nunganga a thomu nge, toko aka i nongpoo toko aka tho pake i, aken kene i nongpoo mun tho, na toko aka i nongpoo tho, aken kene i nongpoo mun toko aka i pakeu tho me.”

Jisas i ritet nge toko aka aro i sungu i a ngarangre omeni.

(Matiu 26:20-25; Mak 14:17-21; Luk 22:21-23)

²¹ Na Jisas i ri venen aken, lamako ilemi kerere rintet na i ritet senu ve, “Tho ri nunganga a thomu nge, omu ko e aken aro i sungu tho a ngarangre omeni.”

²² Lamako ile wainlangaere o theala pel, eneke olemi mire nge oa kathnga aka i ri nge i, kene avele

²³ Na Jon aka ini a Jisas ile wainlanga aka ia sagu rintet i, kene i men totho a Jisas nge.

²⁴ Ma Saimon Pita i powittuna i ma i ria i ve, “Ong nina vet i, i ri aken nge ao?”

²⁵ Mako Jisas ile wainlanga aken ipo wathtuno i ma i nina i ve, “Toko Pomnga, ong ri aken nge ao?”

²⁶ Ma Jisas i olal ile riong ve, “Aro tho papisu bret ake mo tho sungu i a i nge koto i re aken.” Mako Jisas i ela bret ma i papisu i lama i sungu i a Judas aka ini a Saimon Iskariot itun.

²⁷ Ma Judas i ela i na ur e avele, nako Satan i rero sele i.

Mako Jisas i ria i ve, “Ur aka aro ong oma i, mo ong paviritun omanga.”

²⁸ Ave nge areko o men nge aning aken e, e avele ilemi mire nge aka i vava ake Jisas i ria riong aken nge i.

²⁹ Na Judas ini ole umtun a kole thealnga, ma oa pelie o rivenga Jisas i ria i nge Punseleainga a Aning olnga eve nge umtun sunga a toko le ur avelengare nge.

³⁰ Na Judas i ela bret aken lamako i korpot la nako pemlik ol lale.

Jisas i tor ile wainlangaere nge vothung aka aro o panes i.

³¹ Na Judas i korpot la ma Jisas i ria ve, “Na ponange God aro i papomnga Itun. Na Itun ile omaing aro i papomnga a God.

³² Na aro ve Itun ile omaing i papomnga a God, aro God isivenga aro i papomnga Itun, na i toth aka aro i oma i.

³³ “Na lek wainlangaere aro tho voth tomo nge thomu palolo avele. Naro o ora tho, na tho ria thomu ranga ve aka tho ria Judare nge, thomu o pavurvur aka aro thomu o es nge wop aka aro tho es nge, kene avele.

³⁴ “Na ponange tho tor lomu nge vothung ponganga: Ako aro omu sagu pel ranga ve aka ok sagu thomu.

³⁵ Na aro ve omu sagu pel, aro toko alavusnga aro olemi mire ako ve, thomu ini lek wainlangaere.”

Jisas i ria Pita ve, “Aro ong kelelal nge tho.”

(*Matiu 26:33-35; Mak 14:29-31; Luk 22:33-34*)

³⁶ Lama Saimon Pita i nin a Jisas ve, “Toko Pomnga, aro ong es a kath?”

Mako Jisas i olal ile riong ve, “Wop aro tho es nge, i pavurvur aro ong es nge ponange avele, aveto panen, aro ong es nge.”

³⁷ Lama Pita i nina mun i ve, “I vava ake tho pavurvur aro tho panes ol ong avele, e? Tho pavurvur aro tho sungpot lek mimiong mo aro tho opoal ong.”

³⁸ Ma Jisas i olal ile riong ve, “Ong pavurvur aro aro ong sungpot lom mimiong mo ong opoal tho, e? Tho ri nunganga a wong nge, aro vareo i tang rongan, naro wong kelelal pa or me ve, lomum mire nge tho avele.”

14

Jisas ini tokokoere ole so ako aro o es a God nge.

¹ Na Jisas i ria or nge ve, “Thomu o mothong tova lomumu rit eve lomumu ngo pelekpol. Lomumuo nge a God, na lomumuo mun nge tho.

² Ako a ok Vovo ile vel kene, ilemi pulua. Naro tho es nge mo aro tho monsi meumu. Na aro ve i vene ake avele, i pavurvur aro tho ria thomu nge avele.

³ Na aro ve tho monsi meumu mo i vus, aro tho lo werer me, mo tho wola thomu, mo o voth tomo nge tho, nge wop aro tho voth nge.

⁴ Na lomumu mire nge sovengalo nge wop aro tho es nge.”

⁵ Na Tomas i ria i ve, “Toko Pomnga, lemimem mire nge wop aro aro ong es nge, kene avele. Naro lemimem mire nge aken vava?”

⁶ Mako Jisas i olal ile riong ve, “Tho ini so, na riong nunganga, na mimiong tepun. Engek re inga ake ini so ako aro tokokoere o panes i mo o es a Vovo nge. Na so ol e avele ol.”

⁷ Na i ria mun or ve, “Aro ve lomumu mire senu nge tho, aro lomumu mire mun nge ok Vovo. Na i patea ponange aro lomumu mire nge i na thomu o thopol i lale.”

⁸ Mako Pilip i ria i ve, “Toko Pomnga, pathengal them nge a Vovo, na lemimem ol nge ur e avele.”

⁹ Na Jisas i olal ile riong ve, “Pilip, tho voth palolo tomo nge thomu, na lomum mire kek nge tho avele? Toko e ako i thopol tho, aken kene i thopol a Vovo. Na i vova ake ong ri ve, ‘Pathengal them nge a Vovo’, e?

¹⁰ Na Pilip, lomumo nge avele, ako tho teo a Vovo nge, na Vovo i teo a tho nge, e?” Na Jisas i ria or ve, “Riong ake tho ria thomu nge, tho ri nge lemik avele, Vovo i teo a tho nge make i oma ile omaing.

¹¹ Lomumuo nge lek riong ake tho ri ve, tho teo a Vovo nge na Vovo i teo a tho nge. Na aro ve avele, aro lomumuo nge pathepolong ake tho oma ir, o pathengal ake ve, tho teo a Vovo nge, na Vovo i teo a tho nge.

¹² Tho ri nunganga a thomu nge, toko ako ilemio nge tho, aro i oma mun omaing areko tho oma i. Naro ile omaing aro i aolonga nge lek, eneke tho es a Vovo nge.

¹³ Na ur alavusnga ake thomu o nong i a tho nge, eneke thomu o panes tho, aro tho oma i, mo aro tokokoere o papomnga a Vovo nge lek omaing aken.

¹⁴ Na ur alavusnga ake thomu o nong i a tho nge, eneke thomu o panes tho, aro tho oma i.”

Jisas i kin ile riong ake aro i pakeu Oni Riringa a or nge.

¹⁵ Mako Jisas i ria mun or ve, “Aro ve omu sagu tho, maken aro thomu o panes senu lek riong elonga.

¹⁶ Naro tho nong a Vovo nge, mo i sungu mun lomu opoalinga e, naro i voth tomo nge thomu nge nang eloelonga.

¹⁷ Ako ini a God Ioni Riringa, ake i ri nge riong nunganga. Na toko na seng areko o panes vothung ulue anga, o pavurvur aro o elo i avele, eneke o thopol i avele, na olemi mire mun nge i avele. Aveto

lomumu mire nge i, eneke i voth tomo nge thomu, naro i eso a lomumu.

¹⁸ Naro tho es, aveto aro tho mothong lel thomu ranga ve ini wain patuainga, kene avele. Aro tho lo werer mun a thomu nge me.

¹⁹ Na nang pelie i lutetu inga lamako aro tho rin naro tokokoe areko o panes vothung ulue anga, aro o thopol ol tho avele ol, aveto aro thomu o thopol werera mun tho, naro thomu o mimi, eneke tho mimi werer.

²⁰ Ma nge nang aken aro lomumu mire nge ako, tho teo a Vovo nge, na thomu o teo a tho nge, na tho teo a thomu nge.

²¹ Na toko e, aro ve i nongal lek riong na i panes i, toko aken kene ia sagu tho, na toko aka ia sagu tho, na Vovo mun aro ia sagu mun i, na tho mun aro ok sagu mun i, naro tho pathengal sivengek a i nge."

²² Na Judas, aka ini a Judas Iskariot avele, i nin a Jisas ve, "Toko Pomnga, i vava ake aro wong pathengal sivengom a them nge, ave tokokoe areko o panes vothung ulue anga aro wong pathengal sivengom a or nge avele, e?"

²³ Lamako Jisas i olal ile riong ve, "Aro ve toko ia sagu tho, aro i panes lek patoralingre, naro Vovo aro ia sagu mun toko aken, maken aro them toko aini aro them es a i nge me, naro them mimi tomo ol nge i.

²⁴ Na toko aka ia sagu tho avele, aro i panes lek patoralingre avele, na riong aka thomu o nongpol i lale, kene ini lek avele, i es aka a Vovo nge me, aka i pakeu tho me.

²⁵ "Ako rongan tho voth tomo nge thomu na tho ria thomu nge ur areke lale.

²⁶ Na opoalinga, aka ini Oni Riringa, aka aro Vovo aro i pakeu i me, mo i el meik, aro i patorial thomu nge ur elonga, naro i palemi rumal thomu nge lek riong aka tho patorial thomu nge lale.

²⁷ Aro tho lolel thomu, naro tho sungu lek lemi moring a thomu nge, mo i voth tomo ol nge thomu. Na lek lemi moring aken i vur e pel nge toko ulue angare ole avele. O mothong tova lomumu i ngo pelekpol. Na o mothong tova o ngange.

²⁸ Na thomu o nongpol aka tho ri ve, 'Aro tho es la, naro tho lo werer mun a thomu nge me.' Na tova ve omu sagu tho, aro lomumu sivenga nge aka tho es a Vovo nge, eneke Vovo kene i pomnga nge tho.

²⁹ Na ur ake i velpol rongan, na tho ritet i a thomu nge lale, eneke panen tova ve i velpol, aro lomu lemioong i engeng nge tho.

³⁰ Aro tho ri tomo nge thomu palolo avele, eneke i toth aka aro Satan aka i theal areko o panes vothung ulue anga, aro i es me. Na ile engenging avele aka aro i oma ur e a tho nge.

³¹ Aveto tho sis ve aro toko na seng areke ru a ulue aro olemi mire aka ok sagu rintet a Vovo, na tho oma inga omaing elonga aka Vovo i pator tho nge ve aro tho oma i.

Ita, mo te es."

15

Jisas i ranga ve ini vain venganga, na it ranga ve ini vain aken imenini.

¹ Na Jisas i ria or nge ve, "Na tho re ake, tho ranga ve ini vain tepun nunganga na ok Vovo i ranga ve ini vain a ometa tokoninga.*

² Na meningek elonga, aka o mon avele, Vovo i sorotetpot ir. Na meningek elonga aka o mon, Vovo i paepepal ir mo aro o mon senu.

³ Na thomu kene, panongpolong aka tho sungu i a thomu nge, i pariri thomu lale.

⁴ Thomu o teo a tho nge, naro tho teo mun a thomu nge. Na vain meni, aro ve i teo a venganga nge avele, i pavurvur aro i mon avele, aveto i pavurvur aro i mon tova i teo a venganga nge. Na i vene re aka, na aro ve thomu o teo a tho nge avele, i pavurvur aro lomu omaing aro i mon avele.

⁵ "Na tho ranga ve ini vain venganga, na thomu o ranga ve ini vain menini. Na toko aka i teo a tho nge, na tho teo mun a i nge, aro ile omaing aro i mon mo imonnga aro i pom rintet. Na aro ve thomu o teo a tho nge avele, i pavurvur aro o oma ur e avele.

* ^{15:1}: Nge a God ile riong o oma riong agelalnga nge Israelre aka o ranga ve ini vain a ometa.

⁶ Na toko e ako i teo a tho nge avele, i ranga ve ini won meni ako o asespot i mo i mene, naro o velilo won aken menini mo o ula i a won sesenga nge mo i ongtun.

⁷ Na aro ve thomu o teo a tho nge, na lek riong i voth a thomu nge, maken aro thomu o nong a tho nge i pavurvur nge ur ake thomu o sis i, naro i velpol ranga ve ake thomu o nong i a tho nge.

⁸ Tova ve lomu omaing monnga i velpol pom, aken i pathengal ake ve, thomu ini lek wainlangaere, maken aro o papomnga ok Vovo.

⁹ “Ok sagu thomu ranga ve ake Vovo ia sagu tho. Naro thomu o teo a tho nge mo aro lek asaguong aro i voth a thomu nge.

¹⁰ Na aro ve thomu o panes lek riong, maken aro lek asaguong aro i voth a thomu nge, ranga ve ake tho panes a Vovo ile riong ma ile asaguong i voth a tho nge.

¹¹ Na tho ri riong alavusnga aken a thomu nge lale mo ake aro lomu lemi sivengaing i ranga ve ini lek lemi siven-gaing. Naro thomu o vual nge lemi siven-gaing.

¹² Na lek riong engenga i vene: Thomu omole omole omu sagu pel ranga ve ake ok sagu thomu.

¹³ Na asaguong ake i aolonga nge asaguong alavusnga i vene: Aro ve toko e i sungpot ile mimiong nge ithangangaere oopoalnga.

¹⁴ Na thomu ini thengengekre, tova thomu o oma i ranga ve ake tho pator thomu nge.

¹⁵ Na toko umonga ilemi mire avele nge ur ake ia pomnga i oma ir, taro ake i pavurvur aro tho apet thomu ini toko umonga avele, eneke riong alavusnga ake tho nongpol i a ok Vovo nge, i re ake tho ria thomu nge lale, make tho apet thomu ve ini thengengekre.

¹⁶ Thomu o ateal tho ve tho ini omu pomnga, kene avele, tho ateal thomu ve aro thomu ini lek, na tho sungu omaing a thomu nge ve aro lomu omaing aken aro i mon mo i pom, naro ile monaing aro ile vusonga avele. Maken Vovo aro i sungu ur alavusnga ake thomu o nong i a i nge, eneke thomu o panes tho.

¹⁷ Tho sungu riong engenga ake a thomu nge ve, aro omu sagu pel.”

Tokokoe areko o panes vothung ulue anga aro oni silal a Jisas ile wainlangaere.

¹⁸ Na Jisas i ria or ve, “Aro ve tokokoe areko o panes vothung ulue anga oni silal thomu, aro lomumu rum mun ake oni silal tel tho a mukaling.

¹⁹ Aro ve thomu o men ranga ve ini tokokoe areko o panes vothung ulue anga, aro oa sagu thomu ranga ve ini olengare. Aveto tho ateal thomu ve aro thomu o velpol ini tokokoe areko o panes vothung ulue anga avele. Na ponange thomu ini tokokoe areko o panes vothung ulue anga avele, make tokokoe areko o panes vothung ulue anga, oni silal thomu.

²⁰ Naro lomumu rum riong ake tho ria thomu nge lale, ake ve, ‘Toko umonga e avele i aolonga nge ia pomnga.’ Na areko o pamem kerere tho, aro o pamem kerere mun thomu. Ave areko o nongal lek riong, aro o nongal mun lomu riong.

²¹ Naro o pamem kerere thomu, eneke thomu ini lek. Naro o oma venen aken, eneke olemi mire avele nge a Vovo ake i pakeu tho me.

²² Aro ve tho es me avele ake aro tho sung riong a or nge, aro paomelaling avele nge ole vothung kerenga, aveto tho es me lale, mako o pavurvur avele ake aro o ri ve, ‘Lemimem mire avele ake lemem vothung i kerenga.’

²³ Na toko e ake ini silal tho, aken ini silal mun ok Vovo.

²⁴ Aro ve tho voth tomo nge or avele, na tho oma pathepolong areko toko e avele i oma i nomenga, kene avele, aro paomelaling avele nge ole vothung, aveto o thopol lek omaing lale ma oni silal tho tomo nge ok Vovo.

²⁵ Aveto ole vothung aken kene i panunganga riong ake nomenga i voth nge ole patorong, kene i ri vene: ‘Tokokoere oni silal polpol tho, na tepun e avele.’ *Buk Song 35:19; 69:4*

²⁶ “Opoalinga aro i es me, ake ini Oni Riringa ake i ri nge riong nunganga ake i voth tomo nge a Vovo. Aro tho pakeu i a thomu nge me, naro i ritet thomu nge tho.

²⁷ Naro thomu mun, aro thomu o ritet tokokoere nge tho, eneke thomu o voth tomo nge tho, nge wop lemi ako tho patea omaing, ma me i pavurvur ponange.

16

¹ “Na nik plong ve aro lomu lemioong i matu, make tho ri riong ake a thomu nge.

² Naro o pakealalpot thomu a Judare ole lotuonga a vel lemire. Naro nang e ako aro i velpol ako tokokoere aro o pun rin thomu, na olemi ve va o oma a God ile omaing.

³ Na o oma vothung aken, eneke olemi mire nge a Vovo tomo e tho, kene avele.

⁴ Na tho ria thomu nge ur areke, mo aro lomumu rum nge lek riong aken, tova nang aken aro i velpol a thomu nge. Na tho ritet thomu nge ur areke nomenga avele, eneke rongan tho voth tomo nge thomu.

Jisas i ri nge Oni Riringa ile omaing.

⁵ “Aveto i toth lale ako aro tho lo werer a Vovo nge, ako i pakeu tho me. Na omu e avele i nina tho ve, ‘Ong es a kath?’

⁶ Na lomumu kerere rintet, eneke tho ritet thomu nge ur areke.

⁷ Aveto tho ri nunganga a thomu nge, i sivenga ako aro tho esa la, eneke aro ve tho esa la avele, aro Opoalinga aro i esu mun a thomu nge me avele. Aveto aro ve tho es la, aro tho pakeu i a thomu nge me.

⁸ Na nge ako aro i velpol, aro i palemi nine toko ulue angare nge ole vothung kerenga, na nge vothung vengvenga, na nge a God ile paomelaling.

⁹ Aro i pathengal or nge ako ole vothung i kerenga, eneke olelio nge tho avele.

¹⁰ Naro i pathengal or nge vothung vengvenga, eneke aro oleli mire ako tho panes vothung vengvenga, eneke aro tho es a Vovo nge, naro thomu o thopolal ol tho avele.

¹¹ Naro i pathengal or nge ako God ile paomelaling aro i velpol, eneke God i ritet nge ile paomelaling nge a Satan lale.

¹² “Lek riong pom ako tho sis ve aro tho ria thomu nge, aveto ponange thomu o pavurvur aro o el senu lek riong mirenga avele.

¹³ Aveto, nge ako Oni Riringa ako i ri nge riong nunganga kene i velpol, aro i panine lomumu nge ur aka i nunganga. Aro i ri nge isivenga ilemi avele, aveto aro i ri nge ur aka i nongpol i a God nge, naro i ria thomu nge ur alavusnga aka aro i velpol panen.

¹⁴ Naro i papomnga tho, eneke aro i el ur alavusnga aka tho ri nge mo aro i ripot i a thomu nge.

¹⁵ Ur alavusnga aka ini a Vovo ile, kene ini lek, taro ake tho ri ve Oni Riringa aro i el ur alavusnga aka ini lek naro i ripot i a thomu nge.”

Lemi sivengaing aro i el matheong imei.

¹⁶ Na Jisas i ria mun or ve, “Nang pelie i lutetu inga naro thomu o thopol ol tho avele, aveto aro i palolo mun avele naro thomu o thopol werera mun tho.”*

¹⁷ Lama ile wainlanga pelie o nin pel osivenga ve, “Riong aken mirenga vava aka i ri ve, ‘Nang pelie i lutetu inga naro thomu o thopol ol tho avele, aveto aro i palolo mun avele naro thomu o thopol werera mun tho.’ Na i ri mun ve, ‘I vene re ake, eneke aro tho es a Vovo nge?’”

¹⁸ Na o pesrou nge ninong avele ve, “Na i mirenga vava aka i ri ve, ‘Nang pelie i lutetu inga’? Lemir mire nge ile riong aken avele.”

¹⁹ Na Jisas ilemi mire nge oleli aka o sis ve aro o nina i, mako i nina or ve, “Thomu o nin pel sivengomu nge riong aka tho ri ve, ‘Nang pelie i lutetu inga naro thomu o thopol ol tho avele, aveto aro i palolo mun avele naro thomu o thopol werera mun tho,’ e?”

²⁰ Tho ri nunganga a thomu nge, aro thomu o wal na o tang, aveto tokokoe areko o panes vothung ulue anga aro oleli sivenga. Naro lomumu kerere, aveto lomu lemi kerereong aro i eksing kena aro ini ol i lemi sivengaing.

²¹ Na aro ve seng i pop wain e, aro i rov sisong, eneke ile nang re aken aro i pop i, aveto aro ve wain i velpol a lalanga, aro ilemi simikal sisong aken, eneke ilemi sivenga nge aka i pop povothvoth aken lale.

* **16:16:** Jon 14:19

²² I ranga ve ini mun i thomu, na ponange ini lomu nang ako aro lomumu kerere, aveto aro tho thopol werera mun thomu, kena aro lomumu sivenga, na lomu lemi sivengaing aken i pavurvur aro toko e aro i eltetpot i avele.

²³ Na nge nang aken aro thomu o nina ol tho nge ninong e avele. Tho ri nunganga a thomu nge, aro ve thomu o nong ur e a Vovo nge, aro i sungu i, eneke thomu ini lek.

²⁴ Na thomu ini lek wainlangaere, aveto nomenga ma me i mul ponange thomu o nong vet ur e avele a tho nge. Aveto aro o nong ol i a tho nge, naro o el i mo aro lomumu sivenga rintet.

Jisas ile mong vothung ulue anga lale.

²⁵ "Tho ri riong agelalnga a thomu nge, nge ur areke, aveto nang pelie ol aro tho ri riong agelalnga ol e avele a thomu nge. Aro tho panine senu ol lomumu nge a Vovo.

²⁶ Na nge nang aken aro thomu o nong vengveng a i nge, eneke thomu ini lek, i pavurvur avele aro tho el lomu nongong mo tho ria i nge.

²⁷ Eneke, Vovo isivenga aka ia sagu thomu. Ia sagu thomu, eneke thomu oa sagu tho, na lomumuo aka ve, tho es aka a God nge me.

²⁸ Tho es aka a Vovo nge me, ma tho esu a ulue me. Na i toth lale aka aro tho los lelpot nge ulue ake, mo aro tho lo werera a Vovo nge."

²⁹ Na ile wainlangaere o ri i ve, "Na ponange ong panine senu ol i lale, na ong ria ol them nge riong agelalnga ol e avele.

³⁰ Na lemimem mire aka ve, lomum mire nge ur alavusnga, na aro ve tokokore o nin ninong a ong nge avele, ong pavurvur aka aro ong olal ole ninong, eneke lomum mire nge olemi lale. Ake i oma them mo lemimemo aka ve, ong esu God a nge me."

³¹ Mako Jisas i olal ole riong ve, "Lomumuo lale ol nge tho, e?

³² Tho nin venen aken, eneke nang i toth na i velpol lale aka aro thomu o lo vra a lomu vel omole omole, na toko e avele aro

i voth tomo nge tho, aveto engek tho voth avele, eneke Vovo i voth tomo nge tho.

³³ "Na tho ria thomu venen aken mo aro thomu o el lemi moring, eneke thomu o teo a tho nge. Ake ru a ulue, matheongre aro o seltun thomu, aveto aro thomu o mit engeng, eneke lek mong vothung ulue anga lale."

17

Jisas i nong nge isivenga.

¹ Lama Jisas i ri venen aken ma vus, mako ipo watha a Pen a Urvet la, ma i nong ve,

"Vovo, nang i velpol lale, papomnga
Tum mo aro Tum i papomnga wong.

² Eneke ong paeso toko alavusnga a isa thewo mo aro i sung mimiong aka aro ile vusonga avele nge areko ong sung ir a i nge.

³ Na mimiong aka aro ile vusonga avele kene mirenga aka ve, olemi mire nge wong, engom inga aka ini a God nun-ganga, na olemi mire mun nge a Jisas Krais, aka ong pakeu i me.

⁴ Na tho papomnga ong ake ru a ulue nge aka tho pavus omaing aka ong sungu i a tho nge ve aro tho oma i.

⁵ Vovo, nomenga aka ong pavelpol ulue rongan na tho voth tomo nge wong na lek kimaing kene i aolonga, na ponange aro ong papomnga werer tho ranga ve aka tho voth tomo tel nge ong.

Jisas i nong nge ile wainlangaere.

⁶ "Na nge tokokoe areko o panes vothung ulue anga, ong sungpot pelie a tho nge, ma tho panine olemi nge wong. Na toko areken ini lom na ong sungu or a tho nge na o panes lom riong lale.

⁷ Na olemi mire lale aka ve, ur elonga aka i velpol a tho nge, kene i es inga aka a ong nge me.

⁸ Na riong aka ong sungu i a tho nge, tho sungu i a or nge lale, ma o elo i a olemi. Na olemi mire ol nge aka tho es a ong nge me, na olemio aka ve, ong pakeu tho me.

⁹ Tho nong ve aro ong opoal or, na tho nong nge areko o panes vothung ulue anga, kene avele, aveto tho nong nge

areko ong sungu or a tho nge, eneke or ini lom.

¹⁰ Na areko ini lek, or ini lom. Na areko ini lom, or ini lek. Na tokokoe areko o thopol aka lek mimiong i voth a or nge, aro o pasea tho.

¹¹ Na i toth aka aro tho es a ong nge wot, naro tho voth a ulue avele, aveto rongan o voth a ulue. Vovo ong ini toko riringa, na sivengom wong theal or nge lom engenging, nge engenging aka ong sungu i a tho nge, theal or mo or ini omole inga ranga ve aka it aini ini omole inga.

¹² Na nge wop lemi aka tho voth tomo nge or, tho theal senu or nge lom engenging aka ong sungu i a tho nge. Ma oa e avele i penthal, aveto ini inga omole aka ilemi altet ma i penthal ranga ve aka lom erere i ri nge ma i velpol nunganga.

¹³ “Na i toth aka aro tho es a ong nge wot, aveto rongan tho voth ake ru a ulue, make tho ri lek nongong ake mo aro lek lemi sivengaing aro i vual a olemi.

¹⁴ Na tho, tho sung lom riong a or nge lale, mako tokokoe areko o panes vothung ulue anga, oni silal or, eneke o panes toko ulue angare ole vothung avele, ranga ve aka tho mun tho panes toko ulue angare ole vothung avele.

¹⁵ Na tho nong wong ve aro wong el-tetpot or a ulue ake avele, tho nong inga wong ve aro wong paseral or nge a Satan aka ile vothung elonga i kerenga rintet.

¹⁶ Na or ini areko o panes vothung ulue anga kene ole avele, ranga ve aka tho ini areko o panes vothung ulue anga kene ole avele.

¹⁷ Lom riong kene i nunganga, aro lom riong nunganga aro i oma or mo o velpol ini lomngare.

¹⁸ Na tho pakepot or a tokokoe areko o panes vothung ulue anga, ranga ve aka ong pakepot tho a tokokoe areko o panes vothung ulue anga.

¹⁹ Na tho sung tho a wong nge mo aro tho opoal or mo aro lom riong nunganga aro i oma or mo o velpol ini lomngare.

Jisas i nong nge toko lemioongare.

²⁰ “Na tho nong inga nge oenga ole avele, ave tho nong mun nge areko pa-

nen aro o nongpol ole panongpolong mo olelio ol nge tho.

²¹ Tho nong ve aro or alavusnga aro or ini omole, Vovo aro o teo a it aini nge ranga ve aka tho teo a ong nge na ong teo a tho nge, mo aro tokokoe areko o panes vothung ulue anga, aro olelio ve ong pakeu tho ake me.

²² Na tho papomnga or ranga ve aka ong papomnga tho mo aro or ini omole ranga ve aka it aini ini omole.

²³ Tho teo a or nge, na wong teo a tho nge, naro or ini omole ol mo aro tokokoe areko o panes vothung ulue anga aro oleli mire aka ve, ong pakeu tho me na om sagu or ranga ve aka om sagu tho.

²⁴ “Vovo, wong sung tokokoe areke a tho nge lale, na tho sis ve aro o voth tomo nge tho nge pen aka aro tho voth nge, mo aro o thopol ok malamling pen a urvet anga aka i tolilis aka ong sungu i a tho nge, eneke om sagu tho nomenga nge wop lemi aka ong pavelpol ulue rongan.

²⁵ “Vovo wong ini God vengvenga, tokokoe areko o panes vothung ulue anga oleli mire nge wong avele, ave lemik mire nge wong, na lek tokokoe areke, oleli mire aka ve, ong pakeu tho me.

²⁶ Na tho panine oleli nge wong lale, naro tho pesrou avele nge oleli paninenga, mo aro asaguong aka om sagu tho nge, aro i voth a oleli, naro tho, tho teo mun a or nge.”

Jisas i el sisong na i rin lama i los werera mun

18

(Vonge 18:1-20:24)

*Judas i sungu a Jisas a ngarangre omeni.
(Matiu 26:47-56; Mak 14:43-50; Luk 22:47-53)*

¹ Lama Jisas i nong ma i vus, lama ome ile wainlangaere o es ma o apola thei a Kidron, ma o eso a lempopo lemi aka i voth a thei aken wo epee.

² Na Judas ini toko aka aro i sungu a Jisas a ngarangre omeni, na ilemi mire nge

lempopo aken, eneke nang pulua aka Jisas ome ile wainlangaere o velilo pel nge.

³ Mako Judas i es a lempopo aken, ma i wola punonga avlung aka ini Romre tomo mun nge Lotu Tepun a Vel a mit tetalongare aka pris kimangare tomo nge Parisire o pake or la. Ma o pasise sil tomo nge theki lalainga ma o es tomo nge, na o el tomo mun peangre.

⁴ Na Jisas ilemi mire nge ur alavusnga aka aro i velpoltun i, mako i espot ma i nina or ve, “Na thomu o or anga?”

⁵ Na o olal ile riong ve, “Ina Jisas aka ini Nasaret anga.” Ma Jisas i ri ve, “Na tho re ake.” (Na Judas aka i sungu i a ngarangre omeni, i aka ru i mit tomo nge or.)

⁶ Ma nge aka o nongpolo Jisas ile riong aka i ri ve, “Na tho re ake.” Mako o te werer a okime ma o matu a ulue.

⁷ Na Jisas i nina mun or ve, “Na thomu o or anga?”

Ma o olal ile riong ve, “Ina Jisas aka ini Nasaret anga.”

⁸ Na Jisas i olal ole riong ve, “Na tho ria thomu nge lale, tho re ake, na eve o or re ake ini tho, mo modop tokokoe areke mo o es.”

⁹ Na i ri venen aken, eneke ur aka i ri nge nomenga aro i velpol nunganga aka i ri vene, “Vovo, tokokoe areko ong sungu or a tho nge, kene e avele i penthal.”*

¹⁰ Na Saimon Pita i el val ile bainat, mako i turusa i ma i so Prisre oa Pomnga ile umonga aka iion a Malkus, ma i sorotet-pot itelnga epee a imeni sivenga nge anga.

¹¹ Lamako Jisas i ri engeng a Pita ve, “Patusu lom bainat a imei! Lomum vava? Lomum aka ve, tho pavurvur avele aka aro tho el sisong aka Vovo i ateal i ve aro tho el i? Avele aro tho el i.”

O pasong a Jisas a Anas nge la.

(Matiu 26:57; Mak 14:53; Luk 22:54)

¹² Lamako punongare aka or ini Romre tomo nge oa pomnga tomo mun nge mit tetalongare aka or ini Judare, o rere a Jisas ma o kin i.

¹³ Na o pasong tel i a Anas nge aka ini a Kaiapas iwenga tomonnga. Na nge tovu po aken Kaiapas ini Prisre oa Pomnga.

¹⁴ Ini toko aka i ria Judare oa pom-pomere nomenga ve, “I sivenga aka aro toko omole aro i rin leltun toko alavusnga.”†

Pita i kelelal ve ilemi mire nge a Jisas avele.

(Matiu 26:69-70; Mak 14:66-68; Luk 22:55-57)

¹⁵ Na Saimon Pita tomo nge a Jisas ile wainlanga mun e,‡ or paini o panes a Jisas. Na Jisas ile wainlanga aken, i es tomoo nge a Jisas a Prisre oa Pomnga§ ile vel a lok lemi, eneke Prisre oa Pomnga ilemi mire nge i,

¹⁶ aveto Pita i mit ol inga a lok thekia. Na Jisas ile wainlanga aken i lo wererpot a lalanga ma i riteta seng aka i voth a lok thekia mo i wolo a Pita a lok lemi.

¹⁷ Mako seng aken, aka i mit a lok thekia i ria Pita ve, “Wong re ake ini toko aton ile wainlanga, e?”

Ma Pita i olal ile riong ve, “Tho ini ile wainlanga avele.”

¹⁸ Na pen i merir, nako toko umongare tomo nge mit tetalongare o veliloalo won sesenga mikeri ma or vusnga o mit kalutun i ma o meni won sesenga. Na Pita mun i mit tomo nge or ma i meni won sesenga.

Jisas i mit nge riong a Anas itheki.

(Matiu 26:59-68; Mak 14:55-65; Luk 22:63-71)

¹⁹ Mako Prisre oa Pomnga i nin a Jisas nge ile wainlangaere na nge ile pamirealing.

²⁰ Ma Jisas i olal ile riong ve, “Na evelel-nga tho ri pat a tokokoere otheki. Na lek pamirealing alavusnga tho oma i aka a Judare ole lotuonga a velre tomo mun nge Lotu Tepun a Vel a lok lemi nge wop aka Judare o velilo pel nge. Na tho ri kine riong e avele.

²¹ I vova ake ong nin tho, e? Aro ong nin areko o nongpol lek riong, eneke olemi mire nge riong aka tho ria or nge.”

* **18:9:** Jon 6:39 † **18:14:** Jon 11:49 ‡ **18:15:** Jon ini toko aka i es tomo nge a Pita. § **18:15:** Nomenga Anas ini Prisre oa Pomnga lamako Kaiapas i el imei, aveto rongan tokokoere o apet mun a Anas ini Prisre oa Pomnga.

²² Na Jisas i ri venen aken, mako mit tetalonga omole e ako i sivlak i, na i ria i ve, “I vova ake wong ri venen aken nge Prisre oa Pomnga, e?”

²³ Ma Jisas i olal ile riong ve, “Eve tho ri rong kerenga e, moro ong ripot riong kathnga aka i kerenga a tokokoere nge. Aveto aro ve lek riong i nunganga, i vova aka ong so tho, e?”

²⁴ Mako Anas i pake mun i a Kaiapas aka ini Prisre oa Pomnga nge, na imeni kinnga rongan i vot.

Pita i kelelal mun ve ilemi mire nge a Jisas avele.

(Matiu 26:71-75; Mak 14:69-72; Luk 22:58-62)

²⁵ Na rongan Pita i mit ma i meni won sesenga, nako o nina i ve, “Ava ong mun re ake ini toko aken ile wainlanga, e?” Ave i lela ve, “Tho ake avele.”

²⁶ Na Prisre oa Pomnga ile umonga omole aka ini toko aton Pita i sorotetpot itelnga epee ilenga, i ri engeng ve, “Wong re ake tho thopol ong tomo nge i aka a lempopo aken lemi, e?”

²⁷ Ave Pita i lela mun, nako vareo i tang.

Jisas i mit nge riong a Pailat itheki.

(Matiu 27:11-14; Mak 15:2-15; Luk 23:1-5)

²⁸ Rulpou inga, nako o wolpot a Jisas o Kaiapas ile vel na o wol i a gavana aka ini toko Rom ile vel. Na Judare ole mukalingare oni plong ve aro o eso a mukalinga aken ile vel, eneke ini Juda avele na o sis ve aro o panakal senu or mo ur e avele aro i paakop or a God itheki maken o pavurvur aka aro o an Punseleainga a Aning.

²⁹ Mako Pailat i espot a or nge a lalanga ma i nina or ve, “Thomu o teltun toko ake ia nge uneke?”

³⁰ Mako o olal ile riong ve, “Aro ve i oma vothung kerenga e avele, i pavurvur aro them sungu i a menu avele.”

³¹ Na Pailat i ria or ve, “Aro sivengomu o pamit i nge riong mo aro lomumu mire aka ve, i avsa lomu patorong eve avele.”

Ave o olal ile riong ve, “Rom a gavman isa wom them nge toko punnga avele.”

³² Na nomenga Jisas i ritet nge sovengalo aka aro i rin nge, na ur ake i velpol mo aka aro i panunganga ile riong aken.

³³ Ma Pailat i es werero a ile vel lemi ma i lengo a Jisas a i nge me ma i nina i ve, “Wong re ake ini Judare ole nepes?”

³⁴ Ma Jisas i olal ile riong ve, “I vava, ninong aken kene i es a wong nge me, eve toko pelie o ria wong nge tho, e?”

³⁵ Mako Pailat i olal ile riong ve, “Na lelik mire ol nge Judare ole vothung avele. Na ini lomngare tomo nge pris kimangare aka o sungu wong a menik, na ur nekenga aka ong oma i, e?”

³⁶ Na Jisas i ri ve, “Lek menong e nepes i ranga ve ini toko ulue angare ole avele, aro ve i ranga ve ini ole, aro lek tokokoere aro o vuralal lek mo o pavurvur aka aro o sungu tho a Judare ole mukalingare omeni avele. Aveto lek menong e nepes i ranga ve ini toko ulue angare ole avele.”

³⁷ Mako Pailat i nina i ve, “E, ong ini nepes, e?”

Ma Jisas i olal ile riong ve, “Ong apet tho ini nepes na lom riong aken kene i nunganga, na tho velpol ake ru a ulue mo aro tho oma omaing omole inga aka aro tho panongpol nge riong nunganga. Na toko elonga aka oa sagu ur aka i nunganga, o nongal lek riong.”

³⁸ Na Pailat i nina i ve, “Ur nekenga aka ini ur aka i nunganga, e?”

Pailat i ri nge a Jisas ipunrinnga.

(Matiu 27:15-31; Mak 15:16-20; Luk 23:18-25)

Mako Pailat i es wererpot a lalanga ma i ria or ve, “Tho thopol ia tepun e avele aka aro tho teltun ia nge.”

³⁹ Aveto ini lomu vothung aka aro tho pavthopot toko omole aka i voth a mang a midenga lemi nge Punseleainga a Aning elonga, na thomu o sis ve aro tho pavthopot Judare ole nepes ake?”

⁴⁰ Ave o presa ve, “Avele, i avele, sungpot a Barabas a them nge me.” Na Barabas ini toko aka i voth tomo nge areko o pavelpol punong tomo nge gavman.

19

¹ Lamako Pailat i ria or mo o wolpot a Jisas mo o so litlit i.

² Na punongare o mola we wopuponga na o paunu i a ipounga, na o panaklesu i nge seltun vuvavnga.

³ Ma o es a i nge ma o ri sililal i ve, “Them papomnga ong ini Judare ole nepes.” Na o pesrou avele nge isivlaknga.

⁴ Mako Pailat i espot mun pa omole mun a Judare nge na i ria or ve, “O thopol vet, aro tho paespot i me mo aro tho pathengal thomu ve ako tho thopol ia tepun e avele aro tho teltun ia nge.”

⁵ Mako Jisas i espot me na we wopuponga aka o paunu i nge rongan i voth a ipounga na seltun vuvavnga rongan i sop a ilopat. Na Pailat i ria or ve, “O thopol i, a toko re ake.”

⁶ Ma pris kimangare tomo nge mit tetalongare o thopol i, mako o presa viringa ve, “Pamona i a won ngoronga nge! Pamona i a won ngoronga nge!”

Ave Pailat i olal ole riong ve, “Thomu o wola i mo o pamona i a won ngoronga nge, eneke tho thopol ia tepun e avele aro tho teltun ia nge.”

⁷ Lama puluangare o olal ile riong ve, “Lemem patorong omole aka i voth aka i ri ve aro i rin, eneke isivenga i ri ve, ini a God Itun.”

⁸ Ma Pailat i nongpol veno aka ma i ngange rintet.

⁹ Mako Pailat i lo werero mun a ile vel lemi ma i nin a Jisas ve, “Ong es vanath me?” Ave Jisas i olal ile riong avele.

¹⁰ Ma Pailat i ria i ve, “Ong olal lek riong avele, kene i vava, lomum mire avele aka lek engenging i pavurvur aka aro tho pavthopot ong, eve tho pamona ong a won ngoronga nge?”

¹¹ Ma Jisas i olal ile riong ve, “Aro ve God i sungu lom engenging aken a ong nge avele, ong pavurvur aka aro ong oma ur e avele a tho nge. Na toko aka i sungu tho a menum, ile vothung kerenga aken i aolonga nge lom vothung kerenga.”

¹² Na Pailat i nongpol veno aka ma i sis ve aro i kath so e aka aro i pavthopot a Jisas nge, ave pulua pomnga aken o pres werer ve, “Aro ve ong pavthopot i,

i mirenga aka ve, ong ini nepes a Sisar ithanga avele, eneke toko e aka i ri ve ini nepes, aken kene ini nepes a Sisar ile ngarang.”

¹³ Lama Pailat i nongpol riong areken, ma i wolpot a Jisas a lalanga la na i menu nge menonga aka ini riong nongpolngare ole, aka i voth nge pen aka o apet i ve ini “Sovengalo Ako O Oma I Nge Um” Na nge Hibrure okei o apet i ve ini “Gabata”.

¹⁴ Na i toth aka aro penang lopat nge aning elnga a nang aka aro o monsi Punseleainga a Aning nge.

Mako Pailat i ria tokokoere ve, “Lomu nepes ke.”

¹⁵ Ave o pres werera mun ve, “O wol lelpot i! O wol lelpot i! Pamona i a won ngoronga nge!”

Ma Pailat i nina mun or ve, “Na o sis ve aro tho pamona lomu nepes a won ngoronga nge?”

Ma pris kimangare o olal ile riong ve, “Lemem nepes ol e avele, lemem nepes inga aka ini a Sisar.”

¹⁶ Mako Pailat i sungpot a Jisas a punongare nge mo o pamona i a won ngoronga nge.

*O pamona a Jisas a won ngoronga nge.
(Matiu 27:33-44; Mak 15:22-32; Luk 23:33-43)*

Na Jisas i voth ol a punongare omeni.

¹⁷ Ma i potun ol ia won ngoronga ma i es lelpot nge a Jerusalem ma i es a pen aka o apet i ve ini “Toko Po a Kikil”. Na nge Hibrure okei o apet i ve ini a “Golgota.”

¹⁸ Na o pamona i nge pen re aken. Na o pamon tomoa i nge toko or aini. Na e i mon a epee, na e a epee, na Jisas i mon a sapat.

¹⁹ Na Pailat i ria or mo o wat riong epee aka ve,
Ake ini a Jisas aka ile a Nasaret ini Judare ole nepes

Ma o pamona i a ia won ngoronga nge.

²⁰ Na wating aken o wat i nge Hibrure na Grikre na Romre okei. Mako Juda pulua o tital i, eneke pen aka o pamona Jisas nge kene i mela nge rem pomnga avele.

²¹ Na Judare oa pris kimangare o ria Pailat ve, “Mothong tova ong wat i ve, ‘Ini Judare

ole nepes', aro ong wat i ve, "Toko ake isivenga i ri ve ini Judare ole nepes.' "

²² Mako Pailat i olal ole riong ve, "Ur nekenga ako tho wat i lale, aro i ngo re lale aken."

²³ Na punongare o pamona Jisas ma i vus, lama o ela ia teunongre ma o thomreu i ma or penelu. Na o el i omole omole, na o ela mun ia teunong lemi anga ako o italal i avele na o the i ma i omoletet inga.

²⁴ Na punongare o ria pel ve, "Aro te inrapot i avele. Aro te asisal nge satu mo aro lemire mire nge toko kathnga ako aro i el i."

Na ur areken i velpol aka aro i panunganga riong aka i voth a God ile erere nge ma i ri ve,

O thomreu pel nge lek teunongre.

Na o asisal nge satu

mo aro ve oa kathnga i mukal
aro i ela lek tekruk." *Buk Song*

22:18

Mako punongare o oma i venen aken.

²⁵ Na Jisas inina ome inina posnga tomo nge a Klopas iewo sengenga aka iiion a Maria na Maria Makdala anga, or vusnga o mit totho a Jisas ia won ngoronga nge.

²⁶ Ma Jisas i thopol inina ome a Jon aka ini ile wainlanga aka ia sagu rintet i aka o mitit, mako i ria inina ve, "Ake ini tum."

²⁷ Mako i ria mun ile wainlanga aken ve, "Ake ini ninom." Ma i patea nge nang aken ile wainlanga aken i wol ol i a ile vel la ma i theal ol i.

Jisas i rin.

(*Matiu 27:45-56; Mak 15:33-41; Luk 23:44-49*)

²⁸ Mako Jisas ilemi mire aka ve, i pavus ile omaing elonga lale. Ma i ria ve, "Thei i pun tho." Na i ri venen aken mo aro i panunganga riong aka i voth a God ile erere nge.

²⁹ Na enong pokin e aka ru i ngo ma i vual nge vain le masesnga, na o ela ur aka i tum vus thei ma o paesu i a vain nge, na ur aken i vual nge vain, mako o kin i a won aka o apet i ve ini "Hisop" ongepo ma o osea i a iwo nge la.

³⁰ Mako Jisas i tumo i lamako i ria ve, "I vus." Nako ikei wathou ma i rin ol.

Punonga omole i ruruo a Jisas a itelipo.

³¹ Na ini aning elnga a nang aka o monsi nge nang rialonga tomo nge Punseleainga a Aning, ma nang rialonga aken kene i aolonga, na pris kimangare oni plong ve aro tokokoere o mon a won ngoronga nge, nge nang aken, mako o nin a Pailat ve aro o tokoror oeve mo o rin viri viri mo o osu ir.

³² Mako punongare o es ma o tokor tel omole ieve lama o tokor ia aininga ieve, toko or aini aken o mon tomo nge a Jisas.

³³ Na o es a Jisas nge, ave o thopol aka i rin lale, mako o tokor ol ieve avele.

³⁴ Na punonga omole i ela ile peang ma i ruruo a Jisas a itelipo, a ur e avele, nako mla ome thei i lelpot.

³⁵ Ma tho a Jon sivengek, tho thopol ur aken i velpol, na tho ripot riong nunganga mo aka aro thomu mun, aro lomumuo nge. Na lemk mire nge ur nekenga aka tho ri nge, kene i nunganga.

³⁶ Na ur areke i velpol mo aka aro i panunganga ur aka God ile erere i ri nge. Na i ri ve,

Aro ipokinnga e avele aro i vulkor." *Kisim Bek 12:46*

³⁷ Na God ile erere i ri mun ve,
Aro tokokoere o thopol toko aka o ruruo i." *Sekaraia 12:10*

O paeso a Jisas ini peti a vuvepun aka o seo i a pen tepun.

(*Matiu 27:57-61; Mak 15:42-47; Luk 23:50-56*)

³⁸ Lamako Josep aka ile a Arimatea, i nin a Pailat ve i pavurvur aka aro i osu a Jisas ini peti. Na Josep ini a Jisas ile wainlanga e, aveto i parong kinealo i, eneke i ngange nge Judare ole mukalingare. Mako Pailat isa wompot i. Mako i osu a Jisas ini peti.

³⁹ Na Nikodemus i es tomo nge i. Ini toko aka nomenga i es tel a Jisas nge pemlik. Na i el tomo ur una vrunga aka imathenga i pavurvur nge kilo or mule pa me pothoi or penel. Na ur una vrunga aken o oma i nge won or aini einga aka e iion ini Mir na e iion ini Alos.

⁴⁰ Ma or paini o ela Jisas ini peti ma o soala i nge seltun tomo nge ur una vrunga aken. Ake ini Judare ole vothung vet aka o monsi nge vungre otetunnga.

⁴¹ Na ometa e ako i ngo tothal e wop ako o pamona Jisas nge, na vuvepun a silkeponganga i voth nge, ave o tetuno toko e nge rongan.

⁴² Na or paini o tetuno a Jisas ini peti a vuvepun a silkep aken, eneke nang le sivlukong ako nang rialonga i patea nge, i toth me lale na vuvepun aken i toth.

20

Jisas i mimi werera.

(Matiu 28:1-8; Mak 16:1-8; Luk 24:1-10)

¹ Na nge rulpoalal nge won tinanga ako rongan ia midingdeng, Maria Makdala anga i opatal a vuvepun aken nge la, ma i thopol um aka o sing rupo vuvepun thekia aken nge, kene i voth ol avele.

² Mako i tho werer a Saimon Pita tomo nge a Jon aka ini Jisas ile wainlanga aka ia sagu rintet i, ma i ria or ve, "O elpot Toko Pomnga a vuvepun lale, na lemimem mire nge wop kathnga aka o rongu i nge, kene avele."

³ Mako Pita ome a Jon aka ini Jisas ile wainlanga aken o es a vuvepun la.

⁴ Ma or alaini o tho inga, ave Jisas ile wainlanga aka ia sagu rintet i, i sertet a Pita ma i velpol tel a vuvepun aken.

⁵ Ma i lotoru ma ikei eto la ma i thopol seltun aka o so i nge, ave i koro la avele.

⁶ Ma Saimon Pita i velpol a rumongaling ma i alpo sele nge koroong a vuvepun lemla, ma i thopol seltun aka o so i nge kene i nge.

⁷ Na i thopol mun seltun siva aka o kin total ipounga nge, aka i ngo relpot alapinmolnga.

⁸ Ma Jisas ile wainlanga aton ru i velpol tel a vuvepun aken, kene i koro mun la ma i thopol i veno aka ma ilemio ol nge.

⁹ Aveto olemi mire senu nge riong aka i voth a God ile erere imirenga rongan aka i ri ve, aro i rin lamo i mimi werera mun.

¹⁰ Lamako Jisas ile wainlanga or aini aken o lo werer ol a ole pen la.

Maria Makdala anga i thepol a Jisas.

(Mak 16:9-11)

¹¹ Na Maria i mit a vuvepun thekia ma i tang. Ma rongan i tang na i lotoru ma ikei eto a vuvepun lemla

¹² ma i thopol ensel or aini aka oa teunong i veleles. Ma o men nge wop aka Jisas ini peti i ngo tel nge. Na e i men a ipounga nge anga na e i men a ieve nge anga.

¹³ Mako or paini o nina i ve, "Bouti, ong tang neke?"

Mako i olal ole riong ve, "O elpot ok Pomnga lale, na lelik mire nge wop aka o pango i nge, kene avele."

¹⁴ Mako i eksinga ma i thopol a Jisas aka i mitit, aveto i ate i avele.

¹⁵ Ma Jisas i nina i ve, "Bouti, ong tang neke? Na ong ortet anga?"

Na i rivenga ini ometa thealnga e, mako i ria i ve, "Eve ong elpot i, aro ria tho nge wop kathnga aka ong pango i nge mo aro tho es lamo tho el i."

¹⁶ Mako Jisas i ria i ve, "Maria."

Ma itheki lel a i nge na i ria i nge Hibrure okei ve, "Rabonai." Riong ake mirenga aka ve, "Pamirealinga."

¹⁷ Lamako Jisas i ria i ve, "Mothong tova krim tuntun tel tho, eneke tho lo werer a Vovo nge la rongan. Aro ong es a titeikre nge la, mo ong ria or nge aka aro tho lo werer a ok Vovo nge, aka ini omu Vovo mun na ini lek God na ini lomu God mun."

¹⁸ Mako Maria Makdala anga i lo werer ma i ria ile wainlangaere aka i thopol a Toko Pomnga lale, ma i ritet or nge ur alavusnga aka i ria i nge.

Jisas ile wainlangaere o thopol i.

(Matiu 28:16-20; Mak 16:14-18; Luk 24:36-49)

¹⁹ Na nge penaivuvu nge won tinanga aken, Jisas ile wainlangaere o veliloalo pel a vel lemi ma o pupal ritrito or, eneke o ngange nge Judare. Na Jisas i velpol a or nge ma i mitu a otheki, ma i ria or ve, "Lemi moring aro i voth tomo nge thomu."

²⁰ Na i ria venen aken ma vus, mako i pathengalu imeni salemi na peang wo mei aka a itelipo a or nge. Na ile wainlangaere o vual rintet nge lemi sivengaing, eneke o thopol a Toko Pomnga lale.

²¹ Lama Jisas i ria mun or ve, "Lemi moring aro i voth tomo nge thomu. Na ponange tho pakepot thomu ranga ve aka Vovo i pakepot tho."

²² Mako i thupostun or ma i ria or ve, “O elo Oni Riringa a lomumu.

²³ Na aro ve ong panes Oni Riringa ilemi na ong ria toko e nge ve, ‘God ilemi simikal lom vothung kerenga.’ Aken God aro ilemi simikal toko aken ile vothung kerenga. Na aro ve ong ria toko e nge ve, ‘God ilemi simikal lom vothung kerenga avele.’ Aro toko aken kene ile vothung kerenga rongan i voth.”

Tomas i thopol a Jisas.

²⁴ Na Jisas ile wainlanga or mule pa omole pothoi or aini, e ako iion a Tomas na iion mun a Didimus i voth tomo nge or avele nge wop lemi ako Jisas i velpoltun or.

²⁵ Mako o ria i ve, “Them thopol a Toko Pomnga lale.”

Ave Tomas i ria or ve, “Aro lemiko inga ako i mimi tova tho thopol ia sotunong wo mei a imeni salemi na tho paeso menik pupo nge, naro tho paeso mun menik a peang wo mei a itelipo. Na aro ve tho oma venen aken avele, aro lemiko nge avele.”

²⁶ Lama nang or limae i vus na Jisas ile wainlangaere o veliloalo mun pel a vel aken lemi na Tomas i voth tomo ol nge or. Ma o pupal ritrito mun or. Ma Jisas i velpol ma i mitu a or nge, ma i ria mun or ve, “Lemi moring aro i voth tomo nge thomu.”

²⁷ Lamako i ria Tomas ve, “Tomas, parong rumo menum pupo a menik salemi, na osepot menum mo paeso i a telik po. Mothong tova wong voth ini toko aka lom lemioong avele, aro lomumo inga nge tho.”

²⁸ Mako Tomas i olal ile riong ve, “Wong ini ok Pomnga na wong ini lek God.”

²⁹ Na Jisas i ria mun i ve, “Na lomumo ol nge tho, eneke ong thopol tho lale. Sapase areko o thopol tho avele, aveto ole lemioong i voth.”

³⁰ Ako a ile wainlangaere otheki, Jisas i oma pathepolong pulua mun aka tho watu i a erere ake nge avele.

³¹ Aveto tho watu riong areke mo aro lomumo aka ve, Jisas ini toko aka God i ateal i ve aro i el werer ile tokokoere, na ini a God Itun. Na tho wat mun riong

areke mo aro ong el mimiong nge lom lemioong a i nge.

Jisas i velpol werer mun a ile wainlangaere nge

21

(Vonge 21:1-25)

Jisas ile wainlanga or limai o thopol i.

¹ Lamako Jisas i velpoltun mun ile wainlangaere a thei a pamonlel a Galili aka iion aininga a Taiberias. Na ile velpoling i vene:

² Na Saimon Pita, na Tomas aka iion aininga a Didimus, na Nataniel aka ile a Kana aka a epee a Galili, na Sebedi itun or aini tomo mun nge a Jisas ile wainlanga or aini o voth tomo e pel.

³ Ma Saimon Pita i ria or ve, “Aro tho es mo tho paural silang.” Mako o ria i ve, “Aro them es tomo nge wong.” Mako o monpot ol la nge wok, aveto pemlik lollonga aken o paural vet silang e avele.

⁴ Na nang i avsua mesi, nako Jisas i mitpot a thei wo peti, aveto ile wainlangaere o ate i avele aka ve, ini a Jisas.

⁵ Mako i nina or ve, “Thengengekre, o paural vet silang pelie?”

Ave o olal ile riong ve, “Avele, posispot.”

⁶ Mako i ria or ve, “Thomu o ulu omu susua a wok epee a menumu sivenga nge anga mo aro o paural silang pelie.” Mako o ulu ol oa susua, ave o pavurvur nge imontetanga avele, eneke silang pulua o uro nge.

⁷ Na Jon aka ini a Jisas ile wainlanga aka ia sagu rintet i, i ria Pita ve, “Aken ini a Toko Pomnga.” Ma Pita i nongpol aka ve, toko aka i lengpot or ini a Toko Pomnga, mako i teun werer ia neong, eneke i teuntetpot tel i lale. Ma i opthou a thei lemi la ma i keo a thei wopo la.

⁸ Na Jisas ile wainlangaere aka rongan o voth a wok nge, o rumongal nge i ma o montet oa susua aka i vual rintet nge silang ma o mono a wopo la. Na o melapot nge thei wopo avele, i pavurvur nge mita or mule pa mule.

⁹ Na nge aka o pelo a thei wopo, o thopol silang na bret aka i ngo a won sesenga mikeri nge.

¹⁰ Lamako Jisas i ria or ve, “O ela silang pelie ako o paural i mo o el i me.”

¹¹ Na Saimon Pita i ro a wok nge mo aro i tipoo susua a wopo me. Na susua aken i vual nge silang aoliloenga. Na oa titaling i pavurvur nge 153. Na silang i pom rintet, aveto susua i minra avele.

¹² Mako i ria or ve, “O es me mo o an.” Ave oa ko e avele ilemi i mit engeng i pavurvur ako aro i nina i ve, “Ong ini ao?” Eneke olemi mire ako ve, ini a Toko Pomnga.

¹³ Mako Jisas i es ma i ela bret ma i sungu i a or nge, na i oma vene mun aken nge silang.

¹⁴ Na ake ini ile velpoling pa menga a ile wainlangaere nge ako i rin ma i los werera.

Jisas i pator a Pita.

¹⁵ Na o an ma i vus, mako Jisas i ria Saimon Pita ve, “Saimon aka ini a Jon itun, lom asaguong nge tho i mukal nge toko areke ole asaguong nge tho?”

Mako i olal ile riong ve, “Enala, Toko Pomnga, lomum mire ako ok sagu ong.”

Mako Jisas i ria mun i ve, “Aro ong theal lek tokokoere ranga ve ini sipsipre.”

¹⁶ Mako Jisas i ria mun paininga a i nge ve, “Saimon aka ini a Jon itun om sagu tho?”

Mako i olal werer mun ile riong ve, “Enala, Toko Pomnga, lomum mire ako ok sagu ong.”

Mako Jisas i ria mun i ve, “Aro ong theal lek tokokoere ranga ve ini sipsipre.”

¹⁷ Na Jisas i ria mun pa menga a i nge ve, “Saimon aka ini a Jon itun om sagu tho?”

Ma Pita ilemi kerere, eneke Jisas i nina i pa or me ve, “Om sagu tho?” Mako i ria i ve, “Toko Pomnga, lomum mire nge ur alavusnga, na lomum mire ako ve, ok sagu ong.”

Ma Jisas i ria mun i ve, “Aro ong theal lek tokokoere ranga ve ini sipsipre.”

¹⁸ Na tho ri nunganga a wong nge, aka nge wop lemi aka rongan ong apo, ong pateunu sivengom, na ong es nge wop aka lomum ve aro ong es nge. Aveto aro ong

toloku, aro ong paespot menum na toko relenga e aro i pateunu wong naro i ti wong nge wop aka num plong ve aro ong es nge.”

¹⁹ Na Jisas i ri riong aken mo aro i ritet nge sovengalo aka aro Pita i rin nge na i papomnga a God nge.* Lamako Jisas i ria i ve, “Panes tho.”

Jisas i ri nge a Jon aka ini ile wainlanga aka ia sagu rintet i.

²⁰ Na Pita i eksinga werer ma i thopol a Jon aka ini a Jisas ile wainlanga aka ia sagu rintet i, aka i panes or. Na ini toko aton ru i men thalu a Jisas nge aning na ipo wathtun i mo i nina i ve, “Anga aka aro i sungu ong a ngarangre omeni?”

²¹ Ma Pita i thopol i, mako i nin a Jisas ve, “Toko Pomnga, i vava nge toko ake? Aro i rin vava?”

²² Na Jisas i olal ile riong ve, “Aro ve lemik ve aro i mimi mo la i pavurvur nge lek lo wererong me, aken ini lek omaing. Na i vava ake lomum nge? Panes inga tho.”

²³ Mako riong i kima ol a ile wainlangaere nge ve ile wainlanga aton aro i rin avele. Aveto Jisas i ri venen aken avele, i ri inga ve, “Aro ve lemik ve aro i mimi mo la i pavurvur nge lek lo wererong me, aken ini lek omaing. Na i vava ake lomum nge?”

²⁴ Na tho ini a Jon aka tho ritet nge ur elonga areken na tho watu ir. Na lomumu mire ako ve, lek riong i nunganga.

²⁵ Na ur pulua mun aka Jisas i oma i. Na aro ve o watu ir omole omole a erere nge, lemik ve aro ulue ake i pavurvur nge omei avele.

Na i re aken. I vus.

* **21:19:** Na nge a Jisas ile riong aka i ria Pita ve, “Aro ong paespot menum” i mirenga ve Pita aro i paespot imeni mo aro punongare aro o sotuna i a won ngoronga nge.

Jisas ile pakekere ole omaing ako Luk i wat i Pakekere Ole Omaing Ritetong nge a Pakekere Ole Omaing

Luk i wat erere ake mo aro i pavus ile rirumong ako i patea i nomenga nge ile erere ako te apet i ve ini Panongpolong Sivenga ako Luk i wat i. (Luk 1:1) Na ile rirumong ake i ri nge a Jisas ile pakekere eve aposelre ole panongpolong nge i, na nge ile kimaing nge pen elonga. Na Luk i wat ile erere or aini aken a Tiopilus nge. (Aro o thepol ritetong ako i voth a mukaling nge Panongpolong Sivenga ako Luk i wat i.) Na Pakekere Ole Omaing i ritet nge toko lemioongare ole lotu ile velpoling ako i patea aka a Jerusalem na i es mun a Samaria na i pavuralo pen elonga ake ru a ulue. (1:8) Na erere ake i ritet nge toko lemioongare ole lotu aka i velpol a Jisas ile los wereraing kime. Na Judare olemio tel nge a Jisas, lamo Oni Riringa i esu ma i rero or. (2:1-41) Aveto Jisas ile Panongpolong Sivenga ini Judare oenga ole avele. Avele, Oni Riringa i rero mun toko Samaria angare, nge aka olemio mun nge a Jisas, aken i pathengal it aka ve, God aro i pamimi mun or. (8:14-17; 8:25) Na Oni Riringa i rero mun areko or ini Judare avele mo aro i pathengal it aka ve, toko alavusnga ake ru a ulue o pavurvur aro o el mimiong aka aro ile vusonga avele, tova o olemio nge a Jisas. (10:1-11:18)

Na erere ake i ritet mun nge a Pol ile mimiong na ile omaing, aka i panongpol Panongpolong Sivenga nge pen elonga, na i panongpol areko or ini Judare avele, eneke Judare o lel okime nge Panongpolong Sivenga aken. Aken lemire mire nge pen areko Pol i es nge, lamako i wat werer malueng pelie a or nge. Na Luk i wat rirumong ake nge wop lemi aka Pol i voth a mang a midenga lemi aka a Rom, i pavurvur nge tovu po or aini. Na i toth aka aro Pol i mit nge riong, na

Luk i sis ve aro i pathengal aka ve, Pol i oma vothung kerenga avele. Pol i voth a mang a midenga aken, eneke Judare oni plong nge Panongpolong Sivenga aka Pol i panongpol nge, aveto Pol i avsa Romre ole patorong e avele.

Jisas ile pakekere aka o apet mun or ve ini aposelre o panongpol nge ile riong aka a Jerusalem

(Vonge 1:1-8:3)

God i el werera a Jisas a Pen a Urvet la.

¹ Teik a Tiopilus, nge lek malueng teltelng, tho wat nge ur elonga aka Jisas i oma i, na nge ur aka i patorial toko na sengre nge, na i patea nge ile omaing pateanga,

² na i mul nge nang aka God i ela i roro a Pen a Urvet la. Na nomenga Jisas i ateal tokokoe pelie ve ini ile pakekere, na i pator or nge a God Ioni Riringa ile engenging.

³ Na aka nge ile rinong kime, i velpola mun a ile pakekere nge. Ma i oma omaing pulua aka i pathengal or aka ve, i mimi werera mun lale. I velpoltun or papulua i pavurvur nge nang mule pa penel, ma i patorial or nge a God ile menong e nepes.

⁴ Rongan i voth tomo nge or, ma i pator or ve, “Thomu o mothong tova o lo lelpot a Jerusalem. Na thomu aro o men tetal sungong aka God i kin ile riong lale ve aro i sungu i a thomu nge. Ranga ve nomenga aka tho ri tel i a thomu nge lale.

⁵ Eneke Jon i paninu toko na sengre nge thei. Aveto lelle inga mun tie God aro i paninu thomu nge Ioni Riringa.”

Jisas i sis ve aro olemi mire aka ve, aro i velpol ini ole nepes a oopo lemi na nge ole menong ake ru a ulue, kene avele.

⁶ Nge wop lemi aken o velilo pel, ma o nina i ve, “Toko Pomnaga, nge wop lemi ake aro ong velpol ini Israelre ole nepes?”

⁷ Lama Jisas i olal ole riong ve, “Vovo inga ienga aka i pomnaga na i pamien nang na mlik aka aro ur aken aro i velpol nge, aveto ini lomu omaing avele.

⁸ Aveto panen aro Ioni Riringa aro i ru mo i voth tomo nge thomu. Naro

i paengeng thomu. Kena aro thomu o panongpol nge lek riong ako a Jerusalem na Judia na Samaria na pen elonga ake ru a ulue."

Jisas i esa a Pen a Urvet.

⁹ Jisas i ri ma vus lama God i ela ol i roro, ma o the ma songen i pasopal i ma o thepol ol i avele.

¹⁰ Rongan o mit ma otheki i panesrum i a sepsa na a ur e avele nako toko or aini ako o ne teunong velelesnga o mitu a olo sei.

¹¹ Ma or paini o ria ve, "Thomu Galili angare o vova ake o mit ma o thea la a sepsa nge la, e? Jisas ako God i eltetpot i a thomu nge ma i ela i a Pen a Urvet la, aro i lo werer ranga ve mun aka thomu o thepol i aka i esa a Pen a Urvet la."

*O ateal toko e aka aro i tepolal a Judas
imei ma i velpol ini pakeke.*

¹² Lamako o lospot a tete a Oliv ma o lo werer a Jerusalem la. Na tete aken ia wop melanga nge a Jerusalem avele. Oa wop toth inga e pel.

¹³ Ma o eso a rem pomnga na o esa a vel lemi ronganga aka ini ole vothinga. Ma oionre vene: Pita, Jon na Jems na Andru na Pilip ome a Tomas na Bartolomiu na Matiu na Jems aka ini a Alpius itun na Saimon aka i voth tomo nge toko avlung aka o apet i ve ini Selot,* na Judas aka ini a Jems itun.

¹⁴ Ma ine tokokoere o men velilo pel ma oleli omole ol inga nge nongong. Ma o nong tomo nge sangre na Maria aka ini a Jisas inina na Jisas ititeinre.

¹⁵ Lama nge nang omole Pita i mita a toko lemioongare otheki ma oa titaling i mul nge or 120.

¹⁶ Ma Pita i ria ol or ve, "Titeikre, ine riong omole aka o wat i a erere nomenaga, i velpol ol lale. Nomenga God Ioni Riringa i pavelpolpot i a nepes a Devit iwo. Ma i ri nge omaing aka aro Judas i oma i. Ini toko aton ru i pathengal tokokoe areko o rere a Jisas. Na ponange riong ake i velpol nunganga lale.

¹⁷ Na Judas i voth tomo nge them, ma i um tomo nge them."

¹⁸ (Na toko ake ini a Judas i el umtun nge ile omaing kerenga aken, ma i ol ulue epee nge. Ma i matu nge ma iopo meris, makola imikeli i polopot a lalanga, mako ini ile rinong.

¹⁹ Toko alavusnga aka ru o voth a Jerusalem o nongpol ikimanga. Na nge ole riong o apet ulue epee aken ve, "Akedama," i mirenga aka ve, "Ulue aka mla i palalas nge".)

²⁰ Lama Pita i ria mun ve, "Riong aka i voth a God ile erere aka ini a Buk Song, i vene:

'Aro ile vel aro i ngo polpol ol inga,
naro toko e avele ol aro i voth nge.'

Buk Song 69:25

Na

'Aro toko relnga i tepolal ol i nge ile omaing aken.' *Buk Song 109:8*

Na erere i ri venen aken.

²¹⁻²² Na i sivenga aka aro te ateal toko e aro i supo tomo nge it mo aro i ritet nge ur aka i thopol i nge a Toko Pomnga ile los wereraing. Naro ini toko aka i voth tomo nge it nge nang elonga aka Toko Pomnga a Jisas i esu esa tomo nge it. I patea nge nang aka Jon i paninu toko na sangre ma i pavurvur nge nang aka God i elteta i a it nge."

²³ Na tokokoere o atealpot toko or aini. Omole ini a Josep, aka o apet mun i a Barsabas, na iion aininga mun ini a Jastus. Na toko aininga ini a Matias.

²⁴ Ma o nong vene, "Toko Pomnga, lomum mire nge toko alavusnga oleli na ong ateal toko kathnga nge toko aini aken lale na pathengal i a them nge,

²⁵ ve aro i velpol ini pakeke mo i el a Judas imei. Eneke Judas i lo nge omaing ake ma i es nge pen aka i pavurvur nge i."

²⁶ Ma o ela anral tun or aini ma o paateal a Matias na Barsabas nge mo o paenu i a oto lemi ma o tik tok i na um aka i prilpot tel kene ini a Matias ile. Mako i velilo tomo ol nge pakeke or mule pa omole pothoi omole aken, mako oa titaling

* ^{1:13:} Selot i mirenga aka ve, i voth e avlung aka o sis ve aro o pun tomo nge Romre ole gavman mo osivenga o theal ol or.

i velpol werer mun nge mule pa omole pothoi or aini.

2

Oni Riringa i esu me ma i vual a or nge.

¹ Na nang e ako i velpol aka Judare o apet i ve ini “Pentikos.” * Ma toko lemioongare o men velilo pel a vel lemi.

² O men na a ur e avele na o nongpol ur aka i avvuv ranga ve ini thue aolonga aka i ru a Pen a Urvet me, ma i pavual vel aka ru o men nge.

³ Ma o thopol ur aka i ranga ve ini won sesenga annga ma i methera ma i vugir or omole omole.

⁴ God Ioni Riringa i vual a or omole omole nge ma o ri nge keiong rel relnga aka God Ioni Riringa i pavelpolpot i a owo.

⁵ Na Juda pelie aka o voth a Jerusalem aka or ini toko lotuongare aka o es a pen epee elonga me.

⁶ Ma o nongpol ur aken ma toko pulua o vus me. Ma o kukuk, eneke o nongpol toko lemioongare aka o ri nge okei omole omole.

⁷ Ma olemi ngo pelekpol, ma o ria ve, “Ken i vava? Ako tokokoe areke o ri nge keiong rel relnga na or ini Galili angare oenga.

⁸ I vova ake te nongpol or aka o ri nge keir omole omole ranga ve aka titemerre na ar ninaere o ri nge, e?

⁹ Eneke it ine Partia, Midia na Elam angare na areko ole a Mesopotemia, Judia na Kapadosia na areko ole a Pontus na Esia.

¹⁰ Na ar pelie aka ini a Prigia, Pampilia na Isip, na pelie aka a epee a Libia aka toth a Sairini na pelie ini loomere aka o es a Rom me.

¹¹ Na it toko Judare na toko relnga pelie aka te lotu tomo nge Judare ole lotuong. Na pelie aka o es a epee a Krit na Arebia me. Ma it vusnga te nongpol or aka o ri nge keir omole omole nge omaing aolonga aka God i oma i.”

¹² Ma o kukuk nge ma olemi ngo senu avele. Ma o ninu nina pel ve, “Ur ake mirenga vava?”

* **2:1:** Pentikos i mirenga aka nang mule pa lim i lutetu nge Judare oa Punseleainga a Aning aka o apet i ve ini Pasova.

¹³ Aveto toko pelie aka o kelelal or ma o ri ve “Ken, ava areke o thin thei engenga ma otheki vaisis.”

Pita i panongpole riong.

¹⁴ Pita i mit tomo nge ithanga or mule pa omole pothoi omole. Na i pres na i ritet nge toko na sengre ve, “Thomu Judare na thomu toko elonga aka o voth a Jerusalem, o ta telngomu e lek riong mo lomumu mire nge ur aken.

¹⁵ Thomu o ri ve va toko areke o thin thei engenga, aveto avele. Nang meta rongan i el inga limpenel rulpo.

¹⁶ Aveto God ile riong elnga nomen-ganga ina Joel i ritet nomenga nge ur ake i velpol ma i ri ve,

¹⁷ “God i ri vene:

Toth nge nang patopalalnga
aro tho paru Onik Riringa a toko na
sengre nge.

Mo aro tutumuere o ripot lek ri-
ong.

Na lomu kulpopoere aro o thopol
pathengaling rel relnga.

Na lomu toloklokere aro o thopol
oni theongre.

¹⁸ Naro tho paru Onik Riringa a lek toko na
seng omaingare nge,
mo aro o ripot lek riong nge nang
areken.

¹⁹ Aro tho oma pakukukaling pelie a sepsa
na pathepolong a ulue
na mla na won sesenga na won
klunga aolonga aro o velpol.

²⁰ Nang theki aro i eksingu
mo ia mideng
naro ngov i eksingu
mo i selele ranga ve ini mla.

Panen aro Toko Pomnga ile nang i
velpol.

Na ile nang aken i aolonga rintet
na ini nang aka ini pakukukonga.

²¹ Naro toko na seng areko o avav a Toko
Pomnga iion,
aro God i pamimi or.’ *Joel 2:28-32*

“Na i velpol ranga ve aka God ile riong
elnga nomenganga a Joel, i ritet nge.

²² Jisas aka ini Nasareta ini toko aka God
i patheng i a thomu nge, ma i papomnga

i nge ako i oma paatealing na pathepolong na pakukukaling nge imeni ako ru a thomu nge, aka ranga ve lomumu mire nge lale.

²³ Na God i panes vengveng ilemi aka nomenga i ri nge lale ve aro i sungu i a menumu na thomu o oma i ranga ve aka ilemi mire nge aka aro thomu o oma i a i nge, aka thomu o sungu i a toko le vothung kerengare omeni mo o pamona i a won ngoronga nge mo o pun rin i.

²⁴ Aveto God i pamimi werera i ma i eltetpot rinong a sisisong a i nge. Eneke rinong i pavurvur aro ile mong i avele.

²⁵ Na Devit kene i ri vene nge i,
“Na tho thopol Toko Pomnga
ako i voth tomo nge tho evelelnga.
I voth tomo nge tho ma i paengeng tho
taro ake o pakerenga tho avele.

²⁶ Maken lemik sivenga nge ur ake
ma tho ri nge lek lemi sivengaing.
Na tho men tetal ol nge ile opoesaling
e tho.

²⁷ Eneke aro wong mothong lel onik
a rinrinongare ole pen avele.
Na wong mothong tova punapoaltun
lom toko riringa
mo ini peti i plot.

²⁸ Wong pathengal tho nge mimiong a so
lale.
Naro wong voth tomo nge tho,
naro nge aken, lek lemi sivengaing
aro i aolonga.” *Buk Song 16:8-11*

²⁹ “Titeikre tho ritet vengveng a thomu
nge, nge titevir a Devit aka ini nepes. Ako i
rin lale ma o tetun i, na ia vuvepun i voth
tomo nge it nomenga ma me i pavurvur
ponange.

³⁰ Devit ini a God ile riong elnga nomen-
ganga, na ilemi mire nge ur areko God i
kin ile riong nge ve i nunganga, ve aro
panen God aro i pavelpol itevinga e mo
aro i velpol ini nepes ranga ve ini i.

³¹ Nomenga Devit i thepol ur areko lale
ako aro God i oma i panen. Ma i ri nge toko
ako God i ateal i ve aro i el werer or, aka
nge ile los wereraing, nge ile riong aka i
ritet nge nomenga ve, ‘God aro i mothong

lel i mo ini peti i plot a rinrinongare ole
pen avele.’

³² Na them vusnga them thopol aka God
i palos werera Jisas ake lale.

³³ Na God i ela Jisas lale ma i men ol a
God ilo sei a imeni sivenga nge anga.[†] Ma
i el Oni Riringa aka Itema i pator i nge. Na
ur aka thomu o thepol i na o nongpol i ini
sungong aka Jisas i paru i a them nge.

³⁴ Eneke Devit i esa a Pen a Urvet avele,
aveto i ri vene,

“God i ria ok Pomnga ve,
“Ong men a menik sivenga nge,

³⁵ i pavurvur aro aro la
tho paeso lom ngarangre a som
thewo.”’ *Buk Song 110:1*

³⁶ “Vene na thomu Israelre, aro lomumu
mire senu nge ake. Nge a Jisas aton thomu
o pamona i a won ngoronga nge, ake ini
toko aka God i ateal i ma God i pavelpol i
ako ini Toko Pomnga.”

Toko na seng pulua o eksing olemi.

³⁷ O nongpol i ma riong aken i pun oopo.
Ma o ria Pita tomo nge pakeke pelie ve,
“Titeikre aro them vova ol?”

³⁸ Ma Pita i ria or ve, “Thomu omole
omole aro kimomu lelapot lomu vothung
kerenga na o el paninuong nge a Jisas
Krais iion. Maken God aro ilemi simikal
lomu vothung kerenga. Naro i sungu ol
Ioni Riringa a thomu nge.

³⁹ Eneke nomenga God i kin ile riong
tomo nge thomu na nge tutumuere na
areko o voth gat i pavurvur nge areko ar
Pomnga a God aro i leng or a i nge.”

⁴⁰ Pita i panongpol engeng or ma i tor
mun or nge riong pulua ve, “Aro thomu
o naktet thomu mo aro God i pamimi
thomu nge ile paomelaling aka i es a toko
kerengare nge.”

⁴¹ Make tokokoere olelio nge a Pita
ile riong. Mako o el paninuong. Nge
nang aken tokokoere or 3,000 o eksing
ole mimiong ma o rong esa mun toko
lemioongare oa titaling.

⁴² Ma o engeng nge pakekere ole riong
nongpolnga, na nge ole men pathunong,

[†] **2:33:** Menong a Toko Pomnga ilo sei a imeni sivenga nge anga ini pen aka o pavothal nge na i el Toko Pomnga ile engeng nge.

na nge ole an tomoing nge bret ako o rek rek i, na nge ole nongong.

Toko lemioongare ole asagupeling.

⁴³ Na God i oma pakukukaling na pathepolong pulua a pakekere omeni. Ma or alavusnga o papomnга or tomo nge ngangeong.

⁴⁴ Ma toko lemioongare o men pathunal pel nge nang elonga. Na ole ur elonga ake ini or vusnga oa ol.

⁴⁵ Ma aro o sungpot ole ulue na ole ur elonga nge toko e ako mo i ol i, ma o el umtun nge ma o thomreu umtun aken nge tokokoe areko o poor nge ur elonga.

⁴⁶ Nge nang elonga o es tomo e pel a Lotu Tepun a Vel. Ma o es a ole vel omole omole ma o an tomo nge bret ako o rek rek i. Ma olemi i ngo pis ma o vual nge lemi sivengaing.

⁴⁷ Evelelenga o risea a God iion. Ma toko na seng olemi sivenga ol nge or. Nge nang elonga God i ela mun toko na seng areko i pamimi or ma i rong esa mun toko lemioongare oa titaling nge la.

3

Pita i pamimi toko aka ieve lil.

¹ Nge nang omole e aka Pita ome a Jon o es a Lotu Tepun a Vel la. Ma nang theki i el or me aro tokokoere o oma ole nongong.

² Na toko e aka i voth kene ieve lil na inina i maneu i nge na i vene vet ake. E nang elonga o visloa i ma o pamen totho i a Lotu Tepun a Vel a lok thechia, aka o apet i ve, "A Urvet" mo i nong umtun na ur elonga nge areko o eso a Lotu Tepun a Val a lok lemi.

³ Ma toko aken i thopol a Pita ome a Jon aka o eso me a Lotu Tepun a Vel a lok lemi, nako i nonga umtun pelie a or paini nge.

⁴ Ma Pita ome a Jon o the rinrin ol i ma Pita i ria ve, "Wong the a them paini nge me."

⁵ Ma itheki lel a or paini nge la, ma ilemi ve aro i ela ur a or paini nge.

⁶ Aveto Pita i ria i ve, "Lek umtun avele. Aveto lek inga ur e ake aro tho sung i a wong nge. Nge a Jisas Nasaret anga iion tho ria wong ve, wong mita mo wong es."

⁷ Ma i krima imeni sivenga nge ma i pamita i. A ur e avele na ieve alaini o sivenga werer.

⁸ Ma i mita ma i opthoa, mako i esu esa ol. Mako i es tomo ol nge or paini a Lotu Tepun a Vel a lok lemi. Ma i es na i ophtha opthoa na i risea God iion roro.

⁹ Ma toko na seng o thepol i aka i esu esa na i risea God iion.

¹⁰ Ma or alavusnga o ate i ve ini toko aton ru i men kek a Lotu Tepun a Vel a lok thechia aka o apet i ve ini "A Urvet" mo i nong kek umtun na ur elonga. Ma o thepol i aka i sivenga lale ma o kukuk na oleme pelekpol nge uneke aka i velpoltun i.

Pita i panongpol lotuongare.

¹¹ Ma rongan i krimalal a Pita ome a Jon, nako toko na seng o kukuk ma o tho a or nge me ma o pathun tomo nge or nge wop aka o apet i ve ini a "Solomon ile Sawak."

¹² Pita i thopol ake ma i ria toko na seng ve, "Thomu Israelre i vova ake thomu o kukuk nge, e? Na o the rinrin them, e? Thomu o rivenga, ake ini them paini lemem longung eve lemem vothung sivengaing a God itheki ake i pasenu werer toko ake ma i es, e? Avele.

¹³ God ake ini a Abraham na Aisak na Jekop ole na aka ini ar tetere ole i papomnга ile omainga a Jisas roro. Aveto thomu o sungu i a pelie omeni. Na Pailat i ri ve i modoppot i la. Aveto kimomu lelal i.

¹⁴ Kimomu lelal toko vengvenga na ini toko riringa. Na thomu o nin a Pailat ve aro i modoppot toko so rinnga a thomu nge.

¹⁵ Mako thomu o so rin toko aka i pathengal or nge mimiong a so kene lale, aveto God i palosa mun i nge rinong lale. Taro aken them thepol i ma i nunganga.

¹⁶ Ma Jisas iion ile engenging i pamimi toko ake. Na lomumu mire nge toko ake na thomu o thepol i aka i sivenga werer. Na Jisas re aka i pavurpola lemem lemioong ma i sungu engenging a i nge a thomu alavusnga thekumu.

¹⁷ "Na titeikre lelik mire aka ve, thomu na omu pompomere lomumu mire senu avele, make thomu o oma kerengaing a Jisas nge venen aken.

18 Aveto nomenga God i pavelpolpot riong ake a ile riong elnga nomenga angare owo ve, aro God ile toko aka i ateal i ve aro i el werer or kene aro i el tel sisisong, mako God i pavelpol i lale.

19 Vene naro thomu o modop lomu vothung na o eksing mo o panes a God mo aro i patitepot lomu vothung kerengare.

20 Maken aro Toko Pomnga i sungu engenging pomnga a thomu nge. Mo aro i pakeu toko aka i ateal i a thomu nge me. Ini toko aka God i ateal i nomenga ve aro i opoal thomu, ini a Jisas.

21 Na ponange ake i voth a Pen a Urvet. Ma i men total nge nang aka aro God i paponganga werer ur alavusnga ranga ve aka i ripot i nge ile riong elnga nomengangare owo.

22 Eneke Moses i ri nge i vene:
'God aka ini omu Pomnga aro i pake ile riong elnga
ranga ve aka i pake tho
naro ini lomunga e.'

Mo thomu o nongal ile riong evelel-
nga.' Lo

18:15-16

Na Moses i ria mun ve,

23 'Na tokokoe areko oni plong ve aro o nongal
a God ile riong elnga aken ile riong,
aro o voth tomo ol nge a God ilengare avele ol,
aro God i pakerenga selele or.' Lo

18:19

24 "Na riong elnga nomengangare i patea nge a Samuel na riong elnga areko o velpol ol a ikime areko o panongpol a God ile riong, or alavusnga ole panongpolong ake i ritet nge ur areko i velpol nge wop lemi ake.

25 Nge riong elnga nomengangare, God i sungu patorong a thomu Israelre nge, ma thomu o el ol a God ile riong kinnga aka ranga ve i sungu i nomenga a titovumuere nge. Ranga ve aka i ria Abraham ve,

'Aro tho sungu lek menong sivenga a titovumre nge,
mo o sung esu i a toko ulue angare nge.'

Stat 22:18; 26:4

26 Ma God i ateal ile omainga ma i pake tel i a thomu nge me mo aka i pamensenu thomu nge aka i eksing thomu nge lomu vothung kerenga."

4

Sadiusire ole mio nge los wereraing panen anga avele, mako o pamit a Pita ome a Jon e riong.

1 Pita ome a Jon rongan o ria toko na sengre nge, na pris kimangare, na Lotu Tepun a Vel a mit tetalongare ole mukalinga, na Sadiusire mun o velpol.

2 Ma ole mi kling nge or paini, eneke o patorial toko na sengre nge a Jisas ile los wereraing, aken i pathengal aka ve, i pavurvur rinrinongare aro o los werera mun.

3 Taro ake o rere or paini ma o ri ve aro o pamit or e riong, ave i toth penie lale mako o paeso or paini a mang a midenga lami, makola rulpou.

4 Aveto pulua aka o nongpol riong aken lale ma ole mio nge. Mako toko lemioon-gare oa titaling i esa, ma o tital inga totomonere na i pavurvur nge 5,000.

5 Ma nge erangunga Judare oa pom-pomere tomo nge lotu a mukalingare na pamirealingare nge a Moses ile patorong, o pathun a Jerusalem.

6 Ma o velilo tomo nge a Anas aka ini Prisre oa Pomnga na Kaiapas na Jon na Aleksander, na ine tokokoere aka ini a Anas ilengare o voth mun.

7 Ma o pamitu or paini a otheki lemi ma o nina or paini ve, "Thomu paini o oma ur aken vava, thomu o el engenging le vanga na o oma ake nge anga iion?"

8 Na God Ioni Riringa i vuual a Pita nge ma i olal ole riong ve, "Thomu mukalingare nge Israelre na thomu Judare oa pom-pomere,

9 na ponange thomu o ri ve o pamit them paini e riong, eneke them paini them pasenu toko eve kerenga ake. Na ava thomu o nin them ve, toko ake i senunga vava?

10 Na i vene ake naro thomu alavusnga aro lomumu mire nge. Na toko alavusnga aka a Israel mun aro ole mi mire nge. Toko ake i mitu a thekumu lemi ma i senu,

eneke Jisas Krais ako ini Nasaret anga iion ile engengeng i pasenu i. Ma thomu o pamona Jisas aton a won ngoronga nge. Aveto God i palos werera i nge rinong.

¹¹ Jisas ini toko aka God ile erere i ri nge ve,

‘Um aka thomu vel aringare o rivenga i kerenga

ma o siv lelpot i,
ake kene i velpol ini um a urvet
ako i paengeng vel
ranga ve ini wovek sapatanga.’

Buk Song 118:22

¹² Toko aken ienga inga ini toko pamimionga. Nge pen alavusnga ake ru a ulue, God i pathengal ol it nge toko e avele ol aka aro i pamimi it.”

¹³ Ma mukalingare o thepol aka Pita ome a Jon o panongpol na o ngange avele. Na olemi mire aka ve, toko aini ake o es a pamirealinga pelie nge avele. Or paini ini toko polpolnga inga. Na olemi ngo pelekpol nge or paini ma o ate or ve, nomenga or paini o voth tomo nge a Jisas.

¹⁴ Na o thepol toko aken ru ieve i sivenga ol en, ma i mita tomo ol nge or paini, taro aken ole riong ol e avele aka aro o ria or paini nge.

¹⁵ Ma o ria or paini ve aro o plospot a rionga a vel. Lamako o nin ol pel ve,

¹⁶ “Aro te oma toko aini aken vava, e? Or paini o oma pathepolong aolonga ake, ma toko na seng pulua ake ru a Jerusalem olemi mire nge lale, naro them kelelal i avele.

¹⁷ Aveto i mothong tova riong ake aro i es a pen elonga a toko na sengre nge. Make aro te ri engeng nge or paini ve, ‘Aro o mothong tova o ri ol riong pelie a toko na sengre nge, nge a Jisas iion.’ ”

¹⁸ Lamako o leng werer or paini me, na o ria or ve aro o mothong tova o ri mun riong e na o patorial toko na seng nge a Jisas iion.

¹⁹ Aveto Pita ome a Jon o olal ole riong vene, “Lomumu vava, kathnga i sivenga nge a God itheki, aro them modop a God ile riong, eve aro them panes lomu riong?

²⁰ Aveto i pavurvur aro them paini them poreng avele. Them paini aro them

panongpol inga nge ur areko them thepol i na them nongpol i lale.”

²¹ Lama mukalingare o pator mun or paini nge riong engenga pelie. Lamako o modop or paini ma o es. Aveto mukalingare o ri ve o paomelal or, aveto o thepolo sovengalo e avele, eneke toko na sengre o paesa God iion roro nge ur aka o oma i.

²² Ma o paesa God iion roro, eneke toko aka or paini o oma pathepolong aolonga a i nge ma i sivenga werer ia tovu po or mule pa penel.

Toko lemioongare o nong nge aro o el engengeng nge panongpolong.

²³ Lama mukalingare o modop ol or paini, ma or paini o es werer ol a olengare nge. Ma o ria ol or nge riong alavusnga aka ini pris kimangare na Judare oa pom-pomere o ria or nge.

²⁴ Ma o nongpol i ma vus. Ma or alavusnga olemi omoletet na o nong a God nge vene:

“Toko Pomnga, wong oma sepsa na ulue na rua na ur alavusnga aka ru o voth nge.

²⁵ Nomenga Onum Riringa i pavelpol riong e aka a titevime a Devit iwo aka ini lom omainga, ma i ria ve,

“I vava ake toko relngare olemi kling rinrin, e?

Na i vava ake tokokoere o rirum polpol inga, e?

²⁶ Ine nepes alavusnga ake ru a ulue o monsi nge punpel.

Na mukalingare o velilo pel mo or vusnga o pun tomo nge a God ome ile toko atealinga.’ *Buk Song 2:1-2*

²⁷ “I nunganga Herot na Pontius Pilat tomo nge Israelre na tokokoe areko ini Judare avele, o pathun a rem a lumlumnga ake mo o pun tomo nge a Jisas aka ini lom omainga riringa aka wong ateal i nomenga.

²⁸ O pathun pel mo o oma ur alavusnga aka ranga ve nomenga wong engeng ve na lomum ve aro i velpol.

²⁹ Na Toko Pomnga, aro lomum rum nge voling areko o oma i, naro wong opoesal them aka ini lom omaingare mo aro them

engeng nge lom riong panongpolnga. Mo them mothong tova them ngange.

³⁰ Naro wong pango menum a toko ni multhangingare nge mo pamimi werer or. Na oma pathepolong aolonga na pakukukaling nge a

Jisas iion, ake ini lom omaing riringa."

³¹ O nong ma vus, na vel aken ru o voth nge i vaikik. Ma o vual nge a God Ioni Riringa ma o panongpol nge a God ile riong. Na o ngange avele.

Toko lemioongare o sung pel nge ole ur elonga.

³² Ine toko lemioongare oopo omole inga, na olemi omoletet inga. Na oa e avele i thepol ile ur aka ini ienga ile avele, ole ur alavusnga kene ini or vusnga ole.

³³ Na pakekere o panongpol engeng nge a Jisas ile los wereraing. Ma God ile themosaling i pesrou a toko lemioongare nge avele.

³⁴ Oa e avele kene i oror nge aning eve ur elonga. Toko alavusnga aka ru ole ulue eve vel i voth, o sungu i a toko e nge ma i ol i mo o el umtun nge. Nako o el ol i la,

³⁵ ma o sungu ol i a pakekere nge. Ma o thomre i a or omole omole nge, i pavurvur nge uneke aka o oror nge.

³⁶ Na toko omole e aka i voth, iion a Josep aka ini mtho a Saiprus anga ma ini net Livai. Ma pakekere o sungu mun ion a Barnabas a i nge. Toko iion aken mirenga ve, ini toko aka i paengeng tokokoere olemi.

³⁷ Na i sungu ile ulue epee aka a toko e nge, ma i ol i, mako i el sele umtun nge ma i sungu i a pakekere nge.

5

Ananaias ome a Sapaira o rin nge ole vothung kerenga.

¹ Aveto toko omole aka i voth aka iion a Ananaias na iewo iion a Sapaira. Ma or paini o sungu ole ulue epee aka a toko e nge, ma i ol i.

² Aveto umtun epee Ananaias i krim werer i mo ini ole. Na iewo sengenga mun ilemi mire nge umtun epee aken. Ma

Ananaias i el ol inga umtun epee aken ma i sungu i a pakekere nge ranga ve ini olonga alavusnga.

³ Ma Pita i ria ve, "Ananaias, i vova ake som womo inga Satan mo i vual a opom lemi, e? Ma lom apaltet a God Ioni Riringa. Ma wong krim werer umtun epee aka ini lom ulue olonga, e?

⁴ Nomenga aka o ol ulue rongan ma ini lom inga, na nge aka o ol i nge umtun, umtun aken kene ini lom, i vava ake lomum rum ur ake a lomum? Lom apaltet ake ini toko avele, lom apaltet ake ini a God."

⁵ Ma Ananaias i nongpola inga riong ake, nako i rin, mako i matu. Na tokokoere aka o nongpol i o ngange rintet nge.

⁶ Mako kulpopoere o es me ma o auvala ol ini peti, ma o eltetpot i lamako o tetun ol i.

⁷ Palolo avele, nako iewo sengenga i eso me. Na ilemi mire nge ur aka i velpol, kene avele.

⁸ Ma Pita i nina i ve, "I re ake ini umtun alavusnga aka ome ewom tomonnga o el i nge lomu ulue olonga?" Ma i olal i ve, "Umtun alavusnga i re aken."

⁹ Ma Pita i ria ve, "I vava ake ome ewom tomonnga o ri ve o tongporum Toko Pomnga Ioni, e? Tokokoe areko o tetun ewom tomonnga o velpol mun a vel thekia lale, mo aro o potun mun wong la."

¹⁰ A ur e avele, nako i rin ma i matu a Pita ieve tepun. Ma kulpopoere o eso me ma o thepol seng aka ru i rin lale. Ma o potun i la. Ma o tetun totho i a iewo tomonnga ilo sei.

¹¹ Na lotuonga alavusngare na tokokoere aka o nongpola ur ake o ngange rintet nge.

Pakukukaling na pathepolong o velpol.

¹² Ine pakekere o oma pakukukaling na pathepolong pulua aka ru a toko na sengre nge. Ma toko lemioonga alavusnga o pathun aka ru a Solomon ile sawak.*

¹³ Aveto areko ole lemioong avele o ngeip nge voth tomoing nge or. Aveto toko na seng alavusnga o paesa or.

* **5:12:** Solomon ile sawak i toth a Lotu Tepun a Vel lok lemi.

¹⁴ Ma toko na seng pulua ako olemio a Toko Pomnga nge, o velilo tomo pel nge toko lemioongare ma oa titaling i esa ol.

¹⁵ Mako toko na seng o potun ni multhangingare a sovengalo la. Ma o pangoa pelie nge ringre na pelie o ngosel e tako, na o oma venen aken mo aro ve Pita i es me mo nang i totun i mo ia mlil i thastun or mo o sivenga werer.

¹⁶ Ma ine toko na seng pulua nge rumrem ako ru totho a Jerusalem kene o es mun me. Ma o pasong ni multhangingare me. Tomo nge tokokoe areko tamata kerengare o rero a or nge, mako or alavusnga o sivenga werer.

Ensel i elpot werer pakekere a mang a midenga lemi.

¹⁷ Make Prisre oa Pomnga na ilengare ako ini Sadiusire, o thopol aka pakekere o pamimi ni multhanginga pulua, mako olemi ngo pelekpol nge or, eneke o pavurvur ve aro o oma omaing aken avele.

¹⁸ Ma o rere pakekere ma o paeso or a mang a midenga lemi.

¹⁹ Aveto pemlik Toko Pomnga ile ensel e i theppot mang a midenga thekia ma i wolpot or a lalanga. Na i ria or ve,

²⁰ “Thomu o es mo o mito a Lotu Tepun a Vel a lok lemi mo o panongpol toko na sengre nge ur alavusnga nge mimiong ponganga ake.”

²¹ Ine pakekere o nongal ile riong ake, lamako o es a Lotu Tepun a Vel a lok lemi nge rulpoalal. Ma o patea nge toko na seng opatoralnga. Ine Prisre oa Pomnga na ilengare o leng mun Israelre ole mukalingare or mule pa limai mo Judare oa pom-pome alavusngare o velilo pel. Lama o pasong mun okei a mang a midenga mo aka o pasong pakekere a or nge.

²² Na riong elnga areken o velpol a mang a midenga aveto o thepol ol pakekere avele ol. Ma o lo werer ol ma o ritet or vene,

²³ “Them velpol ma them thepol mang a midenga thekia i pupal bibim na mit tetalongare rongan o mit a vel thekia. Ma them theppot vel thekia, aveto them thepol toko e avele a lemi.”

²⁴ Mako lotuonga a mit tetalonga oa pomnga tomo nge pris kimangare o nong-pol riong ake, ma olemi pelekpol ma olemi ve, ur neke ake i velpoltun pakekere?

²⁵ Lama toko omole i es me ma i ria or ve, “O nongpol, ine tokokoe areton ru thomu o paeso or a mang a midenga, or aka o mit a Lotu Tepun a Vel a lok lemi ma o patorial toko na sengre.”

²⁶ Mako mit tetalongare ome oa pomnga o es la ma o wol werer or. Aveto o so vet or avele, eneke o ngeip nge toko na sengre, aro vene mo o pun or nge um.

Ine pakekere o ngange vet avele na o ria mukalingare nge.

²⁷ O wol or me ma o pamitu or aka ru a mukalinga or mule pa limai areken nge, mo aro Prisre oa Pomnga aro i nina or.

²⁸ Ma i ria ve, “Them ri engeng nge thomu ve, thomu o mothong tova o patorial nge toko ake iion. Aveto thomu o pavual a Jerusalem nge riong ake lale. Na lomumu otun them ve, them so rin toko ake ma i rin.”

²⁹ Aveto Pita ome pakekere o olal ole riong ve, “Aro them panes inga aka ini a God ile riong. Them pavurvur aro them panes tokokoere ole riong avele.

³⁰ Thomu o pamona Jisas a won ngoronga nge, ma o pun i ma i rin, aveto titevirre ole God i palos werera i nge rinong.

³¹ Ma ina God i papomnga i ma i pamien i a imeni sivenga nge anga, mo ini mukalinga na ini pamimionga, mo aro ve Israelre o eksing oopo, aro i eltetpot ole vothung kerenga.

³² Them tomo nge a God Ioni Riringa, them thopol i ma them ritet nge ur alavusnga ake. Na Ioni Riringa ini a God ile sungong nge areko o nongal i.”

Gamaliel i ri ve, mukalingare aro olemi mor e pakekere.

³³ O nongpol riong aken, ma olemi kling rintet, ma o ri ve o so rin pakekere.

³⁴ Aveto mukalinga omole i mita. Ini Parisi, ma iion a Gamaliel. Ini patorialinga nge a Moses ile patorong. Na toko na sengre o papomnga i. I mita a mukalinga

or mule pa limai otheki. Ma i pakealalpot pakekere mo o voth tel inga a lalanga.

³⁵ Na i ria mukalingare ve, "Thomu Israelre, lomumu rum senu tel lamo o oma ol ur pelie nge tokokoe areke.

³⁶ Lomumu mire ako nomenga Teudas i velpol ma i ria ve, 'Tho ini Toko Pomnga e ako.' Mako toko or 400 o panes i. Aveto pelie o pun i ma i rin na tokokoe areko o panes i o lo vra ma ile omaing i vus polpolu inga.

³⁷ Lama a toko aken ikime, nge nang e ako gavman i el toko na sengre oion, Judas aka ini Galili anga, i velpol mun ma toko pulua o panes mun i ma i palosa punpeling nge a gavman. Aveto o pun i ma i rin mun. Ma tokokoe areko o panes i o lo vra mun.

³⁸ Taro ake tho ria thomu ve, thomu o mothong tova o oma ur e a or nge. Na thomu o modop or, eneke aro ve ur ake na omaing ake ini toko ulue anga ole, aro i vus polpolu inga.

³⁹ Aveto aro ve God isivenga ini ur ake tepun, i pavurvur aro thomu o pakiktheu or avele. Aken ranga ve aka thomu o pun tomo nge a God."

Ine pakekere olemi sivenga nge aka o el le maraing nge a Jisas iion.

⁴⁰ Taro ake o panes a Gamaliel ile riong mo o lengo pakekere me, ma o ria mit tetalongare ma o so litlit or. Ma o ri engeng nge or ve, o mothong tova o ri nge a Jisas iion. Lamako o modop werer mun or.

⁴¹ Mako pakekere o plosa nge mukalinga or mule pa limai areken ma o espot a lalanga la, na olemi sivenga rintet, eneke God i papomnga or nge aka o el le maraing nge a Jisas iion.

⁴² Na nge nang elonga, a Lotu Tepun a Vel a lok lemi na a tokokoere ole vel o patorial na o panongpol Panongpolong Sivenga aka ve, Jisas ini toko aka God i ategal i ve aro i el werer ile tokokoere.

6

O ateal toko or limai mo o opoesal ine pakekere.

¹ Nge wop lemi aken toko lemioongare oa titaling i esa. Na Juda pelie aka o ri

Grikre okei o ri pompom nge Judare aka o ri Hibrure okei, ma o ri ve, "Nge nang elonga o sung sung umtun nge lemem seng basbasuere avele."

² Lamako pakeke or mule pa omole pothoi or aini o leng ine toko lemioongare me, na o ri ve, "Aro ve them modop a God ile riong panongpolnga na them oma ol inga umtun sunga, ake i sivenga avele.

³ Ken, titeikre, aro thomu o kath toko or limai aken a thomu nge. Ako thomu alavusnga lomumu mire aka o vual nge a God Ioni Riringa na ole mire i aolonga moro aken te pamit or mo o theal omaing ake.

⁴ Naro them inga aka aro nge nang elonga aro them nong nge a God na them panongpol toko na sengre nge a God ile riong."

⁵ Toko na seng alavusnga olemi sivenga nge ole riong aken. Ma o ateal a Stiven, ini toko aka ile lemioong i engeng rintet. Na God Ioni Riringa i vual a i nge. Na o ateal mun a Pilip na Prokorus, na Nikanor, na Timon, na Parmenas na Nikolas, aka ini toko Antiok anga, aka i es ol nge lotuong aka ini Judare ole.

⁶ Ma o pamitpot toko areken a pakekere otheki lemi, na pakekere o ronga omeni a or nge, na o nong ole.

⁷ Taro ake God ile riong i tho a pen elonga. Na toko lemioongare aka a Jerusalem oa titaling i esa esa viri viri. Na pris pulua aka olemio ol nge lemioong ake.

O rere a Stiven.

⁸ Na Stiven ini toko aka i vual nge a God ile lemi esaling, na ile engengeng. Ma i oma ine pathepolong aolonga na pakukukaling pulua a toko na sengre otheki.

⁹ Aveto toko pelie o mita ma o vol a Stiven, or ini toko lalanga anga, ma pelie o voth nge Judare ole lotuonga a vel omole aka o apet i ve ini "Areko o Vthopot nge Ole Um Polpolong Ole Lotuonga a Vel" aka ole a epee a Sairini na Aleksandria, na pelie mun ini a Silisia na Esia.

¹⁰ Aveto God Ioni Riringa i sungu mire sivenga a Stiven nge. Ma i ria or nge. Taro ake o pavurvur aro o olal ile riong avele.

¹¹ Mako o ri kinine ma o pavurpola toko pelie oopo nge, mo aro tokokoe areken o ri ve, "Them nongpol ako i ri riong pelie aka i kelelal a Moses ome a God."

¹² Mako o pavurpola lemi klingong nge tokokoere, na mukalingare, na toko pamirealingare nge a Moses ile patorong. Ma o rere a Stiven ma o el i a riong nongpolngare nge la, mo i mit nge riong a mukalinga or mule pa limai otheki.

¹³ Ma o wol tokokoe pelie aka o oma riong le apaltetonga nge i. Ine toko areken o ri ve, "Nge nang eloelonga toko aken i kelelal Lotu Tepun a Vel riringa ake na Moses ile patorong."

¹⁴ Them nongpol aka i ri ve, toko aka ini a Jisas ini Nasaret anga aro i teu Lotu Tepun a Vel aken na i tepolal lotuong a vothung aka Moses i sungu i a it nge."

¹⁵ Ma mukalinga or mule pa limai areko o menu nge riong, o the rinrin a Stiven. Ma o thepol itheki lemi ma i ranga ve ini ensel itheki.

7

Stiven i tenes mun nge a Josep ile omaing.

¹ Na Prisre oa Pomnga i ri ve, "Riong ake i nunganga, e?"

² Na Stiven i olal i ve, "Titeikre na temimekre o nongpol. Nomenga titevir a Abraham i voth a Mesopotemia na i es a Haran rongan. Nge wop lemi aken God ia malmaling tolilisnga i totun i ma i velpol a i nge.

³ Ma God i ria ve, 'Ong lo lelpot titeumre nge omu ulue aken, naro ong es e ulue epee aka aro tho pathengal i a wong nge.'*

⁴ "Make Abraham i plospot a Kaldia ma i es ma i voth a Haran. Lamako itema i rin ol. Na God i pake ol i me ve aro i voth a ulue epee aken ru thomu o voth ol nge.

⁵ God i sungu ulue epee tun e avele a Abraham nge. Aveto God i kin ile riong ve panen aro i sungu ulue epee aken a i nge mo i krim i mo aro ini ia na tomo nge ititeviere oa. Na Abraham itun e rongan, nako God i oma riong ake.

* ^{7:3:} Stat 12:1

⁶ Na God i ria i vene:
'Naro titovumre aro o men ranga ve ini loomere
a rem gatngare oa ulue.

Aro o velpol ini toko omaingare.
Naro tokokoe areken aro o oma
vothung kerenga a or nge
i pavurvur nge tovu po or 400.

⁷ Aveto panen aro tho paomelal areken
ako o sungu sisisong aken a or nge.
Lamako aro o plospot nge rem aken
mo aro o lotual tho nge rem ake.' *Stat 15:13-14*

⁸ Ma God i sungu riong a Abraham nge,
nge oni peti isnga aka ini ole paatealinga
nge riong kinnga. Lama nang or limme i
vus nge Aisak ipopnga lamako Abraham
i is ile. Na Aisak i pavelpol itun a Jekop.
Na Jekop i is mun itutun or mule pa omole
pothoi or aini ole. Ma o velpol ini Israelre
oa pompomere.

Stiven i tenes mun nge a Josep ile omaing.

⁹ "Ma Jekop itutunre ole mi klingtun
otein a Josep ma o sungu i a Isip angare
nge, ma o ol i mo ini ole umonga a Isip,
aveto God i voth tomo nge i.

¹⁰ Ma i eltetpot ile matheong alavusnga
a i nge, ma i sungu mire aolonga a i nge,
mo i velpol ini toko sivenga a Isipare ole
nepes itheki, ma i men ranga ve ini Isipare
ole nepes, na i theal mun a nepes ile vel
aolonga.

¹¹ "Lama mesi aolonga i velpol a pen
alavusnga aka ru a Isip na a Kenan. Ma
or alavusnga o men lemi kerereong nge
aning le aveleong. Ma titevir areken o
pavurvur aro o thepol ol aning avele.

¹² Aveto Jekop i nongpol kimaing nge
aning aka i voth a Isip. Ma i pake itutunre
ako ini titevirre a Isip la aka ini ole esong
teltelinga la.

¹³ Ma nge ole esong paininga mun la
Josep i pathengal isivenga a ititeinre nge,
lamako Isip angare ole nepes a Pero i ate
a Josep ititeinre.

¹⁴ Na Josep ikei song nge itema a Jekop
mo i es a i nge, tomo nge ilengare, ma
oa titaling i pavurvur nge mule pa limai
pothoi or lim.

¹⁵ Lama Jekop i esu a Isip la. Lamako i rin ol nge, ma titevirre mun o rin mun a Isip.

¹⁶ Ma o potun werer oni peti a Sekem la ma o tetun or nge vuvepun aka nomenga Abraham i ol i nge umtun pelie a tokokoe areko or ini Hamor angare.

¹⁷ “Na i totho ol aka aro God aro i oma ol ur aken, aka i ria Abraham nge nomenga. Nang aken i totho ol aka aro i velpol ol na Israelre oa titaling i esa ma i aolonga ol aka a Isip.

¹⁸ Lama toko omole aka i velpol ini Isipare ole nepes, na ilemi mire nge a Josep avele. Ma i patea ile menong e nepes.

¹⁹ Toko aken i olotet or ma i oma vothung kerenga nge titevirre na i ovulal or ve aro o pango otutunre a lalanga mo o rin.

Stiven i tenes mun nge a Moses ile omaing.

²⁰ “Nge wop lemi aken Moses inina i pop i, ma ini wain sivenga. Ma inina ma itema o theal i a ole vel nge ngov or me.

²¹ Lama o paespot a Moses a lalanga, lama Isipare ole nepes itun sengenga i mane i ma i theal i mo ini itun ol.

²² Ma Moses i el Isip angare ole mire alavusnga, ma ini toko pomnga nge riong na nge ile omaing.

²³ “Lamako Moses ia tovu po or mule pa penel ol lamako ilemi rumu ol ilengare aka ini Israelre ve aro i thopol or.

²⁴ Ma i thopol toko Isip anga aka i siso toko Israel omole. Ma i es a ithanga aken nge mo i opoal i. Mako i olal ol ia ma i so rin ol Isip anga aken.

²⁵ Ma Moses i ri ve va ilengare olemi ve aro God i opoesal i mo i eltetpot or nge kinong aken nge, aveto avele.

²⁶ Na nge erangunga Moses i thepol toko Israel or aini aka o siso pel. Ma i mit roalu or ma i ria ve, ‘Ken! I vava ake thomu paini o siso pel, e? Thomu paini ake ini titein pel areke.’

²⁷ “Aveto toko aken i siso itein aken e, i osiv a Moses ma i ria i ve, ‘Anga i ria ong aka ve, wong ini mukalinga na theal tetalinga nge them, e?’

²⁸ Ava lomum ve aro wong so rin tho ranga ve aka wong so rin Isip anga aka nine, e?’

²⁹ Lamako Moses i nongpol i ma i lopot a Isip ma i voth ol a ulue aka ini Midian angare ole. Na i peange ol nge, makola itun tomonnga or aini.

³⁰ “Na tovu po or mule pa penel i vus lamako ensel omole aka i velpoltun i a pen polpolnga nge. Totho e tete aka ini a Sainai. Ma ensel aken i velpoltuna i ranga ve ini won sesenga aka i velpol a won pok a vutvutnga lemimi me.

³¹ Moses i thepol i ma i kukuk nge ur aken aka i velpol. Ma i es totho la mo i thepol senu i, aveto i nongpol a God ile leng lenging ve,

³² ‘Tho ini titovumre ole God, tho a God aka ini a Abraham, Aisak na Jekop ole.’ Ma Moses i nongpol i veno aka, ma ioni val ma sawir i, na i ngeip ve aro i the ol i.

³³ “Lamako God i ria i vene, ‘Wong ekrispot lom esonga. Eneke ake ini lek vothinga, aka i riri rintet.

³⁴ Tho thepol vothung kerenga lale aka o oma i a lek toko na seng areko o voth a Isip. Na tho nongpol ole tanging lale. Na tho esu me mo tho opoesal or na tho pavthopot matheong aken a or nge. Na es me, mo tho pake wong a Isip la.’

³⁵ “Na Moses inga aton ru Israelre okime lelapot i ma o ria i ve, ‘Anga i pamita wong ve aro wong ini mukalinga na theal tetalonga nge them?’ Toko inga ake aton ru God inga i pake i la mo ini ole mukalinga naro i el werer or. Na Toko Pomnga i oma i venen aken nge ensel ile riong aka i velpoltuna i a won sesenga aka i velpol a won pok a vutvutnga lemimi me.

³⁶ Ma Moses i el wererpot or la, ma i oma pakukukaling na pathepolong pulua a Isip, na nge rua aka o apet i ve ini Rua Selelenga, ma i oma mun i a pen polpolnga nge, i pavurvur nge tovu po or mule pa penel.

³⁷ Na Moses mun inga aton aka i ria Israelre ve, ‘God aro i ateal toko e aken ru a thomu nge mo i velpol ini a God ile riong elnга e ranga ve ini tho.’ †

† 7:37: Lo 18:15

³⁸ Moses inga ako i voth tomo nge Israelre ma o pathun nge pen polpolnga. Ma i voth a tete a Sainai tomo nge ensel aka i sung riong a i nge. Na Moses i voth tomo mun nge titEVirre. Ma i el a God ile riong aka i sung mimiong mo i sung esu i a it nge me.

³⁹ “Aveto titEVirre o nongal ile riong avele. Ma okime lelalpot i. Ma oleMI es werer a Isip la.

⁴⁰ Ma o ria Aron ve, ‘Wong oma avala pelie mo ini lemEM mo o mukal ler. Toko ake ini a Moses aka i wolpot them a Isip me, lemEM mire ol nge i avele. Ava i vana la ol?’

⁴¹ Nge nang aken o oma avala aka i ranga ve ini bulmakau itun. Ma o oma aning aolonga na o oma sungong a avala aka o oma i nge omeni inga.

⁴² Taro ake God ikime lelalpot or. Mako o lotual ol sivemtre aka ro a sepsa, na i ranga ve aka God ile riong elnga nomen-gangare ole erere i ri nge aka i ri vene:

“Thomu Israelre,
nomenga thomu o voth a pen polpol-
nga nge,
i pavurvur nge tovu po or mule pa
penel.

Ma thomu o so rin rin mekeremre.
Ma thomu o oma lomu sungong nge.
Aveto thomu o oma sungong areken a
tho nge avele.

⁴³ Thomu o potun lotuonga a sel
ako ini a Molek aka ini avala ile,
tomo nge sivemt aka ini a Repan
ioni,
ur or aini aka ini ur vivinga
ako thomu o te i ma o lotu nge.
Taro ake aro tho pakepot thomu a
Babilon la.’ *Amos 5:25-27*

Stiven i tenes mun nge Israelre ole omaing.

⁴⁴ “Nomenga aka titEVirre o voth a pen polpolnga nge, ma o voth tomo nge lotuonga a valvale aka ini sel aka o apet i ve ini ‘God ile riong kinnga a valvale’. O oma rum valvale aken aka ranga ve God i pathengal a Moses ve aro i oma i.

⁴⁵ Lamako titEVirre o es tomo nge a Josua mo aro o el ol ulue aka ini toko rereli oa. Ma God i siv lelpot or a titEVirre ole

ulue. Na lotuonga a valvale aka ini sel aken, o el i a otitemaere nge mo o potun i a ole ulue aken, ma i mit makola i pavurvur aka Devit i velpol.

⁴⁶ Ma God ileMI sivenga nge a Devit ile vothung, ma Devit i nong a i nge ve aro i oma a God ile vel aolonga e aka aro i voth nge. Ina God aka ini ole tomo nge otevinga a Jekop.

⁴⁷ Aveto Solomon i oma a God ile vel aken.

⁴⁸ “Aveto God aka i aolonga rintet i pavurvur aro i voth a vel aka tokokoere o oma i nge omeni avele. Ako ranga ve God ile riong elnga nomengangare o ri nge ve,

⁴⁹ “Toko Pomnga i ri vene,
“Pen a Urvet ini lek menonga.

Na ulue ini evek le mitonga.

Vel kathnga ol aka aro o oma ol i mo
ini lek, e?

Na wop kathnga aka aro tho menu
nge

mo tho thou tho nge, e?

I pavurvur avele.

⁵⁰ Eneke sivengek tho oma ur alavusnga.”

Aisaia 66:1-2

Stiven i pamilempot riong nongpolngare ole omaing.

⁵¹ “Thomu toko telnga plaongare na lomumu rongan i kerenga na telngomu gut nge a God ile riong. Thomu o pup rumpot re ake ini titovumuere ole vothung, na evelelnga thomu mun kene o nongal a God Ioni Riringa avele.

⁵² Titovumuere o oma vothung kerenga a riong elnga alavusngare nge aka o voth nomenga. Na o pun rin rin areko o ritet nge a God ile toko vengvenga aro i es me ma i velpol. Ma thomu o teltun i na o pun rin i lale.

⁵³ God i sungu ile patorong a thomu nge, nge enselre, aveto thomu o panes i avele.” Stiven i ri vene re aken.

O pun a Stiven nge um ma i rin.

⁵⁴ Na riong nongpolngare o nongpolna riong aken, ma oleMI klingtun a Stiven ma o atun owo pupo nge i.

⁵⁵ Aveto Stiven i vual nge a God Ioni Riringa ma i thea la a Pen a Urvet. Ma i

thepol a God ile tolilisong na Jisas ako ro i mit a God imeni sivenga nge anga.

⁵⁶ Ma Stiven i ria ve, “O nongpol, tho thepola Pen a Urvet i thep. Ma tho thepol Toko Pomnga Itun aka i mit a God imeni sivenga nge anga.”

⁵⁷ Ma o pres viringa, ma o mon sopal otelnga nge omeni. Ma o akrungtun i.

⁵⁸ Ma o titpopot i a rem pomnga a lalanga la, mo aro o pun rin i nge um. Ma tokokoe areko o teuntetpot ole tekruk seltunnga ma o parongu i a kulpoe aka ilo sei, iion a Sol.

⁵⁹ Rongan o pun a Stiven nge um. Ma Stiven i nong ve, “Jisas wong ela onik.”

⁶⁰ Ma i koru ieve ma i pres viringa ve, “Toko Pomnga mothong tova olal ole vothung kerenga ake a or nge.” Stiven i ria inga vene ake, nako i rin ol.

8

Sol i paomelal toko lemioongare.

¹ Ma Sol ilemi sivenga nge a Stiven ipunrinnga. Nge nang aken o patea ole vothung kerenga nge toko lemioongare aka o voth a Jerusalem. Taro ake toko lemioongare o lo meresu ma o es a epee a Judia na Samaria, aveto pakekere o voth inga a Jerusalem.

² Na toko pelie aka o lotual a God, o tang, ma o wal nge a Stiven lamako o tetun i.

³ Aveto Sol i paomelal toko lemioongare. Ma i eso a vel omole omole ma i el toko na seng lemioongare. Ma i therpot or ma i paeso or a mang a midenga lemi.

Jisas ile pakekere aka o apet or ve ini aposel, o panongpol nge ile riong aka a Judia na Samaria

(Vonge 8:4-12:25)

O panongpol nge Panongpolong Sivenga a epee a Samaria.

⁴ Na toko lemioongare aka o lo meresu a pen elonga o panongpol nge Panongpolong Sivenga a pen areken.

⁵ Na Pilip i esu a rem pomnga omole aka a Samaria, ma i panongpol or nge toko aka God i ateal i ve aro i el werer ile tokokoere.

⁶ Na toko na seng pom rinnga o nongpol a Pilip ile riong na o thopol pathepolong areko i oma i, ma o pait otelnga nge ile riong.

⁷ Na tamata kerengare o wal kerekere ma o lo lelpot toko na seng puluangare nge. Na toko pulua aka o es nge eel, na areko oeve kerenga, kene o sivenga werer.

⁸ Taro ake Samaria angare olemi sivenga rintet.

Saimon ini toko longung nonga.

⁹ Na toko omole e aka i voth a rem pomnga aken kene iion a Saimon. Ma ini longung nonga na Samaria angare o kukuk nge ile omaing, na i ri ve, “Tho ini toko pomnga omole.”

¹⁰ Na ine toko kimangare na toko vulutingare, or alavusnga o men ma o pait otelnga nge a Saimon ile riong. Ma o ri ve, “Toko ake ini a god aka iion a Engengeng Aolonga.”

¹¹ Na nge nang pulua i pakukuk or nge ile longung na o pait rintet otelnga nge ile riong.

¹² Aveto olelio nge a Pilip ile panongpolong nge Panongpolong Sivenga nge a God ile menong e nepes na nge a Jisas Krais iion. Mako toko na seng o el paninuong.

¹³ Ma Saimon mun ilelio mun nge, mako i el paninuong ma i panes ol a Pilip. Ma i thepol pathepolong rel relnga na pakukukaling aka Pilip i oma i ma ilemi pelekpol.

¹⁴ Na pakeke areko o voth a Jerusalem o nongpol aka Samaria angare olelio ol nge a God ile riong. Mako o pakepot ol a Pita ome a Jon ma o es ol a or nge la.

¹⁵ Ma or paini o velpol a or nge ma o nong nge a God mo i paesu Ioni Riringa a or nge.

¹⁶ Eneke Oni Riringa i eso a or nge rongan, na o el inga paninuong aka nge Toko Pomnga a Jisas iion.

¹⁷ Ma or paini o ronga omeni a or nge, mako Oni Riringa i eso a or nge.

¹⁸ Ma Saimon i thepol aka pakeke or aini aken o ronga omeni a or nge, mako Oni Riringa i eso a or nge, mako i ri ve i sungu umtun a or paini nge ma i ri ve,

¹⁹ “Aro thomu paini o sungu mun engenging ake a tho nge. Mo aro tho ronga mun menik a toko e nge mo aro Oni Riringa i eso mun a i nge.”

²⁰ Aveto Pita i olal i ve, “God aro i pavus wong tomo nge lom umtun, eneke lomum rum ve aro ong ol a God ile sungong nge umtun.

²¹ Lemem omaing ake ini lom omaing avele. Eneke lomum kene i vengveng a God itheki avele.

²² Na eksing lomum. Mo kimom lelapot lom lemi rumong kerenga aken mo wong nong nge a Toko Pomnga mo aro i eltetpot lomum kerenga aken, ma aro i oma i eve avele.

²³ Eneke lemik mire ako lemi rumong puluanga nge vothung kerenga olalnga i vual a wong nge na i pavurvur aro i modop ong avele.”

²⁴ Ma Saimon i ria Pita ome a Jon ve, “Aro thomu o nong nge a Toko Pomnga mo i opaal tho. Mo ur areken thomu o ri nge mo i mothong tova i velpol ol a tho nge.”

²⁵ Ma Pita ome a Jon o panongpol toko na sangre nge a Toko Pomnga ile riong, na nge ur areko or paini o thopol aka Jisas i oma i. Lamako or paini o lo werer a Jerusalem la. Ma o panongpol rum so nge rumrem pulua a Samaria nge ole lo wererong la.

Pilip i opoesal toko Itiopia anga.

²⁶ Ina Toko Pomnga ile ensel i ria Pilip ve, “Nge penang aro ong monsi mo wong es rum sovengalo aka i patea a Jerusalem ma i esu a Gasa la, aka a pen polpolnga.”

²⁷ Lamako Pilip i losa ma i esu la. Na toko Itiopia anga omole aka i vus nge lotuong a Jerusalem. Ini toko kimanga aka i theal tetal seng pomnga aka ini nepes aka iion a Kandas, ile umtun a Itiopia.

²⁸ Ma i lo werer a ile pen la. Ma i thopol a Pilip. Na i men nge karis, na i tital viringa a God ile erere aka ile riong elng a Aisaia i wat i.

²⁹ Ma Oni Riringa i ria Pilip ve, “Eso totho a karis aken nge.”

³⁰ Ma Pilip i tho totho la ma i nongpol aka toko aken i tital erere aka ini riong elng a Aisaia ile. Mako Pilip i nina i ve,

“Lomum mire nge riong aka ong tital i imirenga, eve avele?”

³¹ Ma toko aken i olal i ve, “Aro ve toko e i patoral tho nge avele, aro lemik mire nge i vava, e? Esa me mo men tomo nge tho a karis nge.”

³² Lamako Pilip i roa. Na erere epee aken Itiopia anga i tital i, i vene:

“O ti toko aken la,
ranga ve ini sipsip aka aro o so rin
i,
ma toko aken i pesa iwo avele
ranga ve ini sipsip itun aka o soro
ini thoing.
Nako i mit poreng inga.”

³³ Ma o palemarau i,
ma o pamit i e riong
na itepun e avele,
aveto o paomelal polpol inga i.
Itun ol e avele aka aro i tepola ol i,
eneke ile mimiong ake ru a ulue kene
i vus.”

Aisaia 53:7-8

³⁴ Ma toko kimanga aken i nin a Pilip ve, “Riong elnga aken i ri aken nge anga? Nge isivenga, eve nge toko relnga, e?”

³⁵ Mako Pilip i rirumu i a toko aken nge, ma i patea nge erere epee aken, ma i ri nge Panongpolong Sivenga aka nge a Jisas.

³⁶ Ma or paini o tho a so lopat ma o espot e pen aka thei i voth nge. Ma toko kimanga aken i ria i ve, “Thepol thei re ake. Ur nekenga aka i mitrup ol tho aka aro tho el paninuong, e?”

³⁷ [Ma Pilip i ria i ve, “Aro ong el paninuong tova lomumo nge a God nge opom alavusnga.” Na i olal i ve, “I nunganga, lek lemioong lale aka ve, Jisas Krais ini a God Itun.”]

³⁸ Lamako i ria mo karis i mitu. Ma Pilip ome toko kimanga aken, or paini o esu a thei la. Ma Pilip i paninuong.

³⁹ Ma or paini o esa a thei me, na a ur e avele, nako God Ioni Riringa i elteteta a Pilip. Ma toko kimanga aken i thepol ol i avele. Ma ilemi sivenga na i es ol nge sovengalo aka i es nge la.

⁴⁰ Lama Pilip i thopol aaka i voth ol a Asdot. Ma i es a rumrem elonga. Ma i panongpol or nge Panongpolong Sivenga. Ma i mulu a Sisaria.

9*God i eksing a Sol ile mimiong.*

¹ Ma Sol rongan ilemi ve aro i pakerenga na i pun rin a Toko Pomnga ile wainlangaere. Ma i es la ma i nina Prisre oa Pomnga,

² ve aro i wat maluengre a Judare ole lotu a mukalingare nge ako o voth a Damaskus, mo aro ve Sol i velpol a or nge ma i thepol toko na seng areko o panes a Jisas ia tenesing a so, aro i rere or mo i paes werer or a Jerusalem la.

³ Lamako Sol i es, makola i totho a Damaskus, na a ur e avele, nako pen lalanga aka i esu a Pen a Urvet me ma i totun i.

⁴ Ma Sol i matu a ulue na i nongpol lenging aka i ri ve, “Sol, Sol! Wong vova ake ong pakerenga tho, e?”

⁵ Ma Sol i nina i ve, “Toko Pomnga, wong ao?” Ma i ria ve, “Tho ini a Jisas, aka wong pakerenga tho.

⁶ Naro wong mita mo wong eso a rem pomnga la. Panen aro toko e aka aro i ria wong nge ur aka aro wong oma i.”

⁷ Na tokokoe areko o es tomo nge a Sol or aka ru o mit. Ma o ria ol avele, ma o nongpol lenging, aveto o thepol toko e avele.

⁸ Lamako Sol i mita ma itheki lema. Aveto i thepol ol avele. Lamako tokokoe areko o krima imeni, mako o tia ol i a Damaskus la.

⁹ Ma i voth nge nang or me, aveto rongan itheki pros. Na nge nang areken i an avele na i thin avele.

¹⁰ Na Jisas ile wainlanga omole e aka i voth a Damaskus iion a Ananaias. Na nge ile oni theong aka Toko Pomnga i ria i ve, “Ananaias.” Na i ri ve, “Toko Pomnga tho ake ru tho voth.”

¹¹ Ma Toko Pomnga i ria i ve, “Ong losa mo es rum nge Sovengalo aka o apet i ve ini ‘Sovengalo Vengvenga.’ Na a Judas ile vel aro wong thepolo toko Tarsus anga e nge, iion a Sol. I aken ru i nong.

¹² Nge ionti thenga i thepol toko omole aka iion a Ananaias, i es me ma i mitu ma i ronga imeni a i nge mo aro itheki vles werer mun.” Toko Pomnga i ria i vene ake.

¹³ Ma Ananaias i olal ile riong ve, “Toko Pomnga tho nongpol toko pulua aka o ri nge toko aken. Nge vothung kerenga pulua aka i oma i nge lom toko na seng areko o voth a Jerusalem.

¹⁴ Ma i el engenging a pris kimangare nge, ma i es me mo aro i rere toko na seng alavusnga aka ru o nong nge iom.”

¹⁵ Aveto Toko Pomnga i ria i vene, “Ong es la, na toko aken ini ol i lek toko omainga aka tho ateal i ve aro i paes iok a tokokoe areko or ini Judare avele nge, na a nepesre nge, na a Israelre nge.

¹⁶ Aro tho pathengal i nge matheong na sisisong aka aro i el i mo aro i opoal tho.”

¹⁷ Lama Ananaias i es la, ma i koriso a vel lemi ma i ronga imeni a Sol nge. Ma i ria ve, “Teik a Sol, Toko Pomnga a Jisas aka i velpoltun ong a Sovengalo aka ong es nge me, i pake tho me, ve aro thekum vles werer mun, na Ioni Riringa aro i eso mo i vual a wong nge.”

¹⁸ A ur e avele na ur e aka i ranga ve ini silang kikthanga i matpot a Sol itheki, mako itheki vles werer mun. Ma i mita ol, mako o paninu i.

¹⁹ Ma i an werer ol, mako i engeng werer. Ma i voth tomo nge a Jisas ile wainlangaere aka a Damaskus nge nang mun pelie.

Soli panongpol e Panongpolong Sivenga aka a Damaskus.

²⁰ A ur e avele na Sol i panongpol ol a Judare ole lotuonga a vel pulua, ve aka Jisas ini a God Itun.

²¹ Ma or alavusnga o nongpol ile riong ma o kukuk nge, ma o ri ve, “Ake ini toko aton ru i voth a Jerusalem mo i so rin kek areko o nong nge a Jisas iion, na toko ake i es mun re ake me ve aro i rere mun a Jisas ile tokokoere mo i paes or a pris kimangare nge la. Ken ava ini re toko ake?”

²² Aveto Sol ile panongpolong i mathe rintet. Ma Judare aka ru o voth a Damaskus o nongpol ile panongpolong ma olemi ngo pelekpol nge. Eneke i pathengal or ve, i nunganga aka Jisas ini toko ako God i ateal i ve aro i el werer or.

Judare oa klingtun a Sol ma i lo.

²³ Lama nang pulua i vus, ma Judare o velilo pel ma o rirum ol a Sol ipunrinnga.

²⁴ Aveto Sol i nongpola ole riong aken, ako nge nang na mlik elonga Judare o mit tetal a rem pomnga a so thekiki elonga mo o ri ve o pun rin a Sol.

²⁵ Aveto Sol ile wainlangaere o wola i pemlik a rem a lokpo la, aka o oma i nge um. Ma o pamenu i a alal aolonga lemi ma o pamonlolou i la.*

Sol i voth a Jerusalem.

²⁶ Ma Sol i es a Jerusalem ma i ri ve i voth tomo nge a Jisas ile wainlangaere. Aveto o ngange nge i, eneke olemi ve ini a Jisas ile wainlanga avele.

²⁷ Aveto Barnabas i wol ol i a pakekere nge la. Ma i rirum ol or nge aka Sol i thepolo Toko Pomnga a so. Ma Toko Pomnga i ria i. Ma Barnabas i rirum mun ole nge a Sol aka i panongpol engeng nge a Jisas iion aka a Damaskus.

²⁸ Mako Sol i voth tomo nge or a Jerusalem, mako i es tomo ol nge or ma toko e avele i mit rupal i. Na i ngeip avele na i panongpol engeng nge a Toko Pomnga iion.

²⁹ Ma ikei paenal tomo nge Grikre aka o lotu tomo nge Judare, aveto o ri ve o pun rin i.

³⁰ Na toko lemioongare o nongpola venen aken, ma o mitu i a Sisaria la. Mako o pake ol i a Tarsus la.

³¹ Mako nge wop alavusnga aka ru a Judia, Galili na Samaria, lotu kene i tho senu ol. Eneke toko e avele i pakerenga or. Ma lotuong i velpol ma i engeng. Ma Oni Riringa i opoal or, mo oa titaling i esa, na o pavothal ol nge a Toko Pomnga nge ole menong.

Pita i pamimi toko aka iion a Ainias.

³² Pita i esu esa a rem elonga, na nang omole aka i eso a rem pomnga a Lida, mo aro i voth tomo nge toko lemioongare aka ru nge.

³³ Nge rem aken i thopolu toko e aka iion a Ainias aka i ngo ma ini peti i motung-tung, i pavurvur e tovu po or limme.

³⁴ Ma Pita i ria i ve, "Ainias ponange Jisas Krais i pamimi werer mun wong.

* 9:25: Aro o thepol ur ake ia sei nge pes 443.

Mita mo nakrumu lom ring." A ur e avele, nako toko aken i mita, ma i sivenga werer.

³⁵ Ma toko alavusnga aka ru a Lida na epee a Saron o thepol i ma o eksing olemi ma o panes a Toko Pomnga.

Pita i palos werera a Tabita.

³⁶ Nge rem aka a Jopa, seng lemioonga aka iion a Tabita i voth nge. Nge Grikre okei o apet i ve ini a Dorkas. Seng ake i oma omaing sivenga evelelnga, na i opoal toko na seng areko ole ur elonga avele.

³⁷ Ma nge nang aken ini multhang, makola ini ile rinong. Ma ilengare o panunu i ma vus, ma o potuna i ma o pangoa tel i a vel lemi roronga mo o thepol tel itheki.

³⁸ Na rem a Lida na Jopa oa wop kene i mela e pel avele. Na Jopa a toko lemioongare o nongpol aka Pita i voth a Lida. Ma o pakepot toko or aini mo o song nge a Pita. Ma o ria i ve, "Paviri a them nge me."

³⁹ Mako Pita i losa ma i panes or paini. Ma o es ma o velpol. Ma o wola i a vel lemi roronga la. Na a vel lemi aken i vuul nge basbasuere ma o tang na o pathengal a Pita nge tekruk na seltun areko Dorkas i oma i nge aka rongan i mimi.

⁴⁰ Ma Pita i pakepot or a lalanga la, ma i koru ieve na i nong, lama itheki leltun seng aka ru i rin, na i ria ve, "Tabita, ong mita!" Ma seng aken itheki lema ma i thepol a Pita, ma i losa ma i men.

⁴¹ Ma Pita i krima imeni ma i palosa i, ma i mita. Ma Pita i leng toko lemioongare na basbasuere ma i sung werer a Dorkas a or nge, ma i mimi ol.

⁴² Ma riong aken i kima a pen alavusnga aka ru a rem pomnga a Jopa. Ma toko na seng pulua olemio nge a Toko Pomnga.

⁴³ Ma Pita i voth nge nang pulua a Jopa, tomo nge toko aka ini mekerem peti omanga aka iion a Saimon.

10

Ensel i velpoltun a Kornilius.

¹ Na toko omole aka i voth a Sisaria kene iion a Kornilius. Na ini mukalinga nge punongare or mule pa mule aka ini

Romre. Na oa punonga avlung kene o apet i ve ini “Itali angare oa punonga avlung”.*

² Na ome ile vel lemiare o lotual a God. Na i sung sung umtun a Juda areko ole ur elonga avele. Na evelelga i nong a God nge.

³ Nge nang omole ako nang meta i el or me nge penie. Ma i thepol ur aka ranga ve ini oni theong ma i thepol nine a God ile ensel i esu me ma i ria i ve, “Kornilius.”

⁴ Ma Kornilius i the rinrin i ma i ngeip. Ma i ri ve, “Toko Pomnga neke ake?”

Ma ensel aken i olal a Kornilius ve, “God i nongpol lom nongong ma i thopol lom vothung aka wong opoal areko ole ur avele. Ma rongan God ilemi rum ong.

⁵ Naro ong pakepot toko pelie a Jopa la mo o ortet toko aka iion a Saimon, iion aininga a Pita, naro o ria i mo i es me.

⁶ Toko aken i voth tomo nge toko aka ini mekerem peti omanga, iion mun a Saimon, ma ile vel i mit totho a rua wo peti.”

⁷ Na ensel aken i es ol. Mako Kornilius i lengpot ile omainga or aini na punonga omole. Ma punonga aken ini toko lutuunga, na evelelga i voth tomo nge a Kornilius.

⁸ Ma Kornilius i ritet or nge ur aka i velpol, mako i pake or a Jopa la ve aro o wol a Saimon Pita a i nge me.

Pita i thepol ur aka ranga ve ini oni theong.

⁹ Ma nge erangunga o es ma o totho a Jopa. Na nge penang Pita i roa a vel polemi aka i thatha[†] mo i nong.

¹⁰ Ma Pita mesipun i ma i sis ve i an. Aveto rongan o oma aning. Ma i thepol ur e aka ranga ve ini oni theong.

¹¹ I thepol Pen a Urvet aka i thep ma i thepol ur e aka i ranga ve ini seltun aolonga aka o kin i a ongepo alapenel ma o paesu i a sepsa ma i esu a ulue me.

¹² A ur aken lemi i vual nge mekerem pelekpolngna na mekerem areko o re nge oopo na menre.

¹³ Na i nongpol lenging e aka a i nge ve, “Pita, wong mita mo so rin or mo an i.”

* **10:1:** Punonga avlung i pavurvur nge toko or 600.

† **10:9:** O thepol vel polemi ia sei nge pes 121.

¹⁴ Aveto Pita i ri ve, “Toko Pomnga tho pavurvur avele! I pavurvur aro tho an aning aka them Judare them pil nge, kene avele.”

¹⁵ Ma i nongpol mun lenging paininga aka i ri ve, “Ur aka God i ri ve i sivenga, aken mothong tova ong ri ve i kerenga.”

¹⁶ Ur aken i velpol pa or me. Lamako i lo werer mun a Pen a Urvet la.

¹⁷ Ma Pita ilemi pelekpol nge ion theng mirenga. Na tokokoe areko Kornilius i pake or la o velpol. Ma o nin tokokoere nge a Saimon ile vel, mako o mitu ol a ile vel thekia.

¹⁸ Ma o leng ve, “Saimon Pita i voth ake, eve avele?”

¹⁹ Rongan Pita ilemi rum nge ion theng mirenga, ma God Ioni Riringa i ria i ve, “Toko or me ake ru o ortet ong.

²⁰ Vene na losa mo esu la mo es tomo nge or. Mothong tova lomum mulmulal, tho re ake, tho pake or me.”

²¹ Mako Pita i esu a tokokoe areken nge la, ma i ria toko aken ru ve, “Tho re ake ini toko aton ru thomu o or i! Thomu o es nge neke?”

²² Ma o ria ve, “Kornilius aka ini punongare ole mukalinga e, i pake them me. Ini toko vengvenga aka i lotual a God, na ini toko aka Judare o papomnga i. Na God ile ensel omole aka i ria i ve aro ikei song nge ong mo aro wong es a ile vel la. Mo i nongpol lom riong pelie.”

²³ Ma Pita i nongpoo or ma o koro la. Ma i theal or nge pemliknga aken. Mako erangu ma i panes or ma toko lemioonga pelie aka o voth a Jopa o es tomo nge or.

Pita i es a Kornilius ile vel.

²⁴ Ma o es, makola o ngou pemlik omole a so, lamako o losa, makola o velpol a Sisaria. Na Kornilius ome ilengare tomo nge toko pelie aka i nongpoo or, ma o menetal or.

²⁵ Ma Pita i totho ol aka aro i koro, ma Kornilius i es a i nge ma i koru ieve na ipo tiru.

²⁶ Aveto Pita i palosa i ma i ri ve, “Mita, tho ake, tho ini toko inga.”

²⁷ Ma Pita i ri tomo nge i, na ru o eso a vel lemi la ma i thepol toko na seng pulua ako o men velilo pel.

²⁸ Ma Pita i ria or ve, “Lomum mire senu lale ako ve, nge lemem patorong ini vothung kereng tova Juda e aro i voth tomo nge toko aka ini Juda avele. Na i pavurvur aro i estun or avele. Aveto God i ria tho ve, i pavurvur aro tho ria ve toko e i kerenga na tho pavothal nge i kene avele.

²⁹ Vene make tho mothongal nge lomu riong avele, ma tho nongal lomu riong, make tho es me. Na tho nina thomu, i vava ake keumu song tho, e?”

³⁰ Ma Kornilius i ri ve, “Ur e aka i velpol a tho nge, nge nang or me aka i vus lale, kene i vene: Tho voth a lek vel, ma tho nong nge aka nang meta i el or me. Na a ur e avele nako toko e i mitu a thekik lemi. Ma ia neong i tolilis.

³¹ Ma i ri ve, ‘Kornilius, God i nongpol lom nongong ma i thopol lom vothung aka wong opaal areko ole ur avele. Ma God ilemi rum ong.

³² Wong pake toko pelie aka a Jopa mo o song nge toko aka iion a Saimon na iion aininga a Pita. I voth a toko aka iion mun a Saimon aka ini mekerem peti omanga, ma ile vel i mit totho a rua wo peti.’

³³ A ur e avele na keik song nge wong me. Ma i sivenga aka ong nongal them ma ong es me. Make ponange them alavusnga them velilo ake a God itheki, nge aka aro them nongpol riong aka Toko Pomnga i ria wong nge ve aro wong ria them nge.”

Pita i panongpol nge riong a Kornilius ile vel.

³⁴ Pita i patea ile riong vene, “Ponange lemik mire ol aka ve, i nunganga, God kene i therum toko e avele. Toko alavusnga o vur e pel inga.

³⁵ Na nge rem alavusnga ake ru a ulue, areko o pavothal nge i na o oma vothung vengvenga, aro i nongpoo or.

³⁶ Ava lomumu mire nge a God ile riong aka i pakeu i a Israelre nge. Ini Panongpolong Sivenga, aka o el lemi moring tomo nge a God, aka nge a Jisas Krais aka ini toko elonga oa Pomnga.

³⁷ Lomumu mire nge ur aka i velpol ma i eso a pen alavusnga aka a Judia. I patea a Galili nge wop lemi aka Jon i panongpol or nge paninuong.

³⁸ Lomumu mire mun nge a Jisas aka ini Nasaret anga, aka God i ateal i ma i sungu Ioni Riringa na ile engenging a i nge. Ma i es a pen elonga ma i oma senu nge toko na sengre. God i voth a i nge, mako i pamimi areko o voth a Satan imeni.

³⁹ “Na them ini toko aka them thopol i, make them panongpol nge ur aka i oma i a pen elonga aka ini Judare ole na a rem pomnga a Jerusalem mun. Na o sotuna i a won ngoronga nge ma o pun rin i.

⁴⁰ Aveto nang or me i vus ma God i palos werera i nge rinong ma i pavelpol mun i a thekimem.

⁴¹ Ma i pavelpol i a toko alavusnga nge avele. Ini inga them tokokoe areko nomenga God i ateal them ve aro them thepol i aka i los werera a vuvepun. Ma them an na them thin tomo nge i.

⁴² Ma i pator them nge riong panongpolng a toko na sengre nge. Mo them ritet i nunganga aka ve, i re inga ake ini toko aka God i ateal i mo aro i velpol ini riong nongpolng a nge tokokoe areko o mimi na areko o rin lale mun.

⁴³ Ine God ile riong elnga nomenganga alavusngare o ritet nge i. Ma o ri ve, toko alavusnga areko o avav nge a Jisas iion, na olemio a i nge, God aro ilemi simikal vothung kerengare.”

God Ioni Riringa i eso a tokokoe areko or ini Judare avele.

⁴⁴ Rongan Pita i ri, nako Oni Riringa i eso a toko alavusnga areko ru o nongpol ile riong.

⁴⁵ Juda a lemioongare aka o panes a Pita a Jopa me, o kukuk nge aka God i sungu ile sungong aka ini Ioni Riringa a toko na seng rel relnga munre nge.

⁴⁶ Na olemi mire aka ve, Oni Riringa i eso a or nge, eneke o nongpol aka o ri nge keieng rel relnga na o paesa God iion roro.

Ma Pita i ri ve,

⁴⁷ “Anga i pavurvur aka aro i mit roal or nge paninuong nge thei? Eneke o el mun Oni Riringa ranga ve ini mun i it.”

⁴⁸ Ma i pator or ve aro o paninu or nge a Jisas Krais iion. Lamako o nina i ve aro i voth tomo tel nge or nge nang pelie mun.

11

Toko lotuongare ako ro a Jerusalem o nongpol a Pita ile riong.

¹ Ine pakekere na toko lemioongare a pen alavusnga aka ru a Judia o nongpol aka ve, toko relnga pelie olemio nge a God ile riong lale.

² Ma Pita i esa a Jerusalem, ma areko o engeng nge vothung ake ru nge toko ini peti isnga, o vol i.

³ Ma o ria i ve, “I vava ake, wong es long a toko rereli areko o is ole avele, na wong avsa ler patorong, nako ong an tomo mun nge or.”

⁴ Ma Pita i rirum senu or nge ur alavusnga aka i velpol, ma i ri ve,

⁵ “Nge wop lemi aka, tho voth a rem pomnga a Jopa ma tho nong. Ma tho thepol ur aka ranga ve ini oni theong. Ma tho thepol ur aka ranga ve ini seltun ma o kin i a ongepo alapenel ma o paesu i a Pen a Urvet me ma i esu totho a tho nge me.

⁶ Ma tho the senuo a seltun aken lemi. Ma tho thepol mekerem ulue anga aka o voth nge. Ako ranga ve ini olep na mekerem mun pelie na menre.

⁷ Ma tho nongpol lenging aka ve, ‘Pita, ong mita mo so rin or mo an i.’

⁸ “Aveto tho ri ve, ‘Toko Pomnga, tho pavurvur avele. Ur areko i kerenga na them Judare them pil nge, na tho an rum i rongan na i pavurvur aro i eso a wok lemi avele.’

⁹ “Aveto tho nongpol mun lenging aininga aka i esu a Pen a Urvet me, ma i ri ve, ‘Ur areko God i ri ve i sivenga, aken mothong tova ong ri ve i kerenga.’

¹⁰ Ma ur aken i velpol pa or me, lamako i lo werera mun a Pen a Urvet la.

¹¹ “Palolo avele, nako toko or me aka o pake or a Sisaria me, o velpol a vel aka tho voth nge.

¹² Ma Oni Riringa i ria tho ve, ‘Ong panes or na mothong tova lomum mulmulal.’ Ma toko lemioonga or limae areke o es

tomo nge tho. Ma them es la mo them eso a Kornilius ile vel lemi.

¹³ Na i rirumu i a them nge ve, ensel e aka i mita a ile vel lemi. Ma i ri ve, ‘Ong pake toko e a Jopa la mo i song nge a Saimon aka iion aininga a Pita mo i es me.

¹⁴ Mo aro i sungu riong pelie a wong nge. Mo aro wong na lomngare aro God i pamimi thomu.’

¹⁵ “Ma tho patea lek riong ma palolo avele, nako God Ioni Riringa i eso a or nge. Ranga ve mun i nomenga aka i eso tel mun a it nge.

¹⁶ Mako lemik rumu mun a Toko Pomnga ile riong aka i ri ve, ‘Jon i paninu thomu nge thei. Aveto aro God i paninu thomu nge Ioni Riringa.’

¹⁷ Nomenga aka nge ler lemioong nge a Jisas Krais ma God i sungu Ioni Riringa a it nge ranga ve ini ile sungong. Ranga ve mun aka God i sungu mun ile sungong aken nge areko or ini Judare avele. Na tho ini ao, aka aro tho mit roal a God, e?’ Ma Pita i ri re venen aken.

¹⁸ Ma o nongpol a Pita ile riong. Ma o modopu ol ole voling, na olemi sivenga na o risea a God. Na o ri ve, “I nunganga aka God i sungu mun ur aken nge areko or ini Judare avele, ve aro o eksing olemi mo o el mimiong aka aro ile vusonga avele.”

Lotu ile velpoling ponganga a Antiok.

¹⁹ Nomenga aka o pun rin a Stiven ma matheong aolonga i velpoltun lotuong. Ma toko lemioongare o lo mether a pen elonga aka a Ponisia, Saiprus na Antiok. Ma o panongpol inga aka ini Judare oenga.

²⁰ Aveto toko lemioonga pelie aka ini a Sairini na Saiprus o es a Antiok, na o panongpol mun nge toko rereli areko or ini Judare avele. Ma o ri or nge Panongpolong Sivenga nge a Jisas aka ini oa pomnga.

²¹ Toko Pomnga ile engenging i voth tomo nge or. Ma toko na seng pom olemio nge na o eksing olemi a Toko Pomnga nge.

²² Lama panongpolong aken i kimapot a lotuongare aka a Jerusalem. Mako o pakepot a Barnabas a Antiok la.

* ^{11:23:} Pakeke 4:36 i ritet mun nge a Barnabas.

²³ Ma i velpol ma i thepol a God ile themosaling ako i voth a or nge. Ma ilemi sivenga. Ma i paengeng* mun toko na sengre, mo olemi i ngo pis ol a Toko Pomnga nge evelelnga.

²⁴ Na Barnabas ini toko vengvenga, ma God Ioni Riringa i vual a i nge. Ma ile lemioong kene i engeng ma toko pulua ako o eso a Toko Pomnga nge.

²⁵ Lamako Barnabas i es a Tarsus mo i ortet a Sol.[†]

²⁶ Ma i thepolo i ma i wol i a Antiok la. Ma or paini o voth tomo nge toko lemioongare ako a Antiok nge tovu po omole. Ma o patorial toko na seng pulua. Ako a Antiok or tel o apet toko lemioonga areken ve ini “Kristen” aka i mirenga ve, or ini a Krais ile.

²⁷ Nge wop lemi aken God ile riong elnga pelie o losa a Jerusalem ma o esu a Antiok la.

²⁸ Ma God ile riong elnga omole ako o apet i ve ini a Agabus i mita. Ma Oni Riringa i vual a i nge ma i ritet nge mesi aolonga aka aro i velpol panen nge rumrem alavusnga ake ru a ulue. (Mesi aolonga aken i velpol nunganga nge wop lemi aka Klodius i voth ini nepes.)

²⁹ Mako toko lemioongare o rirum aka aro o sung umtun a toko lemioongare nge aka a Judia la, i pavurvur nge ole opoaling omole omole.

³⁰ Lamako o pakepot ina Barnabas ome a Sol ma o pasungalu umtun aken a or paini nge mo aro o el i a lotuonga a mukalingare nge la.

12

Herot i so rin a Jems na i paeso a Pita a mang a midenga lemi.

¹ Nge wop lemi aka Herot* i voth ini nepes, na i patea ile vothung aka i rere ine toko lemioonga pelie mo i pamem kerere or.

² Ma i ri ma o rere a Jems, aka ini a Jon itein, ma o so rin i nge bainat.

³ Ma Herot i thepol aka Judare olemi sivenga nge a Jems isorinnga, mako i ria mo o rere mun a Pita. I oma ake nge

* ^{11:25:} Tovu po or mule aka i vus lale nge a ves 9:30. Antipas aka i sorotetpot a Jon ikei.

nang pelie aka Judare o oma oa aning ako o an bret aka o pango yis aka ini bret pawimpotnga nge avele.

⁴ Ma o rere a Pita ma o paeso i a mang a midenga. Ma i sungu i a punonga avlung or penel aka o teporal pel nge ithealtetal-nga. Ma toko penel o voth nge avlung omole omole. Na Herot ilemi aka ve, aro Punseleainga a Aning aka o apet mun i ve ini Pasova i vus tel. Lamoko aro i pamitu ol a Pita nge riong a toko na seng otheki lamo i so rin ol i.

⁵ Mako Pita i voth a mang a midenga lemi ma o theal total i, aveto evelelnga toko lemioongare o nong engeng nge a God ve aro i opoal i.

Ensel i eltetpot a Pita a mang a midenga lemi.

⁶ Nge pemliknga aka aro rulpou aka aro o pamit ol a Pita nge riong, i ngou a punonga or aini oa wop na o kin imeni nge sen or aini, omole i es a punonga e nge, na epee i es a punonga aininga nge. Na punonga pelie mun aka ru o theal total mun mang a midenga thekia.

⁷ A ur e avele, nako Toko Pomnga ile ensel i esu, ma pen lalanga aolonga i velpol a mang a midenga lemi. Ma ensel i montuno i a itelipo ma i pamimeta i. Ma i ria i ve, “Wong surpol viri.” Mako sen or aini aken o moluspot a Pita imeni.

⁸ Lama ensel i ria ve, “Mita mo kino om let na teuno lom esonga.” Ma Pita i oma i aka ranga ve ensel i ria i nge. Lama ensel i ria mun i ve, “Teunu lom tekruk seltunnga mo panes tho.”

⁹ Ma Pita i korispot a mang a midenga ma i panespot i la. Aveto Pita ilemi mire ur ake ru ensel i oma i a i nge, i nunganga eve va avele. Pita i rivenga ake ini ioni theong.

¹⁰ Ma or paini o es la, ma or paini o selea toko avlung omole lama aininga lamako o espot ol a vel thekia. Ma vel thekia aken isivenga i theppot. Ma or paini o es ol a rem pomnga la. Ma or paini o espot a so thekiki. Na a ur e avele, nako ensel i penthal rusa a i nge.

* ^{12:1:} Herot ake ini a Herot Agripa 1. Na ini a Herot

¹¹ Ma Pita ilemi rum ako i velpol ol. Ma i ri ve, “Ponange, lelik mire ol aka God i pake ile ensel, make i eltetpot tho a Herot imeni na nge ur elonga aka Judare olemi ve aro o oma i a tho nge.”

¹² Ilemi ol nge ur aken, nako i es ol a Maria ile vel la aka ini a Jon Mak inina. Ma toko pulua o velilo pel a vel aken ma o nong nge.

¹³ Ma Pita i es ma i pitroo a vel thekia, ma seng omainga omole aka iion a Roda i espot mo i theppot vel thekia.

¹⁴ Ma i nongpolo ma i ate a Pita ikei. Ma ilemi sivenga nge ave i theppot vel thekia avele, na i tho werer ma i ritet ve, “Pita ake ru i mit a lalanga.”

¹⁵ Ma o ria i ve, “Sapang ngongong wong?” Aveto i engeng ma i ri ve, “Avele, i nunganga, i aka ru i mit.” Ma o ri ve, “Ake ini ile ensel.”

¹⁶ Aveto Pita aka ru rongan i pitrongrong inga. Lama o theppot vel thekia. Ma o thepol i ma o kukuk nge.

¹⁷ Ma Pita imeni vutun or mo o poreng. Ma i rirum ol or nge ur aka Toko Pomnaga i eltetpot i a mang a midenga lemi. Ma i ri ve o ria Jems[†] na toko lemioongare nge ur ake. Lamako i espot ma i es ol a pen relnga la.

¹⁸ Ma rulpou ma mit tetalongare o ri mengmeng avele. Olemi pelekpol, na o ri ve, “Pita i es ol vana la?”

¹⁹ Ma ina Herot i ri ma o kath a Pita, ave o thepolo i avele. Mako i ria ma o pamit mit tetalongare nge riong na o so rin or.[‡] Lamako Herot i plosa a Judia ma i esu a Sisaria ma i voth ol nge.

Herot i rin ol.

²⁰ Na Herot ilemi kling nge toko na seng areko ru a Tair na Saidon. Mako o apetpot pelie mo o velilo pel ma o es a i nge, mo o pavengveng ole ripeling. Mako o ri tel nge a Blastus, aka ini mukalinga aka i theal a Herot ile vel. Ma i mit okime ma o nina i nge mo o pavengveng ilemi klinga aken mo i vus, eneke oa aning kene o el re aka ru a Herot ia ulue.

[†] **12:17:** Jems ake ini a Jisas itein ma i velpol ini toko mukalinga nge toko lemioongare a Jerusalem. [‡] **12:19:** Romre ole vothung nge mit tetalonga i vene: Aro ve o theal senu tokokoe areko o voth a mang a midenga avele, aro o pun rin or.

²¹ Ma nge nang e aka Herot i ateal i, i teunu ia nepes a malmaling, ma i men a ia nepes a menonga. Ma i ri riong a toko na seengre nge.

²² Ma o nongpol ile riong ma o ri ve, “Ini toko ile riong ake avele, ini god omole aka ile riong ake.”

²³ A ur e avele, nako Toko Pomnaga ile ensel i paeso ni multhanging aolonga a i nge. Ma webeng o an ilemi ma i rin, eneke i ria or avele aka aro o papomnaga a God inga, aveto i rial areko o papomnaga isivenga avele.

²⁴ Ma God ile riong i engeng ma i song a pen elonga.

²⁵ Na Barnabas ome a Sol o sungu umtun ma vus a lotuongare nge aka a Jerusalem ma or paini o wol a Jon Mak ma i lo werer tomo ol nge or paini la.

Pol i panongpol nge a Jisas ile riong aka a pen epee rel relnga

13 (Vonge 13:1-21:14)

O pake a Barnabas ome a Sol nge lotuong a omaing.

¹ Ako a lotuongare a rem aka a Antiock nge, God ile riong elnga pelie na patoralinga pelie or aka ru o voth. Areko oion a Barnabas na Simeon aka iion aininga a Niger aka i mirenga ve, ni pokuku rutunga, na Lusius aka ini Sairini anga. Na Manain (ako ithanga a Herot aka i theal pen epee aka), na Sol mun.

² Ma o lotu nge a Toko Pomnaga na o sem nge aning. Na God Ioni Riringa i ria or vene, “Thomu o ateal a Barnabas ome a Sol nge omaing aka tho ateal or paini ve aro o oma i.”

³ Vene na o sem nge aning na o nong, ma o ronga omeni a or paini nge, ma o pake or paini la.

Pol ile panongpolong a esong tel telnga.

*Sol ome a Barnabas o panongpol nge
Panongpolong Sivenga a Saiprus.*

⁴ Ma God Ioni Riringa i pake a Barnabas ome a Sol ma o es a Selusia. Ma or paini o ro a imot nge. Ma imot i pasong or paini a Saiprus la.*

⁵ Mako o velpol ol a rem pomnga a Salamis, ma or paini o panongpol nge a God ile riong a Judare ole lotuonga a vel, ma Jon Mak i voth tomo nge or paini mo aro i opoal or paini.

⁶ Ma or paini o es a pen elonga ako ru a mtho aken. Makola mulal nge rem ako iion a Papos. Ako ru a Papos o thepolo toko omole aka iion a Barjisas. Ini toko nong tungtangonga na ini toko Juda na ini riong elnga le apaltetonga.

⁷ I voth tomo nge ithanga aka ini mtho aken a mukalinga e, iion a Sergius na iion mun a Paulus. Ini toko aka ile mire i aolonga. Ma i leng a Barnabas ome a Sol me. Eneke ia pun aka ve, aro i nongpol a God ile riong.

⁸ Aveto toko nong tungtangonga aken i kelelal or paini. (lion nge Grikre okei ini Elimas) Ma ia pun aka ve, i eksing mukalinga ilemi mo i mothong tova ilemio nge.

⁹ Aveto Sol aka o apet mun i a Pol, aka God Ioni Riringa i vual a i nge. Ma i the rinrin toko nong tungtangonga aken, ma i ri ve,

¹⁰ “Wong ini a Satan itun! Wong ini ngarang nge vothung vengvenga elonga. Na vothung kerenga i vual a wong nge. Na wong kene ong ri ve wong eksing a Toko Pomnga ile Panongpolong Sivenga mo ini riong le apaltetonga.

¹¹ Ponange re ake Toko Pomnga imeni aro i esa inga a wong nge, naro thekum pros mo wong thepol ol nang ile toong avele, aro wong voth ol palolo ol avele.”

A ur e avele, nako ur e aka ranga ve ini sepsa midenga i pasopal itheki, ma itheki pros sele. Ma i omrang pelekpol ipo. Ma i ortet toko e aka aro i pathengal i nge so.

¹² Ma mukalinga i thepol ur aken, ma ilemio nge a Jisas, eneke i kukuk nge patoraling aka nge a Toko Pomnga.

* ^{13:4:} Saiprus ini a Barnabas ile rem tepun. O thepol a Pakeke 4:36. † ^{13:22:} 1 Samuel 13:14

Pol i um a Antiok aka ru a Pisidia.

¹³ Na Pol tomo nge areko o panes i, o losa a Papos. Ma imot i el or a Perga aka a epee a Pampilia. Aveto Jon Mak i lolel or ma i lo werer a Jerusalem la.

¹⁴ Ma o losa a Perga ma o es ma o velpol a Antiok aka a epee a Pisidia. Ma nge nang rialonga o eso a Judare ole lotuonga a vel ma o men nge.

¹⁵ Lama lotu a mukalingare o titalpot a Moses ile patorong. Na God ile riong elngare ole riong. Ma o pasong ol okei nge a Pol ome i thangangaere. Ma o ri ve, “Titeikre aro ve lomu riong e aka aro o paengeng toko na seng ole mi nge, aro thomu o ripot i.”

¹⁶ Ma Pol i mita, ma i osea imeni mo o poreng. Ma i ri ve, “Thomu Israelre na thomu areko thomu ini Judare avele aka o lotual a God, thomu o nongpol tho.

¹⁷ God aka ini Israelre ole, i ateal tite-vimemre, ma i oma or ma o velpol mo o pom, nge wop lemi aka o menalo a Isip aka nge kinong. Na nge ile engenging aolonga i el werer or a Isip ma o es me.

¹⁸ Na o voth pen polpolnga ma i pavurvur nge tovu po or mule pa penel. Ma God i el matheong nge ole vothung nge ole esong aken.

¹⁹ Na nge wop lemi aken i pavus net or limai aka ini Judare avele nge ulue epee aka o apet i ve ini a Kenan ma i sungu i a ile tokokoere nge ma ini ole ol.

²⁰ Ma ur alavusnga ake i mulal nge tovu po or 450.

“Lamako i sungu riong nongpolngare a or nge ma o voth ma i pavurvur nge wop lemi aka God ile riong elnga a Samuel i velpol.

²¹ Nge wop lemi aka o nina ol nge nepes e. Ma ina God i sungu ol a Sol aka ini a Kis itun a or nge ma ini nepes ol. Ma ini a Benjamin ile net ma i voth ini nepes i pavurvur nge tovu po or mule pa penel.

²² Aveto God i eltetpot i, ma i ateal a Devit ve ini nepes ma i ri nge a Devit ve, ‘Tho thepol a Devit aka ini a Jesi itun, na ini toko aka i engeng ve aro i panes lemik

alavusnga, naro i oma ur alavusnga areko tho sis ve aro i oma i.’ †

²³ “Na nomenga ako God i kin ile riong tomo nge Israelre ve aro i pake toko e ako ini a Devit ilenga mo aro i pamimi or. Toko aken i velpol lale ini a Jisas.

²⁴ Na Jisas i patea ile omaing rongan, na nge wop lemi aken Jon i panongpol Israelre ve aro o modop ole vothung kerenga na o el paninuong.

²⁵ Totho ol aka aro Jon aro i pavus ol ile omaing, ma i ria or ve, ‘Thomu o rivenga tho ini ao? Tho ini toko aton ru thomu o men tetal i, kene avele. Aveto thomu o nongpol! Toko aton i aka ru i rumongal me. Na tho pavurvur aro tho es totho a ilo sei mo aro tho inospot ile esonga a we, kene avele.’

²⁶ “Titeikre, na thomu aka ini a Abraham ititeviere, na thomu tokokoe areko or ini Judare avele ake ru o lotual a God, panongpolong aka i ri nge pamimingera, aken God i sungu i a it nge me lale.

²⁷ Na toko na seng areko o voth a Jerusalem tomo nge oa pompomere or alavusnga olemi mire senu avele aka Jisas ini toko aka aro i el werer or. Na olemi rum senu nge a God ile riong elnga nomengangare ole riong areken avele, aka o tital i na o nongpol i evelelnga a Judare ole lotuonga a velre. Aveto o teltun ia. Ma o oma i vene ake ranga ve aka God ile riong elnga nomengangare o ri nge ve aro o oma i.

²⁸ Ma o thepol vet vothung kerenga e aka i oma i mo o so rin i nge, kene avele. Aveto o nong a Pailat nge ve aro i so rin i.

²⁹ Ma o oma ur alavusnga areken ranga ve aka nomenga God ile riong elnga nomengangare o wat i nge i, lama nge aken o eltetu i a won ngoronga nge, mako o paeso ol i a vuvepun.

³⁰ Aveto God i palos werera i e rinong.

³¹ Nge nang pulua aka i velpoltun tokokoe areko o es tomo nge i a Galili aka a Jerusalem. Na ponange o panongpol nge i a toko na seng areko or ini Israelre.

³² “Na them panongpol thomu nge Panongpolong Sivenga vene: Ur ake kene nomenga God i kin ile riong ve aro i sungu i a titevirre nge.”

³³ Make ponange i sungu i a it nge ako ini titevirre otutunre, nge aka i palos werera a Jisas nge rinong. Ako ranga ve voing aininga aka i voth a Buk Song i ri nge. Ma i ri ve,

‘Wong ini Tuk,

na ponange tho ini Tomom
ako tho pavelpol wong.’ *Buk
Song 2:7*

³⁴ Ma God i ri nge aka i palos werera i nge rinong naro i pavurvur aro i rin mun avele. Make Toko Pomnga i ri nge nomenga ve,

‘Aro tho sungu ol ur sivesivenga a thomu nge

ako nomenga tho kin lek riong tomo nge a Devit nge.’ *Aisaia 55:3*

³⁵ Na nge erere epee mun e i ri nge ve, ‘God, ong pavurvur aro wong mothongglelu lom Toko Riringa
mo i plotu a vuvepun avele.’ *Buk
Song 16:10*

³⁶ “Na nge aken ina Devit i oma omaing ranga ve aka God i ria i nge, nge wop lemi aka rongan i mimi. Lamako i rin ol. Ma o tetunu i a ititeviere olo sei. Ma ini peti i plotu aka ru a vuvepun.

³⁷ Aveto toko ake ini a Jisas aka Toko Pomnga i palosa i nge rinong kene i plot avele.

³⁸ “Na thomu titeikre aro lomumu mire senu aka ve, them panongpol thomu nge Panongpolong Sivenga ve, Jisas i pavurvur aka aro i eltetpot lomu vothung kerenga.

³⁹ Ina Moses ile patorong i pavurvur aro pavthopot thomu nge lomu vothung kerenga avele. Aveto aro ve lomumuo nge a Jisas, aro i pavthopot thomu nge lomu vothung kerenga.

⁴⁰ Vene na thomu o nakalal thomu, eneke ur areko ine God ile riong elnga nomengangare o ri nge, aro vene mo i velpol a thomu nge. Na o ri vene:

⁴¹ ‘Nongpol! Thomu toko kelelangare, thomu aro o kukuk naro o rin.
Eneke aro tho oma omaing aolonga a thekumu
ako i pavurvur aro lomumuo nge
avele,
tova toko e i panineu senu i a thomu nge.’” *Habakuk 1:5*

⁴² Pol ile riong i vus lama Pol ome a Barnabas o toth ako aro o korpot a Judare ole lotuonga a vel aken, lama toko na sengre o ria mun or paini ve, "Nge nang rialonga mun e ako, aro thomu paini o es mun me mo o panongpol mun them nge ur aken."

⁴³ Lama or alavusnga o korpot a Judare ole lotuonga a vel aken. Ma Juda pulua tomo nge toko rereli mun pulua ako o eso nge Judare ole lotu, o panes a Pol ome a Barnabas, ma or paini o paengeng mun or, mo o krim bibim a God ile themosaling aken.

⁴⁴ Nge nang rialonga rumongalinga aken, i toth ako aro toko na seng alavusnga aken ru a rem pomnga aken, o velilo pel mo o nongpol a Toko Pomnga ile riong.

⁴⁵ Aveto Juda mun pelie ako o thepol toko na seng pom aka o velilo pel, ma olemi i ngo tangatun. Na olemi kling na o wathalal a Pol ile riong ma o kelelal i.

⁴⁶ Aveto Pol ome a Barnabas o ngeip avele, ma o ri engeng a or nge ve, "I sivenga aka them paini them sung tel a God ile riong a thomu nge. Aveto thomu o lelpot kimomu nge riong ake. Ma siven-gomu o ri ve, 'Them pavurvur avele aka aro them el mimiong aka aro ile vusonga avele.' Na ponange aro them paini aro them pamu a tokokoe areko or ini Judare avele.

⁴⁷ Eneke Toko Pomnga i pator them paini ve,

'Tho pamen wong ve aro wong ini pen
lalanga

a toko relngare nge.

Mo ong ini sovengalo a toko na seng
areko a ulue
ako aro God i el werer or nge.' "Aisaia

49:6

⁴⁸ Ma toko na seng areko or ini Judare avele, o nongpola ma olemi sivenga ma o risea nge a Toko Pomnga ile riong. Na toko na seng areko God i ateal or ve aro o el mimiong aka aro ile vusonga avele, o velpol ini toko lemioongare.

⁴⁹ Ma Toko Pomnga ile riong i esa a pen alavusnga aka a epee aken.

⁵⁰ Aveto Judare o ri ololo mukalingare nge rem aken tomo nge seng areko or ini

seng kimangare na o lotual a God mo aro o pakerenga a Pol ome a Barnabas. Ma o pakealalpot or paini a ole pen la.

⁵¹ Ma or paini o tepluspot oeve a vuvus. Ako i paateal aka ve, o oma vothung kerenga nge or paini. Lamako o es ol a rem aka ini a Aikoniam.

⁵² Ma toko lemioongare aka a Antiok o vual nge lemi sivengaing na nge a God Ioni Riringa.

14

Pol ome a Barnabas o oma omaing aka ru a Aikoniam.

¹ Lamako Pol ome a Barnabas o eso a rem aka ini a Aikoniam. Ma or paini o oma mun ranga ve aka o oma i a Antiok. Ma o eso a Judare ole lotuonga a vel lemi. Ma o panongpol ma ole panongpolong kene i pun oopo, ma Judare ome areko or ini Judare avele, or pulua ole mio nge a Jisas.

² Aveto Juda pelie areko oni plong nge eksingong o pavurpol areko or ini Judare avele, na o palemi pelekpol or nge toko lemioongare.

³ Ma or paini o voth palolo mun tie aka ru o Aikoniam. Na or paini o ngange avele, ma o panongpol engeng nge a Toko Pomnga a Jisas, na i sungu mun engenging a or paini nge, mo aro o oma pakukukaling na pathepolong pelie, maken aro i panunganga ole riong aka nge ile themosaling.

⁴ Ako a rem aken toko na sengre o omreu pel. Ma pelie o suptun Judare na pelie o suptun pakekere.

⁵ Lama toko rereli pelie ome Judare o los tomoa nge oa pompomere. Ma o teltun pakekere oa, mo aro o pakerenga or ma o pun rin or nge um.

⁶ Aveto or paini o nongpoli lale, mako or paini o lo nge rem pomnga aini aka e iion a Listra na e iion a Derbe. Na rumrem areken o ngo tothaloo a epee aka a Likonia.

⁷ Ma nge wop aken or paini o panongpol nge Panongpolong Sivenga.

Pol ome a Barnabas o oma omaing aka ru a rem a Listra.

⁸ Na aka ru a rem a Listra toko omole aka i voth ma ieve lil vet aka i inina i pop i nge, na i pavurvur aro i es avele.

⁹ Na i men ma i nongpol a Pol aka i panongpol nge riong. Ma Pol i thepol i aka ile lemioong i pavurvur aka aro ieve i sivenga werer. Mako i the rinrin i.

¹⁰ Ma i ria i viringa ve, “Wong mit vengvenga!” Mako i opthoa lamako i esu esa ol.

¹¹ Ma toko na seng pulua aka o thepol ur aka Pol i oma i ma o presa na o ri nge Likoniare okei ve, “Thepol godre o velpol ranga ve ini toko ma o esu a it nge me.”

¹² Ma o apet a Barnabas ini a Sus aka ini Grikre ole god iion, na Pol ini toko rionga, taro aka o apet i ve ini a Hermes aka ini Grikre ole god aka i el riong a godre nge.

¹³ Ma god a Sus ile lotuonga a vel i mito a rem wopo ma ine pris aka ini a god a Sus ile, i ela kolkolung punpolngare mai ti bulmakaure ma o es ma o mitu a lotuonga a lok thekia, mako i tomo nge toko na sengre, o sis ve aro o ongtun ole sungong mo o lotual or paini.

¹⁴ Ma Barnabas ome a Pol o nongpola riong aken, ma oni plong nge, na olemi kling, mako o inra ole teunong ma o tho la ma o mitu a toko na sengre oa lemimi, ma o presa ve,

¹⁵ “Thomu tokokoere, i vova ake thomu o oma vene ake, them paini ini toko ne-neanga aka ranga ve ini thomu. Them paini them es ake me mo them panongpol nge Panongpolong Sivenga. Mo aro thomu o mothong lelu omaing kerenga areken na o eksing mo o eso a God nge aka i mimi, aka i oma sepsa na ulue na thev na ur elonga aka i voth nge.

¹⁶ I nunganga aka nomenga i punapoaltun toko na seng alavusnga ma o panes vet inga aka ini osivenga olemi.

¹⁷ Aveto i punapoaltun or selele avele, evelengi i pathengal or nge isivenga ma i oma vothung sivenga nge or. Ma i paesuvit a sepsa me, na i pavropol ur oinga nge nang po, ma i sungu aning a thomu nge, ma i pavual thomu nge lemi sivengaing.”

¹⁸ Or paini o oma riong aken, aveto toth aka toko na sengre aro o oma sungong a or paini nge, aveto or paini o engeng nge omitroalnga.

¹⁹ Aveto ine Judare pelie aka a Antiok na Aikoniam o es me. Ma o ri ololo toko na

sengre olemi mo o pun rin a Pol nge um a rem pomnga lemi. Ma o montetpot i a lalanga la ma o rivenga i rinaltet lale.

²⁰ Aveto toko lemioongare o es ma o mit kalalual i, mako Pol i mita ma i es werero a rem pomnga la. Lama nang mun e ma Pol ome a Barnabas o es a rem pomnga a Derbe.

Or paini o lo werer a Antiok a epee aka a Siria.

²¹ Ma Pol ome a Barnabas o panongpol nge Panongpolong Sivenga a Derbe. Ma toko na seng pulua aka o eksing olemi. Lamako or paini o lo werer a Listra na Aikoniam na Antiok.

²² Ma or paini o paengeng toko lotuongare olemi mo o mit engeng nge ole lemioong. Ma o ria or ve, “Aro te el tel matheong pulua ake ini sovengalo aka aro te eso a God ile menong e nepes.”

²³ Ma or paini o sem na o nong, lamako o pamem lotu a mukalingare a rumrem na o sungu areko olelio nge a Jisas, a Toko Pomnga imeni.

²⁴ Lamako or paini o eso a epee a Pisidia la, makola o velpol a Pampilia.

²⁵ Ma aka ru a epee a Pampilia or paini o panongpol nge riong aka ru a rem a Perga lama o esu ol a rem a Atalia la.

²⁶ Ako ru a Atalia or paini o ro a imot nge. Ma or paini o song werer a Antiok la. Nge pen aka nomenga toko lemioongare o sungu or paini a God imeni ve aro i themosal or paini nge ile omaing aka o oma i lale.

²⁷ Na or paini o velpol a Antiok. Ma o velilo toko lemioongare. Ma or paini o ritet nge ur areko God i oma i a or paini omeni. Mako i thep mun sovengalo nge areko or ini Judare avele mo olelio nge i.

²⁸ Ma or paini o voth palolo tomo nge toko lemioongare.

15

Pathunong aolonga nge lotu aka a Jerusalem. Na o ri ve Moses ile patorong panesnga i pavurvur aka aro i pamimi toko avele.

¹ Aveto toko pelie aka ole a Judia o es a Antiok ma o oma riong pelie aka a toko

lemioongare nge. Ma o ria or ve, “Aro ve thomu o panes a Moses ile vothung nge ile paatealing nge toko ini peti isnga avele, aro God i el werer thomu avele.”

² Ma Pol ome a Barnabas olemi kling nge or. Ma o pun pel nge riong. Ma ine toko lemioongare o ovengpot inga Pol ome a Barnabas na toko mun pelie mo o es a Jerusalem mo o pavengveng riong aken, tomo nge pakekere na mukalingare.

³ Ma ine toko lemioongare o pake or la, ma o eso a epee ako a Ponisia na Samaria. Ma o ritet toko lemioongare a rem or aini aken ve, God i eksing toko pelie aka or ini Judare avele olemi, ma toko lemioongare olemi sivenga.

⁴ Ma o es ma o velpol a Jerusalem. Ma pakekere na toko lemioongare na ole mukalingare o pathokeal or. Ma Pol ome a Barnabas o ritet or nge ur areko God i oma i nge or paini omeni.

⁵ Aveto toko lemioonga areko o votu tomo nge toko avlung aka o apet i ve ini Parisi. Ma o mita, ma o ri ve, “I sivenga aka aro o el paatealing aka aro o is ole. Naro thomu o paengeng or nge riong aka aro o panes a Moses ile patorong.”

⁶ Ma ine pakekere na mukalingare o men velilo pel ma o pavengveng riong aken.

⁷ Na nge aken o ri pompom e pel lama Pita i mita ma i ria ve, “Titeikre, lomum mire nge aka nomenga God i atealpot tho a it nge ve aro tho sung Panongpolong Sivenga a tokokoe areko or ini Judare avele mo o nongpol i ma olelio ol nge.

⁸ Na God ilemi mire nge toko na sengre olemi. Ma i pathengal it aka i elo mun or a i nge, mako i sungu Ioni Riringa a or nge, ranga ve aka i sungu i a it nge.

⁹ Ma i pathengal it ve them Judare na tokokoe areko or ini Judare avele o rel avele. Na olelio ol a i nge ma i papon-ganga olemi.

¹⁰ Na i vava ake thomu ri ve o tongporum a God, e? Thomu o mothong tova o kino matheong aken a toko lemioongare okei po aka ini a Moses ile patorong panesnga. Nomenga nge titevirre na it mun

i pavurvur aro te potun matheong aken avele.

¹¹ Avele, lemira ko ve God i el werer it nge a Toko Pomnga a Jisas ile themosalang. Ranga ve aka i el werer or a i nge.”

¹² Na Pita ile riong i vus ma toko na seng alavusnga aka ru o pathun, o men poreng ol inga na aka ru o nongpol a Pol ome a Barnabas ole riong aka or paini o ritet nge pathepolong na pakukukaling pulua aka God i oma i a or paini omeni a tokokoe areko or ini Judare avele otheki.

¹³ Mako o ri ma i vus. Mako Jems i ria ve, “Titeikre, o nongal lek riong.

¹⁴ Ma Saimon i ritet ma vus nge aka God i eso a tokokoe areko or ini Judare avele, na i ateal toko na seng pelie aka ru a or nge ve aro ini ile.

¹⁵ Na God ile riong elnga nomengangare ole riong i vene mun inga aken. Ma o wat vene:

¹⁶ “Mako Toko Pomnga i ri ve,
‘Panen aro tho lo werer me.
Na Devit ile vel* aka i matu
aro tho pamit werera mun i,
na vel a ur elonga i kerenga
aro tho oma werer mun i
na tho pamit werera i.

¹⁷ Vene na toko alavusnga ake ru a ulue aro o or a Toko Pomnga.

Ako ini toko na seng areko or ini Judare avele

ako tho ateal or lale mo aro ini lek.
Na ini a Toko Pomnga aka i oma ur areke,

na i ri vene re aken.’ *Amos 9:11-12*

¹⁸ Na nomenga God i pavelpol riong aken na lemimem mire nge lale.”

¹⁹ Lama Jems i ri mun ve, “Vene na lemik kene i vene: Te mothong tova te sungu matheong aka nge a Moses ile patorong panesnga nge tokokoe areko or ini Judare avele, nge areko o eksing olemi a God nge.

²⁰ Avele, naro te wat inga malueng omole a or nge la. Mo te ria or, mo o mothong tova o an aning aka o sungu tel i a avalare nge, eneke i riri avele. Na o lel okime nge vothung aka nge toko na seng aomnga. Na o mothong tova o an mekerem aka ia mla i te a ilemi. Na o mothong tova o an mla.

* ^{15:16}: Devit ile vel mirenga aka ve ini ititeviere, na Jisas ini a Devit itevinga.

²¹ Eneke nomenga ma me ponange mun nge nang rialonga elonga o tital a Moses ile patorong a Judare ole lotuonga a vel lemi. Na nge rem alumlumnga elonga toko mun pelie ako o panongpol nge a Moses ile patorong ve aro o mothong tova o oma vothung areken.”

O pasong okei nge toko mun pelie ako or ini Judare avele ako or ini toko lemioongare.

²² Vene ake, mako pakekere na mukalingare na toko lemioongare, or alavusnga olemi omole inga ma o therumpot ole toko pelie. Ako aro o pake or a Antiok tomo nge a Pol na Barnabas. Ma o therumpot a Judas ako iion aininga a Barsabas na o therumpot mun a Sailas. Eneke toko lemioongare o papomnga or paini.

²³ Ma ine pakekere na mukalingare o wat malueng ma o sungu i a or nge mo o el i a Antiok la. Ma ole malueng i ri vene: Them pakekere na mukalingare, them ini titeumuere.

Them wat malueng ake a thomu nge ini tokokoe areko or ini Judare avele ako ini toko lemioongare ako o voth a Antiok na Siria na Silia.

Them ri ve rulpo titeikre,

²⁴ Them nongpol riong pelie ako ve, ine toko mun pelie ako a them nge o es a thomu nge ma o pakerenga lomumu nge ole riong pelie. Na o palemi pelekpol mun lomumu. Aveto them ria or venen aken avele.

²⁵ Ma them nongpola riong aken, ma lemimem omole inga ako ve, them therumpot riong elnga pelie mo them pakepot or a thomu nge, mo o es tomo nge a Barnabas ome a Pol aka emem sagu or paini.

²⁶ Ma or paini o ngeip nge ole mimiong avele ako o panongpol nge a ar Pomnga a Jisas Krais iion.

²⁷ Vene make them pake a Judas ome a Sailas mo o ripot mun i nge owo mo ole riong i ranga ve ine lemem riong aken ru a malueng ake.

²⁸ God Ioni Riringa na them, lemimem omole ma them ri vene: I pavurvur aro them sungu ol matheong mun e avele a

thomu nge. Ave aro thomu o panes inga patorong areke:

²⁹ Thomu o mothong tova o an aning ako o sungu tel i a avalare nge. Na thomu o mothong tova o an mla. Na thomu o mothong tova o an mekerem ako ia mla i te a ilemi. Na o lel kimomu nge vothung ako nge toko na seng aomnga. Na i sivenga aro thomu o geltet vothung areken. Na lemem riong i mul re vene ake. I re aken.

³⁰ Lamako o pake ol toko riong elnga areken ako ru a Antiok la. Ma o Pavelilo ol toko lemioongare ma o sungu ol malueng aken a or nge.

³¹ Ma toko na seng o tital malueng, ma oleli sivenga nge panongpolong sivenga aken ako o paengeng or nge.

³² Lamako, Judas ome a Sailas, o ri palolo a toko na seng lotuongare nge. Ma o paengeng or mo aro o ngeip avele, eneke or paini ini a God ile riong sung esnga.

³³ Ma or paini o voth palolo mun tie ako a Antiok. Lamako toko lemioongare o ri ve o nak ol i. Mako o pake werer ol or paini a tokokoe areko o pake or paini a or nge.

³⁴ Aveto Sailas i ri ve i voth reletun a Antiok.

³⁵ Na Pol ome a Barnabas o voth palolo a Antiok, ma or paini na toko mun pelie o patorial or na o panongpol or nge a Toko Pomnga ile riong.

Pol ome a Barnabas o thusu ol pel.

³⁶ Lama o voth palolo, lamako Pol i ria Barnabas ve, “Aro it aini te lo werer a rem pomnga elonga a toko lemioongare nge, aka nomenga te panongpol or nge a Toko Pomnga ile riong, mo te porum vet nge or aka o voth senu eve avele.”

³⁷ Ina Barnabas ilemi aka ve i wol a Jon Mak mo i es tomo nge or.

³⁸ Aveto Pol ini plong ve aro i es tomo nge or, eneke i ri ve, “Nomenga toko ake tomo, i lo ar a Pampilia. Na i vus tomo nge it nge ler umong avele.”

³⁹ Ma or paini o vol rumal pel nge toko aken. Taro ake or paini o thusu ol pel. Ma Barnabas i wola ol a Mak ma i es tomo ol nge i. Ma or paini o roa ol a imot nge ma o es ol a Saiprus la.

⁴⁰ Na Pol i wol a Sailas ma or paini o es. Na toko lemioongare o ri ve, “Naro Toko Pomnga ile themosaling aro i voth tomo nge thomu paini.”

⁴¹ Ma o eso ako ru a Siria na Silisia. Ma o paengeng toko na seng lemioongare.

Pol ile panongpolong a esong aininga.

16

Timoti i es tomo nge a Pol ome a Sailas.

¹ Na Pol i es alpo a Derbe ma i velpol a Listra. Na toko lemioonga omole aka i voth nge, iion a Timoti. Na inina ini seng lemioonga aka ini seng Juda, aveto itema ini toko Grik.

² Ine toko lemioongare aka ru a Listra na Aikoniam o ri ve, Timoti kene ile vothung sivenga.

³ Ma Pol i sis aka ve, i wol tomo a Timoti mo i es tomo nge or paini. Mako Pol i ria ma o is ile, eneke ine Juda alavusnga areko ru o voth a rem alavusnga areken, olemi mire aka Timoti itema ini toko Grik.*

⁴ Na o es a rem pomnga alavusnga. Ma o sung riong aka pakekere na mukalingare o rirum i a Jerusalem a toko lemioongare nge mo o panes i.

⁵ Taro ake toko lemioongare ole lemioong i velpol mo i engeng. Na nge nang elonga toko lemioongare oa titaling i esa.

Pol ioni the toko Masedonia anga.

⁶ Ma o es mo o omre patu epee a Prigia na epee a Galesia lemi pat. Eneke God Ioni Riringa i rial or nge Panongpolong Sivenga panongpolnga a Esia.

⁷ Mako o es mala mulalnga a Misia a ulue wopo ma o ri ve o es ol a epee a Bitinia. Aveto Jisas Ioni i rial or.

⁸ Ma o selelepot a Misia na o es teleku ol a Troas la.

⁹ Nge pemliknga, Pol ioni the aka toko Masedonia anga aka i mit ma i ri engeng a Pol ve, “Es a epee a Masedonia me, mo wong opoal them.”

* ^{16:3:} Aro ve o is ile avele aro Judare o pavurvur aro o nongal ile riong avele. † ^{16:12:} Masedonia i ongepo or penel ma Pilipai i voth a ongepo epee a mukaling.

¹⁰ Pol ioni the venen aken, mako a ur e avele na them monsi mo aro them es a Masedonia, eneke lemimem aka ve, aken ini a God ile lenging aka aro them panongpolnge ile Panongpolong Sivenga a or nge.

Lidia i eksing ilemi ma ile mimiong i engeng ol a Pilipai.

¹¹ Mako them ro a imot nge a Troas ma imot i mon vengveng a Samotres la. Ma nge erangunga i monu ol a Neapolis.

¹² Mako them lospot nge rem aken ma them velpol a Pilipai. Ini rebo aka ini Romre ole, na i voth a rem a Masedonia ongepo† epee mukalinga. Na them voth nge nang pelie.

¹³ Na nge nang rialonga them espot a rem pomnga a mavupoa, ma them es a thei ma them rivenga pen aka ru Judare o nong nge kene i voth nge. Ma them thepol sengre aka o men velilo pel nge. Ma them men ma them ri tomo nge or.

¹⁴ Seng omole aka i nongpol lemlem riong, iion a Lidia, aka i lotual a God. Ini seng rem pomnga anga aka iion a Taiataira, na ini seng aka tokokoere o ol neong uvuvnga sivenga a i nge. Na God i thep ilemi nge a Pol ile riong nongalnga.

¹⁵ Mako o paninu i tomo nge ile vel lemiare. Ma i nongpoo them ve, “Na eve lomum ve lek lemioong i nunganga a God nge mo aro thomu o es me mo o voth tomo ol nge tho a lek vel.” Na i engeng ol nge them aka aro them panes rum ile riong.

Pol ome a Sailas o voth a mang a midenga a Pilipai.

¹⁶ Na nge nang omole e aka them es a wop aka o nong nge. Ma seng umonga omole i sangpolo them. Seng aken tamata kerenga i voth a i nge, aka aro i pamilem ur areko aro i velpol panen. Ma tokokoere o ol i mo i ria or nge ur areko aro i velpol a or nge panen. Na tokokoe areko o theal seng aken kene o el umtun pom nge ile omaing aken.

¹⁷ Ma seng aken i panes a Pol tomo nge them. Ma i presa vene: “Ine tokokoe areke ini a God aka i pomnga rintet ile

omaingare. Ma o panongpol thomu nge a God ile so aka aro i el werer it nge.”

¹⁸ Ma nge nang elonga seng aken i oma inga venen aken. Lama Pol ilemi kling ol ma i eksinga ma i ria tamata aken ve, “Tho nong wong nge a Jisas iion aro wong lopot a seng aken nge!” Na a ur e avele na tamata kerenga aken i lopot a seng aken nge.

¹⁹ Lama tokokoe areko o theal seng aken olemi mire aka ve, aro o el ol umtun nge seng aken avele. Mako o es la ma o rere a Pol ome a Sailas, ma o montet or paini ma o pamit or nge riong aka ru a rem lemi a toko pulua otheki.

²⁰ Ma o paes or paini a Romre ole riong nongpolngare nge ma o ri ve, “Toko aini ake ini Judare, or paini kene o pakerenga toko na sengre ole menong a ler rem.

²¹ Or paini o patoral toko na sengre nge vothung areko i voth nge them Romre lemem patorong avele. Na i pavurvur aro te panes i avele.”

²² Na toko na sengre mun o valelal mun vothung kerenga nge or paini, ma ine riong nongpolngare o inra or paini ole teunong na o ri ve, mo o so litlit or paini.

²³ Ma o vilval or paini lamako o paeso or a mang a midenga. Lama o ri engeng nge toko aka ru i mit tetal mang a midenga thekia ve, “Wong theal senu senu or paini.”

²⁴ Mit tetalonga i nongpol riong engenga aka o sungu i a i nge, ma i paeso or paini a mang a midenga lemi ol la, ma o sing tuntun oeve nge won mathenga.

²⁵ Na nge pemlik lopat, Pol ome a Sailas o nong ol na o vo a God nge. Na toko mun pelie aka ru a mang a midenga o nongpol or paini.

²⁶ Na a ur e avele na wiring aolonga i velpol ma i tik mang a midenga a wovikvekre. A ur e avele mun na mang a midenga thekia alavusnga o thep. Na toko kinongare o mounpot, a mang a midenga lemi.

²⁷ Mako mit tetalonga i mimeta ma i thepol aka mang a midenga thekia i thep. Ma i rivenga tokokoe areko ru o voth a mang a midenga o lo lale. Mako i turusa ile bainat ma i toth aro i pun rin isivenga.[‡]

²⁸ Aveto Pol i leng viringga ma i ri ve, “Wong mothong tova o pakerenga siven-gom! Them alavusnga ake ru rongan them voth.”

²⁹ Ma mit tetalonga i pres nge theki lalainga ma i tho a lemi, ma sawir i. Ma i ulu isivenga totho a Pol ome a Sailas oeve tepun.

³⁰ Mako i wolpot or paini a lalanga la. Ma i nina ve, “Thomu paini, aro tho oma nekenga aka aro God aro i el werer tho, e?”

³¹ Ma or paini o olal ile ninong ve, “Aro ve lomumo a Toko Pomnga a Jisas, maken God aro i el werer ong ome tutumre.”

³² Ma or paini o panongpol Toko Pom-nga ile riong a i nge na areko ru o voth a ile vel.

³³ Mako i wola or paini nge pemliknga re aken, ma i paut ole kolok, ma palolo avele, nako o paninu i tomo nge ile vel lemiare.

³⁴ Lamako i wol or paini a ile vel, lama i sung aning a or paini nge, ma o an i. Na i tomo nge itutunre o vual nge lemi sivengaing, eneke olemio a God nge.

³⁵ Lama rulpou ma riong nongpolngare o pake lososthongare ma o ria mit tetal-longa ve, “Inospot toko aini aken mo o es.”

³⁶ Mako mit tetalonga i ria Pol ve, “Riong nongpolngare o pake riong me ve wong na Sailas o losa mo o es, eneke o ekris thomu lale mo nak ol lomu esong la.”

³⁷ Aveto Pol i olal ole riong ve, “Them paini ini toko Rom na them oma vothung kerenga e avele. Na o so them a pulua otheki lemi. O aseso them a mang a midenga. Ma o nongpol tel lemem riong avele. Na o ri ve o pake kinepot them, e? Aro avele! Aro ine riong nongpolngare ini Romre oenga aro o es me mo o wolpot them.”

³⁸ Ma lososthongare o pasong werer riong a riong nongpolngare nge. Ma o

[‡] **16:27:** Romre ole vothung nge mit tetalonga i vene: Aro ve o theal senu tokokoe areko o voth a mang a midenga avele, aro o pun rin or. O thopol Pakeke 12:19. **§ 16:38:** Romre ole patorong i ri vene: Aro ve toko ini toko Rom na aro ve o pamit i nge riong rongan, i pavurvur aka aro o paeso tel i a mang a midenga lemi avele.

nongpol ako Pol ome a Sailas ini toko Rom. Ma o ngeip, eneke o avsa Romre ole patorong. §

³⁹ Mako o es la ma o ri mosnga ol nge or. Lama o wolpot ol or a mang a midenga, ma o ria ol or paini ve, "Thomu o lospot nge rem pomnga ake."

⁴⁰ Mako or paini o espot a mang a midenga lemi ma o es ol a Lidia ile vel la. Or paini o thepol toko na seng lemioongare ma o paengeng mun olemi nge riong pelie lamako o es.

17

Tesalonaika angare o ri ve o so a Pol ome a Sailas.

¹ Ma Pol ome a Sailas o es a rem pomnga a Ampipolis na Apolonia makola o reletun a Tesalonaika. Na Judare ole lotuonga a vel ako i voth nge.

² Na Pol i panes ile vothung ako ranga ve i oma i opisleonga aka i eso a Judare ole lotuonga a vel. Ma nge nang rialonga or me i ri tomo nge or nge erere nomenganga.

³ Mako i panineu or nge a God ile riong mirenga aka toko aka God i ateal i, aro i el sisong naro i rin mo aro i plos werera mun. Ma Pol i ria ve, "Jisas ake ini toko aka tho panongpol thomu nge, ini toko aka God i ateal i ve aro i el werer it."

⁴ Ma riong aken i pun Juda pelie oopo. Ma o eksing olemi. Mako o panes ol a Pol ome a Sailas. Ma ine Grik pulua mun aka o lotual a God, o paneso mun or paini. Ma seng kimanga pulua mun tie o oma mun venen aken.

⁵ Aveto Judare o thopol puluare aka o lopot a or nge ma olemi ngo senu avele. Mako o ri ololo toko kerenga pelie aka o voth polpol a rem lemi mo o mit tomo nge or. Ma o pavurpola tokokoere aka ru a rem pomnga lemi ma or alavusnga o mat rupalo a Jeson ile pen, mo o wolpot or paini a toko na sengre nge la.

⁶ Aveto o thepol or paini avele. Ma o wetepot a Jeson na toko lemioonga pelie aka ru a rem alumlumnga a mukalingare nge, mo o mit nge riong, na o pres ve, "Tokokoe areke o oma vothung kerenga a pen elonga. Na or ol ake o es ol a ler pen me.

⁷ Ma ina Jeson i nongpoo or a ile vel. Na toko areken alavusnga o wathalal ine nepes a Sisar ile patorong. Ma o ri ve nepes relnga e aka i voth ma iion a Jisas."

⁸ Ma ine toko na seng pulua tomo nge mukalingare o nongpol riong aken ma o ri pompom nge.

⁹ Vene, mako mukalingare o oma i ma Jeson ome toko lemioongare aro o olu ole korpotong nge umtun moro aken aro o modop or mo o es.

Pol ome a Sailas o panongpol a Beria.

¹⁰ Na nge pemliknga aken toko lemioongare o pakepot a Pol ome a Sailas, ma o es a Beria. Ma or paini o velpol nge, ma o eso a Judare ole lotuonga a vel.

¹¹ Ma Beria angare olemi nine ma o mukal nge Tesalonaika angare. Ma oleli sivenga nge riong nongpolnaga. Ma evelelenga o tital erere nomenganga mo aro oleli mire senu nge riong aka Pol i ri nge, i nunganga eve avele.

¹² Vene, make Judare pulua olelio nge a Jisas. Na seng kimanga pulua mun aka ini Grik olelio mun nge. Na toko Grik pulua mun.

¹³ Lamako Juda areko o voth a Tesalonaika o nongpola aka Pol i panongpol a God ile riong a Beria mun. Mako o es mun a rem aken la, mako o pasulung mun toko na sengre oleli, mako o pavurpola oleli nge a Pol ipunnga.

¹⁴ Mako toko lemioongare o pakepot a Pol a rua wo la. Aveto Sailas ome a Timoti o voth a Beria.

¹⁵ Mako tokokoere o mit a Pol a soven-galo ma o mulal a Atens. Ma nge ole lo wererong a Beria la, Pol i riu or ve, "Aro Sailas ome a Timoti o es viri viri a tho nge me."

Pol i panongpol nge riong a Atens.

¹⁶ Ma Pol rongan i men tetal or paini a Atens. Ma i thepolo a rem alumlumnga aken i vual nge ur vivina ma ilemi ngo senu avele.

¹⁷ Mako i eso a Judare ole lotuonga a vel, ma i ri tomo nge Judare na areko or ini Judare avele aka o lotual a God, mako i panine oleli. Ma nge nang elonga i esu a pathunonga a pen. Ma i ri tomo mun nge areko o velpol.

¹⁸ Na toko lemi mireonga pelie ako o apet or ve ini Epikurian na Stoik o pun pel nge riong tomo nge a Pol. Mako pelie o ria ve, "Toko lemi aulunga ake i ri neke aken?" Ma pelie o ri ve, "Ava i panongpol nge a god ako ini rem relngare ole." O ri venen aken, eneke Pol i panongpol nge a Jisas nge ile los wereraing nge rinong.

¹⁹ Ma o wol a Pol ma o velpol nge tete ako mukalingare o pathun nge, ako iion a Areopagus. Na o ria i ve, "Them ri ve lemimem mire senu tel nge patoraling ponganga aken ru wong ri nge."

²⁰ Eneke them nongpol lom riong ma them rov i ma i rel. Make them ri ve lemimem mire senu nge riong aken mirenga."

²¹ Ma toko alavusnga aka ini Atens angare tomo nge rem relnga pelie ako o voth a Atens o oma ol omaing pelie ol e avele. Ma o rorestun ol inga rurumong nge ur ponganga aka o nongpol i.

²² Ako a Areopagus, Pol i mita aka ru a mukalingare otheki. Na i ria a or nge ve, "Thomu toko Atens angare tho thepol i aka ve, thomu ini tokokoe areko lomumu i aalonga nge lotu."

²³ Na tho eso a lomu rem alumlumnga lemi ma tho thepolo ur areko thomu o lotual ir. Ma tho thepolo sungong a lek-leka aka o wato nge ve, 'Ake ini a god aka lemimem mire nge avele ile.' Na God ake lomumu mire nge avele, aveto thomu o lotual polpol inga i. Na ponange tho panongpol thomu nge i.

²⁴ "God aka i oma ulue tomo nge ur alavusnga aka ru i voth nge, ini a God aka ini nepes aka i theal a Pen a Urvet na ulue. Na i pavurvur aro i voth nge lotuonga a vel aka toko i oma i nge imeni avele.

²⁵ Na i kene i oror nge ur e avele mo aka te sungu ur pelie a i nge. Toko e i pavurvur aro i opoesal i avele. Ienga inga aka i sung mimiong na ur alavusnga a toko alavusngare nge.

²⁶ Na nge toko omole inga aka i pavelpol toko alavusnga, ma i pamen or a pen alavusnga ake ru a ulue. Na i oma toko rongan, aveto i paateal nang aka aro o mimi nge na oa ulue wopoalnga a rumrem

ako ru o voth nge.

²⁷ I oma venen aken mo aka aro o ortet i, ma eve o engeng nge iortetnga mo aro o thopol ol i eve avele. Aveto i voth mela nge it omole omole avele.

²⁸ Toko e aka i ri vene, 'Ienga inga aka ini mimiong tepun, make te esu esa na te velpol ini toko.' I ranga ve ini lomu toko watinga i ri nge ma i ri vene, 'Na it alavusnga ini itutunre.'

²⁹ "Na it ini a God itutunre. Mo te mothong tova te ri ve God ini ur vivinga aka o oma i nge gol na silva na anral aka toko i oma i nge imeni nge ile mire.

³⁰ Nomenga olemi mire nge a God avele. Na God kene i ri pompom nge ur areko o oma i nomenga avele. Aveto ponange i ri engeng tokokoere a rumrem elonga ve aro o lel okime nge ur alavusnga aka i kerenga.

³¹ Eneke i rongu nang omole aka aro toko ulue anga alavusngare aro o mit nge riong. Na i ateal toko omole aka lale ve aro i mukal nge riong nongpolnga aken. Ma ile nongpolong aken aro i vengveng rintet. Ma i pathengal ur aken a toko alavusngare nge, nge aka i palos werera riong nongpolnga aken nge rinong."

³² Ma o nongpola ia riong aka toko i los werera nge rinong. Ma pelie o ri silil nge a Pol. Na toko mun pelie aka o ria i ve, "Them sis aka ve, them nongpol mun wong aka aro wong ri mun nge riong aken."

³³ Taro ake Pol i losa nge ole pathunong aken ma i es.

³⁴ Aveto toko pelie aka o panes i ma ole mio nge a Jisas. Na oa omole aka iion a Dionisius ini mukalinga aka ru a Areopagus. Na seng e aka iion a Damaris tomo nge toko na seng mun pelie.

18

Pol i um a Korin.

¹ Lama Pol i losa a Atens ma i es a Korin.

² Ma i thepolo toko Juda omole aka iion a Akuila. Na ile rem tepun a Pontus. Nomenga tel aka i voth a Itali ma nepes aka ini toko Rom aka iion a Klodius i ri ve, "Thomu Judare o plospot a Rom mo o es." Lama Akuila tomo nge iewo sengenga

a Prisila o es ma o velpol inga a Korin ma Pol i thopolon or paini lama i es a or nge la.

³ Ma i voth ma i um tomo nge or, eneke ini ile omaing ako i el umtun nge aka i oma valvale aka ini sel ranga ve ini or paini.

⁴ Na nge nang rialonga elonga Pol i es a Judare ole lotuonga a vel ma i panine olemi. Ma ilemi aka ve, i ri ololo Judare na areko or ini Judare avele mo olemio nge a Jisas.

⁵ Na Sailas ome a Timoti o lospot a Masedonia ma o velpol a Pol nge a Korin. Mako Pol i panongpol nge Panongpolong Sivenga nge nang elonga. Ma i panongpol Judare nge riong engenga ve, Jisas ini toko aka God i ateal i ve aro i el werer ile tokokoere.

⁶ Aveto o nongal ile riong avele, na o oma mun riong kerenga pulua mun a i nge la. Mako i losa ol ma i thobirpot ol krom a ile teunong nge. Ake ranga ve i oma paatealing nge or nge aka oni silal Panongpolong Sivenga aka i sungu i a or nge. Mako i ria ve, "Aro ve thomu o penthal panen, akenna ini lomu omaing ol, na oma lek omaing a thomu nge lale, aveto thomu o nongal lek riong avele. Na ponange aro tho es ol a tokokoe areko or ini Judare avele."

⁷ Mako Pol i los lelpot or. Ma i es ol a toko aka ini Juda avele ile vel la, aka iion a Titius Jastus. Toko ake i lotual a God. Na ile vel i mit totho a Judare ole lotuonga a vel.

⁸ Na Judare ole lotuonga a vel a mukalinga aka iion a Krispus tomo nge ile vel lemiare olelio a Toko Pomnga nge. Ma Korin angare pulua o nongal a Pol ile riong ma olelio nge a Jisas ma o el paninuong.

⁹ Nge pemliknga omole aka Pol i thepol ur aka ranga ve ini oni theong, ma God i ria i ve, "Mothong tova ong ngeip naro ong ripot inga. Na ong mothong tova wom tum."

¹⁰ Eneke tho voth tomo nge wong. Toko e avele aro i oma tangatun nge wong. Lek toko na seng pulua aka o voth a rem pomnga ake."

¹¹ Mako Pol i voth tomo nge Korin angare, nge tovu po omole na ngov or limae.

Na i patoral or nge a God ile riong.

¹² Na nge wop lemi aka Romre o pamita a Galio ma i velpol ini epee a Akaia angare ole mukalinga, ma Judare olemi omole ma o rere a Pol ma o pamit i nge riong.

¹³ Ma ole apaltetpot nge riong na o ria ve, "Toko ake, kene i ri ololo toko na sengre olemi nge aka aro o lotual a God, nge vothung aka i avsa lemem patorong."

¹⁴ Ma Pol ia pun aka ve, i olal ole riong, aveto Galio i ria Judare ve, "Thomu Judare aro ve toko ake i oma vothung aka i kerenga rintet, i pavurvur aka aro tho nongpol thomu."

¹⁵ Aveto thomu o vol rum pel nge lomu riong na oion pelie na nge ur aka i voth a lomu patorong lemi. Ake ini lomu omaing ol. Sivengomu o pavengveng ol i a thomu ol nge. Tho, aro tho nongpol i avele."

¹⁶ Ma i ria or venen aken ma i vus. Lamako i pakealalpot or a lalanga la.

¹⁷ Ma o rere a Sostenes aka ini Judare ole lotuonga a vel a mukalinga ma o siso i aka ru a rionga a vel thekia, aveto Galio ilemi i voth nge avele.

Pol i lo werer a Antiok a epee a Siria.

¹⁸ Ma Pol i voth tomo nge toko lemioongare nge nang pulua aka a Korin. Lama i plospot ma i es tomo nge a Prisila na Akuila ma o velpol a Senkria ma Pol i utpot ipounga thoing, eneke i paateal i aka ve, riong aka i kin tomo i nge a God kene i vus lale. Lama o mon nge imot a epee a Siria la.

¹⁹ Lamako o otuno a Epesus. Lama Pol i los lelpot ol a Prisila na Akuila. Ma i es ol a Judare ole lotuonga a vel ma i ri tomo nge or.

²⁰ Ma o ria i ve aro i voth tel palolo tomo nge or. Aveto i ri ve i pavurvur avele.

²¹ Lamako i paioal ol nge or. Na i ri ve, "Aro ve God ia pun ve tho lo werer mun me, moro aken aro tho lo werer mun a thomu nge." Lamako i roa ol a imot nge a Epesus ma i monpot ol.

²² Ma imot i otuno a Sisaria. Ma Pol i ru a imot nge ma i es alpo a Jerusalem la. Ma i porumtet toko lemioongare. Lamako i alpo mun a Antiok la.

²³ Ma Pol i voth palolo tie aka ru a Antiok. Lamako i losa ma i esu esa aka ru

a pen elonga ako ru a epee a Galesia na Prigia. Ma i paengeng ol toko lemioonga alavusngare.

Apolos i panongpol nge riong a Epesus na Korin.

²⁴ Na toko Juda omole ako iion a Apolos ile pen a Aleksandria. Ma i velpol a Epesus. Ini toko aka ile riong kene i nine. Ini toko aka ilemi mire rintet nge a God ile riong aka ru a erere nge.

²⁵ Na i el pamirealing nge a Toko Pomnga ile sovengalo lale. Ma ile riong i mathe ma i engeng na i patorial toko na sengre nge. Na i ri vengveng or nge ur areko Jisas i oma i. Aveto ilemi mire inga nge a Jon ile paninuong.

²⁶ Ma i es a Judare ole lotuonga a vel ma i panongpol engeng nge. Ma Prisila ome a Akuila o nongpol i. Ma o wola i a ole pen la. Ma o panine mun i nge a God ile sovengalo vengvenga ranga ve aka Jisas i rin ma i los werera mun.

²⁷ Ma Apolos ia pun aka ve, i es a epee a Akaia. Na toko lemioongare aka a Epesus o paengeng i. Ma o wat malueng a toko lemioongare nge aka a Akaia. Mo o wolo i a ole pen la tova nge ile velpoling aka a Akaia. Ma i velpol ma i opoesal rintet areko olemio nge a Jisas nge a God ile themosaling.

²⁸ Ma Apolos i mit engengu a Judare otheki ma i olal ole riong alavusnga aka ru a pulua otheki. Ma i pavengveng olemi nge a God ile erere, mako olemi nine aka Jisas ini toko aka God i ateal i ve aro i el werer it.

Pol ile panongpolong a esong menga.

19

Epesus angare pelie o el a God Ioni Riringa.

¹ Apolos i vota a Korin, na nge wop lemi aken Pol i esu esa a ulue epee aken lemi pat, makola i velpol a Epesus ma i thepolo toko lemioonga pelie.

² Ma i nina or ve, "Nomenga aka o eksing lomumu, ma thomu o el Oni Riringa?"

Ma o olal i ve, "Them nongpol riong e avele aka ve, Oni Riringa i vota."

³ Mako Pol i nina mun or ve, "Na thomu o el paninuong le vanga?"

Na o ri ve, "Them el ake ini a Jon ile paninuong."

⁴ Ma Pol i ri ve, "Jon ile paninuong aken ini tokokoe areko o lel okime nge ole vothung kerenga ole. Ma Jon i ria toko na sengre ve aro olemio nge toko aka aro i rumongal a i nge, aka ini a Jisas."

⁵ Ma o nongpol riong aken, ma o el paninuong nge a Toko Pomnga a Jisas iion.

⁶ Ma Pol i ronga imeni a or nge. Mako Oni Riringa i eso a or nge. Ma o palav nge keiong rel relnga na o panongpol nge a Toko Pomnga ile riong.

⁷ Na tokokoe areken oa titaling i pavurvur nge mule pa omole pothoi or aini.

⁸ Ma Pol i eso a Judare ole lotuonga a vel lemi ma i ri engeng a or nge, nge ngov or me. Ma i panine olemi ma i ri ololo or mo aro olemio nge ile riong nge a God ile menong e nepes.

⁹ Aveto toko na seng pelie olemi rit na o avsa ile riong na olemio nge avele. Na aka ru a toko na sengre otheki o ri riong kerenga pulua nge a Toko Pomnga ile sovengalo aka Pol i ri nge. Mako Pol i losa ma i mothong lelu or na i wola inga toko lemioongare. Na nge nang elonga o es a Tiranus ile patorialinga a vel ma i patorial or nge.

¹⁰ Ma i oma omaing aken i pavurvur nge tovu po or aini, mako toko alavusnga aka ru a Esia o nongpola Toko Pomnga ile riong. Areko or ini Judare tomo nge areko or ini Judare avele o nongpol i.

Skeva itun tomonmonengaere o tongporum vet tamata kerenga wistetpotnga.

¹¹ Na God i oma pakukukaling rel relnga pulua a Pol imeni.

¹² Mako o el lavlav sivare aka Pol i girtet ini peti nge, mako o el i a ni multhangin-gare nge la, mako oa ni multhanging i vus. Na tamata kerengare o lopot a or nge.

¹³ Na toko Juda pelie aka o esu esa na ole omaing aka ini tamata kerengare wistetpotnga na pelie o tongporum tamata kerengare wistetpotnga nge a Jisas iion. Na o ri vene, "Nge a Jisas iion aka Pol

i panongpol nge, tho ria wong ve, ong lopot.”

¹⁴ Ma ine Judare ole Prisre oa Pomnga e ako iion a Skeva na itun tomonmonengaere or limai ako o oma vothung aken.

¹⁵ Ave tamata kerenga aken i olal ole riong ve, “Lemik mire nge a Jisas na lemik mire mun nge a Pol, aveto thomu ini ao?”

¹⁶ Na toko aken ru tamata kerenga i voth a i nge i opTho a or nge ma i siso or ma i thelal or. Ma i pakerenga oni peti ma oni amimla na oa neong i minrira na o lopot a vel alalilanga la.

¹⁷ Ma Judare na Grikre aka o voth a Epesus o nongpola ur aken ma o ngeip nge. Na o paesa Toko Pomnga a Jisas iion roro rintet.

¹⁸ Lama toko lemioonga pulua olemi rum werer nge ole vothung kerenga aka o oma i nomenga ma o pamilempot i.

¹⁹ Ma pulua aka o oma longung ma o elpot ole longung a erere ma o veliloal i na o ongtuna ol i a toko na sengre otheki. Ma o tital longung a erere iolonga ma i pavurvur nge 500,000 Kina.*

²⁰ Ma nge vothung areken Toko Pomnga ile riong i velpol engeng a pen elonga na pulua olemio nge.

²¹ Lama ur aken i vus ma Pol ilemi ve aro i es werer a epee a Masedonia ome a Akaia mo i reletun a Jerusalem la. Ma i ria ve, “Aro tho es tel a Jerusalem lamo panen aro tho es ol a Rom.”

²² Ma i pakepot toko or aini aka o um tomo nge i, e iion a Timoti na e iion a Erastus mo o mukal a Masedonia la. Na Pol i voth palolo mun tie a epee a Esia.

Epesus angare o onngatun a Pol.

²³ Na nge wop lemi aken aka a Epesus keiotong aolonga i velpol nge toko lemioongare aka o panes a Toko Pomnga ile sovengalo.

²⁴ Na toko omole aka iion a Demitrius, ile omaing aka i oma a god aka ini seng aka iion a Artemis ile lotuonga a vel a sei tutunenga. Ma i oma ur areken nge silva. Na ile omaingare o el umtun aka i mengmeng avele nge ole omaing aken.

²⁵ Ma i velilo toko omainga areken tomo nge tokokoe areko o oma mun omaing aken. Ma i ria or ve, “Lomumu mire aka te el umtun aolonga aka nge omaing aken.

²⁶ Na toko ake ini a Pol i ri ololo toko na seng pulua olemi. Ako ranga ve thomu o nongpol i na o thepol i lale. Na i oma inga ake ru a Epesus inga avele. Avele, i oma i pa omole moro i vus a pen alavusnga aka ru a Esia. Na i ri ve, god aka ru te oma i nge menir ini god nunganga avele.

²⁷ Ina Pol ile riong aken i pavurvur aka aro i pakerenga ler omaing aka te el umtun nge. Na e mun e, ile riong aken i pavurvur aka aro i pavthongal mun lotuonga a vel aka ini a god aka ini seng aka iion a Artemis ile. Na seng god aken aro i velpol ini ur polpolnga inga ake ru a toko na sengre olemi. Nomenga Esia a toko na seng alavusnga na pen alavusnga ake ru a ulue o lotual i.”

²⁸ Ma o nongpola riong aken ma olemi kling rintet nge ma o onnga. Ma o ri ve, “Artemis ini it Epesus angare ar pomnga aka i aolonga rintet!”

²⁹ I vene, make palaving aolonga i velpol a rem pomnga ma i amin. Ma toko na sengre o presa pres ma or alavusnga o vurpola ma o thepolo toko or aini aka ini a Gaius ome a Aristarkus. Toko or aini aken ini Masedonia angare aka o supo tomo nge a Pol, ma or alavusnga o montetpot or paini a wop aka ini tokokoere ole pathunonga.

³⁰ Ma Pol ia pun aka ve, i eso a toko na sengre oa lemimi la. Aveto toko lemioongare o mit roal i.

³¹ Na toko mukalinga pelie aka nge epee aken ini a Pol ithangangaere o pasong riong a i nge ma o ri engeng a i nge ve, i mothong tova i eso a pathunonga nge la.

³² Ma toko na seng alavusnga areken ole keking i aolonga. Ma pelie o pres nge riong e na oa pelie o pres nge riong relnga e, eneke or pulua aka olemi mire nge ur aka o es me mo o pathun nge, kene avele.

³³ Ma Judare o sivpot a Aleksander a mukaling la, mako olemi ve aro i sung riong pelie a or nge. Ma imeni vutun

* ^{19:19:} Grik 50,000 Drakma. Na Drakma ini umtun silva omole aka i pavurvur nge toko omole iolonga aka i um nge nang omole.

or mo o poreng mo aro i lel a tokokoere otheki nge ur aken.

³⁴ Aveto o ate ako ve ini toko Juda, mako or yusnga o presa omole inga ve, "Artemis ini it Epesus angare ar pomnga ako i aolonga rintet!" Ma o onnga vene aken palolo i pavurvur nge aua or aini.

³⁵ Lamako toko aka ini watonga nge rem pomnga aken i mita ma i ria toko na sengre ma o poreng na i ri ve, "Thomu Epesus angare, it alavusnga lemire mire nge aka it ini rem aka te theal lotuonga a vel aka ini ar pomnga a Artemis ile. Na te theal mun ia sei aka ini anral pavothalinga aka nomenga sapthalpot i a pen a urvet me.

³⁶ Naro toko e avele aka aro i kelelal nge riong aken. Naro thomu alavusnga o poreng. Na thomu o mothong tova o pavurpol polpola ur e aka tepun e avele.

³⁷ Ma thomu o pasong toko or aini ake me, aveto o kem ur e avele a ler lotuonga a vel lemi na or paini mun kene o ri sililang ler god aka ini seng aken avele.

³⁸ Na eve Demitrius ome ile omaingare oleli otun toko pelie nge riong, tokokoe areko ini riong nongpolngare aka ru o voth. Na rionga a vel mun aka ru i voth mo aro o pavengveng ole riong aken nge.

³⁹ Na eve lomu riong mun pelie i voth. I sivenga aka aro thomu o pavengveng i nge pathunong aka i panes ler patorong.

⁴⁰ Eneke i pavurvur aka aro Romre aro o teltun ar nge pathunong a sisopeling nge ur ake te oma i ponange. Na ur aken tepun e avele. Na aro ve o nina it nge velilopeling kerenga aken, aro te olal ol i a or nge vava?"

⁴¹ Ma toko watonga i ri ma i vus, lamako i pakepot or la.

20

Pol i es werer a Masedonia na Akaia.

¹ Ma volpeling aken ru a Epesus i vusu ol. Lama nge nang relnga ol e aka Pol i leng veliloalo toko lemioongare a i nge na i tor ol ole, nako i paioal ol or. Mako i losa ol mo i es ol a Masedonia la.

² Na i esu esa a epee aken, ma i sung riong pelie a toko lemioongare nge mo i paengeng or, lamako i alpo ol a Akaia* la.

³ Ma i voth nge ngov or me aka ru a Akaia. Lamako i monsi ol aka aro i el imot mo i es a Siria la. Aveto i nongpol aka ve, Judare o rirum isorinnga. Mako ilemi ol aka ve, i lo werer mun a Masedonia la.

⁴ Na Sopater aka ile a Beria aka ini a Pirus itun i es tomo nge a Pol. Na toko mun pelie aka o es tomo nge or. Or aini aka ole a Tesalonaika oion a Aristarkus na Sekundus, na Gaius aka ile a Derbe, na Timoti na toko or aini aka ole a Esia oion a Tikikus ome a Tropimus. Or alavusnga o es tomo nge a Pol.

⁵ Ma o mukal tel la, mo o men tetal them a Troas.

⁶ Aveto them voth tel mo nang aka Judare o an bret aka yis i voth nge avele kene i vus, lamako them ro ol a imot nge ma them lospot ol a Pilipai. Lama nang or lim i vus tel mun, mako them thepolo ol or a Troas. Ma nang or limai them voth nge.

Ako a Troas Pol i pamimi werer a Iutikus.

⁷ Na nge nang mukalinga them pathun tomo nge toko lemioongare mo them reku bret ma them an tomo e pel. Ma Pol i panongpol toko na sengre ma i ri palolo, makola pemlik lopat, eneke nge erangunga aro i es.

⁸ Ma ine the lalainga pulua aka ro i voth nge vel lemi aka them voth nge roro.

⁹ Na kulpo omole aka, iion a Iutikus i men a thepolpotinga. Na Pol i panongpol vet inga la, mako Iutikus itheki nokolkol rintet. Mako i nokolkolu ol. Ma i matpot nge vel lemi menga aka i voth tetala. Ma i matu a ulue la ma o tia i alarinnga.

¹⁰ Ma Pol i esu la. Ma i soptunu kulpo aken ma i krima i nge imeni. Na i ri ve, "O mothong tova lomumu kerere i mimi aken."

¹¹ Ma Pol i es werera mun a vel lemi la. Ma i reku bret, ma o an. Na i ri tomo mun nge or, makola rulpou ma i losa ma i es.

¹² Na kulpo aken i mimi werera mo o wol i a ile vella, mako oleli sivenga werer mun.

* **20:2:** Akaia iion mun a Gris.

Pol i losa a Troas ma i es a Miletus.

¹³ Mako them mukal ma them ro a imot nge ma them mon, makola them velpol a Asos mo aro them pathoteta a Pol nge. Them oma venen aken, eneke Pol i ritet tel them nge ve aro i es nge ieve la.

¹⁴ Mako Pol i thepolo them a Asos. Mako them pathoteta i a imot nge. Ma them mon ol a Mitilini.

¹⁵ Ma nge erangunga imot i ela them ma them velpol totho a mtho a Kios. Ma nge erangunga mun them velpol a mtho a Samos. Ma nge rulpounga mun them mon la ma them otuno ol a rem a Miletus.

¹⁶ Ma Pol ilemi aka ve, aro i mon selele a Epesus, eneke ini plong ve aro i vot palolo a epee a Esia, eneke ia pun aka ve, i paviri mo i supo nge Pentikos[†] a aning ako ro a Jerusalem tova eve i pavurvur.

Pol i paioal ol Epesus a lotu a mukalingare.

¹⁷ Nako a Miletus, ma Pol i pasong ikei a lotuonga a mukalingare aka a Epesus. Mo aro o es a i nge.

¹⁸ Ma o velpol a i nge ma i ria or ve, "Na thomu alavusnga lomumu mire nge vothung aka tho oma i nge lek velpoling teltelng ako a Esia na nge nang elonga aka tho voth tomo nge thomu.

¹⁹ Na lomumu mire nge aka Judare o rirum aka ve, aro o pun tho. Na nge aken o tongporum tho ma tho el matheong na thekik ei i teel. Aveto tho paruru tho na tho oma inga aka ini a God ile omaing.

²⁰ Ma tho krim werer ur aka aro i opoal thomu, kene avele. Tho panongpol thomu na tho pamireal thomu a rem lemi na nge lomu vel omole omolenga.

²¹ Na tho ri engeng Judare na Grik angare nge panongpolong ve aro o eksing ole mimiong mo o es a God nge, mo olemio nge ar Pomnga a Jisas.

²² "Na ponange tho panes inga Oni Riringa aka i pake tho a Jerusalem la. Na lemik mire ol nge ur aka aro i velpoltun tho nge wop aken avele.

²³ Aveto lemik mire nge lale, aka a rumrem areko tho um nge, Oni Riringa i pator

tho ve, kinong na matheong aro o el tho nge wop aken.

²⁴ Aveto lemik ve lek mimiong ini ur pomnga avele a tho nge. Na i pavurvur aro tho pangeipal nge lek mimiong avele, tova eve tho patopalal omaing aka Toko Pomnga a Jisas i sungu i a tho nge ranga ve aka aro tho ritet nge Panongpolong Sivenga aka nge a God ile themosaling.

²⁵ "Na thomu o nongpol. Nomenga tho es ake ru a thomu nge. Na tho panongpol thomu nge Panongpolong Sivenga aka nge a God ile menong e nepes. Na lemik mire aka panen aro omu e i pavurvur aro i thepol werera ol thekik avele ol.

²⁶ Mako ponange tho ri engeng a thomu nge na eve omu e aka i eksing ilemi avele na i penthal, aken ini lek omaing ol avele.

²⁷ Eneke tho krim werer nge aka tho panongpol aka God ile omaing alavusnga, kene avele.

²⁸ Na thomu o naktet senu thomu, tomo nge areko Oni Riringa i sung i a thomu nge mo o theal or. Aro thomu o velpol ini theal tetalonga nge a God ile tokokoere aka i pavelpol or mo ini ile, aka nge Itun ile rinong.

²⁹ Na lemik mire aka ve, panen tova aro tho lolel thomu, toko le apaltetongare aro o velpol mo o pelotun thomu, naro o patelek toko lemioongare ole lemioong ranga ve ini nanau pil aka o pakerenga sipsipre.

³⁰ Na tokokoe pelie panen aka ru a thomu nge aro o losa mo o oma riong le apaltetonga na o monteto toko lemioongare mo o panes or.

³¹ Thomu o mothong tova o men punapo, aveto thomu o thealal, na lomumu rum nge tovu po or me aka tho el matheong, aveto tho pesrou nge lek patoraling a thomu nge, nge nang na mlik elonga avele.

³² "Na ponange ake tho sungu ol thomu a God imeni. Na ile riong aka nge ile themosaling i pavurvur aro i theal thomu na i pavurvur mun aka aro i paengeng thomu tova thomu o el ile ur sivenga aka

[†] **20:16:** Pentikos i mirenga aka nang mule pa lim i lutetu nge Judare oa aning aka o inga bret aka yis i voth nge avele. O thepol werer a ves 6.

aro i sungu i a toko alavusngare nge ako ini ile.

³³ Na tho theseal toko e avele ile umtun na ia malmaling mun avele.

³⁴ Lomumu mire nge lek omaing lale, tho theal sivengk nge ako tho oma omaing nge menik na tho theal mun areko o supo tomo nge tho.

³⁵ Tho pathengal thomu nge lek omaing alavusnga ako ve, aro te um engeng mo aro te opoa areko o pavurvur aro o opoa osivenga avele. Na i vene re aken ako aro lemire rum nge ar Pomnga a Jisas ile riong ako i ria it nge ve, ‘Vothung nge ur sunga i aolonga nge ur elnga.’ ”

³⁶ Pol i patopalal ile riong. Lamako or vusnga o koru oeve ma o nong a God nge.

³⁷ Mako or vusnga o tang, ma o rekukalo a Pol na o angongoal ol i lamako o paioal ol i.

³⁸ Na olemi kerere rintet nge ile riong ako i ria or nge ve, panen aro o pavurvur aro o thepol werera ol itheki avele ol. Mako or vusnga o mitpot ol i a imot nge la.

21

Pol i thoteta a imot nge mo i es a Jerusalem.

¹ Them paioal or ma vus lama them losa ma them thoteta ol a imot nge, ma them mon vengveng a mtho aka iion a Kos. Ma erangu mun na them mon ma them velpol a mtho aolonga aka iion a Rodes. Lamako them plosa ma them velpol a rem aka iion a Patara.

² Nge rem aken them thepolo imot mun aka i monsi nge esong a Ponisia. Mako them thoteta ol nge ma them mon ol la.

³ Ma them mon la ma them velpolpot nge wop aka them thopolpot ol a mtho a Saiprus. Ma them mon telek a menimem kerenga nge anga ma them velpol a Siria, mako them otuno ol a rem a Tair, mo aka aro o eltetpot ur elonga a imot lemi me.

⁴ Ma them thepol toko lemioonga pelie nge. Na them voth tomo nge or nge nang or limai. Na nge Oni Riringa ile engenging ma o ri engeng a Pol ve aro i mothong tova i es a Jerusalem la.

⁵ Aveto lemem vothong tomo nge or i vus, ma them lospot ol ma them es ol nge wop aka aro them es ol nge la. Ma or alavusnga tomo nge oewo sengengaere na otutunre o los tomopot ol nge them a rem pomnga na o mitpot ol them a thev wo la. Na them alavusnga them koru evemem na them nong ol a God nge.

⁶ Lamako them mitu ol pel ma o ri ve, “Thomu o nak ol i.” Ma them ri ve, “E, aro thomu o voth ol venen.” Mako them thoteta ol a imot nge, nako o lo wererpot ol a ole la.

Agabus aka ini a God ile riong elnga i sung riong a Pol nge.

⁷ Mako them losa a Tair ma them otuno a Tolemes. Ma them pathokeal toko lemioongare ma them voth tomo inga nge or nge nang omole.

⁸ Na nge erangunga them lospot ma them velpol a Sisaria. Ma them eso a vel aka ini a Pilip ile. Ini toko aka i panongpol nge Panongpolong Sivenga na ini toko omole nge toko or limai aton aka o ateal or a Jerusalem mo o opoesal pakekere.

⁹ Ma Pilip itun sengenga or penel aka o peange rongan o voth na or ini a God ile riong elngare.

¹⁰ Ma them voth a Sisaria nge nang pelie ma God ile riong elnga aka iion a Agabus i esu a epee a Judia me.

¹¹ Ma i es a them nge me ma i ela Pol ia let ma i kin isivenga ieve na imeni nge ma i ria ve, “Oni Riringa i ri ve, ‘Judare aka ro a Jerusalem aro o kintun let ake tokoninga ranga ve ake ru tho kin tho nge. Naro o sungu i a tokokoe areko or ini Judare avele omeni.’ ”

¹² Ma them nongpol ake, ma them tomo nge toko pelie aka them ri engeng a Pol ve, i mothong tova i es a Jerusalem la.

¹³ Aveto i olal lemem riong ve, “Thomu o vova ake? Lomu tanging na lomu riong aro i palemi kerere lemi. Tho monsi ol inga aka aro o paeso tho a mang a midenga lemi na tho monsi ol mun aka nge rinong aka ro a Jerusalem tova ve ur ake i paaolonga a Jisas iion.”

¹⁴ Ma nge lemem thopolong a i nge veno aka i pavurvur aro them eksing ol ilemi avele, mako them porengu ol, ma them ria

ve, "Aro te panes inga Toko Pomnga ilemi ol inga."

Pol i voth a mang a midenga a Judia na riong nongpolngare o nongpol ile riong

(Vonge 21:15–26:32)

*Pol i velpol a Jerusalem ma o pamit i nge
riong, aveto i porumtet tel a Jems tomo nge
lotu a mukalingare.*

¹⁵ Ma them voth nge nang pelie, mako them monsi lemem ur elonga ma them esa a Jerusalem la.

¹⁶ Ma toko lemioonga pelie ako a Sisaria o es tomo nge them ma o wol them a Nason ile vel mo aro them voth nge. Ini toko Saiprus anga ako ile lemioong i engeng nomenga vet ako nge a Jisas.

¹⁷ Ma them velpol a Jerusalem ma toko lemioongare o nongpoo them tomo nge lemi sivengaing.

¹⁸ Ma nge erangunga Pol i es tomo nge them mo them thopol a Jems. Na lotu a mukalingare o voth tomo mun.

¹⁹ Ma Pol i pathokeal or, mako i ritetu or, nge ur alavusnga aka God i oma i nge tokokoe areko or ini Judare avele aka nge ile omaing.

²⁰ Ma o nongpol a Pol ile riong ma i vus ma o risea a God nge. Lamako o ria Pol ve, "Teik, thopol vet, pulua mengmenga vet avele aka ini Judare o velpol ini toko lemioongare, ma or alavusnga o engeng nge a Moses ile patorong panesnga.

²¹ Na o nongpola aka wong patorial Judare aka o men tomo nge areko or ini Judare avele a ole rem, ve aro o lel ol okime nge a Moses ile patorong panesnga mo o mothong tova o is ol otutunre ole na o mothong tova o kis ol ar pompomere ole vothung mun.

²² Na lemire mire aka ve, o nongpola aka ong velpol lale, naro te oma ol neke?

²³ Naro ong panes inga nekenga aka aro them ria ong nge. Ma toko or penel ake ru o voth tomo nge it, kene o kin ole riong tomo nge a God.

²⁴ Naro ong es tomo nge toko areke naro ong oma mun vothung aka i pariri or a God itheki naro ong sung umtun mo i pavurvur nge vothung aken iolonga moro aken aro o theku ol opounga thoing. Na aro ve wong oma venen aken, aro puluangare aro ole mi mire aka ve, riong alavusnga aka o nongpol i nge wong kene i nunganga avele, mo aka ole mi aka ve, nge sivengom aka nge lom mimiong ong panes a Moses ile patorong alavusnga.

²⁵ Na nge tokokoe areko or ini Judare avele aka o velpol ini toko lemioonga, them wat malueng a or nge lale. Ako lemimem ve o mothong tova o an aning aka o sung tel i a avalare nge. Na o mothong tova o an mekerem aka ia mla i te a ilemi. Na o mothong mun tova o an mla. Na o lel okime nge vothung aka nge toko na seng aomnga."

²⁶ Na nge erangunga Pol i es tomo nge toko or penel aken ma i oma vothung aka i pariri isivenga a God itheki tomo nge or. Lamako i es ol a Lotu Tepun a Vel mo i sung ritetong nge nang kathnga aka vothung aka nge paririong aken aro i vusu nge, na nge nang aken aro o oma toko penel aken ole sungong omole omole nge.

Judare o rere a Pol a Lotu Tepun a Vel a lok lemi.

²⁷ Na vothung aken i pavurvur nge nang or limai ma i toth nge ile vusong ma toko Juda pelie aka ole a epee aka a Esia o thopol a Pol aka ru a Lotu Tepun a Vel a lok lemi. Ma o pavurpola tokokoe alavusnga areken ole mi ma o rere a Pol.

²⁸ Ma o pres ve, "Thomu toko Israelre opoesal them, toko ake i re aton ru i esu esa a pen elonga ma i oma riong kerenga nge it toko Israelre na nge a Moses ile patorong tomo mun nge Lotu Tepun a Vel ake, na e mun nge aka i wol tokokoe areko or ini Judare avele a Lotu Tepun a Vel a lok lemi aka o pavothal nge, ma i paakop pen riringa ake."

²⁹ (Na o ri vene aken, eneke o thepol tel a Tropimus aka ini Epesus anga i voth tomo nge a Pol a rem pomnga, ma ole mi ve ava Pol i wolu mun i lale a Lotu Tepun a Vel a lok lemi, aveto avele.)

³⁰ Ma lemi otunong aolonga i velpol a pen alavusnga ako ru a rem pomnga, na a ur e avele na tokokoere o veliloalo pel, mako o rere a Pol ma o titpopot i a lalanga la, nako o pupalo lok thekia elonga.

³¹ Na o mostun a Pol ipunrinnga, mako riong i kimapot a Rom a punongare oa pomnga ve, tokokoe alavusnga areko ru a Jerusalem o toth aro o pun pel.

³² A ur e avele na oa pomnga aken i wol punongare ole mukalinga pelie tomo nge punongare ma o songu a or nge la. Ma tokokoere o thopol aka i es tomo nge punongare, mako o modopu ol a Pol isisonga.

³³ Mako punongare oa pomnga i es ol ma i rereu ol a Pol, mako i ria ol or ve aro o kin ol i nge sen or aini. Lama i nina or ve, "Toko ake ini anga, na i oma neke?"

³⁴ Na pelie o pres nge ur e, na oa pelie o pres mun nge ur relnga mun, ma oa pomnga aken i el senu riong e avele, eneke nge ole pasisaling, mako i ria or ve, "Thomu o wol a Pol a punongare ole vel lemi la."

³⁵ Ma Pol i es ma i patuno inga papalinga, mako punongare o potuna i la, eneke nge tokokoere ole lo vurong nge ipunrinnga.

³⁶ Na tokokoere aka o paneses or o presa ve, "O pun rin i."

Pol i ria Judare nge ile lemioong tepun.

³⁷ Ma punongare o toth aro o paesa a Pol a ole vel lemi, mako Pol i ria oa pomnga ve, "I pavurvur aka aro tho ria tel riong e a wong nge?"

Na oa pomnga i ria ve, "Lomum mire nge Grikre okei?

³⁸ Na ong ini toko Isip anga aton avele aka i patea punong nge gavman nomenga mun tie, na i wolpot toko punongare or 4,000 aka o el bainat a pen polpolnga la?"

³⁹ Ma Pol i olal ile riong ve, "Tho ake ini toko Juda, lek rem tepun aka ini a Tarsus aka a epee a Silisia aka ini rem aka i pomnga. Ken i sivenga aka aro som wompot tel tho mo tho ri tel a tokokoe areken nge."

⁴⁰ Mako oa pomnga i nongala ile riong, ma Pol i mita a papalinga ma imeni vutun

or mo o poreng, mako o poreng ma i ria or nge la nge Hibrure okei ve,

22

¹ "Titeikre na ok vovoere, o nongpol lek lelong aka aro tho ria thomu nge."

² Ma o nongpol aka i ria or nge la nge Hibrure okei, mako o porengu ol.

Mako Pol i ria ve,

³ "Tho ake ini toko Juda, lek rem tepun aka ini a Tarsus aka a epee a Silisia, aveto tho poma nge rem ake ini a Jerusalem. Ma Gamaliel i patorial senu tho ve aro tho panes senu ar pompomere ole patorong. Na tho panes a God ile omaing ranga ve ini thomu alavusnga ake ru ponange.

⁴ Na tho pamien kerere tokokoe areko o panes a Jisas ile pamirealing ma tho oma i venen aken ma oa pulua o rin nge. Ma tho rere toko na seng pulua mo o paes or a mang a midenga lemi.

⁵ Na Prisre oa Pomnga tomo nge Judare oa pompomere o pavurvur aka aro o ritet mun nge ve, lek riong areke kene i nun-ganga. Na tho ela ole malueng pom aka o wat i nge otitein Judare aka a Damaskus, mako tho es la mo tho kin or na tho wol or a Jerusalem ve aro o el paomelaling nge.

Pol i ritet nge ur aka i velpoltun i mo i eksing ile mimiong.

⁶ "Tho es ma penang lopat na tho totho a Damaskus na a ur e avele nako pen lalanga aolonga aka i esu a Pen a Urvet me ma i totun tho.

⁷ Mako tho matu a ulue na tho nongpol lenging aka i ria tho ve, 'Sol, Sol! Wong vova ake ong pakerenga tho, e?'

⁸ "Ma tho nina i ve, 'Toko Pomnga, wong ao?'

"Ma Toko Pomnga i ri ve, 'Tho ini a Jisas, aka ini Nasaret anga aton ru ranga ve wong pakerenga tho.'

⁹ Na tokokoe areko o es tomo nge tho, o thopol pen lalanga aken, aveto olemi mire nge toko aken ile lenging aka i ria tho nge, kene avele.

¹⁰ "Na tho nina i ve, 'Toko Pomnga, aro tho oma neke?'

"Ma Toko Pomnga i ria tho ve, 'Mita mo es a Damaskus la, nge pen aken aro o ria

wong nge omaing alavusnga aka tho ateal i ve aro ong oma i.'

¹¹ Ma thekik pros, eneke tolilisong aka i tolilis rintet i totun tho ma thekik i the ses, mako areko o supo tomo nge tho o krima menik, mako o ti ol tho a Damaskus la.

¹² "Ma toko omole aka iion a Ananaias i es mo i thopol tho. Ine toko aka ile lotu i engeng nge a God, ma i panes senu ler patorong. Na Juda alavusnga aka o vota a Damaskus o papomnga i.

¹³ Ma i mito a lok seik ma i ria tho ve, 'Teik a Sol aro ong the werer mun.' A ur e avele, nako tho the werer mun ma tho thopol i.

¹⁴ "Ma i ria mun tho ve, 'God aka ini ar pompomere ole, i ateal ong lale ve aro lomum mire nge ur aka i sis ve aro ong oma i, naro ong thopol ile Toko Vengvenga aton, naro ong nongpol riong aka i espot a isivenga iwo.

¹⁵ Naro ong ritet a toko alavusngare nge, nge i na nge ur areko ong thopol i na ong nongpol i lale.

¹⁶ Na ong paninal ol neke? Mita mo ong el paninuong na ong avav a Toko Pomnga iion mo aro lom vothung kerenga i vus."

God i pake a Pol mo i panongpol a tokokoe areko or ini Judare avele.

¹⁷ "Ma tho lo werer a Jerusalem ma tho nong a Lotu Tepun a Vel ma tho thopol ur aka ranga ve ini oni theong.

¹⁸ Ma tho thopol Toko Pomnga aka i ria tho ve, 'Paviri, mo lospot virial a Jerusalem, eneke aro o nongal lom riong nge tho avele.'

¹⁹ "Ma tho olal ile riong ve, 'Toko Pomnga, osivenga olemi mire aka nomenga tho esu esa nge Judare ole lotuonga a velre mo tho siso na tho paeso areko olemio nge ong a mang a midenga lemi.

²⁰ Na nge wop lemi aka o pun rin a Stiven aka ini toko aka i paesu esa lom riong, tho mit ma tho ri ve i sivenga mun inga aka nge ipunrinnga ma tho theal mun areko o pun rin i kene ole teunong.'

²¹ "Mako Toko Pomnga i ria tho nge ve, 'Es, eneke aro tho pake wong melanga a tokokoe areko or ini Judare avele.'

Pol i ritet or aka ve, ini toko Rom.

²² Na Judare o nongpol a Pol ile riong nge tokokoe areko or ini Judare avele, ma oni plong ol ve aro o nongpol ol ile riong ma o pres viringga ve, "La o so rin i, toko aka i venen aken i mothong tova i mimi tomo ol nge it ake ru a ulue."

²³ Ma or alavusnga olemi kling rintet, mako o onnga ma o inra oa teunongre na o mota vuvus ma o ula i roro.

²⁴ Ma punongare oa pomnga i ria ile tokokoere ve aro o paeso a Pol a ole vel la, mo aro o so litlit i mo o nina i nge mo aro olemi mire senu nge ur aken tepun aka Judare o presa pres venen aken nge i.

²⁵ Mako o kin i mo aro o so litlit i, aveto Pol i ria mukalinga aka i mit tothal i ma i ria i ve, "Na nge Romre ole patorong i pavurvur aka aro o so litlit tel toko aka ini Rom na riong nongpolnga i sung paomelaling a i nge rongan eve avele?"

²⁶ Mako mukalinga aken i nongpol i veno aka ma i es a punongare oa pomnga ma i nina i ve, "Aro ong oma ol neke? Eneke toko aken ini toko Rom."

²⁷ Mako punongare oa pomnga i es a Pol nge la ma i nina i ve, "Wong ria tho, ong ini toko Rom, e?"

Ma Pol i olal ile riong ve, "Enala, tho ini toko Rom."

²⁸ Ma punongare oa pomnga i ria ve, "Tho ul umtun aolonga aka aro tho velpol ini toko Rom ol."

Ma Pol i olal ile riong ve, "Aveto tho ake ini toko Rom, eneke vovo ome a nina or ini Rom."

²⁹ A ur e avele, nako areko o ri ve o oma ninong pelie a Pol nge kene o teses werer na punongare oa pomnga i ngange, eneke i rov i a i nge aka ve, i avsa patorong lale aka i kin a Pol aka ini toko Rom nge sen.

Pol i mit nge riong a Judare ole mukalingle otheki.

³⁰ Ma punongare oa pomnga i sis aka ve, ilemi mire senu nge ur aken tepun aka Judare olemi otun a Pol nge. Mako nge erangunga i pake riong nge pris kimagare tomo nge Judare oa pompomere ve aro o velilo pel, mako i wol a Pol ma i pamit i nge riong a otheki.

23

¹ Ma Pol i the vengveng a Judare ole mukalingare nge ma i ria ve, “Titeikre, lek omaing alavusnga aka tho oma i pavurvur nge ponange tho ri ve va tho panes a God ilemi.”

² Mako Prisre oa Pomnga aka iion a Ananaias i pake riong nge tokokoe areko o mit tothal a Pol mo aro o sopo iwo.

³ Ma Pol i ria i ve, “God aro i sopop wong, wong ranga ve ini vel pupnga akopnga aka o vor i ma i veleles ma o thopol akop avele.* Ong men ranga ve ini riong nongpolnga aka i panes patorong, aveto sivengom ong avsa patorong nge aka ong ria or ma o so tho.”

⁴ Na tokokoe areko ru o totho a Pol nge o ria i ve, “Ong kelelal ake ini a God ile Prisre oa Pomnga.”

⁵ Ma Pol i olal ole riong ve, “Titeikre, lemik mire avele aka ini a God ile Prisre oa Pomnga, eneke erere nomenganga i ri vene,

‘Ong mothong tova o oma riong kerenga nge lomu mukalinga.’” *Kisim Bek 22:28*

⁶ Ma Pol ilemi mire aka ve, oa pelie ini Sadiusi na oa pelie mun ini Parisi, mako i lengpot aka ru a Judare ole mukalingare otheki ma i ri ve, “Titeikre, ok vovo ini Parisi, na tho ini Parisi mun. Na tho mit nge riong ake, eneke lek lemioong i engeng nge aka areko o rin lale aro o mimi werer.”

⁷ Ma i ripot venen aken, ma Parisire na Sadiusire o patea ol volpeling, mako toko avlung areken o thomreu ol pel ma or ainiu ol.

⁸ (O vol pel, eneke Sadiusire o ri ve tokokoe areko o rin lale o pavurvur aro o mimi werer avele, ma o ri mun ve enselre avele na toko ion i avele. Aveto Parisire olemio nge ur alame aken.)

⁹ Ma ole presing i mengmeng vet avele, na pamirealinga nge patorong pelie aka ini Parisire o mita ma o ri engeng ma o ri ve, “Them thopol ur e avele aka toko aken i oma i ma i kerenga, ava ensel eve toko oni i ria i nge.”

* **23:3:** Vel pupnga akopnga aka o vor i ma i veleles, i mirenga aka ve, ini toko i oma inga vothung sivenga a tokokoere otheki, aveto ilemi kene i akop. O thopola Matiu 23:27.

¹⁰ Na ole volpeling i aolonga na olo vur ma punongare oa pomnga i ngeip nge a Pol aka aro vene mo o thirther pel nge i mo i vunro. Mako i pakeu ile punongare aka ru a tokokoere oa lemimi mo o eltet a Pol a or nge ma o wola i a punongare ole vel la.

¹¹ Na nge pemliknga Toko Pomnga i mito a Pol nge ma i ria i ve, “Ong mit engeng, aro ong ritet Rom angare nge tho ranga ve aka ong ritet nge tho a Jerusalem lale.”

Judare o rirum a Pol isorinnga.

¹² Ma nge rulpounga Juda pelie o pathun pel mo o kath sovengalo aka aro o pun a Pol nge. Ma o kin ole riong engenga a God nge aka ve, o pavurvur aka aro o an avele na o thin avele i pavurvur aka la aro o so rin tel a Pol.

¹³ Na tokokoe areko o rirum sovengalo aken oa titaling i aoselea mule pa penel.

¹⁴ Ma o es a pris kimangare na Judare oa pompomere nge ma o ria or ve, “Them kin lemem riong engenga ve aro them an avele na them thin avele i pavurvur aka la aro them so rin a Pol.

¹⁵ Na ponange aro thomu o pasong riong nongpolngare ole riong a punongare oa pomnga mo i pasongu a Pol a thomu nge me mo lomu apaltet ve aro thomu o ri ve thomu o el senu mun riong ninenga pelie nge ur aken. Aveto aro them men kine a sovengalo mo aro i velpol ake rongan na them so rin tel i lale.”

¹⁶ Aveto Pol ilunnga itun tomonnga i nongpol aka o rirum a Pol isorinnga, mako i eso a punongare ole vel ma i ria Pol nge.

¹⁷ Ma Pol i lenga punongare ole mukalinga omole ma i ria i ve, “Wola kulpo ake a punongare oa pomnga nge, eneke riong e ake ru a i nge mo i ria i a i nge.”

¹⁸ Mako i wol i a punongare oa pomnga nge.

Ma i ria i ve, “Toko aton ru te rere i aka iion a Pol, i lenga tho ma i ria tho ve aro tho pasong kulpo ake a wong nge, eneke riong e ake ru aro i ria wong nge.”

¹⁹ Ma punongare oa pomnga i krima i a imeni ma i ti lelpot i ma i nina i ve, “Ur

nekenga ako ong ri ve aro ong ria tho nge, e?"

²⁰ Ma i ria i ve, "Judare ole mukalinga pelie olemi omoletet lale ako ve, aro o nina wong ve, lelken aro wong wolu a Pol a or nge la, na ole apaltet ve aro o ri ve o el senu mun riong ninenga pelie nge i.

²¹ Na mothong tova nongpol or, eneke toko pulua aka oa titaling i aoselea mule pa penel aro o men kine a sovengalo, mo o men tetal i ve aro o so rin i. Ma o kin ole riong lale ve aro o an avele na o thin avele i pavurvur tova aro o so rin i. Na o monsi nge lale aka aro o oma i, na o men tetal ol inga aka ini lom riong."

²² Na punongare oa pomnga i pator engeng i ve, "Mothong tova ria toko e nge aka ong ria tho nge ur ake." Lamako i pake werer ol kulpo aken la.

O pasong a Pol a Peliks aka ini Sisaria angare ole mukalinga.

²³ Mako punongare oa pomnga i lenga mukalinga or aini ma i ria or ve, "Thomu o monsi punongare or 200 tomo nge peang elngare or 200 mun na punonga or mule pa limai aka o tho nge hos mo thomu alavusnga o es a Sisaria la. Naro o losa tova nang meta i el or limpenel pemlik.

²⁴ Na thomu o monsi mun nge hos pelie mo Pol i ro nge. Naro thomu o naktet inga iwolnga mo la o pavelpol i a mukalinga a Peliks nge."

²⁵ Na punongare oa pomnga i wat malueng aka ve:

²⁶ Tho ini a Klodius Lisias,
Tho wat nge wong ini mukalinga pomnga a Peliks.
Lom rulpo,

²⁷ Na Judare o rere toko ake ma toth re aka tova aro o so rin i, aveto tho es tomo nge lek toko punongare ma them pamimi i, eneke tho el tel riong pelie lale aka ve, ini toko Rom.

²⁸ Na tho sis ve aro lemik mire nge ur aken tepun aka Judare olemi otun toko aken nge, mako tho wolu i a ole mukalingare nge la.

²⁹ Na tho thopol ia tepun e avele aka i oma i mo o so rin i nge eve aro o paeso i a mang a midenga nge, aveto ole lemi

otunong aken nge i, i pavurvur nge ninong pelie aka ru nge ole patorong.

³⁰ Ma tho nongpol aka Juda pelie o kath sovengalo aka aro o so rin i nge, make tho pasong virial i a wong nge wot. Na tho ri nge tokokoere aka o pamit i nge riong ve aro o ripot ur aka olemi otun i nge, a wong nge.

I re aken.

³¹ Mako punongare o panes oa pomnga ile riong, ma o wol a Pol nge pemliknga aken ma o es, makola o mul a Antipatris.

³² Na nge erangunga, punongare aka o es nge oeve o mit or na o lo werer a ole vel, ma punonga areko o tho nge hos or ol inga aka o pasong i la.

³³ Mako o velpol a Sisaria ma o sungu malueng a mukalinga nge na o sungu mun a Pol a imeni.

³⁴ Na mukalinga i tital malueng na i nin a Pol ve, "Wop epee kathnga aka ong es nge me?" Ma i nongpol aka ile rem tepun aka ini a Silisia.

³⁵ Mako i ria i ve, "Aro tho nongpol mos ol lom riong tova areko olemi otun ong aro o velpol." Ma i sung riong ve aro punongare o theal tetal i a vel aka nepes a Herot pomnga i ari i nomenga.

24

Judare olemi otun a Pol.

¹ Ma nang or lim i vus lama Prisre oa Pomnga aka iion a Ananaias i es a Sisaria tomo nge Judare oa pompome pelie na tomo mun nge toko aka ile mire i aolonga nge Romre ole patorong aka iion a Tertulus. Ma o mita nge riong a Sisaria a mukalinga aka iion a Peliks itheki, ma o oma ole riong aka olemi otun a Pol nge.

² Ma o lengo a Pol lamako Tertulus i ripot ol riong aka olemi otun a Pol nge. Ma i ria ve, "Ar pomnga a Peliks, nge wop lemi ake, aka wong voth ini mukalinga ong pamen senu tokokoere ma o men lemi moring na nge lom mire aolonga ong pavengveng werer ur pulua, na ong pavelpol mun menong le sivengaing pulua aka nge lemem rem ake.

³ Na tokokoere nge pen alavusnga olemi sivenga nge lom omaing aken ma them ri sivenga rintet nge wong.

⁴ Aveto nik plong ve aro tho palototun wong, na tho nong wong ve i pavurvur ako aro lomum esal them mo aro ong nongpol tel inga lemem riong orornga atike.

⁵ “Them thopol toko ake i oma vothung kerenga pulua ma i pavurpol punpeling nge Judare aka a rumrem alavusnga nge pen alavusnga ake ru a ulue. Na ini mukalinga e nge toko avlung relnga vet aka o apet or ve ini Nasaret angare.

⁶ Na i sis ve aro i oma omaing aka them pavothal nge aka aro them oma i a Lotu Tepun a Vel a lok lemi, mako them rere i ma lemimem ve aro them pamit i nge riong aka nge lemem patorong.

⁷ Aveto punongare oa pomnga aka iion a Lisias i es tomo nge toko punongare, na nge ole engengeng o eltetpot i a them nge.

⁸ Lama Lisias i sung riong aka ve, tokokoe areko olemi otun i aro o mit nge riong a thekum. Na aro ve sivengom ong nin senu toko aken, mo aro ong el senu ol riong nge ur areko i oma i ma lemimem otun i nge.

“Na i re aken.”

⁹ Na Judare olemi otun mun i ve, ur alavusnga aken i nunganga.

Pol i ripot ile riong a Peliks nge.

¹⁰ Ma Sisaria a mukalinga imeni vutun a Pol mo aro i patea ol ile riong. Ma Pol i ria ve, “Lemik mire aka wong voth ini riong nongpolnga nge tovu po pulua aka nge rem ake, na lemik sivenga inga aka aro tho ripot lek riong a wong nge.

¹¹ Na aro ve ong nin mun tokokoere, aro o ripot riong nunganga, aka nang or mule pa omole pothoi or aini i vus rongan nge aka tho esa a Jerusalem mo tho lotu nge.

¹² Na nge nang e avele aka Judare o thopol tho aka tho vol tomo nge toko e aka a Lotu Tepun a Vel eve o thopol tho tova tho pavurpolo tokokoere olemi nge ur e aka ru a Judare ole lotuonga a vel e, eve a rem pomnga lemi. Avele selele.

¹³ Na o pavurvur aro o panunganga ole riong e avele nge ur aka olemi otun tho nge.

¹⁴ I nunganga aka tho lotual a God aka ini titevimekre ole, nge ake tho panes inga a Jisas Ile Sovengalo aka Judare o ri

ve i nunganga avele, aveto lek lemioong i engeng nge ur alavusnga aka i voth a Moses ile patorong na nge ur aka God ile riong elngare o wat i.

¹⁵ Lemik i engeng a God ranga ve mun nge tokokoe areken, aka panen i nunganga aka aro toko sivenga tomo nge toko kerengare aro o mimi werera mun.

¹⁶ Make tho um engeng ve aro a lemik, tho rov i aka tho oma vothung kerenga e avele a God na tokokoere otheiki.

¹⁷ “Na tho voth gat a Jerusalem nge tovu po pelie ma tho lo werer mun la ve aro tho sung umtun pelie a lek tokokoere nge naro tho oma sungong nge mekerem ongtunnga a God nge.

¹⁸ Na tho oma venen aken na tho oma omaing aka i pariri tho lale, mako o thepolo tho a Lotu Tepun a Vel a lok lemi. Na toko pulua avele aka o voth tomo nge tho na keking pelie avele.

¹⁹ Aveto i nunganga aka Juda pelie aka ole a epee a Esia o voth mun, na eve olemi otun tho nge riong pelie, i sivenga aka aro o voth mun ake nge riong, aveto o voth avele.

²⁰ Na tokokoe areke or mun aka othopol tho aka tho mit nge riong a Judare ole mukalingare otheiki na eve o pavurvur aro o pamilempot i nge wong nge ur nekenga aka mukalingare o rov i a or nge ve aka tho oma i ma i kerenga.

²¹ Ava ur omole ol inga aka tho oma i a otheiki ma olemei sivenga nge avele aka tho pres ve, ‘Tho mit nge riong ponange ake, eneke lek lemioong i engeng nge aka areko o rin lale aro o mimi werer.’

“Na i re aken.”

²² Na Peliks ilemi mire senu nge Jisas Ile Sovengalo aken, aka tokokoere o panes Toko Pomnga nge, ma i pavus riong aken ma i ria or ve, “Aro lemik rum senu tel tova punongare oa pomnga a Lisias aro i velpol lamo tho ritet ol nge lemik a thomu nge.”

²³ Ma i sung riong a punongare ole mukalinga mo aro i theal tetal a Pol, aveto i pavurvur mun aka aro i esu esa tie na o mothong tova o mitrup ilengare aka aro o opoal i nge ur pelie nge ile menong.

²⁴ Na nang pelie i vus na Peliks i velpol tomo iewo sengenga aka iion a Drusila aka ini seng Juda. Na ikei song nge a Pol mo i nongpol i. Na i nongpol aka i ri nge lemioong aka nge a Krais Jisas,

²⁵ na Pol i ri lollo nge aka toko i panes vothung vengvenga, na nge aka toko i nak-tet isivenga mo aro i panes lemi rumong kerenga avele, na nge nang aka aro toko alavusnga aro o mit nge riong a God itheki. Mako Peliks i nongpol i veno aka ma i ngange ma i ria i ve, "Aro i mulal tel vene ake na wong es. Na eve lek omaing ol e avele mo aro tho leng werer mun wong."*

²⁶ Ma ikei song i papulua mo i ria i nge, eneke ilemi aka ve, aro Pol i sungu umtun pelie a i nge.

²⁷ Ma tovu po or aini i vus ma Por-sius Pestus i tepolal a Peliks imei nge ile omaing aken. Aveto Peliks i modopu werer mun a Pol a mang a midenga lemi, eneke i sis aka ve, aro i oma omaing sivenga a Judare nge.

25

Pol i mit nge riong a Pestus itheki.

¹ Ma Pestus i velpol a ile rem epee aka i theal i ma i voth nge nang or me, ma i losa a Sisaria ma i esa a Jerusalem la.

² Lama pris kimangare tomo nge Judare ole mukalingare o mit a Pestus itheki ma o pamilempot ur areko olemi otun a Pol nge.

³ Ma o nong engeng a Pestus ve aro i oma omaing sivenga a or nge aka aro i pamu a Pol a Jerusalem. Na o ri venen aken, eneke o oma sovengalo lale aka o so rin a Pol a sovengalo lopat tova i es la.

⁴ Pestus i olal ole riong ve, "Pol i voth a mang a midenga aka a Sisaria, na i toth lale aka aro sivengek inga aro tho es werer nge.

⁵ Na i sivenga aka aro lomu mukalinga pelie aro o es tomo nge tho a Sisaria la, mo o ripot ole riong aka olemi otun toko aken nge tova eve i oma vothung kerenga pelie."

* **24:25:** Peliks i ngange nge a Pol ile riong, eneke i pamuespot a Drusila aka ini toko relnga iewo. Ma ilemi rum nge ile vothung kerenga aken. * **25:13:** Nepes ake ini a Herot Agripa 2. O ritet nge itema ile omaing na ile rinong aka a Pakeke 12:1-4 na 12:19-23.

⁶ Ma Pestus i voth a Jerusalem i pavurvur nge nang or limme eve nang or mule, mako i esu a Sisaria, ma nge erangunga i men ol nge riong nongpolnga a vel ma i sung ol riong aka aro o pasong a Pol mo i mit nge riong.

⁷ Lama Pol i velpola ma Juda areko o esu a Jerusalem me, o mit kalalual i na olemi otun a Pol nge omaing areko i kerenga rintet, aveto o pavurvur aro o ripot ole riong aka aro i pathengal nge ve ole riong aken i nunganga, kene avele.

⁸ Aveto Pol i mit engeng ma i olal ole riong ve, "Tho oma vothung kerenga e avele aka tho avsa Judare ole patorong na tho oma ur kerenga e avele a Lotu Tepun a Vel tomo mun nge Romre ole nepes aka ini a Sisar."

⁹ Pestus i sis ve aro i oma omaing sivenga a Judare nge, mako i ria Pol ve, "I sivenga nge wong aka aro ong mit nge riong a thekik a Jerusalem nge ole lemi otunong aken?"

¹⁰ Aveto Pol i olal ile riong ve, "Na ponange tho mit ake a nepes a Sisar ile riong nongpolnga a vel lemi, na nge pen ake inga i pavurvur aka aro tho mit nge riong nge. Na sivengom lomum mire senu nge lale aka tho oma vothung kerenga e avele a Judare nge.

¹¹ Aro ve tho avsa patorong aka i pavurvur aka aro tho rin nge, maken aro o pun rin tho nge, aro tho lolel nge rinong aken avele, aveto aro ve Judare ole lemi otunong nge tho i nunganga avele, ong pavurvur aro ong sungu tho a omeni avele. Tho sis inga ve aro tho mit inga nge riong a nepes a Sisar itheki."

¹² Ma Pestus i ri tomo nge ile tokokoe areko o sung mire a i nge, lamako i ritet a Pol nge ve, "Na ong nong ve aro nepes a Sisar i nongpol lom riong, nge aken aro ong es a Sisar nge mo i nongpol i."

Pestus i ri tomo nge a nepes a Agripa nge a Pol.

¹³ Na nang pelie i vus na nepes a Agripa* tomo nge ilun a Bernis o velpol a Sisaria

mo aro o porum a Pestus naro o ri sivenga nge ile omaing ponganga aka o sungu i a i nge.

¹⁴ Ma or paini o voth mun nge nang pulua nge pen aken, mako Pestus ome nepes aken o rirum a Pol ile menong. Ma Pestus i ria i ve, “Toko omole aka i voth aka nomenga Peliks i paeso i a mang a midenga ma rongan aka ru i voth.

¹⁵ Ma nge wop lemi aka tho velpola a Jerusalem, ma pris kimangare tomo nge Judare oa pompomere o oma riong aka olemi otun i nge ma o nina tho ve aro tho paomelal i.

¹⁶ “Aveto tho ria or ve, ‘Nge Romre ole patorong toko aro i mit tel nge riong mo aro i olal tel riong nge areko olemi otun i nge, na i pavurvur aro them sung tel i a ile ngarangre omeni avele.’

¹⁷ Ma toko areken o es tomo nge tho a Sisaria ma tho palolutun nge or avele ma erangu inga na tho menu nge riong nongpolnga ma tho pake riong nge toko aken mo o pasongu i a rionga a vel lemi.

¹⁸ Na tokokoe areko olemi otun i kene o mita ma o ripot vothung areko olemi otun i nge, aveto o ripot ol riong relnga, na ur areko lemik ve aro o ripot i, kene o ri ol i avele.

¹⁹ Aveto o ri ol inga aka nge lemi rumong rel relngare aka nge ole lotuong na e mun e aka nge toko aka iion a Jisas aka i rin lale, aveto Pol i ri ve i mimi.

²⁰ Lemik aka ve, aro tho ortet senu riong areken tepun, aveto tho pavurvur avele, mako tho nin a Pol ve, ‘I sivenga nge wong aka aro ong mit nge riong a Jerusalem nge ole lemi otunong areken?’

²¹ Aveto Pol i sis ve aro nepes a Sisar i nongpol ile riong, make tho ri ve aro o theal total tel i a mang a midenga mo i pavurvur nge tova la tho pasong i a Sisar nge la.”

²² Na Agripa i ria Pestus ve, “Tho sis ve aro engek tho nongpol toko aken ile riong.”

Ma Pestus i olal ile riong ve, “Aro ong nongpolo ile riong lelken.”

Pol i mita a Agripa itheki.

²³ Na nge erangunga Agripa ome a Ber-nis o teuna oa nepes a malmaling ma o es a pathunonga a vel na nge ole velpoling tokokoere o papomnga or. Ma o men tomo nge punongare oa pompomere na rem aken oa pompomere. Mako Pestus i ria ma o pasong a Pol a or nge.

²⁴ Ma Pestus i ria ve, “Nepes a Agripa na thomu areko o voth tomo nge them ake, o thopol toko ake! Judare aka a Jerusalem na a Sisaria mun or alavusnga o valelalu riong a i nge. Na o pres ve aro i mothong tova i mimi ol.

²⁵ Aveto tho thopol ur e avele aka i oma i aka aro o so rin i nge. Ma lemik ve aro tho pasong i a Rom la, eneke i ri ve aro nepes a Sisar aro i nongpol ile riong.

²⁶ Aveto lemik mire senu nge riong sivenga e avele aka aro tho wat i a ar pomnga a Sisar nge. Mako tho pamitu mun i a thomu alavusnga thekumu, na nge wong a nepes a Agripa mo aro wong nin tel mun i nge ninong pelie mo i opoal tho nge riong aka aro tho watu i a malueng lemi.

²⁷ Eneke a lemik i sivenga mos avele aka aro tho pasong polpol toko aka i voth a mang a midenga lemi na tho ri nine senu ur aka olemi otun i nge, kene avele.”

26

Nepes a Agripa i nongpol a Pol ile riong.

¹ Mako Agripa i ria Pol ve, “Sivengom vengveng aro ong ripot lom riong.” Ma Pol i watha imeni ma i patea ile lelong vene:

² “Nepes a Agripa, i sivenga nge tho aka ponange ake tho mit a thekum mo aro tho lel nge ur areko Judare olemi otun tho nge.

³ Eneke lomum mire senu nge them Judare lemlem vothung alavusnga na nge lemlem ripeling nge lemlem patorong. Na tho nong mos inga nge wong ve aro ong men senu mo ong nongpol lek riong.

⁴ “Judare olemi mire nge lek mimiong aka nge lek posngaing ma me pavurvur nge ponange aka i patea nge lek wainlan-gaing aka a lek rem tepun, na olemi mire mun nge lek mimiong aka ro a Jerusalem.

⁵ Olemi mire nge tho nomenga vet aka me na aro ve olemi ve o ri nunganga, o pavurvur aka aro o ripot i. Nake tho mun e

ako tho voth nge toko avlung ako o apet or ve ini Parisi na nge ole patorong panesnga i mukal rintet nge menong alavusnga aka nge lemem lotuong.

⁶ Na tho mit nge riong ponange, eneke lemik i engeng na tho men total nge ur aka God i kin ile riong tomo nge titevimemre ve aro i velpol.

⁷ Lemem net or mule pa omole pothoi or aini o lotu engeng nge a God nge nang na mlik na o men total mun nge ur aka God i kin ile riong tomo nge or ve aro i velpol. Lek nepes, Judare olemi otun tho, eneke lemik i engeng na tho men total mun ur aken aro i velpol.

⁸ I vova ake thomu Judare lomumu ve i pavurvur aro God i pamimi werer tokokoe areko o rin lale, kene avele, e?

⁹ “Na tho mun re ake nomenga lemik ve aka aro tho oma omaing pulua aka aro i mit rupal omaing aka Jisas aka ini Nasaret anga iion aro i kima nge.

¹⁰ Na ur areke aka tho oma i a Jerusalem. Na tho el engeng aka a pris kimangare nge, na tho paeso a God ile tokokoe pulua aka a mang a midenga lemi, na nge aka riong nongpolngare o sung riong ve aro o so rin or ma tho mun aka tho sung lek riong ve aro o so rin or.

¹¹ Na nge nang pulua aka tho esu esa a Judare ole lotuonga a vel omole omole mo aka aro tho paomelal or, na tho tongporum mun or aka aro o kelelal werer ole lemioong nge a Jisas. Ma lemik kling rintet nge or, mako tho esu esa a rem pomnga pulua aka o voth gat mo aro tho paomelal mun or nge.

Pol i ritet nge ile umong aka God i sungu i a i nge.

¹² “Ma tho oma venen aken aka tho el engeng aka a pris kimangare nge, lama tho es a Damaskus.

¹³ Lek nepes, aka penang ma tho es a sovengalo lopat, nako tho thopol pen lalanga aka i esu a Pen a Urvet me ma ile tolilisong i aolonga nge nang le toing ma i totun tho tomo nge areko o supo tomo nge tho.

¹⁴ Na them alavusnga them matu a ulue, na tho nongpol lenging aka i ria tho nge Hibrure okei ma i ri ve, ‘Sol, Sol, i vova ake ong pakerenga tho, e? Ong pakerenga

werer ake ini sivengom, eneke wong pun sival werer tho ranga ve ini bulmakau aka ieve i pun sival werer won wowonga aka tokoningare o pun sival bulmakaure nge.’

¹⁵ “Ma tho ria ve, ‘Toko Pomnga, wong ao?’

“Ma Toko Pomnga i ria ve, ‘Tho ini a Jisas aton ru wong pakerenga tho.

¹⁶ Na wong mita, tho velpoltun ong ake ve aro tho ateal wong ve aro wong ini lek umonga, naro ong ritet tokokoere nge ur aka ong thopol i nge tho ponange na nge ur areko aro tho pathengal i a wong nge panen.

¹⁷ Naro tho pamimi wong a lomngare nge na a toko rereli munre nge. Na tho pake wong a or nge

¹⁸ mo aro ong wolpot or a mideng na ong paespot or a pen lalanga la. Naro ong eltetpot mun or a Satan imeni mo aro o es a God nge, na aro ve olemio a tho nge, aro God i eltetpot ole vothung kerenga naro o voth tomo mun nge a God ilengare aka i sirum or lale mo ini ile.’

Pol i ritet nge ile umong aka God i sungu i a i nge.

¹⁹ “Na nepes a Agripa, tho panes inga ur aka tho thopol i aka i esu a Pen a Urvet me.

²⁰ Na tho panongpol tel aka a Damaskus lama a Jerusalem mun, na nge rem alavusnga aka ini Judare ole, na aka a tokokoe areko or ini Judare avele mun. Tho panongpol or ve aro o lel okime nge ole vothung kerenga na o eksing olemi mo olelio nge a God, na o panes vothung areko i pathengal i a tokokoere nge ve o eksing olemi lale.

²¹ Mako Judare o rere tho a Lotu Tepun a Vel a lok lemi ma o ri ve o pun rin tho, eneke tho panongpol or venen aken.

²² Aveto God i opaal tho, mako me i pavurvur nge ponange aka tho mitu ake na tho ritet nge ur aka i velpoltun tho. Na tho ritet ur ake a toko vulutngare tomo nge toko kimangare. Na ur ake tho ri nge kene i ranga ve ini ur areko Moses na God ile riong elnga nomengangare o ri nge ve aka aro i velpol.

²³ Ma o ri ve toko aka God i ateal i ve aro i el werer ile tokokoere, aro i el sisisong,

ma ini toko teltelnga ako aro i los werera nge rinong mo aro i panongpol ilengare na tokokoe areko or ini Judare avele, nge pen lalanga aka i pathengal or nge sovengalo aka aro God i el werer or nge.”

²⁴ Ma Pol i oma ile riong venen aken, mako Pestus i prestun i ve, “Pol! Wong ini ngongong, na lom mire aolonga aken i pavelpol ong ini ngongong.”

²⁵ Aveto Pol i olal ile riong ve, “Ok pomnga a Pestus tho ini ngongong avele. Riong areke tho ri kene i nunganga na tho ri ranga ve ini toko aka ile mire i voth.

²⁶ Nepes a Agripa, tho ri milemu ur alavusnga a wong nge, eneke lomum mire nge ur alavusnga areken. Na a ur e avele aka i melpot a lomum, eneke ur alavusnga ake i velpol nge pen lalanga na e avele kene i ngo kineo.

²⁷ Nepes a Agripa, i vava lomumo nge riong aka God ile riong elngare o wat i? Lemik mire aka lomumo nge lale.”

²⁸ Na Agripa i ria Pol ve, “Lomum vava, lom riong re atike i pavurvur aka aro i oma tho mo tho velpol ini Kristen?”

²⁹ Ma Pol i olal ile riong ve, “Ur mun e avele nge ponange eve panen aro tho nong nge a God ve aro wong tomo nge toko alavusnga aka o nongpol tho ponange, aro o velpol ini Kristen ranga ve mun i tho, aveto nik plong ve aro thomu o voth mun a mang a midenga ranga ve ini tho.”

³⁰ Lama nepes na rem a mukalinga tomo nge a Bernis na areko o men tomo nge or o losa.

³¹ Ma o espot a vel lemi ma o ria osivenga nge ma o ri ve, “Ine toko ake i oma vothung kerenga e avele aka i pavurvur aro i rin nge, eve aro o paeso i a mang a midenga nge.”

³² Ma Agripa i ria a Pestus nge ve, “I pavurvur aka aro te eltetpot toko ake a mang a midenga lale, aveto te pavurvur avele, eneke i nin ve lale aro ar Pomnga a Sisar aro i nongpol ile riong.”

Pol i es a Rom

27

(Vonge 27:1-28:31)

Pol i mon nge imot a Rom la.

¹ Ma o oma riong lale ve aro them mon a Itali la, mako o sungpot a Pol tomo nge tokokoe areko o voth a mang a midenga, a toko aka iion a Julius imeni. Na Julius ini mukalinga nge punongare or mule pa mule na i supo tomo nge punonga avlung aka ini a nepes a Sisar ile.

² Ma them ro a imot nge aka ini rem a Adramitium angare ole, aka i monsi mo i song a rumrem aka a epee a Esia. Mako them mon ol la. Na Aristarkus aka ini Masedonia anga aka a epee a Tesalonaika i es tomo nge them.

³ Na nge erangunga them otuno a Saidon. Na Julius i oma vothung sivenga nge a Pol mo i es la mo i thopol ititeinre mo o opoal i nge ur areko i oror nge.

⁴ Lama them mon ol la, aveto thue i thu ma i opengal them, mako them mon ser a mtho a Saiprus la.

⁵ Ma them mon kora ol they a epee a Silisia na Pampilia, mako them velpol a rem a Maira aka a epee a Lisia.

⁶ Ma nge wop aken, punonga a mukalinga i thepol imot aka ini Aleksandria angare ole, aka i song telek a Itali la, mako i pathoteta ol them nge.

⁷ Ma them tho inga mor mor nge nang pelie, ma i klip rintet nge them, mako them velpola ol mor mor totho a Nidus ma them pavurvur aro them tho selela avele, eneke thue aolonga i el wereral them, mako them lomolo a mtho a Krit totho nge pen ongepo aka a Salmone.

⁸ Ma them mon rumrum ol they wo petila, aveto them mon senu avele, mako them velpola ol mor mor a wop aka o apet i ve ini a Songel Sivenga aka i totho a rem a Lasea.

⁹ Na nang pulua i vus nge lemem moning, mako they le po pompomong i toth lale na i sivenga nge moning ol avele, na nang aka Judare o sem nge kene i vus lale.* Mako Pol i sung riong engenga a or nge.

¹⁰ Ma i ria ve, “Titeikre, tho thopol aka nge ler moning nge wop aken aro i sivenga avele. Aro kerengaing aolonga aro i velpol a imot nge tomo nge ur elonga. Naro

* ^{27:9:} Na nang aka Judare o sem nge i paateal nge thevuvu po pateanga.

ur areken oenga avele, tomo mun nge it tokongare ler mimiong aro i kerenga mun.”

¹¹ Aveto punonga a mukalinga ilemio nge a Pol ile riong avele. Na i nongal inga ako ini imot pathonga na imot tokoninga ole riong.

¹² Na otunuonga aken ini pen sivenga avele ako aro imot aro i otuno nge, nge thevuvu po. Taro aka toko pulua aka ru a imot lemi o ri ve aro te lospot nge pen aken mo te mon a Piniks tova eve te pavurvur, mo te voth nge pen aken nge thevuvu po. Ine songlel aken i voth a mtho a Krit na a esuonga or aini itheki lel telek a nang le esuonga nge.

Thevuvu aolonga ma thev le po pom-pomong i velpoltun or.

¹³ Ma thue ake i velpol ma i aolonga mos avele, mako tokokoere o rivenga aka aro o nak inga ole moning, mako o monteta imot krim tuntunnga ma o mono totho a thev wo peti aka ru a Krit.

¹⁴ Na palolo avele, nako thevuvu aolonga i velpol aka o apet i ve ini Vit Po a Thue. Ma thevuvu aken i thu telek a mtho a Krit la.

¹⁵ Ma thevuvu i val imot ongepo, na olemi ve aro o patho inga imot nge wop aka thue i es nge me, aveto o pavurvur avele. Ma o mothong lelu ol i, mako thue i thutet ol imot la.

¹⁶ Ma them mon telek a mtho aka iion a Kauda a epee aka thue i aolonga nge avele. Na nge wop aken lomem vurtun wok paesanga.

¹⁷ Makola o wetea ol i a imot nge, mako o el we ma o wis kalutun bibim imot nge, mo aro i paengeng imot. Ma o ngeip ve aro o mon vengveng a mamathang po aka ru a Afrika, mako o paesu sel, mako o mon gogong ol inga la.

¹⁸ Ma thevuvu na they le po pom-pomong o sivilval imot, mako nge erangunga imot thealngare o patea ol nge ur elonga asespotnga a imot powe.

¹⁹ Na nge erangunga mun imot thealngare osivenga o asespot ole omainga a ur elonga.

²⁰ Ma nge nang pulua aka them thepol ol nang ome sivemitre avele ol. Ma thevuvu

aolonga i thu thua ol them opisleonga. Mako them alavusnga lemimem aka ve i pavurvur aro them mimi ol avele.

²¹ Na nge nang pulua tokokoere o an ol avele, mako Pol i mita ol a otheki ma i ria or ve, “Titeikre, tova eve thomu o nongal inga keik mo te mothong tova te lospot a Krit, i pavurvur aro te sangpolo kerengaing ake avele.

²² Aveto ponange ake tho nong engeng nge thomu ve aro thomu o mit engeng, eneke lemik aka omu e i pavurvur aro i kerenga avele, na imot inga aro i kerenga.

²³ Lemik mire vene ake, eneke tho ini a God ile toko na tho ini ile toko umonga na nge pemliknga ile ensel i velpol a tho nge,

²⁴ ma i ria ve, ‘Pol, mothong tova wong ngeip, aro ong mit nge riong a nepes a Sisar itheki, na God i oma omaing sivenga a wong nge ma i ri ve tokokoe areko o voth tomo nge wong a imot nge aro o rin avele.’

²⁵ Mako aro thomu o mit engeng, eneke lek lemioong i engeng ve aro God i oma ur alavusnga ranga ve aka i ria tho nge lale.

²⁶ Aveto thue aro i thutet it kena te oalo a mtho e nge.”

²⁷ Na nge nang mule pa omole pothoi or penelnga thevuvu aolonga aka i thutet them a theyn ake o apet i ve ini a Mediterranean. Ma nge pemlik lopat imot thealngare o rov i aka o totho ol a rupun.

²⁸ Lamako o ul rumu we mo aka o thepolrum theyn ile lukulukuong. Ma ile lukulukuong i pavurvur nge thanga or mule pa aini. Lamako them mono mun totho la, mako o ul rumu mun we ma ile lukulukuong i pavurvur nge thanga or mule pa omole pothoi or lim.

²⁹ Ma o ngeip, ke aro vene mo imot aro i tho selele a anral pupo nge la, mako o ulu imot krim tuntunnga or penel a rumongaling. Na o nong ve aro i walpau viri viri.

³⁰ Ma ine imot thealngare o ortet so aka aro o lopot a imot nge, mako o pamonlolu wok lamako ole apaltet ve aro o ulu ol imot krim tuntunnga pelie a imot ongepo.

³¹ Mako Pol i ria punongare ole mukalinga tomo nge punongare ma i ria ve, “Aro ve imot thealngare o voth a imot

nge avele i pavurvur aro thomu o mimi avele.”

³² Mako ine punongare o sorotetpot we ako i kriminal wok, mako i matu ol la.

³³ Toth ol erangunga me, na Pol i sungu ol riong a or nge ako ve aro o an ol aning pelie, mako i ria ol ve, “Saluk thomu ma o men polpol ol nge nang or mule pa omole pothoi or penel ol ake. Na nge nang alavusnga aken thomu o ano vet aning tie avele.

³⁴ Make ranga ve tho ri engeng a thomu nge, mo thomu o ela aning pelie mo o an, mo ako aro i paengeng thomu, na omu e avele aro i el kerengaing.”

³⁵ Ma i ria or vene ake lamako i ela bret omole aka ru a otheki ma i nong na i risivengaing a God nge, mako i reku ol bret na i patea ol aning.

³⁶ Mako oopo i ngo senu ol ma or alavusnga o ela ol aning, mako o an ol.

³⁷ Them alavusnga aka them voth nge imot aken, emem titaling i velpol ma i pavurvur nge or 276.

³⁸ Ma or alavusnga aka o an ma osa pup ol, lamako o asespot ol wit monnaga alavusnga a thev stha la mo aro imot i vthopot.

Ine imot i methipthebu.

³⁹ Ma nang i avsua mesi, ma ine imot thealngare o thopol thev wo peti, aveto olemi mire nge avele. Aveto o thepol total thev a songlel aka wonwon po nge. Ma olemi aka ve, tova eve i pavurvur aro o mono nge la mo o otuno nge.

⁴⁰ Mako o sorotetpot imot krim tuntungare mo o ngou ol a thev lemi la, ma o kekrispot we areko o kintuno sauthonga or aini aka o patho vengveng imot nge, lamako o paesa ine sel roro mo thue i el i mo i thuo imot a wonwon po la.

⁴¹ Aveto ine imot i tha o nge wonwon po aka i voth a thev stha ma imot ongepo i opengalo nge. Ma i pavurvur aro i tho ol avele. Ma thev i velu vela imot kime anga makola i patea nge methepong.

⁴² Ma ine punongare olemi aka ve aro o so rin tokokoere aka nomenga aka o voth a mang a midenga, eneke aro vene mo o keo a wopo la mo ini ole loong selele la.

⁴³ Aveto ine punonga a mukalinga ilemi aka ve o mothong tova o so rin a Pol, mako i ria punongare ve, o mothong tova o oma vothung aken. Mako i ria tokokoe areko olemi mire nge keong ve aro o ophopot tel a imot nge mo o keo la mo o pelo a wonwon po.

⁴⁴ Lamako tokokoe areko olemi mire nge keong avele, aro o krim won epipeere tomo nge imot pupnga epipeere naro o mon tomoo nge la mo o otuno. Ma o oma venen aken, mako them otuno a wopo ma them alavusnga them mimi.

28

Pol ile omaing aka a mtho a Malta.

¹ Ma them otuno lale ma them voth sivenga a wonwon po, mako them nina ol nge mtho aken iion, mako o ria ol them ve iion a Malta.

² Ma tokokoe areko o voth a mtho aken o oma vothung sivenga nge them. Na vit mol ma pen elonga i merir, mako o papola won sesenga ma o nongpoo them.

³ Ma Pol i paen tomoal wonre ma i paena i a won sesenga nge. Na puro aka iwo ei i nes toko ma i rin, kene i voth a won areken lemi, ma i rov won sesenga velnga, mako i repot ma i atet a Pol imeni ma i monlol ol nge.

⁴ Ma toko na seng areko ru nge rem aken o thepol aka puro aken i atet a Pol imeni ma i monlol. Ma o ri ve, “Thepol, i nunganga aka toko ake ini toko aka i so rin tokokoere, eneke i rin avele a thev stha, aveto ler god aka i olal tokokoere ole vothung kerenga ilemi ve aro i mimi avele.”

⁵ Aveto Pol i titpot puro aken ma i mata a won sesenga nge. Na ur e avele i pakerenga a Pol ile mimiong.

⁶ Mako toko na seng o thopolrum ol aka ve, aro Pol ini peti i wimpot eve aro i matu mo i rintetpot, aveto o theal rang ma ur e avele i velpol, mako o eksing olemi na o ri ve, “Ake va ini god e.”

⁷ Na ulue epee aken ru nge rem aken ini mukalinga nge mtho aken iion a Publius ile, ma i nongpoo them a ile vel la ma them voth tomo nge i na i theal senu them ma i pavurvur nge nang or me.

⁸ Na Publius itema ini multhang na ini peti i vel na i pipi. Ma Pol i es a i nge la ma i thepol i ma i nong na i ronga imeni a i nge ma i pamimia i.

⁹ Ma i oma venen aken ma ni multhanginga areken ru o voth nge mtho aken ma o es mun a Pol nge, ma i pamimi or, mako o sivenga werer.

¹⁰ Ma o oma vothung sivenga nge them ma toth ol aka aro them monpot ol ma o sungu ur areko them oror nge ma o paena i a imot nge.

Pol ile esong a Rom la.

¹¹ Ma them voth a mtho a Malta nge ngov or me. Lamako them roa nge imot aka ini Aleksandria angare ole. Na imot aken i voth a Malta i pavurvur nge thevuvu po ile vusong. Na imot aken iion a "god Sus itun or aini." *

¹² Ma them mon ma them velpol a rem pomnga aka iion a Sirakius. Ma them voth nge, nge nang or me.

¹³ Ma them monpot a Sirakius ma them velpol a rem pomnga aka iion a Regium. Na nge erangunga thue sivenga i velpol ma i thutet them ma nang or aini i vus, mako them velpol a rem pomnga aka iion a Puteoli.

¹⁴ Na nge wop aken them thepol toko lemioongare pelie ma o nongpoo them mo aro them voth tomo nge or i pavurvur nge nang or limai. Lamako them losa ma them es a Rom la. Na lemem esong a Rom i vene re aken.

¹⁵ Ma toko lemioongare aka a Rom o nongpola aka ve, them velpol. Ma o losa ma o es mo aro o thepolo them a sovengalo. Ma pelie o mulal nge pathunonga aka o olol pel ole lulu nge, aka ini a Apius ile.[†] Na pelie o mulal nge pen aka vel or me o voth nge aka ini tokokoere ole ngoaloinga.[‡] Ma Pol i thopol or ma i ri sivengaing a God nge, mako ilemi engeng.

¹⁶ Mako them velpol a Rom ma osa wom nge a Pol ve aro ienga aro i voth a vel omole nge. Na punonga omole aro i theal total i.

* **28:11:** Na nge imot aken o ut a god Sus itun or aini oa sei a ongepo. Ma oion a Kastor na Poluks. † **28:15:** Apius ile pen ile melangaing i pavurvur nge 72 kilomita a Rom. ‡ **28:15:** Na vel or me ile melangaing i pavurvur nge 55 kilomita a Rom.

Pol i panongpol nge Panongpolong Sivenga a Rom.

¹⁷ Na Pol i voth nge nang or me a Rom ma i leng veliloalo Judare ol mukalingare, ma o veliloalo pel ma i ria or ve, "Titeikre, na tho oma ur e avele nge lerngare tomo nge ar pompomere ole patorong, aveto Judare o rere tho a Jerusalem ma o sungu tho a Romre omeni.

¹⁸ Ma o oma ninong pulua a tho nge ma o sis ve aro o modoppot tho, eneke o thopol aka tho oma vothung kerenga e avele aka aro o so rin tho nge.

¹⁹ Aveto Judare o wathalal riong aken, mako lek sovengalo ol e avele, mako tho ri werer mun ve aro ar pomnga a Sisar aro i nongpol lek riong. Aveto lek riong e avele aka lemik otun lerngare nge.

²⁰ Na tepun aka tho leng thomu me kene i vene: Tho sis ve aro tho thopol thomu na tho ri tomo nge thomu. Na tho voth a mang a midenga, eneke lek lemioong i engeng nge ur aka it Israelre te men total nge."

²¹ Ma o olal ile riong ve, "Toko e avele aka a Judia i wat malueng a them nge me. Na toko e avele mun aka o voth tel a Judia ma o ria them nge ur kerenga e aka wong oma i, kene avele.

²² Aveto lemimem aka ve, aro them ninet lomum, eneke a pen elonga tokokoere o ri riong kerenga nge toko avlung aton aka ong voth nge."

²³ Mako o rongu mos mun nang e aka aro o velilo pel nge, ma nge nang aken or pulua o es a vel aka Pol i voth nge. Ma i patea rulpo na i pavurvur nge pemliknga ma i ritet or nge a God ile menong e nepes, na i ri nge a Moses ile patorong na nge riong aka God ile riong elnga nomengangare o wat i. Na ilemi aka aro i ri ololo or ve Jisas ini toko aka God i ateal i ve aro i el werer ile tokokoere.

²⁴ Mako Pol i pavurvur i ri ololo tokokoe pelie, mako olemio nge ile riong aken, aveto pelie aka olemio nge ile riong avele.

²⁵ Ma o wathalal pel nge riong aken ma o plosa ma o es, ave a mukaling tel

Pol i patopalal ile riong ve, “Oni Riringa i ri riong nunganga a titevirre nge, aka a Aisaia aka ini a God ile riong elnga nomenganga iwo.

²⁶ Ma i ria ve,
‘Es mo ri tokokoe areken ve,
“Aro thomu o nongpol, na o nongpol,
aveto i pavurvur aro lomum mire
nge avele.

Naro thomu o kath, na o kath,
aveto aro thomu o thopol i avele.”

²⁷ Eneke tokokoe areken olemi engeng nge
ole vothung
na o mon sopal otelnga na otheki
molok.
Na aro ve o oma vene aken avele,
aro o the naro o nongpol.
Maken aro olemi mire nge
mo aro o eksing olemi a tho nge
mo tho pamimi or.’ *Aisaia 6:9-10*

Na God i ri venen aken.”
²⁸ Ma Pol i pavus ile riong ve, “Na tho sis
ve aro lomumu mire nge ve, God ile riong
ako i el werer tokokoere nge kene i sungu
i a tokokoe areko or ini Judare avele lale,
naro o nongal i.”

²⁹ Ma Pol ile riong i vus ma Judare o losa
ma o es ma ole volpeling i aolonga na o
pun ol pel nge riong a osivenga nge.

³⁰ Na nge tovu po or aini Pol i ngoalo a
vel aka na i ol i a tokoninga nge la. Na i
nongpoo tokokoe areko o es a i nge mo o
thopol i.

³¹ Ma i panongpol nge a God ile menong
e nepes. Na i patorial or nge a Toko
Pomnga a Jisas Krais. Na i ngeip nge riong
panongpolnga avele. Na toko e avele i rial
i nge omaing aken.

Na i re aken. I vus.

Toko powe ninengare o ri ve Pol i
vthopot nge kinong ake ma i esu esa mun
nge tovu po or lim, ma i panongpol nge
Panongpolong Sivenga a pen elonga. Ma
ile esong i mulalu ol nge epee aka ini a
Spen. O thepol ritetong nge a 1 Timoti aka
i ritet nge pen alavusnga aka Pol i es nge.
Na nge aka Pol i lo werer a Rom la, ma
o paeso werer mun i a mang a midenga,
lamako o so rin i.

Pol ile malueng ako i wat i a toko lemioongare nge ako o voth a rem pomnga a Rom Rom Ritetong nge a Rom

Na nge a Pol ile panongpolong a esong menga i es a pen epee ako ini a Gris na iion aininga ini a Akaia, na i wat malueng ake a toko lemioongare nge ako o voth a Rom. (Aro o thepol Pakekere ole Omaing 20:2-3) Na rem pomnga a Rom ini rem ako i aolonga nge rem alavusnga ake ru a ulue, nge wop lemi aken. Na Pol i sis ve aro i es a or nge mo aro i opoal or. (1:11-15) Aveto i sis ve aro i es tel a Jerusalem mo i sung umtun pelie a toko lemioongare nge. (15:25-28) Mako Pol i wat malueng ake a or nge mo aro olemi mire ako ve, aro i porum tel or nge ile esong a Spen la. (15:23-24) Na Pol i thepol vet toko lemioongare ake o voth a Rom rongan, na i sis ve aro i ritet tel or nge a God ile sovengalo ake aro o velpol ini toko riringa a itheki. Na toko lemioonga pulua ake a Rom or ini Judare avele, aveto pelie a or nge ini Judare. Na Pol i sis ve aro i panine olemi ake ve, ur aka God i kin ile riong nge tomo nge Judare kene ilemi simikal i avele. Avele, God ini God vengvenga, na i panes vengveng ile riong elonga, na ini God vengvenga venen aken nge ake i apet toko ini toko vengvenga a itheki, tova i lemio nge a Jisas. (1:17-17) Na aro ve God i apet toko ini toko vengvenga a itheki, aken aro i pamimi toko aken. Na Pol i ri ve, toko alavusnga, areko ini Judare tomo mun nge areko or ini Judare avele, or alavusnga o oma vothung kerenga, (1:18-3:20) na o pavurvur ake aro o velpol ini toko vengvenga a God itheki nge a Moses ile patorong panesnga, kene avele. Aveto aro ve toko e ilemio nge a Jisas Krais, God aro i themosal i naro i apet i ve ini toko vengvenga a itheki, eneke Krais eltetpot ile vothung kerenga lale. (3:21-26) Na aro ve God i pamimi it venen aken, aken i pathengal it ake ve, ini God vengvenga

na i panes ile riong ake i kin tomo i nge Judare nomenga. (3:21, 26) Aveto toko e avele i pavurvur aro i velpol ini toko vengvenga a God itheki nge a Moses ile patorong panesnga. Avele, aro ilemio nge a Jisas ranga ve ake Abraham ilemio nge a God. (3:27-4:25) Maken aro ve God i apet it ini toko vengvenga a itheki, ake nge ler teoong a Krais nge, aken ile lemi klingong i voth ol a it nge avele. Avele, te voth lemi moring tomo nge a God, eneke it toko kerenga te velpol ini a God ilengare nge a Jisas ile omaing. (5:1-11) Na i nunganga ake nomenga te voth a rinong lemi, eneke te oma vothung kerenga, aveto God ile sungong ake i sung polpol i a it nge, kene i aolonga rintet nge ler vothung kerenga areken, mako i sung mimiiong ake aro ile vusonga avele a it nge. (5:12-21) Na aro ve God i eltetpot it a vothung kerenga lemi, te mothong tova te panes werer mun vothung kerenga, aveto aro te panes inga a Krais na vothung sivenga ake i sis ve aro te oma i. (6:1-23) Na i nunganga ake nomenga toko alavusnga olemi i voth nge vothung kerenga omanga, (7:7-25) aveto te voth ol a Moses ile patorong lemi avele, (7:1-6) mako te pavurvur ol ake aro te mimi a Oni Riringa ile thealing lemi. (8:1-39) Na Judare o engeng nge a Moses ile patorong panesnga mo o velpol ini toko vengvenga a God itheki, aveto o pavurvur avele, mako God i pakeu a Krais me, na aro ve lemiro a i nge, aro te velpol ini toko vengvenga a God itheki, ranga ve ake i pator or nge nomenga. (9:1-11:36) Na God i apet it ini toko vengvenga venen aken, mako aro te panes inga vothung vengvenga ake i sis ve aro te oma i. (12:1-15:13)

Sovengalo ake toko i velpol ini toko vengvenga a God itheki, ini inga nge ile lemioong inga

(Vonge 1:1-4:25)

Pol i ritet nge ile omaing ake ini pakeke.

¹ Tho a Pol ake tho wat malueng ake, na tho ini a Krais Jisas ile umonga, na i leng

tho ve tho ini ile pakeke, na i paateal tho ve aro tho panongpol nge ile Panongpolong Sivenga.

² Nomenga God i kin ile riong nge Panongpolong Sivenga aken, na ile riong elngare o wat nge, aka a ile erere riringa lemi.

³ Na i ritet nge Itun aka i velpol ini toko, na ini nepes a Devit itevinga,

⁴ na ion i riri rintet, aken i pathengal it aka ve, ini a God Itun aka ile engenging i aolonga, eneke i los werera nge rinong, ini ar Pomnga a Jisas Krais.

⁵ Na nge a Jisas, God i themosal them, mako tho velpol ini ile pakeke mo aro tho papomnga iion, naro tho panongpol toko alavusnga areko or ini Judare avele, mo aro o nongal ile riong na olemio a i nge.

⁶ Na thomu ini toko pelie a or nge aka God i leng thomu mo o velpol ini a Jisas Krais ile.

⁷ Tho wat malueng ake a thomu toko lemioonga alavusnga aka o voth a Rom. Thomu ini areko God ia sagu thomu, na i leng thomu mo thomu ini ile. Aro thomu o el themosaling na lemi moring a Titemer a God tomo nge ar Pomnga a Jisas Krais nge.

Pol i sis ve aro i porum vet Rom angare.

⁸ Tho sis ve aro tho ri tel a thomu nge vene: Nge a Jisas Krais tho ri sivengaing a lek God nge, nge thomu alavusnga, eneke lomu lemioong i kima a pen elonga ake ru a ulue.

⁹ Tho sung lek mimiong alavusnga aka tho betet nge a God ile omaing aka tho panongpol nge Itun ile Panongpolong Sivenga. Na God aken ilemi mire aka ve, lek riong ake i nunganga aka tho ri ve, tho nong evelelnga nge thomu,

¹⁰ nge lek nongong alavusnga.

Nang pulua lale aka lemik ve aro tho porum vet thomu, aveto lek so i thep rongan, na tho nong engeng tova ve God i sis ve aro i oma i, aka aro i thep ol sovengalo aka aro tho es a thomu nge wot.

¹¹ Na tho nong venen aken, eneke tho sis rintet ve aro tho thopol thomu mo aro tho sung Oni Riringa ile sungong pelie a thomu nge, mo aro i paengeng thomu.

¹² Na lek riong aken i mirenga ve, nge lek lemioong na nge lomu lemioong mun, aro te paengeng pel nge, nge aka tho voth tomo nge thomu.

¹³ Na titeikre, tho sis ve aro lomumu mire senu aka, tho monsi nge nang pulua aka aro tho es a thomu nge wot, ave i pavurvur nge ponange ur pelie rongan i mit roal tho. Tho sis ve aro tho um a omu wop, mo aro tho pavelpol mun monngomu sivenga ranga ve aka tho pavelpol i a rem elonga aka or mun ini Judare avele.

¹⁴ Eneke God i pavurpol lemik ve aro tho panongpol nge toko alavusnga, ranga ve ini areko or ini Grikre aka o el pamirealing, tomo mun nge areko or ini Grikre avele aka o el pamirealing avele, na toko powe ninengare tomo mun nge toko powe ninengare avele.

¹⁵ Mako lemik engeng ve aro tho panongpol mun Panongpolong Sivenga a thomu Rom angare nge.

Tokokoere o velpol ini toko vengvenga a God itheki nge Panongpolong Sivenga panesnga.

¹⁶ Na lemik engeng venen aken, eneke lek maral nge a Krais ile Panongpolong Sivenga panongpolnga avele, eneke God ile engenging i voth nge, aka aro i pamimi toko alavusnga tova ve olemio nge i. Them Judare them nongpol tel i, lamako areko or ini Judare avele o nongpol mun i.

¹⁷ Na lek riong aken i mirenga ve, nge Panongpolong Sivenga aken God i pathengal it nge sovengalo aka aro tokokoere o velpol ini toko vengvenga a itheki, aka nge ole lemioong inga. Na evelelnga God i oma venen aken, aro ve toko e ilemio nge a God ile riong, God aro i apet i ve ini toko vengvenga. Na i ranga ve aka ile erere i ri nge aka i ri vene:

“God aro i apet toko ini toko vengvenga nge ile lemioong inga,
maken aro i el mimiong sivenga.”

Habakuk 2:4

Toko alavusnga okime lelalpot a God.

¹⁸ Na riong aken i nunganga, eneke God aka i voth a Pen a Urvet i pathengal it aka ve, ilemi klingtun, naro i paomelal, areko o papompom i avele, na o oma vothung

kerenga a tokokoere nge, nge ako o mit roal riong nunganga nge ile omaing.

¹⁹ Eneke ur kathnga aka God isa wom i a tokokoere nge mo olemi mire nge i, kene olemi mire nge lale, eneke God i pango pat i a or nge lale.

²⁰ Riong aken i nunganga, eneke nomenga nge nang aka God i pamenu ur alavusnga na i mulu ponange, tokokoe areko o thopol a God nge otheki avele, o pavurvur aka aro olemi mire nge aka i voth ini a God, na nge ile engenging aka aro ile vusonga avele, eneke o thopol ur alavusnga aka i oma i, maken ole riong tepun e avele aka aro o ri ve, "Lemik mire nge a God avele."

²¹ Na ole riong tepun e avele, eneke nomenga olemi mire nge a God, aveto o papompom i ranga ve ini God avele, na o ri sivengaing a i nge avele. Na o patea lemi pelekpolong nge a God, mako olemi i nine avele, na olemi a mideng.

²² Na o ri ve, "Them ini toko powe ninengare." Aveto o velpol ini toko ngongongre.

²³ Mako o lel okime nge a God aka aro ile vusonga avele ilotualnga, na o tepolal i nge avalare olotualnga aka o te ir ma o velpol ranga ve ini toko aka i rin, na men, na mekerem, na ur reingare oa seire.

²⁴ O oma venen aken, mako God isa wompot or mo o oma ol vothung kerenga kathnga aka i mita a olemi, ranga ve ini toko na seng aomngare, mako o oma ol vothung aka o palemara pel oni peti nge.

²⁵ Na o ela riong aka i ri nunganga nge a God, ma o tepolal i nge riong le apaltetonga, na o lotual ur areko Patenger i pamenu ir, na o sung ole sungong a or nge, aveto o oma venen aken a Patenger nge avele, ini God aka aro te risea i evelelnga aka aro ile vusonga avele. I nunganga.

²⁶ Na tokokoere o oma venen aken, mako God isa wompot or mo o panes inga vothung le maralongare aka i voth engeng a olemi, ranga ve aka sengre o lel okime nge peangeong a menong vengvenga, na o tepolal ol i nge vothung aka sengre o ngo tomo nge pel.

²⁷ Na i vene mun aka, totomonere o lel mun okime nge ngo tomoing nge sengre, na olemi vel rintet nge ngo tomopeling

nge osivenga. Totomonere o oma vothung le maralonga tomo nge totomonere, mako osivenga o el ol ole vothung kerenga aken olalnga, i pavurvur nge ole omaing kerenga aka o oma i.

²⁸ Na oni plong ve aro God ile mire nunganga i ngoo a olemi, mako God isa wompot or mo o panes osivenga ole lemi rumong kerenga, na o oma vothung kerenga aka i sivenga avele aka aro tokokoere o oma i.

²⁹ Na o vuul rintet nge vothung kerenga elonga omanga, na vothung aka i vengveng avele, ranga ve aka o theseal tokokoere ole ur elonga, na ole ngarang tokokoere, na oni plong ve aro ur sivesivengare aro i velpol a tokokoere nge, na o so rin polpol tokokoere, na o vol pel, na ole apaltet, na o pamens kerere tokokoere, na o ri ngunngun,

³⁰ na o pakerenga tokokoere oion, na oni silal a God, na o ri tangatun nge tokokoere, na o magon, na o paroro osivenga oion, na olemi rum nge vothung kerenga ponganga omanga, na o avsa otemaere ome oninaere ole riong,

³¹ na lemi rumong sivenga i voth ol a or nge avele, na ole lemioong avele, na ole olotet tokokoere, na olemi esal werer nge olengare avele.

³² Na olemi mire lale aka God ile torong vengvenga i ri ve, areko o oma venen aken, i sivenga aka aro o pun rin or nge ole vothung areken, aveto o kenkeno inga nge omanga, na e mun e aka o risea nge areko o oma mun vothung aka i venen aken.

2

God ienga inga aro i pamit toko alavusnga nge riong.

¹ Na i nunganga aka God aro i paomelal areko o oma vothung kerenga venen aken, maken omu omole omole aka o teltun oa, i tepun e avele aka aro thomu o men kine nge a God ile paomelaling, eneke nge aka thomu o teltun oa, akennga o teltun mun sivengomu, eneke thomu o oma mun vothung kerenga ranga ve ini or.

² Na lemire mire aka God ile vothung aka i teltun areko o oma venen aken oa, i vengveng inga.

³ Aveto thomu ini inga toko ulue angare ako o teltun mun areko o oma vothung kerenga venen aken oa, aveto thomu o oma mun vothung kerenga areken, ava thomu o rivenga aro o lo nge a God ile paomelaling, e?

⁴ O mothong tova o punapo polpol nge ile vothung ako ile lemi esaling rongan i voth, na i men tetal, na i paomelal virial thomu avele. Na God i oma ile vothung sivenga aken, mo aro thomu o eksing lomumu.

⁵ Aveto thomu o eksing avele, eneke lomumu i rit, na o thep opomu avele, maken thomu o rong esa a God ile paomelaling a thomu nge, nge nang ako aro i parong pat ile lemi klingong, na nge nang aken tokokoere aro oleli mire ol aro ve, ile paomelaling aken i vengvengtet inga,

⁶ naro "i olal i a toko omole omole nge, i pavurvur nge ole vothung." *

⁷ Ranga ve ako aro i sung mimiong ako aro ile vusonga avele, nge areko o betet inga nge vothung sivenga omanga, na o sis rintet ve aro God i risea or, na i paesa or, naro o rin avele mun.

⁸ Aveto aro i sung ile lemi klingong na ile paomelaling nge areko o opoal inga osivenga, na o avsa riong nunganga panesnga, na o panes vothung kerenga omanga.

⁹ God aro i sung matheong na sisong a toko omole omole nge ako i oma vothung kerenga, aro i sung tel i a Judare nge, lamo nge areko or ini Judare avele.

¹⁰ Aveto aro i risea, na i paesa, na i sung lemi moring nge areko o oma vothung sivenga, aro i sung tel i a Judare nge, lamo nge areko or ini Judare avele,

¹¹ eneke God ile avrumong omole inga ako i avrum toko alavusngare nge.

¹² Eneke toko alavusnga aka oleli mire nge a Moses ile patorong avele, God aro i avrum ole vothung tomo nge patorong aken avele, aveto aro i teltun oa, eneke o oma vothung kerenga. Na toko alavusnga aka oleli mire nge a Moses ile patorong, God aro i teltun mun oa, eneke o panes patorong aken avele.

¹³ Riong aken i nunganga, eneke ini areko o nongpol inga a Moses ile patorong,

ako aro o velpol ini toko vengvenga a God itheki, kene avele. Aveto ini inga areko o panes a Moses ile patorong, aka aro o velpol ini toko vengvenga a God itheki.

¹⁴ Eneke areko or ini Judare avele, aka Moses ile patorong i voth a or nge avele, nang pelie vothung sivenga i mita a oleli me aka Moses ile patorong i ri nge, aveto oleli mire nge a Moses ile patorong avele. Aken kene i pathengal it aka ve, oleli mire nge vothung kathnga aka i sivenga aka aro o oma i.

¹⁵ Na ole vothung aken i pathengal it aka ve, God ile torong i voth a oleli, na ole lemi rumong i pathengal mun it nge aken, tova ve oleli i ngo senu eve i ngo senu avele nge ole vothung pelie.

¹⁶ Na God aro teltun oa venen aken nge nang aka aro God i pakeu a Krais Jisas me mo aro i avrum tokokoere nge oleli inkilenga. Na Panongpolong Sivenga aka tho panongpol nge kene i venen aken.

Judare oleli ve aro o velpol ini toko vengvenga a God itheki nge a Moses ile patorong panesnga.

¹⁷ Na i vava nge thomu? Thomu areko o ri ve thomu ini Judare. Na lomumu i voth inga aka aro o velpol ini toko vengvenga a God itheki nge a Moses ile patorong panesnga. Na thomu o paesa sivengomu aka God i ateal thomu ve thomu ini ile,

¹⁸ na lomumu mire nge a God ileli, na lomumu mire nge vothung kathnga aka i sivenga rintet, eneke o pamireal thomu nge a Moses ile patorong.

¹⁹ Na lomumu i engeng aka ve, sivengomu o pavurvur aka aro o pathengal areko or ini Judare avele a God nge, ranga ve aka toko i ti theki prosnga a sovengalo, na lomu riong i panine tokokoere oleli ranga ve ini pen lalanga i to a mideng.

²⁰ Na lomumu i engeng ve aro o pavengveng areko ole mire i oror nge a Moses ile patorong, na areko ole mire i oror nge a God ranga ve ini wainlangaere. Lomumu i engeng ve o pavurvur nge opatalnga venen aken, eneke lomumu ve, mire alavusnga na riong nunganga i voth inga a Moses ile patorong lemi.

* **2:6:** Buk Song 62:12

²¹ Na aro ve lek riong aken i nunganga nge thomu areko o patoral tokokoere, i vova ako thomu o patoral sivengomu avele, e? Thomu o tor ole ve, o mothong tova o kem, na i vova ako thomu o kem, e?

²² Na thomu o ria tokokoere ve, o mothong tova o ngo tomo nge areko or ini oewo avele, na i vova ako thomu o ngo tomo nge areko or ini ewomu avele, e? Na numu silal rintet avalare, na i vova ako thomu o kem ur pelie a avalare ole lotuonga a vel, e?

²³ Na thomu o paesa sivengomu nge ako God i sung ile torong a thomu nge, na i vova ako thomu o pavthongal a God nge ako o avsa ile torong aken, e?

²⁴ Na lomu vothung aken i ranga ve aka God ile erere i ri nge aka i ri vene:

“Areko or ini Judare avele

o ri tangatun nge a God,
eneke o thopol thomu Judare
lomu vothung aka i kerenga.”
Aisaia 52:5

Aro te velpol ini a God ilenga nunganga vava?

²⁵ Na aro ve thomu o panes a Moses ile patorong, i sivenga aka aro o is lomu aka ini paatealngomua aka thomu ini a God ile. Aveto aro ve thomu o avsa a Moses ile patorong, paatealngomua aken ini ur polpolnga, na a God itheki i ranga ve aka o is lomu avele.

²⁶ Na areko or ini Judare avele, o is ole avele, aveto aro ve o panes a Moses ile patorong, aro o velpol ranga ve ini areko o is ole a God itheki.

²⁷ Na toko aka o is ile avele, ave i panes a Moses ile patorong, toko aken aro i teltun omu aka o is lomu na o el a Moses ile patorong aka o watu i a thomu nge, eneke thomu ini patorong avsangare.

²⁸ Na lek riong aken i nunganga, eneke toko aka i pamalmal i ranga ve ini Judare, aveto ilemi meninin, ini a God ile toko nunganga avele. Na aro ve i el paatealing aka o is ile, aken ini paatealing aka ini a God ile toko nunganga avele.

²⁹ Aveto toko ini a God ile toko nunganga, tova ve i panes a God ile torong aka a ilemi. Na paatealing aka ini a God ile toko nunganga, ini ur aka i velpol a ini peti inga aka o is ile, kene avele, ini ur aka

i velpol a ilemi aka Oni Riringa i eksing i. Na toko aka i venen aken, aro i el riseaing a God nge, na a tokokoere nge avele.

3

God i panes vengveng ile riong aka i kin i nomenga.

¹ Na lek riong aken i nunganga, na ava thomu o ri ve, “Judare o mukal nge areko or ini Judare avele vava, e? Na Judare ole vothung aka nge toko ini peti isnga, aro i opoal or vava, e?”

² O, na o mukal na ole opoaling pulua i voth. Tho ri tel vene a mukaling: God i sung isivenga ile riong nunganga a or nge, mo aro o watu i mo o theal senu i.

³ Na aro ve pelie a or nge olemio nge na o panes i avele, aro vava? O mothong tova lomumu ve, ole vothung aken i oma a God mo i pasulngal ile riong aka i kin tomo i nge or nomenga.

⁴ Avele aka. Aveto aro ve toko alavusnga ake ru a ulue o velpol ini toko le apalte-tonga, God kene aro i panes vengveng ile riong nunganga aken. Na i ranga ve ini a God ile erere aka i ri nge ve:

“Toko alavusnga aro olemi mire aka,
God, lom riong i vengveng rintet,
na aro ve o pamit ong nge riong,
aro lom mong riong aken.” *Buk Song 51:4*

⁵ Na aro ve tokokoere o avrum pel nge them Judare lemem vothung kerenga tomo nge a God ile vothung vengvenga, akennga lemem vothung kerenga i pathengal tokokoere aka God i vengveng, ma aro them ria ol uneke? Na i vava, aro them ri ve God i vengveng avele nge aka ilemi klingtun them Judare? (Lek riong aken i ranga ve ini toko ulue angare ole.)

⁶ Avele aka! Aro them ri venen aken avele. Aro ve i venen aken, God i pavurvur avele aka aro i paomelal tokokoere ake ru a ulue nge ole vothung kerenga.

⁷ Na ava toko Juda e aro i ri ve, “Lek vothung kerenga i pathengalpot a God ile vothung vengvenga mo i nine, mako tokokoere o papomnga i. Na i vova aka God aro i paomelal tho ranga ve aka tho oma vothung kerenga, e? Eneke

lek vothung kerenga aken i pavelpol iriseanga.”

⁸ Na aro ve toko aken ile riong aken i nunganga, i pavurvur ako aro o ri ve, “Aro te oma vothung kerenga mo aro vothung sivenga i velpol a i nge.” Na areko o ri venen aken, o pavurvur nge a God ile paomelaling ako aro i sungu i a or nge. Aveto toko pelie o ri ve na o ri tangatun nge tho ve, “I re aken, aken ini a Pol ile riong.”

Toko e avele ile vothung i vengveng a God itheki.

⁹ Na i vava, them Judare, them sivenga nge areko or ini Judare avele, a God itheki? Avele! Eneke tho pathengal thomu nge lale aka ve, Judare tomo mun nge areko or ini Judare avele, or alavusnga o voth a vothung kerenga lemi.

¹⁰ Na i ranga ve aka God ile erere i ri nge ve,
“Toko e avele ini toko vengveng a God
itheki,
na e ol e avele.

¹¹ Na toko e avele ile mire i vengveng,
na e avele i ortet a God.

¹² Na toko alavusnga o lel okime nge a God,
na or alavusnga o velpol ini ur polpol-
nga inga a itheki.
Na toko e avele i oma ol vothung
sivenga,
na e ol e avele. *Buk Song 14:1-3*

¹³ Na riong aka i espot a owo me
i plot ranga ve ini vuvepun.
Na o patelek tokokoere
nge ole riong le apaltetonga. *Buk
Song 5:9*

Na ole riong i pakerenga tokokoere
ranga ve ini pilimo iwo einga kerenga
ako i pun rin tokokoere nge. *Buk
Song 140:3*

¹⁴ Na owo i vual nge voltitetong
na riong aka i welwel. *Buk Song 10:7*

¹⁵ Na opisleonga olemi inga aka nge toko
so rinnga.

¹⁶ Na pen elonga aka o es nge,
o pamen kerere vet inga aka ini
tokokoere,
na o pavelpol vet inga aka ini math-
eongre nge.

¹⁷ Na olemi mire nge tokokoere opamense-
nunga avele. *Aisaia 59:7-8*

¹⁸ Na mimiong aka nge a God ingeipnga
i voth vet a or nge avele.” *Buk Song
36:1*

God ile riong i ri nge venen aken.

¹⁹ Na lemir mire nge aka, ur kathnga aka
God ile torong i ri nge, kene them Judare
them voth a lemi, eneke God i sungu i a
them nge lale. Na i sungu i a them nge mo
aro toko e avele i pavurvur aro i kelelal ve,
“Tho oma vothung kerenga e avele.” Na i
sung mun i mo aro toko alavusnga ake ru
a ulue aro o voth a ile paomelaling lemi.

²⁰ Eneke toko e avele i pavurvur aro
i velpol ini toko vengvenga a God itheki
nge patorong panesnga, ave patorong ile
omaing ve aro i pathengal it ve, ler
vothung i kerenga.

*Toko i velpol ini toko vengvenga a God
itheki nge ile lemioong inga.*

²¹ Aveto ponange, God i parong pat
sovengalo relnga e aka aro te velpol ini
toko vengvenga a itheki, na ini a Moses
ile patorong panesnga avele, ini sovengalo
ako Moses ile patorong tomo nge a God ile
riong elngare o ri nge nomenga.

²² Na sovengalo aken i vene: Tokokoere
o velpol ini toko vengvengare a God itheki
nge ole lemioong inga nge a Jisas Krais. Na
toko alavusnga aka olemio nge a Krais aro
o velpol ini toko vengvengare venen aken,
eneke toko alavusnga o vur e pel inga a
God itheki,

²³ eneke it alavusnga te oma vothung
kerenga, mako te pavurvur nge a God ile
paatealing sivenga aka i paateal i a it nge,
kene avele.

²⁴ Aveto God i themosal it, na i ol werer
it nge a Krais Jisas ile rinong, make te
velpol ini toko vengvengare a itheki, na i
pavurvur aro te olal i a i nge avele.

²⁵ Na God i pakeu a Jisas mo o so rin i
alamimminga a pulua otheki. Na nge ile
rinong aken, i pavurvur aka aro God ile
simikal tokokoere ole vothung kerenga,
tova ve olemio nge ile rinong aken. Na nge
ile omaing aken God i pathengal tokoko-
ere aka ve, ile vothung i vengveng aka
nomenga i olal virial tokokoere nge ole

vothung kerenga avele, eneke i punapo inga i pavurvur ako aro Krais i el ole vothung olalnga nge ile rinong.

²⁶ Na i oma venen aken mo aro i pathengal aka ve, ini a God vengvenga, na ile vothung i vengveng mun aka ponange i apet toko ini toko vengvenga tova ilemio nge a Jisas.

²⁷ Na riong aken i nunganga, mako i vava? I pavurvur aro te paesa sivenger nge aka te velpol ini toko vengvengare a God itheki? Avele, eneke te velpol ini toko vengvengare a God itheki nge ler vothung avele, ini inga nge ler lemioong inga.

²⁸ Make lemir mire aka toko i velpol ini toko vengvenga a God itheki nge ile lemioong, na nge a Moses ile patorong panesnga avele.

²⁹ Na i vava, God ini Judare oenga ole? Avele, ini areko or ini Judare avele ole God mun.

³⁰ Eneke God omole inga i voth. Na areko o is ole aro o velpol ini toko vengvengare a God itheki nge ole lemioong inga nge a Jisas, na i vene mun nge areko o is ole avele, o velpol mun ini toko vengvengare a God itheki nge ole lemioong inga nge a Jisas.

³¹ Na aro ve te velpol ini toko vengvengare a God itheki nge ler lemioong inga, i vava, i pavurvur aka aro te mothongpot a God ile torong panesnga? Avele, eneke te paengeng ile torong aken nge aka te panes i nge ler lemioong.

4

Abraham i velpol ini toko vengvenga a God itheki nge ile lemioong.

¹ Na aro ve God i apet toko ini toko vengvenga nge ile lemioong, i vava nge a Abraham aka ini titevir nomenganga, e?

² Aro ve Abraham i velpol ini toko vengvenga a God itheki nge ile vothung, aken i pavurvur aro i paesa isivenga iion, aveto a God itheki i pavurvur aro i paesa isivenga iion avele,

³ eneke God ile erere i ri vava? I ri vene: "Abraham ilemio nge a God ile riong,

mako God i apet i ve ini toko vengvenga a itheki." *Stat 15:6*

⁴ Na aro ve toko i um na i el iolonga, te apet iolonga aken ini sungong avele, aveto aken ini ile omaing olalnga inga.

⁵ Aveto God aro i apet areko o oma vothung kerenga, ini toko vengvengare a itheki nge ole lemioong na nge ole omaing avele.

⁶ Na i ranga ve nepes a Devit mun i ri nge, aka i ri nge areko olemi sivenga rintet, eneke God ilemi rum nge ole vothung avele, na i apet or ini toko vengvengare a itheki. Na i ri vene:

⁷ "Sapase areko God ilemi simikal ole vothung
 ako o avsa ile torong,
 na areko i palestun mun ole vothung
 kerenga.

⁸ Na sapase mun areko
 Toko Pomnga ilemi rum ol
 ole vothung kerengare avele."
Buk Song 32:1-2

⁹ Na i vava nge sapaseong aken? Ini Judare aka o is ole kene ini oenga ole? Eve ini areko o is ole avele ini ole mun? Aro lemir rum senu tel nge a Abraham. Lemir mire lale aka ve, God ile erere i ri ve, "Abraham ilemio nge a God ile riong, mako i velpol ini toko vengvenga a itheki."

¹⁰ Ave ur aken i velpol penna? Nge aka o is ile lale, eve o is ile rongan? I velpol nge aka o is ile lale avele. I velpol nge aka o is ile rongan.

¹¹ Na o is ile rongan ma i velpol ini toko vengvenga a God itheki, lamako God i sung paatealing nge toko ini peti isnga a i nge. Na paatealing aken i pathengal aka ve, i velpol ini toko vengvenga a God itheki lale nge aka o is ile rongan. I venen aken, mako Abraham i velpol ini toko mukalinga nge areko o is ole avele, na o velpol ini toko vengvenga a God itheki nge ole lemioong, make Abraham i ranga ve ini otevinga.

¹² Na i velpol, ma ini areko o is ole otevinga mun. Aveto Abraham ini toko alavusnga areko o is ole otevinga, kene avele, ini inga areko o is ole na ole lemioong i ranga ve ini titevimem a Abraham ile lemioong aka i voth a i nge, nge aka o is ile rongan.

Toko alavusnga ako olemio nge a God aro o el ur aka i kin ile riong nge nomenga.

¹³ Nomenga God i kin ile riong tomo nge a Abraham ome ititeviere ve aro i sung ur alavusnga ake ru a ulue a or nge mo ini ole. Na God i oma venen aken nge a Abraham, nge ile vothung aka i panes a God ile torong, kene avele. Aveto God i oma venen aken, eneke Abraham i velpol ini toko vengvenga a ithiki lale nge ile lemioong.

¹⁴ God i oma venen aken, eneke aro ve i ri ve, "Aro tho sung ur alavusnga aka tho oma i lale nge areko o panes a Moses ile patorong," aken aro lemioong i velpol ini ur polpolnga inga, na ur aka i kin ile riong nge, aro i velpol mun ini ur polpolnga inga.

¹⁵ Eneke areko o tongporum nge a Moses ile patorong panesnga, o pavurvur nge avele, mako o pavelpol inga a God ile lemi klingong. Aveto aro ve patorong e avele, i pavurvur aro toko i avsa i avele.

¹⁶ Aken ini tepun aka God ilemi ve aro i sung ur aka i kin ile riong nge, nge areko olemio a i nge, mo aro o el i nge ile themosaling. Nge aken kene ur e avele i pavurvur aka aro i mit roal i, naro Abraham ititevie alavusngare aro o el ur aka God kin ile riong nge lale, areko or ini Judare aka o panes a Moses ile patorong, tomo mun nge areko o velpol ini ititeviere, eneke ole lemioong i ranga ve ini ile. Na Abraham i velpol ranga ve ini it alavusnga titevir.

¹⁷ Na i ranga ve aka God ile erere i ri nge ve,
"Tho ateal ong ve,

ong ini toko puluangare otevinga."

Stat 17:5

Na a God ithiki, Abraham i velpol ini titevir, eneke ilemi nge a God aka i pamimi werer areko o rin lale, naro i pavelpol ur areko i velpol rongan.

¹⁸ Na Abraham ilemi ve, "Tho toluku lale na so ol e avele aka aro ur aka God i kin ile riong tomo nge tho lale kene aro i velpol." Aveto ilemi nge a God ve aro i oma i, mako i velpol ini toko puluangare otevinga, ranga ve aka God i ria i nge lale ve,

"Titovumre aro o papel
mo o pompom ranga ve ini sivemitre."

Stat 15:5

¹⁹ Na Abraham ilemi mire aka ve, ini peti i molilil lale, na ia tovu po i totho nge 100 lale, na Sara mun i kimeit, na i pavurvur nge wain pavelpolnga ol avele. Aveto ile lemioong i mit engeng inga,

²⁰ na i matu avele nge a God ile riong aka i kin tomo i nge i lale, na i el engenging nge ile lemioong aken, mako i paesa God iion roro,

²¹ na ilemi i engeng rintet ve, ur aka God i kin ile riong nge, i pavurvur aka aro i oma i.

²² Aken ini tepun aka God i apet i ve ini toko vengvenga a ithiki.

²³ Na riong aka i voth a God ile erere lemi aka i ri ve, "God i apet i ve ini toko vengvenga a ithiki." * O wat i nge a Abraham ienga avele.

²⁴ Aveto nge it mun, mo aro i opoal it areko God aro i apet it ve ini toko vengvengare a ithiki, tova ve lemiro nge a God aka i palos werera ar Pomnga a Jisas nge rinong.

²⁵ Na God isa wompot inga a Jisas mo o pun rin i mo aro i rin leltun ler vothung kerenga, na i palos werera i mo aro te velpol ini toko vengvengare a ithiki.

Ler vothung nomenganga i rin tomo ol nge a Krais ma te el ol mimiong ponganga a i nge

5

(Vonge 5:1-8:24)

Lemi moring i voth tomo nge areko o velpol ini toko vengvengare a God ithiki.

¹ Maken te velpol ini toko vengvengare a God ithiki nge ler lemioong, na nge ar Pomnga a Jisas Krais ile omaing, make te voth lemi moring tomo nge a God.

² Na nge ler lemioong mun Krais i thep sovengalo mo aro te mit nge ile themosaling lemi aka te voth nge ponange, na te risea nge aka te men sial nge a God ile pamien senuong aka aro i velpol a it nge panen.

* 4:23: Stat 15:6

³ Na te risea nge ur aken inga avele, te risea mun nge matheong ako i velpoltun it, eneke lemire mire ako matheongre potunga i oma it mo te mit engeng nge a God.

⁴ Na nge ako te mit engeng venen aken, God ilemi sivenga nge it, make aro te men sial nge a God ile pamen senuong, eneke lemire mire lale aka ve, God ilemi sivenga nge it lale.

⁵ Naro ler maral nge ler men sialing aken avele, eneke God i pavual it nge ile asaguong lale nge Ioni Riringa aka i sungu i a it nge.

⁶ Na lemire mire aka ve, God ia sagu it, eneke so ol e avele aka aro te velpol ini toko vengvengare a itheki, na nge wop lemi aken Krais i rin mo i opoal it toko kerengare, nge nang aka God i ateal i lale.

⁷ Na i semel nge avele aka aro toko e i opoal toko vengvenga mo i rin nge i, aveto aro ve toko omole e aka i voth aka i sungpot ile mimiong nge tokokoere oopoalnga, ava aro toko e i rin nge i? Eve avele.

⁸ Aveto God i pathengal it nge ile asaguong aken, nge aka rongan te oma vothung kerenga, na Krais i rin mo aro i opoal it.

⁹ Maken i nunganga aka te velpol ini toko vengvengare a God itheki nge a Krais ia mla, na aro ve ur aken i nunganga, i nunganga rintet aka nge ia mla mun, God aro i pamimi it na i eltetpot it nge ile lemi klingong.

¹⁰ Na tho ri venen aken, eneke nomenga it ini a God ile ngarangre, ave ponange te velpol ini ilengare ol, eneke nge Itun ile rinong aken. Na aro ve te velpol ini ilengare nge ile rinong, ile mimiong aro i opoal senu ol it mo aro te mimi tomo ol nge i evelelnga.

¹¹ Na te risea nge ur aken inga avele, aveto te risea mun nge aka te teo a God nge, eneke nge ar Pomnga a Jisas Krais ile omaing aka te velpol ini a God ilengare.

Adam i pavopol rinong, ave Krais i pavopol mimiong.

¹² Maken tokokoere o el mimiong nge toko omole inga, ranga ve ini mun i toko omole inga aka i pavopol vothung

kerenga ake ru a ulue, na ile vothung kerenga aken i pavopol ol rinong, na nge sovengalo aken rinong i el ol toko alavusnga, eneke or alavusnga o oma vothung kerenga.

¹³ Na riong aken i nunganga, eneke nge wop lemi aka Moses ile patorong i velpol rongan, na vothung kerenga i voth tel a ulue lale, aveto God i tital ole vothung kerenga areken avele, eneke i sung ile torong a or nge rongan.

¹⁴ Aveto rinong i el or, mako i patea ol nge a Adam na i mul nge a Moses ile patorong ile velpoling. Na pelie o nong sirik a God ile torong ranga ve ini aka Adam i oma i, kene avele, aveto o rin mun, eneke Adam ile omaing i el ol toko alavusnga, na ini sei aka nge a Krais ile omaing aka aro i oma i a rumongaling panen nge a Adam.

¹⁵ Aveto or paini ole omaing i thun avele, Adam ile vothung kerenga i ranga ve ini a God ile sungong aka i sung polpol i a it nge, kene avele. Eneke toko pulua o el rinong nge toko omole inga ile vothung kerenga, aveto God ile themosaling na Krais ile sungong aka ile themosaling i pavopol i, kene i lel ma i vlestun toko pulua mun, nge toko omole inga mun, aka ini a Jisas Krais.

¹⁶ Na ur aka te el i nge a Krais ile sungong aken, i rel rintet mun nge ur aka te el i nge toko omole aken ile vothung kerenga, eneke Adam ile vothung kerenga omole i pavopol a God ile paomelaling nge areko o mit nge riong a God itheki, aveto toko pulua o oma ole vothung kerengare lale, lamako Krais i sung polpol ile sungong aken a or nge, ma God i apet or ini toko vengvengare a itheki.

¹⁷ Na i nunganga aka toko omole inga a Adam ile vothung kerenga kene i pavopol rinong ma i voth tomo nge tokokoere. Na aro ve ur aken i nunganga, i nunganga rintet aka, areko o el a God ile themosaling aka i aolonga rintet tomo mun nge ile sungong aka i apet or ve ini toko vengvengare a itheki, kene aro o el mimiong aka aro ile vusonga avele, nge toko omole inga mun, aka ini a Jisas Krais.

¹⁸ Maken i nunganga aka ve, God i teltun toko alavusnga oa, nge vothung

kerenga omole inga ako Adam i oma i, na i vene mun ako God i apet toko alavusnga ini toko vengvenga a itheki na i sung mimiong a or nge, nge vothung vengvenga omole inga ako Krais i oma i.

¹⁹ Na tho ri venen aken, eneke toko pulua o oma vothung kerenga, eneke toko omole i avsa a God ile riong, na i vene mun ako toko pulua aro o velpol ini toko vengvengare, eneke toko omole i panes a God ile riong.

²⁰ Na God i sung a Moses ile patorong a tokokoere nge, mo aro vothung ako nge patorong avsanga aro i esa esa, aveto nge ako vothung ako nge patorong avsanga i esa esa, God ile themosaling i esa esa mun ma i aoselea i.

²¹ Na ranga ve aka rinong i voth tomo nge tokokoere nge ole vothung kerenga omanga, God ile themosaling i voth tomo mun nge or, mo aro o velpol ini toko vengvengare a itheki, na o el mimiong aka aro ile vusonga avele nge ar Pomnga a Jisas Krais.

6

Nge ler teoong a Krais nge, vothung kerenga i rin tomo nge it.

¹ Na aro ve lek riong aken i nunganga, aro te ri vava? Aro te ri ve, "Aro te kis inga nge vothung kerenga omanga mo aro God ile themosaling i esa esa?"

² Avele, aro te ri venen aken avele. Eneke te modoppot vothung kerenga omanga ranga ve ini toko rinonga aka i modoppot ile mimiong. Na te pavurvur aro te mimi ol a vothung kerenga lemi avele!

³ Na ava lomumu mire aka ve, it alavusnga areko te teo a Krais Jisas nge, te el paninuong, na nge paninuong aken i ranga ve aka te rin tomo nge i.

⁴ Maken nge paninuong aken i ranga ve aka o tetun it tomo mun nge i, mo aro it kene te el mun mimiong aka i ponganga rintet na te mimi ol nge, ranga ve aka Krais i el i lale, nge aka Titemer a God i palos werera i nge rinong, nge ile engengeng aka i aolonga rintet.

⁵ Na aro ve i nunganga aka ve, te teo a i nge, na te rin ranga ve ini i, aken

i nunganga mun aka ve, aro te el mun mimiong ponganga ranga ve ini i.

⁶ Na riong aken i nunganga, eneke lemire mire aka ve, God i pamona ler mimiong nomenganga tomo nge a Krais a won ngoronga nge, mo aro vothung kerenga ile engengeng ol e avele a ler mimiong, na i pavurvur avele ol aka aro i oma it mo te panes i.

⁷ Eneke toko aka i rin lale, i pavurvur ol nge vothung kerenga omanga ol avele, i vthopot lale.

⁸ Na i nunganga aka te rin tomo nge a Krais, make lemiro ol aka ve, aro te mimi tomo mun nge i.

⁹ Eneke lemire mire aka ve, Krais i los werera nge rinong, na i pavurvur aro i rin werer mun avele. Na rinong i voth tomo ol nge i avele.

¹⁰ Eneke i rin pa omole inga, na nge ile rinong aken ile mong ol vothung kerenga. Ave ponange ake, i mimi ol na i papomnga a God nge ile mimiong aken.

¹¹ Na i ranga ve ini mun i thomu, aro lomumu rum werer nge sivengomu aka ve, thomu o modoppot vothung kerenga omanga, ranga ve ini toko rinonga aka i modoppot ile mimiong, na lomumu rum werer mun nge sivengomu aka ve, o mimi werer naro o papomnga a God nge lomu mimiong aken, nge lomu teoong a Krais Jisas nge.

¹² Maken o mothong tova somu womalo vothung kerenga mo i mita engengeng a lomumu mo i pavurpol numu peti nge vothung kerenga aken panesnga.

¹³ Na o mothong mun tova somu womalo numu peti epipeere a vothung kerenga nge mo i oma vothung kerenga, aveto aro o sungpot sivengomu a God nge, ranga ve aka o mimi werera nge rinong, naro somu womalo numu peti epipee alavusnga a God nge mo o oma vothung vengvenga.

¹⁴ Eneke i pavurvur aro vothung kerenga ile mong ol thomu avele, eneke thomu o voth a Moses ile patorong lemi avele, aveto thomu o voth ol a God ile themosaling lemi.

Te vthopot nge vothung kerenga omanga na te voth ol inga nge vothung

vengvenga omanga.

¹⁵ Na i nunganga ako te voth a Moses ile patorong lemi avele, aveto te voth ol inga a God ile themosaling lemi, maken aro te oma ol va ol? Aro te kis inga nge vothung kerenga omanga? Avele, aro te oma venen aken avele.

¹⁶ Ava lomumu mire avele ako ve, aro ve somu wompot sivengomu mo o nongal toko e ile riong, aken o velpol ini toko aken ile um polpolonga, eneke o nongal ile riong, na i venen aken, na aro ve o velpol ini vothung kerenga ile umongare, aro olongomu panen anga ini rinong, aveto aro ve o velpol ini a God ile riong nongangare, aro o velpol ini toko vengvengare a itheki.

¹⁷ Aveto te ri sivengaing a God nge ako nomenga thomu ini vothung kerenga ile umongare, aveto o sungpot lomumu alavusnga na o nongal patoraling nunganga ako God i sungu i a thomu nge.

¹⁸ Na God i pavthopot thomu nge vothung kerenga omanga, make o velpol ini vothung vengvenga ile umongare.

¹⁹ Na tho ri nge toko umonga tomo nge um polpolonga, eneke i semel na i pavurvur ako aro lomumu mire nge. Na nomenga somu wompot numu peti epipeere mo o velpol ini vothung kerenga ile umongare, ranga ve ako ini toko na seng aomngare, na o panes a God ile riong avele, mako thomu o mimi ranga ve ako God i sis ve aro o oma i, kene avele. Na ranga ve ako thomu o oma i nomenga aro o oma mun i ponange, aro somu wompot numu peti epipeere mo o velpol ini vothung vengvenga ile umongare, maken aro o riri rintet a God itheki.

²⁰ Na nomenga nge wop lemi ako thomu o voth ini vothung kerenga ile um polpolongare, thomu o voth a vothung vengvenga lemi avele.

²¹ Na lomu vothung aken, ake ponange lomu mara nge, i pavelpol monnga sivenga eve avele? I sivenga avele, eneke vothung aken i pavelpol re ako ini rinong.

²² Aveto ponange God i pavthopot thomu nge vothung kerenga omanga, na i oma thomu mo ini isivenga ile umongare, na lomu vothung monnga ini vothung ako

i riri rintet a God itheki ako iolalnga ini mimiong ako aro ile vusonga avele.

²³ Na lek riong aken i nunganga, eneke vothung kerenga olalnga ini rinong, aveto God ile sungong ako i sung polpol i a it nge ini mimiong ako aro ile vusonga avele, na te el inga ile sungong aken a ler teoong nge ar Pomnga a Krais Jisas nge.

7

Te vthopot nge a Moses ile patorong panesnga aki i kin it nomenga.

¹ Titeikre, thomu areko lomumu mire senu nge a Moses ile patorong, ava lomumu mire ako ve, na rongan toko e i mimi, aken i voth a Moses ile patorong lemi.

² Ranga ve ini seng peange ako patorong i kin i tomo nge iewo, i pavurvur ako rongan iewo tomonnga i mimi, aveto aro ve iewo tomonnga i rin, i vthopot ol nge patorong aki i kin i tomo nge iewo.

³ Maken aro ve iewo rongan i mimi na i ngo tomo nge toko relnga e, aro o apet i ve ini seng theki roronga, aveto aro ve iewo i rin lale, i vthopot ol nge kinong aken, na aro ve i ela toko relnga e, aken ini seng theki roronga avele.

⁴ Maken titeikre, i vene mun i thomu, thomu o vthopot nge a Moses ile patorong panesnga ranga ve ini toko aki i rin lale, eneke thomu o rin tomo nge a Krais nge lomu teoong a i nge, maken varo o velpol ini toko relnga e ile, ini toko aki i los werera nge rinong. Na te velpol ini ile mo aro te pavelpol monnger sivenga a God nge.

⁵ Na i venen aken, eneke nomenga aki rongan te voth nge ler mimiong nomenganga, Moses ile patorong i pavurpolo vothung kerenga a lemir aki nir peti epipeere o panes i, na monnger aken i pavelpol rinong.

⁶ Aveto ponange, te rin lale na te vthopot nge ur areko i kin it nomenga aki ini a Moses ile patorong, mako ponange te oma a God ile omaing, nge vothung ponganga aki Oni Riringa i pavelpol i a it nge, na te oma ranga ve ako te oma i nomenga avele, nge aki te panes patorong aki o wat i a erere nge.

*Patorong i palemi kling tokokoere mo o
oma vothung kerenga.*

7 Na aro ve Moses ile patorong i pavurpol vothung kerenga a lemir, aro te ri vava, e? Aro te ri ve, "Moses ile patorong i kerenga?" Avele, aro te ri venen aken avele. Aveto Moses ile patorong i ritet tho nge lek vothung kathnga aka i kerenga. Ranga ve Moses ile patorong i ri ve, "O mothong tova o theseal toko e ile ur elonga." * Na aro ve i ri venen aken avele, lemik mire aka thesealing ini vothung kerenga avele.

8 Aveto nge aka patorong i ritet tho ve thesealing ini vothung kerenga, mako vothung kerenga i panes sovengalo aken mo i pavurpolo thesealing peleknga elonga a lemik. Eneke aro ve patorong i voth avele, vothung kerenga ile engenging mun avele, na i ranga ve aka i rin lale.

9 Na nge aka lemik mire nge a God ile torong rongan, lek mimiong i sivenga, aveto nge aka lemik mire ol nge a God ile torong, tho rov ol vothung kerenga aka i mimi a tho nge, na tho ate ol aka ve, tho ranga ve ini toko rinonga a God itheki.

10 Na tho ate mun aka patorong ile omaing aka aro i sung mimiong a tokokoere nge, tova ve o panes i, kene i teltun rinong a tho nge, eneke tho pavurvur nge ipanesnga avele.

11 Na i vene aken, eneke vothung kerenga ile apaltet tho, i ela God ile torong sivenga ma i ria tho nge, aveto i pun opok nge. Na nge ile omaing aken, vothung kerenga i teltun rinong a tho nge.

12 Maken aro te ri ol vava nge patorong aken, e? God ile torong aken i riri, eneke i es a i nge me, na ur areko God ile torong i ri nge, i riri mun, eneke i es mun a i nge na i vengveng na i senunga.

13 Naro te ri vava? Aro te ri ve, "Ur aka i sivenga i teltun rinong a tho nge?" Avele, aro te ri venen aken avele. Ini lek vothung kerenga aka i teltun rinong a tho nge, i el ur aka i sivenga na i pavurpol vothung kerenga a lemik nge, na nge ile omaing aken, vothung kerenga i ngopat at inga. Mako God ile torong aken i pathengal

tho ve, vothung kerenga i kerenga selele rintet.

*Vothung sivenga na vothung kerenga o
pun pel a lemir.*

14 Na lemir mire aka ve, God ile torong i es vengveng a i nge me. Aveto tho, tho ini toko ulue anga aka vothung ulue anga i voth a tho nge. Na i ranga ve aka tho ini vothung kerenga ile toko um polpolonga.

15 Lemik mire avele nge vothung tepun aka tho oma i, eneke vothung aka tho sis ve aro tho panes i, kene tho panes i avele. Aveto vothung aka nik plong nge omanga, aken kene tho oma i.

16 Na aro ve tho oma vothung kerenga aka nik plong ve aro tho oma i, aken i pathengal aka ve, lemik ve God ile torong i vengveng.

17 Na i vene ake, ini sivengek aka tho oma i avele, aveto ini vothung kerenga aka i ngo a lemik aka i oma i.

18 Eneke lemik mire aka ve, ur sivenga e avele i voth a lemik, aka nge lek mimiong nomenganga aka rongan i voth a tho nge, eneke tho sis ve aro tho oma vothung sivenga, aveto tho pavurvur nge omanga avele.

19 Eneke ur sivenga aka tho sis ve aro tho oma i, kene tho oma i avele, aveto ur kerenga aka nik plong ve aro tho oma i, kene tho kis inga nge omanga.

20 Na aro ve tho oma ur aka nik plong ve aro tho oma i, aken ini sivengek aka tho oma i avele, aveto ini vothung kerenga aka i ngo a lemik aka i oma i.

21 Maken tho thopol vothung ake i voth a lemik ma i paketun tho vene ake: Aro ve tho sis ve aro tho oma vothung sivenga e, vothung kerenga i voth mun a lemik.

22 I nunganga aka lemik nunganga i ngo senu rintet nge a God ile torong,

23 aveto tho thopol torong relnga e aka i voth mun a lemik aka nik peti epipeere o panes i, na i pun tomo nge a God ile torong aka lemik i engeng nge panesnga, ini vothung kerenga a patorong aka i voth mun a lemik aka nik peti epipeere o panes i, na ile mong tho mo tho velpol ini ile toko um polpolonga.

* 7:7: Kisim Bek 20:17

²⁴ O, wain a thoo, tho ini toko polpolnga ol inga. Na anga aro i pavthopot tho nge lek matheong ake, ako vothung kerenga rongan ile mong nik peti na i teltun rinong a tho nge, e?

²⁵ Tho ri sivengaing a God nge ako i pavthopot it nge matheong aken, aka nge ar Pomnga a Jisas Krais ile omaing! Maken tho voth vene: Na nge sivengek lek lemi rumong, tho sis ve aro tho panes a God ile torong, aveto vothung kerenga a torong rongan i voth mun a lemik aka nge lek mimiong nomenganga, ma rongan tho panes i.

8

Vothung aka Oni Riringa i pavelpol i.

¹ Na tho ri lale aka ve, te velpol ini toko vengvengare a God itheki, nge ler lemioong nge a Krais. Maken God aro i teltun ol rinong nge areko o teo a Krais Jisas nge, kene avele.

² Eneke nge ler teoong a Krais Jisas nge, Oni Riringa a patorong aka i sung mimiong, i pavthopot it nge vothung kerenga a patorong aka i sung rinong.

³ Eneke i pavurvur aro te velpol ini toko vengvenga nge a Moses ile patorong panesnga avele, eneke vothung ulue anga i engeng rintet a it nge, mako God i oma ur aka Moses ile patorong i pavurvur nge avele, nge aka i pakeu isivenga Itun me, na i velpol ini toko ranga ve ini it, aveto vothung kerenga i voth a i nge avele. Ma i rin leltun ler vothung kerengare na i el meir nge a God ile paomelaling nge ler vothung kerenga areken.

⁴ Na God i oma venen aken mo aro te pavurvur nge ur alavusnga aka Moses ile patorong i ri nge, tova ve te panes ol Oni Riringa na vothung ulue anga avele.

⁵ Areko o panes vothung ulue anga, olemi voth inga nge ur ulue anga, aveto areko o panes Oni Riringa ile vothung, olemi voth inga nge ur aka ini Oni Riringa ile.

⁶ Na aro ve toko e ilemi voth inga nge ur ulue anga, aro i el rinong. Aveto aro ve toko e ilemi voth inga nge Oni Riringa, aro

i el lemi moring tomo mun nge mimiong aka aro ile vusonga avele.

⁷ Riong aken i nunganga, eneke areko oleli voth inga nge ur ulue anga, or ini a God ile ngarangre, eneke ole lemi rumong i voth a God ile torong lemi avele. Na i nunganga aka ole lemi rumong aken i pavurvur mun nge ipanesnga avele.

⁸ Na areko o voth a vothung ulue anga lemi, o pavurvur aro o palemi senu a God avele.

⁹ Aveto thomu, thomu o voth a vothung ulue anga ile thealing lemi avele, aveto thomu o voth a Oni Riringa ile thealing lemi, tova ve i nunganga aka ve, God Ioni i voth a lomumu. Na aro ve Krais Ioni i voth a toko e ilemi avele, toko aken ini a Krais ile toko avele.

¹⁰ Aveto aro ve Krais i voth a lomumu, aro numu peti aro i rin ol nge vothung kerenga, aveto onumu i mimi ol, eneke thomu o velpol ini toko vengvengare a God itheki.

¹¹ Na aro ve God aka i palos werera a Jisas nge rinong Ioni i voth a lomumu, God aka i palos werera a Krais nge rinong aro i palos werera mun numu peti nge Ioni aka i voth a lomumu.

Te velpol ini a God itutunre nge Oni Riringa ile omaing.

¹² Maken titeikre, rongan ar thangaroong i voth a Krais nge, ave i voth nge vothung ulue anga avele aka aro te panes i,

¹³ eneke aro ve thomu o panes vothung ulue anga, aro o el rinong. Aveto aro ve thomu o el Oni Riringa ile opoaling mo o so rin vothung ulue anga aka i voth a numu peti, aro o el mimiong aka aro ile vusonga avele.

¹⁴ Eneke or alavusnga aka o panes ur aka God Ioni i sis ve aro o oma i, or kene ini a God itutunre.

¹⁵ Eneke God Ioni aka i sungu i a thomu nge, i oma thomu mo o velpol ini um polpolongare aka o ngeip werer a God nge, kene avele. Aveto nge Ioni aken thomu o velpol ini a God itutunre, make nge ler nongong a i nge, te apet i ve ini ar Vovo.

¹⁶ Na onir i ripot ve, it ini a God itutunre, na Oni Riringa isivenga mun i ripot venen aken, na i paengeng riong ako onir i ri nge.

¹⁷ Na aro ve it ini itutunre, aro te el mun ur sivesivengare ako ini a God ile, ranga ve ako titeir a Krais i el i lale, tova i nunganga ako ve, te el matheong ranga ve ako Krais i el i lale, mo aro God aro i papomnga it tomo mun nge a Krais.

Panen aro te el menong sivenga ako a Pen a Urvet.

¹⁸ Na lemir malmaling a urvet ariko God aro i pavelpol pat i a it nge, aro i aolo leltun matheong areke ranga ve te el i ponange.

¹⁹ Eneke ur alavusnga areko God i pamenu ir, kene o men sial nge nang ariko aro God i pango patu areko ini itutunre.

²⁰ Eneke ur alavusnga areko God i pamenu ir, o el matheong na kerengaing nge a Adam ile vothung kerenga, mako o pavurvur nge ole omaing teltenga avele. Na oni plong ve aro o el i, aveto o el i, eneke God i sis ve aro o el i tomo mun nge men sialing

²¹ nge nang ariko aro God aro i pavthopot osivenga nge, na nge nang aken aro o voth ol nge rinong na ploting lemi avele, naro o el malmaling a urvet mun ariko ranga ve God itutunre o el i.

²² Naro i velpol vene re aken, eneke lemir mire ariko ve, ur alavusnga areko God i pamenu ir, rongan olo vur ve aro o vthopot nge matheong aken ranga ve ini seng ariko ilo vur nge sisong nge itun poppotnga, na olo vur venen aken i pavurvur ponange.

²³ Na ini inga ur areken oenga ariko olo vur avele, aveto it areko te el a God ile sungong teltenga lale ariko ini Ioni Riringa, sivenger lor vur mun a lemir, nge ariko te men sial nge nang ariko aro God i patu it mo te velpol ini itutunre. Nge nang aken God aro paonolpot nir peti nomenganga mo ariko te rin ol avele.

²⁴ Na nge ariko God i pamimi it mako te men sial nge ur ariko aro i sungu i a it nge, aveto aro ve te thepol i lale, aro te men sial nge avele, eneke toko e avele i men sial nge ur ariko i el i lale.

²⁵ Aveto lemir mire ariko ve, ur ariko te men sial nge kene te el i rongan, mako te mit engeng nge ler lemioong na te men sial nge ur aken.

²⁶ Na ler men sialing aken i paengeng it nge matheong areken potunng, na Oni Riringa mun i paengeng mun it nge, eneke lemir mire nge ur kathng ariko aro te nong i a God nge, kene avele. Aveto Oni Riringa isivenga ilemi mire nge, na i el meir nge nongong aken, ma ilo vur ma i ek nge ur ariko i mathealal na i pavurvur nge riong ripotng aavele.

²⁷ Na God ariko i the a lemir, ilemi mire nge a Oni Riringa ilemi, nge ariko i nong nge it ariko ini a God ile tokokoere, na i panes a God ilemi nge ile nongong aken.

²⁸ Na lemir mire ariko ve, areko oa sagu a God, God i oma ur alavusnga ariko i velpoltun or mo o um tomo e pel mo i sivenga. Na i oma venen aken nge areko i leng or mo ini ile, na i panes ilemi nge aken.

²⁹ Eneke nomenga God ilemi mire lale nge areko aro o velpol ini ile, mako i ateal or ve aro o velpol ranga ve ini mun i Itun, mo aro Itun aken aro i velpol ini ititein puluanga areken oa tengen.

³⁰ Na areko nomenga i ateal or ve aro o velpol ranga ve ini Itun, ma i lengpot mun or mo aro olemio nge i. Na areko i lengpot or, ma i apet mun or ve ini toko vengvengare a itheki. Na areko i apet or ve ini toko vengvengare a itheki, aro i papomnga mun or naro i sung ol ia malmaling a urvet a or nge.

Ur e avele aro i mit roal a God ile opoaling a it nge.

³¹ Naro te ri vava nge ur sivesivenga areken, ariko tho ri nge, e? Na aro ve God ini thenger, anga aro ile mong it?

³² Eneke i krim werer isivenga Itun avele, aveto i sungpot inga i a ngarangre omeni mo aro i opoal it alavusnga. Na aro ve i sungpot Itun a it nge venen aken, aro i sung mun ur alavusnga a it nge, nge ile themosaling.

³³ Na toko e avele i pavurvur ariko aro i teltun a God ile tokokoere oa, eneke ini a

God aka i oma tokokoere mo o velpol ini toko vengvengare a itheki.

³⁴ Na toko mun e avele i pavurvur aka aro i teltun rinong a it nge, eneke ini a Krais Jisas aka i rin na i los werera na i men a God imeni sivenga nge anga, aka i nong a God nge, ve aro i opoal it.

³⁵ Na ur e avele i pavurvur aka aro i mit roal a Krais ile asaguong a it nge. Matheong, eve sisong, eve kerengaing, eve mesi, eve tekruk le avelelong, eve lemi a rinong, eve rinong. Ur alavusnga areke o pavurvur avele.

³⁶ Na i ranga ve aka God ile erere i ri nge ve,

“Them voth ini lom tokokoere,
na nge aken lom ngarangre o engeng
nge pun rinngemem evelelnga,
na o rivenga them ranga ve ini sipsipre
ako o monsi nge opunrinnga
lale.” *Buk Song 44:22*

³⁷ Aveto aro i velpol venen aken avele, ur kathnga aka aro i velpoltun it, aro ler mong selele i, eneke nge ler teoong a Krais nge aka ia sagu rintet it.

³⁸ Na tho pavurvur nge riong aken ringa, eneke lemik i engeng rintet ve, ur e avele i pavurvur aka aro i eltetpot it nge a God ile asaguong lemi, ranga ve ini rinong, eve mimiong, eve enselre, eve meleunre, eve ur areko i velpol ponange, eve ur areko aro i velpol panen, eve ur pelie aka ole engenging i voth,

³⁹ eve ur areko o voth roro a ulue, eve ur areko o voth ruru a ulue lemi, eve ur pelie mun aka God i pamenu ir. Ur alavusnga areken o pavurvur avele aka aro o eltetpot it nge a God ile asaguong lemi aka te voth nge, nge ler teoong a ar Pomnga a Krais Jisas nge.

Pol i ri nge a God ile vothung ako i oma i a Israelre nge

9

(Vonge 9:1-11:36)

Pol ilemi kerere nge Israelre, eneke o lel okime nge a Krais.

¹ Na riong aka aro tho ri nge kene i nunganga, eneke tho teo a Krais nge. Na

lek apaltet avele. Na lemik, aka i voth a Oni Riringa isa thewo, i pavelpol riong nunganga ve,

² lemik i kerere rintet, na matheong aka i voth a opok lemi aro i voth evelelnga aka aro ile vusonga avele,

³⁻⁴ eneke titeik Israelre o lel okime nge a Krais, na i toth aka lemik ve aro tho el omei na tho el a God ile paomelaling nge or, naro i sorotetpot tho a Krais nge, tova ve i pavurvur aro o el meik nge lek teoong a Krais nge. Na toko Israel areken kene or ini lekngare, na nomenga God i oma omaing sivenga nge or ranga ve aka i patu or, na i pathengal ia malmaling a urvet aka i tolilis kene a or nge, na i kin ile riong tomo nge or ve, aro i sung ile riong nunganga a or nge, na i sung ile patorongre a or nge, na i pathengal or nge sovengalo aka aro o lotual i nge, na i kin ile riong tomo nge or ve, aro i sung ur sivesivengare a or nge,

⁵ na otitevie nomengangare or ini toko pompomere a God itheki, lamako otevinga e aka i velpol nge oa mla, ini a Krais ini toko aka God i ateal i ve aro i el werer ile tokokoere, na ini a God, na ur alavusnga i voth a isa thewo. Naro te risea i evelelnga aka aro ile vusonga avele! I nunganga.

Pol i ri nge a God ile omaing aka i oma i a Israelre nge aka ikei song or, ave oa pulua o velpol ini itutun nungangare avele.

⁶ Na i nunganga aka toko Israel pulua o lel okime nge a Krais, aveto o mothong tova lomumu ve, God ile riong aka i kin tomo i nge a Abraham ome ititeviere nomenga kene i velpol nunganga avele. I velpol nunganga, eneke tokokoe areko o velpol nge a Jekop aka iion aininga a Israel ia mla, or alavusnga ini a God ile toko nungangare avele.

⁷ Na thomu o rivenga aka ve, God i apet toko ini a Abraham itevinga nunganga, tova ve i velpol nge ia mla, ave lomu lemi rumong aken i nunganga avele. God i apet toko ini a Abraham itevinga nunganga, aka nge ile riong kinnga, na i ranga ve aka thomu o ri nge, kene avele, eneke Abraham itun pelie o voth, aveto God i ateal inga Abraham itun a Aisakieng, nge

ako i kin ile riong tomo nge a Abraham ve, “Aro tho apet a Aisak ititeviere oenga mo ini ol i titovum ol re.” *

⁸ Na uneke ako tho ri nge, kene i mirenga ve, Abraham ititeviere ako ia mla i pavelpol or, or alavusnga ini a God itutunre avele. Aveto God i ri ve, Abraham ititevie nungangare ini inga areko ile riong kinnga i pavelpol or, na or kene ini ol i itutunre ol.

⁹ Na i venen aken, eneke God i kin ile riong tomo nge a Abraham ve, “Nge tovu po konga nge ngov ke, aro tho lo werer, na nge wop lemi aken Sara kene aro i maneu itun tomonnga a Aisak lale.” †

¹⁰ Na e mun e ako Sara itun aken ini a Aisak na ini titevimeem. Na Aisak iewo a Rebeka kene iopo ma itun or aini o ngo a iopo lemi, ako otema omole.

¹¹⁻¹² Na i pop or rongan, na o oma vothung kerenga eve vothung sivenga pelie rongan, aveto God kene i ria Rebeka ve, “Om tengen a Iso aro i velpol ini tum opisoinga a Jekop ile umonga.” ‡ Na God ile riong aken i pathengal it ako ve, God ile atealing nge tokokoere i panes inga ur akailemi alpotet nge, na i panes ole vothung avele, eneke i sungu ile riong aken a mukaling, na or paini o oma vothung kerenga eve vothung sivenga pelie rongan. Aveto God i ateal tokokoere ranga ve aka i sis ve aro i oma i.

¹³ Na i ranga ve aka God ile erere i ri nge, aka i ri ve,

“Ok sagu a Jekop ma tho ateal i,

aveto nik silal a Iso.” *Malakai 1:2-3*

¹⁴ Na God i oma venen aken, naro te ri vava, e? Aro te ri ve, “God ile vothung i vengveng avele,” e? Avele! Aro te ri venen aken avele!

¹⁵ Eneke, God i ria Moses ve,
“Na toko kathnga areko tho ateal ir
mo aro tho themosal or,
kene aro tho themosal inga or.
Na toko kathnga areko tho ateal ir
mo aro lemik esal or,
kene aro lemik esal inga or.”

Kisim Bek 33:19

¹⁶ Maken, God i ateal inga tokokoere aka nge ile themosaling inga mo ini ile, na e avele i velpol ini a God ile, aka nge ur aka

isivenga ilemi i voth nge, eve nge isivenga ile omaing engenga.

¹⁷ Na aken i nunganga, eneke God ile erere i ri nge ile riong aka i sungu i a Isip angare ole nepes a Pero nge, aka i ri ve, “Tepun or aini i voth

ako tho papompom vengveng ong nge,

na i vene:
Aro tho pathengal lek engenging

a tokokoere nge,
nge aka tho sung paomelaling
a ong nge.

Na e mun e, aro iok i kima
a pen elonga ake ru a ulue.” *Kisim Bek 9:16*

¹⁸ Maken aro ve God i sis ve aro ilemi esal toko e, aken aro ilemi esal i. Na aro ve i sis ve aro i palemi rit toko e mo itelnga pla, aken aro i oma mun i.

¹⁹ Na ava omu e aro i nina tho ve, “Aro ve God i palemi rit tokokoere venen aken, i vava aka God ikei palil or nge ole nong sirikong aken, e? Eneke aro ve God i ateal toko e ve aro i oma ur e, aken toko e avele i pavurvur aro i es lelpot nge aken.”

²⁰ Aveto wong ini toko le vanga aka ong ri venen aken, e? Wong ini neneanga na i vava aka keum paenal nge a God, e? Aro ve toko e i viv saka mo i oma thei pokin nge, na aro ve thei pokin aken iwo i voth, i mothong tova i ria itokoninga ve, “I vava aka ong viv tho vene ake, e?” §

²¹ Na saka vivnga e aka i pavurvur aro i ela saka epee omole mo i viva thei pokin or aini nge. Na i pavurvur aka aro i ateal epee epee mo i panes ilemi nge omanga. Na aro ve i oma epee omole mo ini thei pokin a urvet, ur e avele. Na aro ve i oma aininga mo ini thei pokin vulutnga, ur mun e avele. Aken ini ile omaing inga.

²² Na God ile atealing nge tokokoere i vene mun re aken. Na nomenga aka God ilemi alpotet ve aro ilemi klingtun toko pelie, naro i pakerenga or tomo nge ile engenging, mo aka aro toko alavusnga ake ru a ulue aro o thepol ile lemi klingong tomo nge ile engenging aken, aveto ilemi alpotet mun ve aro i paninal rintet nge omanga,

* **9:7:** Stat 21:12 † **9:9:** Stat 18:10-14 ‡ **9:11-12:** Stat 25:23 § **9:20:** Aisaia 29:16

²³ mo aro toko pelie o pavurvur ako aro o el ile themosaling mo olemi mire ako ve, ini God a urvet ako i sivenga rintet. Na nomenga mun aka God i ateal tokokoe areken ve aro i themosal or venen aken, mo aka aro toko alavusnga ake ru a ulue aro o thepol mun aka ve, ini God a urvet aka i sivenga rintet.

²⁴ Na ile themosaling elnga areken ini it ako i leng it mo ini ile, na i leng Judare oenga avele, aveto i lengpot mun pelie aka ini Judare avele.

²⁵ Na i ranga ve aka God ile riong elnga a Hosea i ri nge, aka i ri vene:

“Areko or ini lek tokokoere avele nomenga,
aro tho apet ol or ini
‘Lek tokokoere.’
Na areko ok sagu or nomenga avele,
aro tho apet ol or ini
‘Areko ok sagu or.’” *Hosea 2:23*

²⁶ Na Hosea i ria mun ve,
“Na nge pen epee aka God i ria or ve,
‘Thomu ini lek avele.’
Na nge pen vengveng aken
God aka i mimi evelelga aro i ria
or ve,
‘Thomu ini lek.’” *Hosea 1:10*

²⁷ Na i venen aken nge tokokoe areko or ini Judare avele, aveto God ile riong elnga a Aisaia ri engeng nge Israelre vene:
“Na aro ve Israelre oa titaling i velpol
ranga ve ini rua a wonwon a titaling,
God kene aro i pamimi inga or posalngati.

²⁸ Eneke Toko Pomnga aro i patopalal selele ile paomelaling viri viri nge areko o voth ake ru a ulue, ranga ve aka i ri nge.” *Aisaia 10:22-23*

²⁹ Na i ranga ve aka Aisaia i ri nge a mukaling aka i ritet nge Israelre ve,
“Aro ve Toko Pomnga aka ile engenging i aolonga rintet
kene i mitrup titevirre opaome-lalnga avele,
aro te vus selele
ranga ve ini rem a Sodom ome
a Gomora aka o vus selele.” *Aisaia 1:9*

Israelre o velpol ini toko vengvenga a God itheki avele, eneke olemio nge a Krais

avele, aveto o engeng inga nge a Moses ile patorong panesnga.

³⁰ Maken lek riong aken i mirenga vava, e? I mirenga ve, areko or ini Judare avele, na o betet ve aro o velpol ini toko vengvengare a God itheki, kene avele, or kene o velpol ini toko vengvengare a God itheki, eneke olemio nge a Krais.

³¹ Na i mirenga mun ve, Judare aka o betet nge a Moses ile patorong panesnga mo aro o velpol ini toko vengvengare a God itheki, kene o velpol ini toko vengvengare a God itheki avele.

³² Na i venen aken nge neke? Eneke o rong tomo i nge ole lemioong avele, aveto o engeng inga nge ole omaing aka nge a Moses ile patorong panesnga. Na nge ole omaing aken inga o sis ve aro o velpol ini toko vengvengare a God itheki. Aveto avele. Na Jisas i velpol ranga ve ini um aka oeve tup nge.

³³ Na i ranga ve aka God ile erere i ri nge aka i ri vene:
“Nongpol!

Aro tho pamenu toko
ako a tete a Saion aka a Jerusalem,
na i ranga ve ini um
ako tokokoere oeve tup nge
na o matu nge. *Aisaia 8:14*
Aveto areko olemio nge i,
aro o el le maraing nge i avele.” *Aisaia 28:16*

10

Israelre olemi mire nge sovengalo aka aro o velpol ini toko vengvenga a God itheki, kene avele.

¹ Na titeikre, tho sis rintet ve aro God aro i pamimi Israelre, na tho nong nge a God venen aken.

² Eneke tho pavurvur aka aro tho pamilempot nunganga ve, o engeng nge a God ipanesnga, aveto olo vur polpol, eneke olemi nine senu nge ur aka God i sis ve aro oma i, kene avele.

³ Na olemi mire senu avele aka, ini inga a God ienga aka i oma toko mo i velpol ini toko vengvenga a God itheki. Ma o sis ve aro o velpol ini toko vengvengare a God itheki, aka nge osivenga ole engenging. Na olemi i venen aken, mako o lel okime nge a God

ile sovengalo ako aro i apet toko ve ini toko vengvenga nge.

⁴ Na o leklek venen aken, eneke Krais i tepolal a Moses ile patorong mei lale, mako toko alavusnga aka olemio nge a Krais, kene God i apet or ini toko vengvenga a itheki.

⁵ Na i venen aken, eneke Moses i ritet nge patorong panesnga a sovengalo, aka aro God i apet toko ve ini toko vengvenga nge, na i ri vene:

“Toko e aka i avsa a Moses ile patorong e avele,
aro i el mimiong aka aro ile vusonga avele
aka nge ile vothung aken.” *Wok Pris 18:5*

⁶ Na aken i klipalaltun, aveto aro ve God i apet it ini toko vengvenga aka nge ler lemioong inga, aken i semel na te nutuno nge riong aka i voth a God ile erere nge, aka i ri vene:

“Mothong tova lomum ve,
‘E avele i pavurvur aka aro i esa roro a Pen a Urvet.’” *Lo 30:12*

(Aken i mirenga ve, i oma venen aken mo i elu a Krais nge me.) Na God ile erere i ri mun ve,

⁷ “Na mothong tova lomum mun ve,
‘E avele i pavurvur aka aro i esu ruru a Wali.’” *Lo 30:13*

(Aken i mirenga ve, i oma venen aken mo i ela werer a Krais a rinong a pen nge me.)

⁸ Na mothong tova lomum venen aken, eneke Krais ile riong i voth mela venen aken avele, aveto God ile riong i ri vene:

“God ile riong i semel nge elnga.

I pavurvur aka aro ong ri nge
na i pavurvur aka aro lomum rum nge.” *Lo 30:14*

Riong aka i ri ve, “God ile riong” i ri nge ile riong aka i ritet nge lemioong a sovengalo. Na riong aken ini ur aka them panongpol nge.

⁹ Na lemem panongpolong i vene: Aro ve ong ri patpot ve, “Jisas ini Toko Pomnga” na aro ve lomumo aka a opom lemi ve, God i palos werera i nge rinong, na nge aken God aro i pamimi ong.

¹⁰ Na riong aken i nunganga, eneke lemiro nge a Jisas ake a opor lemi, na nge

aken God i pavurvur aka aro i apet it ini toko vengvengare, na e mun e, aro ve te ri patpot ler lemioong aken nge wor, na nge aken God aro i pamimi it.

¹¹ Na i ranga ve aka God ile erere i ri nge aka i ri vene:

“Neneanga kathnga aka ve, ilemio nge i, aro i el le maraing nge i avele.” *Aisaia 28:16*

¹² Na riong aken i ri nge toko neneanga e kene i nunganga, eneke Judare tomo mun nge areko or ini Judare avele, kene o vur e pel inga a God itheki. Na Toko Pomnga ini toko alavusnga ake ru a ulue oa Pomnga. Na i kene i oma senu nge toko na seng alavusnga aka o nong a i nge.

¹³ Na riong aken i nunganga, eneke God ile erere i ri vene:

“Toko na seng alavusnga
ako o avav a Toko Pomnga
mo i pamimi or,
aro i oma venen aken
a or nge.” *Joel 2:32*

¹⁴ Na riong aken i nunganga, aveto aro ve olemio nge a Toko Pomnga avele, aro o avav a i nge vava, e? Na aro ve o nongpol riong pelie nge i avele, aro olemio nge i vava, e? Na aro ve toko e i panongpol or nge i avele, aro o nongpol riong pelie nge i vava, e?

¹⁵ Na aro ve o pake panongpolonga e a or nge avele, aro i panongpol or nge i vava, e? Na i ranga ve aka God ile erere i ri nge aka i ri vene:

“Panongpolong Sivenga panongpolngare
ole velpolong a tokokoere nge
kene i sivenga rintet.” *Aisaia 52:7*

¹⁶ Na Panongpolong Sivenga nge a Jisas i velpol a Israelre nge, aveto pelie a or nge kene o nongal nge avele. Na i ranga ve aka God ile riong elnga a Aisaia i ri nge aka i ri vene:

“Toko Pomnga,
them panongpol nge lom riong,
aveto anga e i nongal nge?” *Aisaia 53:1*

¹⁷ Na i venen aken, make lemir mire aka ve, tokokoere aro o nongpol tel panongpolong nge a Krais, lamo o pavurvur aka aro olemio nge i, na o nongpol panongpolong aken, tova toko e i panongpol or nge.

¹⁸ Na toko Israel alavusnga o nongal nge panongpolong aken avele. Na i vava, e? O nongpol i avele, e? Avele, o nongpol i lale, eneke God ile erere i ri vene:
“Tokokoere a pen elonga ake ru a ulue o nongpol okei lale.

Na ole riongre i velpol
a rumrem elonga
ake ru a ulue lale.” *Buk Song 19:4*

¹⁹ Na i vava mun, e? Ava lomumu ve, Israelre olemi mire senu nge panongpolong aken mirenga avele, e? Avele aka, olemi mire nge, eneke Moses i ritet tel nge a mukaling aka olemi mire nge a God ile riong, na i watu a God ile riong vene:

“Aro tho pavurpol lomumu
mo i ngo kerere,
nge aka tho oma lek omaing
sivenga
a toko rerelire nge.
Aro tho palemi kling thomu,
nge aka tho oma lek omaing sivenga
a tokokoere nge
ako thomu o rivenga olemi mire
nge tho avele.” *Lo 32:21*

²⁰ Na Aisaia i ri nge toko rerelire, ave i ngeip avele nge aka i watu a God ile riong vene:

“Areko olemi mire nge kathngek avele,
o sangpolo tho lale.
Na tho patheng patpot sivengek
nge areko o nintet nge tho avele.”

Aisaia 65:1

²¹ Aveto Aisaia i ri nge Israelre na i watu a God ile riong vene:

“Nge nang elonga tho theal rangal
nge thomu telnga plaongare
na riong avsangare
mo aka o lo werer a tho nge me,
aveto avele.” *Aisaia 65:2*

11

God ile themosaling nge Israelre.

¹ Na i venen aken, na i vava? Aro lemire ve God ikime lelalpot selele ile tokokoe Israelre? Avele aka! Eneke sivengek, tho ini mun i toko Israel, na tho ini mun i a Abraham itevinga, na tho ini a Benjamin ile net.

² Na nomenga God i ategal Israelre mo aro o velpol ini ile tokokoere, na ikime

lelalpot or avele. Na riong ake i nunganga, eneke ava lomumu mire senu nge a Elaija ia tenesing ake i voth a God ile erere lemi nge, na i vene: Elaija ikei ot a God aka nge Israelre, na i ri pompom ve,

³ “Toko Pomnga,
Israelre o so rin rin vus lom riong elngare,
na o teu mun lom sungonga a lek-lekare,
na engek ol ake tho voth,
na ponange ol ake o ri nge so rin-ngek.” *1 King 19:10-14*

⁴ Na Elaija i ri vene, aveto God i olal i a i nge vava, e? God i ri ve,
“Engom ong voth avele,
rongan lek toko or 7,000 aken ru o voth,
ako o koru oeve
na o lotual god le apaltetonga a Bal avele.” *1 King 19:18*

⁵ Na i vene mun ponange, oa pelie rongan o voth aka God i ategal or nge ile themosaling mo ini ile.

⁶ Na aro ve i ategal inga or nge ile themosaling, aken ilemi i voth nge ole omaing aka o oma i, kene avele. Na aro ve i ategal or nge ole omaing aken, aken aro ile themosaling kene ini sungong nunganga avele.

⁷ Maken aro te ri ol vava ol? Na i vene: Israelre o betet rin ve aro o velpol ini toko vengvengare a God itheki, mako o engeng nge a Moses ile patorong panesnga, aveto ur aka o betet rin nge elnga, kene o elo i avele, ini inga oa pelie aka God i ategal or ve aro olemio nge ile sungong, na oa pulua God i palemi rit olemi mo olemio nge ile sungong aken avele, mako o el vet ol i avele.

⁸ Na i ranga ve aka God ile erere i ri nge aka i ri vene:
“God i oma ole lemi rumong
ma i oror,
ranga ve ini toko aka i nokolkol rintet.
Ma i oma otheki
ma i mathe nge nokolkolong
na i pavurvur aro otheki lema avele.
Ma i oma mun or,
mo otelnga gut nge ile riong nong-polnga.

Na i vene re inga ako me i mul nge ponange.”

Lo 29:4

9 Na Israelre o rivenga Moses ile patorong panesnga i ranga ve ini oa aning ako aro i sung mimiong a or nge. Mako nepes a Devit i nong nge a God vene:

“Aro ong oma oa aning aken

mo i velpol ranga ve ini van
ako i mon a suol nge,

mo o vo rum i mola o tingo nge.

Naro i velpol mun ranga ve ini um aka
oeve tup nge

mo o matu.

Naro ong olal aken a or nge
i pavurvur nge vothung kerenga aka
o oma i.

10 Naro ong oma mun otheki
mo ia midingdeng
i pavurvur aka aro o the ol avele.
Naro ong oma mun or
mo okime loo loo selele
nge oa aning aken potunnga.”

Buk Song 69:22-23

God i el werer areko or ini Judare avele.

11 Na i venen aken na i vava mun aka? Aro lemir ve Israelre o matu selele nge a God ipanesnga mo aro o pavurvur ol nge mitaing avele, e? Avele aka! Aveto ole matuong aken i thep so nge areko or ini Judare avele mo i pavurvur aka aro God i pamimi or. Na God i oma venen aken mo i pavropol Israelre olemi mo o theseal nge ile sungong aka i sungu i a or nge.

12 Na i nunganga aka toko alavusnga ake ru a ulue, o el a God ile sungong sivenga aken, eneke Israelre o lel okime nge a Krais. Na areko or ini Judare avele o el mun a God ile sungong sivenga aken, eneke Israelre olemio nge a Krais avele. Na aro ve ole matuong aken i pavopol sungong venen aken, sungong aka it alavusnga aro te el i, aro i aolo leltun sungong aken tova toko Israel alavusnga o meno nge menong le sivengaing aka God i ateal i a or nge.

13 Naro tho sung riong a thomu nge aka ini Judare avele. Na tho kene tho ini a God ile pakeke aka i pake tho mo tho panongpol nge areko or ini Judare avele. Na tho magon rintet nge lek omaing ake, aka God i sungu i a tho nge.

14 Eneke tho sis ve aro lek omaing aken, aro i pavropol lekngare olemi mo o theseal nge ur sivenga aka God i oma i a thomu nge. Na nge vothung aken tho sis ve, God aro pamimi oa pelie.

15 Na nge aka God i lel ikime nge Israelre, aken i thep so nge toko alavusnga ake ru a ulue, mo olemi omole tomo nge a God. Aveto nge aka God aro i el werer Israelre mo o men senu werer tomo nge i, aken i sivenga rintet nge toko alavusnga na i ranga ve aka toko aka i mimi werera nge rinong.

16 Na Israelre otevinga ini a Abraham, na ini toko riringa a God theki, na i kene i ranga ve ini won riripi aka i sivenga, na aro ve won riripi aken i sivenga, imenini munre aro o sivenga mun, aken i mirenga ve, Abraham ititeviere aro o velpol ini toko riringa a God itheki.

17 Aveto won menini pelie aken, God i tokorpot ir, na i ela thomu aka o ranga ve ini won oliv menini aka ini kleng mimi anga, na i oteto thomu a oliv meninire aka rongan o voth oa wop, mo aro o plo tomo e pel. Na ponange ol ake thomu o el mun ur sivesivengare aka God i kin ile riong tomo nge a Abraham nge.

18 Na o mothong tova omu e i papomnga isivenga nge won menini aka God i tokorpot or lale. Na aro ve lomum i venen aken, i sivenga aka aro lomum rum senu tel a mukaling ve: Sivengom wong sung thei a won riripi aken avele, aveto won riripi aken i sung thei a ong nge.

19 Na ava omu e aro i ria tho ve, “God i tokorpot won menini pelie mo aro tho el omei.”

20 Aken i nunganga, aveto God i tokorpot oa pelie, eneke olemio nge a Krais avele, na wong rongan ong mit, eneke lomumo nge a Krais. Na mothong tova papomnga sivengom, aveto i sivenga aka aro ong ngeip nge aken.

21 Eneke aro ve God i mothongal nge Israelre opaomelalnga avele, aka o ranga ve ini won aken menini nunganga, aken aro i mothongal nge paomelalngom mun avele.

22 Na riong areken i nunganga, mako tho sis ve aro lomumu rum senu tel ake

ve, God kene i oma senu nge tokokoere, na i sung mun paomelaling a or nge. I paomelal areko o oma vothung kerenga lale, aveto i oma senu nge thomu tova ve omu omole omole rongan o voth a ile themosaling lemi. Aro vene mo aro i tokorpot mun thomu a won kin aken nge.

²³ Na won menini areko i tokorpot or nomenga, aro ve o mothong ole lemi ritong na olemio ol nge a Krais, God aro i otet werero mun or a won aken nge, eneke i pavurvur nge ur aken omanga.

²⁴ Na God i pavurvur nge ur aken omanga, eneke i soropot thomu nge oliv kin ako ini kleng mimi anga, na i oteto thomu nge oliv kin sivenga ako ini rebo anga ako ini kinngomu vengvenga avele, na aken i klipalaltun, aveto aro ve God i pavurvur nge ur aken omanga, i semel ako aro i ela oliv kin aken imeninire mo i otet werero mun or a osivenga omei.

God aro i pamimi toko Israel alavusnga panen.

²⁵ Na titeikre, tho sis ve aro lomumu mire senu nge riong inkinenga omole e ako God i patheng pat i a them nge lale, aro vene mo thomu o paroro sivengomu. Na i vene: Toko Israel pulua ole lemi ritong aken kene aro i voth inga, i pavurvur ako la areko or ini Judare avele, olemio nge a Krais i pavurvur nge oa titaling ako God i ateal i a or nge.

²⁶ Lamo God aro i pamimi toko Israel alavusnga, naro i vene ako God ile erere i ri nge ako i ri vene:

“Toko pamimionga aro i espot a Jerusalem me,
naro i eksing Israelre
mo o modopu ol ole kime lelalpo-
tong nge a God.”

²⁷ Na lek riong kinnga tomo nge or kene i vene:
Nge wop lemi aken
aro tho eltetpot ole vothung
kerenga.” *Aisaia 59:20-21*

²⁸ Na Israelre o lel okime nge a Krais ia Panongpolong Sivenga, mako o velpol ini a God ile ngarangre, aveto ole vothung aken i thep so nge thomu areko ini Judare avele mo aro God i oma senu nge thomu. Aveto Israelre rongan or ini a God ile

tokokoere ako ia sagu or, eneke nomenga i ateal or na i kin ile riong tomo nge otitevie nomengangare.

²⁹ Na riong aken i nunganga, eneke God i el werer ile sungongre avele, na i eksing ilemi nge areko i ateal or, kene avele.

³⁰ Na thomu, nomenga kene thomu o avsa a God ile riong, aveto ponange thomu o voth ol a God ile themosaling lemi, eneke Israelre o avsa a God ile riong na thomu o el omei.

³¹ Make ponange or mun ini a God ile riong avsangare, ranga ve ini mun i thomu nomenga, na i velpol venen aken mo aro God i sung werer mun ile themosaling a or nge, nge sovengalo mun ako i sung i a thomu nge lale.

³² I nunganga, God i oma toko alavusnga mo ole vothung kerengare i kintuntun or, mo i pavurvur ako aro i pathengal ile themosaling a or alavusnga nge.

Pol i risea a God iion roro.

³³ Ken, God i sivenga rintet, ipowe i nine rintet, na ile mire i aolonga na i lukuluku. Na toko e avele i pavurvur ako aro i thepol a God ile avrumongre ole mulalonga, na toko e avele i pavurvur mun aro i sangpolo ile omaing tepun.

³⁴ Na i ranga ve aka God ile erere i ri nge ako i ri vene:

“E avele i pavurvur ako aro i el a Toko Pomnga ile mire.

Na e avele i pavurvur nge itornga.”

Aisaia 40:13

³⁵ “Na i pavurvur avele aro
toko e i sung thangaroong a God nge,
avele aro.” *Jop 41:11*

³⁶ Na toko e avele i pavurvur nge aken, eneke God ini ur alavusnga tepun, na rongan i theal ur alavusnga aro a ile engenging lemi, na ur alavusnga areken o voth mo aro o paroro i.

Naro te risea i evelengka aro aro ile vusonga avele. I nunganga.

Pol i ri nge vothung ako toko lemioongare aro o oma i

Aro te sungpot ler mimiong alavusnga a God nge.

¹ Maken titeik lemioongare, te velpol ini toko vengvenga a God itheki ako a ile themosaling lemi venen aken, mako tho pator lomu ve, aro thomu o sungpot sivengomu a God nge ranga ve ini sungong miminga ako i riri a itheki na ilemi sivenga nge. Aken ini lomu vothung ako o lotual vengveng a God nge.

² Na o mothong tova o panes ol tokokoe areko rongan o panes vothung ulue anga, aveto somu womo a God mo i paponganga lomu lemi rumong, na nge aken aro i paonolpot thomu. Na aro ve i oma venen aken, thomu o pavurvur aka aro o ate nge vothung kathnga aka God i sis ve aro thomu o oma i. Ranga ve ini vothung aka i sivenga, na vothung aka God ilemi sivenga nge, na vothung aka i vengvenget a itheki.

Aro te um engeng nge sungong aka God i sungu i a it omole omole nge.

³ Na God i themosal tho ma i ateal tho ve ini ile pakeke, mako tho pator thomu omole omole ve, wong mothong tova risea sivengom roro nge ur areko i vengveng a God itheki lale, aveto aro avrum senu tel lom lemioong aka ini sungong aka i panes a God ile avrumong nge sungonga a ong nge, naro lom lemi rumong nge sivengom aro i vengvenget tomo nge i.

⁴⁻⁵ Na lemir mire aka ve, toko ilopat epipee pulua i vot, na epipee omole omole ole omaing i thun avele, ole omaing kene i rel rel. Na i ranga ve mun nge it toko lemioonga pulua, it ini a Krais ilopat epipeere, aka te velpol ol ini a Krais ilopat omole ol inga. Na te teo teo e pel mo te opaal pel epee epeenga, na aken ini tepun aka omu e i mothong tova i papomnga isivenga.

⁶ Na te el sungong rel relnga aka a God nge me, i pavurvur nge ile themosaling aka i sungu i a it nge. Na i vene, aro ve toko e ile sungong ini panongpolong ranga ve ini a God ile rieng elnga, aro i oma i, i pavurvur ranga ve aka nge ile lemioong.

⁷ Na aro ve ile sungong ini tokokoere oopoalnga, aro i opaal inga or. Na aro ve

ile sungong ini tokokoere opatalnnga, aro i patalor inga or.

⁸ Na aro ve ile sungong ini tokokoere olemi paengenga, aro i paengeng inga or. Na aro ve ile sungong ini opoalonga nge ur aka tokokoere o oror nge, aro ini toko sun-gonga a or nge. Na aro ve ile sungong ini mukalinga nge umong, aro i um engeng mo i theal senu umong aken. Na aro ve ile sungong ini themosaling nge tokokoere, aro ilemi sivenga nge oopoalnga.

Toko lemioongare aro oa sagu pel.

⁹ Na nge lomu asagupeling, o mothong tova sivengomu o nea thomu. Naro thomu o lel kimomu nge vothung kerenga omanga. Naro thomu o betet inga, aro nge vothung sivenga panesnga.

¹⁰ Naro oa sagu pel ranga ve ini titein-peling a vothung. Naro o papomnga thon-gongomu lemioongare roro nge siven-gomu.

¹¹ Na o mothong tova thekumu namalo tie nge a God ile omaing omanga, aveto Oni Riringa aro i pavurpol lomumu evele-lnga nge a Toko Pomnga ile umong.

¹² Naro thomu o men sial tomo nge lemi sivengaing, nge ur sivesivenga areko God aro i sungu i a thomu nge. Naro thomu o mit engeng nge matheong elnga. Naro o kis inga nongong evelelnga.

¹³ Na aro ve God ile tokokoe pelie o oror nge ur e, aro thomu o opaal or nge. Na aro ve long pelie o velpol a thomu nge, aro thomu o nongpoo or.

¹⁴ Naro thomu o nong nge a God ve aro i oma senu nge areko o sung matheong a thomu nge. Aro thomu o oma inga venen aken, na o mothong tova o nong a God nge ve aro i olal kerengaing a or nge.

¹⁵ Na aro ve omu pelie o risea, aro o risea tomo nge or. Na aro ve omu pelie o tang, aro thomu o okup or nge tanging.

¹⁶ Naro lomu lemi rumong i vur e pel inga. Na o mothong tova o papomnga sivengomu, aveto aro thomu o opaal toko vulutngare nge ole umong. Na o mothong tova sivengomu lomumu ve, thomu ini powe ninengare.

¹⁷ Na aro ve o oma vothung kerenga nge thomu, o mothong tova o olal mun i nge

vothung kerenga. Aveto aro o naktet tel thomu nge vothung ako i vengveng a toko alavusnga otheki.

¹⁸ Na i sivenga aka aro thomu o betet inga nge pamen senu peking a vothung, i pavurvur nge lomu engenging aka a thomu nge anga.

¹⁹ Na titeik sivengare, aro ve o oma vothung kerenga nge thomu, o mothong tova o olal i a or nge, aveto o sungu i a God imeni mo isivenga i monpepe or, eneke God ile erere i ri vene:

Toko Pomnga i ri ve,
“Ini lek omaing aka aro tho monpepe
or
nge ole vothung kerenga aken olal-
nga.” *Lo 32:35*

²⁰ Aveto aro o oma ranga ve aka God ile erere i ri nge vene:

“Aro ve lom ngarang e mesi pun i,
aro ong sung aning a i nge.
Na aro ve thei i pun i,
aro ong sung mun thei a i nge.
Na aro ve ong oma venen aken,
aro ile mara nge ile vothung kerenga
ako i oma i a ong nge lale.” *Gut-pela Sindaun 25:21-22*

²¹ Na aro ve o oma vothung kerenga nge wong, mothong tova aro ole vothung kerenga aken aro i pavurpol lomum mo ong olal i a or nge, aveto aro lom vothung sivenga aro ile mong ole vothung kerenga aken.

13

Aro te voth a mukalingare osa thewo.

¹ Naro toko na seng alavusnga, or omole omole aro o voth a gavman a mukalingare osa thewo, eneke aro ve God i pamenu or venen aken avele, e avele aro i velpol polpol ini mukalinga. Na gavman a mukalinga areko o voth, kene God isivenga i pamenu or venen aken.

² Mako toko e aka i avsa nge mukalinga e ile riong, kene i kelelal nge ur aka God i pamenu i. Na areko o oma venen aken, aro o pavelpol paomelaling a osivenga nge.

³ Na e mun e aka, gavman a mukalingare o voth nge toko sivengare opan-gangenga avele, aveto o voth aka nge toko kerengare opangangenga. Na eve ong sis ve aro ong ngeip nge a gavman a mukalinga avele, aro ong oma inga vothung sivenga, maken aro i risea ong nge.

⁴ Na i venen aken, eneke gavman a mukalinga ini a God ile umonga aka aro i opoal ong nge menong sivenga. Aveto aro ve ong oma vothung kerenga, aro ong ngange, eneke ile engenging i voth. Na ini a God ile umonga aka i oma a God ile omaing nge toko kerengare opaomelalnga ake ru a ulue.

⁵ Make i sivenga aka aro ong paesu sivengom a mukalingare osa thewo, aro vene mo o paomelal ong. Na e mun e aka, aro ong voth a osa thewo, eneke lomum mire aka ve, vothung aken ini vothung vengvenga.

⁶ Na aken ini takis ulnga tepun, eneke gavman a mukalingare ini a God ile umongare, na ole omaing inga aka ini omaing aken omanga na umong mun pelie aka o el ol umtun nge avele.

⁷ Na aro ve om thangaroong i voth, aro ong olal i. Na aro ve om thangaroong nge takis rel relnga pelie aka rongan i voth, aro ong ul i a takis elngare nge. Na aro ve o paesu ong a toko e isa thewo, aro ong voth inga nge. Na aro ve o sung mukalinga a omaing a toko e nge, aro ong nongal ikei na papomnga iion.

Aro ve ar sagu tokokoere, aro te avsa a God ile torong avele.

⁸ Na aro ve omu thangaroong e i voth a toko e nge, aro thomu o patopalal i mo i vus. Aveto ur omole i voth aka aro o pavus i avele, aka ini asagupeling. Na tho ri inga nge asagupeling, eneke toko aka ia sagu toko kathnga aka i thepolo i, kene i panes vengveng a God ile torong elonga lale.

⁹ Na God ile torong i ri vene:
“Mothong tova ngo tomo nge areko or ini ewom avele.
Mothong tova so rin toko.
Mothong tova ong kem.
Mothong tova theseal thongom e ileurre” *Kisim Bek 20:13-17*

na torong areke tomo nge torong mun pelie o voth inga nge torong omole lemi ako i vene:

“Aro om sagu toko kathnga aka ong thepolo i,
ranga ve aka om sagu sivengom.”
Wok Pris 19:18

10 Na aro ve toko e ia sagu toko kathnga aka i thepolo i, aro i oma vothung kerenga e avele a i nge. Maken aro ve toko e ia sagu toko kathnga aka i thepolo i, i ranga ve aka i panes vengveng a God ile torong elonga lale.

*Toko lemioongare aro o naktet ole esong
ake ru a ulue.*

11 Naro thomu o oma venen aken, eneke lomumu mire aka, wop lemi ake te mimi nge, kene ur pomnga e aka aro i velpol nge. Na ponange ini lomu nang aka aro thomu o vurpola nge nokolkolong mo o thealal, eneke nang aka aro Toko Pomnga i el werer it nge, kene i toth rintet ol nge nang nomenganga aka lemiro tel nge a Krais.

12 Na pen a midenga i toth nge ile vusong, na pen lalanga i toth rintet ol lale, ranga ve aka ini a Toko Pomnga ile velpolling, mako i sivenga aka aro te mothong ol mideng a vothung panesnga mo aro te panes ol pen lalanga a vothung. Aken it ranga ve ini toko punonga aka i ovruu nokolkolonga a teunong mo aro i pasopa ol punonga a teunong aka aro i paseral i nge punong.

13 Naro te panes ol inga aka ini pen lalanga a vothung sivenga. Na te mothong tova te oma pen a midenga a vothung ranga ve aka o thinu thina thei engenga nge saal aolongaere aka vothung kerenga pulua i voth a lemi, na o thin rinrin thei engenga evelelnga, na toko na seng aomnga, na ngo tomopeling nge toko na seng rel relngare, na volpelng, na muspeling.

14 Aveto lomu mimiong aro i velpol ranga ve ini a Toko Pomnga a Jisas Krais ile mimiong, na o mothong tova lomumu rum nge vothung ulue anga panesnga aka i mita a lomumu me.

14

Areko ole lemioong i motu, o mothong tova okei palil nge areko ole lemioong i motu rongan.

1 Na e mun e aka, aro thomu o nongpoo areko ole lemioong rongan i lol, aveto o mothong tova o nongpoo ir mo aro o ri pel nge ur areko ole lemiong rongan i engeng nge.

2 Eneke toko omole ile lemioong i motu, na ilemi ve i pavurvur nge aning elonga annga, aveto toko relnga e aka ile lemioong rongan i lol, ini mekerem annga avele, na i an inga ur ometa angare.

3 Na toko aka ini ur alavusnga annga, i mothong tova ilemi otun toko aka i an mekerem avele. Na toko aka i an mekerem avele, i mothong tova i teltun toko aka i an ur alavusnga, eneke God i nongpoo i lale.

4 Na ong ini ao aka ong teltun toko relnga e ile umonga ia, e? Ini inga ile mukalinga aka aro i avrum nge ile omaing aka i sivenga eve i kerenga, na ini lom omaing avele. Aveto aro i mit engeng, eneke Toko Pomnga i pavurvur aka aro i pamit engeng i.

5 Na toko omole e aka ilemi ve, nang relnga vet e aka i rel nge nang alavusnga aka a God itheki, aveto toko relnga e aka ilemi ve, nang alavusnga i vur e pel inga. Naro toko omole omole aro olemi i ngo senu ol nge ole vothung aken, aka i vengveng ol a God itheki.

6 Na toko e aka i ri ve nang relnga vet e aka i voth, kene ilemi venen aken mo aro i papomnga a Toko Pomnga nge. Na toko e aka i an mekerem, kene i oma mun venen aken mo aro i papomnga a Toko Pomnga nge, eneke i ri sivengaing a God nge, nge aning aken. Na toko e aka i an mekerem avele, kene i oma venen aken mo aro i papomnga a Toko Pomnga nge, na i ri mun sivengaing a God nge, nge aning aka i an i.

7 Na i venen aken, eneke ar e avele isivenga i theal total ile mimiong, na ar mun e avele isivenga i theal total ile ri-nong.

8 Avele! Eneke aro ve rongan te mimi, aro te risea Toko Pomnga nge ler mimiong aken. Na aro ve te rin, aro te risea mun a

Toko Pomnga nge. Maken aro ve te mimi eve te rin, it ini a Toko Pomnga ile.

⁹ Na tepun vengveng ako ve, Krais i rin lamako i mimi werera, kene i vene: I oma venen aken mo aro i velpol ini mimiongare ome rinrinongare oa Pomnga.

¹⁰ Na wong, i vova ako ong teltun teum lemioonga ia, e? Na e mun e, i vova ako lomum otun teum lemioonga ia, e? Mothong tova oma venen aken, eneke it alavusnga aro te mit nge riong a God itheki.

¹¹ Eneke God ile erere i ri vene:
“Toko Pomnga i ri vene,
‘Aro ve i nunganga aka tho mimi,
i nunganga mun aka
toko alavusnga aro o koru oeve ruru
mo o papomnga tho.
Na or alavusnga mun
aro o pamilempot
ole vothungre a God nge.’ ” *Aisaia 45:23*

¹² I venen aken, mako aro it omole omole aro te pamilempot ler vothung tepun omole omole a God nge.

Te mothong tova ler vothung i pamatu titeirre ole lemioong.

¹³ Maken aro te mothong ol teltunnger pel tomo nge titeir lemioongare nge ler vothung. Aveto omu omole omole aro ilemi tuntun ve, “Aro tho oma ur e avele aka aro i pamatu teik lemioonga e nge ile lemioong.”

¹⁴ Na nge lek teoong a Toko Pomnga a Jisas nge, lemik nine senu nge aka, aning alavusnga i riri a God itheki, na i pavurvur nge annga. Aveto aro ve toko e aka ilemi ve, aning pelie i akop a God itheki, aken i mothong tova i an i, eneke ini aning akopnga a isivenga itheki.

¹⁵ Na i venen aken, na aro ve teum lemioonga e i thepol aka ong an aning aka ilemi ve God i mit roal it nge ma ilemi kerere nge, aken lom asaguong i voth ol nge teum lemioonga aken avele, aka nge lom vothung aken. Mako om aning inga aka ong an i, i mothong tova i pakerenga teum lemioonga e aka Krais i rin nge iopoalnga.

¹⁶ Na o mothong tova thomu o oma vothung aka lomumu ve i sivenga, aka

a toko pelie aka o rivenga ini vothung kerenga otheki, aro vene mo o ri ve lomu vothung aken ini vothung kerenga.

¹⁷ Eneke aro ve te voth a God ile menong e nepes sa thewo, aning eve thinong kathnga aka te el i eve te mothong i, ini ur polpolnga, aveto God i sis rintet ve aro te oma inga vothung vengvenga, naro te voth lemi moring tomo nge tokokoere, naro Ioni Riringa i pavelpol lemi siven-gaing a it nge.

¹⁸ Naro te oma venen aken, eneke toko e aka i oma a Krais ile omaing venen aken, God ilemi sivenga nge i, na tokokoere mun aro o papomnga i nge ile vothung aken.

¹⁹ Maken aro te betet nge vothung aka i pavelpol men senu peling na vothung mun aka nge ler lemioong paengenga epee epee.

²⁰ Na o mothong tova lomumu i engeng nge aning pelie annga aka pelie o rivenga God i mit roal it nge, aro vene mo thomu o teu a God ile omaing a tokokoere nge. Na i nunganga aka aning alavusnga i riri a God itheki, na te pavurvur nge annga, aveto ini vothung kerenga tova ve toko e ile vothung aka nge aning pelie annga, i pamatu itein lemioonga e.

²¹ Na i sivenga aka aro thomu o mothong mekerem annga, eve vain thinnga, eve vothung mun pelie, tova lomu vothung aken aro i pamatu titeumu lemioonga e.

²² Na i venen aken, mako lemioong kathnga nge ur areke aka rongan ong krim bibim i, ini ur aka aro i voth inga a ome a God omu wop. Na o mothong tova o ri pel nge. Sapase toko e aka ilemi omoletet nge ur e aka i vengveng nge omanga, lamako ilemi virpol nge iteltunnga avele.

²³ Aveto toko e aka rongan ilemi sulung salang nge aning pelie annga, aveto i an ol i, maken i teltun ol ia a God nge, eneke ile lemioong omole ol inga nge ur aka i an i, kene avele. Na ur alavusnga aka toko e ile lemioong i pavelpol i avele, ini ile vothung kerenga vet aken.

¹ Na it areko ler lemioong i motu, aro te ontunu inga lemir nge ur kathnga ako areko ole lemioong i motu rongan, kene o rivenga God i mit roal or nge. Na te mothong tova te panes vothung ako i pango senu inga lemir.

² Aveto it omole omole aro te oma inga vothung ako aro i pango senu titeirre olemi mo aro te paengeng or nge ole lemioong.

³ Naro te oma venen aken, eneke Krais mun i oma inga vothung ako i pango senu isivenga ilemi, kene avele, aveto i el inga matheongre, na i ranga ve aka God ile erere i ri nge vene:

“God, ri tangatunngom kene i velpol mun a tho nge.” *Buk Song 69:9*

⁴ Na tho palemi rumal thomu nge riong ako i voth a God ile erere nge venen aken, eneke riong alavusnga ako o wat i a God ile erere nge nomenga, kene o wat i mo aro o patorial it nge, mo aka aro te tital i mo i opoal it nge mit engengeng nge matheong potunnga, na nge lemir paengenga. Na aro ve i opoal it venen aken, i pavurvur aka aro te men sial nge ur sivesivengare aka God aro i sungu i a it nge.

⁵ Na tho nong a God nge, ini God aka i opoal it nge mit engengeng nge matheong potunnga na nge lemir paengenga, na tho nong a i nge ve aro i oma thomu alavusnga mo lomu lemi rumong i omole ol inga, nge aka aro thomu o panes ol a Krais Jisas ilemi.

⁶ Na tho nong ve aro i oma venen aken mo o pavurvur aka aro o papomnga a God aka ini a Toko Pomnga a Jisas Krais Itema tomo nge lomumu na lomu riong aka i omoletet ol inga.

Judare tomo nge areko or ini Judare avele ole pamimionga omole ol inga aka ini a Krais.

⁷ Maken aro thomu o nongpoo pel ranga ve aka Krais i nongpoo thomu a i nge me, mo aka aro tokokoere aro o papomnga a God.

⁸ Na i vene ake, na tho ria thomu ve, God i pakeu a Krais me mo i velpol ini Judare ole umonga mo i pathengal it aka ve, God ile riong i nunganga, ranga ve aka i papokima nunganga a God ile riong

ako i kin i nomenga tomo nge Judare oa pompome nomengangare.

⁹ Na Krais i velpol mun ini Judare ole umonga mo aro areko or ini Judare avele aro o papomnga a God nge ile themosaling aka i velpol mun a or nge. Na i ranga ve ini God ile erere i ri nge vene:

“Maken aro tho risea ong

a tokokoe areko or ini Judare avele oa wop.

Naro tho vo mun riseaing a voingre aka o paesa iom roro.” *Buk Song 18:49*

¹⁰ Na God ile erere i ri mun vene:
“Aro thomu areko thomu ini Judare avele, aro o risea tomo nge Judare
ako or ini a God ile tokokoere.” *Lo 32:43*

¹¹ Na nge ile erere epee mun i ri vene:
“Aro thomu areko thomu ini Judare avele, aro o risea Toko Pomnga.

Na toko alavusnga ake ru a ulue
aro o vo riseaing a voingre mun a i nge.” *Buk Song 117:1*

¹² Na God ile riong elnga a Aisaia i ri mun vene:

“Na toko e aka aro i velpol,
naro ini a nepes a Devit itema a Jesi itevinga.
Na God aro i paesa i roro
mo areko or ini Judare avele
aro o voth a isa thewo.
Aken aro o men sial mun nge
ur sivesivenga areko toko aken
aro i sungu i a ile tokokoere nge.” *Aisaia 11:10*

¹³ Na i venen aken, mako tho nong nge a God nge thomu, eneke ini a God aka i oma thomu mo o men sial mun nge ur sivesivenga areken, na tho nong ve aro i pavual thomu nge lemi moring tomo nge lemi sivengaing, eneke lomumuo a i nge. Na tho nong ve aro i oma venen aken mo Oni Riringa ile engengeng aro i pavual rintet thomu nge men sialing nge ur sivesivenga areken.

Pol i ritet nge ile omaing na i pavus ile malueng

(Vonge 15:14–16:27)

Pol i ritet nge ile omaing tepun.

¹⁴ Na titeik lemioongare, sivengek lemk nunganga ako ve, sivengomu o vual nge vothung sivenga, eneke God i pavual thomu lale nge ile mire alavusnga, mako thomu o pavurvur aka aro o pator pel sivengomu nge ur areken.

¹⁵ Aveto tho wat riong engenga nge ur pelie ake a thomu nge lale, eneke tho sis ve aro tho palemi rumal werer mun thomu nge ur areken. Na tho oma venen aken, eneke ake ini lek omaing vet aka God i sungu i a tho nge, aka nge ile themosaling.

¹⁶ Na nge aken tho velpol ini a Krais Jisas ile umonga aka aro tho panongpol areko or ini Judare avele, ranga ve aka prisre o oma i a Judare nge. Na tho panongpol or nge a God ile Panongpolong Sivenga mo aro areko or ini Judare avele, aro o velpol ranga ve ini sungong aka God ilemi sivenga nge, eneke Oni Riringa i oma or mo o riri a itheki.

¹⁷ Na God i ateal tho nge ile omaing venen aken, mako tho pavurvur aka aro tho risea sivengek nge a God ile omaing aken aka tho oma i, eneke tho teo a Krais Jisas nge.

¹⁸ Na tho pavurvur aka aro tho ri mun nge ur pelie avele, ini inga nge ur aka Krais i oma i aka a lek omaing lemi. Na i oma a lek omaing lemi mo aro areko or ini Judare avele o nongal nge a God, nge aka o nongpol lek riong, na o thepol lek omaing,

¹⁹ na o thepol mun pakukukaling na pathepolong engenga aka Oni Riringa ile engenging i pavelpol i. Na i venen aken, mako tho panongpol nge a Krais ia Panongpolong Sivenga alavusnga lale aka a rumrem elonga i patea a Jerusalem na i mulalu a epee a Ilirikum* angare oa nek.

²⁰ I vene aka tho oma i evelelnga aka tho sis rintet ve aro tho panongpol Panongpolong Sivenga nge areko olemi mire nge a Krais rongan. Na nik plong ve aro tho panongpol mun nge wop aka toko relnga e i panongpol tel nge lale. Aken i ranga ve aka tho ari lek vel a toko relnga e ile vel le mitainga.

²¹ Aveto tho sis ve aro tho panes riong aka i voth a God ile erere nge aka i ri nge

a Krais vene:

“Areko o el panongpolong nge i rongan, aro olemi mire nge i.
Na areko o nongpol nge i rongan, aro el mire ol nge i.” *Aisaia 52:15*

Pol i sis ve aro i porum vet Rom angare lamo i es ol a Spen.

²² Na lek omaing i venen aken, mako papulua i mitrup tho nge porumtetngomu.

²³ Aveto ponange rem ol e avele i voth a epee ake aka aro tho um nge, na tovu po pulua aka i vus lale tho sis rintet ve aro tho porum vet thomu,

²⁴ mako lemk ol ve aro tho porum vet thomu nge aka aro tho es a epee a Spen. Na nge wop lemi areko tho es nge, tho sis ve aro tho porumtet thomu, na tutunnga inga atiko aro tho voth tomo nge thomu mo aro lemk ngo senu tel tie, lamo tho sis mun ve aro thomu o opoal tho nge lek esong aken.

²⁵ Aveto ponange ol ake tho es ol a Jerusalem la mo aro tho sung sungong a toko lemioongare aka o voth nge.

²⁶ Eneke Masedonia ome a Akaia angare olemi ve i sivenga aka aro o sung umtun nge toko lemioonga areko o voth a Jerusalem oa pelie aka o oror nge ur pelie, na tho es tomo ol nge ole sungong aken la.

²⁷ Na i nunganga aka osivenga olemi ve, i sivenga aka aro o sung umtun aken a or nge, aveto i nunganga mun aka oa thangaroong i voth a Judare nge, eneke aro ve Judare o thep so nge areko or ini Judare avele mo o el mun mimiong ponganga nge, aken i sivenga aka aro o opoal mun Judare nge ur ulue anga aka o oror nge.

²⁸ Maken aro tho pavus tel lek omaing ake, aka nge ole umtun sunga alarolu a or nge, na umtun aken kene ini ole lemioong monnga. Lamo nge lek esong a Spen la, aro tho porum tel thomu Rom angare.

²⁹ Na lemk mire aka ve, nge lek velpol ing a thomu nge, aro tho opoal thomu nge ur sivesivenga areko Krais i pavual it nge.

³⁰ Na titeikre, te voth a ar Pomnga a Jisas Krais isa thewo, na Oni Riringa i opoal

* ^{15:19:} Ilirikum iion aininga ini a Dalmesia na i voth teleka nge a Masedonia na or paini oa nek omole.

it nge asagupeling, mako tho tor engeng lomu ve aro o nong nge a God ve aro i opoal tho nge lek omaing, aken aro thomu o betet tomo nge tho nge lek omaing aken.

³¹ Aro thomu o nong ve aro God i paseral lek nge areko ole mio nge a Krais avele ako o voth a Judia. Na o nong mun ve aro God aro i oma ile tokokoere aka o voth a Jerusalem mo ole mi sivenga inga nge umtun aka aro tho sungu i a or nge.

³² Aken aro tho velpoltun thomu tomo nge lemi sivengaing, tova God ilemi i venen aken. Naro te pavurvur aka aro te thau it mo te paengeng pel ler.

³³ Na tho nong ve aro God aka ini lemi moring tepun aro i voth tomo nge thomu alavusnga. I nunganga.

16

Pol i pasungalu ile nang sivenga a Rom angare nge.

¹ Na tho sis ve aro tho ritet lomu nge lulur lemioonga a Pibi, ini lotu a opoalinga aka a rem pomnga a Senkria. Na tho ritet thomu ve ini seng sivenga.

² Na tho nong thomu ve aro o nongpoo i, tova i velpol a thomu nge, eneke i mun ini a Toko Pomnga ile. Naro thomu o nongpoo i ranga ve aka God i sis ve aro ile tokokoere o oma i. Naro thomu o opoal i nge ur kathnga aka i oror nge, eneke ini seng aka i opoal rintet lemioonga pulua lale na tomo mun nge tho.

³ Na pasungalu lek nang sivenga a Prisila ome a Akuila nge, aka or ini a Krais Jisas ile umongare aka o um tomo nge tho.

⁴ Or paini o sungpot ole mimiong nge pamimingek na i toth aka aro o el meik nge rinong aka i kath tho. Mako tho ri sivengaing nge or paini, aveto ini engek avele, toko lotuongare aka or ini Judare avele, or alavusnga mun o ri sivengaing nge or.

⁵ Na pasungalu lek nang sivenga a lotuongare nge aka o pathun a or paini ole vel lemi.

Na pasungalu lek nang sivenga a Epainetus nge, ini toko teltelng a Krais aka a epee a Esia.

⁶ Na pasungalu lek nang sivenga a Maria nge, aka i um engeng nge opoal ngomu.

⁷ Na pasungalu lek nang sivenga a Andronikus ome a Junias nge, or paini ini lekngare aka nomenga o voth tomo nge tho aka a mang a midenga lemi. Na God ile pakekere o risea or paini na or paini o teo tel a Krais nge lamako tho ol.

⁸ Na pasungalu lek nang sivenga a Amplius nge aka ok sagu i, eneke i teo mun a Toko Pomnga nge.

⁹ Na pasungalu lek nang sivenga a Urbanus nge ini a Krais ile umonga ranga ve ini tho.

Na pasungalu lek nang sivenga a Stakis nge aka ini teik sivenga.

¹⁰ Na pasungalu lek nang sivenga a Apeles nge, ini toko aka tongporumongre o velpoltun i, ave rongan i mit engeng nge ile lemioong nge a Krais.

Na pasungalu lek nang sivenga a Aristobulus ile vel lemi angare nge.

¹¹ Na pasungalu lek nang sivenga a Herodion nge aka ini leknga mun.

Na pasungalu lek nang sivenga a Narsisus ile vel lemiare nge, or ini areko o teo mun a Toko Pomnga nge.

¹² Na pasungalu lek nang sivenga a Tripina ome a Triposa nge, seng or aini aken o betet nge a Toko Pomnga ile omaing omanga.

Na pasungalu lek nang sivenga a luk sivenga a Persis nge, ini seng mun aka i betet rintet nge a Toko Pomnga ile omaing omanga.

¹³ Na pasungalu lek nang sivenga a Rupus nge, ile omaing a Toko Pomnga nge i sivenga rintet.

Na pasungalu lek nang sivenga a inina mun nge, eneke inina aken i velpol mun ini ok nina.

¹⁴ Na pasungalu lek nang sivenga a Asinkritus, Plegon, Hermes, Patrobas, na Hermas nge, tomo mun titeir lemioongare aka o voth tomo nge or.

¹⁵ Na pasungalu mun lek nang sivenga a Pilologus, Julia, Nereus tomo nge ilunnga na Olimpas nge, tomo mun

nge a God ile tokokoere ako o voth
tomo nge or.

¹⁶ Na o pasungalu pel nge lomu nang
sivenga tomo nge menumu titponga
ranga ve aka omu sagu pel.

Na Krais ile lotuonga alavusngare o pa-
sungalu mun ole nang sivenga a
thomu nge.

*Aro te naktet it nge toko le apalteton-
gare.*

¹⁷ Na titeikre, tho tor engeng lomu ve
aro o naktet thomu nge pamirealonga
le apaltetongare aka o pavelpol menong
rel relnga nge lotu, na o paleklek toko
lemioonga pelie mo aro o panes ol a Krais
ile sovengalo sivenga avele. Ole pamirealing
aken i rel nge a Krais ile pamirealing
ako thomu o elo i lale. Aro thomu o voth
mela nge or.

¹⁸ Eneke tokokoe areko o venen aken o
oma ar Pomnga a Krais ile omaing avele,
aveto o panes inga ur aka i mita a olemi
me. Na o ri ololo na o pamolomolo tokoko-
ere nge ole riong, na o paleklek areko
olemi ve, toko ol e avele i voth aka aro ile
apaltet or.

¹⁹ Na tho ri venen aken, eneke toko
alavusnga o nongpol aka ve, thomu o non-
gal senu a Krais ile riong, mako tho risea
thomu nge lomu vothung aken, aveto tho
sis ve aro thomu ini toko powe ninengare
nge vothung sivenga omanga, na ini toko
riringa areko o lel kimomu nge vothung
kerenga omanga.

²⁰ Na God aka ini lemi moring tepun
kene i toth aka aro i pakerenga a Satan
ile omaing, naro i opoal thomu mo o
tepetuntun toko le apaltetonga areken.

Na tho nong ve aro thomu o voth a ar
Pomnga a Jisas ile themosaling lemi.

*Toko pelie o pasungalu ole nang sivenga
a Rom angare nge.*

²¹ Na Timoti aka i um tomo nge tho,
i pasungalu ile nang sivenga a thomu
nge. Na Lusius, Jeson na Sosipater aka
or ini lekngare o pasungalu mun ole nang
sivenga a thomu nge wot.

²² Na tho a Tertius, tho watu a Pol ile
malueng a riong ake, na tho mun tho

pasungalu lek nang sivenga a thomu nge,
eneke tho teo mun a Toko Pomnga nge.

²³⁻²⁴ Na tho a Pol, Gaius i nongpoo tho a
ile vel lemi, na i nongpoo mun lotuonga
alavusngare a pen ake mo o oma lotu a
ile vel lemi, na i pasungalu mun ile nang
sivenga a thomu nge wot.

Na Erastus i pasungalu mun ile nang
sivenga a thomu nge, ini mukalinga aka i
theal tetal rem pomnga ake ini a Korin a
umtun.

Na titeir a Kwartus i pasungalu mun ile
nang sivenga a thomu nge wot.

²⁵ Naro te risea a God, eneke i pavurvur
ako aro i paengeng thomu nge lomu
mitong nge a Jisas Krais, ranga ve aka
Panongpolong Sivenga aka tho panong-
pol tokokoere nge, kene i ri nge. Na
Panongpolong Sivenga aken i velpol pat
ol na i ritet nge a Jisas Krais. Aveto
nomenga nomenga vet aka me Panongpol-
long Sivenga aken i ngo kine,

²⁶ aveto i velpol pat ol lale. Na them
opoal tokokoere nge imirenga, nge aka
them pathengal or aka ve, Jisas Krais ini
toko pamimionga aka God ile riong elnga
nomengangare, kene o wat nge na o ritet
nge ve aro i velpol panen. Na God aka i
mimi evelelnga aka aro ile vusonga avele,
kene i pakepot them ve aro them panong-
pol toko alavusnga areko or ini Judare
avele, mo o pavurvur aka aro olelio nge
a Krais, mo o panes i.

²⁷ Na i venen aken, mako nge ler teoong
a Jisas Krais nge, aro te risea a God, aka
ienga inga ini a God powe ninenga. Naro
te risea i evelelnga aka aro ile vusonga
avele. I nunganga.

Na i re aken. I vus.

**Pol ile malueng teltelnga
ako i wat i a toko
lemioongare nge ako o voth
a rem a Korin
1 Korin
Ritetong nge a 1 Korin**

Toko pelie ako a rem pomnga a Korin o velpol tel ini toko lemioongare, nge ako o nongpol Panongpolong Sivenga aka Pol i panongpol nge. Na Pol i panongpol Korin angare nge ile esong paininga. (O thepola Pakekere ole Omaing 18:1-18) Na Korin ini rem pomnga aolonga nomenga nge wop lemi aka Pol i es nge la. Na toko na seng pulua aka o voth a rem aken, o panes vothung kerenga pulua, na o lotual avalare tomo nge aka o sung polpol oni peti nge pel. Na nge a Pol ile panongpolong a esong menga i voth a rem pomnga a Epesus, na i nongpol nge toko lemioongare aka a Korin ole men kerereong. Pol i nongpol aka toko lemioonga ponganga pelie aka a Korin, i klip nge or aka aro o modop ole vothung kerenga areko o oma i nomenga. Na i nunganga aka Oni Riringa i sungu sungong sivesivenga pulua aka a toko lemioongare nge aka a Korin, ave o panes senu senu sungong areken mirenga avele. Na osivenga olemi ve, ole mire i aolonga, (1:18-2:16) mako o paroro osivenga. (4:6-21) Na toko omole e aka i ngo tomo nge itema iewo aininga aka i mothongpot mun i, (5:1-8) na o pamit pel nge riong evelelnga. (6:1-11) Na o thomreu pel nge lotu. (1:10-17; 3:1-23) Na tokokoe pelie mun aka o plosa a Korin me, ma o nin a Pol nge ur pelie aka toko lemioonga areken a Korin olemi nine nge rongan. (7:1; 8:1; 12:1; 16:1) Na i venen aken, mako Pol i wat malueng ake mo aro i pator ole nge ole vothung kerenga areken, na i olal senu ole ninongre. Na i ritet or nge peangeong a vothung, (7:1-40) na i ria or ve, toko lemioonga e avele aro i pamatu itein lemioonga e nge vothung aka i rivenga i sivenga aka aro i oma i, ave itein lemioonga aken i rivenga vothung

aken ini vothung kerenga. (8:1-11:1) Na Korin angare o engeng nge Oni Riringa ile sungong nge keieng rel relnga ringa, mako Pol i ritet or aka o lotu tomo nge a Oni Riringa ile sungongre vava. (11:2-14:40) Na i ritet mun or aka tokokoere ole los wereraing ini ur aolonga aka i voth a Panongpolong Sivenga lemi. (15:1-58) Na i nunganga aka toko lemioonga pelie aka a Korin o panes vothung kerenga pelie, na olemi nine nge ur pelie rongan, aveto Pol ile pamirealing nge ur areken i pavurvur aka aro i opoal it ponange, eneke te thepol ur areken a lotuong lemi ponange.

**Toko lemioongare o
mothong tova o pun pel nge
riong eve o paroro osivenga
oion**

(Vonge 1:1-4:21)

¹ Tho a Pol, tho wat malueng ake a thomu nge wot. Na tho ini a Krais Jisas ile pakeke, eneke i panes a God ilemi, mako i ateal tho mo tho velpol ini ile pakeke. Na titir a Sostenes i voth tomo nge tho.

² Na tho wat malueng ake a thomu areko o lotual a God aka a Korin. Na God i pariri thomu a itheki, nge aka i oma thomu mo thomu omole ol inga a Krais Jisas nge. Na i ateal thomu mo ini ile, ranga ve aka i ateal toko alavusnga a rumrem elonga aka olemio nge a ar Pomnga a Jisas Krais na o lotual i, ini oa Pomnga na ini ar Pomnga mun.

³ Naro thomu o el themosaling na lemi moring a Titemer a God tomo nge ar Pomnga a Jisas Krais nge.

*Pol i ri sivengaing a God nge, nge ile
opoaling a Korin angare nge.*

⁴ Evelelnga tho ri sivengaing a God nge, nge thomu, eneke i sung ile themosaling a thomu nge, eneke thomu o teo a Krais Jisas nge.

⁵ Make nge lomu teoong aken thomu o oror nge ur e avele, ranga ve aka God i opoal thomu nge ile riong panongpolnga elonga, na i panine lomu mire nge ur alavusnga,

⁶ eneke lemem panongpolong nge a Krais, i teo a lomumu.

⁷ Make thomu o oror nge Oni Riringa ile sungong e avele, nge wop lemi ake thomu o thealal nge ar Pomnga a Jisas Krais ile velpoling.

⁸ Naro i paengeng lomu lemioong, i pavurvur nge nang patopalalnga aken, mo aro ur e avele aro i voth a thomu nge, nge nang aken aro i pamit tokokoere nge riong.

⁹ Eneke God i panes inga ur ako i ri nge. Na ake ini isivenga, aka i ateal thomu mo o teo a Itun a Jisas Krais nge, aka ini ar Pomnga.

Pol i pator or nge ole mit omoleong.

¹⁰ Titeikre, ar Pomnga a Jisas Krais i sung engenging a tho nge, make tho nong engeng a thomu nge ve aro o mothong tova o pun pel nge riong, na o mothong tova sivengomu o omreu pel. Aro lomu menong omole inga naro lomu lemi rumong omole mun inga, nge sovengalo aka aro thomu o panes a Krais nge.

¹¹⁻¹² Titeikre, tho ri venen aken, eneke ina Kloe ile vel lemia pelie o ria tho ve, thomu o pun pel nge riong. Ranga ve aka omu pelie o ri ve, "Them panes a Pol ile panongpolong." Na pelie o ri ve, "Them panes a Apolos ile panongpolong." Na pelie o ri ve, "Them panes a Pita ile panongpolong." Na pelie mun o ri ve, "Them panes a Krais ile panongpolong."

¹³ Na lomu vothung aken i sivenga avele. Toko lemioonga alavusnga o ranga ve ini a Krais ini peti aka i omole inga, na i pavurvur aro thomu o omrireng i avele. Na tho a Pol tho mon a won ngoronga nge mo aro tho el werer thomu, kene avele, Krais ienga inga i oma venen aken. Na nge nang aka thomu o el paninuong, thomu o apet iok avele, thomu o apet a Krais iion.

¹⁴ Na tho ri sivengaing a God nge aka tho paninu omu pelie avele, ini inga Krispus ome a Gaius,

¹⁵ aken na omu e avele i pavurvur aro i ri ve, "Pol i paninu tho mo tho ini ile wainlanga."

¹⁶ O, lemik simikal, tho paninu mun a Stepanas ome ile vel lemiare. Na lemik mire senu avele, ava tho paninu mun pelie eve ava avele.

¹⁷ Na lemik i sivenga aka tho paninu toko pulua avele, eneke Krais i pake tho nge omaing aken, kene avele. Ave i pake inga tho ve aro tho panongpol nge Panongpolong Sivenga. Na tho panongpol tomo nge toko ulue angare ole mire avele. Na aro ve tho oma venen aken, aro panongpolong nge a Krais ile omaing a won ngoronga nge aka tho panongpol nge, kene aro ile engenging avele.

God ile mire na ile engenging i voth a Krais nge.

¹⁸ Aro tho ri mun nge panongpolong nge a Krais ile omaing a won ngoronga nge. Na tokokoe areko o penthal, aro ve o nongpol i, aro o ri ve ini ur polpolnaga. Aveto tokokoe areko God i pamimi or, aro ve o nongpol i, aro olemi mire aka ve, God ile engenging i voth nge panongpolong aken.

¹⁹ Na i ranga ve aka God ile erere i ri nge, na i ri vene:

"Aro tho pakerenga toko powe ninengare ole mire." *Asaia 29:14*

²⁰ Na i vava nge toko powe ninengare tomo nge pamirealingare nge a Moses ile patorong na tokokoe mun areko o ri ololo tokokoere, e? Or ini toko ulue anga inga na God i oma ole mire mo ini ur polpolnaga na i pamimi tokokoere nge ole mire aken avele.

²¹ Na God i panes ile mire sivenga, mako i oma tokokoere olemi mo aro ve o panes osivenga ole mire, i pavurvur aro olemi mire senu nge a God avele, na ilemi sivenga ve aro i pamimi areko olemio nge a Krais, nge aka o nongpol panongpolong aka tokokoe areko o panes vothung ulue anga, kene o ri ve ini ur polpolnaga inga, ini panongpolong aka them panongpol nge.

²² Na Judare oni plong nge panongpolong aken, eneke o engeng inga nge pathepolong thopolnaga. Na areko or ini Judare avele, oni plong mun nge panongpolong aken, eneke o engeng nge toko powe ninengare ole riong nongpolnaga.

²³ Aveto them, them panongpol inga nge aka Krais i pamimi tokokoere nge ile rinong a won ngoronga nge. Ave Judare olemi rit nge riong aken nongpolnaga, na

areko or ini Judare avele, o ri ve riong aken ini ur polpolnga.

²⁴ Ave Judare tomo nge areko or ini Judare avele, aro ve o nongal a God ikei, aro olemi mire ako ve, riong aken i ri nge a Krais, na God ile engenging tomo nge ile mire ninenga, i voth a i nge.

²⁵ Eneke God ile omaing aken, aka i oma i nge ile mire ninenga, aka tokokoere o rivenga ini ur polpolnga, kene i mukal nge tokokoere ole omaing engenga alavusnga.

²⁶ Titeikre, lomumu rum werer nge lomu menong nge nang aka thomu o nongal a God ile lenging a thomu nge. Na nge toko ulue angare ole thopolong a thomu nge, omu pelie avele kene ini powe ninenga, na omu pelie avele aka iomu i kima, na omu pelie avele ini nepes itun.

²⁷ Na God i ateal tokokoe areko toko ulue angare o ri ve or ini ngongong, mo or ini ile, aken i pathengal toko powe ninengare aka ve, or ini toko powe ninengare a God itheki avele ma ole mara. Na God i ateal mun tokokoe areko toko ulue angare o ri ve or ini toko polpolnga, mo or ini ile, aken i pathengal toko kima angare aka ve, or ini toko kima angare a God itheki avele ma ole mara.

²⁸ Na God i ateal mun tokokoe areko toko ulue angare o papomnga or avele na o ri ve or ini toko vulutnga na oni silal ir, mo or ini ile, aken i pathengal toko ulue angare aka ve, ur aka o papomnga i, kene ini ur polpolnga a God itheki.

²⁹ Na God i oma venen aken mo aro toko e avele i pavurvur aro i ri ve, "Nge sivengek lek mire inga, tho velpol ini a God ile."

³⁰ Ave God ienging aka i pateo thomu a Krais Jisas nge. Na nge ler teoong aken, God i sungu mun ile mire sivenga a it nge, na i pamensenu it tomo nge i, na i pariri it a itheki, ma i pavthopot it nge ler vothung kerenga.

³¹ Maken i sivenga aka aro te oma ranga ve aka God ile erere i ri nge, ma i ri vene:

"Aro ve toko e i papomnga toko e,
i sivenga aka aro i papomnga Toko Pomnga
nge ile omaing aken." *Jeremaia 9:24*

2

Pol i palemi rum Korin angare nge ile panongpolong.

¹ Titeikre, nge wop lemi aka tho voth tomo nge thomu nomenga, na tho panongpol thomu nge a God ile riong inkinenga, tho ri riong motutuenga a thomu nge avele. Na tho ri ranga ve aka lek mire i aolonga nge lomu mire, kene avele.

² Na tho oma venen aken, eneke lemik ve aro tho panongpol nge ur e avele, ini inga nge a Jisas Krais ile omaing a won ngoronga nge.

³ Ma nge lek mitong a thekumu, i ranga ve aka lek engenging avele, na tho ngange, ma sawir tho.

⁴ Na tho panongpol a God ile riong ranga ve ini toko powe ninenga aka i ri ololo thomu, kene avele. Ave thomu o nongpol panongpolong aka tho panongpol nge, na o thopol a God ile engenging aka ranga ve pathepolong aka Ioni Riringa i sungu i a tho nge.

⁵ Na tho oma venen aken, eneke tho sis ve aro lomu lemioong aro i mit engeng nge a God ile engenging, na nge toko ulue angare ole mire avele.

Pol i ritet nge Oni Riringa ile mire.

⁶ Ave tokokoe areko ole lemioong nge a Krais i motu, o el mire sivenga nge panongpolong aka tho panongpol nge, ave mire aken ini toko ulue angare ole avele, na ini mukalingare aka o theal ulue na malang po ole, kene avele, ine mukalinga areken aro o penthal.

⁷ Na mire aka tho panongpol nge, ini a God ile, na ile mire aken i vene: Nomenga nge ur alavusnga opateanga, i ateal sovengalo aka aro i paesa it a Pen a Urvet nge, aka nge a Krais ile rinong, aveto sovengalo aken i ngo kine i pavurvur nge aka i pathengal i a them nge, aka ini ile pakekere.

⁸ Na mukalinga areko o theal ulue na malang po kene, olemi mire nge sovengalo aken avele. Aro ve olemi mire nge, aro o pamona Toko Pomnga aka i voth tomo nge a God nomenga, a won ngoronga nge, kene avele.

⁹ Aveto God ile erere i ri nge sovengalo aken aka i ngo kine nomenga na i ri vene: “Ur aka God i monsi nge areko oa sagu i, kene toko e avele i nongpol i rongan, eve i thopol i, na i velpol a toko e ilemi nge rongan.”

Aisaia 64:4

¹⁰ Aveto ponange kene lemimem mire nge, eneke God i sung Ioni Riringa a them nge mo aro i panine them nge ur areko i ngo kine nomenga.

Na Oni Riringa i pavurvur nge ur aken omanga, eneke ilemi mire nge ur alavusnga, i pavurvur nge ur aka i voth a God ilemi.

¹¹ Na toko e avele i pavurvur aro ilemi mire nge toko relnga ilemi, ini inga toko aken ion iako ilemi mire nge ilemi. Na ranga ve mun aka God Ioni ienga inga aka ilemi mire nge a God ilemi.

¹² Na them, onimem i pathengal ur areken a them nge, kene avele. Aveto God i sungu Ioni Riringa a them nge mo aro lemimem mire nge ur alavusnga aka God i sungu i a them nge lale.

¹³ Maken them panongpol tokokoere nge ur areko Oni Riringa i pathengal i a them nge, na them ri riong aka toko ulue angare ole mire i pavelpol i, kene avele. Ave them ri riong aka Oni Riringa i pavelpol i a them nge na them ripot i a tokokoe areko Oni Riringa i voth a or nge lale.

¹⁴ Aveto toko aka Oni Riringa i voth a ilemi avele, ilemi mire nge ur areko i es a God Ioni Riringa nge me, kene avele, eneke ilemi ve ur areken ini ur polpolnga, na i pavurvur aro ilemi mire nge avele, eneke ini inga areko Oni Riringa i voth a or nge na i opoal or, aro o el mirenga.

¹⁵ Na toko aka Oni Riringa i voth a i nge, i pavurvur aka aro i asesu asesa ur alavusnga a ilemi. Aveto ile vothung kene, toko polpolnga i pavurvur aro i asesu asesa i a ilemi avele, eneke Oni Riringa i voth a i nge avele.

¹⁶ Na ur aken i nunganga, eneke God ile erere i ri vene:

“Toko e avele ilemi mire nge a Toko Ponga ilemi,

na toko i pavurvur aro i patalal i avele.”

Aisaia 40:13

Aveto it, lemire mire nge a Krais ilemi, eneke Ioni Riringa i voth a it nge.

3

Pol i ri ve o mothong tova o panes a God ile umongare, na o panes inga a God ienga.

¹ Titeikre, nge wop lemi aka tho voth tomo nge thomu nomenga, tho patalal thomu ranga ve ini tokokoe areko Oni Riringa i voth a or nge, kene avele. Aveto tho patalal thomu ranga ve ini tokokoe areko o elo Oni Riringa a or nge rongan, eneke lomu lemi rumong nge a Krais rongan i ranga ve ini povothvoth.

² Na tho sung patoraling semelnga aka a thomu nge, ranga ve ini aning moloknga aka te sung i a povothvothre nge. Na tho sung patoraling motutuenga a thomu nge avele, eneke thomu o pavurvur nge riong aken elnga avele. Na i mulal ponange thomu o pavurvur nge patoraling motutuenga elnga rongan.

³ Eneke rongan thomu o mimi ranga ve ini tokokoe areko o panes vothung ulue anga. Ako ranga ve rongan thomu o pamien kerere pel, na o pun pel nge riong. Lomu vothung aken i pathengal aka ve, rongan thomu o mimi ranga ve ini tokokoe areko o panes vothung ulue anga.

⁴ Na omu pelie o ri ve, “Tho ini a Pol ile toko, eneke ile panongpolong inga i vengveng.” Na omu pelie o ri ve, “Tho ini a Apolos ile toko, eneke ile panongpolong inga i vengveng.” Na lomu vothung aken i pathengal aka ve, rongan thomu o mimi ranga ve ini tokokoe areko o panes vothung ulue anga.

⁵ Aro tho pavengveng thomu. Apolos ini ao? Na tho a Pol tho ini ao? Them alaini them ini a God ile umongare. Na thomu o nongpol lemem panongpolong, mako lomumuo nge a Krais. Na them oma inga omaing rel relnga aka God inga aka i sungu i a them omole omole nge,

⁶ ranga ve aka tho panongpol tel thomu nge a God ile riong, lamako Apolos i es me ma i paengeng lomu lemioong nge a Krais. Thomu o ranga ve ini ometa aka tho es

tel nge lale, ma tho o aning nge, lamako Apolos i es me ma i theal i, aveto God ienga i pametaplo i.

⁷ Na lemem omaing areken, o mothong tova o papomnga them nge, naro o papomnga inga a God ienga, eneke isivenga inga ako i pametaplo aning areken.

⁸ Toko aka i o aning na toko aka i theal i, or paini kene o oma inga a God ile omaing. Naro God i olal i a or paini nge i pavurvur nge ole omaing omole omole.

⁹ Eneke omaing aka them paini them oma i, ini a God ile. Na thomu o ranga ve ini a God ia ometa na ile vel.

Pol i pavengveng or na i ri ve God ile umonga i ranga ve ini vel aringa.

¹⁰ God i pake tel tho a thomu nge, ranga ve ini vel aringa sivenga. Na nge ile themosaling nge tho, tho patea ile omaing a thomu nge, ranga ve ini vel aringa aka i rongu tel vel le mitainga aka ini um. Lamo toko pelie o es me mo o aria ol vel nge. Aveto oa omole omole aro o naktet or nge vel aken aringa.

¹¹ God i ateal inga a Jisas Krais mo aro i el werer tokokoere nge ienga inga ile omaing, na i kene i ranga ve ini a God ile vel aken le mitainga omolenga, na i pavurvur aro toko e i rongu ol e avele.

¹² It toko lemioongare, it ranga ve ini tokokoe areko aro o aria ole vel omole omole nge vel le mitainga aken, na aro ve te panes a God ilemi, it ranga ve ini toko aka i ari ile vel nge gol na silva na um aka iolonga roro. Na aro ve te panes lemir, it ranga ve ini toko aka i ari ile vel nge won na ptho na ket.

¹³ Na toko alavusnga ole omaing aken aro i ngo pat nge nang aka Krais aro i pamit tokokoere nge riong, eneke Krais aro i tongporum ole omaing aken nge won sesenga nge ur le vanga aka o ari ole vel aken nge.

¹⁴ Na aro ve vel aka i aria i a vel le mitainga aken, i kerenga nge won sesenga ile anlelong aken avele, aro toko aken i el iolonga.

¹⁵ Aveto aro ve ile vel aken i ongtuna, aro i el iolonga avele, aveto ile mimiong aro i penthal avele, na i ranga ve ini toko

ako i lopot nge ile vel aka won sesenga i ongtun i ma i vusa.

Pol i pavengveng or na i ri ve thomu ini a God ile lotuonga a vel riringa.

¹⁶ Lomumu mire lale aka ve, thomu ini a God ile lotuonga a vel na God Ioni Riringa i voth a lomumu.

¹⁷ Na aro ve toko e i pakerenga lomu lemioong nge a Krais, God aro i pakerenga mun toko aken, eneke God i ateal ile lotuonga a vel mo ini ile, na thomu re aken ini ile lotuonga a vel.

Pol i pavengveng or na i ri ve o mothong tova o papomnga tokokoere.

¹⁸ Omu e i mothong tova ile apaltet isivenga. Aro ve omu e ilemi ve ile mire i aolonga nge thomu, i sivenga aka aro i velpol tel ranga ve ini toko aka ile mire i oror, aken aro God i sungu mire sivenga ol a i nge.

¹⁹ Eneke ur aka toko ulue angare olemi ve ini mire sivenga, aken ini mire orornga a God itheki. Ranga ve aka God ile erere i ri nge ve,

“God i patelek toko powe ninengare nge osivenga ole mire.” *Jop 5:13*

²⁰ Na God ile erere i ri mun ve,
“Toko Pomnga ilemi mire nge
toko powe ninengare ole mire
ako ini ur polpolnga a itheki.”

Buk Song 94:11

²¹ Maken aro thomu o mothong tova o papomnga tokokoere. Eneke God i sungu ile sungong alavusnga a thomu nge,

²² aka ranga ve ini a Pol na Apolos na Pita na ur ulue anga, na mimiong na rinnong, na ur areke aro i velpol a thomu nge ponange na panen, mako ur alavusnga areken ini lomu.

²³ Aveto thomu, thomu ini a Krais ile, na Krais ini a God ile.

4

Pol i pavengveng or na i ri ve, tho ini a Krais ile pakeke nunganga.

¹ I sivenga aro lomumu ve them ini a Krais ile umongare, aka Krais i sungu a God ile riong inkinenga thealnga a them nge.

² Na toko ako ve, ile omaing ini ur elonga thealnga, ine ur aro i mukal a ile mimiong, ako aro i panes senu ia pomnga ile riong.

³ Na i vava nge tho, tho ini umonga sivenga eve avele? Lemik i pompom nge lomu thopolong nge tho, kene avele, na nge tokokoe mun pelie ole thopolong nge tho mun, kene avele. Na sivengek mun tho pavurvur aro tho avrum lek omaing ile sivengaing, kene avele.

⁴ Lemik i teltun tho nge ur e ako tho oma i, kene avele, aveto i pavurvur aro tho ri ve lek omaing i vengvengtet inga, kene avele. Ini inga a Toko Pomnga aka aro i avrum lek omaing.

⁵ Maken thomu o mothong tova o avrum toko relngare ole vothung, eneke nang e aka aro te mit nge riong, kene i velpol rongan, naro thomu o men tetal nang aka aro Toko Pomnga i lo werer nge me. Na nge nang aken aro i el ur aka i ngo a mideng naro i parong pat i a pen lalanga, naro lemire mire ol nge toko omole omole ole omaing tepun, kene i vava. Naro God i risea or omole omole i pavurvur nge ole omaing aken.

Pol i pavengveng Korin angare ve o mothong tova o paesa osivenga roro.

⁶ Titeikre, riong aka tho ri nge lale, aken tho ri nge tho na Apolos, na tho ri riong aken mo aro i opoa thomu, na aro ve thomu o the nge lemem vothung aken, aro lomumu mire nge riong aken mirenga aka i ri ve, "Mothong tova oma polpol ur pelie aka i voth a God ile erere nge avele." Aken thomu o mothong mun tova o papomnga a God ile umonga pelie na o paposnga pelie.

⁷ Na omu kathnga aka o oma venen aken, tho ria ong ve, ong ini ao aka ong ri ve ong mukal nge titeumre. Na ur sivenga alavusnga aka thomu o el i lale, i es aken a God nge me. Na lomu mukalingare mun or ini a God ile sungong a thomu nge, na i vava ake thomu o paroro or nge them, e?

⁸ Ken, ava thomu o vual nge a God ile riongre lale, e? Na ava thomu o pavurvur nge Oni Riringa ile omaing elonga ol lale, e? Na ava God i panepes thomu lale, e?

Make numu plong ol nge lemem opoalingu. Lemik i nunganga ol aka ve, thomu o velpol ini nepes ol lale mo aro them voth ini nepes tomo nge thomu.

⁹ Eneke nang pelie lemik ve God i rong teleklek them aka ini ile pakekere a rumongaling lale, na tokokoere o oma ol them ranga ve ini tokokoe areko o teltun oa, eneke tokokoere na enselre o pait inga otheki nge lemem omaing areken.

¹⁰ Na nge a Krais ile omaing panongpolng, tokokoere olemi ve, them ranga ve ini toko aka ile mire i oror, aveto thomu, o rivenga thomu ini toko powe ninengare, eneke thomu o teo a Krais nge. Na tokokoere olemi ve o pavurvur aro o papomnga lemem riong avele, aveto thomu, tokokoere o papomnga lomu riong. Na tokokoere o papomnga them avele, aveto thomu, tokokoere o papomnga thomu.

¹¹ Na nomenga ma me i pavurvur ponange mesipun them, na thei i pun them, na them teun teunong minranga, na o sivlak them, na them pamuu pamua,

¹² na sivengemem them les pen. Na aro ve tokokoere o oma riong kerenga nge them, aro them nong nge a God mo i oma senu nge or. Na aro ve o pakerenga them, aro them oma ur e avele nge or.

¹³ Na aro ve o pakerenga iomem, aro them olal inga nge riong sivenga. Na tokokoe areko o panes vothung ulue anga o oma them ranga ve ini ole re, na them velpol ol ranga ve ini toko vulutngare a otheki lale.

Pol i pavengveng Korin angare ve aro o panes ile vothung.

¹⁴ Na tho wat riong areken kene ini riong aka aro tho palemara thomu nge avele, aveto tho watu i mo aro tho patorial thomu ranga ve aka thomu ini tutukre aka ok sagu thomu.

¹⁵ Na aro ve Krais i pakepot toko or 10,000 mo o opoa thomu nge ipanesnga, ur e avele, aveto omu vovo inga omole ake ini tho, eneke lomumu nge

Panongpolong Sivenga aka tho panongpol tel thomu nge, make thomu o teo a Krais Jisas nge.

¹⁶ Make tho nong engeng thomu ve aro thomu o panes a Krais ranga ve ako tho panes i.

¹⁷ Maken tho pakepot a Timoti a thomu nge wot. Na i ranga ve ini tuk aka ok sagu i, aka i nongal riong, eneke i panes a Krais Jisas ranga ve ini tho. Naro i palemi rumal thomu nge lek vothung aka tho panes a Krais nge, i ranga ve ini vothung aka tho patorial nge a lotu a rumrem elonga.

¹⁸ Omu pelie o papomnga sivengomu, eneke lomumu ve aro tho lo werer a thomu nge avele.

¹⁹ Aveto aro tho lo werer viri viri a thomu nge, tova ve Toko Pomnga i oposal tho nge lek esong wot. Maken sivengek aro lemik mire nge areko o papomnga osivenga ole riong tomo mun nge ole engenging.

²⁰ Eneke tokokoere ole mi mire aka toko ini a God ile, nge ile riong aka i ripot i avele, aveto nge ile engenging na ile vothung aka i panes a Krais nge.

²¹ Na nge lek esong a thomu nge wot, lomumu vava? Lomumu ve aro tho es tomo nge paomelaling eve asaguong na vothung mosnga?

Toko lemioongare aro o pavengveng pel ole vothung kerenga aka i voth a or nge

5

(Vonge 5:1–6:20)

Pol i ri ve aro o pamit lelpot toko omole aka ile vothung kerenga a or nge.

¹ Tokokoere o ri pel nge vothung kerenga aka i voth a thomu nge. Na vothung kerenga aken i kerenga rintet, i pavurvur aka areko oni silal a God, aro o oma i avele, ranga ve aka toko omole i ngo tomo nge itema iewo aininga aka i mothong mun i.

² Aveto thomu rongan o papomnga sivengomu nge lomu menong aka somu wom inga toko aken, na i vava aka lomumu kerere nge avele, e? I sivenga aka aro thomu o wistetpot toko aka i oma vothung kerenga aken a thomu nge.

³ Na i nunganga aka tho voth tomo nge thomu avele, aveto lek lemi rumong i voth

tomo nge thomu. Na tho teltun toko aken ia lale, ranga ve aka tho voth tomo nge thomu.

⁴ Na tho sis ve aro thomu o velilo pel ranga ve ini ar Pomnga a Jisas ole. Na lek lemi rumong aro i voth tomo nge thomu. Na ar Pomnga a Jisas ile engenging aro i voth tomo mun nge thomu.

⁵ Naro thomu o sung toko aken a Satan imeni mo aro i paomelal ini peti, maken aro Toko Pomnga i el werer ioni nge nang aka aro i pamit tokokoere nge riong.

Pol i patongrum ler mimiong ranga ve ini bret, na yis i ranga ve ini vothung kerenga.

⁶ Lomu vothung aka thomu o papomnga sivengomu nge kene i sivenga avele. Na lomumu mire nge riong agelalnga ake, “Yis aka i posngaingati i pavurvur aka aro i pawimpot bret alavusnga.” Na i ranga ve ini thomu, toko omole inga ile vothung kerenga aken aro i pakerenga toko elonga ole menong.

⁷ Na toth nge Punseleainga a Aning, Judare o eltetpot tel yis aka ini bret pawimpotnga a ole velre, na aken ini ole vothung vet aken. Na ranga ve ini mun i toko kerenga aken, aro thomu o eltetpot i a thomu nge mo aro lomu mimiong i ponganga ol ranga ve aka God i sis ve aro te mimi ol nge. Na te pavurvur aro te mimi ol venen aken, eneke Krais i rin leltun ler vothung kerenga lale ranga ve ini sipsip aka o so rin i nge Punseleainga a Aning.

⁸ Maken aro te an Punseleainga a Aning aken, naro te an tomo i nge vothung kerenga avele. Ranga ve aka nomenga te pakerenga tokokoere ole menong na te oma vothung kerenga. Aveto aro te eltetpot vothung ulue anga aken a ler mimiong ranga ve aka Judare o eltetpot bret pawimpotnga neginga a ole velre. Naro lemir i riri naro te panes vothung nunganga, maken aro ler mimiong i ranga ve ini bret aka pawimpotnga i voth nge avele, maken aro te an Punseleainga a Aning aken.

⁹ Nge lek malueng teltelnga aka tho wat i a thomu nge, kene tho ria thomu ve, o

mothong tova o paneo tomo nge toko na seng aomngare.

¹⁰ Na nge lek riong aken tho ri nge areko o panes vothung ulue anga, kene avele, or ini areko o aom toko na seng, na o sung ses, na o kem, na o lotual avalare. Na thomu o pavurvur aro o geltet or avele.

¹¹ Aveto lek riong aken i mirenga ve, o mothong tova o voth tomo nge toko aka isivenga i nea i ve ini toko lemioonga, aveto rongan i aom sengre, na i sung ses, eve i lotual avalare, na i pakerenga tokokoere oion, eve i thin thei engenga, na i kem. Na toko aka i venen aken, thomu o mothong tova o an tomo nge i.

¹²⁻¹³ Na ini lek omaing avele aka aro tho avrum areko or ini a Satan ile nge ole vothung, aken ini a God ile omaing. Aveto ini lomu omaing aka aro thomu o avrum areko o voth tomo nge thomu nge lomu lotu, kene ole omaing. Naro thomu o oma ranga ve aka God ile erere i ri nge aka i ri ve,

“O pamitlelpot toko aka i oma vothung kerenga
mo i voth tomo ol nge thomu avele.”

Lo 17:7

6

Toko lemioongare o mothong tova o pamit pel osivenga nge riong.

¹ Aro ve omu e i teltun ithanga aka ini toko lemioonga mun ia, i vengveng avele aka aro i pamit i nge riong a tokokoe areko or ini toko lemioongare avele otheki. Aveto i vengveng aka aro God ile tokokoere aro o nongpol ile riong aken.

² Lomumu mire lale aka panen God ile tokokoere aro o nongpol tokokoe areko o panes vothung ulue anga ole riong. Na aro ve thomu o nongpol tokokoe areko o panes vothung ulue anga ole riong, na i vova aka thomu o pavurvur nge titeumuere ole riong posposenga e pavengvenga avele, e?

³ Na lomumu mire lale aka panen aro te nongpol mun a Satan ile ensel kerengare ole riong, maken aro i venen aken na thomu o pavurvur mun aro o pavengveng riong posposenga areke i velpol a ulue.

⁴ Maken aro ve riong posposenga areken i velpol, i vova aka thomu o es nge areko

or ini toko lemioongare ole ngarang, mo o nongpol lomu riong, e?

⁵ Na tho ri venen aken mo aro tho pale-mara thomu. Na i vava, omu e avele ile mire i pavurvur aka aro i nongpol thomu toko lemioongare lomu riong, e? Omu e avele?

⁶ Na i vova aka toko lemioonga e i pamit ithanga aka ini toko lemioonga mun nge riong aka a tokokoe areko or ini toko lemioongare avele otheki, e?

⁷ Lomu vothung aka thomu o pamit pel sivengomu nge riong, i pathengal aka ve, thomu o leklek lale. I sivenga aka aro thomu o el inga kerengaing aka o oma i a thomu nge. Na i sivenga mun aka aro thomu o ri avele nge areko o kem lomu ur elonga pelie.

⁸ Aveto thomu o pamen kerere pel sivengomu, ma thomu o kem mun pel lomu ur elonga, na thomu o oma venen aken nge titeumuere aka or ini toko lemioongare.

⁹ Na lomumu mire lale aka ve, tokokoe areko o kis vothung kerenga omanga aro o eso a God ile menong e nepes lemi avele. Na thomu o mothong tova o olotitet sivengomu, areko o aom toko na seng, na o lotual avalare, eve o pakerenga peangeong, na toko i ngo tomo nge toko,

¹⁰ eve o kem, na o sung ses, eve o thin thei engenga, na o pakerenga tokokoere oion, eve o es patat ol inga ma o kem, tokokoe areken aro o eso a God ile menong e nepes lemi avele.

¹¹ Na nomenga omu pelie kene o oma venen aken, aveto ponange thomu o riri lale ma thomu ol ini a God ile, na thomu ini toko vengvenga a itheki, eneke lomumuo nge ar Pomnga a Jisas Krais na nge a God Ioni Riringa.

Nir peti i ranga ve ini Oni Riringa ile vel.

¹² Toko pelie aka o ri ve, “Krais i pavthopot tho lale, make tho pavurvur nge ur alavusnga omanga.” Na riong aken i nunganga, aveto ur alavusnga i sivenga aka aro thomu o oma i, kene avele. Na tho vthopot lale, aveto nik plong ve aro ur e i oma tho mo tho velpol ini ile um polpolonga.

¹³ Na toko mun pelie ako o ri ve, “Aning mei ini opor, na opor ini aning mei.” Na riong aken i nunganga, aveto God aro i pavus or alaini. Na God i oma opor nge aning, aveto i oma nir peti ve ini toko na seng aomngare avele, i oma nir peti ve aro te oma Toko Pomnga ile omaing. Na Toko Pomnga ini nir peti thealnga.

¹⁴ Na God i palos werera a Toko Pomnga nge rinong, naro i palos werera mun it nge ile engenging.

¹⁵ Na lomumu mire lale ako ve, numu peti elonga i velpol ranga ve ini a Krais ini peti alarolnga. Na i vava, i pavurvur aro Krais ini peti aro i teo mun a seng sovengalo anga nge? I pavurvur avele!

¹⁶ Na lomumu mire lale ako, aro ve toko i ngo tomo nge seng sovengalo anga, or alaini oni peti i velpol omole ol inga. Ranga ve aka God ile erere i ri nge ve, “Or alaini o velpol omole ol inga.” *Stat 2:24*

¹⁷ Aveto aro ve toko i teo a Toko Pomnga nge, ioni i velpol omole ol inga tomo nge a Toko Pomnga ioni.

¹⁸ Aro thomu o lel kimomu nge vothung aka nge toko na seng aomngga, eneke vothung kerenga e avele i pakerenga toko ini peti, ini inga vothung aka nge toko na seng aomngga aka i pakerenga toko ini peti.

¹⁹ Na lomumu mire lale aka ve, God i sungu Ioni Riringa a thomu nge mo i voth a lomumu, mako numu peti ini Oni Riringa ile vel ol, na numu peti ini lomu avele.

²⁰ Eneke olongomu i aolonga aka God i ol thomu nge. Maken aro thomu o papomnga a God nge lomu omaing elonga aka thomu o oma i nge numu peti.

Pol i olal Korin angare ole ninong nge peangeong a vothung

7

(Vonge 7:1-40)

Pol i ritet nge peangeong a vothung.

¹ Tho ri ve aro tho olal lomu ninong aka i voth a malueng nge aka thomu o wat i a tho nge me. Na thomu o nin ve, “I vava

nge toko aka i peange avele?” Na tho ri ve, aro ve toko i peange avele, aken i sivenga.

² Aveto vothung aka nge toko na seng aomngga i velpol a thomu nge lale, maken i sivenga aka aro toko omole omole aro o peange mo oewo i voth. Na sengre mun omole omole aro o peange mo oewo aro i voth mun.

³ Na nge ole ngo tomo peling, aro ve i patea nge toko, iewo sengenga i mothong tova i pamumutal i, na aro ve i patea nge sang, iewo tomonnga i mothong tova i pamumutal mun i.

⁴ Eneke iewo sengenga ini peti ini ienga ile avele, ini iewo tomonnga ile mun, ranga ve ini mun i, iewo tomonnga ini peti ini ienga ile avele, ini iewo sengenga ile mun.

⁵ Na o mothong tova o pamumutal pel nge numu peti, aveto aro ve lomumu omole nge numu peti mit roalnga nge nang pelie, mo aro thomu o engeng nge nongong, aken i sivenga inga, aveto aro ve lomu nongong i vus, aro thomu o ngo tomo werer mun nge pel. Aro vene mo Satan aro i tongporum thomu, eneke thomu o pavurvur nge numu peti mit roalnga nge nang pulua, kene avele.

⁶ Na riong aken tho sungu i a thomu nge, ini a God ile patorong avele, aveto tho ri ve tho opaal inga thomu nge lomu menong.

⁷ Na lemik aka ve, tokokoere aro o peange avele ranga ve ini tho. Aveto toko omole omole o el sungong a God nge aka aro o panes i nge, omole i el rel na omole i el rel.

⁸ Na thomu o nin tho nge basbasuere, na tho ri ve i sivenga aka aro seng na toko basbasuere aro o peange werer avele ranga ve ini tho.

⁹ Aveto aro ve o engeng nge ngo tomo peling, i sivenga aka aro o peange werer. Aro vene mo matheong i velpoltun or.

¹⁰ Na thomu o nin mun tho nge iewo mothongga, naro tho sung patorong ake a peangere nge, aveto ini lek patorong avele, ake ini a Toko Pomnga ile ma i ri vene: Na sengenga i mothong tova i mothongpot iewo.

¹¹ Aveto aro ve i oma venen aken, aro i men polpol ol, eve aro i lo werer mo i men

senu werer tomo nge iewo. Na tomonnga i mothong tova i mothongpot mun iewo.

¹² Naro tho ria thomu areko o peange tomo nge areko or ini toko lemioongare avele. Na ake ini Toko Pomnga ile patorong avele, ake ini lek patorong. Na aro ve wong ini toko lemioonga na ewom sengenga ini seng lemioonga avele, na i sis inga ako ve, aro i voth tomo inga nge wong, aken kene ong mothong tova ong mothongpot i.

¹³ Na i vene mun ako aro ve ong ini seng lemioonga na ewom tomonnga ini toko lemioonga avele, na i sis inga ako ve, aro i voth tomo inga nge wong, aken kene ong mothong tova ong mothongpot i.

¹⁴ Eneke iewo tomonnga aka ini toko lemioonga avele, i teo a iewo sengenga nge aka ini seng lemioonga, mako God i oma vothung a i nge ranga ve ini ile. Na i vene mun ako nge iewo sengenga aka ini seng lemioonga avele, i teo a iewo tomonnga nge aka ini toko lemioonga, mako God i oma vothung a i nge ranga ve ini ile. Aro vene mo otutunre o ranga ve ini areko o lotual a God avele otutunre, aveto i nunganga aka God i elo mun otutunre.

¹⁵ Aveto areko or ini lemioongare avele, aro ve olemi ve o mothongpot oewo areken or ini lemioongare, aken ur e avele i mitrup or. Na aro ve i velpol venen aken, toko eve seng aka ini lemioonga i vthopot ol nge ile kinong nge peangeong aken. Na aro ve i es eve i voth ur e avele, eneke God i ateal thomu mo aro thomu o voth lemi moring tomo nge tokokoere.

¹⁶ Na wong seng lemioonga lomum mire avele aro ve ong opaal ewom tomonnga mo i eksing ile mimiong eve avele, na i vene mun nge wong toko lemioonga lomum mire mun avele aro ve ong opaal ewom sengenga mo i eksing ile mimiong eve avele.

Aro te voth nge menong aka God i ateal i ve aro te voth nge.

¹⁷ Thomu omole omole aro o voth inga nge menong aka Toko Pomnga i sungu i a thomu nge lale nge nang aka God i lengo thomu a i nge. Ake ini lek patorong aka tho pator lotu a rumrem elonga nge.

¹⁸ Na aro ve toko e aka o is ile lale na God i lengo i, i mothong tova i pavengveng werer ini peti aka o is i. Na aro ve toko e aka o is ile avele na God i lengo i, i mothong tova aro o is ol ile.

¹⁹ Eneke vothung aka ru o is ole tomo mun nge vothung aka o is ole avele, or alaini ini ur polpolnga, aveto vothung aka nge a God ile patorong panesnga ini ur aka i aolonga.

²⁰ Na menong kathnga aka thomu o voth nge lale nge nang aka God i lengo thomu, aro thomu o voth inga nge.

²¹ Na nge nang aka God i lengo wong, aro ve ong ini toko um polpolonga, ur e avele, aro ong voth inga nge, aveto aro ve sovengalo i velpol aka aro ong vthopot nge lom menong aken, i sivenga aka aro ong panes i.

²² Eneke toko um polpolonga aka God i lenga i mo ini Toko Pomnga ile, ini toko aka Toko Pomnga i pavthopot i nge vothung kerenga omanga. Na i vene mun nge toko aka ini um polpolonga avele, na God i lenga i mo ini Toko Pomnga ile, aken ini a Krais ile toko um polpolonga ol.

²³ Na olongomu i aolonga aka God i ol thomu nge, na nge aken thomu o mothong tova o velpol ini tokokoere ole um polpolongare.

²⁴ Na titeikre, thomu omole omole, menong kathnga aka thomu o voth nge lale, nge nang aka God i lengo thomu, aro thomu o voth inga nge, aka a God ile thealing lemi.

Pol i olal ole ninong nge areko o peange rongan.

²⁵ Na thomu o nin tho nge areko o peange rongan, ave Toko Pomnga i sung ile patorong e avele nge tho nge areko o peange rongan, naro tho sung lek riong a thomu nge, eneke tho ini toko aka Toko Pomnga ile themosaling i oma tho, maken i pavurvur aka aro lomumuol nge lek riong.

²⁶ Na nge lek thopolong i sivenga aka aro thomu o voth inga nge menong aka thomu o men nge ponange, eneke nge matheong areke ru i velpol.

²⁷ Aro ve ong ela seng e lale, ong mothong tova ong kath sovengalo aka aro ong mothongpot i nge. Na aro ve ong peange rongan, mothong tova ong kath sovengalo aka aro ong peange nge.

²⁸ Ave aro ve ong ela ewom e, aken ong oma vothung kerenga avele. Na aro ve ovote i ela iewo e, aken i oma vothung kerenga avele. Na peangeong ini ur aka ranga ve i rong esa mun matheongre, make tho oma riong ake, eneke nik plong ve aro matheong areke i velpol a thomu nge.

²⁹ Titeikre, tho ria thomu, ler nang pulua ol avele aka aro te oma a God ile omaing nge. Na i patea ponange na i mul panen aro lemire rum senu nge ler mimiong, na tokokoe areko o peange, aro o panes a God ranga ve aka o peange avele.

³⁰ Na areko o tang viringa, aro o oma ranga ve aka olemi kerere avele. Na areko o ngenge sise, aro o oma ranga ve aka o ngenge sise avele. Na areko o ol ur elonga, aro oma ranga ve aka ur areken ini ole avele.

³¹ Na areko o olol pel ole lulu aka ini ur ulue angare, aro o oma ranga ve aka o mostun ol ur aken avele ol, eneke ulue ake te thopol i ponange aro i voth palolo ol avele.

³² Tho sis ve aro thomu o voth ranga ve aka ur ulue anga i palemi pompom thomu avele. Na toko aka iewo avele, ilemi i ngo pis inga nge a Toko Pomnga ile omaing, eneke i sis ve aro i oma omaing aka i palemi senu a Toko Pomnga.

³³ Aveto toko aka i peange, ilemi i voth inga nge ur ulue anga, eneke i sis ve aro i oma omaing aka i palemi senu iewo sengenga.

³⁴ Ma ur areken i omreu ilemi ma i or ainiu ol. Na seng areko o peange nomenga, aveto o voth polpol, tomo nge ovotvotere, o pavurvur aro o sung oni peti na olemi alavusnga a Toko Pomnga nge. Aveto seng aka i peange, ilemi i voth inga nge ur ulue anga, eneke i sis ve aro i oma omaing aka i palemi senu iewo tomonnga.

³⁵ Aveto tho ri venen aken, eneke tho sis ve aro tho opaal thomu. Na ini aken aro tho sung matheong a thomu nge avele.

Na tho sis ve aro thomu o panes vothung vengvenga, na o sung lomu mimiong alavusnga a Toko Pomnga nge, naro lomumu ol or ainiu ol avele.

³⁶ Toko aka o sungtun ovote omole mo ini iewo, aveto o palolotun sungaling, na aro ve toko aken ilemi ve vothung aken i sivenga avele, na aro ve i engeng nge ngo tomo peling, na i sis ve aro o sungal i viri viri, aken aro i oma inga, aken ini vothung kerenga avele. Aro o sungal i mo o voth tomo e pel.

³⁷ Aveto toko aka ilemi i ngo lale ve aro i peange avele, na toko e avele i ri ololo i, na i engeng nge ngo tomo peling nge seng avele, na aro ve i mothong ovote aka o sungtun i a i nge, aken ini vothung sivenga.

³⁸ Maken toko aka i ela ovote aka o sungtun i a i nge, vothung aka i oma i, i sivenga, aveto toko aka i mothong ovote aka o sungtun i a i nge, vothung aka i oma i, i sivenga rintet.

³⁹ Seng lemioonga aro ve iewo tomonnga rongan i mimi, i pavurvur aro i peange werer mun avele. Aveto aro ve iewo tomonnga i rin, i pavurvur aka aro i peange werer mun nge toko aka i sis ve aro i ewoa i, aveto aro ini toko aka ilemioong mun nge a Toko Pomnga.

⁴⁰ Aveto lemik ve aro ilemi sivenga rintet tova ve i peange werer avele. Na Oni Riringa i voth mun a tho nge. Na lemik ve riong ake tho ri, Oni Riringa i pavelpol i a tho nge.

Aro lemire rum nge toko lemioonga aka ile lemioong i motu rongan

8

(Vonge 8:1-11:1)

*Pol i olal Korin angare ole ninong nge
aning aka o sung tel i a avalare nge.*

¹ Naro tho olal lomu ninong nge toko lemioongare ole vothung aka o an mekerem aka o sung tel i a avalare nge. Na i nunganga aka toko lemioongare ole mire i mukal nge toko aka ini toko lemioonga avele ile mire, aveto toko aka ilemi ve ile mire i aolonga, aken i paroro isivenga

nge magoning, aveto toko ako ia sagu toko lemioongare, aken kene i paengeng ole lemioong.

² Na aro ve toko e i ri ve i el mire alavusnga nge ur e omanga, aken kene i pathengal it ako ve, toko aken ile mire rongan i oror.

³ Aveto toko aka ia sagu a God, ilemi mire senu nge ur aka God i sis ve aro i oma i.

⁴ Naro tho ri nge mekerem annga aka o sung tel i a avalare nge. Na lemire mire aka ve, avala ini ur nunganga avele ake ru a ulue. Aveto God inga omole i voth, na God ol e avele ol.

⁵ Na toko pelie o rivenga god pelie o voth, na o ri ve pelie o voth a ulue na pelie o voth a malang po. Na i nunganga aka tamatare o voth aka tokokoere o apet or ini godre na oa pompomere,

⁶ aveto it kene, lemire mire aka God omole inga i voth aka ini Titemer aka i pavelpol ur alavusnga na aka ini a God aka te panes i na te oma ile omaing. Na ar Pomnga omole inga aka i voth, aka ini a Jisas Krais aka God i pavelpol ur alavusnga nge imeni, na nge ienga inga ile engengeng kene te oma a God ile omaing aken.

⁷ Aveto toko lemioonga pelie olemi mire nge ur areke rongan. Na vothung aka nomenga o lotual avalare nge, rongan i voth a oleme, i pavurvur ponange. Na aro ve o an mekerem aka o sung tel i a avalare nge, aro oleme pelekpol, eneke ole lemioong i motu rongan.

⁸ Aveto aning i oma ur e avele nge ler men tomoing nge a God. Na aro ve te pil mun nge aning pelie, aken aro i pakerenga ler menong aken avele. Na aro ve te an mun aning aken, aro i opoal mun ler menong aken avele.

⁹ Krais i pavthopot thomu lale mako o pavurvur nge mekerem elonga annga, aveto thomu o nakalal senu thomu nge omaing aken, aro vene mo o pakerenga tokokoe areko ole lemioong i motu rongan kene ole lemioong.

¹⁰ Eneke aro ve omu e aka lemi rumong aken i voth a i nge, i es a avalare ole lotuonga a vel ma i an nge, na aro ve toko aka ile lemioong i motu rongan i thopol

ong, aro vava? Aro lom omaing aken aro i oma toko aken ilemi mo aro i an aning aka o sungu i a avalare nge lale, na ini omaing aka rongan ilemi ve i kerenga aka aro i oma i.

¹¹ Maken lomu lemi rumong aken i pakerenga teum aka Krais i rin leltun i, aka ile lemioong i motu rongan.

¹² Na nge lomu vothung aken thomu o oma vothung kerenga nge a Krais tomo mun nge titeumuere aka ole lemioong i motu rongan, eneke o pavurpol olemi nge omaing aka rongan olemi ve i kerenga nge omanga.

¹³ Maken na aro ve tho paleklek teik e, nge mekerem aka tho an i, aro tho mothong tel mekerem aken annga, mo aken aro tho pamatu teik aken avele.

9

Pol ini pakeke nunganga aka ranga ve ini a God ile pakeke alavusnga.

¹ Tho ini a Krais ile pakeke nunganga na i pavthopot tho lale, na thekik i thopol vengveng ar Pomnga a Jisas Krais na tho oma Toko Pomnga ile omaing a thomu nge, mako thomu o velpol ini toko lemioongare.

² Na lomumu mire lale aka tho ini a Krais ile pakeke nunganga, eneke tho panongpol thomu, make lomumuo ol nge a Krais. Na lomu lemioong aken i pathengal aka ve, tho ini a Krais ile pakeke nunganga. Aveto toko pelie oleme ve, tho ini a Krais ile pakeke avele.

³ Na lek lelong nge areko o teltun ok kene i vene:

⁴ Aro ve tho panongpol thomu nge a Toko Pomnga ile riong, tho pavurvur mun aka aro tho el olongek aka ranga ve tho an na tho thin tomo nge thomu, ranga ve aka God ile pakeke alavusnga o oma i.

⁵ Na tho pavurvur mun aka aro tho ela seng lemioonga e mo ini ewok naro i es tomo nge tho ranga ve aka God ile pakeke alavusnga tomo nge a Jisas ititeinre na Pita o oma i.

⁶ Na them e a Barnabas them pavurvur mun aka aro them mothong omaing aka them el olongemem nge mo aro areko o nongpol lememe panongpolong aro o theal

them, ranga ve aka pakeke alavusnga o oma i.

⁷ Toko e avele i oma punonga a omaing na i el iolonga nge avele. Na aro ve toko i les vain a ometa, aro i el iolonga nge vain monnga. Na aro ve toko i theal sipsipre, aro i el iolonga nge oa susu ei.

⁸ Na ur areken te thopol i ake ru a ulue, aveto Moses ile patorong i ri mun nge,

⁹ na i ri vene:
“Thomu o mothong tova o kin kup bul-
maka iwo,
tova ve i te guaku wit monnga
ma petiti i palitlot
mo aro i an pelie.” *Lo 25:4*

Na ava God i ri venen aken mo aro i opaal bulmakaure? Avele.

¹⁰ I ri venen aken mo aro i patorial it. Maken toko aka i totet ulue aka aro i o aning nge tomo nge toko aka i mon giguak wit monnga, or paini o oma ole omaing aken, eneke olemi mire aka aro o el oolonga nge aning aken pelie.

¹¹ Na them panongpol thomu nge a God ile riong ranga ve ini ometa omanga aka i o aning. Na aro ve them el opoaling nge lemem menong ake ru a ulue a thomu nge, ranga ve ini ometa omanga i el aning nge ia ometa, aro them sung matheong aolonga a thomu nge? Avele.

¹² Na God ile pakeke areken o el oolonga nge thomu, maken them pavurvur mun aka aro them el olongemem nge thomu, eneke them mukal nge or, eneke them panongpol tel thomu.

Aveto them engeng nge olongemem el-nga a thomu nge kene avele, aro vene mo them sung matheong a thomu nge ranga ve aka tokokoere o oma i, aveto them el matheong nge ur areko them oror nge, mo aro them sung matheong e avele nge areko o nongpol lemem panongpolong nge a Krais.

¹³ Na lomumu mire lale aka ve, areko o oma Lotu Tepun a Vel a omaing, o el oa aning nge tokokoere ole sungong aka o sungu i a God nge a Lotu Tepun a Vel aken. Na areko o oma pris a omaing aka o sung tokokoere ole sungong a God nge aka a sungong a lekleka nge, o el mun oa aning nge sungong areken.

¹⁴ Na i ranga ve mun nge areko o panongpol nge Panongpolong Sivenga, Toko Pomnga i sung patorong aka aro o el opoaling nge areko o nongpol ole panongpolong aken.

¹⁵ Tho pavurvur mun aka aro tho oma venen aken, aveto tho, tho oma venen aken avele. Na tho wat riong areke mo aro thomu o patea i a tho nge, kene avele. Na i sivenga aka aro tho rin tel, lamo ur aken i velpol ol. Na toko e avele i pavurvur aro i eltetpot lek omaing aken, aka tho magon nge.

¹⁶ Na aro ve tho panongpol Panongpolong Sivenga, i pavurvur aro tho magon nge avele, eneke Toko Pomnga i pator tho ve aro tho panongpol, na tho pavurvur inga nge ur aka i pator tho nge. Na patong tho ti, tova tho panongpol Panongpolong Sivenga avele.

¹⁷ Na aro ve tho panes sivengek lemik nge panongpolong, aro tho el olongek, aveto aro ve tho panes a Toko Pomnga ilemi nge panongpolong, aro tho oma inga omaing aka i sungu i a tho nge ve aro tho oma i.

¹⁸ Aken kene olongek rongan i voth ma i vene: Aro ve tho panongpol tokokoere nge Panongpolong Sivenga, lemik i ngo senu aka aro tho sung matheong e avele a or nge, nge olongek. Na voth vosaling aken ini olongek. Na ake ini tepun aka tho mothong ur aka tho pavurvur nge elnga nge Panongpolong Sivenga panongpolonga.

Pol ini tokokoere ole toko um polpolonga nge Panongpolong Sivenga panongpolonga

¹⁹ Tho vthopot lale na tho ini toko e avele ile toko um polpolonga, aveto tho oma ranga ve aka tho ini toko alavusngare ole toko um polpolonga, mo aro tho elo toko pulua a Krais nge.

²⁰ Na aro ve tho voth tomo nge Judare, aro tho oma ranga ve aka tho ini toko Juda, mo aro tho elo Judare a Krais nge. Na tho vthopot lale nge a Moses ile patorong panesnga, aveto aro ve tho voth tomo nge areko o panes a Moses ile patorong, aro

tho oma ranga ve ako tho panes mun i, mo aro tho elo or a Krais nge.

²¹ Na aro ve tho voth tomo nge areko or ini Judare avele, aro tho oma ranga ve ako tho ini toko Juda avele, mo aro tho elo or a Krais nge. Aveto tho avsa a God ile patorong avele, eneke tho panes a Krais ile patorong.

²² Na aro ve tho voth tomo nge areko ole lemioong i motu rongan, aro tho oma omaing e avele ako aro i pamatu ole lemioong, mo aro tho opoal or nge vothung ako aro o panes a Krais nge. Na tho oma ranga ve ako tho panes toko alavusnga ole vothung, mo aro tho tongporum sovengalo elonga ako aro tho elo toko pelie a Krais nge.

²³ Na tho oma venen aken, eneke tho sis ve aro toko alavusnga aro o nongpol Panongpolong Sivenga. Na tho oma venen aken, mo aro tho ela mun ur sivesivenga ako God i kin ile riong ve aro i sungu i nge areko olemio nge panongpolong aken.

Aro te engeng nge a Krais ipanesnga ranga ve ini toko aka i tho nge sertetong.

²⁴ Lomumu mire lale aka ve, nge sertetong toko alavusnga o tho nge, aveto toko omole inga aka aro i el iolonga, eneke i mukal nge thoong. Na ranga ve mun nge thomu, aro o engeng nge a Krais ipanesnga i pavurvur ako aro thomu o el olongomu aka God i monsi nge areko o mit engeng.

²⁵ Na toko alavusnga aka aro o tho nge sertetong, o oma inga ur areko aro i opoal or nge ole thoong aken. Na o oma venen aken, mo aro o el vevea aka aro i tho palolo avele. Aveto it, te oma inga ur areko aro i opoal it nge a Krais ipanesnga, mo aro te el a God ia vevea aka aro i kerenga avele.

²⁶ Maken tho panes a Krais ranga ve ini toko aka i tho vengveng nge ur aka i tho tuntun i, na tho oma ranga ve ini toko sisoinga aka i vair pelek pelek imeni, kene avele.

²⁷ Tho mit roal lemi rumong kerenga aka i mita a lelik me, mo aro nik peti i panes inga lemioong sivenga aka i tho a lelik. Na aro ve tho oma venen aken

avele, aro tokokoe areko tho panongpol or, aro o el oolong, naro tho avele ol.

10

Te mothong tova te panes Israelre ole vothung.

¹ Titeikre, lelik aka ve, aro lomumu mire senu nge titevirre ole vothung aka o oma i nomenga aka a pen polpolng. Or alavusnga o panes songen aka God i pavelpol i mo i mukal na i paseral ole, i pavurvur aka la o es a Rua Selelenga wo epee a ulue klangklanga a thev lemi, eneke God i omreu thei aken.

² Na ole esong a songen thewo tomo nge ole esuong a thev lemi, aka ini ole paniuong aka i paateal or ve, or ini a Moses ile tokokoere.

³ Or alavusnga o an nge aning aka i esu a God nge me.

⁴ Na or alavusnga o thin mun nge thei aka God i pavelpol i ma i lelpot a um nge me. Na um aken i paateal a Krais aka i es tomo nge or na i sung ur areko o oror nge.

⁵ Aveto oa pulua o oma vothung aka God ilemi i ngo senu nge avele, mako o rin rin a pen polpolng aken, ma oni peti i ngo pelekpol a pen elonga.

⁶ Ur areken i velpol mo aro i pathengal it aka ve, te mothong tova te theseal vothung kerenga omanga ranga ve aka o oma i.

⁷ Na thomu o mothong tova o lotual avalare, ranga ve aka pelie a or nge o oma i. Na lemir mire aka o lotual avalare, eneke God ile erere i ri vene:

“Tokokoere o men nge avala ia aning lamako o losa ma o sesal avala aken.”

Kisim Bek 32:6

⁸ Na te mothong tova te ngo tomo nge areko or ini ewor avele, ranga ve aka pelie a or nge o oma i. Na nge ole vothung aken, God i pun rin toko or 23,000 a or nge, nge nang omole inga.

⁹ Na te mothong mun tova te tongporum a Toko Pomnga nge vothung kerenga le vanga aka aro i paomelal it nge, ranga ve aka pelie a or nge o oma i, mako pilimo kerengare o pun rin or.

¹⁰ Na thomu o mothong tova o ri pom-pom nge lomu mukalingare ranga ve aka pelie a or nge o oma i, mako ensel aka i

pun rin toko, i es a or nge ma i pun rin or.*

¹¹ Ur areken i velpol a or nge nomenga, mo aro i pathengal it nge a God ile paomelaling nge areko o oma venen aken. Na o watu tenesing areke a God ile erere nge mo aro i pator it ve, te mothong tova te oma venen aken, eneke te voth ol nge nang areko i tohttuno ulue ile vusong.

¹² Maken aro ve toko e ilemi ve, i mit engeng lale, aro i nakalal senu ile lemioong, aro vene mo i matu nge vothung kerenga.

¹³ Na aro ve tongporumong i velpol a thomu nge, aro lomumu mire ako ve, tongporumong areken ini ponganga avele, i velpol tel mun a tokokoe pelie nge lale. Na God i panes ile riong ako i kin i nomenga naro isa wenalo tongporumong ako aro i velpol a thomu nge, ako i aolonga nge lomu engeng, kene avele. Na aro ve tongporumong i velpoltun thomu, God aro i sung sovengalo aka aro thomu o mit engeng nge tongporumong aken.

I pavurvur avele aka aro te an Toko Pomnga ia aning na avalare oa aning mun.

¹⁴ Maken titeik sivengare, aro thomu o voth mela nge vothung aka nge avalare olotualnga.

¹⁵ Na tho ria thomu ranga ve aka mire sivenga i voth a thomu nge, aro thomu o avrum vet lek riong ake, i nunganga eve avele?

¹⁶ Na aro ve te men nge a Toko Pomnga ia aning, aro te ela vain mei, na te ri sivengaing a i nge, lamo te thin nge aka i palemi rumal it nge a Jisas ia mla, lamako te el mun bret aka te rek rek i na te an i, aka i palemi rumal it nge a Jisas isiva. Na vain thinnga ome bret annga aken i pathengal aka ve, te teo a Krais nge aka i rin leltun it.

¹⁷ Na o thopol, bret omole inga i voth aka it toko pulua te an nge, make it alavusnga te velpol omole ol inga tomo nge a Krais.

¹⁸ Aro lomumu rum werer Israelre ole vothung aka o an nge sungong aka prisre o sung tel i a God nge, aken i pathengal aka ve, or alavusnga o teo a God nge.

¹⁹ Na i vava nge aning aka o sung tel i a avalare nge? Aning aken i eksing ma i rel ol? Avele. Na avala ini God nunganga?

²⁰ Avele. Aveto tokokoe areko o lotual avalare, o oma ole sungong aken a God nge avele, o oma i akennga a tamatare nge, na nik plong ve aro thomu o teo a tamatare nge.

²¹ Na i pavurvur aro thomu o thin nge a Toko Pomnga ia thei mei na tamatare oa mun, kene avele. Na i pavurvur aro thomu o an nge a Toko Pomnga ia aning na tamatare oa mun, kene avele.

²² Ava thomu o sis ve aro o palemi vel Toko Pomnga nge aka thomu o lotual inga ienga avele. Na lemire mire aka ve, ler engenging i pavurvur aro i mit roal a Toko Pomnga ile paomelaling, kene avele.

Ler vothung aro i paengeng tokokoere ole lemioong.

²³ Toko pelie aka o ri ve, “Krais i pavthopot tho lale, make tho pavurvur nge ur alavusnga omanga.” Ma riong aken i nunganga, aveto ur alavusnga omanga i opoal it avele. Na te pavurvur nge ur alavusnga omanga, aveto ur alavusnga omanga i opoal tokokoere ole lemioong avele.

²⁴ Na toko lemioongare o mothong tova o oma ur aka i opoal inga osivenga, aveto aro o oma ur aka aro i opoal tokokoere.

²⁵ Na thomu o pavurvur aka aro thomu o an mekerem alavusnga aka thomu o ol i a tokokoere nge, na o mothong tova lomumu pompom na o oma ninong ve, “O sung ur ake a avalare nge eve avele?”

²⁶ Eneke God ile erere i ri vene: “Ulue ake tomo nge ur alavusnga
ake ru i voth nge,
ini a Toko Pomnga ile.” *Buk Song 24:1*

²⁷ Aro ve toko aka ini toko lemioong avele, i nongpoo thomu mo o an tomo nge i, na aro ve o sis ve o es, aro o es inga naro o an inga ur aka i sunga i a thomu nge. Na o mothong tova lomumu pompom na o oma ninong ve, “O sung ur ake a avalare nge eve avele?”

²⁸⁻²⁹ Aveto aro ve toko e i ri ve, “Ur ake o sungu i a avalare nge lale.” Aken aro thomu o mothong tova o an i, eneke

* ^{10:10:} O thepol a Namba 16:41-50.

toko aken i sis ve aro i opoal thomu. Na lomumu mire lale ako ve, i sivenga ako aro o an i, aveto aro ve thomu o an i, aro o palemi pelekpol toko aken ilemi. Na lomu omaing aken, i opoal ol toko aken avele. Na toko pelie aro o ri ve, "I vava ako toko relnga ile lemi rumong aro i mit roal tho nge ur aka lemik ve i sivenga ako aro tho oma i, e?"

³⁰ Na aro ve tho ri sivengaing a God nge, nge ok aning, toko e avele i pavurvur aro i ri pompom nge lek omaing aken."

³¹ Tho olal toko aken ile riong tomo nge thomu ve, aro ve thomu o an na o thin eve o mothong ur areken, ur e avele, aveto lomu omaing alavusnga aka tokokoere o thopol i, aro o papomnga a God nge.

³² Na toko pulua aro o thopol lomu vothung, pelie ine Judare na pelie or ini Judare avele na pelie ini toko lemioongare aka ole lemioong i motu rongan, na thomu o mothong tova o oma vothung e aka aro i pakerenga olemi.

³³ Na tho oma vene aken, eneke lemik aka ve, vothung elonga aka aro tho oma i, aro i palemi senu inga toko alavusnga. Na lemik i voth nge ur aka aro i opoal tho avele, i voth inga nge ur aka aro i opoal or. Na tho oma venen aken mo aro tho opoal or mo aro God i el werer or.

11

¹ Aro thomu o panes lek vothung ranga ve aka tho panes a Krais ile vothung.

Pol i ri nge Oni Riringa ile sungongre na nge vothung sivenga nge lotuong

(Vonge 11:2-14:40)

Seng ipounga aovaltunnga ini paatealing aka i voth a iewo isa thewo.

² Tho paesa iomu, eneke lomumu rum lek vothung na ur alavusnga aka tho patorial thomu nge, na thomu o panes vothung aka tho sung esu i a thomu nge.

³ Aveto aro lomumu rum senu nge riong ake, seng i voth a iewo tomonnga isa thewo, na totomone alavusnga o voth a Krais isa thewo na Krais i voth a God isa thewo.

⁴ Na aro ve toko i nong, eve i ripot a God ile riong na i aovaltun ipounga, aken i palemara a Krais, eneke i aovaltun ipounga ranga ve aka i voth a toko e isa thewo.

⁵ Na aro ve seng i nong eve i ripot a God ile riong na i aovaltun ipounga avele, aken i palemara iewo tomonnga na i ranga ve ini seng aka o theku ipounga mo o palemara i.

⁶ Na aro ve seng i mothong ipounga aovaltunnga, aro i theku ipounga thoing, aveto lemire mire aka ve, seng ile mara tova i theku ipounga thoing, make i sivenga aka aro i aovaltun ipounga.

⁷ Na toko i mothong tova i aovaltun ipounga, eneke ini a God ia sei, na aro ve tokokoere o thopol i, aro o papomnga a God. Aveto seng aro i aovaltun ipounga, eneke God i oma i mo aro ve tokokoere o thopol i, aro o papomnga iewo tomonnga.

⁸ Na i venen aken, eneke God i elpot seng ipokin ma i oma totomone nge avele, aveto i elpot totomone ipokin ma i oma seng nge.

⁹ Na God i oma a Adam mo ini a Iv iopoalnga, kene avele, aveto i oma a Iv mo ini a Adam iopoalnga.

¹⁰ Maken i sivenga aka aro seng i aovaltun ipounga mo ini ile paatealinga aka i voth a iewo tomonnga isa thewo. Na aro ve God ile enselre o thopol i venen aken, aro olemi i ngo senu nge.

¹¹ Aveto nge ler mimiong nge a Toko Pomnga ipanesnga, toko na sangre o vur e pel na o opoal pel epee epeenga nge ole menong.

¹² Na tho ri venen aken, eneke seng aka God i pamenu tel i, i velpolpot a totomone ini peti, aveto i patea nge seng aken na i mul nge ponange, totomonere o velpol nge sangre. Aveto aka ini a God aka i pamenu ir.

¹³ Na thomu o avrum vet i a lomumu, i sivenga tova ve seng i aovaltun ipounga avele, na i nong a God nge a puluare otheki?

¹⁴ Na nge lomu thopolong nge ur aka God i pamenu i, i patorial thomu aka ve, i sivenga avele tova ve totomonere opounga thoi aro i aoliloe.

¹⁵ Aveto i sivenga ako aro sangre opouniga thoi aro i aoliloe mo ini oa malmaling, eneke God i sung opouniga thoi aoliloenga mo ini opouniga aovaltunnga.

¹⁶ Na aro ve toko e i sis ve aro them pun pel e riong nge lemem riong ake, aro tho olal i ve, them tomo nge a God ile lotuongare a rumremre, them panes re inga ako ini vothung omole inga ake.

*Korin angare o panes senu sovengalo
ako nge a Toko Pomnga ia aning avele.*

¹⁷ Nge lek patoraling areke aro tho ri nge lomu vothung ako lemik i ngo senu nge avele. Na nge lomu pathunong nge lotuong, thomu o oma vothung ako i opoal tokokoere nge a Krais ipanesnga avele. Lomu vothung i kerenga,

¹⁸ eneke a mukaling tel tho nongpol riong ako ve, nge lomu pathunong nge lotuong, thomu o omreu pel, na o pun pel e riong. Na lemik ako ve, riong aken tho nongpol i, pelie i nunganga,

¹⁹ eneke punpeling e riong pelie aro i velpol a thomu nge, mo aro thomu o ate senu nge omu kathnga ini a Krais ile toko nunganga.

²⁰ Naro tho ria thomu nge lomu vothung ve, nge lomu pathunong nge aning ako i palemi rumal thomu nge a Krais ile an tomoing nge ile wainlangaere, thomu o an i ranga ve aka Krais i voth tomo nge thomu avele,

²¹ eneke omu omole omole o songalal ma o an tel a mukaling, aken i oma pelie ma o an ol avele, na omu pelie o thin loptet vain, mako thekumu vaisis.

²² Ava lomu vel e avele aka aro o an nge na o thin nge, e? Na lomu vothung aken i pathengal aka ve, thomu o papomnga lomu pathunong nge lotuong avele, ma i palemara toko le ur avelengare aka o pathun tomo nge thomu. Naro tho ri vava nge lomu vothung aken, e? Aro tho paesa thomu nge? Avele!

*Pol i palemi rum or nge a Krais ile an
tomoing nge ile wainlangaere.*

²³ Naro tho paesa thomu nge lomu omaing aken avele, eneke patoraling aka

Toko Pomnga i sungu i a tho nge, i mun re ake tho sung esu i a thomu nge lale, na patoraling aken i vene: Nge pemliknga aka aro Judas i sungu a Jisas a ngarangre omeni, Toko Pomnga a Jisas i ela bret

²⁴ na i ri sivengaing nge, na i reku i na i ria ve, "Ake i ranga ve ini sivangek aka aro tho sungpot i mo i opoal thomu, na nge vothung ake aro lomumu rum tho nge."

²⁵ Na o an ma vus lama i ela thinonga aka vain i mon nge ma i oma riong ranga ve aka i oma tel i nge bret ma i ria ve, "Ake i ranga ve ini ok mla aka aro i pavelpol ol a God ile riong kinnga ponganga* tomo nge thomu. Na lomumu rum tho nge vothung ake tova thomu o thin vain aken."

²⁶ Naro thomu o papomnga aning aken, eneke nge nang eveleLnga tova ve thomu o an bret aken na o thin nge vain mei aken, i ranga ve aka thomu o panongpol werer mun nge a Toko Pomnga ile rinong aka i el werer it nge. Naro o oma venen aken i pavurvur nge ile lo wererong me.

*Aro te pavengveng tel ler menong tomo
nge a Toko Pomnga lamo te an ol ia aning.*

²⁷ Maken aro ve toko e i an bret aken na i thin nge vain mei aka lemire rum Toko Pomnga nge, na il oma omaing aka i papomnga a Toko Pomnga nge avele, aken i pakerenga a Toko Pomnga ini peti na ia mla, aken ini vothung kerenga, naro God i teltun ia nge.

²⁸ Na i sivenga aka aro toko alavusnga aro o avrum tel ole mimiong lamo o an bret aken na o thin ol nge vain mei aken,

²⁹ eneke aro ve toko e i an bret aken na i thin nge vain mei aken, aveto ilemi rum senu Toko Pomnga ini peti tomo nge ile omaing avele, aken God ile paomelaling aro i es a i nge.

³⁰ Na ponange omu pelie numu peti lol na pelie oni multhang na pelie o rin lale, eneke thomu o oma venen aken.

³¹ Aveto aro ve te avrum senu tel ler mimiong na te pavengveng i, lamo te an ol, maken God aro i paomelal it venen aken avele.

³² Aveto aro ve Toko Pomnga i avrum ler mimiong ma i sivenga avele, aro i sung

* ^{11:25:} Riong kinnga ake i pavelpol menong ponganga tomo nge a God.

sisisong ako aro i pavengveng it nge. Na i oma venen aken, mo aro te penthal tomo ol nge areko o panes vothung ulue anga, kene avele.

³³ Maken titeikre, aro ve thomu o pathun nge aning aken, aro thomu o men tetel tel thongongomuere, lamo o an ol.

³⁴ Na aro ve toko e mesipun i, aro i an tel a ile vel, mo aro Toko Pomnga i paomelal thomu avele, nge lomu vothung nge lomu pathunong areken.

Na riong mun pelie aro tho pator thomu nge aka aro tho velpol a thomu nge.

12

Pol i olal Korin angare ole ninong nge Oni Riringa ile sungongre.

¹ Thomu o nin tho nge Oni Riringa ile sungongre, na titeikre lemik aka ve, aro lomumu mire senu nge Oni Riringa ile sungongre, eneke lomumu i nine senu nge rongan.

² Na lomumu mire lale aka ve, nomenga nge wop lemi aka thomu ini toko lemioongare rongan, tokokoere o patelektun thomu mo o lotual pelekpol avalare aka o palav avele.

³ Aveto ponange tho sis ve aro lomumu mire nge riong kathnga aka Oni Riringa i pavelpol i. Toko e avele aka God Ioni Riringa i pavelpol riong a i nge, aro i ri tangatun nge a Jisas. Na toko aka i ripot nge ilemi na i ri ve, "Jisas ini Toko Pomnga." Oni Riringa i voth a i nge ma i pavelpol riong aken.

⁴ Na Oni Riringa ile sungong rel relnga i voth, aveto Oni Riringa omole re inga aken, aka i sung ir a tokokoere nge.

⁵ Na te opaal Toko Pomnga ile tokokoere nge omaing rel relnga, aveto te oma a Toko Pomnga omole re inga aken ile omaing.

⁶ Na tokokoere o pavurvur nge omaing rel relnga omanga, aveto God omole re inga mun aken i sung engenging a or omole omole nge, nge ole omaing aken.

⁷ Oni Riringa i sung ile sungong rel relnga a toko omole omole nge mo aro o opaal pel osivenga.

⁸ Ranga ve aka Oni Riringa i panine toko e ilemi mo aro i panine tokokoere ole mi

nge a God ile riong. Na Oni Riringa mun re inga aken aka i sung mire a toko e nge, mo aro i pamireal tokokoere nge a God ile riong.

⁹ Na Oni Riringa aken i paengeng toko e ile lemioong mo i aolonga, na i sung ile sungong a toko mun e nge, mo i pavurvur nge ni multhangingare opamimbinga.

¹⁰ Na i sung ile sungong a toko mun e nge, mo i pavurvur nge pathepolong omanga. Na i sung ile sungong a toko mun e nge, mo i ripot a God ile riong. Na i sung ile sungong a toko mun e nge, mo i avrum tokokoere ole riong kathnga aka i espot a Oni Riringa nge me na tamatare nge me. Na i sung ile sungong a toko mun e nge, mo i ripot nge keiong rel relngare aka ilemi mire nge avele. Na i sung mun ile sungong a toko mun e nge, mo ilemi mire nge toko aken ile riong mirenga.

¹¹ Na sungong alavusnga areken, Oni Riringa re inga omole aken, i sungu i a toko omole omole nge, ranga ve aka ilemi ve i sungu i a or nge.

Oni Riringa ile sungongre i ranga ve ini nir peti epipeere aka ole omaing omole omole i voth.

¹² Na toko ini peti epipeere i pom, aveto toko aken ilopat omole inga. Na i ranga ve ini mun i a Krais ilopat aka i omole inga. Na it omole omole it ini a Krais ini peti epipeere,

¹³ eneke it omole omole te el a God Ioni Riringa omole re inga aken, na i ranga ve aka te el paninuong, na Oni Riringa i veliloalo it mo te velpol ini a Krais ilopat omole. Na ar pelie ini Judare na pelie ini Judare avele, na pelie ini toko um polpolongare, na pelie ini toko um polpolongare avele. Na God i sung Ioni Riringa omole re inga ake a it alavusnga nge mo te el engenging a i nge.

¹⁴ Toko ini peti epee ini ini peti elonga avele, aveto ini peti epipeere i voth. Na i vene mun nge Oni Riringa ile sungong.

¹⁵ Na aro ve toko e ieve i ri ve, "Tho ini imeni avele, mako tho ini ini peti epee avele." Aveto rongan i voth toko aken ini peti epee.

¹⁶ Na aro ve toko itelnga i ri ve, “Tho ini itheki avele, mako tho ini ini peti epee avele.” Aveto rongan i voth toko aken ini peti epee.

¹⁷ Na aro ve toko ilopat ini itheki popepeng, aro i nongpol vava? Na aro ve toko ilopat ini itelnga popepeng, aro i nong rum i vava?

¹⁸ Aveto toko ilopat i venen aken avele. God i oma toko ilopat mo ini peti epipeere o voth a omei ranga ve ako God i sis ve aro o ngo venen aken.

¹⁹ Na aro ve toko ilopat ini ini peti epee popepeng, aro ilopat alarol avele.

²⁰ Aveto toko ini peti epipeere o voth ma o pavelpol toko ilopat alarolng.

²¹ Maken toko itheki i pavurvur avele ako aro i ria imeni ve, “Aro ve ong voth avele, ur mun e avele, aro tho voth senu inga.” Na toko ipouna i pavurvur mun avele ako aro i ria ieve ve, “Aro ve ong voth avele, ur mun e avele, aro tho voth senu inga.”

²² Aveto i venen aken avele. Na toko ini peti epipee pelie ako te ri ve o molilil, aro ve o voth avele, i pavurvur aro ilopat i voth senu avele.

²³ Na nir peti epipee pelie ako ler thopolong i sivenga nge avele, aro te pamalmal i. Na nir peti epipee pelie ako ler maral nge, kene aro te pasopal senu i.

²⁴ Aveto nir peti epipee pelie ako ler thopolong i sivenga nge, te oma ur e avele nge. Na God i Pavelilo toko ini peti epipeere mo aro epipee pelie ako ler thepolong i sivenga nge avele, aro te theal senu i.

²⁵ Na i oma venen aken mo aro toko ini peti epipeere aro oni silal pel avele, aveto aro ole theal senu peling aro i vur e pel inga.

²⁶ Na aro ve toko ini peti epee omole i sis, aro ini peti epipee alavusnga, aro o rov mun sisong aken. Na aro ve toko e i papomng aini peti epee omole, aro ini peti epipee alavusnga aro olemi sivenga mun nge.

²⁷ Na thomu o ranga ve ini toko ini peti epipeere ako tho ri nge, na thomu alavusnga o velpol ini a Krais ilopat.

²⁸ Na God i sungu omaing rel relnga a toko omole omole nge ako ini ini peti epipee ako o lotual i nge. Na omaing mukalinga ini ile pakekere, na omaing aininga ini areko o ripot a God ile riong, na omaing menga ini pamirealingare, lama pathepolong omangare tomo nge areko o el ile sungong nge vuraling, na areko o pavurvur nge tokokoere oopoalnga, na areko o mukalpo tokokoere nge omaing, na patopalalnga ini areko o ripot nge keieng rel relngare ako olemi mire nge avele.

²⁹ Na or alavusnga ini ile pakekere avele. Na or alavusnga ini a God ile riong ripotngare avele, na or alavusnga ini pamirealingare avele, na or alavusnga ini pathepolong omangare avele,

³⁰ na or alavusnga ini vuralingare avele, na or alavusnga ini areko o ripot nge keieng rel relnga kene avele, na or alavusnga ini areko o ripot nge keieng rel relnga aken mirenga, kene avele.

³¹ Naro thomu alavusnga aro o engeng mo o ela Oni Riringa ile sungong mukalnare aka o mukal nge areko o rumongal.

Na tho sis ve aro tho pathengal thomu nge omaing aka i sivenga nge omaing alavusnga, ini vothung aka nge asaguong.

13

Asaguong ini vothung aka i sivenga nge Oni Riringa ile sungong alavusnga.

¹ Aro ve tho leng leng nge rumrem alavusnga okei tomo nge enselre okei, aveto ok sagu tokokoere avele, aro tho ranga ve ini kom aka i tang polpol.

² Na aro ve tho ripot a God ile riong ranga ve ini a God ile riong elnga, na aro ve lemik mire nge a God ile riong inkinnenga alavusnga, na aro ve lemik mire nge ur alavusnga, na aro ve lek lemioong i engeng i pavurvur aka aro tho ria tetere naro o pamu, na aro ve tho pavurvur nge ur areken omanga, aveto ok sagu tokokoere avele, aken tho ini toko polpolng.

³ Na aro ve tho sung lek ur elonga alavusnga a toko le ur avelengare nge, na aro ve tho sungpot nik peti a tokokoere

nge mo o ongsises i, aveto ok sagu tokokoere avele, aro lek omaing aken aro i opoal tho avele.

⁴ Aro ve toko e ia sagu tokokoere, aro iopo i vurpol virial avele. Naro i oma inga vothung sivenga a tokokoere nge, naro i theseal avele, naro i papomnga isivenga avele, naro i magon avele,

⁵ naro itelnga pla avele, naro ilemi i voth inga nge isivenga avele, naro ilemi kling virial avele, naro ilemi i voth nge vothung kerenga ako o oma i a i nge, kene avele,

⁶ naro ini plong nge vothung kerenga, aveto ilemi sivenga nge a God ile riong nunganga.

⁷ Na toko e aka ia sagu tokokoere, aro i el inga matheong aka o oma i a i nge, na aro ve tokokoere ole omaing i velpol ini vothung kerenga a i nge, aro ilemi ve o oma vengveng a i nge avele, na i pani-al evelelnga nge areko o tongporum nge vothung sivenga omanga, na i mit engeng nge matheong alavusnga aka i velpoltun i.

⁸ Vothung aka nge asaguong aro ile vu-songa avele, aveto omaing nge a God ile riong ripotnga, aro i vus, na omaing nge keiong rel relngare ripotnga aro i vus, na tokokoere ole mire aro i vus mun.

⁹ Eneke ponange lemirk mire nge ur alavusnga aka aro God i oma i, kene avele, lemirk mire inga nge epipee. Na aro ve God i sung ile riong a it nge, aro lemirk mire inga aka nge epipeere.

¹⁰ Aveto nge nang aka aro God i pavus ile omaing alavusnga, aro lemirk i nine nge ur alavusnga. Maken Oni Riringa ile sungong aka i sungu i a it nge ponange, aro i penthal.

¹¹ Na aken i ranga ve ini wainlanga aka i poma na ile mire i motu. Na nge aka rongan tho ini wainlanga, tho leng leng ranga ve ini wainlanga, na lemirk mire aka ranga ve tho ini wainlanga, na lemirk rum aka ranga ve tho ini wainlanga, lamako tho aolonga ol, mako tho modop ol wainlangaing a vothung aken.

¹² Na wainlangaing a vothung i ranga ve ini Oni Riringa ile sungongre aka aro o vus tova ve God i pavus ile omaing alavusnga. Na ponange lemirk i nine avele, ranga ve aka te the nge thealu aka i nine

avele. Aveto panen aro te thopol vengveng a God itheki. Na ponange lemirk mire nge epipee, aveto panen aro lemirk mire nge ur alavusnga, ranga ve aka God ilemi mire nge ur alavusnga aka a tho nge.

¹³ Nge wop lemi ake God i sis ve aro te panes vothung or me ake, aro ler lemioong i engeng nge a God, naro te men sial nge ur sivesivengare aka aro God i sungu i a it nge, naro ar sagu tokokoere, na vothung aka i aolonga nge vothung or me aken ini asaguong.

14

Pol i pator Korin angare nge ve, keiong rel relngare ringa ini Oni Riringa ile sungong mukalinga avele, eneke i opoal toko alavusnga avele.

¹ Naro thomu o engeng nge asaguong nge tokokoere. Aveto aro thomu o engeng mun nge Oni Riringa ile sungongre elnga. Naro o engeng rintet nge ile sungong aka o ripot a God ile riong ranga ve ini a God ile riong elngare,

² eneke toko e aka i ripot nge keiong rel relngare aka ilemi mire nge avele, i ria tokokoere nge avele, i ri aken a God nge, eneke toko e avele ilemi mire nge ile riong aken. Na i ri riong inkilenga aka nge Oni Riringa ile engenging.

³ Aveto toko e aka i ripot a God ile riong ranga ve ini a God ile riong elnga, i ria tokokoere nge, mako i paengeng lotuongare ole menong, na i paengeng ole lemioong, na i opoal areko o voth nge matheong.

⁴ Na toko e aka i ri nge keiong rel relngare i paengeng aka ini isivenga, aveto toko e aka i ripot a God ile riong, i paengeng aka ini lotuonga alavusngare.

⁵ Na tho sis ve aro thomu alavusnga o el Oni Riringa ile sungong aka nge keiong rel relngare ripotnga, aveto tho sis rintet ve aro thomu o el Oni Riringa ile sungong aka nge a God ile riong ripotnga ranga ve ini ile riong elnga. Na aro ve toko e i ri nge keiong rel relngare, i sivenga aka aro toko e i ekrispot ile riong aken mirenga mo aro lotuonga alavusngare o el opoaling nge ile riong aken. Na aro ve toko e i

ripot mirenga avele, toko ako i ripot a God ile riong ranga ve ini ile riong elnga, ile omaing kene i aolonga nge toko ako i ri nge keiong rel relnga ile omaing aken.

⁶ Titeikre, aro ve tho es a thomu nge wot, na tho ria thomu nge keiong rel relnga aka lomumu mire nge avele, aro i opoal thomu vava? Aveto aro ve tho ripot a God ile riong ranga ve ini ile riong elnga, eve tho sung mire a thomu nge, eve tho panine lomu mire nge riong aka tho el i a God nge me, eve tho patoral thomu, aken aro i opoal thomu.

⁷ Na i ranga ve ini mun i bei na won agolu, o mimi avele, aveto okei aka ru i voth, na aro ve i tang senu avele, i pavurvur aro te panes i avele.

⁸ Na aro ve kuth i avvuv senu avele, aro te monsi nge punong vava?

⁹ Na i vene mun aken nge thomu, aro ve thomu o ri nge keiong rel relnga aka tokokoere olemi mire nge avele, aro olemi mire nge lomu riong vava? Lomu riong aken i opoal toko e avele.

¹⁰ Na i nunganga aka keiong rel relnga ake ru i voth a ulue, na riong omole omole areken i sivenga nge areko olemi mire nge.

¹¹ Maken aro ve tho nongpol toko aka i ri keiong relnga e, aken ini toko relnga e a tho nge, na tho ini toko relnga e a i nge, na i pavurvur aro aro thengemem pel avele.

¹² Na i vene mun nge thomu aka thomu o ri riong aka tokokoere olemi mire nge avele. Na lelik mire aka ve, thomu o engeng nge Oni Riringa ile sungongre elnga, maken aro thomu o naktet senu nge Oni Riringa ile sungong areko o pavurvur nge lotuongare oopoalnga.

¹³ Na i venen aken na i sivenga aka aro toko e aka i ri nge keiong rel relnga, aro i nong engeng mo i pavurvur aro i ritet nge ile riong aken mirenga.

¹⁴ Na aro ve tho nong nge keiong rel relnga aka lelik mire nge avele, aken ini Oni Riringa aka i voth a lelik aka i pavelpol i, aveto lek mire i voth polpol inga.

¹⁵ Naro tho oma ol vava? Aro sek wom Oni Riringa aka i voth a lelik mo i nong, naro lelik aro i pavelpol mun nongong.

Naro sek wom Oni Riringa aka i voth a lelik mo i vo, naro lelik mun aro i pavelpol mun voing.

¹⁶ Na aro ve wong oma venen aken avele, na som wom inga Oni Riringa aka i voth a lomum mo i nong sivengaing a God nge, nge keiong rel relnga, na aro ve toko e aka ile lemioong i motu rongan i voth, aken i pavurvur aro i nong sivengaing a God nge tomo nge wong avele, eneke ilemi mire nge lom riong avele.

¹⁷ Na i nunganga aka ong ri sivengaing a God nge, aveto lom riong aken i paengeng toko aken avele.

¹⁸ Tho ri sivengaing a God nge aka ve, aro ve engek tho voth, tho ri nge keiong rel relnga pulua na i mukal nge lomu riong nge keiong rel relnga.

¹⁹ Aveto nge lotuongare ole velilopeling, lelik engeng nge tokokoere opatalnaga, aken aro tho ripot inga riong posngaingati aka aro tokokoere olemi mire nge, naro tho mothong riong pulua rintetnga ripotnga nge keiong rel relnga aka tokokoere olemi mire nge avele.

²⁰ Titeikre, lomu vothung aka thomu o engeng inga nge keiong rel relnga ripotnga i ranga ve ini wainlangaere ole vothung, na thomu o mothong tova o oma ol venen aken. Aveto i sivenga aka aro lomu vothung omanga i ranga ve ini povothvoth aka i oma vothung kerenga e avele, aveto nge lomumu, aro i motu ranga ve ini toko motunga ilemi.

²¹ Na thomu o mothong tova lomumu ve, keiong rel relnga ringa i pathengal aka ve, God ilemi sivenga nge thomu, eneke God ile riong i ri vene:

“God i ri vene:

Aro tho pakepot toko rerelire
mo aro o sung paomelaling
a lek tokokoere nge,
naro o nongpol keiong rel relnga
aka olemi mire nge avele,
aveto rongan o telnga pla inga,
na o nongal lek riong avele.” *Ai-saia 28:11-12*

²² Na riong aken i pathengal it aka ve, keiong rel relnga ringa ini a God ile paatealing nge areko o panes ile riong, kene avele, ini paatealing nge areko o avsa

ile riong, mako i sung paomelaling a or nge. Aveto aro ve toko e i ripot a God ile riong ranga ve ini ile riong elnga, aken ini paatealinga nge areko o panes a God ile riong, na ini paatealinga nge areko o avsa ile riong, kene avele.

²³ Maken aro ve toko lemioongare o velilo pel nge lotu na or alavusnga o ri nge keieng rel relnga aka olemi mire nge avele, na aro ve tokokoe areko or ini toko lemioongare avele, eve toko lemioongare aka ole lemioong i motu rongan, aro ve o es a thomu nge, na o thopol lomu omaing aken, aken kene o rivenga thomu ini ngongongre.

²⁴ Aveto aro ve thomu alavusnga o ripot a God ile riong ranga ve ini ile riong elngare, na aro ve toko e aka ini toko lemioonga avele, eve toko lemioonga aka ile lemioong i motu rongan, aro ve i es a thomu nge, na i thopol lomu omaing aken, aro ilemi mire aka ve, ini toko aka i oma vothung kerenga, na lomu omaing areken aro i pun iopo.

²⁵ Maken aro i pamilempot ur aka i ngo kine a ilemi, naro i koru ieve na i lotual a God. Naro i ripot ve, "I nunganga aka God i voth tomo nge thomu!"

Polisis ve aro Korin angare ole lotu aro i tho senu.

²⁶ Maken titeikre, aro thomu o oma ol va nge lomu lotuong, e? Nge wop lemi aka, tova ve thomu o velilo pel nge lotu, omu omole omole lomu omaing kene i voth, na omu e kene aro i vo, na omu e kene aro i pamireal, na omu e kene aro i panine lomu mire nge riong aka i el i a God nge me, na omu e kene aro i ripot nge keieng rel relnga, na omu e mun kene aro i kekris toko aken ile riong mirenga. Naro thomu o oma lomu omaing alavusnga areken mo aro i paengeng lotuongare.

²⁷ Na aro ve omu pelie o sis ve aro o ri nge keieng rel relnga, aro ini inga or aini eve or me, naro omole aro i ri tel lamo e mun e. Na e mun e aka aro i kekris toko aken ile riong mirenga.

²⁸ Aveto aro ve toko e avele i voth aka aro i ripot riong aken mirenga, aro toko aka i sis ve aro i ri nge keieng rel relnga, i mothong tova i ri viringa nge, aro i men

poreng inga nge ole lotuong, naro i ri inga tomo nge isivenga na tomo mun nge a God.

²⁹ Na aro ve omu pelie o sis ve aro o ripot a God ile riong ranga ve ini ile riong elngare, o mothong tova o ser pel nge riong, aro or aini inga eve or me aro oa omole omole o ri tel, naro toko alavusnga o nongpol ile riong aken na o avrum i tova i es a God nge eve avele.

³⁰ Na aro ve God i pathengal ile riong a toko mun e nge aka ru i men, aro imeni sea a toko aken nge mo ile riong i vus, lamo toko aken aro i ripot riong aka God i pathengal i a i nge.

³¹ Na aro ve thomu o oma venen aken, aro omu omole omole aro i ripot riong aka God i pathengal i a i nge, aken aro lomu riong areken aro i patoral thomu na i paengeng thomu alavusnga.

³² Na toko aka i ripot a God ile riong ranga ve ini a God ile riong elnga, i pavurvur aka aro i naktet ile riong pateanga na ile vusong,

³³ eneke God ini God aka i pavelpol serpelng nge riong avele, ini God aka i pavelpol inga lemi moring.

Na aro ve thomu o velilo pel nge lotuong, aro thomu o panes mun vothung aka God ile tokokoere a lotuong a rumremre o oma i,

³⁴ aka ranga ve sangre aro o men poreng nge lomu pathunong areken. Na o mothong tova o leng leng, eneke Moses ile patorong i ri ve, aro o voth a oewoere osa thewo.

³⁵ Na aro ve o sis ve aro olemi mire senu nge ur aken ru o ri nge, aro o nin senu ol oewo tomonmonengaere a ole vel ol, eneke i vengveng avele tova ve seng e aro i leng leng a lomu pathunong areken.

³⁶ Aveto thomu o oma vene aken avele. Na ava Panongpolong Sivenga aka o panongpol ol nge, i patea a thomu nge, e? Na ava i voth inga aka a sivengomu nge, e? Na ava pelie ol nge avele, e?

³⁷ Na aro ve omu e ilemi ve ini a God ile riong elnga e, eve ilemi ve Oni Riringa ile sungong i voth a i nge, aro ilemi mire aka ve, riong ake tho wat i a thomu nge, ini a Toko Pomnga ile patorong.

38 Na aro ve i avsa lek riong ake, aro thomu o mothong tova o nongal mun ile riong.

39 Maken titeikre, aro thomu o engeng nge Oni Riringa ile sungong ako aro o ripot a God ile riong ranga ve ini ile riong elnga, na o mothong tova o mit roal areko o el Oni Riringa ile sungong nge keiong rel relnga ringa.

40 Aveto aro thomu o panes senu lotuong a omaing na o mothong tova o palemi pelekpol tokokoere.

Tokokoe alavusnga areko o rin lale, aro o los werera mun

15

(Vonge 15:1-58)

Krais ile los wereraing nge rinong.

1 Titeikre, tho sis ve aro tho palemi rum werer thomu nge Panongpolong Sivenga ako tho panongpol tel i a thomu nge lale. Na thomu o elo i a lomumu lale, na lomu lemioong i mit engeng nge.

2 Na ake ini Panongpolong Sivenga ako God i el werer thomu nge, tova ve rongan lomu lemioong i voth inga nge. Aveto aro ve lomu lemioong i matu nge, aken lomu lemioong aken aro i vus polpolu inga.

3 Riong ako tho el i ma tho sung esu i a thomu nge, na riong e avele i aolonga nge riong aken, na i vene: Krais i rin leltun ler vothung kerengare, ranga ve aka God ile erere i ri nge,

4 i rin ma o paeso ini peti a vuvepun, lamako nang or me i vus ma i los werera mun ranga ve aka God ile erere i ri nge.

5 Lamako i velpola a Pita nge lama i velpola mun a ile pakeke or mule pa omole pothoi or aini nge.

6 Lamako i velpola mun a toko lemioongare nge aka o pathun na oa titaling i aoselea or 500. Na oa pulua rongan o mimi, aveto pelie o rin lale.

7 Lama i velpola mun a Jems nge, lama i velpola mun a ile pakeke alavusngare nge.

8 Lama i velpola mun a tho nge a rumongaling. Na tho velpol ini ile pakeke nge sovengalo aka i rel, ranga ve ini wainlanga aka inina i pop senu i avele.

9 Na tho posnga nge ile pakeke alavusnga, na tho ini toko sivenga avele aka aro o apet tho ve ini ile pakeke, eneke tho pakerenga a God ile lotuongare.

10 Aveto nge a God ile themosaling nge tho, make tho velpol ol nge mimiong ake tho voth ol nge ponange. Na ile themosaling aken i vus polpol avele, make tho um engeng. Na lek omaing i aolo leltun ile pakeke alavusnga ole omaing, aveto ini lek engenging avele, ini a God ile themosaling aka i paengeng tho nge omaing aken.

11 Na aro ve thomu o nongpol i a tho nge, eve a or nge, ur e avele, lemem panongpolong i vur e pel inga. Na aken ini Panongpolong Sivenga aka lomumuo ol nge.

Toko lemioongare aro o los werera mun nge rinong panen.

12 Opisleonga them panongpol nge aka God i palos werera a Krais nge rinong, na i vava ake omu pelie o ri ve, tokokoe areko o rin lale, o pavurvur aro o mimi werera ol avele, e?

13 Aveto, tova i nunganga aka ve, tokokoe areko o rin lale, aro o los werera ol avele, aken Krais i los werera mun nge rinong avele.

14 Na tova i nunganga aka ve, Krais i los werera ol avele, aken lemem panongpolong tomo nge lomu lemioong ini ur polpolnga.

15 Na aro ve i venen aken, them pakekere, lemem apaltet nge a God ile omaing aken, eneke them panongpol nge a God aka i palos werera a Krais nge rinong, aveto tova i nunganga aka ve, areko o rin lale, aro o mimi werera ol avele, aken God i palos werera mun a Krais nge rinong avele.

16 Eneke, tova i nunganga aka ve, God i pavurvur avele aka aro i palos werera areko o rin lale, aken i palos werera a Krais nge rinong avele.

17 Na tova i nunganga aka ve, God i palos werera a Krais avele, aken lomu lemioong ini ur polpolnga na lomu vothung kerengare rongan i ngo reletun a thomu nge,

¹⁸ na tokokoe areko olemio nge a Krais na o rin lale, aro o penthal mun.

¹⁹ Na aro ve ler lemioong nge a Krais i opoal inga it nge ler menong ake ru a ulue inga, na a Pen a Urvet avele, aken patong it tio, aro tokokoere ole lemi esaling a it nge aro i aolo leltun ole lemi esaling a toko mun pelie nge.

²⁰ Aveto i venen aken avele, i nunganga ako God i palos werera a Krais nge rinong, na ini toko ako i el tel mimiiong ako aro ile vusonga avele, aken kene lemire mire ake ve, areko o rin lale, aro o el mun mimiiong aken.

²¹ Na ranga ve ako toko omole ile omaing i pavelpol rinong, toko omole mun e ako ile omaing kene, i pavelpol los wereraing nge rinong.

²² Na i vene re ake, eneke Adam i pavelpol rinong, mako ilengare aro o rin mun, aveto Krais i pavelpol los wereraing, make ilengare aro o el mun mimiiong ake aro ile vusonga avele.

²³ Aveto toko omole omole ole nang ake aro God i palos werera or nge. I palos werera tel a Krais, na nge a Krais ile lo wererong me, aro i palos werera mun areko olemio nge i.

²⁴ Lamo ulue ile vusong aro i velpol, naro i velpol vene: Krais aro ile mong areko o theal malang po na areko o theal ulue. Na ole engenging nge ur areken thealnga, aro i pavus i. Maken aro ur alavusnga aro i voth ol nge ile thealing, naro i sungu i a Itema imeni nge.

²⁵ Eneke Krais aro i theal ur alavusnga ranga ve ini nepes, i pavurvur ake la aro God i paeso a Krais ile ngarangre a isa thewo.

²⁶ Na nge ake God ile mong ile ngarang alavusnga, aro ile mong mun rinong.

²⁷ Naro i velpol venen aken, eneke God ile erere i ri vene:

“God aro i paeso ur alavusnga a Krais isa thewo.” *Buk Song 8:6*

Na riong ake i ri nge “ur alavusnga” kene i ri nge a God avele, eneke ini inga a God aro i paeso ur alavusnga a Krais isa thewo.

²⁸ Ma nge ake ur alavusnga i voth a Krais isa thewo, Krais ake ini a God Itun aro

i paeso isivenga a God isa thewo mo aro God ienga inga aro i theal ol ur alavusnga.

²⁹ Na toko pelie o rin tel lale na o el paninuong avele, aveto othangangaere o el ol omei nge paninuong mo aro o opoal ol or. Na tova i nunganga ake ve, God i palos werera areko o rin lale avele, i vava ake o oma venen aken, e? Naro o opoal ol or vava?

³⁰ Na i vava nge them ake, e? Eneke them el kerengaing evelelnga nge lemem omaing aken.

³¹ Na titeikre, tho magon nge ake tho panongpol thomu, mako thomu o teo a Jisas Krais ar Pomnga nge, na lek magoning aken i oma tho mo tho ri nunganga ve, nang elonga tho el kerengaing pa omole tova aro tho rin.

³² Na nge lek omaing ake a Epesus, tho el kerengaing nge tokokoere ake ole engenging i ranga ve ini nanau pil. Na aro ve tho oma venen aken ranga ve ake lemik ve God aro i palos werera tokokoere avele, aken lek omaing aken ini ur polpolnga inga. Na tova i nunganga ake ve, God aro i palos werera areko o rin lale avele, aro te panes inga riong ake i ri ve:

“Aro te mosal inga nge aning na thinong, eneke lelken aro te rin.” *Aisaia 22:13*

³³ Thomu o mothong tova somu womalo tokokoere mo aro o paleklek thomu venen aken. Lomumu rum werer riong ake: “Aro ve thomu o paneo tomo nge toko kerengare, aro o pakerenga lomu vothung sivenga.”

³⁴ Na lomu mire vengvenga i voth a kath? Naro o modop lomu vothung kerengare. Tho ri venen aken, eneke omu pelie olemi mire nge a God avele. Na lek riong ake aro i palemara thomu.

Nir peti aro i rel nge ake God i palos werera it.

³⁵ Na tho pathengal thomu lale ake ve, God aro i palos werera tokokoere, aveto ava toko e aro i nina ve, “Aro i palos werera areko o rin lale vava? Naro oni peti i rel vava?”

³⁶ Na ninong le vanga ake? Na aro ve thomu o o won monnga, won monnga aken aro i plot tel, lamo aro i metaplo na i mimi werera.

³⁷ Na thomu o o wit eve ur e ilopat avele, thomu o o inga ako ini ile rinrel.

³⁸ Na God i pametaplo i ranga ve ako i ategal i nge lale, na rinrel rel relngare i pametaplo or ranga ve ako i ategal i a or omole omole nge.

³⁹ Na ur alavusnga areko o mimi, osivanga i thun avele, na tokokoere osivanga i rel, na mekeremre osivanga i rel, na menre o rel na silangre o rel.

⁴⁰ Na ur areko o voth a sepsa oni peti i voth, na ur areko o voth a ulue oni peti i voth mun, aveto oa malmaling i rel rel.

⁴¹ Na nang theki ia malmaling i rel, na ngov ia malmaling i rel, na sivemitre mun oa malmaling i rel, na sivemir omole omole oa malmaling i rel rel mun.

⁴² Na i vene mun nge areko God aro i palos werera or nge rinong, aro oni peti i rel. Na toko e ini peti aka o tetunu i, aro i voth palolo avele naro i plot, aveto God aro i palos werera ini peti aken mo aro i plot ol avele, aro i mimi ol aka aro ile vusonga avele.

⁴³ Na toko ini peti aka o tetunu i, ini ur polpolnga, aveto nge aka God i palos werera i, ma ini ur a urvet. Na toko ini peti aka o tetunu i, ile engengeng avele, aveto nge aka God i palos werera i, ma ile engengeng aolonga.

⁴⁴ Ma toko ini peti aka o tetunu i, ini ulue anga, aveto nge aka God i palos werera i, ma ini Pen a Urvet anga.

Na aro ve God i oma nir peti aka i mimi a ulue, aro i oma mun nir peti aka aro i mimi a Pen a Urvet.

⁴⁵ Na i ranga ve mun aka God ile erere i ri nge, na i ri vene:

“God i oma toko teltelnga aka ini a Adam ma i sung mimiong a i nge.” *Stat 2:7*

Aveto God i palos werera a Krais aka o apet i ve ini a Adam rumongalinga, na mimiong aka i sungu i a i nge, i rel, eneke Krais i pavurvur aka aro i sung mun i nge areko ole mio nge i.

⁴⁶ Na nir peti aka ini Pen a Urvet anga, i velpol tel avele, te el tel nir peti aka ini ulue anga, lamako aro te el ol nir peti aka ini Pen a Urvet anga.

⁴⁷ Na toko teltelnga aka ini peti ini ulue anga, ini a Adam, aveto toko teltelnga aka ini peti ini Pen a Urvet anga, ini a Krais.

⁴⁸ Na toko ulue anga alavusngare oni peti, i ranga ve ini toko ulue anga aken ini peti. Na toko alavusnga aka or ini toko Pen a Urvet anga aken ile, aro oni peti i ranga ve ini ini peti.

⁴⁹ Na ponange nir peti i ranga ve ini toko ulue anga aken ini peti, ranga ve mun aka panen aro nir peti i ranga ve ini toko Pen a Urvet anga aken ini peti.

⁵⁰ Titeikre tho ria thomu, toko ulue anga ini peti, i pavurvur aro i mimi a Pen a Urvet avele, a pen aka God i men ranga ve ini nepes nge. Na ur areko i pavurvur aro i plot, i pavurvur aro i mimi a pen aka ur e avele i plot nge, kene avele.

⁵¹ O nongpol, aro tho ritet thomu nge a God ile riong inkilenga omole kene i vene: It toko lemioongare, ar pelie aro o rin rongan na Krais aro i lo werer, aveto it alavusnga aro te onol,

⁵² aka nge kuth le avvuvong patopalalnga, naro te onol viri viri ranga ve ini toko theki witnga. Na lemire mire aka ve, it alavusnga aro te onol, eneke nge kuth le avvuvong aken, toko lemioongare aka o rin lale, aro o mimi werer tel, naro oni peti ol ini Pen a Urvet anga naro i plot ol avele, lamo it areko rongan te mimi, aro te onol mun venen aken.

⁵³ Naro i velpol venen aken, eneke nir peti aka i pavurvur aro i rin na i plot, aro i onol mo i pavurvur aro i rin na i plot avele.

⁵⁴ Na nge aka i velpol venen aken, God ile riong aro i velpol nunganga, aka i ri vene:

“God ile mong rinong
na i vus selele.”

Aisaia 25:8

⁵⁵ Na God ile erere i ri mun ve:

“Rinong lom engengeng kath
ako aro lom mong tokokoere nge, e?
Na rinong lom peang kath, e?” *Hosea 13:14*

⁵⁶ Na rinong i pavurvur aka aro i pun rin it, eneke te oma vothung kerenga, na lemire mire aka ler vothung i kerenga, eneke God ile erere i ritet nge lale.

⁵⁷ Aveto te ri sivengaing a God nge, nge aka ur areken ole engeng avele ol aka aro

ole mong it, eneke ar Pomnga a Jisas Krais ile mong or lale.

⁵⁸ Maken titeik sivengare, aro o mit engeng na o mothong tova toko e aro i ri ololo thomu nge lomu lemioong. Na evelelnga aro thomu o um engeng nge a Toko Pomnga ile omaing omanga, eneke lomumu mire ako Toko Pomnga ile omaing e avele aka aro o oma i, ini ur polpolnga.

Pol i ri nge omaing aka i sis ve aro i oma i

16

(Vonge 16:1-24)

Pol i ri nge Korin angare ole sungong aka aro o sungu i a Jerusalem angare nge.

¹ Nge lomu malueng aken thomu o nin mun tho nge umtun aka aro i opoal a God ile tokokoe areko o voth a Jerusalem. Naro thomu o oma ranga ve aka tho ria lotuongare a rumremre aka a epee a Galesia.

² Na tho ria or vene: Na nge nang rialonga elonga thomu omole omole aro o parong lelpot umtun epee aka i panes umtun aka o el i nge wick aken, naro o paen tomoal i, i mul nge nang aka aro tho velpol nge, maken nge lek velpoling aro o or ol umtun avele.

³ Na nge lek velpoling, aro thomu o atealpot toko pelie aka lomumu i sivenga nge or. Na aro ve tho es a Jerusalem avele, aro tho wat malueng aka i ritet Jerusalem angare nge toko areken, naro tho pake or mo o es tomo nge lomu sungongre a Jerusalem la.

⁴ Aveto aro ve i sivenga nge tho aka aro tho es, aro o es tomo nge tho.

Pol i ritet nge ile esong aka aro i es werer a Korin la.

⁵ Aro tho porumtet tel toko lemioongare a rumremre aka a epee a Masedonia, naro tho alpo selele a thomu nge wot.

⁶ Naro tho voth palolo tie tomo nge thomu, eve aro tho voth palolo mo la vit po i vus, lamo aro thomu o opoal tho nge lek esong e wop kathnga aka aro tho es nge.

⁷ Na aro ve tho es tel a thomu nge, i pavurvur aro tho voth palolo tomo nge thomu avele, na nik plong ve aro tho oma venen aken, eneke tho sis ve aro tho

voth palolo tomo nge thomu, tova ve Toko Pomnga isa wom tho.

⁸ Aveto aro tho voth ake a Epesus, i mul nge nang aka aro Judare oa aning aka o apet i ve ini Pentikos aro i velpol,

⁹ eneke God i thep sovengalo nge tho lale mo aro tho panongpol ile riong, mako toko pulua o panes i, aveto toko pulua mun o sis ve aro o mit roal tho.

¹⁰ Na aro ve Timoti i velpol, aro thomu o theal senu i nge ile voth tomoing nge thomu mo aro i ngeip avele, eneke i oma a Toko Pomnga ile omaing ranga ve ini tho.

¹¹ Na o mothong tova o pavthongal i, aveto aro o opoal i nge ile esong a tho nge me, mo aro i es tomo nge lemi moring, eneke rongan tho men tetal i tomo nge areko o supo na o um tomo nge i.

¹² Na thomu o nin tho nge a Apolos aka i um tomo nge them. Na tho ri engeng nge i mo aro i supo tomo nge a Timoti rea a thomu nge wot, aveto ilemi engeng ve aro i es nge wop lemi ake avele, aveto aro ve nang sivenga e i velpol a i nge, aro i es ol a thomu nge wot.

Pol ile riong patopalalnga.

¹³ Thomu o thealal na o mit engeng nge lomu lemioong nge a Krais. Na o mothong tova o ngeip, o mit engeng inga.

¹⁴ Na o oma lomu omaing alavusnga tomo nge asaguong.

¹⁵ Lomumu mire aka Stepanas ile vel lemiare olemio tel nge a Krais aka a lomu epee a Akaia, na o sungu ole mimiong mo aro o opoal a God ile tokokoere. Na tho ri engeng nge thomu titeikre,

¹⁶ aro o paeso thomu a osa thewo tomo nge areko o um engeng tomo nge or, nge omaing aken.

¹⁷ Na Stepanas na Portunatus na Akaikus o velpol a tho nge, na lelik i sivenga rintet nge lomu toko or me aken ole velpoling, eneke lelik kerere aka thomu o voth tomo nge tho avele, na o el ol meumu.

¹⁸ Na o pasivenga werer lelik ranga ve aka o oma i a thomu nge. Maken aro thomu o papomnga tokokoe areko o oma venen aken.

¹⁹ Na lotuongare a rumremre ako a epee a Esia o pasungalu ole nang sivenga a thomu nge. Na Akuila ome a Prisila tomo mun nge areko o pathun a ole vel mo aro o lotu nge, o pasungalu mun ole nang sivenga rintet a thomu nge, eneke thomu o teo a Krais nge ranga ve ini or.

²⁰ Na toko lemioonga alavusnga ako o voth tomo nge tho, o pasungalu mun ole nang sivenga a thomu nge. Na nge lomu pathunongre aro thomu o pathokeal pel ranga ve ako omu sagu pel.

²¹ Na tho a Pol tho wat pathokealing patopalalnga ake nge sivengek menik.

²² Areko oa sagu a Toko Pomnga avele, God ile paomelaling aro i voth a or nge! Emem pomnga es me.

²³ Ar pomnga a Jisas ile themosaling aro i voth tomo nge thomu.

²⁴ Ok sagu thomu alavusnga, eneke it vusnga te teo a Krais Jisas nge.

Na i re aken. I vus.

Pol ile malueng aininga ako i wat i a toko lemioongare nge ako o voth a rem a Korin 2 Korin Ritetong nge a 2 Korin

Nge malueng ake lemir mire ako Pol ilemi esal rintet na ilemi voth nge toko lemioongare ako a Korin. Na toko pelie o sis aka ve aro o velpol ini lotu a mukalingle ake a Korin, na o paruru a Pol na o lel okime nge i. Na o ri ve, Pol ini a God ile pakeke nunganga avele, na ile engenging avele aka aro i theal toko lemioonga Korin angare. Na toko lemioonga pelie o panes mun lemieng aken, aka o paroro osivenga na o paruru a Pol. Na Pol kene i voth aka la a Esia na ilemi kerere rintet na i sis rintet ve aro o eksing olemi, mako i wat malueng mun ve aro o modop ole vothung kerenga, na Taitus i es tomo nge a Korin angare nge la. Aveto Taitus i lo werer viri viri avele, na Pol rongan ilemi pelekpol nge Korin angare, mako i panes mun a Taitus ieve mei, eneke i sis ve aro i thopol a Taitus tova i lo werer mo i nongpol rum tova Korin angare o eksing lale eve avele. Na Pol i ortet i a Troas, mako i alpo a Masedonia la. (2:12,13) Na Pol i ri pompom nge ile omaing nge panongpolong, na nge aka Panongpolong Sivenga i sivenga rintet nge a Moses ile patorong, (2:14–6:21) na i ri venen aken, eneke ini plong ve aro Korin angare o mothong lel ile riong aka o el i a olemi lale. Na Pol i ri posililaltun or nge aka o paroro osivenga, na i pathengal nge isivenga aka i el sisong, na sisong aken i pathengal aka ve, i kene ini a Krais ile toko sivenga. (4:11-18; 6:1-10) Na Pol i sis rintet ve aro o lel okime nge ole vothung kerenga, (5:20-7:4) na nge aka i thepolo a Taitus aka la a Masedonia (7:5,6) na Taitus i ria Pol nge eksingong sivenga aka Korin angare o oma i, aken i oma a Pol ma ilemi ngo thaw. (7:6-16) Na i velpol venen aken, mako Pol i wat mun malueng ake na i ria or mo o monsi senu senu ole sungong nge toko lemioongare aka ru a Jerusalem. (8:1-

9:15) Na i sung riong engenga nge areko o paruru i ve aro o lel okime nge ole vothung kerenga aken, aro vene mo aro i paomelal rintet or, tova i velpol werer a Korin.

Pol i ritet nge umong ako God i sungu i a ile pakekere nge aka o apet or ini aposel

(Vonge 1:1-7:16)

¹ Tho a Pol, tho ini a Krais Jisas ile pakeke, eneke God i ateal tho ve aro tho velpol ini ile pakeke. Tho wat malueng ake a thomu tokokoe areko o lotual a God aka a Korin na a pen alavusnga aka o voth a Akaia. Na titeir a Timoti i voth tomo nge tho.

² Aro thomu o el themosaling na lemi moring a Titemer a God tomo nge ar Pomnga a Jisas Krais nge.

Pol i ri sivengaing nge a God ile opoaling.

³ Them risea a God aka ini ar Pomnga a Jisas Krais Itema aka ini Titemer, na ini lemi esaling alavusnga tepun, na i paengeng it alavusnga lemir.

⁴ Na i opoal them nge lemem matheong alavusnga potunnga mo aro them opoal mun tokokoe areko o el matheong, naro them opoal or nge opoaling aka God i sungu i a them nge.

⁵ Na Jisas ile matheong i esa a them nge, aveto ile opoaling i es mun a them nge. Na i venen aken, eneke them ini ile.

⁶ Na eveleunga them el matheong, na them el tomo mun a God ile opoaling, na them pavurvur aka aro them opoal na them paengeng thomu nge lomu matheong potunnga, aka thomu o potun i ranga ve ini them.

⁷ Na lemimem i engeng ve aka aro thomu o mit engeng, eneke lemimem mire aka God aro i opoal thomu nge lomu matheong potunnga, ranga ve aka i opoal them nge lemem matheong potunnga.

⁸ Titeikre, them sis ve aro lomumu mire aka ve, them el matheong puluanga aka a epee a Esia. Na matheong aken i aolonga rintet, na i pavurvur aro them potun i avele. Na i omelal rintet them ma lemimem ol aka ini rinong.

⁹ I nunganga, them rov i ako i toth aro them rin. Aveto ur areken i velpol a them nge mo aro them mothong tova lemimem i voth nge lemem engenging, aveto aro lemimem i voth inga a God nge, eneke ile engenging i pavurvur nge ur alavusnga omanga, na e mun e i pavurvur aro aro i palos werera rinrinongare.

¹⁰ Na nomenga ako matheong aolonga i omelal them ma toth nge lemem rinong, aveto God i eltetpot them nge matheong aken. Na lemimem mire aken, aro ve them voth nge matheong, aro i eltetpot mun i a them nge. Na ienga inga aken them parong lemimem a i nge mo aro i eltetpot them nge matheong alavusnga aken aro i velpoltun them.

¹¹ Na them sis ve aro thomu o opoal mun them nge lomu nongongre. Na aro ve toko pulua o nong nge lemem, na God i olal ole nongong, aro toko pulua o risea a God nge ile opoaling sivenga aken i sungu i a them nge.

Pol i eksing werer ilemi nge ile esong a Korin, na toko pelie o ri ve Pol ini toko le apaltetonga, na Pol i olal ole riong.

¹² Na them ri nunganga aken them rov i a lemimem aken ve, lemem omaing alavusnga aken nge thomu i ngo pat, na lemem riong alavusnga aken them oma i a thomu nge i nunganga, na God ilemi sivenga nge lemem omaing areken. Na them oma venen aken mun a toko alavusnga nge. Na them panes aken i toko ulue angare ole mire avele, aveto God ile themosaling i opoal them.

¹³⁻¹⁴ Na ur alavusnga aken tho wat i a thomu nge, i nine na i pavurvur aro aro thomu o total i, na lomumu mire senu nge, aveto ponange lomumu mire inga aken nge pelie, na lemek ve aken panen aro lomumu mire senu ol re nge, naro nge a Toko Pomnga a Jisas ile nang aken aro i lo werer nge me, aro lomumu sivenga nge lek omaing ranga ve aken aro lemek sivenga mun nge lomu omaing.

¹⁵⁻¹⁶ Na lek lemoong i engeng ve, lomumu sivenga nge lek omaing, mako lemek ve aro tho porumtet tel thomu nge lek esong a Masedonia la, na nge lek lo

wererong a Masedonia aro tho porum mun thomu mo aro tho opoal mun thomu paininga. Na nge lek lo wererong a Masedonia tho ri ve aro thomu o sung ur pelie mo i opoal tho nge lek esong a Judia.

¹⁷ Nge wop lemi aken lemek rum nge lek esong, tho oma polpol i avele. Na thomu o mothong tova lomumu ve, tho panes i nge vothung ulue anga ranga ve ini toko aken i ripot ile riong, aveto i panes i avele.

¹⁸ Tho panes lek riong ranga ve aken God i panes mun ile riong evelelnga.

¹⁹ Na tho ri vene aken, eneke panongpolong aken nge a God Itun aken ini a Jisas Krais aken Sailas na Timoti na tho, them panongpol thomu nge, kene them eksing i avele. Na Jisas mun i eksing a God ile riong avele.

²⁰ Eneke riong alavusnga aken God i kin tomo i nge tokokoere, Krais i naktet panesnga na i oma i. Na it alavusnga te ri ve sivenga nge a Krais na te risea God iion nge.

²¹⁻²² Na ake aken a God aken i pamit them tomo nge thomu mo aro te mit engeng nge a Krais ipanesnga. Na i sung Ioni Riringa a it nge mo i paateal it ve, it aken aken i sungong aken i ritet ler nge ur aken panen aro te el i. Na God re inga ake i ateal them mo aro them panongpol thomu nge a Krais ile omaing.

Pol i wat malueng a or nge na i es a or nge avele, eneke i sis ve i men tetal or mo o modop tel ole vothung kerengare.

²³ Na God ilemi mire nge ur areko tho ri nge kene i nunganga. Na tho lo werer a thomu nge a Korin avele, eneke nik plong ve aro tho vol thomu nge lomu vothung kerenga aken rongan thomu o oma i.

²⁴ Nik plong ve aro tho velpol ini lomu lemoong theal tetalnga, eneke lomu lemoong i engeng nge a Jisas lale. Aveto tho sis ve aro tho opoal thomu nge sovengalo aken aro thomu o modop lomu vothung kerenga nge, mo aro lomumu sivenga nge.

2

¹ Mako lemek altet ol inga ve aro tho es mun a thomu nge wot avele, eneke aro

vene mo tho palemara thomu ako ranga ve tho oma i nge thomu nomenga.

² Eneke aro ve tho oma thomu alavusnga mo thomu alavusnga lomumu sivenga avele, aken aro omu e avele aro i palemi sivenga tho.

³ Mako tho wat malueng engenga a thomu nge mo aro thomu o eksing lomu mimiong mo aro ve tho es a thomu nge, aro thomu o palemi kerere tho avele, aveto aro o ria inga tho nge ur aka i palemi sivenga tho. Na lemik inga aka ve, aro thomu o panes inga ur areko tho wat i a thomu nge aka ranga ve thomu o oma i lale, aken aro it alavusnga aro lemir sivenga nge.

⁴ Na tho wat venen aken, eneke lemik kerere na thekik einga i teel nge thomu, nako tho wat malueng aton a thomu nge. Na tho wat i a thomu nge ve aro tho palemi kerere thomu avele, aveto tho wat i ve aro lomumu mire aka ve, ok sagu rintet thomu.

Pol i ria or ve aro olemi simikal toko kerenga aken ile vothung kerenga aken.*

⁵ Na toko aton i palemi kerere thomu, i palemi kerere mos tho avele, aveto i palemi kerere rintet inga ake ini thomu. Na i palemi kerere thomu alavusnga tie. Aken tho ri nunganga.

⁶ Na paomelaling aka thomu pulua o sungu i a i nge, i pavurvur nge i, eneke i eksing lale.

⁷ Naro lomumu simikal ile vothung kerenga aken naro thomu o paengeng ilemi. I sivenga avele aka aro lemi kerere ong i pamatu i.

⁸ Make tho ri engeng ve aro thomu o pathengal i a i nge ve omu sagu i.

⁹ Na tepun mun re ake, make tho wat a thomu nge, i vene: Tho sis ve aro tho tongporum thomu tova thomu o panes ur alavusnga aka tho ri nge eve avele.

¹⁰ Na toko e aka lomumu simikal ile vothung kerenga, tho mun lemik simikal mun ile vothung kerenga. Na lemik ve ile

vothung kerenga a tho nge ini ur polpolnga na lemik simikal i lale aka a Krais itheki, eneke tho sis ve aro lomu menong i sivenga werer.

¹¹ Na tho oma venen aken, eneke i sivenga avele aka aro Satan ile mong it, eneke lemir mire senu nge ile vothung aka aro i pakerenga ler esong nge.

Pol i sis ve aro i thopol a Taitus.

¹² Na nge wop lemi aka tho es ma tho velpol a Troas, Toko Pomnga i thep lek sovengalo aka aro tho panongpol a Krais ile Panongpolong Sivenga a or nge.

¹³ Aveto lemik i ngo senu avele, eneke tho thopol a vet teik a Taitus mo i ria tho nge lomu menong, kene avele, mako tho paioal or ma tho alpo mun a Masedonia la.

Pol i es a Masedonia na i thopol a Taitus na i nongpol ritetong sivenga nge Korin angare ole menong, mako i risea a God iion nge.†

¹⁴⁻¹⁶ Them risea God iion roro, eneke i pathengal tokokoere aka lemlem mong ur aka i ngo roal them nge lemlem omaing a i nge, eneke them ini a Krais ile. Na them es nge pen elonga na them panongpol na tokokoere ole mi mire ol nge a God. Na God ilemi sivenga nge lemlem omaing, eneke lemlem panongpolong i ranga ve ini ur aka i una vro a pen elonga na tokokoere o una i. Na tokokoe areko o nongal lemlem riong, lemlem panongpolong aken i ranga ve ini ur aka i una vro na o una i na i pathengal or nge mimiong aka aro ile vusonga avele. Aveto tokokoe areko o nong sirik lemlem riong, lemlem panongpolong aken i ranga ve ini ur aka i una plot ma o una i na o lel okime nge na o es, mako rinong i sangpolo ol or. Na toko e avele ile engenging i pavurvur nge omaing aken,

¹⁷ aveto tho pavurvur, eneke tho ranga ve ini toko puluanga aka o panongpol nge a God ile riong mo aro o el umtun nge, kene avele. Tho oma venen aken avele. Na tho ini a Krais ile na lek riong alavusnga i nunganga a God itheki, na tho panongpol

* **2:4:** RP Nomenga toko e aka i teltun a Pol ve ini pakeke le apaltetonga. Na Pol i nin Korin angare ve aro o paomelal i nge ile riong aken na o oma i lale. † **2:13:** RP Na Pol ile riseaing ake i pavurvur nge vonge or limainga. Na nge vonge or limainga i rurum werer nge ur aka i velpol a i nge aka a Masedonia.

thomu ranga ve ini toko aka God i pakeu tho me.

3

Pol i ri ve Korin angare ole omaing i ranga ve ini malueng aka i ritet nge aka ile omaing i sivenga.

¹ Na tokokoe pelie olemi otun tho ve, tho wat maluengre mo aro tho risea sivengek nge. Na ava lomumu ve, tho wat malueng ake mo aro tho risea sivengek mun nge, e? Akennga avele. Na nik plong ve aro tho krim malueng aka i ritet nge lek omaing mo aro tho sungu i a thomu nge. Na nik plong mun ve aro thomu o wat malueng aka i ritet nge tho. Aveto toko le apaltetonga pelie aka o voth a thomu nge, kene o krim ole malueng aka i ritet nge ole omaing.

² Na lelik mire senu nge lomu vothung sivenga na i ranga ve ini lek malueng aka toko alavusngare o thopol i na olemi mire aka ve, lek omaing aka a thomu nge i nunganga.

³ Na them panongpol thomu, mako thomu o eksing lomu vothung ma i sivenga. Na lomu vothung sivenga areken i ranga ve ini malueng aka Krais i wat i aka i ritet nge lek omaing. Na tokokoere o thopol malueng aka i wat i a erere ome um nge avele, aveto o thopol inga lomu vothung sivenga aka God aka i engeng rintet Ioni i pavelpol i a lomu mimiong.

Pol i ri ve, God inga aka i sung ile engenging a them nge mo aro them panongpol.

⁴ Them ri venen aken, eneke them ini a Krais ile na them rov i aka God i el werer thomu aka nge lemem panongpolong.

⁵ Na i pavurvur aro them oma omaing aken nge sivengemem lemem engenging avele, aveto ini a God ienga inga aka i paengeng them nge ile omaing aken omanga.

⁶ Na God i pavelpol them mo them panongpol nge ile riong ponganga aka i kin tomo i nge tokokoere. Them panongpol or nge a Moses ile patorong panesnga avele, eneke aro ve toko e i panes senu a

Moses ile patorong alavusnga avele, aro God i sung paomelaling a i nge. Aveto them panongpol or nge a God Ioni Riringa ile omaing aka aro i sung mimiong a or nge.

*God ile riong kinnga ponganga aro i sung mimiong aka aro ile vusonga avele.**

⁷ Na God i wat ile patorong nomenganga nge um, ma i sungu i a Moses nge, ma Moses itheki lemi i tolilis, ma Israelre o pavurvur aro o the rinrin i avele, eneke i tolilis rintet. Aveto itheki lemi tolilisnga aken i voth palolo avele, na i penthal mor a mor, makola ini ile vusuong. Na nge aka Moses ile patorong i es tomo nge tolilisong kene i pathengal aka ve i sivenga, aveto ipanesnga i klipalal rintet, na aken aro i pavelpol rinong a tokokoere nge.

⁸ Aveto God Ioni Riringa ile omaing i mukal na i sivenga rintet nge aken.

⁹ Na aro ve Moses ile patorong aka i paomelal tokokoere nge ole vothung kerenga kene i sivenga, i vava nge Oni Riringa ile omaing aka i pavengveng tokokoere a God itheki, e? Aken i mukal na i sivenga rintet nge i.

¹⁰ Eneke ur aka nomenga i sivenga, ponange i sivenga mos ol avele, eneke God ile riong kinnga ponganga aka i kin tomo i nge tokokoere, i mukal rintet nge ile patorong nomenganga aka rongan i sivenga rintet.

¹¹ Na aro ve vothung nge a Moses ile patorong panesnga aka i voth palolo avele na i penthal kene i sivenga, i vava nge soven-galo ponganga aka aro te el mimiong nge, aka aro i penthal avele, e? Aken kene i mukal na i sivenga rintet.

¹² Na lemimem mire aka God ile soven-galo ponganga aro i penthal avele, mako them panongpol engeng rintet nge.

¹³ Na them parong kineal lemem riong e avele ranga ve ini a Moses aka i pasopal itheki lemi mo Israelre o mothong tova o thopol itheki lemi tolilisnga aka i penthalu mor mor.

¹⁴ Aveto olemi rit na oni plong nge a God ile riong panesnga. Na i pavurvur ponange, aro ve o nongpol werer ol a

* **3:6:** RP Aveto Moses ile patorong kene i ritet tokokoere aka aro o rin nge ole vothung kerenga.

Moses ile patorong ako toko e ako i tital i, aro olemi mire senu nge avele, eneke i ranga ve ini ur e ako i ngo sopal ole mire. Na rongan ur aken i ngo, eneke so omole inga i voth ako i pavurvur aro i penthal nge, tova olemio nge a Krais.

¹⁵ Na i venen aken i pavurvur nge ponange, aro ve Judare o nongpol toko e ako i tital a Moses ile patorong, i ranga ve ini ur e ako i ngo sopal ole mire.

¹⁶ Aveto Toko Pomnga aro i eltetpot ur aken a olemi tova ve o eksing a i nge.

¹⁷ Na Toko Pomnga ake tho ri nge, ake ini a God Ioni Riringa. Na aro ve Oni Riringa i voth a toko e ilemi, aro i pavthopot i nge vothung ako nge a Moses ile patorong panesnga mo aro God i el werer i.

¹⁸ Na them pasopal omaing ako God i oma i a them nge, kene avele. Ako ranga ve Moses i pasopal itheki lemi. Na tokokoere o thopol a God ia malmaling Pen a Urvet anga a lemem mimiong. Na Toko Pomnga ake ini Oni Riringa i eksing them evelelnga mo aro them velpol ranga ve ini i, mo aro lemem mimiong i pathengal a God ia malmaling Pen a Urvet anga a tokokoere nge.

4

Pol ile mimiong na ile panongpolong i vengveng.

¹ Na lemimem pelekpol avele nge panongpolong ake, eneke God i sung omaing ake a them nge, na ile lemi esaling i voth a them nge.

² Na tokokoere olemi otun them, aveto them parong kineal riong pelie avele, na them oma ur e avele ako aro lemem marange. Na lemem apaltet thomu avele, na them wath ke pelekpol a God ile riong avele. Aveto them panongpol a God ile riong nunganga ma i nine a thomu nge. Na them oma venen aken mo aro toko alavusnga olemi mire ako ve, lemem omaing alavusnga ake them oma i a God itheki, i nunganga.

³ Na aro ve Panongpolong Sivenga ake them panongpol thomu nge, i klip a omu pelie nge, aken i klip inga nge areko o penthal lale.

⁴ Eneke Satan ake i theal areko o panes vothung ulue anga, i pasopal tokokoere olemi ake olemio nge a Jisas avele, mo aro olemi mire senu nge a Krais ile Panongpolong Sivenga avele. Na Krais ake ini a God ia sei na i sivenga rintet.

⁵ Na them panongpol ve aro thomu o nongal nge them, kene avele, aveto them panongpol ve aro thomu o nongal nge a Jisas Krais, eneke ini ar Pomnga. Na them ini lomu umongare, eneke them oma a Jisas ile omaing.

⁶ Na them panongpol nge a Jisas, eneke God ake nomenga i ri ve, “Pen lalanga aro i totun pen a midenga.” * Ake ini a God ake ponange i pavus mun mideng ake a ler mimiong nge ile pen lalanga ake ini a Jisas. Na Jisas ile mimiong i ranga ve ini pen lalanga ake te thopol i na lemir mire nge a God ia malmaling Pen a Urvet anga.

Ler engenging i aolonga avele, aveto God inga ake i sung ile engenging aolonga a it nge.

⁷ Na lemimemo nge a Jisas na i ranga ve ini ur sivesivenga ake i ngo a lemimem, aveto lemimem i ranga ve ini ur areko i merek semelal. Na God i oma venen aken, eneke i ri ve aro tokokoere olemi mire ake ve, them oma omaing areke nge a God ienga ile engenging na them oma i nge lemem engenging avele.

⁸ Na matheong pulua i kalualtun them, aveto ole mong rintet them avele. Na nge nang pulua lemimem ve, aro them oma ol va, aveto them loltun omaing aken avele.

⁹ Na them el kerengaing, aveto God i lo lelpot emem avele. Na nge nang pelie them el mla nge omaing aken, aveto o pun rin them avele.

¹⁰ Evelelnga tokokoere o sis ve aro o pun rin them ranga ve ake o pun rin a Jisas, eneke them oma a Jisas ile omaing. Na tokokoere o thopol i ake ve, Jisas ile mimiong i voth a them nge.

¹¹ Na nge nang alavusnga ake them voth nge, i toth re ake aro o pun rin them, eneke them oma a Jisas ile omaing, aveto them oma venen aken, eneke them sis ve

* **4:6:** Stat 1:3

aro tokokoere o thopol i ako ve, Jisas i paengeng them.

¹² Mako them el matheong aka i toth aro i pun rin them, aveto thomu o el mimiong aka aro ile vusonga avele nge lemem omaing a thomu nge.

¹³ Na lemem lemioong i voth nge a Jisas, na them oma mun vothung ranga ve ini riong aka toko i wat i a erere nge, ma i ria God nge ve,

“Lek lemioong i voth a wong nge,
mako tho nin wong ve aro wong opoal
tho.” *Buk Song 116:10*

Na lemimemo ve aro God i opoal mun them, mako them panongpol nge a Krais ile omaing.

¹⁴ Eneke lemimem mire aka ve, God aka i palos werera Jisas nge rinong, aro i palos werera mun them mo aro them voth tomo ol nge a Jisas, naro i pasong them tomo nge thomu mo aro te voth tomo nge i.

¹⁵ Na them el matheong alavusnga areken mo aro them opoal thomu. Na them oma venen aken mo aro God ile themosaling aro i es na i es evelelenga a toko puluangare nge, mo aro toko puluanga o ri sivengaing a God nge naro o risea iion roro.

¹⁶ Make lemimem pelekpol avele, eneke lemimem i engeng ve aro panen God aro i palos werera it. I nunganga aka matheong i pakerenga nimem peti, aveto God i paengeng lemimem aka nge nang omole omole.

¹⁷ Na matheong aka them el i ponange aro i voth palolo avele a them nge, na ini ur polpolnga, eneke panen God aro i tepolal matheong aken nge ur aka i sivenga rintet, na i pomnga nge ur areken naro ile vusonga avele.

¹⁸ Mako lemimem i voth inga nge ur areko a Pen a Urvet aka them thopol i avele, na lemimem i voth nge matheong aka them thopol i na them el i ake ru a ulue, kene avele, eneke ur areko them thopol i, aro i voth palolo avele, aveto ur areko them thopol i nge thekimem avele, aro i voth palolo naro ile vusonga avele.

ako aro i el i a Pen a Urvet.

¹ Na nir peti aka onir i voth nge i ranga ve ini valvale aka aro i voth palolo nge avele, na aro ve o pun rin it, aro God i sung vel ponganga a it nge aka isivenga i oma i aka ini nir peti ponganga. Naro onir aro i voth ol nge aka aro ile vusonga avele ake ro a Pen a Urvet.

² Aveto ponange te mrela ol nge mimiong ake na te sis rintet ve aro te ela ol nir peti ponganga ake ro a Pen a Urvet.

³ Eneke aro ve te ela ol nir peti ponganga aken, aro onir aro i voth polpol ol avele

⁴ ake ru a ulue aka rongan te voth nge nir peti ulue anga, na nir plong matheong elnga, na nir plong ve aro te rin mo te mothonglelu nir peti, aveto te sis ve aro te ela nir peti ponganga aka ini Pen a Urvet anga mo aro ur aka ini ulue anga aro God i tepolal i nge ur aka aro ile vusonga avele.

⁵ Na ake ini a God aka i oma it venen aken mo aro i sung nir peti ponganga a it nge, na i sung Ioni Riringa a it nge lale, aken ini sungong aka i ritet ler nge ur aka panen aro te el i.

⁶ Mako ler lemioong i engeng, na lemir mire nge ve, aro ve te voth nge nir peti ulue anga, aken i ranga ve ini ler menaloinga na i vene aka te voth tomo nge a Toko Pomnga avele.

⁷ Na te um tomo nge lemioong a i nge, aveto te thopol i avele.

⁸ Na lemimem mire aka ve, ur areke them ri nge kene i nunganga, na them sis rintet ve aro them mothonglelu nimem peti ulue anga ake, mo them es mo them voth tomo nge a Toko Pomnga.

⁹ Na aro ve them voth nge nimem peti ulue anga, eve aro them voth tomo nge a God, evelelenga lomem vur nge vothung aka aro ilemi sivenga nge.

¹⁰ Eneke aro it alavusnga aro te mit nge riong a Krais itheki, naro i olal werer i a it nge, i pavurvur nge vothung areko te oma i ake ru a ulue, aka ranga ve ini vothung sivenga eve vothung aka ini ur polpolnga a itheki.

*Nomenga it na God ler ngarang pel,
aveto nge a Jisas ile rinong inga aka i
pavelilo werer it tomo nge a God.*

11 Na them ngeip ve aro them oma vothung kerenga, eneke lemimem mire ako ve, panen aro them mit nge riong a Toko Pomnga itheki, mako them ri engeng a tokokoere nge mo olemi ako ve, them ini toko le apalitetonga avele. Na God ilemi mire ako ve, ur alavusnga aka them oma i, i nunganga. Na lelik i engeng ve lomumu i el senu ur areken lale.

12 Na tho ri venen aken aka aro tho pasea sivengk nge avele, aveto tho sis ve aro thomu o pavurvur aka aro o olal werer riong nge areko o ri tuntun tho. Na tokokoe areko ini magoningare aka olemi engeng nge ur areko tokokoere o thopol i nge otheki, aveto olemi engeng nge toko ilemi avele.

13 Na aro ve omu pelie olemi ve, tho ini ngongong, eneke o ri ve tho betet inge panongpolong, tho oma venen aken mo aro tho paesa God iion roro. Na aro ve omu pelie olemi ve, tho oma omaing sivenga, tho oma venen aken aka aro ini lomu sivengainga.

14 Na Krais ile asaguong nge tokokoere i oma tho make tho velpol ini ile umonga, eneke lelik i engeng ve, Krais ile rinong i el tokokoere omei nge a God ile paomelaling nge ole vothung kerenga. Na God i tepolal toko alavusnga ole rinong nge ole vothung kerenga nge a Krais ile rinong.

15 Na Krais i rin leltun toko alavusnga mo aro areko o el mimiong ponganga aro o oma osivenga ole omaing avele, aveto aro o oma a Krais ile omaing aka i el omei nge ile rinong na God i palos werera mun i.

16 Na i patea nge nang aka lemiro nge a Jisas, te mothong tova te ri ve, toko ini toko sivenga eve ini toko kerenga nge ur aka te thopol i nge thekir. Nomenga te oma venen aken, na te ri ve Krais ini a God Itun avele, aveto ponange aro te oma ol venen aken avele.

17 I nunganga, aro ve toko aka ile lemioong i voth nge a Krais, aken i velpol ini toko ponganga. Na i panes vothung ulue anga avele, aveto i panes ol mimiong ponganga.

18 Na ake ini a God aka i oma ur alavusnga aken a it nge. Nomenga God ile ngarang aka ini it, aveto nge a Krais ile

rinong, ile lemi klingong nge it i vus. Na God i pake them mo aro them panongpol nge aka sovengalo i voth lale aka aro ole ngarangpeling aro i vus nge.

19 Eneke God i pakeu a Krais me mo aro i el tokokoere omei nge a God ile paomelaling nge ole vothung kerenga, make i pavurvur aro ile ngarang ol it avele. Na i pavurvur aro i paomelal ol or nge ole vothung kerenga aka o oma i, kene avele. Na i pake them mo aro them panongpol nge riong ake ranga ve aka nge a Krais ile omaing aro God i paomelal ol it avele ol.

20 Na them ini a Krais ile riong elngare, na i ranga ve aka God i ri ile riong ma i espot a womem, na them panongpol engeng tokokoere ve aro o mothong tova o voth ol ve or ini a God ile ngarang ol.

21 Na Krais i oma vothung kerenga e avele, aveto God i paomelal i nge ler vothung kerenga alavusnga, eneke i el meir nge ler vothung kerenga areken mo aro ve lemiro nge i, aro te velpol ini toko vengvenga a God itheki.

6

Jisas ile pakekere o el matheong pulua nge ole omaing.

1 Na them um tomo nge a God na them ri engeng a thomu nge ve, thomu o el a God ile themosaling lale, na ilemi simikal lomu vothung kerenga lale, na o mothong tova o lel kimomu nge i.

2 Eneke God ile erere i ri ve,
“Na tho ateal nang areko lale
ako aro tho opoal thomu nge,
mo aro tho el werer thomu nge.
Na nge nang aken,
tho nongpol lomu nongong,
mako tho opoal thomu lale.” *Ai-sia 49:8*

Na God i ri vene, na thomu o nongpol, ponange ol ake God i monsi lale aka aro i opoal ol tokokoere, na ponange mun ake aro i el werer tokokoere.

3 Na them oma vothung kerenga e avele aka aro tokokoere o thopol i mo o lel okime nge lemem omaing ake.

4 Aveto them pathengal tokokoere aka ve, them ini a God ile umonga sivengare

nge lemem mimiong alavusnga, nge ur areko rongan them potun i, ranga ve ini matheong na lemi kerereong na kerengangre,

⁵ na nge ur areko them el i, ako o so litlit them, na o paeso them a mang a midenga lemi, na toko volingare o vustuno them mo aro o pun rin them, na nge umong engengare ako them el senu nokolkolong nge avele, na them an senu avele.

⁶ Na ur alavusnga aka them oma i, i riri a God itheki, na lemem lemi rumong i sivenga, na them vol avele, na them oma omaing sivenga a tokokoere nge, na them panes inga Oni Riringa aka i mukalpo lemem, na emem sagu tokokoere,

⁷ na evelengla them ri nunganga, na God ile engenging i voth a them nge, na them oma vothung vengvenga mo aro them panongpol senu nge a God ile riong, naro them olal senu riong areko olemi otun them nge.

⁸ Na them oma inga venen aken tova ve o papomnga them eve oni silal them, na tova o ri sivenga nge them eve o ri kerenga nge them. Na lemem riong i nunganga, aveto toko pelie o rivenga lemem apaltet,

⁹ na tokokoe pelie olemi mire senu nge tho aka tho ini a Krais ile pakeke nunganga, aveto pelie o atekokol tho, na nge nang pulua them toth re aka aro them rin, aveto rongan them mimi, na tokokoere o paomelal them, aveto o pun rin them avele,

¹⁰ na tokokoere o nong sirik lek riong, mako lemik kerere nge, aveto evelengla lemik sivenga, eneke God i opoal tho, na them ini toko le ur avelengare, aveto them opoal tokokoere mo aro ole ur elonga pom ol aka ro a Pen a Urvet, na lemem ur elonga avele, aveto lemimem i vual nge ur alavusnga aka God i sungu i a them nge. Na them oma venen aken mo i pathengal tokokoere aka ve, them ini a God ile umonga sivengare.

¹¹ Na lek riong areke, aka tho wat i a thomu Korin angare nge, i nunganga, na tho thep opok lale nge thomu nge ur alavusnga aka i voth a lemik.

¹² Na ok sagu thomu lale, aveto omu

sagu mos tho avele.

¹³ Na tho ria thomu ranga ve aka thomu ini tutukre ve, aro thomu o thep mun opomu a tho nge, mo aro ar sagu werer ol pel.

Mothong tova paneo tomo nge areko ole mio nge a Krais avele.

¹⁴ Na thomu o mothong tova o kin lomu riong tomo nge areko ole mio nge a Jisas avele, eneke toko vengvenga na toko le vothung kerengare ole lemi rumong i vur e pel avele. Na tokokoe areko o es nge pen lalanga na mideng esngare o pavurvur aro o pathun tomo e pel avele.

¹⁵ Na Krais i pavurvur aro ilemi sivenga nge a Satan ile omaing e avele. Na toko lemioongare o pavurvur avele aro o paneo tomo nge tokokoe areko ole mio nge a Krais avele.

¹⁶ Na God i pavurvur aro isa womalo tokokoere mo o lotual avalare a ile lotuonga a vel, kene avele, na ranga ve mun i aka te pavurvur avele aro te paneo tomo nge tokokoe areko ole mio nge ole god aka ini God nunganga avele. Eneke it toko lemioongare it ranga ve ini a God ile lotuonga a vel, eneke Ioni Riringa i voth a lemir. Na i ranga ve aka God i ri nge ve, “Aro tho voth tomo nge or,

naro tho es tomo nge or,

naro tho velpol ini ole God,

naro or ini lek tokokoere.”

*Wok
Pris 26:12; Jeremaia 32:38; Es-
ekiel 37:27*

¹⁷ Mako aro thomu o panes a God ile riong aka ile erere i ri nge ve,
“Toko Pomnga i ri vene:

‘Thomu o lo lelpot nge areko ole mio a tho nge avele,

na thomu o naktet thomu nge ole vothung,

na o mothong tova o oma vet ole vothung,

na aro ve thomu o oma venen aken,,
aro tho elo thomu a tho nge.’”

Aisaia 52:11

¹⁸ Na God ile erere i ri mun ve,

“Aro tho velpol ini omu Vovo,

naro thomu o velpol ini tutukre.

Na Toko Pomnga aka i theal tetal toko alavusnga

i ri re venen aken." *2 Samuel 7:8,14*

7

¹ Na thomu areko ok sagu thomu, God i kin ile riong ve aro i oma ur areken i voth a ile erere nge, mako aro te mothong tova te oma na lemire rum ur areko i kerenga a God itheki, naro te betet inga nge vothung riringa omanga, eneke te papomnga a God naro te ngeip mun nge vothung kerenga omanga.

Pol ilemi sivenga rintet, eneke Korin angare o eksing ole mimiong.

² Naro thomu o thep opomu a tho nge, naro omu sagu tho, eneke tho oma vothung kerenga e avele a thomu nge, na tho pakerenga omu e ile menong avele, na lek apaltet omu e avele.

³ Na tho wat riong ake, ve aro tho lel nge riong, aveto lemik otun thomu nge avele, na i ranga ve ako tho ri lale ve, ok sagu rintet thomu, na aro ve tho mimi tomo nge thomu eve tho rin tomo nge thomu, ur e avele, lek asaguong rongan i voth a thomu nge.

⁴ Na lemik i engeng ako ve, omu sagu tho na thomu o papomnga tho. Na lemik sivenga rintet nge lomu omaing sivenga ako thomu o oma i, na lomu omaing sivenga areken i paengeng lemik nge lek omaing ako tho el matheong nge. Na lek lemi sivengaing i aolonga rintet.

Pol i rurum werer nge ile esong ako i kath a Taitus nge ako i modopu i nge a 2 Korin 2:13.

⁵ Na tho velpol a Masedonia, aveto matheong ako i voth a tho nge i vus avele, na pen elonga aka tho es nge tokokoere o sung matheong pulua a tho nge. Na toko pulua o pun tho nge riong pulua, na lemik uvuval nge lomu lemioong.

⁶ Aveto God aka i paengeng areko olemi kerere, i paengeng lemik nge a Taitus ile velpoling,

⁷ na nge ile velpoling inga avele, aveto ile riong i paengeng lemik aka tho nongpol ve, thomu o paengeng mun ilemi nge lomu riong. Na i ria tho ve, thomu o sis rintet ve aro o thopol tho, na i ria mun tho ve, lomumu esal nge tho nge lomu vothung

ako o oma i a tho nge, na i ria mun tho ve, thomu o engeng nge aka o mit kimek nge lek omaing. Na tho nongpol aken make lemik sivenga rintet.

⁸ Na lek malueng aka thomu o el i lale i palemi kerere thomu, na nomenga lemik kerere mun nge aka tho wat venen aken, aveto ponange lemik kerere ol nge avele, eneke lemik mire aka ve, lek malueng aken i palemi kerere thomu, aveto i voth palolo avele.

⁹ Na lek lemi sivengaing ake nge lomu lemi kerereong aken avele, aveto lemik sivenga, eneke lomu lemi kerereong aken i oma thomu ranga ve aka God i sis ve i velpol a thomu nge, mako kimomu lelalpot nge lomu vothung kerenga. Na lek malueng aken i pakerenga ol omu tie avele,

¹⁰ eneke aro ve toko e i panes a God ilemi, na ilemi kerere nunganga nge ile vothung kerenga na ikime lelalpot i, aken aro God i pamimi i, na i paomelal ol i avele. Na toko aken aro ilemi kerere ol avele. Aveto aro ve toko e i panes vothung ulue anga, na ilemi kerere nge ile vothung kerenga, aveto ikime lelalpot i avele, aken aro i el paomelaling panen.

¹¹ Aveto thomu o panes a God ilemi aka lomumu i kerere nge lomu vothung kerenga, na o thopol ur areko i pavelpol i a lomu mimiong, na i vene: Thomu o engeng ve tokokoere aro o modop ole vothung kerengare viri viri, na thomu o sis rintet ve, thomu o pathengal tho aka thomu o pavengveng ur aka tho wat i lale, na numu plong rintet nge toko aton i oma vothung kerenga, na thomu o ngeip nge aka God aro i paomelal thomu, na thomu o sis ve aro tho lo werer a thomu nge wot mo aro ler menong i senu werer, na thomu o monsi lale nge aka aro o paomelal toko aka i oma vothung kerenga. Na thomu o oma omaing alavusnga aken lale, aken i pathengal i aka ve, thomu o vtho ol nge vothung aken.

¹² Na tho wat a thomu nge lale, aveto lemik rum nge toko aka i oma vothung kerenga, kene avele, na lemik rum mun nge toko aken ru i oma vothung kerenga a i nge, kene avele, aveto tho wat a thomu

nge ve aro God i pathengal i a thomu nge, aka thomu o papomnga tho aka tho ini a Jisas ile pakeke.

¹³ Na lomu omaing alavusnga areken i paengeng lemik.

Na thomu inga o paengeng lemik avele, aveto lemik sivenga mun aka tho thopol a Taitus ile lemi sivengaing aka i el i a thomu nge, eneke thomu o palemi senu werer i nge lomu riong aka lomu asaguong nge tho i nunganga.

¹⁴ Nomenga tho ria Taitus ve, lemik sivenga rintet nge lomu omaing, lama Taitus i es la ma i thopol lomu omaing ranga ve aka tho ri tel i a i nge nomenga, na lek mara nge avele, mako lek lemi sivengaing a thomu nge aka tho ria Taitus nge, i velpol nunganga ranga ve aka lek riong alavusnga aka tho sungu i a thomu nge i nunganga.

¹⁵ Na Taitus ilemi rum werer lomu omaing aka thomu o papomnga i na o nongpoo i na thomu o nongal lek riong aka i sungu i a thomu nge, mako ile asaguong a thomu nge i esa esa ol.

¹⁶ Na lemik sivenga rintet, eneke lemik i engeng nge aka thomu o panes senu a God ile omaing.

Korin angare aro o monsi ole sungong aka aro i opoal toko lemioongare aka o voth a Jerusalem

8

(Vonge 8:1-9:15)

Pol i ri engeng ve aro Korin angare o monsi ole sungong viri viri.

¹ Na titeikre, tho sis ve aro tho ria thomu nge a God ile themosaling aka i sungu i a toko lemioongare nge aka a Masedonia.

² Na o el matheong aolonga, na or ini toko le ur avelengare, aveto God ile themosaling i voth a or nge, na olemi sivenga rintet, na olemi omoletet, ma o sung ole sungong ma i aolonga.

³⁻⁴ Na tho ria thomu, tho thopol ole omaing aka ole umtun aka o pavurvur aka aro o sung i, o sungu inga na o sung mun ole umtun epee aka aro i opoal or nge ole

mimiong, mako o oror ol nge umtun. Na nge olemi inga, mako o sung i venen aken. Na o nong engeng nge them ve aro semem wom mun or mo aro o supo mun nge toko lemioongare oopoalnga aka a Jerusalem.

⁵ Na ole omaing i aolonga nge ur areko lemimem ve aro o oma i. Na a mukaling tel o sungu osivenga nge omaing aka Toko Pomnga ilemi sivenga nge, lamako o sungu osivenga nge omaing aka lemimem sivenga mun nge, na nge vothung aken o panes inga a God ilemi.

⁶ Na nomenga Taitus i opoal thomu, ma thomu o patea nge lomu sungong paen velilonga, mako them ri engeng a i nge mo i lo werer a thomu nge wot, mo i opoal werer mun thomu mo thomu o pavus lomu omaing aka i patheng pat lomu themosaling a toko lemioongare nge aka o voth toth a Jerusalem.

⁷ Na lomu lemioong i engeng nge a Krais, na thomu o panongpol Panongpolong Sivenga, na lomumu mire nge a God ile riong nunganga, na thomu o sis rintet ve aro thomu o opoal tokokoere, na omu sagu rintet them. Na nge lomu omaing areken thomu o mukal nge toko lemioongare, naro lomu vur mo aro thomu o mukal nge toko lemioonga alavusnga nge lomu sungong sunga.

⁸ Na tho pakealal thomu avele, aveto tho thopol toko lemioongare aka a Masedonia na o engeng ve aro o opoal otiteinre aka o oror nge ur elonga, na nge aken tho sis ve aro tho tongporum lomu asaguong tomo nge ole asaguong aken.

⁹ Na lomumu mire nge a Toko Pomnga a Jisas Krais ile themosaling a it nge, aka nomenga, ur alavusnga aka ini ile, aveto i mothong lelu i mo aro i rin mo i opoal thomu, naro thomu o el ur sivesivenga aka God i sungu i a ilengare nge.

¹⁰ Na nge lek lemi rumong aro tho ritet nge ur aka i sivenga aka aro thomu o oma i. Na nge tovu po aka i vus lale, thomu tel aka o engeng ve aro thomu o sungu sungong a Jerusalem angare nge, na thomu tel o patea lomu sungong velilonga.

¹¹ Na aken aro thomu o pavus tel lomu sungong mo aro tokokoere o thopol aka

thomu o engeng nge ipavusnga ranga ve ako thomu o engeng nge ipateanga. Naro thomu o oma lomu sungong i pavurvur nge lomu ur elonga aka i voth.

¹² Na aro ve toko e i thep iopo na i sung imeni i pavurvur nge ile ur elonga aka i voth, God aro ilemi sivenga nge ile sungong aken, eneke toko i pavurvur avele aka aro i sung ur pelie aka i voth a i nge avele.

¹³ Na nik plong ve aro thomu o el math-eong tova ve o sungpot lomu ur elonga pulua mo i opoal areko o oror, aveto thosis ve aro tokokoe areko o el opoaling a thomu nge, aro o vur e pel tomo nge thomu.

¹⁴ Na nge wop lemi ake, lomu ur elonga pom na i pavurvur aka aro thomu o opoal areko o oror. Na panen aro ve thomu o oror, aro areko ole ur elonga i pom aro o pavurvur aka aro o opoal werer mun thomu. Aken i ranga ve aka thomu o oma titeinpeling aka aro thomu opoal pel epee epeenga.

¹⁵ Na i ranga ve aka God ile erere i ri nge na i ri ve,

“Areko o tho tomoal ‘Mana’ pom,
aken oa ‘Mana’ i pom avele.
Na areko o tho tomoal ‘Mana’ posal-
nga,
aken oa ‘Mana’ i posnga avele.” *Kisim
Bek 16:17-18*

Na God i sung Israelre oa aning aka o apet i ve ini “Mana” nge rulpounga nge nang omole omole. Na vel lemia omole omole o es mo aro o tho tomoal oa Mana i pavurvur nge lita or aini or aini. Na pelie o tho tomoal oa Mana pom na pelie o tho tomoal inga posalnga na o paen tomoal oa Mana alavusnga na o wea oa Mana omole omole ma i velpol vengveng nge lita or aini nge toko omole omole.

*Pol i pake toko or me a Korin angare nge
mo aro o opoal or nge ole sungong elnga na
o pasong mun ile malueng ake a or nge.*

¹⁶ Na tho ri sivengaing a God nge aka i pavurpol a Taitus iopo, na i engeng ve aro i opoal thomu ranga ve ini tho.

¹⁷ Na tho nin a Taitus ve aro i lo werer a thomu nge wot, na i nongal lek riong, aveto isivenga ilemi i engeng ve aro i es

a thomu nge, na ilemi sivenga rintet nge lo wererong mun a thomu nge wot.

¹⁸ Na tho pake tomo i nge toko lemioonga omole aka toko lemioongare ake a Masedonia o risea i nge ile omaing aka i panongpol nge Panongpolong Sivenga.

¹⁹ Na e mun e aka toko lemioonga areken o ateal i ve aro i supo tomo nge them nge lemem omaing aka aro them pasong sungong a Jerusalem angare nge. Na them oma omaing aken mo aro tokokoere o paesa God iion roro, naro i pathengal i aka ve, them engeng inga ve aro them opoal areko o oror.

²⁰ Na tokokoere o sung ole umtun pulua nge sungong aken o oma i, na nimem plong ve aro tokokoe pelie olemi otun them ve, them kem umtun pelie nge sun-gong aken, mako them wola toko pelie mo aro o supo tomo nge them.

²¹ Na them naktet inga lemem vothung mo aro i vengveng a God itheki tomo mun a tokokoere otheki.

²² Na toko lemioonga omole mun ake them pake mun i wot. Na toko aken i oma omaing puluanga aka i pathengal them nge ve, ilemi i engeng nge a God ile omaing omanga. Na ilemi i engeng rintet aka thomu o engeng mun aka aro o opoal areko o oror, mako i sis rintet ve aro i es a thomu nge wot.

²³ Na Taitus ini thengek aka i opoal tho nge lek omaing a thomu nge, na tho ateal i ve aro i es a thomu nge. Na toko lemioongare o ateal mun toko lemioonga or aini aton mo aro o es tomo nge i. Na tokokoere o thopol toko or aini aken ole vothung ma o risea a Krais nge.

²⁴ Na tova ve o velpol, aro thomu o sung lomu sungong a or nge. Naro toko lemioongare nge pen ake aro o nongpol nge lomu asaguong, na aken i pathengal i a or nge aka ve, ini lemem riseaing tepun a thomu nge.

9

*Pol i ria Korin angare mo aro o sung ole
sungong aka i opoal toko lemioongare aka
a Jerusalem.*

¹ Na i sivenga avele ako aro tho ri engeng nge thomu mo aro o opoal toko lemioongare ako a Jerusalem.

² Eneke lemik mire lale ako thomu o engeng ve aro o opoal or. Na tho risea thomu a Masedonia angare otheki. Na tho ria or nge ve, "Nge tovu po aka i vus lale, Korin angare aka a epee a Akaia, o monsi ol ole sungong sunga." Na lomu monsiong i pavurpol toko pulua oopo lemi mo o sung mun ole sungong.

³ Aveto tho pasong toko lemioonga or me aken a thomu nge mo aro o opoal thomu nge lomu sungong pavelilonga. Na nik plong ve aro lek riseaing nge thomu aro i velpol ini riong polpolnga, aveto tho sis ve aro thomu o monsi lomu sungong ranga ve aka tho ria thomu nge lale.

⁴ Na tho ria toko alavusnga aka thomu o monsi lomu sungong lale, aveto aro ve tho velpol tomo nge Masedonia anga pelie na nik plong ve aro o thopol thomu aka o monsi rongan, aro vene mo lemem mara nge lemem riong aka them ri lale na thomu mun aro lomu mara rintet mun nge.

⁵ Na lemik i venen aken, mako tho pake tel titeik or me aken mo o mukal tel a thomu nge wot mo aro o opoal thomu nge lomu sungong pavelilonga aka thomu o kin lomu riong nge lale. Na aro ve them velpol, aro tokokoere o thopol thomu aka olemi sivenga nge lomu sungong sunga na ini aka them pakealal thomu nge avele.

Pol i ri ve toko aka i sung ile sungong i ranga ve ini toko aka i o ur elonga a ia ometa.

⁶ Na lomumu rum senu tel nge lek riong ake. Na toko oinga aka i o ur posalnga aro i el mun aning posalnga, aveto toko oinga aka i o ur pom, aro i el mun aning puluanga. Na i ranga ve mun nge toko aka ile sungong i posnga aro God i olal werer i nge ur posalnga, aveto toko aka ile sungong i aolonga aro God i olal werer i nge ur puluanga.

⁷ Na toko omole omole aro olemi rum senu tel nge ur or pov ako aro o sung i, lamo aro o sungu ol i, na aro ve toko e ini plong nge ile sungong sunga, i mothong tova i sungu i, na aro ve tokokoere o ovulal

i ve, aro i oma ile sungong aken, aro i mothong, eneke God ia sagu inga areko olemi sivenga ma o oma ole sungong.

⁸ Na aro ve thomu o sung sungong aolonga nge areko o oror, aken aro God i sung mun sungong aolonga a thomu nge, mo aro evelelnga ur areko thomu o el i, i aolonga nge ur areko i pavurvur nge lomu mimiong, na aken thomu o pavurvur aka aro o oma omaing sivenga pulua aka aro i opoal tokokoere.

⁹ Ranga ve aka God ile erere i ri nge ve, "Na toko aka i sung sung ile sungong a toko le ur avelengare nge.

God aro ilemi simikal ile vothung sivenga areken avele,
naro ile vusonga avele." *Buk Song 112:9*

¹⁰ Na God i sung ur oinga nge toko oinga, na i sung aning nge areko o oror nge aning, mako aro i sung mun ur elonga a thomu nge mo aro thomu o oma lomu vothung sivenga aka aro i opoal tokokoere.

¹¹ Na nge nang elonga God aro i sung ur elonga pom a thomu nge mo aro nge nang elonga aro thomu o opoal mun tokokoere. Naro them pasong lomu sungong ake a tokokoere nge mo aro o ri sivengaing a God nge, nge lomu sungong aken.

¹² Na lomu opoaling nge tokokoere venen aken aro i pavual a God ile tokokoere nge ur areko o oror nge, na e mun e aka tokokoe pulua aro o risea rintet a God nge lomu opoaling aken.

¹³ Na lomu omaing aken aro i pathengal tokokoere aka ve, omu sagu a God, na o panes ile mire, naro tokokoere o risea God, eneke thomu o pamilem aka lomumuo nge a Jisas ile Panongpolong Sivenga, na e mun e aka thomu o oma nunganga ur aka lomumuo nge. Naro o risea a God mun nge lomu sungong aka thomu o thomre lomu umtun na o sungu ol i a or nge, na nge tokokoe pelie munre.

¹⁴ Naro oa thangaroong i voth a thomu nge, naro o nong a God nge mo aro i oma senu nge thomu, eneke God ile themosaling i voth a thomu nge, na lomu themosaling i es a or nge.

¹⁵ Naro te ri sivengaing a God nge, nge Itun ako ini ile sungong a it nge, aka i aolonga rintet, na i pavurvur aro te paton-grum i nge ur e avele. Na te ri sivengaing a God nge, nge ile sungong aken.

Toko pelie o ri pelekpol nge a Pol, na aken i papelekpol Korin angare olemi, mako Pol i pavengveng werer olemi

10

(Vonge 10:1-13:14)

*Pol i oma ile lelong aka ve, ini a Jisas ile
pakeke nunganga.*

¹ Tho a Pol, tho sis aka ve, tho panes a Krais ile vothung, mako tho paruru tho na tho ri mosnga a thomu nge. Na toko pelie a thomu nge olemi otun tho ve, aro ve tho voth tomo nge thomu, aro tho ri riong mosnga a thomu nge, na aro ve tho voth melanga nge thomu, aro tho wat riong engenga a thomu nge.

² Na tho nong thomu ve aro thomu o lel kimomu nge tokokoe areken mo aro ve tho velpol a thomu nge, aro tho mothong tova tho oma riong engenga a thomu nge. Aveto aro tho oma riong engenga nge areko olemi otun tho ve, tho eksingu eksinga lek vothung ranga ve ini tokokoe areko o panes vothung ulue anga.

³ Na i nunganga, them ini toko ulue angare, aveto them pun pel nge riong tomo nge areko olemi otun them ranga ve aka toko ulue angare o oma i, kene avele.

⁴ Na them pun pel nge riong tomo nge areko or ini a God ile ngarangre, aveto them pun pel aka ranga ve toko ulue angare o oma i, kene avele. Aveto God i paengeng lemlem riong, mo aro i pavus ole mit engengeng nge ole riong le apaltetonga areken.

⁵ Na lemlem riong ile mong tokokoe areko o risea osivenga nge ole riong aka i mitrup areko o ri ve aro olemi mire senu nge a God. Na them eksing ole lemi rumong alavusnga mo aro o panes inga a Krais ile.

⁶ Panen aro ve thomu pulua o panes senu a Krais tomo nge ile pakekere, aro tho velpol mo aro tho paomelal areko rongan o nong sirik a Krais ile riong.

⁷ Thomu o thopol senu nge ur areko i velpol a thomu nge. Toko pelie a thomu nge o ri engeng ve, Krais i ateal or na o ri ve tho avele. Na tokokoe areke aro o ate senu aka Krais i ateal tho ranga ve ini or.

⁸ Na lek mara avele aka nge nang pulua tho risea engengeng aka Toko Pomnga i sungu i a tho nge, eneke tho oma venen aken mo aro tho opoal lomu lemioong mo i motu, na tho ri ve aro tho pamatu lomu lemioong avele.

⁹ Na nik plong ve aro tho ri pompom nge lek engengeng, eneke nik plong ve aro tho pangeip thomu nge lek maluengre aka tho wat i a thomu nge wot.

¹⁰ Eneke toko pelie o ri ve, “Pol ile maluengre o mathe na o pun oopo, aveto nge ile velpoling a it nge kene i velpol ranga ve ini toko vulutnga na ile panongpolong i velvel vet avele.”

¹¹ Na tokokoe areko o ri venen aken aro oleli mire senu aka ve, nge lek velpoling a thomu nge lek riong aro i engeng ranga ve ini lek riong aka tho wat i a lek malueng leli aka tho voth melanga nge thomu na tho wat i.

¹² Na tokokoe areko oleli otun tho o risea osivenga oion, eneke o patongrum ole mimiong tomo nge a God ile riong avele, osivenga o ateal wop aka aro ole mimiong sivenga i mulalngau nge, aken o oma ranga ve ini ngongong. Na tho kene tho patongrum lek mimiong ranga ve ini or avele.

¹³ Na God i rongu nek nge ulue epee aka aro tho um nge. Na nik plong ve aro tho risea tho nge wop aka i voth a lalanga nge wop aka lek omaing i mulalngau nge. Aveto aro tho risea tho nge lek omaing nge ulue epee aka God i sungu i a tho nge, na thomu mun o voth a leli.

¹⁴ Na tokokoe areko oleli otun tho o ri ve, tho risea tho nge lek omaing nge wop aka God i sungu i a tho nge avele, naro ole riong i nunganga tova ve tho es tel a thomu nge avele, aveto tho panongpolong nge a Krais ile Panongpolong Sivenga ma i mulal tel a thomu nge lale.

¹⁵ Na tokokoe areko olemi otun tho o panongpol tel nge thomu avele, aveto o nea osivenga nge lek omaing a thomu nge. Aveto tho oma venen aken avele, aveto ini tho ako tho panongpol tel nge thomu, na i sivenga aka aro tho risea tho nge lek omaing a thomu nge. Na lemik i engeng aka ve, lomu lemioong aro i esa esa, naro lek omaing a thomu nge aro i velpol mo i aolonga, naro i mulalnga inga nge wop aka God i rongu i ve aro i mulalu nge.

¹⁶ Na aro ve i venen aken, aro thomu o opoal tho mo aro tho panongpol nge Panongpolong Sivenga nge rem aka i voth gat nge thomu aka toko e i panongpol nge rongan, eneke nik plong ve aro tho nea sivengek nge toko relnga ile omaing ranga ve aka toko pelie o oma i.

¹⁷ Aveto tho risea tho nge lek omaing aka ranga ve God ile erere i ri nge. Na i ri ve, "Aro ve toko e ilemi ve i risea nge ur e,

aro i risea nge ur aka Toko Pomnga i oma i."

Jeremaia 9:24

¹⁸ Na thomu o mothong tova o papomnga tokokoe areko o risea osivenga nge ole omaing, aveto thomu o papomnga tokokoe areko Toko Pomnga i risea or.

11

Pakeke le apaltetongare o voth a Korin na Pol i ngeip ve aro o paleklek Korin angare ole lemioong nge a Jisas, mako i sung riong engenga a or nge.

¹ Tho sis ve aro somu wompot tel tho mo aro tho wat ri posililaling tie aka ranga ve tho risea sivengek nge lek omaing, aveto i ranga ve aka thomu o nongpol i lale.

² God i engeng ve aro tokokoere o panes inga aka ini ienga, na tho mun lemik i engeng ve aro thomu o panes inga a Krais, na i ranga ve aka Krais i sungtun thomu a tho nge mo aro tho theal senu thomu mo o voth riringa i pavurvur nge nang aka aro thomu o es a i nge.

³ Aveto tho ngeip nge toko le apaltetongare aka aro o paleklek thomu ranga ve aka nomenga Satan i paleklek a Iv nge ile riong le apaltetonga, aro vene mo thomu o panes senu ol a Krais ile riong avele, naro

thomu o velpol toko riringa a Krais itheki avele.

⁴ Tho ri vene ake, eneke toko pelie aka o es a thomu nge, na o panongpol thomu nge a Jisas, aveto ole apaltet thomu, eneke ole panongpolong i rel rintet nge panongpolong aka tho sungu i a thomu nge. Na o ri ve aro thomu o el oniong aka i rel rintet nge Oni Riringa aka thomu o el i lale. Na o panongpol nge riong aka o apet i ve ini "panongpolong sivenga" aveto i rel rintet nge a Jisas ile Panongpolong Sivenga aka thomu o el i a tho nge lale. Na lomumu sivenga inga nge ole riong alavusnga elnga.

⁵ Na i sivenga aka aro thomu o el lek riong, eneke lemik i engeng ve tokokoe areko thomu o apet or ve ini pakeke pomngare kene o mukal nge tho avele.

⁶ Na tho ini toko aka tho sivenga mos nge leng lenging avele, aveto lek mire i aolonga nge a God ile riong, na nge lek omaing alavusnga i pathengal i a thomu nge aka lek mire i aolonga.

Pakeke le apaltetongare aka a Korin o ri ve Pol ile panongpolong i sivenga avele, eneke i el umtun nge ile omaing avele, aveto Pol i ri ve i oma venen aken, eneke ia sagu rintet or.*

⁷ Na tho panongpol thomu nge a God ile Panongpolong Sivenga na tho el umtun nge avele. Na tokokoe areko olemi otun tho o ri ve, tho oma vothung kerenga nge vothung aken. Aveto tho paruru tho na tho um nge lek engenging mo tho el umtun nge, mo aro tho opoal thomu.

⁸ Na tokokoe pelie o ri ve, tho el polpol umtun nge toko lemioongare aka nge rem relngare, eneke o sung polpol umtun a tho nge na o sis ve aro tho oma lek omaing aka i opoal thomu.

⁹ Na nge wop lemi aka tho voth tomo nge thomu Korin angare, tho sung matheong a omu e nge avele, aka tho nong umtun a omu e nge mo tho ol ur areko tho oror nge. Eneke toko lemioongare aka a epee a Masedonia o pake tokokoe pelie mo aro o pasong ole sungong a tho nge mo aro o

* **11:6:** RP Nomenga toko powe ninengare ole vothung i vene: Aro ve o panongpol nge riong aro o el umtun nge.

opoal tho nge ur areko tho oror nge. Na tho sung matheong a omu e nge rongan, naro tho mit engeng inga nge lek vothung aken.

¹⁰ Na Krais ile riong i nunganga, na lek riong i nunganga vene mun aken. Aro tho el polpol umtun a toko e nge avele ako a lomu epee a Akaia. Naro toko e avele aro i pavurvur aro i mit roal tho nge lek riseaing nge lek omaing aken.

¹¹ Na ava lomumu ve tho oma vene ake, eneke ok sagu thomu avele, e? Avele, God ilemi mire ako ve, ok sagu rintet thomu.

¹² Aro tho panes inga lek vothung aken, ako aro tho ela umtun a thomu nge avele, eneke nik plong ve aro toko le apaltetonga areken aro o thopolo ole riong tepun sivenga e ako aro o mit nge na o risea osivenga ve, "Lemem omaing i vur e pel."

¹³ Eneke tokokoe areken or ini pakeke le apaltetongare. Na o ri ve o oma a God ile omaing, aveto ole apaltet, na o nea or nge ve or ini a Krais ile pakeke, aveto ole apaltet.

¹⁴ Na tho kukuk nge ole omaing avele, eneke Satan mun isivenga i nea mun i a tokokoere nge ako ve, ini a God ile ensel.

¹⁵ Na tokokoe areken ru o voth a thomu nge kene or ini a Satan ile omaingare, ako o nea osivenga ako ve, or ini a God ako i vengveng ile omaingare. Na panen aro o el paomelaling ako i pavurvur nge ole omaing areken.

Toko le apaltetongare o ri ololo Korin angare ve, Pol ini a God ile pakeke nunganga avele, aveto Pol lela nge.

¹⁶ Na tho ria mun ve, aro tho oma tel ri posililaling tie, aveto thomu o mothong tova lomumu ve, tho ini toko ngongong. Aveto aro ve omu pelie lomumu ve tho ini ngongong, aro thomu o nongal mun lek riong, ranga ve ako thomu o nongal toko le apaltetongare ole riong, ako o ri ranga ve ini ngongong, naro tho risea mun sivengek ranga ve ini or.

¹⁷ Nge lek riong ako aro tho risea sivengek nge aro lek riong i ranga ve ini Toko Pomnga ile riong avele, aveto aro i ranga ve ini toko ngongong ile riong.

¹⁸ Na toko pulua a thomu nge o panes vothung ulue anga na o risea osivenga, mako aro tho panes mun ole vothung mo aro tho risea sivengek.

¹⁹ Na lomumu sivenga inga nge toko ngongongre ole riong nongpolngga. Ava thomu o rivenga thomu ini toko powe ninengare, e?

²⁰ I vene ke, aro ve tokokoere o oma thomu ranga ve ako thomu ini ole um polpolongare, eve o pavus polpol lomu ur elonga, eve o pun ongomu, eve o oma thomu ranga ve ako or ini toko kimanga naro o palemara thomu, aveto somu wom inga or na o nongal inga ole riong.

²¹ Ava thomu o rivenga tho ini toko lolingga, mako tho oma venen aken avele, e? Na i vova ako thomu o rivenga lek maral nge ur aken omanga, e? Avele ako, tho oma venen aken avele.

Na pakeke le apaltetongare o risea osivenga nge ole omaing, naro tho panes ole vothung ako ranga ve ini toko ngongong, naro tho risea sivengek nge lek omaing.

²² O ri ve or ini Judare na o ri oa pompomere okei, na tho vene mun aken. O ri ve or ini Israelre, na tho vene mun aken. O ri ve or ini a Abraham ititeviere, na tho vene mun aken.

²³ O ri ve or ini a Krais ile omaingare, aveto lek omaing nge a Krais i mukal nge or. Na lomu riong inga i oma tho make tho wat riong ake ranga ve ini toko ako ile mire avele. Lek omaing ako tho oma i, i aolo leltun ole omaing. Na tokokoere o paeso tho a mang a midenga papulua, eneke lek lemioong i engeng nge a Krais, aveto or kene avele. Na tokokoere o siso tho viringa, aveto or kene avele. Na nang pulua toth re ako aro tho rin, eneke tho oma a Krais ile omaing.

²⁴ Pa or lim aka Judare ole mukalingare o sung paomelaling a tho nge, eneke oni plong nge lek omaing, na o so litlit tho pa or mule pa me pothoi or limpenel nge nang omole omole aken.

²⁵ Pa or me aka Rom a punongare o val tho nge won. Na nge nang omole aka tokokoe areko olemi klingtun tho o luvalal tho nge umre ma pa omole re aka aro tho rin. Na pa or me imot areko tho ro nge o

methipthep a thev stha na nge nang omole nge nang or me aken tho monror tomo nge imot methipthepnga epee na tho voth a thev stha i pavurvur nge pemliknga na eranga omole.

²⁶ Na nge lek esong pulua, i toth ako aro tho el kerengaing nge thei apolnga, na nge toko kemongare, na nge lekngare ako ini Judare, na nge tokokoe areko or ini Judare avele. Na nge nang pulua mun i toth ako aro tho el kerengaing nge ako tho voth a rem pomnga, na nge ako tho voth gat, na nge ako tho mon nge imot a thev stha. Na i toth mun aka aro tho el kerengaing nge tokokoe areko o ri ve or ini toko lemioongare aka o panes a Jisas, aveto ole apaltet.

²⁷ Na nge nang pulua tho um engeng nge menik mo aro tho el umtun nge, na tho el senu nokolkolong nge avele, na nge nang pelie tho el senu aning na thei avele, na nge nang pulua mun tho an avele, eneke tho mostun inga aka ini lek omaing. Na nge nang pelie nik peti i meririr, eneke lek tekruk pom avele.

²⁸ Na tomo mun nge matheong areken, nge nang elonga tho el matheong mun, eneke lemik i voth nge toko lemioonga alavusnga, aro vene mo ole lemioong i matu.

²⁹ Aro ve toko e ile lemioong i engeng mos avele, aro lemik esal nge i, na aro ve toko e i paleklek toko lemioonga e nge vothung kerenga, aro lemik klingtun ir.

³⁰ Aro ve thomu o engeng ve aro tho risea sivengek, aro tho ri nge ur areko tokokoere o paruru tho nge.

³¹ Na God aka ini a Jisas Krais ia Vovo aka aro te risea i evelelnga, ilemi mire nge ur alavusnga ake tho ri nge, ve i nunganga.

³² Na toko pelie o paruru tho nge aka tho tholel matheong aka i velpoltun tho a Damaskus. Na toko omole aka i voth a nepes a Aretas isa thewo ini gavana aka i theal total rem pomnga a Damaskus na i sis ve aro i rere tho, mako i pake ile punongare mo aro o mit total rem pomnga a lok aka ini um ithekia elonga.

³³ Aveto thengenekre o inou tho a alal aolonga lemi na o pablokpot tho a lok thetitipotnga ma o pamonlol tho a ulue

la. Na nge sovengalo re inga ake, mako tho lo a imeni.

12

Pol i ritet nge ur aka i ranga ve ini oni theong aka i velpola i nge nomenga.

¹ Ava lomumu ve aro tho risea sivengek nge ur pelie mun e, aveto lemik ve aro i opoal ur e avele. Aveto aro tho ri nge ur areko Toko Pomnga inga i pathengal i a tho nge, na nge ur areko i pavelpol ninenga a tho nge mo lemik mire nge.

² Lemik mire nge toko aka ini a Krais ile, aka nomenga nge tovu po or mule pa omole pothoi or penel, Toko Pomnga i ela toko aken roro rintet aka a ile Pen a Urvet la. Lemik mire nge avele, ava ini peti i esa la eve ini ion, aveto God inga ilemi mire nge.

³⁻⁴ Na lemik mire aka Toko Pomnga i ela toko aken aka ro la a toko vengvengare ole vothinga. Na i nongpol ur areko God i mit roal i ve i mothong tova i ria tokokoere nge.

⁵ Na ur areken tho ri nge, kene i velpol vengveng a tho nge, naro tho risea nge ur areko i velpoltun tho, aveto i pavurvur aro tho risea sivengek nge avele. Aro tho risea inga tho nge ur areko tokokoere o paruru tho nge.

⁶ Aveto aro ve tho risea sivengek nge ur areken God i pathengal i a tho nge, aro tho oma ranga ve ini toko ngongong avele, eneke aro tho ri riong aka i nunganga. Aveto aro tho risea sivengek nge ur areken avele, eneke nik plong ve aro thomu o papomnga tho nge ur areko God i pathengal i a tho nge, aveto tho sis ve aro thomu o papomnga tho nge ur areko tho oma i na tho ri nge.

Ni peti sisong i voth a Pol nge na i paruru i mo aro tokokoere o thopol a God ile engenging a i nge.

⁷ Na God i pathengal ur sivesivengare a tho nge, aveto ini plong ve aro tho risea sivengek iok nge ur areken, mako i sung ni peti sisong a tho nge, na i sis ranga ve ini tuok wowonga aka i o nik peti. Na i ranga ve ini a Satan ile umonga aka i paomelal tho.

⁸ Na tho nong engeng pa or me a Toko Pomnga nge mo aro i eltetpot ni peti sisisong aken a tho nge.

⁹ Aveto i ria tho nge ve, “Aro avele, lek themosaling ako i voth tomo nge wong aro i opoal wong. Eneke lek engenging i pavurvur aka aro i opoal senu wong tova wong engeng avele.” Mako aro lemik sivenga rintet nge, na tho risea nge ur areko i velpol a tho nge, na nge lek engenging avele, eneke tho sis ve aro tokokoere o ate aka ve, Krais ile engenging i voth a tho nge.

¹⁰ Aro ve tho engeng avele, eve tokokoere oni silal tho, eve o sung matheong a tho nge, eve o sung kerengaing a tho nge, na eve ur klipnga pelie i velpoltun tho, eneke tho oma a Krais ile omaing, ur e avele, eneke God i paengeng tho tova matheong areken i velpoltun tho.

Pol i ritet nge ile asaguong nge toko lemioongare aka a Korin.

¹¹ Lek riong aka tho ri lale i ranga ve ini toko ngongong, aveto thomu inga aka o oma tho mo tho ri venen aken. Eneke nomenga thomu o ri riong sivenga a tokokoe areko thomu o apet or ve ini pakeke pomngare, aveto ole omaing e avele i mukal nge tho, na i sivenga tova ve thomu o ri riong sivenga a tho nge, aveto avele. Na i nunganga, tho ini toko polpolnga tova ve God i opoal tho avele.

¹² Na i vava aka thomu o ri riong sivenga a tho nge avele, e? Eneke tho oma ur areko i pathengal thomu ve, tho ini a Jisas ile pakeke nunganga aka ranga ve nge pakukukaling na pathepolong na ur rel relnga aka i pathengal thomu nge a God ile engenging. Na tokokoere o sung matheong a tho nge, aveto tho engeng inga nge omaing areken omanga.

¹³ Na tho oma lek omaing a thomu nge ranga ve aka tho oma i a toko lemioonga alavusngare nge, aveto ur inga omole aka tho sung matheong a thomu nge avele, aka thomu o ol tho avele. Ake ava tho oma vothung kerenga a thomu nge? Na i vova ake lomumu i venen aken, e? Aro ve lomumu i vene re aken, tho nong thomu ve

aro lomumu simikal lek vothung kerenga aken.

¹⁴ Na tho monsi lale ve aro tho porum thomu pa or menga ol, na nik plong ve aro thomu o ol tho, eneke tho sis inga aka aro omu sagu tho, na nik plong nge lomu ur elonga areken elnga, na lek vothung aken i vengveng, eneke thomu o ranga ve ini tutukre, eneke tho opoal thomu aka thomu o el mimiong ponganga. Na i sivenga avele aka aro toko e itutunre aro o paen tomoal ole umtun mo aro o opoal otema nge, aveto i sivenga aka aro otema inga aro i paen tomoal ile umtun mo aro i opoal itutunre nge.

¹⁵ Aken aro lemik sivenga rintet aka aro tho opoal thomu tutukre nge lek ur elonga alavusnga, naro tho sung lek engenging alavusnga mun mo aro i opoal thomu. Na aro ve ok sagu rintet thomu venen aken, na i vova ake omu sagu rintet tho avele, e?

¹⁶ Na tokokoe areko olemi otun tho na o ri ve, “I nunganga, Pol i sung matheong nge umtun elnga a thomu nge avele, aveto i pamolomolo thomu na ile apaltet thomu ma i el lomu umtun.”

¹⁷ Na lomumu mire senu mun aka nomenga tokokoere aka tho pake or a thomu nge, o el polpol umtun a thomu nge avele.

¹⁸ Na tho ri engeng a Taitus nge mo aro i es a thomu nge, na tho pake tomo i nge titeir aton. Na Taitus i el polpol lomu umtun mo aro i sungu i a tho nge, kene avele. Na them paini them oma mun vene re aken, na them panes inga vothung omole inga aka them el umtun a thomu nge avele.

¹⁹ Na ava lomumu ve, nge lek malueng ake tho wat inga mo tho leltet tho nge, e? Avele. God ilemi mire aka lek riong alavusnga i nunganga, na tho ri ranga ve aka tho ini a Krais ile umonga. Na tho ria thomu titeikre, ok sagu thomu, na lek omaing alavusnga aka tho oma i ini aka aro thomu o mit engeng nge lomu lemioong nge a Krais.

²⁰ Na tho ri venen aken, eneke nik plong ve aro tho velpol a thomu nge tova lomu vothung i vengveng rongan, aro vene mo

numu plong nge lek riong engenga ako aro tho sungu i a thomu nge. Na tho ngeip, aro vene mo tho thopol volpeling, na muspeling, na lemi klingong, na pamumutaling, na voltetong, na ri ngunngunong, na magnoning, na telnga plaing ako i voth a thomu nge.

21 Na tho ngeip nge porumtetngomu, eneke aro ve thomu o modop lomu vothung kerenga rongan, aro God i palemara tho a thekumu, naro lemk kerere nge tokokoe areko nomenga o oma vothung kerenga na rongan o kis inga ole vothung kerenga omanga, na o modop vet i rongan, ranga ve aka nge vothung aka nge toko na seng aomnga, na ngo tomoing nge toko na seng rel relngare, na theki le roroing, na ole mara nge ole vothung kerenga areken omanga avele.

13

Pol i pator engeng Korin angare mo aro o modop ole vothung kerenga.

1 Ake ini lek esong pa menga ol a thomu nge. Na God ile erere i vene,

“Aro ve toko or aini eve or me

o ritet nge toko e ile vothung kerenga aka o thopol i,

aken i pavurvur aro o paomelal toko aken nge.” *Lo 19:15*

2 Na tho tor lomu nge lomu vothung kerenga lale nge lek porumtetong aininga a thomu nge nomenga. Na rongan tho voth mela nge thomu, na tho tor lomu paininga nge lek malueng ake. Na nge lek lo wererong a thomu nge, aro tho paomelal areko o oma ole vothung kerenga nomenga vet aka me, tomo nge areko o patea ole vothung kerenga a sapat lemi, na rongan o oma inga ole vothung kerenga areken.

3 Na lek vothung aken aro i pathengal i a thomu nge aka tho ri ake ini a Krais ile riong, na tho ini ile pakeke. Na Krais ile opoaling a thomu nge i mengmeng avele, na ile engenging i voth a thomu nge.

4 Na i nunganga aka, o pamona a Krais a won ngoronga nge ranga ve ini toko aka ile engenging ol avele, aveto ponange i ake ru i mimi ol, eneke God ile engenging i

oma i ma i mimi werera. Na tho mun tho oma Krais ile omaing ranga ve aka lek engenging avele, aveto God ile engenging aro i oma tho mo aro tho paomelal thomu.

5 Na thomu o thopol senu vet lomu mimiong, na o tongporum vet sivengomu tova ve lomu lemioong i nunganga nge a Jisas Krais eve avele. Na aro ve lomumu mire aka ve, Jisas Krais i voth a opomu lemi, aken moro lomu lemioong i voth a i nge, aveto aro ve Jisas Krais i voth a opomu lemi avele, aken lomu lemioong i voth a i nge avele.

6 Na lemk i engeng aka, aro ve thomu o avrum vet lek vothung, aro lomumu mire aka, Jisas i ateal tho ve ini ile pakeke nunganga aka a thomu nge.

7 Na tho nong a God nge aka aro thomu o oma vothung kerenga e avele. Na nik plong ve aro tokokoere o thopol tho aka tho paomelal thomu nge lomu vothung kerenga mo aro oleli mire aka tho ini lomu pakeke nunganga. Aro ve o thopol tho venen aken avele, na oleli mire aka tho ini lomu pakeke nunganga avele, ur e avele, aveto tho sis inga ve aro thomu o oma vothung vengvenga.

8 Na aro ve thomu o oma vothung vengvenga aro tho pavurvur aro tho paomelal thomu avele, eneke tho pavurvur inga aka aro tho paomelal areko o oma vothung kerenga. Na lek omaing inga aka aro tho opoal tokokoere mo aro o nongal a God ile riong nunganga.

9 Na lemk sivenga nge aka tova thomu o mit engeng nge lomu lemioong nge a Krais, na aro ve i venen aken, aro tho pathengal ol lek engenging aka aro tho paomelal thomu nge, kene avele, na aro ve tokokoe pelie oleli ve lek engenging avele, ur mun e avele. Na lek nongong nge a God i vene: Aro i opoal thomu mo lomu lemioong i engeng rintet.

10 Na tho voth mela nge thomu, make tho wat ur areken, eneke tho sis ve aro thomu o oma vothung vengvenga, mo aro nge lek velpoling a thomu nge, aro tho paomelal thomu avele, nge engenging aka Toko Pomnga i sungu i a tho nge. Na Toko Pomnga i sung ile engenging a tho nge mo aro tho paengeng lomu lemioong, na

ini ako aro tho pakerenga lomu lemioong
avele.

*Pol i pavus ile malueng watnga na i
paioal ol Korin angare.*

¹¹ Na titeikre thomu o nak ol i. Na thomu o pavengveng lomu mimiong, na lomumu inga omole, na o panes lek riong areke, naro thomu o naktet lomu menong. Naro God i sung ile asaguong na ile lemi moring a thomu nge naro i oma senu nge thomu.

¹² Aro ve thomu o thopolo toko lemioon-gare, aro o pathengal i a or nge ako ve, God ile asaguong i voth a lomu mimiong.

¹³ Na toko lemioonga alavusngare a pen ake o pasungalu ole nang sivenga a thomu nge.

¹⁴ Na tho sis ve aro Toko Pomnga a Jisas Krais ile themosaling na God ile asaguong aro i voth tomo nge thomu, naro Oni Riringa i Pavelilo thomu mo titeinpeling a vothung i vual a thomu nge.

Na i re aken. I vus.

Pol ile malueng ako i wat i a toko lemioongare nge ako o voth a epee a Galesia Galesia Ritetong nge a Galesia

Toko pelie ako a rumremre ako a epee a Galesia o velpol tel ini toko lemioongare nge ako o nongpol Panongpolong Sivenga aka Pol i panongpol nge. Toko pelie olemi ve i oma omaing aken nge ile esong tel-telnga, na toko pelie olemi ve, i oma i nge ile esong aininga. Na tokokoe areken o voth a epee a Galesia or ini Judare. Ave o panes a Moses ile patorong avele. O nongpol Panongpolong Sivenga mako olelio nge a Jisas ma God i pamimi or. Aveto palolo avele nge ako Pol i los lelpot or, nako pamirealonga le apaltetongare o velpoltun toko lemioonga Galesia angare ma ole apaltet or ve, "Aro ve toko e ilemio nge a Jisas inga, i pavurvur avele ako aro i el mimiong aka aro ile vusonga avele, aveto aro i panes mun a Moses ile patorong, naro i el mun paatealing aka ini toko ini peti isnga mo i velpol ini a God ile toko." Ma Pol i nongpol aka ve patoraling aken i velpoltun or ma ilemi kling rintet nge, ma i kukuk nge Galesia angare aka o ta otelnga nge patoraling aka i rel rintet nge Panongpolong Sivenga aka Pol i panongpol or nge ma o elo i a oleli. (1:6-9) Mako Pol i wat malueng ake a or nge mo i pathengal or ve, Panongpolong Sivenga aken ienga i pavurvur aro i pamimi or. Pol i pathengal or ve, ile panongpolong aken i nunganga, eneke God isivenga i ateal i mo i velpol ini ile pakeke, ma i sung mun panongpolong aken a i nge. (1:11-2:10) Na ur aolonga aka i voth a Panongpolong Sivenga lemi, na i voth mun a malueng ake lemi i vene: Toko i velpol ini toko vengvenga a God itheki, aka nge ile lemioong inga nge a Krais, na nge a Moses ile patorong panesnga, eve nge vothung sivenga omanga, kene avele. (2:16-21) Pol i pathengal aka ve, toko e avele i pavurvur nge a Moses ile patorong

panesnga, maken God i sis inga ve aro ler lemioong i ranga ve ini a Abraham ile lemioong, moro aken aro te velpol ini toko vengvenga a God itheki, naro te vthopot mun nge a Moses ile patorong engenga panesnga. (3:1-4:31) Aveto it areko te vthopot nge a Moses ile patorong panesnga, aro te oma vothung kerenga avele. (5:1-15) Avele aka, ler lemioong i pavthopot it nge aken, maken te pavurvur nge vothung sivenga panesnga ranga ve aka Oni Riringa i paengeng it nge omanga. (5:16-26)

God isivenga i ateal a Pol mo ini ile pakeke

(Vonge 1:1-2:14)

¹ Tho ini a Pol, tho ini pakeke, ave ini tokokoere aka o ateal tho na o pake tho, kene avele. Na tho ini tokokoere ole riong elnga avele. Aveto Titemer a God ome a Jisas Krais aka i palos werera i nge rinong, o ateal tho ve aro tho ini ole pakeke na ole riong elnga.

² Na toko lemioongare aka o voth tomo nge tho, them pasong malueng ake a thomu toko lotuongare nge aka o voth a rumremre aka a epee a Galesia.

³ Aro thomu o el themosaling na lemi moring a Titemer a God tomo nge ar Pomnga a Jisas Krais nge.

⁴ Na Jisas Krais i panes inga Titemer a God ilemi, mako i sungu isivenga ile mimiong mo aro i pavthopot it nge ler vothung kerenga, na i el werer it nge vothung ulue anga aka i kerenga rintet aka i voth tomo nge it ponange ake ru a ulue.

⁵ Maken evelelnga aro te risea a God iion roro na ler riseaing aken aro ile vusonga avele. I nunganga.

*Panongpolong Sivenga ini a God ile ri-
ong nunganga, na toko e i mothong tova i
eksing ol i.*

⁶ Lemik i ngo tangatun nge lomu vothung aka tho lo lelpot thomu, na palolo vet avele, nako thomu o lo lelpot a God viri viri. Na nge a Krais ile themosaling i ateal thomu, aveto thomu o lo lelpot i viri viri,

na thomu o panes panongpolong relnga mun e.

⁷ Na panongpolong ol e avele ako ini Panongpolong Sivenga, aveto tokokoe pelie o papelekpol a Krais ile Panongpolong Sivenga na o palemi pelekpol mun thomu nge.

⁸ Aveto aro ve them eve ensel ako i esu a Pen a Urvet me, aro ve o panongpol nge panongpolong ako i rel nge Panongpolong Sivenga aka them panongpol tel thomu nge lale, aken tho nong nge a God ve aro i paomelal toko aken nge paomelaling aka aro ile vusonga avele.

⁹ Na tho ria mun aka ranga ve tho ria thomu nge lale, aro ve toko e i panongpol thomu nge panongpolong aka i rel nge Panongpolong Sivenga aka thomu o elo tel i lale, aken tho nong nge a God ve aro i paomelal toko aken nge paomelaling aka aro ile vusonga avele.

¹⁰ Ava thomu o rivenga tho ri riong ake mo i oma tokokoere mo oleli sivenga nge tho, e? Avele! Tho sis inga aka ve, God aro ileli sivenga nge tho. Na aro ve rongan tho engeng inga nge tokokoere opamolomolonga venen aken, aro tho ini a Krais ile umonga nunganga avele.

Pol ia tenesing aka i velpol ini a God ile pakeke.

¹¹ Titeikre tho sis ve aro lomumu mire ako ve, Panongpolong Sivenga aka tho panongpol nge, ini toko ulue angare ole avele.

¹² Na tho el i a toko e nge avele. Na toko e i patorial mun tho nge avele. Aveto Jisas Krais isivenga inga aka i pathengal i a tho nge.

¹³ Thomu o nongpol lale nge lek vothung ako tho oma i nomenga aka tho panes senu Judare ole vothung. Na tho pakerenga rintet a God ile toko lemioongare, na tho engeng aka ve, aro tho pavus or.

¹⁴ Na tho engeng rintet nge ok pompome Judare ole vothung panesnga, na nge lek vothung aken, tho mukal rintet nge thengegek Juda pulua aka emem tovu po i thun.

¹⁵ Na rongan nina i pop tho rongan, na God i themosal tho, na i ateal tho mo tho

ini ile umonga. Lamako nge nang omole aka God i ateal i,

¹⁶ i pathengal tho nge Itun mo aro tho panongpol nge i nge areko or ini Judare avele, na nge nang aken tho el torong a toko e nge avele.

¹⁷ Na tho es mo aro tho thopol areko o velpol ini pakeke tel nge tho aka a Jerusalem, kene avele, aveto a ur e avele, nako tho es inga a pen polpolnga aka a Arebia, lamako tho lo werer a rem pomngga a Damaskus la.

¹⁸ Na tovu po or me i vus ma tho esa a Jerusalem mo aro tho leng leng tomo nge a Pita na tho voth tomo inga nge i, nge nang or mule pa omole pothoi or lim.

¹⁹ Na tho thopol tomo mun a Jems aka ini a Jisas itein, na tho thepol ol pakeke mun e avele.

²⁰ Na tho ri nunganga a thomu nge, aka a God itheki, lek riong ake tho wat i a thomu nge, kene lek apaltetpot thomu nge avele.

²¹ Nge nang areko tho voth tomo nge a Pita i vus lamako tho es a epee a Siria na Silisia.

²² Na nge wop lemi aken, Krais ile toko lemioongare aka o voth a epee a Judia o thopol thekik rongan.

²³ Aveto o nongpol nge iok le kimaing ve: Toko aton nomenga i pakerenga it, ponange i panongpol ol nge lemioong aka te voth nge, aka nomenga i sis ve aro i pavus i.

²⁴ Na o risea a God iion roro, eneke o nongpol aka God i eksing lek mimiong.

2

Pakekere tomo nge a Pol, oleli omoletet ol inga.

¹ Na tovu po or mule pa omole pothoi or penel i vus lale, lamako tho lo werer a Jerusalem la tomo nge a Barnabas. Na tho wol tomo mun a Taitus la.

² Na God ienga inga aka i pathengal tho ve aro tho es la. Na tho pathun tomo inga nge lotu a mukalingare, na tho ritet or nge ur nekenga aka ini Panongpolong Sivenga aka tho panongpol areko or ini Judare avele. Na tho oma venen aken, eneke tho sis ve aro lotu a mukalingare oleli omoletet inga nge Panongpolong Sivenga

ako tho panongpol nge, aro vene mo lek omaing ako tho oma i lale, tomo mun nge lek omaing ake rongan tho oma i, kene aro i velpol ini ur polpolnga inga.

³ Na Taitus ini thengek ake i es tomo nge tho, na ini toko Grik, aveto o ovulal i ve aro o is ile avele.

⁴ Aveto toko le apaltetonga pelie ake o ri ve or ini thengemem, o engeng ve aro them is ile. Na o sul tomo nge them mo aro o thopol senu them ake Krais i pavthopot them nge a Moses ile patorong panesnga, aveto o engeng mun ve aro them panes mun a Moses ile patorong,

⁵ aveto them nongal ole riong e avele, mo aro aro thomu o el Panongpolong Sivenga ake i nunganga.

⁶ Aveto lotu a mukalinga areken ake lomu pamirealingare o papomnga or, kene o rong esa mun riong e avele a panongpolong we ake tho panongpol nge. Na toko iion le kimaing ini ur polpolnga a tho nge, eneke God i the nge toko iion le kimaing avele, i thopol inga toko ake nge ilemi.

⁷ Na tokokoe areken o rong esa mun riong e avele a lek riong we, koto olemi mire ake God i sung omaing a tho nge mo aro tho panongpol Panongpolong Sivenga nge areko or ini Judare avele, ranga ve ake i sung omaing a Pita nge ve aro i panongpol Panongpolong Sivenga a Judare nge.

⁸ Eneke God i paengeng tho mo tho velpol ini pakeke nge areko or ini Judare avele, ranga ve ake i paengeng a Pita mo i velpol ini Judare ole pakeke.

⁹ Na lotu a mukalinga areko o paengeng lotu le mitong, ini a Jems na Pita na Jon olemi mire ake God i themosal tho, mako i sung omaing ake a tho nge, mako o elo them e a Barnabas a or nge. Na lemimem i omoletet nge lemem omaing ake ranga ve God i pake or a Judare nge, na i pake them e a Barnabas nge areko or ini Judare avele.

¹⁰ Na o nin inga them nge ur omole inga ve aro lemimem rum ole toko lemioonga areko sa teo or nge ole ur e avele. Na

omaing aken ini omaing ake tho engeng nge omanga lale.

Pol i vol a Pita nge ile vothung.

¹¹⁻¹² Aveto nge wop lemi ake Pita i voth a Antiock, tho mitu a itheki lemi ma tho vol i, eneke i mothong an tomoing nge areko or ini Judare avele, aken kene i panes Panongpolong Sivenga nunganga avele.

Na i mothong an tomoing nge or, koto i thopol tokokoe areko Jems i pake or a Antiock la, ake o engeng ve aro o is toko lemioonga alavusnga ole,* ma Pita i ngeip nge or ake aro o teltun ia, tova o thopol ake i an tomo nge areko or ini Judare avele.

¹³ Na toko lemioongare ake or ini Judare, ake o voth a Antiock, o neo or tomo nge a Pita ile olotetong na ole olotetong aken i paleklek mun a Barnabas ma i panes mun or.

¹⁴ Na nge ake tho thopol or venen aken, ake o panes senu vothung nunganga avele, ake nge Panongpolong Sivenga panesnga, mako tho vol a Pita a toko lemioonga alavusnga otheki, ma tho ria i ve, "Wong ini Juda, aveto nomenga wong panes Judare ole vothung vet avele, wong panes inga vothung nge areko or ini Judare avele. Aveto ponange ong olotet areko or ini Judare avele, ve aro o panes mun Judare ole vothung aken. Ong leklek re aken."

Areko ole mio nge a Jisas, oenga inga aro o velpol ini toko vengvengare a God itheki

(Vonge 2:15-4:31)

*Toko ake ile mio nge a Jisas, i velpol ini
toko vengvenga a God itheki.*

¹⁵ Na it ini Judare, eneke titievirre or ini Judare, na it ini toko rerelire ake o avsa a Moses ile patorong, kene avele.

¹⁶ Na it Judare lemir mire nge ake, aro ve toko e i panes a Moses ile patorong, aken i pavurvur aro i velpol ini toko vengvenga a God itheki avele, ave toko i velpol ini toko vengvenga a God itheki, nge ile lemioong

* **2:11-12:** 11-12 Pol i ri nge areko o engeng nge a Moses ile patorong panesnga tomo mun nge a Jisas ile riong panesnga. Maken o engeng ve aro toko lemioongare aro o is mun ole mo aro o velpol ini a God ile.

nge a Jisas Krais. Maken it mun lemiro nge a Jisas Krais mo aro te velpol ini toko vengvengare a God itheki. Na te velpol ini toko vengvengare a God itheki nge ler lemioong nge a Jisas Krais inga, na nge a Moses ile patorong panesnga avele. Eneke toko e avele aro i velpol ini toko vengvenga a God itheki, nge a Moses ile patorong panesnga.

¹⁷ Na it Judare mun it ini tokokoe areko te sis ve aro te velpol ini toko vengvengare a God itheki, nge ler lemioong inga nge a Krais. Na aro ve te avsa a Moses ile patorong, nge ler omaing ako te panes a Krais nge, lomumu vava, aken i mirenga ve, Krais i paeso it nge vothung kerenga? Avele!

¹⁸ Aveto aro ve lemik werero mun nge a Moses ile patorong panesnga, aken kene tho leklek lale.

¹⁹ Na Moses ile patorong i patalal tho ve, tho pavurvur nge ipanesnga avele, make tho lel kimek nge ipanesnga mo aro tho panes ol inga a God. Na i ranga ve ako tho mona tomo nge a Krais a ia won ngoronga nge,

²⁰ make tho mothong ol vothung ako tho velpol ini toko vengvenga a God itheki, nge a Moses ile patorong panesnga. Na i ranga ve ako tho pamona lek mimiong nomenganga aken a won ngoronga nge tomo nge a Krais. Na ponange ini a Krais ako i mimi ol a tho nge, na i oma tho mo tho velpol ini toko vengvenga a God itheki. Na nge lek mimiong elonga, lek lemioong i voth inga nge a God Itun ako ia sagu tho na i rin leltun tho.

²¹ Na tho krim engeng a God ile themosaling, eneke aro ve toko e i velpol ini toko vengvenga a God itheki tova ve i panes inga a Moses ile patorong, aken kene Krais ile rinong kene ini ur polpolnga inga.

3

Toko i velpol ini toko vengvenga a God itheki nge ile lemioong inga nge a Krais, na nge a Moses ile patorong panesnga avele.

¹ Thomu Galesia angare thomu o ranga ve ini ngongong. Ako a thekumu tho telmire senu lomumu nge a Jisas Krais ile rinong a won ngoronga nge. Na i vova

ako thomu o oma ranga ve ako toko i oma tangatun thomu ma o panes mun a Moses ile patorong, e?

² Naro lomumu rum senu tel lek riong ake. God i sungu Ioni Riringa a thomu nge, eneke thomu o nongpol Panongpolong Sivenga make lomumuo nge. Na i vova ake thomu o oma ranga ve ako o el Oni Riringa nge a Moses ile patorong panesnga, e?

³ Thomu o ranga ve ini ngongong, eneke thomu o patea lomu esong nge a God ipanesnga tomo nge Ioni Riringa ile engenging, ave ponange thomu o ri ve, o patopalal lomu esong aken nge sivengomu lomu engenging.

⁴ Na ur pulua ako i velpoltun thomu nge wop lemi aka lomumuo nge a Krais, ini ur polpolnga inga eve avele? Ave lemik ve ini ur polpolnga inga avele.

⁵ Na God i sung Ioni Riringa a thomu nge, na i oma pathepolong pelie a thomu nge, eneke thomu o nongpol Panongpolong Sivenga make lomumuo nge, na i oma thomu venen aken, eneke thomu o panes senu a Moses ile patorong, kene avele.

⁶ Na lomumu rum senu tel nge a Abraham ile omaing ako i oma i. Na God ile erere i ri vene,
“Abraham ilemio nge a God,

ma God i apet i ve ini toko vengvenga.” *Stat 15:6*

⁷ Maken aro lomumu mire ako ve, tokokoe areko olelio nge a God ranga ve ini i, or ini a Abraham itutun nungangare.

⁸ Na nomenga God i ritet tel nge Panongpolong Sivenga ma i ria Abraham nge ve, “Nge wong inga

make aro tho oma senu nge toko alavusnga.” *Stat 12:3; 18:18; 22:18*

Na God i ri venen aken a ile erere nge, eneke ilemi mire lale nomenga ako ve, areko or ini Judare avele aro o velpol ini toko vengvenga a itheki, aka nge ole lemioong inga.

⁹ Mako aro i omu senu nge areko olelio nge i ranga ve aka i oma senu nge a Abraham aka ini toko lemioonga.

¹⁰ Na areko o sis ve o velpol ini toko vengvenga a God itheki tova ve o panes

senu a Moses ile patorong, or kene aro o voth a kerengaing lemi, eneke toko e avele i pavurvur nge ipanesnga. Na lemire mire aki riong ake i nunganga, eneke God ile erere i ri vene,

“Aro ve toko e i panes senu senu ur alavusnga

ako i voth a Moses ile patorong nge avele,

aro toko aken aro i voth a kerengaing lemi.”

*Lo
27:26*

11 Na riong mun aki i pathengal it ve, toko i velpol ini toko vengvenga a God itheki nge a Moses ile patorong panesnga avele, i voth mun a God ile erere na i ri vene,

“Toko vengvenga ile mimiong

aro i panes ile lemioong nge a God.”

Habakuk 2:4

12 Na Moses ile patorong panesnga i relrintet nge toko ile lemioong nge a God. Aveto God ile erere kene i ri vene,

“Toko aki ve, i panes vengveng ur alavusnga

ako i voth a Moses ile patorong lemi, aro i mimi.”

Wok Pris 18:5

Aveto toko e avele i pavurvur nge ipanesnga.

13 Mako Krais i el wererpot it a kerengaing lemi, aki ini a Moses ile patorong panesnga, nge aki i el ol meir nge kerengaing aken. Na lemire mire ol aki ve, Krais kene i el ol meir nge kerengaing aken, eneke God ile erere i ri nge vene,

“Aro ve o pamona toko e a won nge, aro i voth a kerengaing lemi.”

*Lo
21:23*

14 Na Krais Jisas i oma venen aken mo aro God i oma senu mun nge areko or ini Judare avele, na nge a Jisas, God i oma senu nge or ranga ve aki i oma senu nge a Abraham. Na aro ve lemiro nge a Krais ile omaing aken, aro te elo a God Ioni Riringa aki i kin ile riong nge nomenga ve aro i sungu i a it nge.

Moses ile patorong i pavurvur avele aki aro i eksing a God ile riong aki i kin tomo i nge a Abraham.

15 Titeikre, aro tho tongporum i nge ler menong ponange anga, aro ve toko or aini

o kin ole riong lale, i pavurvur aro toko e i eksing ol i avele, na i rong esa mun e avele, koto riong kinnga aken i voth re lale aken.

16 Na i vene mun nge aki God i kin ile riong tomo nge a Abraham na itevinga. Na God i ri nge ititeviere alavusnga avele, i ri inga aki nge itevinga omole* aki ini a Krais.

17 Aro tho ri molusu tel mun lek riong mirenga. Nomenga aki God i kin ile riong tomo nge a Abraham, lamako tovu po or 430 i vus, nako God i sung ol a Moses ile patorong a or nge, aveto Moses ile patorong i pavurvur aki aro i pavus a God ile riong kinnga aken avele. Na ile riong kinnga aken i voth re lale aken.

18 Na aro ve toko e i panes senu a God ile patorong mo aro God i sungu ile sungong a i nge, aken kene sungong aken i espot a ile riong kinnga lemi me avele. Na God i sungu ile sungong a Abraham nge, eneke God i panes senu ile riong kinnga aken, na nge ile themosaling i sungu inga a i nge.

19 Na i vava ake i sungu ile patorong a or nge, e? I sungu i, eneke i sis ve tokokoere aro olemi mire nge aki ole vothung i kerenga rintet. Na i sis ve aro ile patorong aro i voth, mola i pavurvur nge a Abraham itevinga aken ile velpoling, aki ini a Krais aki God i kin ile riong nge i. Na e mun e aki God i sungu ile patorong a ile enselre nge mo aro o sungu i a Moses nge. Na Moses ini a God ile riong elnga aki i voth a God na tokokoere oa wop, na i sungu a God ile patorong aken a tokokoere nge.

20 Na aro ve toko or aini o sis ve aro o kin ole riong, ole riong elnga e i voth a oa wop mo aro i paengeng ole riong aken. Aveto nge wop lemi aki God i sungu ile riong kinnga a Abraham nge, isivenga i sungu i a i nge, na ile riong elnga e avele. Aken i mirenga ve, ile riong kinnga aken i mukal nge ile patorong aken.

God ile patorong i pathengal it nge a Krais.

21 Lomumu vava, ava God ile patorong i mit roal ile riong kinnga, e? Avele aki. Aro ve God i sungu ile patorong e aki i sung mimiong a it nge, aken i nunganga

* **3:16:** Stat 12:7; 13:15; 24:7

ako aro te velpol ini toko vengvenga a itheki nge patorong aken.

²² Aveto God ile erere i ri ve, vothung kerenga ile engenging ile mong toko alavusnga, na God i oma venen aken mo aro tokokoere o ela ile sungong nge ile riong kinnga tova ve olemio nge a Jisas Krais.

²³ Na nge wop lemi ako Panongpolong Sivenga nge a Jisas i velpol rongan, na Moses ile patorong i rere it, ma i telut ar i pavurvur nge ako Panongpolong Sivenga i velpol a lalanga.

²⁴ Na Moses ile patorong i theal it i pavurvur nge a Krais ile velpoling mo ako aro te velpol ini toko vengvenga a God itheki tova ve lemiro nge a Krais.

²⁵ Na nge wop lemi ol ake, i pavurvur aka aro tokokoere olemio nge a Krais, maken Moses ile patorong ile thealing nge it kene i vus ol.

Nge ler lemioong inga te velpol ini a God itutunre.

²⁶ Thomu alavusnga lomumuo nge a Jisas na o teo a i nge, maken thomu ini a God itutunre.

²⁷ Na thomu toko na seng areko o el paninuong kene o teo a Krais nge. Na thomu o ranga ve ini a Krais.

²⁸ Na nge lomu teoong a Krais Jisas nge, thomu o rel rel ol avele ol. Na thomu Judare, na thomu areko ini Judare avele, na thomu toko um polpolongare, na thomu areko ini um polpolongare avele, na thomu tokokoere, na thomu sengre, thomu alavusnga omole ol inga nge a Krais.

²⁹ Na thomu ini a Krais ile, aken thomu ini a Abraham ititeviere, naro thomu o el ur sivesivenga areko God i kin ile riong tomo nge a Abraham nge lale.

4

Thomu o ranga ve ini toko um polpolongare ol avele ol, thomu ini a God itutunre.

¹ Aro tho ri molusu tel mun lek riong a thomu nge. Na aro ve toko itun e, aro itema ile ur elonga aken ini ile, eneke panen aro ve itema i rin, aro i el ile ur elonga aken, aveto nge ile posngaing

rongan itema i theal i ranga ve ako ini ile toko um polpolonga.

² Na toko e i theal itun na ile ur elonga, i pavurvur nge nang ako itema i ateal i lale ve aro i sungu ol i a imeni.

³ Na i vene mun nge it Judare, nomenga Moses ile patorong i theal it ranga ve ini it ini toko um polpolongare.

⁴ Aveto nge nang ako God i ateal i, i pakeu Itun a it nge me. Ma seng ulue anga i pop i ma Moses ile patorong i theal mun i.

⁵ Na i velpol mo aro i eltetpot it nge a Moses ile patorong ile thealing lemi mo aro it ol ini a God itutunre.

⁶ Ma God i pakeu Itun Ioni Riringa a it nge me, eneke it ini itutunre ol. Na Oni Riringa aken i pavurpol lemire mo aro te nong a God nge ve, “Vovo, Vovo.”

⁷ Mako thomu ini toko um polpolongare nge a Moses ile patorong panesnga avele ol, thomu ini a God itutunre ol. Aken kene aro thomu o el mun ile ur sivesivenga, eneke thomu ini itutunre.

Pol ilemi pelekpol nge a Galesia angare ole vothung.

⁸ Nomenga aka lomumu mire nge a God avele, ma thomu ini um polpolongare nge god le apaltetongare.

⁹ Aveto ponange thomu o elo a God a lomumu, eve aro tho ri ve, God i elo thomu a i nge. Na i vova ake lomumu werero mun nge god le apaltetongare aka or ini ur polpolngare na ole engenging avele, e? Akennga thomu o velpol werer mun ini ole um polpolongare.

¹⁰ Na thomu o panes rum Judare ole vothung nge nang rialongare, na nge ngovre, na nge tovu pore, na nge ole aning aolonga a nangre.

¹¹ Ma lelik i voth nge thomu na tho ngange nge vothung aka thomu o oma i, aro vene mo lek omaing aka tho oma i a thomu nge aro ini ur polpolngare.

¹² Na tho nong engeng nge thomu titeikre, aro thomu o panes lek vothung, eneke tho panes lomu vothung aka tho panes a Moses ile patorong avele, nge aka tho voth tomo nge thomu. Na nge wop

lemi aken thomu o oma vothung kerenga e avele a tho nge.

¹³ Na lomumu mire nge ako tho es tel a lomu pen, eneke nik multhang. Make tho panongpol thomu nge Panongpolong Sivenga.

¹⁴ Na ni multhanging ako a tho nge i sung matheong a thomu nge, aveto thomu o lel kimomu nge tho avele, aveto thomu o nongpoo inga tho ranga ve aka tho ini a God ile ensel omole eve ini a Krais Jisas isivenga.

¹⁵ Na nge wop lemi aken, thomu o voth vosal na lomumu i sivenga nge tho. Na lomu voth vosaling aken i vana la ol? Tho ria thomu nunganga, nge wop lemi aka tho voth tomo nge thomu, ma thomu o lelalo ur e avele nge tho, na tova ve o pavurvur mun nge thekumu eltetpotnga, aro o sungu mun i a tho nge.

¹⁶ Ave ponange rongan tho ri riong nunganga a thomu nge, ave thomu o rivenga tho ini lomu ngarang.

¹⁷ Areko o panongpol thomu nge panongpolong relnga, o engeng ve aro o ri ololo thomu, aveto ole omaing aken i sivenga avele. Na o ri ve o atiteu it mo aro lomumu i engeng ol a or nge.

¹⁸ Na aro ve toko e i engeng nge omaing omanga, aken i sivenga tova ve ini omaing sivenga. Evelelnga aro thomu o oma venen aken. Na o mothong tova o oma inga nge, tova tho voth tomo nge thomu.

¹⁹ Na thomu tutukre, tho rov werer mun sisong nge thomu ranga ve ini seng aka i rov sisong nge popong. Na sisong aken aro i voth a tho nge i pavurvur nge nang aka aro thomu o velpol ranga ve ini ol i a Krais.

²⁰ Na tho sis rintet ve aro tho voth tomo nge thomu mo aro tho eksing ol lek riong mo aro tho ri mosnga ol nge thomu, eneke lemik kerere nge thomu.

*God ile riong kinnga or aini: Omole i kin i tomo nge a Moses na omole i kin i tomo nge a Abraham.**

* ^{4:20:} RP Riong kinnga teltelnga i the nge tokokoere ole vothung nge ipanesnga, aveto riong kinnga aininga kene i the inga nge tokokoere ole lemioong inga. † ^{4:27:} Na nge ves ake seng sarit, Pol i patongrum i nge Jerusalem Pen a Urvet anga. Na seng aka iwo i voth, kene i patongrum i nge Jerusalem ulue anga.

²¹ Tho ri ve tho nin thomu toko na seng areko o sis ve aro o panes a Moses ile patorong. Ava lomumu rum senu nge ur aka Moses ile patorong i ri nge rongan.

²² Na God ile erere i ri ve, Abraham itun tomonnga or aini, na itun tomonnga omole ile seng um polpolonga a Hagar i pop i, na itun aininga iewo sengenga a Sara i pop i.

²³ Na seng um polpolonga aken rongan i pavurvur nge popong na i pop a Abraham itun tomonnga omole, aveto panen nge aka Abraham ome a Sara o pavurvur ol nge wain pavelpolnga avele, Sara aka ini seng um polpolonga avele, kene i poppot mun a Abraham itun tomonnga omole, eneke God i panes ile riong aka i kin i tomo nge a Abraham ma i pavelpol i.

²⁴ Seng or aini ake nge tenesing ake o patongrum a God ile riong kinnga or aini aken. Na seng um polpolonga aka ini a Hagar i patongrum a God ile riong kinnga aka i sunga i a Moses nge a tete a Sainai, mako ile wainlangaere o velpol ma ini toko um polpolongare.

²⁵ Na Hagar i patongrum ine tete a Sainai aka a Arebia na i patongrum mun rem pomnga a Jerusalem aka ponange, eneke Jerusalem angare o voth ini toko um polpolongare nge a Moses ile patorong panesnga.

²⁶ Aveto Jerusalem Pen a Urvet anga i voth ini rem um polpolonga avele, na i ranga ve ini a Sara na rem aken i ranga ve ini niner.

²⁷ Eneke God ile erere i ri vene,
“Seng sarit
ako ong rov sisong nge popong
avele,
aro ong onnnga
na ong ngenge sise.
Eneke ong pavurvur nge popong
avele,
aveto tutumre aro o aolo leltun seng
ako iwo i voth.” † *Aisaia 54:1*

²⁸ Na titeikre, thomu o ranga ve ini a Sara itun a Aisak, eneke thomu o velpol ini a God itutunre a ile riong kinnga lemi,

ranga ve ini a God ile riong kinnga ako i pavelpola a Aisak ma ini a Abraham itun.

²⁹ Na nomenga Hagar itun ako i velpol nge a God ile riong kinnga avele, ini ile ngarang nge a Sara itun ako God Ioni Riringa i pavelpol i. Na i vene mun ponange aka Moses ile patorong panesngare ole ngarang nge a Jisas ilengare.

³⁰ Aveto God ile erere i ri vava? I ri vene: "Aro wong mothongpot seng um polpolonga ome itun
mo i mothong tova i el itema ile ur elonga pelie.
Aken aro itema aken iewo aka ini seng um polpolonga avele,
kene itun aro i el i alavusnga." *Stat 21:10*

³¹ Na titeikre, lek riong ake i pathengal it ve, it ini seng um polpolonga itutunre[‡] avele, aveto it ini seng um polpolonga avele itutunre.

Na nge aka Krais i pavthopot it, Oni Riringa i mukalpo it mo te oma inga vothung sivenga a toko alavusngare nge

5

(Vonge 5:1–6:18)

Mothong tova velpol werer mo ini toko um polpolonga mun nge a Moses ile patorong panesnga.

¹ Krais i pavthopot it lale na i sis ve aro te velpol ol ini toko um polpolongare mun avele ol. Maken thomu o mit engeng, na o mothong tova o sungo mun sivengomu nge ur aka o vthopot nge lale.

² O nongpol, tho a Pol tho ria thomu ve, aro ve toko e isa womo inga mo o is ile, akennga ur aka Krais i oma i a i nge ini ur polpolnga.

³ Na pa omole mun tho pator thomu toko alavusnga, aro ve toko e i sis ve aro i panes patorong nge ini peti isnga na o is ile, akennga patorong aken i kin i lale nge a Moses ile patorong alavusnga panesnga.

^{‡ 4:31:} Na Pol ile riong ake i mirenga ve, toko lemioongare o mothong tova o velpol ranga ve ini toko um polpolongare nge a Moses ile patorong panesnga.

⁴ Na thomu aka o tongporum aka ve, o panes a Moses ile patorong mo aro God i apet thomu ve ini toko vengvengare, aken ranga ve thomu o sorotetpot thomu a Krais nge na thomu o voth a God ile themosaling kime.

⁵ Aveto them, Oni Riringa i opoal them mo them men tetal nge nang aka aro God i apet them ve ini toko vengvengare, eneke lemimemo nge a Krais ile rinong.

⁶ Eneke aro ve toko e i teo a Krais Jisas nge, na aro ve o is ile eve o is ile avele, aken ini ur polpolnga a God itheki, aveto God i the inga nge toko ile asaguong nge tokokoere aka ile lemioong i pavelpol i.

⁷ Nomenga thomu o panes senu a Krais, aveto i vova aka thomu o panes toko aka i ri ololo thomu na i mit roal thomu nge riong nunganga panesnga, e?

⁸ Na God i lengpot thomu, ave riong aken ru thomu o panes i ponange, kene i es a i nge me avele.

⁹ Na lomumu mire nge riong agelalnga ake, "Yis aka i posngaingati i pavurvur aka aro i pawimpot bret alavusnga." Na i ranga ve mun nge toko le vothung kerenga omole, i pavurvur aka aro i paleklek toko alavusnga.

¹⁰ Na lemik ve aro thomu o rong esa mun riong pelie a lek riong we avele, eneke ler lemioong omole inga aka nge a Toko Pomnga. Na toko aka i palemi pelekpol thomu, aro ve ini toko le vanga, lemik ve aro God i paomelal i nge ile omaing aken.

¹¹ Na titeikre, toko pelie o ri ve, rongan tho panongpol nge toko ini peti isnga, aveto tho panongpol nge avele. Aro ve tho panongpol nge, aro Judare o sung math-eong a tho nge avele, eneke panongpolong aka i venen aken, i palemi kling toko e avele, aveto Judare o sung matheong a tho nge, eneke rongan tho panongpol inga nge omaing aka Jisas i oma i a won ngoronga nge.

¹² Na tho sis ve tokokoe areko o palemi pelekpol thomu nge toko ini peti isnga, aro o mothong tova o is inga oni peti ienga, i

sivenga ako aro o sorotetpot i alavuspot.

¹³ Titeikre, i nunganga aka God i leng thomu mo i pavthopot thomu nge a Moses ile patorong panesnga, aveto lomu vthopotong aken ini tepun ve aro thomu o panes vothung kerenga aka i mita a lomumu, kene avele, aveto i sivenga aka aro thomu o opoal pel aka ranga ve asaguong i voth a thomu nge.

¹⁴ Eneke God ile patorong omole ol inga aka i soalo ile patorong alavusnga, na ile patorong aken i ri vene:

“Aro om sagu tokokoere aka o voth tothal wong

ako ranga ve om sagu sivengom.”

Wok Pris 19:18

¹⁵ Aveto aro ve thomu o pamen kerere pel na o pun pel epee epeenga ranga ve ini mekeremre, kena aro thomu o pakerenga selele thomu.

Toko aka i panes Oni Riringa, aken ile vothung i rel rintet nge toko aka i panes isivenga ilemi.

¹⁶ Tho sis ve aro tho ri molusu lek riong mirenga a thomu nge. Na aro ve Oni Riringa i mukal nge lomu mimiong, aro thomu o oma vothung ulue anga aka i mita a lomumu, kene avele.

¹⁷ Eneke vothung ulue anga i sis ve i sivalalpot Oni Riringa, na Oni Riringa i sis ve i sivalalpot vothung ulue anga. Na or paini o sivalal pot.

¹⁸ Na aro ve Oni Riringa i mukal nge lomu mimiong, aken ranga ve Moses ile patorong i theal ol thomu avele ol.

¹⁹ Lomumu mire nge vothung ulue anga lale aka ranga ve ini: Ngo tomoing nge toko na seng areko ini oewo avele, na toko na seng aomngare, na theki le roroing,

²⁰ na nge avalare olotualnga, na nong tungtangongare, na le ngarangpeling, na volpeling, na musong, na lemi klingong, na o paroro osivenga, na o omreu or ma o mit rel relpot,

²¹ na thesealing, na toko thin rinrinnonga, na toko thin rinrinongare nge aning aolilongaere, na o oma mun vothung pulua aka i vene mun re aken. Na tho panakal thomu ranga ve aka tho oma i nomenga, tokokoe areko o oma venen

aken, o pavurvur aro o meno a God ile menong e nepes lemi avele.

²² Aveto Oni Riringa i pavelpol inga vothung aka ranga ve ini: Asagupeling, na voth vosaling, na ine lemi moring, na matheongre potunnga, na tokokoere othemosalnga, na vothung le sivengaing, na riong panesnga,

²³ na toko mosinga, na mimiong theal senunga. Na aro ve toko e i oma vothung areke, aro i avsa patorong e avele.

²⁴ Na areko or ini a Krais ilengare o pamona ur kerenga aka i mita a olemi na i paketun or nge ur kerenga omanga, kene a won ngoronga nge lale, na ur alavusnga areken o rin tomo nge a Jisas lale.

²⁵ Na i sivenga aka aro Oni Riringa i mukal nge ler mimiong alavusnga, eneke i sung mimiong ponganga ol a it nge lale.

²⁶ Na te mothong tova te risea sivenger ior, na te mothong tova te paruru titeirre oion mun, na te mothong tova te theseal toko e aka iion i kima.

6

I sivenga aka aro lemioongare o opoal othangangaere nge ole matheong potunnga.

¹ Titeikre, aro ve toko e i oma vothung kerenga lale, aro thomu areko Oni Riringa i mukal nge lomu mimiong, aro o oma riong mosnga nge i, na o opoal i nge ile vothung aken pavengvenga. Naro thomu o naktet thomu, aro vene mo tongporumong i paleklek mun thomu.

² Naro thomu o opoal pel nge lomu matheong potunngare. Na nge lomu vothung aken, aro thomu o panes a Krais ile patorong.

³ Aro ve toko aka i panes Oni Riringa avele i apet isivenga ini toko aka Oni Riringa i mukal nge ile mimiong, aken ile apaltet isivenga.

⁴ Na toko omole omole aro o avrum osivenga ole vothung. Na aro ve e ile vothung i sivenga, aken aro ilemi ngo senu nge isivenga, na i mothong tova i ri ve ile vothung i sivenga rintet nge tokokoere ole vothung,

⁵ eneke toko omole omole aro ole omaing ol nge ole vothung omole omole.

⁶ Naro toko e ako i el pamirealing nge a God ile riong, aro i sungpot ile ur sivenga pelie nge toko aka i pamireal i.

⁷ Na thomu o mothong tova lomu apaltet sivengomu, eneke toko e avele i pavurvur nge a God ileapaltetnga. Vothung aka toko i oma i, God aro i olal werer mun i a i nge.

⁸ Aro ve toko e i panes vothung ulue anga aka i voth a ilemi, aro i el mun ur aka i kerenga nge ile vothung aken. Aveto aro ve toko e i panes Oni Riringa, aro Oni Riringa i sung mimiong aka aro ile vusonga avele a i nge.

⁹ Na te mothong tova te lol nge vothung sivenga omanga, eneke aro ve te engeng inga nge omanga, aro God i olal ur sivenga a it nge, nge nang aka i ateal i lale.

¹⁰ Maken aro rongan te mimi aro te oma vothung sivenga nge toko alavusnga, na aoloaltunnga nge tokokoe areko ler lemioong omole inga nge a Krais.

Panakaling patopalalnga aka Pol isivenga i wat i.

¹¹ Na thomu o thopol wating epee ao longa areke. Akenga tho a Pol ol ake, tho wat ol i.

¹² Na areko o sis ve o ovulal thomu mo o is lomu, aken itepun inga aka ve, o sis ve tokokoere o thopol ole omaing nge oion le kimaing, na oni plong ve Judare o sung matheong a or nge, tova ve o panongpol aka lemioong inga nge a Krais ile rinong i pavurvur aka aro God i el werer or nge.

¹³ Na areko o is ole lale osivenga o engeng nge a Moses ile patorong alavusnga panesnga avele. Aveto o sis aka ve, o is lomu mo aro ini oion le kimainga aka thomu o panes ole vothung.

¹⁴ Na a tho nge, aro tho risea ol ur ol e avele, ini inga ar Pomnga a Jisas Krais ile rinong a won ngoronga nge. Na nge ile rinong aken, vothung ulue anga ini ur polpolnga a tho nge, na tho ini ur polpolnga nge toko ulue angare.

¹⁵ Na aro ve o is toko ile eve o is ile avele, aken ini ur polpolnga, aveto ur inga aka i aolonga a God itheki, aka aro toko i velpol ini toko aka Oni Riringa i paonol i mo i ponganga.

¹⁶ Na God ile lemi moring na ile themosaling aro i voth tomo nge areko o panes lek riong ake. Na tomo mun nge areko or ini a God ile tokokoere.

¹⁷ Na lek riong patopalalnga i vene: Na toko e i mothong tova i sung ol matheong ol e a tho nge, eneke matheong mei areke ru a nik peti i pathengal aka ve, tho ini a Jisas ile umonga.

¹⁸ Na thomu titeikre, ar Pomnga a Jisas Krais ile themosaling aro i voth tomo nge thomu. I nunganga.

Na i re aken. I vus.

Pol ile malueng ako i wat i a toko lemioongare nge ako o voth a rem a Epesus Epesus

Ritetong nge a Epesus

Pol ile malueng ake i ritet nge pasealing sivesivengare aka tokokoe areko o teo a Krais nge o el i. (1:3-14) Nge ler teoong a Krais nge, God i ateal it mo te voth toko vengvengare a itheki, (1:4) na i patu it, (1:5) na i el werer it na i pavthopot it nge ler vothung kerenga olalnga, (1:7) na ilemi simikal ler vothung kerenga, (1:7) na i paateal it nge Ioni Riringa ve it ini ile, (1:13) mo aro lemir mire aka ve, aro i pasealu it nge ile ur sivesivengare. (1:14) Na God i pamimi it venen aken mo aro tokokoere o risea i. (1:6, 12, 14) Mako Pol i nong nge a God ve aro it toko lemioongare aro lemir mire senu nge mimiong ponganga aken. (1:15-23) Nomenga ler vothung kerenga i kin it, aveto God i themosal it (2:1-7) mo aka toko kathnga aka ilemio nge a Krais, God aro i pasealu i nge mimiong ponganga aken, na toko e avele i pavurvur aka aro i el mimiong ponganga aken, nge isivenga ile engenging. (2:8-10) Nomenga it areko ini Judare avele, te voth mela nge a God, aveto nge ler teoong a Krais nge, God i veliloa it tomo nge Judare na ponange te velpol ol ini toko riringa nge mitong omole a itheki. (2:11-3:13) Na ler velilopeling nge mitong omole aken ini ur aolonga aka i ngo pat avele nge tovu populua (3:3-6) na Pol i nong nge a God ve aro te pavurvur aro te ate senu a Krais ile asaguong sivenga aken. (3:14-21) Na God pasealu it nge mimiong ponganga aken lale, aken aro te naktet ler esong mo i panes mimiong ponganga a vothung. (4:1-6:20) Aro te ate senu aka it alavusnga te velpol ini a Krais ilopat omole inga, (4:1-16) naro te teuna ler mimiong ponganga aken ranga ve ini tekruk. (4:17-32) Aro te mimi a pen lalanga lemi, (5:1-21) naro te oma vothung sivenga nge ewiworrer, tuturre, ninerre, titemerre, ler mukalin-

gare na nge ler toko um polpolongare. (5:22-6:9) Na Pol i patopalal ile riong nge riong engenga aka aro te teun punonga a teunong sivesivenga aka i es a God nge me, mo aro te pun tomo nge tamata kerengare mo te mit engeng na te voth mela nge vothung kerenga omanga. (6:10-20) Na ur aolonga nge malueng ake i vene: Aro it toko lemioongare aro ler mimiong i panes mimiong ponganga aka God i sungu i a it nge, aka nge ler teoong a Krais nge.

God i oma it mo te velpol ini toko ponganga aka nge ler teoong a Krais nge

(Vonge 1:1-3:21)

¹ Tho ini a Pol aka God i panes ilemi ma i ateal tho ve tho ini a Krais Jisas ile pakeke.

Tho wat malueng ake a thomu areko ini a God ile tokokoere nge aka a Epesus, aka o engeng nge a Krais Jisas ipanesnga.

² Aro thomu o el themosaling na lemi moring a Titemer a God tomo nge ar Pomnga a Jisas Krais nge.

God i oma senu nge it, eneke te teo a Jisas nge.

³ Te risea a God aka ini ar Pomnga a Jisas Krais Itema aka i oma senu nge it nge ile sungong Pen a Urvet anga elonga aka i oopal onir nge, aka nge ler teoong a Krais nge.

⁴⁻⁵ Te risea a God, eneke nge wop lemi aka God i pamenu ur e rongan, i ateal it lale ve, aro te teo a Krais nge mo aro te riri na ar theki e avele a God itheki. Na i ateal it lale ve aro i patu ol it mo ini itutunre nge ler lemioong nge a Jisas Krais. Na i oma venen aken, eneke ilemi ve aro i oma i na i, panes inga ilemi aken.

⁶ Naro te risea a God nge ile themosaling aken aka i sivenga rintet, eneke i sung polpol ile sungong a it nge, aka ini Itun aka ia sagu rintet i.

⁷ Na Itun aken i rin mo aro i el werer it, na ia mla i eltetpot ler vothung kerenga a God itheki tova te teo a i nge. Na God i oma venen aken, eneke ile themosaling a it nge i aolonga rintet.

⁸ Ma i lel ranga ve ini thei a it nge tomo nge mire sivesivengare na lemi rumong sivengare.

⁹⁻¹⁰ Na God i pathengal ilemi inkinenga nge a Krais a it nge lale, eneke ilemi ve aro i oma venen aken. Na i pathengal it aro nge nang ako i ateal i lale ve aro i veliloalo ur alavusnga ake ru a ulue tomo nge ur alavusnga aka a Pen a Urvet lemi mo aro i sungu i a Krais imeni mo ini ur alavusnga ole nepes. Naro i oma ol ur aken vengtun nge nang ako i ateal i lale.

¹¹⁻¹² God aka i oma ur alavusnga mo aro o panes inga isivenga ilemi, i ateal tel them Judare aka aro them ini ile tokokoere aka nge lemem teoong a Krais nge, na i oma venen aken, eneke nomenga i ri ve mo i panes inga ilemi mo aro imonnga i velpol. Na i ateal them venen aken mo aro them risea a God nge ile sivengaing aken.

¹³⁻¹⁴ Na thomu tokokoe areko thomu ini Judare avele, thomu o teo mun a i nge, nge wop lemi aka thomu o nongpol ile riong nunganga aka ini Panongpolong Sivenga aka i pamimi thomu. Na nge wop lemi aka lomumuo nge a Krais, God i paateal thomu nge Ioni Riringa ve thomu ini ile, ranga ve aka i kin ile riong nge lale, mako thomu o teo a Krais nge. Na i sungtun it nge Ioni Riringa aken, na lemire mire aka panen aro i sungpot ol ur alavusnga aka i kin ile riong nge ve aro i sungu i a itutunre nge, aka ini it. Naro Oni Riringa aken aro i theal senu it i pavurvur nge nang aka aro God i ol werer ol ile tokokoere nge. Na te risea a God nge ile sivengaing aken.

Pol i nong nge a God mo i panine Epesus angare olemi.

¹⁵⁻¹⁶ Na lelik rum nge ur areko tho ri nge lale, make tho pesrou nge nongong nge thomu avele. Ma tho ri sivengaing a God nge, nge thomu, i patea nge nang aka tho nongpol aka ve, lomumuo nge a Toko Pomnga a Jisas, na aka omu sagu a God ile toko alavusnga.

¹⁷ Na rongan tho kisis lek nongong a ar Pomnga a Jisas Krais ile God nge aka ini Titemer aka i sivenga rintet, ve aro Oni Riringa aro i pavengveng lomu mire, naro i pathengal senu a God a thomu nge mo

aro lomumu mire senu nge ur aka God i sis ve aro o oma i.

¹⁸ Na tho nong ve aro lomumu i thep mo aro lomumu mire senu nge ur areko i leng thomu ve aro lomumu i voth nge, na o men sial nge, na nge ur sivesivengare aka aro i sungu i a ile tokokoere nge aka olemio a i nge.

¹⁹ Na tho nong mun ve aro lomumu mire senu nge ile engenging aka i aolonga rintet, aka i voth tomo nge it areko lemire nge a Krais. Na ile engenging aken, i ranga ve ini ile engenging aolonga

²⁰ aka i oma i nge a Krais, nge aka i palos werera i nge rinong, ma i pamien ol i a imeni sivenga nge anga aka a Pen a Urvet lemi, ini pen aka o papompom i nge.

²¹ Na Krais ile engenging i mukal nge ur alavusnga areko ole engenging i voth, tomo mun nge enselre na tamatare. Na iion i kima na i mukal nge ioning alavusnga ponange na panen aka aro ile vusonga avele.

²² Na God i pathealu a Krais nge ur alavusnga mo aro o voth a isa thewo, na i oma venen aken mo aro i opoal toko lemioongare.

²³ Na toko lemioongare o ranga ve ini a Krais ilopat na Krais ini opounga. Na aro ve toko lemioongare o teo a Krais nge, aken ilopat alavusnga i vurvura ol. Na Krais i patopalal ur alavusnga.

2

It tokokoe areko te oma vothung kerenga a God itheki, kene te rin lale, ave Krais i pamimia it.

¹ Na nomenga aka a God itheki, onumu kene i rin lale, eneke thomu o avsa riong, na o oma vothung kerenga.

² Na nge wop lemi aken, thomu o panes vothung ulue anga, tomo nge tamata kerenga areko o voth a malang po oa pomnga, aka i ri ololo areko o avsa a God ile riong.

³ Na nomenga kene it alavusnga te vur e pel tomo nge or, ma te panes mun vothung ulue anga aka i mit engeng a lemire, na i paketun it nge vothung kerenga omanga. Na nge wop lemi aken, te panes lemire na

lemi rumong kerenga nge vothung ulue anga omanga, na aro ve te eksing avele, God ile lemi klingong rongan i voth a it nge, naro te ela ile paomelaling.

⁴⁻⁵ Na i ranga ve ako te rin lale nge ler vothung kerenga, aveto God ia sagu rintet it, na ile themosaling a it nge me i aolonga rintet, mako i pamimi it tomo nge a Krais. Na nge a God ile themosaling inga ako i pamimi thomu.

⁶ Na nge ler lemioong nge a Krais Jisas, God i palos werera onir mo aro panen aro te voth tomo ol nge a Krais ake ro a Pen a Urvet.

⁷ Na nge a Krais Jisas ile omaing, God i pavelpol ile lemi esaling a it nge, eneke i sis ve aro i pathengal ile themosaling aolonga rintetnga nge areko aro o mimi panen.

⁸ Na nge a God ile themosaling inga ako i pamimi thomu tova lomumu nge a Krais. Na ur aken ini lomu omaing avele, aken ini a God ile sungong.

⁹ Na God i pamimi it nge ler vothung, kene avele, na i pavurvur aro te paroro it nge ile omaing aken, kene avele.

¹⁰ Na it re ake ini a God ile omaing ponganga, na Krais Jisas i oma it mo aro te oma omaing sivenga aka God i monsi i lale ve aro te oma i.

Krais i oma Judare na areko or ini Judare avele mo or omole ol inga.

¹¹ Na i vene ako thomu ini Judare avele, eneke ninomuere ini Judare avele. Na Judare o apet osivenga ve or ini a God ile tokokoere, eneke or ini areko o is ole, na o apet thomu ini kuthre, eneke olemei ve thomu ini toko vulutngare, aveto ur ake ini toko ulue anga ile omaing, na ini a God ile omaing avele. Na lomum rum senu nge lomu menong nomenganga.

¹² Ako nomenga lomumu mire nge a Krais avele. Na nomenga God i ateal Israelre mo or ini ile, aveto thomu ini ile avele. Na nomenga God i kin ile riong tomo nge Israelre mo aro i opoal or, aveto thomu o voth a ile riong kinnga aken lemi avele. Na thomu o the mun a mukaling nge ur sivenga aka aro i velpol a thomu nge, kene avele, na thomu o mimi a ulue ake, aveto lomumu mire nge a God avele.

¹³ Na nomenga thomu o mela nge a God, aveto ponange i elo thomu totho a i nge, eneke nge a Krais Jisas ia mla inga mako thomu o teo a i nge.

¹⁴ Na Krais inga i pavelpol lemi moring a them Judare nge tomo nge thomu areko thomu ini Judare avele. Na i oma it mo it omole ol inga. Ave nomenga kene ler ngarang pel, na nir silal pel, na i ranga ve ini lok aken i ngo ruptetal it, ave Krais i teu lok aken, ma i pavus ler ngarangpeling

¹⁵ nge ile rinong, na i pavus a Moses ile patorong aka torong i voth nge mo aro them na thomu aro te teo a Krais nge mo it omole ol inga, na te men lemi moring.

¹⁶ Na e mun e aka, ler ngarangpeling kene i vus lale, nge a Krais ile rinong a won ngoronga nge mo aro i el werer it a God nge la.

¹⁷ Na i venen re aken, na i panongpol lemi moring a thomu aka nomenga o voth mela nge a God, na i panongpol mun lemi moring a them nge aka them totho a God nge,

¹⁸ maken it omole ol inga. Na Oni Riringa omole inga aka i thep ler so aka aro te es a Titemer nge, eneke lemiro nge a Krais.

¹⁹ Mako thomu ini longre, kene avele ol, ave thomu na them it ini ol i a God ile, na te velpol ol ini a God ilengare ol.

²⁰ Na it ranga ve ini vel aka te men pok nge a God ile riong elngare tomo nge ile pakekere ole patoraling, na Krais Jisas isivenga ini wovek sapatanga aka i potun vel aken ile matheong.

²¹ Na it omole omole te teo a Toko Pomba nge, na i ari espot ile vel aken mo aro i velpol ini a God ile Lotuonga a Vel aka i riri.

²² Na thomu mun aka o teo a Krais nge, God i veliloalo thomu tomo nge them, na i ari ile vel nge it mo aro Ioni Riringa i voth nge, maken i ranga ve aka God isivenga i voth nge.

3

Pol ini pakeke aka i panongpol nge areko or ini Judare avele.

¹ God i veliloalo thomu tomo nge them Judare, mako tho a Pol tho nong nge

thomu. Na tho voth a mang a midenga, eneke tho oma a Krais Jisas ile omaing ako tho opoal thomu areko thomu ini Judare avele.

² Ava thomu o nongpol lale nge sovengalo aka God i pavelpol ile themosaling a it nge, mako i sung omaing ake a tho nge mo aro i opoal thomu.

³ Ako ranga ve, i pathengal ilemi inkinenga nge a Krais a tho nge, ranga ve aka tho wat riong pelie nge lale.

⁴ Na aro ve thomu o tital riong areken tho wat i, aro lomumu mire nge lek lemi rumong aka nge a God ilemi inkinenga nge a Krais.

⁵ Na nomenga tokokoere olemi mire nge ilemi inkinenga ake avele, aveto nge a God Ioni Riringa i pathengal i nge ile pakekere tomo nge ile riong elngare aka i ateal or.

⁶ Na ilemi inkinenga i vene: Tokokoe areko or ini Judare avele aro o el mun ur sivesivenga aka God aro i sungu i a Judare nge. Na or alaini aro o velpol ini a Krais ilopat, naro o el mun ur aka God i kin ile riong nge, tova ve o nongpol Panongpolong Sivenga ma olemio nge a Krais Jisas.

⁷ Na God i themosal tho na nge ile engenging i sung ile sungong a tho nge aka tho velpol ini ile omainga nge Panongpolong Sivenga ake.

⁸ Na tho ini toko polpolnga nge a God ile toko alavusnga, ave i sung mun ile themosaling aken a tho nge mo aro tho panongpol areko or ini Judare avele, nge a Krais ile omaing sivenga a it nge, aka i sivenga rintet na i pavurvur aro ler mire i el senu i avele.

⁹ Na i sung mun ile themosaling aken a tho nge mo aro tho panine toko alavusnga olemi, nge sovengalo aka God i pavelpol ile omaing inkinenga nge. Na sovengalo aken, God aka i pamenu ur alavusnga, i pango kine i nge tokokoe areko o mimi nomenga.

¹⁰ Na i oma venen aken mo aro ponange i pamenu ile toko lemioongare mo aro i

panine ensel engengare aka a Pen a Urvet olemi, nge ile mire rel relnga elonga.

¹¹ Na God i oma omaing alavusnga aka nge a Krais Jisas aka ini ar Pomnga imeni, na i panes i ranga ve aka nge ilemi nge nomenga.

¹² Na te teo a Krais nge, na lemiro nge i, maken i pavurvur aka aro te es ol a God nge, naro te ngeip avele, na lemir mire aka aro i nongpol it.

¹³ Na lek menong i venen aken, mako tho nong a thomu nge, o mothong tova lomumu pelekpol nge matheong* areke tho el i, aro i opoesal thomu nge lomu menong tomo nge a God.

Pol i nong[†] nge toko lemioongare aka a Epesus ve aro o mit engeng nge ole lemioong.

¹⁴ Na lelik rumu aka God i veliloalo thomu tomo nge them Judare, mako tho koru ekek na tho nong a Titemer nge

¹⁵ aka i pamenu ur alavusnga ake ru a ulue na a Pen a Urvet, lamako i sung ol oionre.

¹⁶ Na tho nong a i nge ve, aka nge ile ur sivesivenga aka a Pen a Urvet, aro Ioni Riringa aro i sung engenging a thomu nge, mo i paengeng lomumu

¹⁷ mo aro nge lomu lemioong aro Krais i mimi ol a lomumu nge. Na tho nong mun ve aro asaguong i tea a lomumu, ranga ve ini won riripi i teu a ulue lemi, naro o mit engeng nge asaguong

¹⁸ mo aro thomu tomo nge a God ile toko alavusnga aro lomumu mire senu nge a Krais ile asaguong a it nge, aka i aolonga rintet, na i lollo rintet, na i roro rintet na i lukuluku rintet,

¹⁹ na i pavurvur aka aro lemir mire nge iwopoalnga avele. Na aro ve thomu o vual nge asaguong aken, i ranga ve aka thomu o vual rintet nge a God. Ma lek nongong nge thomu i vene re aken.

²⁰ Naro te risea a God nge ile engenging aka i voth a it nge, eneke ile omaing i aolonga rintet nge ur areko te pavurvur aro te nong i a i nge, na nge ur areko lemir i pavurvur nge.

* ^{3:13:} Pol i voth a mang a midenga na i apet i ve ini matheong. † ^{3:13:} RP Pol i patea ile nongong nge ves 1 nge vonge 3, aveto nge ves 2 na i mul nge ves 13 i ri nge ile omaing, na nge ves 14 ake i patea werer ile nongong.

²¹ Na it tokokoe areko te teo a Krais Jisas nge na it ini ile toko lemioongare, aro te risea a God evelelga nge nang elonga ako aro ile vusonga avele. I nunganga.

It ranga ve ini a Krais ilopat, maken aro te panes ol a God ile vothung

4

(Vonge 4:1–6:24)

It toko lemioongare it ini a Krais ilopat.

¹ Na tho voth a mang a midenga, eneke tho oma a Toko Pomnga ile omaing. Tho ri engeng a thomu nge ve, aro lomu mimiong i pathengal it ako ve, God i ateal thomu ve aro thomu o panes ol i.

² Aro thomu o paruru thomu, na o ri riong mosnga a tokokoere nge, na o mothong tova opomu vurpol virial, na o pathengal pel nge lomu asaguong aro o potun inga matheong aro o sungu i a thomu nge.

³ Na Oni Riringa aro i sungu lemi moring a thomu nge mo aro thomu omole ol inga, naro thomu o engeng nge lomu teoong aken mo aro i vus avele.

⁴ Na te teo a Jisas ilopat na te voth omole ol inga, na Oni Riringa aka ini omole inga, na nge aka God i ateal thomu, i ateal thomu ve aro thomu o men sial nge ur sivesivengare aka aro i sungu i a thomu nge.

⁵ Na Toko Pomnga ienga inga omole, na ler lemioong inga omole, na paninuong inga aka omole.

⁶ Na God inga omole aka ini toko alavusnga oa Vovo, na ini toko alavusnga oa Pomnga, na toko alavusnga o el mimiong a i nge, na i voth a toko alavusnga nge.

⁷ Na Krais i panes isivenga ilemi, mako i sung sung ile themosaling a it omole omole nge.

⁸ Ranga ve aka God ile erere i ri nge ma i ri vene:

“Na nge wop lemi aka i esa a rem aka i roro rintet,

ma i ti areko ile mong or

na i sung sung ile sungongre a tokokoere nge.”

Buk Song

68:18

⁹ Na riong aka i ri ve, “i esa” kene i mirenga vava? I mirenga aka ve, i esu tel ruru a ulue me.

¹⁰ Na toko aton i esu me i mun re aken i esa roro a sepsa la, ma i alselea la mo aro i oma ur alavusnga mo i vung ol.

¹¹ Na ini toko aton i sung sung sun-gongre a tokokoere nge, na i ateal pelie mo or ini pakekere, na pelie mun or ini a God ile riong elngare, na pelie mun or ini Panongpolong Sivenga panongpolngare, na pelie mun aro o theal toko lemioongare na o patoral or.

¹² Na i sung sung sungong areken mo aro i opaal a God ile tokokoere mo aro o oma ole omaing ranga ve ini toko lemioongare mo Krais ilopat i engeng.

¹³ Naro te oma omaing aken i pavurvur aka aro ler lemioong i omoletet, na lemir i omoletetpot mun nge a God Itun mo aro te velpol ini toko lemioonga motungare, na te poma mo te vur e pel nge a Krais.

¹⁴ I venen aken na it ranga ve ini wain-langa avele, aka oleli sulung salang nge toko le apaltetongare ole patorialing aka o ri ololo oleli, na o paleklek or nge ole riong le apaltetongare ranga ve ini wok aka thue ome thev le lolikong o elu ela i.

¹⁵ Aveto aro te ri inga riong nungangare tomo nge asaguong, naro te velpol ranga ve ini a Krais aka ini toko lemioongare opounga.

¹⁶ Na it kene ini a Krais ini peti epipeere, na i oma it mo te teo a i nge ranga ve ini nir peti a av aka i paengeng nir peti. Na aro ve it omole omole te oma ler omaing, aro te opaal ini peti elonga, mo ilopat i poma senu mo ler asaguong i aolonga.

Krais i sung mimiong ponganga a toko lemioongare nge.

¹⁷ Na tho tor engeng thomu nge a Toko Pomnga iion, thomu o mothong lomu vothung aka o panes vothung ranga ve ini tokokoe areko oleli mire nge a God avele, aka ole leli rumong ini ur polpolngga.

¹⁸ Na ole mire i voth a mideng, na o voth mela nge a God ile mimiong aka i sungu i a tokokoere nge, eneke ole mire avele, eneke oopo leli i rit.

¹⁹ Na ole mara nge ur pelie omanga, kene avele, mako o sungu osivenga nge vothung kerenga elonga omanga, na olo womtun ol inga nge theki le roroing.

²⁰⁻²¹ Aveto thomu o nongpol Panongpolong Sivenga nge a Jisas, ma o patalor vengveng thomu nge a Krais. Na o patalor thomu nge vothung areken omanga avele.

²² Aveto o patalor thomu nge lomu vothung nomenganga ako aro thomu o mothongpot i, eneke lomu vothung nomenganga i pakerenga lomu mimiong, eneke i pavurpol lomumu ako i paleklek thomu.

²³ Naro thomu o mothongpot i, naro lomumu na lomu mire aro i ponganga rintet.

²⁴ Naro thomu o elu vothung ponganga ako God i oma i na i ranga ve ini i, na o teuna i ranga ve ini tekruk ako o teuna i mo tokokoere o thopol i ako lomu vothung aken i panes nunganga a God ile riong, na i vengveng a God itheki mo God ilemi sivenga nge.

²⁵ Na o patalor thomu venen aken, mako o mothong tova lomu apaltitet, aro thomu o ri nunganga inga a toko lemioongare nge, eneke it alavusnga it ini a Krais ini peti epipeere.

²⁶ “Aro ve lomumu kling, aro thomu o naktet thomu, ke aro vene mo thomu o oma vothung kerenga.” * Naro o mothong tova lomu lemi klingong i sivluk tomou nge nang.

²⁷ Na o mothong tova o sungpot a Satan imei e.

²⁸ Na toko kemiring o mothong ol kemiring, aro o oma omaing sivenga nge osivenga omeni, naro o pavurvur nge ole mimiong thealnga, na o pavurvur mun ako aro o sung mun pelie a toko le ur avelengare nge.

²⁹ Na o mothong ol tova riong kerenga i espot ol a womu, ave aro thomu o ri inga riong ako i opoal toko ilemi nge ur aka i oror nge, mo aro lomu riong aken aro i opoal mun areko o nongpol i.

³⁰ Na o mothong tova o palemi kerere a God Ioni Riringa aka ini paatealing aka thomu ini ile, naro i theal senu thomu i

pavurvur nge nang aka aro God i ol werer ile tokokoere nge.

³¹ Na o mothong ol vothung kerenga elonga omanga ranga ve ini lemi ritong, na lemi klingong, na volpeling, na voltetong, na ri pompomong, na toko ni silalnga.

³² Aro thomu o oma vothung sivenga nge pel, naro lomumu esal pel, naro lomumu simikal pel nge lomu vothung kerenga, ranga ve aka God ilemi simikal lomu vothung kerenga, eneke thomu o teo a Krais nge lale.

5

Aro te es inga nge a Krais ile pen lalanga.

¹ Na thomu ini a God itutunre aka ia sagu thomu. Na ilemi simikal lomu vothung kerenga venen aken, maken aro thomu o engeng mo o velpol ranga ve ini i.

² Na nge ler mimiong aro ar sagu tokokoere, ranga ve ini a Krais aka ia sagu it ma i sungu isivenga ile mimiong mo aro i opoal it, na i sung ile mimiong a God nge ranga ve ini sungong aka i una vro aka God ilemi sivenga nge.

³ Na o mothong ol ngo tomoing nge toko na seng areko ini ewomu avele, na toko na seng aomngare, na sung sesong, eneke vothung areke i sivenga avele nge a God ile tokokoere ve aro o oma i. Naro tokokoere o sangpolo tepun e avele a lomu mimiong nge aka aro o ri ngunngun thomu nge vothung areken.

⁴ Na i sivenga mun avele aka aro thomu o ri riong kerenga, na ri posililaling, na ri posililaling kerenga, aveto aro thomu o ri sivengaing a God nge.

⁵ Na lomumu mire senu aka ve, areko o ngo tomo nge toko na seng areko or ini oewo avele, na areko o aom toko na seng, na areko o theseal, toko na seng areken kene aro o eso a Krais na God ole menong e nepes, kene avele. Na ur ulue anga aka o theseal i, kene i velpol ranga ve ini ole god le apaltetong aka o lotual i.

⁶ Na thomu o naktet thomu nge areko o sis ve aro o ri ololo thomu nge ole riong

* ^{4:26:} Buk Song 4:4

polpolnga, eneke God aro ilemi klingtun areko o oma vothung areken na o avsa ile riong.

⁷ Maken thomu o mothong tova o voth tomo nge areko o oma venen aken.

⁸ Na nomenga thomu o voth a mideng, ave ponange thomu o voth ol a pen lalanga, eneke thomu o teo a Toko Pomnga nge. Thomu aro o es inga ranga ve ini a Toko Pomnga ile pen lalanga itutunre,

⁹ eneke ile pen lalanga i pavelpol imonnga aka ini vothung sivenga alavusnga, na vothung vengvenga, na ur areko i nun-ganga.

¹⁰ Naro thomu o tongporum vothung aka aro Toko Pomnga ilemi sivenga nge.

¹¹ Na o mothong tova o paneo tomo nge areko o voth a mideng, na o oma vothung aka imonnga i sivenga avele. Aveto o pango pat mideng esngare ole vothung kerenga.

¹² Na tho ri nge mideng esngare ole vothung, eneke ini ur le maralinga tova ve tho ripot ur areko telnga plaongare o oma kine i.

¹³ Ave aro ve the lalainga i totun ur e, aro tokokoere olemi mire nge ve ini ur le vanga,

¹⁴ eneke the lalainga i palala ur alavusnga, na i ranga ve aka tokokoere o ri nge na o ri vene:

“Vung, surpola werer nge rinong
na mita mo Krais aro i totun ong.”

¹⁵⁻¹⁶ Na thomu o voth a pen lalanga lemi, maken aro thomu o naktet senu lomu esong ake ru a ulue, eneke te voth ol nge nang le kerengaing. Na o mothong tova lomu mire i ranga ve ini toko ngongong, aro lomu mire i ranga ve ini toko powe ninenga. Na menong kathnga aka i velpoltun thomu, aro o betet inga nge a Toko Pomnga ile omaing.

¹⁷ Na te voth ol nge nang le kerengaing, naro o mothong ol vothung pelekpolngare, na o tongporum vet ol lomu mire nge vothung aka Toko Pomnga i sis ve aro thomu o oma i.

¹⁸ Na o mothong tova o pavual opomu lemi nge vain thinnga mo thekumu vaisis rintet, aro vene mo lomu mimiong i

kerenga, aveto aro Oni Riringa i pavual opomu lemi nge isivenga.

¹⁹ Aro thomu o leng leng tomo e pel nge riong aka i voth a Buk Song lemi, eve omu lotuonga a voingre nge, eve voing areko Oni Riringa i pavelpol i a lomumu, naro thomu o vo na o risea a Toko Pomnga nge opomu lemi alavusnga.

²⁰ Na evelenga aro thomu o ri siven-gaing a Titemer a God nge, nge ur alavusnga, eneke it ini ar Pomnga a Jisas Krais ile.

²¹ Aro thomu o nongal pel lomu riong, eneke thomu ini a Krais ile na o papomnga i.

Pol i ri nge peangeong a menong.

²² Na thomu seng peangere aro thomu o nongal ewomuere ole riong ranga ve aka thomu o nongal a Toko Pomnga ile riong,

²³ eneke seng iewo aka ini ile mukalinga ranga ve ini a Krais aka ini toko lemioon-gare ole mukalinga, na toko lemioongare ini a Krais ilopat na ini ole pamimionga.

²⁴ Maken aro seng peangere aro o non-gal ol oewoere ole riong alavusnga ranga ve aka toko lemioongare o nongal a Krais ile riong.

²⁵ Na thomu toko peangere aro omu sagu ewomu sengengaere ranga ve aka Krais ia sagu toko lemioongare, na i sun-gpot isivenga ile mimiong a or nge,

²⁶ mo aro i pariri or, na o riri nge paninuong na nge ile riong panesnga.

²⁷ Na i oma venen aken mo aro i monsi or na i el or ranga ve ini seng a urvet aka ini peti i akrom na bakkak e avele, na ur mun e avele i sopo a i nge, ave i riritet inga na i vengveng rintet.

²⁸ Maken aro toko peangere aro oa sagu oewo sengengaere ranga ve aka oa sagu osivenga oni peti. Na toko aka ia sagu iewo, aken kene ia sagu isivenga.

²⁹ Na i vene re aken aka toko e avele ini silal isivenga ini peti, aveto i paan senu i, na i theal i ranga ve aka Krais i theal senu it toko lemioongare,

³⁰ na it ranga ve ini mun i ini peti epipeere.

³¹ Na God ile erere i ri vene:
“Ma nge aka toko aka aro i gatpot a inina
ome itema nge

mo aro i teo a iewo sengenga nge,
aken or paini o velpol ini omole ol
inga.”

Stat 2:24

³² Na riong inkinenga lukulukunga i
voth a riong aken lemi, na tho ri ve ri-
ong aken i ri mun nge a Krais ome toko
lemioongare.

³³ Na i ri mun nge thomu omole omole,
maken aro toko aro ia sagu iewo sengenga
ranga ve ako ia sagu isivenga, na seng aro
i papomnga iewo tomonnga.

6

*Pol i ri nge toko lemioongare ole
menong tomo nge otutunre.*

¹ Thomu wainlangae aro o non-
gal omu vovoere na omu ninaere ole
riong, eneke thomu ini Toko Pomnga
ile. Na vothung aken kene ini vothung
vengvenga.

²⁻³ Naro thomu o oma venen aken, eneke
God ile erere i ri vene:
“Aro thomu o papomnga omu vovoere
ome omu ninaere
mo aro tho pamen senu thomu
na lomu mimiong ako a ulue aro
i lollo.”

Lo 5:16

Na riong ake ini a God ile patorong
teltelinga aka ile riong kinnga i voth nge.

⁴ Na thomu a vovoengaere thomu o
mothong tova o palemi kling tutumuere,
aveto aro thomu o theal or, na o
pavengveng or, na o patorial or nge a Toko
Pomnga ile riong.

*Vothung aka nge toko um polpolongare
tomo nge otokoningare ole menong.*

⁵ Na thomu toko um polpolongare aro
thomu o nongal inga tokoningomure ole
riong, naro thomu o papomnga rintet or,
na o mothong tova o nea inga thomu ve
thomu o papomnga or. Aro thomu o
nongal ole riong ranga ve aka thomu o
nongal a Krais ile riong.

⁶ Na thomu o mothong tova o pawom-
womal or tova o mit na o the thomu.
Aveto aro thomu o betet inga nge lomu
omaing ranga ve aka thomu ini a Krais
ile umongare aka o panes a God ilemi nge
lomumu alavusnga.

⁷ Aro thomu o oma lomu omaing nge
lomumu alavusnga ranga ve aka o oma

i nge a Toko Pomnga, na nge tokokoere
avele.

⁸ Eneke lomumu mire aka ve, Toko
Pomnga aro i olal toko alavusnga nge ole
omaing aka i sivenga. Aro ve ini toko um
polpolngga eve ini toko aka ile mukalinga
avele, aken ini ur polpolngga a God itheki.

⁹ Na thomu tokokoe areko o theal lomu
toko um polpolongare, aro thomu o panes
mun vothung aka tho ria lomu toko um
polpolongare nge. Na thomu o mothong
tova o pangeipal or, eneke lomumu mire
ako ve, lomu Mukalinga i voth aka a Pen
a Urvet, na ini ole mukalinga mun. Na ile
thopolong nge toko alavusnga i vur e pel
inga a itheki.

*God ile riong aro i paseral toko lemioon-
gare ole.*

¹⁰ Na lek riong patopalalnga i vene: Mit
engeng nge lomu teoong a Toko Pomnga
nge na nge ile engenging aolonga.

¹¹ Aro thomu o teuna ur paseralonga
ako God i sungu i a thomu nge mo aro
thomu o mit engeng nge a Satan ile soven-
galo le apaltetongare,

¹² eneke te pun pel tomo nge tokokoere
avele, aveto te pun pel tomo nge tamata
kerengare aka o voth a malang po, tomo
nge mothukre, na toko onire, na mele-
unre, na ur pelek pelekngare aka o theal
mideng ake te voth nge.

¹³ Maken aro thomu o teuna ol a God
ile paseralonga alavusnga, na nge wop
lewi aka nang kerenga aro i velpoltun
thomu, aro thomu o pavurvur aka aro o
mit engeng nge ngarangre ole punong, na
aro ve punpelng i vus, aro thomu rongan
o mit engeng inga.

¹⁴ Na thomu o mit engeng inga, na o kin
engeng riong nunganga a lomu pat ranga
ve ini let. Na o kin engeng mun vothung
vengvenga a lomu pat mo i ranga ve ini
tekruk engenga aka i paseral pakeumu.

¹⁵ Na o kino Panongpolong Sivenga aka
i pavelpol lemi moring, a evomu salemi
mo o mit bibim nge, aken o monsi lale nge
ipanongpolngga.

¹⁶ Na o kino ur areke lamo o ela mun
lom kiltho aka ini lom lemioong, eneke i
pavurvur aka aro i susuv a Satan ile peang
wo velvelnga aka i ul i a thomu nge me.

17 Na o uru a God ile sungong ako i el werer thomu lale mo i paseral poungomu. Na o ela mun a God ile riong aka Ioni Riringa i sungu i a thomu nge mo i ranga ve ini lomu bainat wowonga.

18 Na evelenga aro thomu o nong a God nge, nge Ioni Riringa ile engenging, na o pesrou avele nge nongong rel relnga na ninong a i nge. Naro thomu o thealal na o kis lomu nongong nge a God ile tokokoere mo aro God i opoal or.

19 Na thomu o nong mun nge tho ve aro God i paeso ile riong a wok nge tova ve tho monsi nge riong paespotnga, naro tho ngeip avele nge aka aro tho panongpol nge riong aka nomenga i ngo kine aka ini Panongpolong Sivenga.

20 Na tho voth a mang a midenga, eneke tho ini a Jisas Krais ile riong elnga aka tho panongpol nge Panongpolong Sivenga. Naro thomu o nong a God nge mo aro i paengeng tho mo tho ngange avele naro tho panongpol Panongpolong Sivenga ranga ve aka i sis ve aro tho panongpol nge.

Pol ile riong patopalalnga.

21-22 Na tho pake a Tikikus a thomu nge wot mo i ritet thomu nge ur alavusnga aka i velpol a tho nge, mo aro lomumu mire mun nge lek menong na nge lek omaing. Na ini titeir aka ar sagu i na ini umonga aka i oma senu a Toko Pomnga ile omaing. Naro i ritet nge lemem menong ake naro i paengeng lomumu.

23 Naro titeir areko or ini toko lemioon-gare aro o el lemi moring na asaguong na lemioong a Titemer a God tomo nge ar Pomnga a Jisas Krais nge.

24 Naro God ile themosaling aro i voth tomo nge areko ole asaguong i pesrou a ar Pomnga a Jisas Krais nge avele.

Na i re aken. I vus.

Pol ile malueng ako i wat i a toko lemioongare nge ako o voth a rem a Pilipai Pilipai

Ritetong nge a Pilipai

Nge wop lemi aka Pol i plosa ma i es aka la a epee a Masedonia mo aro i panongpol or nge Panongpolong Sivenga, i es aka a rem pomnga a Pilipai. (O thepolo Pakekere ole Omaing 16:9-40) Na ile panongpolong aken i pavelpol toko lemioonga pelie a rem aken. Lamako i los lelpot or. Na tovu po pelie i vus, lamako o rere a Pol a rem relnga e, ma o paeso i a mang a midenga lemi. Na toko powe ninengare o ri ve i voth a mang a midenga aka a rem pomnga a Rom. (Pakeke 28:14-31) Na Pol i wat malueng aka a mang a midenga lemi mo i ri ve aro i ri sivenga nge Pilipai angare, ke o seveal opoaling e sungongre a i nge. (1:5; 4:10-19) Na i ritet mun or nge ile menong aka a mang a midenga lemi. Na toko pelie o sis ve aro o pavelpol mun matheong pelie a Pol nge, aveto Pol ilemi voth mos nge math-eong aken tomo nge ile menong a mang a midenga lemi, kene avele. Avele, ilemi sivenga inga aka Panongpolong Sivenga i kima a pen elonga. (1:12-26) Na lemi sivengaing a vothung ini ur aalonga aka malueng aka i ri nge. (1:4; 1:18; 2:2; 2:17-18; 2:28-29; 3:1; 4:1; 4:4) Na Pol i pator toko lemioongare aka o voth a Pilipai mo o mit engeng na o ngeip avele nge Panongpolong Sivenga panesnga. Na o mothong tova o ngange nge areko o sis ve aro o pakerenga or. (1:27-30) Aken ini ur aalonga aka i voth a malueng aka lemi. Na Pol i nin mun Pilipai angare ve aro o paruru osivenga mo o opoal tokokoere, ranga ve aka Krais i oma i. Krais ini a God, aveto i paruru isivenga ma i velpol ini toko neneanga, na i ranga ve ini toko umonga aka i opoal it. (2:1-11) Na i ria mun or ve aro i pake toko sivenga or aini a or nge, ini a Timoti ome a Epaproditus. (2:19-30) Na i tor mun ole nge pamirealonga le

apaltetongare aka o ri ve, i pavurvur toko i velpol ini toko vengvenga a God itheki, tova ve i panes vothung sivenga aka toko ulue angare o ri nge. Aveto Pol i ri ve, aro lemiro inga nge a Krais, aken aro te velpol ini toko vengvengare a God itheki. (3:1-21)

Pilipai angare o velpol ini a Pol itein sivesivengare, mako Pol ilemi sivenga rintet nge or

(Vonge 1:1-4:23)

¹ Tho a Pol tomo nge a Timoti, them ini a Krais Jisas ile umongare.

Na tho wat malueng aka a thomu areko ini a God ile tokokoe alavusnga areko o teo a Krais Jisas nge, aka o voth a Pilipai, tomo mun nge areko or ini lotu a mukalingare aka ole lemioong i motu, na ole opoalingare mun.

² Aro thomu o el themosaling na lemi moring a Titemer a God tomo nge ar Pomnga a Jisas Krais nge.

*Pol ilemi rum Pilipai angare ole sungong
a i nge ma i ri sivengaing a God nge.*

³ Tho ri sivengaing a God nge, nge lomu lemi rumong alavusnga nge tho.

⁴ Na nge lek nongong alavusnga, tho nong a God nge, nge thomu, ma tho nong tomo nge riseaing,

⁵ eneke thomu o opoal tho nge Panongpolong Sivenga panongpolngaka nge lomu sungong. Na lomu omaing aken i patea nge nang aka thomu o nongpol tel panongpolong aken, na i mul nge ponange.

⁶ Na tho nong mun venen aken, eneke lelik mire aka i nunganga lale aka ve, God aka i patea ile omaing sivenga a lomumu, aro i kis ile omaing aken i mul nge aka aro i pavus i, nge nang aka Jisas Krais aro i lo werer nge me.

⁷ Na i vengveng aka aro lelik i voth venen aken nge thomu, eneke ok sagu rintet thomu, eneke aro ve tho voth a mang a midenga, eve tho mit nge riong mo tho lel nge panongpolong aka tho panongpol nge, na tho pathengal i aka ve, Panongpolong Sivenga aken i nunganga, aken kene

thomu o opoal tho nge lek omaing nge Panongpolong Sivenga panongpolnga ako God i sungu i a tho nge, nge ile themosaling, na thomu o opoal tho nge aken nge lomu sungong a tho nge.

⁸ Na God ilemi mire ako lek riong ake i nunganga ako tho ri ve, lemik i engeng ve aro tho voth werer tomo nge thomu, na ok sagu thomu nge a Krais Jisas ile asaguong ako i voth a tho nge.

⁹ Na lek nongong nge thomu i vene: Aro thomu o rong esa lomu asagupeling nge ako aro lomu mire i aolonga nge a God, naro lomumu i nine nge ur alavusnga.

¹⁰ Na tho nong ve aro thomu o venen re aken, mo aro thomu o pavurvur ako aro o avrum senu vothung kathnga aka i sivenga rintet, na nge aka aro thomu o riri, na toko e avele i pavurvur aro i teltun omu. Na ake ini lomu omaing aka o monsi nge nang aka aro Krais i lo werer nge me.

¹¹ Na tho nong mun ve aro thomu o vual nge vothung vengvenga aka Jisas Krais i pavelpol i a lomu mimiong mo aro tokokoere aro o thopol lomu mimiong aken, naro o papomnga a God na o risea i nge.

Pol ile esoong a mang a midenga i paengeng tokokoere nge Panongpolong Sivenga panongpolnga.

¹² Titeikre, tho sis ve aro lomumu mire aka, ur aka i velpoltun tho, aka o paeso tho a mang a midenga, i mit roal Panongpolong Sivenga panongpolnga avele, aveto toko pulua rongan o nongpol nge.

¹³ Ranga ve aka mit tetalonga alavusnga aka o theal nepes a Sisar ile vel, tomo mun nge toko alavusnga aka o voth a pen ake, olemi mire aka tho voth a mang a midenga ake, eneke tho oma a Krais ile omaing.

¹⁴ Na toko lemioonga pulua o thopol a God ile opoaling nge tho, aka tho voth a mang a midenga ake, mako ole lemioong i engeng nge a Toko Pomnga, mako ole ngeipong ol e avele na o panongpol engeng nge a God ile riong.

¹⁵ Na i nunganga aka toko pelie oni plong nge iok le kimaing na oni silal tho, mako o panongpol nge a Krais ile riong. Aveto pelie o panongpol, eneke ole lemi rumong i sivenga nge tho.

¹⁶ Or ini areko o panongpol, eneke oa sagu tho, na ole mi mire ako, tho voth a mang a midenga mo aro tho mit nge riong, naro tho lel nge Panongpolong Sivenga aka tho panongpolong nge.

¹⁷ Aveto areko oni plong nge iok le ki-maing, o panongpol mun nge a Krais ile riong, eneke o sis ve aro o theal osivenga, na ole lemi rumong i vengveng avele, na ole mi mire ake ve, o pavurvur aka aro o rong esa matheong mun a tho nge, aka tho voth a mang a midenga lemi.

¹⁸ Na i vava nge aken? Aro ve ole lemi rumong i sivenga eve i kerenga, ur e avele, eneke ake ini a Krais ile panongpolong aka tokokoere o nongpol i, na lemik i sivenga nge aken.

Pol i sis ve aro ile mimiong alavusnga aro i papomnga a Krais iion.

Na o sis ve aro o palemi kerere tho, aveto aro tho kis inga riseaing,

¹⁹ eneke nge lomu nongong a God nge, nge tho, na nge a Jisas Krais Ioni ile mit tomoing nge tho, kene lemik mire aka ur areken aro i pavelpol lek mimiong el werernga.

²⁰ Na lemik ve aro i velpol venen re aken, eneke tho sis rintet ve aro tho oma ur e avele aka aro lek mara nge, ave tho sis ve ponange na panen aro tho mit engeng, na evelelenga aro tho papomnga a Krais nge lek mimiong tomo mun nge lek rinong.

²¹ Na lemik i vene, eneke aro ve tho mimi, aro tho papomnga inga a Krais. Na aro ve tho rin, aro i sivenga nge aken.

²² Aveto aro ve rongan tho mimi, tho pavurvur aro tho oma a Krais ile omaing mun pelie. Naro tho panes kathnga? Aro tho mimi eve tho rin? I pavurvur aro tho ritet thomu nge avele.

²³ Eneke lemik aini aini tun nge, tho sis ve aro tho rin mo aro tho voth tomo ol nge a Krais, eneke aken i sivenga rintet nge mimiong ake ru a ulue.

²⁴ Aveto nge thomu, i sivenga aka tova ve aro tho mimi ake ru a ulue mo aka aro tho opoal thomu. Na opoalngomu aken kene i aolonga rintet nge lek esoong a Pen a Urvet.

²⁵ Na lenik i engeng ve lek omaing rongan i voth ako aro tho opoal thomunge, aken lenik mire lale aka ve, aro tho mimi, naro tho kis inga nge opoalngomu mo aro lomu lemioong i motu, naro lomu lemi sivengaing nge lomu lemioong aken aro i aolonga.

²⁶ Na nge aka tho velpol werer a thomunge, aro tho opoal thomu venen aken mo aro thomu o vuall rintet nge a Krais Jisas iriseanga, eneke tho ake aro tho voth tomo werer mun nge thomu.

O mit engeng nge lomu lemioong na o el inga matheong, eneke God i sungu or alaini a thomu nge.

²⁷ Na ur inga aka i aolonga ini lomu mimiong aka aro i panes vothung aka Krais ile Panongpolong Sivenga i ri nge. Na aro ve tho es na tho thopol thomu, eve tho voth mela nge thomu, aro thomu o oma venen aken mo aro tho nongpol aka rongan thomu o mit engeng, na lomumu omole ol inga nge aka lomu vur engeng ranga ve ini toko omole, nge lomu lemioong panesnga aka Panongpolong Sivenga i pavelpol i a thomu nge.

²⁸ Na tho sis ve aro tho nongpol mun aka thomu o mit engeng nge aka saluk thomu tie avele nge lomu ngarangre. Na aro ve saluk thomu nge lomu ngarangre avele, aken i pathengal or ve, God aro i pakerenga or, na i pathengal mun thomuve, God aro i pamimi thomu.

²⁹ Naro o mit engeng, eneke God i oma senu nge thomu, aka isa wompot thomuve aro o oma a Krais ile omaing, na ilemi inga ve aro lomumuo inga nge i avele, aveto aro o el mun matheong, eneke thomu ini ile.

³⁰ Na ur aken i nunganga, eneke thomu o el matheong ranga ve aka thomu o thopol i aka tho el i nomenga, na ponange thomu o nongpol mun aka rongan tho el i.

2

Te mothong tova te opoal inga sivenger.

¹ I nunganga aka lomu teoong a Krais nge i paengeng thomu, na i nunganga mun aka ile asaguong i pasivenga lomumu, na i nunganga mun aka Oni Riringa omole

inga i voth a lomumu omole omole, na i nunganga mun aka lomumu esal pel na o themosal mun pel.

² Maken aro thomu o palemi senu rintet tho nge lomu vothung aka ranga ve, lomu lemi rumong kene aro i vur e pel inga, na lomu asaguong kene aro i vur e pel mun inga, naro lomu omaing tepun omole ol inga, na lomumu kene aro i omoletet inga.

³ Na o mothong tova o theal inga sivengomu, eve o oma ur aka aro i papomnaga polpol iomu nge, aveto aro o paruru sivengomu na lomumu aka ve, tokokoere o pomnga nge thomu.

⁴ Na o mothong tova lomumu i voth inga nge ur aka aro i opoal sivengomu, aveto aro lomumu i voth mun nge ur aka aro i opoal tokokoere.

Aro te paruru sivenger ranga ve aka Krais i paruru isivenga.

⁵ Na lomu lemi rumong aro i vene re aken, aka ranga ve ini a Krais Jisas ile. Na ile lemi rumong i vene:

⁶ Na evelelnga i voth ini a God, aveto ilemi ve aro i krim tuntun ile menong

ako i vur e pel tomo nge a God,
kene avele.

⁷ Aveto i eltetpot isivenga nge ile menong
aken
ma i velpol ini toko,
ma i men vulut ol inga
ranga ve ini toko um polpolonga.

⁸ Na tokokoere o thopol i
ma i ate ranga ve ini toko,
ma i paruru isivenga,
na i panes a God ilemi,
ma i mul nge ile rinong
ako i rin alamimminga a won
ngoronga nge.

⁹ Mako God i paesa i roro rintet,
ma i aosele toko alavusnga,
ma i sungu ion e
ako i roro rintet nge ioning
alavusnga a i nge.

¹⁰ Na i oma venen aken
mo aro ur alavusnga
ako o voth a Pen a Urvet,
na malang po, na ulue, na Wali,
aro o koru oeve
mo o papomnaga a Jisas iion aken.

11 Na e mun e nge ako aro or alavusnga
aro o ri milimlemu i ako ve,
Jisas Krais ini ur alavusnga oa Pom-
nga.
Na nge ole riong aken
aro o papomnga mun a God
ako ini Titemer.

*Aro ler mimiong aro i to ranga ve ini
sivemitre.*

12 Maken, thomu areko ok sagu thomu, God i el werer thomu lale, maken aro thomu o oma ol vothung ako i panes lomu menong tomo nge a God aken, ranga ve aka evelelnga thomu o panes vothung nongalnga aka thomu o oma i nge aka tho voth tomo nge thomu. Na ponange tho voth tomo nge thomu avele, na i sivenga rintet aka aro thomu o kis reletun inga vothung aken omanga. Na nge aka thomu o oma venen aken, aro o pavothal rintet nge a God,

13 Eneke ini God aka i um a lomumu na i sung ile engenging na ile lowoming a thomu nge, ve aro o oma omaing aka i sis ve aro o oma i.

14 Na nge lomu omaing elonga o mothong tova o ri pompom na o vol pel a lemi.

15 Aro thomu o oma venen aken, mo aro thomu o velpol ini tokokoe areko toko e avele i pavurvur nge teltunngomua, naro lomu vothung i riri inga, naro thomu ini a God itutunre aka o oma vothung kerenga e avele, nge aka thomu o voth tomo nge areko o leklek na o oma inga vothung kerenga. Na lomu tolilisong i ranga ve ini sivemitre aka o topot a tokokoe areken oa lemimi.

16 Naro thomu o topot a oa lemimi, nge aka aro thomu o krim engeng nge riong aka i sung mimiong. Na tho sis ve aro thomu o oma venen aken, mo aro tho pavurvur aka aro tho pasea thomu nge nang aka aro Krais i lo werer nge me, aka lek omaing engenga a thomu nge kene ini ur polpolnga avele.

17 Aveto aro ve ur kerenga i velpoltun tho, aro lemk i sivenga inga nge. Na lomu lemioong i ranga ve ini sungong aka thomu o oma i a God nge, na aro ve o palel ok mla, na o otoka i a lomu sungong aken nge, mo aka aro i pavus lomu sungong

aken, akennga aro lemk i sivenga inga tomo nge thomu alavusnga.

18 Na tho sis ve aro lomumu i sivenga mun venen aken, mo lomumu i sivenga tomo inga nge tho.

*Riong nongpolnga aro i ritet tel aka
ilemi vava nge a Pol, lamoko Pol aro i
pakepot a Timoti a Pilipai angare nge la.*

19 Na lelle inga atike na lemk ve aka tho pavurvur aro tho pakepot a Timoti a thomu nge wot, tova ve Toko Pomnga a Jisas i sis ve aro tho oma venen aken. Naro tho pakepot i mo aro lemk sivenga mun tomo nge thomu nge aka aro tho nongpol nge lomu menong le kimaing.

20 Aro tho pakepot a Timoti, eneke toko ol e avele ilemi rumal thomu nge lomu menong ranga ve ini i.

21 Eneke toko elonga o theal inga aka ini osivenga ole menong, na olemi i votn nge a Jisas Krais ile omaing avele.

22 Aveto lomumu mire lale aka ve, Timoti ini toko aka i mit engeng nge tongporumong, nge aka i um tomo nge tho nge Panongpolong Sivenga panongpolnga, ranga ve ini wain aka i um tomo nge itema.

23 Maken palolo avele na lemk ve aka tho pavurvur aro tho pakepot i a thomu nge wot. Na nge aka lemk mire nge ur kathnga aka aro i velpoltun tho, lamoko aro tho pakepot i a thomu nge wot viri viri.

24 Na lemk i votn nge a Toko Pomnga ve, aka aro lelle inga atike na engek aro tho es mun a thomu nge wot.

*Pol i ri ve aro i pakepot tel a Epaproditus
a Pilipai angare nge la.*

25 Na lemk ve i vengveng aka aro tho pake werer a Epaproditus a thomu nge wot. Ini teik aka i um tomo nge tho na i mit tomo nge tho nge punong a omaing. Na ini lomu riong elnga aka thomu o pake i tomo nge lomu sungong mo i opoal tho nge ur aka tho poor nge.

26 Naro tho pake werer i a thomu nge wot, eneke ilemi votn engeng nge thomu alavusnga, na ilemi kerere, eneke lomumu i votn a i nge, nge aka thomu o nongpol aka ini multhang.

²⁷ Na i nunganga ako i ngoo ma i toth ako aro i rin, aveto God i sung ile themosaling a i nge, na i sungu i a ienga inga nge avele, aveto i sung mun i a tho nge, aro vene mo tho el matheong mun e.

²⁸ Maken lok wom rintet nge i ve aro tho pake i a thomu nge wot mo aka aro ve thomu o thopol werer mun i, aro lomumu i sivenga nge i, maken aro lemik i sivenga werer tie nge thomu.

²⁹ Maken aro thomu o nongpoo i nge a Toko Pomnga iion tomo nge riseaing aolonga. Naro o papomnga tokokoe areko o ranga ve ini i,

³⁰ eneke i sungpot ile mimiong, mako i toth aka aro i rin, nge aka i oma a Krais ile omaing, na i sung opoaling nge tho aro thomu o pavurvur nge omanga avele.

3

Te velpol ini toko vengvengare a God itheki aka nge ler lemioong inga.

¹ Na titeikre, lek riong patopalalnga i vene: Aro lomumu sivenga, eneke thomu ini a Toko Pomnga ile. Na aro ve tho wat mun riong a thomu nge aka tho ri tel i a thomu nge lale, ur ol e avele ol a tho nge, aka aro tho oma i, eneke ake ko aro i paseral thomu.

² Na o nakalal thomu nge areko o ranga ve ini nanau pilre. Or ini areko o oma vothung kerenga na o isis pelekpol ole, mako olemi ve o velpol ini a God ile.*

³ Eneke it re ake ini a God ile aka i istetpot ler vothung kerenga a it nge na te lotual a God nge Ioni Riringa, na lemire ngo nge a Krais Jisas ile omaing a it nge, na lemire ol nge ler vothung aka aro i opoal it, kene avele.

⁴ Aveto sivengek, tho pavurvur aka aro lemik i ngo nge lek vothung mo i opoal tho, tova ve i sivenga aka aro tho oma venen aken, ave i sivenga avele.

Na aro ve toko e ilemi ve i pavurvur aro ilemi i ngo nge ile vothung, akennga tho mukal nge i.

* **3:2:** Pol i ri nge areko o engeng nge a Moses ile patorong panesnga tomo mun nge a Jisas ile riong panesnga. Maken o engeng ve aro toko lemioongare aro o is mun ole mo aro o velpol ini a God ile. † **3:6:** O thepol a Pakeke 8:3; 22:3-4 na Galesia 1:13-14.

⁵ Lek nang or limme, nako o is lek, na tho ini toko Israel, na lek net re ake ini a Benjamin, na nomenga tho panes Hibrure oa pompomere ole vothung, na lemik mire nge okei, na tho mun ini Parisi, or ini toko avlung aka o panes vengveng rintet a Moses ile patorong,

⁶ na tho sis rintet ve aro tho oma a God ile omaing, make nomenga tho pakerenga areko olelio nge a Jisas,† na toko e avele i pavurvur aka aro i teltun ok nge a Moses ile patorong panesnga.

⁷ Aveto ur areken aka nomenga lemik ve aro i opoal tho, ponange lemik mire lale aka ve, i mit roal aka ini tho nge a Krais ielonga.

⁸ I nunganga aka ur alavusnga aken elonga ini ur polpolnga ol re a lemik, eneke tho sis rintet ve aro tho ini a Krais Jisas ile, aka ini ok pomnga, na aken i sivenga rintet nge ur alavusnga. Na nge ipanesnga tho modop ur alavusnga, na lemik nge aka i ranga ve ini sesalang, na tho oma venen aken mo aro tho elo a Krais mo ini lek

⁹ na tho ini ile, na tho velpol ini toko vengvenga nge aka tho panes a Moses ile patorong, kene avele. Aveto God i oma tho mo tho ini toko vengvenga a itheki, eneke nge lek lemioong inga nge a Krais.

¹⁰ Na tho sis ve aro tho voth ol ini a Krais ile, na tho sis mun ve aro God ile engenging aka i palos werera Krais nge, aro i voth mun a lek mimiong. Na matheong aka Krais i el i, tho sis mun ve aro tho el mun i. Na tho sis mun ve aro lek lemi rumong i ranga ve ini ile lemi rumong aka i voth a i nge, nge aka i rin.

¹¹ Maken aro tho voth tomo mun nge areko Krais aro i palos werera or nge rinong, ave aro tho es tomo nge or vava?

Pol i um ranga ve aka i tho engeng nge sertetpeling.

¹² Na o mothong tova lomumu ve tho ini toko vengvenga lale, eve tho sivenga rintet mun lale, avele. Aveto tho, tho engeng ve aro tho krim bibim ur areken, eneke Krais

i krim bibim tho mo aro tho oma venen aken.

¹³ Titeikre, lemik ako ve, tho krim bibim ur areken rongan. Aveto ur omole inga ako tho oma i kene i vene: Tho the werer avele, na tho tho engeng inga a mukaling la,

¹⁴ na tho engeng ve aro tho sertet mo tho mul nge wop ako God i ateal i ve ini lek, mo aro tho ela ile sungong Pen a Urvet anga ako i ateal i a tho nge, nge ako tho teo a Krais Jisas nge.

¹⁵ Maken areko a it nge ako o motu nge ler teoong a Krais nge lale, aro lemire aro i venen re aken. Na aro ve omu e ilemi ngo relpot, akennga God aro i pathengal mun i nge.

¹⁶ Aveto i sivenga ako aro te kis reletun inga nge vothung aro God i pathengal i a it nge lale.

¹⁷ Titeikre, aro thomu o oma i ranga ve aro tho oma i, na o naktet lomu vothung ranga ve aro thomu o thopol i a them nge.

¹⁸ Tho ri venen aken, eneke toko pulua ole vothung i ranga ve aro ole ngarang nge omaing aro Krais i oma i a won ngoronga nge, na nomenga tho ritet thomu nge or papulua, na ponange tho ritet mun thomu nge or, ma tho tang nge.

¹⁹ Na ole god aro o panes i, ini ur areko i voth a oopo lemi, na vothung aro ler mara nge, kene o papomnga osivenga nge omanga, na ole lemi rumong i voth inga nge ur ulue anga, naro nge ole vusong aro o el kerengaing.

²⁰ Aveto it kene ini Pen a Urvet anga, na lor wom nge aro te men total toko pamimionga aro i esu a pen aken nge me, ini Toko Pomnga a Jisas Krais.

²¹ Naro i eksing nir peti sesnga mo i velpol ranga ve ini isivenga ini peti a urvet, naro i oma venen re aken nge ile engenging aro i paesu ur alavusnga a isa thewo nge.

4

Pol i pator Pilipai angare ole.

¹ Maken titeik areko ok sagu thomu, aro thomu o mit engeng nge a Toko Pomnga ranga ve aro tho wat i a thomu nge lale. Na lemik i voth engeng nge thomu, na

thomu o palemi senu tho, na thomu o ranga ve ini ok vevea aro o pauru tho nge, na thomu re ake ini thengengek areko ok sagu thomu.

² Na tho tor engeng a Iuodia ome a Sintike ve aro ole volpeling i vus, naro or paini ole lemi rumong i omole ol inga, eneke or paini o teo a Toko Pomnga nge.

³ Na e mun e aro, kles, tho nin wong ve aro ong opoal seng or aini aken aro o um engeng tomo nge tho nge Panongpolong Sivenga panongpolnga, tomo mun nge a Klemen na thengengek areko them um tomo nge pel, na or kene oion i voth a erere nge aro i ritet nge areko God aro i sung mimiong aro aro ile vusonga avele a or nge.

⁴ Na evelelnga aro thomu o risea nge lomu teoong a Toko Pomnga nge, naro tho ria mun ve, aro thomu o risea i.

⁵ Naro thomu o pathengal lomu mosing a vothung a toko alavusnga nge, eneke Toko Pomnga i toth me lale.

⁶ Na o mothong tova lomumu rit nge ur e, aveto nge menong elonga, aro thomu o nin a God nge lomu nongong tomo nge ri sivengaing a i nge.

⁷ Maken aro God ile lemi moring aro i aolo leltun ler lemi rumong aro i paseral lomumu na lomu lemi rumong, eneke thomu o teo a Jisas Krais nge.

⁸ Na titeikre lek riong patopalalnga i vene: Ur kathnga i nunganga, na ur kathnga aro te pavothal nge, na ur kathnga mun i vengveng, na ur kathnga i riri rintet, na ur kathnga mun e aro ar sagu i, na vothung kathnga aro i sivenga aro te theseal i, na ur alavusnga aro i sivenga, na ur alavusnga aro tokokoere o risea i, kene aro lomumu rumsetun nge ur alavusnga areken.

⁹ Na ur kathnga mun aro tho patorial thomu nge na tho sung esu i a thomu nge, na ur aro o nongpol i nge tho, na o thopol i a tho nge, aro thomu o kis inga omanga.

Pol i ri sivenga nge sungong aro i el i a Pilipai angare nge.

¹⁰ Tho risea Toko Pomnga roro nge ile omaing aro i palolo mun tie, lamako thomu o paponganga werer mun lomu

lemi rumong nge tho. Na i nunganga ako rongan lomumu rum tho, aveto lomu sovengalo e avele aka aro thomu o pathengal i a tho nge.

¹¹ Na o mothong tova lomumu ve, tho ri venen aken, eneke tho poor nge ur pelie, eneke tho el mire lale nge aka aro lemik sivenga inga nge menong kathnga aka tho voth nge.

¹² Na lemik mire nge sivengek thealngeka tova ve, tho men vulut, eve lek ur elonga pom, na nge menong elonga aka tho voth nge, tho el mire lale nge aka aro lemik sivenga inga nge, tova eve sek pup, eve tho men mesi, na eve lek ur elonga pom, na eve tho oror mun nge ur pelie.

¹³ Tho pavurvur nge menong elonga areke mennga, eneke tho el engenging a Toko Pomnga nge lale.

¹⁴ Aken i nunganga, aveto i sivenga nge thomu aka thomu o el mun lek matheong.

¹⁵ Na thomu Pilipai angare sivengomu lomumu mire mun aka nge wop lemi aka thomu o nongpol tel Panongpolong Sivenga nge tho, lama tho plos lelpot lomu epee a Masedonia, na tho el sungong mun nge rem e avele aka lotu i voth nge, ini inga engomu.*

¹⁶ Na rongan tho voth tothal a thomu nge aka a Tesalonaika, palolo avele, nako thomu o opoal tho nge lomu sungong pa omole inga a tho nge avele, nge aka tho oror nge ur pelie.†

¹⁷ Na o mothong tova lomumu ve, tho engeng nge sungong elnga, avele, aveto tho engeng ve aro lomu sungong monnga aro i aolonga a thomu nge.

¹⁸ Na i ranga ve aka tho el omu thangaroong olalnga lale na i vus re aken, na thomu o pangoloa i, na tho oror ol nge ur e avele ol, nge aka tho ela lomu sungongre aka o sungu i a Epaproditus nge ma i pasong i a tho nge me. Na lomu sungong aken i ranga ve ini sungong aka thomu o sungu i a God nge aka i una vro na God ilemi i sivenga nge ma i risea mun nge.

¹⁹ Na lek God aka ile ur sivesivenga aka i pom rintet, aro i sung ur alavusnga aka

thomu o oror nge a thomu nge, nge aka thomu o teo a Krais Jisas nge.

²⁰ Maken aro te risea ar Vovo a God evelelnga aka aro ile vusonga avele. I nunganga.

Pol i patopalal ile malueng.

²¹ Tho pasungalu lek nang sivenga a God ile tokokoe alavusnga areko o teo a Krais Jisas nge. Na titeik areke o um tomo nge tho o pasungalu mun ole nang sivenga a thomu nge.

²² Na God ile tokokoere aka o voth a pen ake o pasungalu mun ole nang sivenga a thomu nge tomo mun nge areko o theal a nepes a Sisar ile vel ake.

²³ Na Toko Pomnga a Jisas Krais ile themosaling aro i voth tomo nge thomu.

Na i re aken. I vus.

* **4:15:** O thepol a 2 Korin 11:9. † **4:16:** O thopol a Pol ile esu esaing ake nge a Pakeke 16:11-17:10.

vual a i n g e

Pol ile malueng ako i wat i a toko lemioongare nge aka o voth a rem a Kolosi Kolosi Ritetong nge a Kolosi

Ava Pol i voth a mang a midenga lemi aka a rem pomnga a Rom, na i wat malueng aka a toko lemioongare nge aka o voth a Kolosi aka a epee a Esia. (Pakekere ole Omaing 28:16-21) Nge wop lemi aken i wat mun malueng or aini, e a Pilemon nge, na e a Epesus angare nge. Na Kolosi anga pelie o velpol ini toko lemioongare aka nge a Pol ile panongpolong avele, ava ini inga a Epapras aka i nongpol Panongpolong Sivenga aka Pol i panongpol Epesus angare nge, mako i es ma i panongpol Kolosi angare nge. (1:7-8; Pakeke 19:10) Pol i wat malueng aka mo aro i tor Kolosi angare ole nge pamirealonga le apaltetongare ole riong le apaltetonga pulua. Ranga ve aka o paroro nang pelie, (2:16) na o paroro mun enselre. (2:18) Na o sis ve aro toko alavusnga aro o panes a Moses ile patorong, (2:21, 26) naro o panes mun vothung aka nge toko ini peti isnga. (2:11) Na olo wom inga nge mire ulue anga panesnga, na o rivenga mire aken panesnga aro i sung mimiiong sivenga a tokokoere nge. (2:4, 8, 18) Aveto Pol ilo wom rintet nge a Krais ipanesnga, na i ri ve ienga inga i pavurvur aka aro i el werer it, na ini inga a God ia sei. (1:15) Krais i pamenu ur alavusnga nomenga. (1:16) Na nge a Krais ile engenging ur alavusnga o voth pis a omei. (1:17) Krais ini toko teltelnga aka i los werera nge rinong. (1:18) Na Krais ome a God kene o thun inga. (1:19; 2:9) Krais i pamu werer ur alavusnga a God nge. (1:20-22) Maken Krais i mukal nge ur alavusnga, na i pavurvur rintet nge pamiminger. Aken ini ur aolonga aka malueng ake i ri nge.

Ur alavusnga i voth a Krais isa thewo, na God ile mimiiong na ile vothung i

(Vonge 1:1-3:4)

¹ Tho ini a Pol aka God i panes ilemi ma i ateal tho ve tho ini a Krais Jisas ile pakeke na titeir a Timoti i voth tomo nge tho.

² Tho wat malueng ake a thomu titeikre aka ini a God ile toko riringare aka a Kolosi, thomu aka o teo a Krais nge na o panes senu i.

Aro Titemer a God aro i sungu ile themosaling na ile lemi moring a thomu nge.

Pol i ri sivengaing a God nge, nge Kolosi angare.

³ Na nge nang elonga aka them nong nge thomu, them ri sivengaing a God nge aka ini ar Pomnga a Jisas Krais Itema,

⁴ eneke them nongpol nge lomu lemioong nge a Krais Jisas na nge lomu asaguong nge a God ile toko lemioonga alavusnga.

⁵ Na nomenga nge wop lemi aka thomu o nongpol riong nunganga aka ini Panongpolong Sivenga na lomumuo nge, thomu o nongpol nge ur aka God i monsi i lale a Pen a Urvet ve aro i sungu i a thomu nge, mako o men sial i. Na lomu men sialing nge ur sivenga aken i pavelpol lomu lemioong na lomu asaguong aken.

⁶ Na Panongpolong Sivenga aka i velpol a thomu nge, toko pulua a pen elonga ake ru a ulue o nongpol mun i, na i pavelpol monnga a ole mimiiong ranga ve aka i pavelpol ol monnga a lomu mimiiong, nomenga i patea nge nang aka thomu o nongpol i, na lomumu i nine nge aka God ile themosaling nge toko alavusnga i nunganga.

⁷ Na Epapras kene i patorial thomu nge a God ile themosaling aken. Na ini a Krais ile umonga tomo nge them, na i oma senu a Krais ile omaing. Na ar sagu i na i opoal them nge lemem omaing.

⁸ Ma i ritet them nge lomu asaguong aka Oni Riringa i pavelpol i a thomu nge.

Pol i nong a God nge mo i paengeng Kolosi angare olemi.

⁹ Mako i patea nge nang aka Epapras i ritet them nge thomu, na them pesrou nge nongong nge thomu avele. Na them

nong a God nge ve aro i panine lomu mire mo i aolonga nge Ioni Riringa ile omaing, maken aro lomu mire i nine senu nge ur ako God i sis ve aro thomu o oma i.

¹⁰ Na them nong venen aken, mo aro thomu o nak menong ako aro Toko Pomnga ilemi i sivenga nge, naro ilemi i sivenga mun nge lomu omaing alavusnga, naro thomu o pavelpol omaing sivesivengare, naro lomu mire nge a God aro i aolonga.

¹¹ Na them nong nge a God mo aro i paengeng thomu nge ile engeng elonga mo i pavurvur nge ile engeng elonga ako i pathengal i a tokokoere nge lale, mo aro thomu o mit engeng mun nge math-eongre potunnga, naro keumu a riong nge avele, naro lomumu i ngo senu inga nge.

¹² Na them nong mun ako aro thomu o ri sivengaing a Titemer nge ako i oma thomu mo aro thomu o el mun ur areko i ateal i nge ile tokokoere aka a Pen a Urvet aka i vual nge pen lalanga.

¹³ Na thomu o pavurvur nge ur aken elnga, eneke i eltetpot it a Satan imeni a mideng lemi, mako i paeso it a Itun aka ia sagu rintet i, a imeni nge.

¹⁴ Na nge Itun ile omaing, ilemi simikal ler vothung kerengare ma i ol werer it.

Pol i ri nge a Krais ile mimiong na ile omaing.

¹⁵ Na toko e avele i pavurvur aro i thopol a God, aveto te thopol a God ia sei aka a Itun nge. Na God ia tengen aken i voth tel, na i mukal nge ur alavusnga aka i pamenu ir.

¹⁶ Eneke ini ur alavusnga opateanga ma i pamenu ur alavusnga aka a Pen a Urvet na ulue, ur areko te thopol ir, tomo mun nge ur areko te thepol ir avele, ranga ve ini ensel engengare, na tamata kerengare, na meleunre, na ur engenga aka o voth a malang po. Na Itun i pamenu ur alavusnga mo aro ur alavusnga o pavothal nge i.

¹⁷ Na ur e avele i velpol rongan, na Krais i voth tel lale, na nge ienga inga ur alavusnga o voth pis a omei.

¹⁸ Na ini ile toko lemioongare opounga. Na toko lemioongare o rangga ve ini ilopat na o el mun ole mimiong a i nge, eneke ini

a God ia tengen aka i palos werera tel i nge rinong mo aro i mukal nge ur alavusnga.

¹⁹ Ma ini a God ia sei, eneke God i ateal i ve aro isivenga i vual rintet a i nge.

²⁰ Na God ilemi aka ve, aro ur alavusnga aka i voth a ulue na Pen a Urvet, aro o lo werer a i nge la, mako i sungpot Itun mo aro i rin a won ngoronga nge mo ia mla i pavelpol lemi moring a it nge.

²¹ Na nomenga thomu o voth mela a God nge, na lomu ngarang mun i, eneke nge lomu lemi rumong kerenga na lomu vothung kerengare.

²² Aveto ponange i pavelpol titeinpeling tomo nge thomu, nge Itun ile rinong aka o pun rin i alamimminga. Na i oma venen aken mo aro thomu o riri rintet, na o vengveng, na omu theki e avele,

²³ tova ve lomu lemioong i voth engeng inga aka a i nge, na o mit engeng, na o men sial engeng nge ur aka o nongpol i nge Panongpolong Sivenga. Ma tho a Pol, tho ini a God ile umonga nge Panongpolong Sivenga ake. Na Panongpolong Sivenga ake i kimapot a pen elonga ake ru a ulue.

Pol i ritet nge ile omaing aka God i sungu i a i nge.

²⁴ Na nge wop lemi ake, lemk sivenga inga nge sisong aka tho el i nge lek omaing aka tho panongpol areko or ini Judare avele, ranga ve ini thomu. Na tho patopalal sisong aka rongan i voth, aka Krais i ateal i ve aro tho el i, mo aro tho opoal ile toko lemioongare. Or kene o ranga ve ini ilopat.

²⁵ Na God inga aka i ateal tho ve tho ini toko lemioongare ole umonga aka aro tho panongpol thomu areko thomu ini Judare avele nge a God ile riong elonga.

²⁶ Ako nge ile riong inkinenga aka nomenga i ngo kine a pompomere nge, aveto ponange God i pathengal ol i a ile tokokoere nge.

²⁷ Na i ateal or ve aro ole mi mire aka ve, ile riong inkinenga aken i ri ve, God aro i oma senu rintet mun nge areko or ini Judare avele. Na ile omaing aken i mirenga ve, aro ve Krais i voth a opomu lemi, aro thomu o men sial ol nge ur sivesivengare aka a Pen a Urvet.

²⁸ Make them panongpol toko alavusnga nge a Krais. Na them tor ole na them pamireal or nge mire elonga aka God i sungu i a them nge, mo aro nge lemem omaing aken aro o motu nge ole teoong a Krais nge tova o mit a God itheki.

²⁹ Na ake ini lek omaing aka lok vur rintet nge omanga, nge a Krais ile engenging aolonga alavusnga aka i voth a tho nge.

2

Pol i paengeng Kolosi angare ole lemioong na i panakal mun or nge patoraling le apaltetongare.

¹ Tho sis ve aro lomumu mire nge lek omaing aka lok vur nge, ma i opoal thomu na toko lemioongare aka a Laodisia, tomo nge areko o thopol mun tho rongan.

² Na tho um engeng venen aken mo aro tho paengeng olemi, naro ole asagupeling aro i veliloalo or, maken aro o vual rintet nge lemi rumong sivenga elonga mo aro olemi mire nge a God ile riong inkinenga aka ini a Krais.

³ Na Krais ienga inga i pango pat a God ile mire na ile lemi rumong ninenga. Na nge ler teoong a i nge, te el ur sivesivenga areke aka i ngo kine nomenga.

⁴ Na tho ri venen aken, eneke nik plong ve aro toko pelie o ri ololo thomu, nge ole riong pelie aka i tang ranga ve ini riong nunganga.

⁵ Eneke tho kene tho voth tomo nge thomu avele, aveto lelik i voth tomo nge thomu. Na lelik sivenga nge aka thomu o mit engeng nge lomu lemioong nge a Krais, na toko e avele i pavurvur aro i atiteu lomu mitong.

Teoong inga aka a Krais nge i pavelpol mimiong nunganga.

⁶ Na nge lomu lemioong, thomu o elo a Jisas Krais a opomu lemi na ini omu pomnga. Na o kis inga lomu lemioong a i nge, nge lomu mimiong aka ranga ve thomu o teo a i nge.

⁷ Naro thomu o mit engeng a i nge ranga ve ini won aka iriripi i teu a ulue lemi. Naro thomu o pamit engeng lomu

mimiong a i nge ranga ve ini vel aka o ari i nge wovek papesnga. Naro thomu o paengeng lomu lemioong ranga ve aka o patorial thomu nge, naro evelelnga aro thomu o ri sivengaing a God nge.

⁸ Aro thomu o nakalal thomu nge toko le apaltetongare ole riong, aro vene mo thomu o ting nge ole ri ololoing. Na ole riong ini ur polpolnga na i nunganga avele, eneke o panes inga pompomere ole vothung na toko ulue angare ole mire, na areken o es a Krais nge me avele.

⁹ Na thomu o nakalal thomu, eneke lomumu mire aka Krais i velpol ini toko ranga ve ini it, na ur alavusnga aka i voth a God nge, i voth mun a i nge.

¹⁰ Na thomu o oror nge ur e avele, eneke thomu o teo a Krais nge, na i mukal nge tamatare tomo nge ur alavusnga aka ole engenging i voth.

¹¹ Na thomu o teo a Krais nge na thomu o el ile paatealing. Na ini paatealing aka tokokoere o oma i aka o is lomu,* kene avele, ini paatealing aka Krais i oma i aka i eltetpot vothung ulue anga a thomu nge.

¹² Na nge wop lemi aka thomu o el paninuong, aken ini ile paatealing aken, na i ranga ve aka thomu o rin, na God i tetun thomu tomo nge a Krais, lama i palos werera mun thomu tomo nge i, eneke lomumuo nge a God ile engenging aka i palos werera a Krais nge rinong.

¹³ Na nomenga thomu o oma lomu vothung kerenga. Na Krais i eltetpot vothung ulue anga a thomu nge rongan, na i ranga ve aka thomu o rin lale, aveto God i pamimi werera thomu tomo nge a Krais. Na ilemi simikal ler vothung kerengare.

¹⁴ Aken i ranga ve aka i pavus ol ar thangaroong a erere aka i wat ler vothung kerengare nge, tomo nge ile patorong aka i teltun it nge. Na i pavus ol i nge aka o sotuna a Jisas a won ngoronga nge.

¹⁵ Na nge a Krais ile omaing aken, God i pathengal tokokoere aka ve, ile mong a Satan tomo nge tamatare ole engenging,

* **2:11:** Paatealing neginga aka tokokoere o el i nge aka o panes a God ile riong kinnga nomenganga kene ini oni peti isnga.

na i thelal or na i pamit or a pulua otheki, lamako i palemara or.

Te rin lale tomo nge a Krais ako i pavus ol a Moses ile patorong panesnga.

¹⁶ Mako thomu o mothong tova o nongal areko olemi otun thomu nge aka thomu o panes Judare ole patorong avele, nge ur aka thomu o an i, na o thin i, na nge aning aoliloenga a nangre, na nge ngov ponganga a aningre, na nge nang rialonga.

¹⁷ Na ur areke i ranga ve ini patongrumong aka i pathengal pompome nomen-gangare nge ur aka aro i velpol panen. Na ur aka i pavelpol nunganga ol ur areken ini a Krais.

¹⁸ Na o mothong tova o nongal tokokoe areko ole apaltet nge aka o ri ve o paruru osivenga, na o lotual enselre, na o ri ve thomu o penthal lale, eneke thomu o panes ole riong avele. Tokokoe areken o ri pompom nge ur aka o thopol i nge oni theong, na o paroro polpol osivenga, eneke o panes inga mire ulue anga.

¹⁹ Na tokokoe areken o teo lollo vet a Krais nge avele, mako opouna avele, eneke o mothong a Krais aka ini toko lemioongare opouna aka i sung aning nge ini peti elonga mo aka ini peti epipeere o engeng nge av. Na God i papoma ini peti elonga aken.

²⁰ Thomu o rin tomo nge a Krais lale. Na thomu o vthopot ol nge a Moses ile patorong panesnga. Na i vova ake lomu mimiong rongan i ranga ve ini toko aka ilemio nge a Krais avele ile mimiong, e? Na i vova ake thomu o panes patorong aka ranga ve:

²¹ Mothong tova tongporum aning krim rumnga, na rom rumnga, na vugirnga, e?

²² Patorong areke i velpol nge toko ulue angare ole mire inga. Ma aning areken o velpol mo te an i, naro i vus werer mun.

²³ Na patorong areke te thopol i, ma i ranga ve aka mire ninenga i pavelpol i, eneke itheki ranga ve tokokoere aro o lotu engeng, na o paruru osivenga, na o oma oni peti ranga ve ini ur polpolnga. Aveto vothung areken osivenga o pavelpol ir, ma o pavurvur aro ole mong vothung kerenga aka i mita a olemi me, kene avele.

3

Te los werera lale tomo nge a Krais ma te el mimiong ponganga a i nge.

¹ Thomu o teo a Krais nge, na i ranga ve aka God i palos werera mun thomu nge rinong, maken aro lomumu i pelo nge ur areko i voth nge wop aka Krais i men a God imeni sivenga nge anga.

² Aro lomumu inga nge ur areko a Pen a Urvet. Na o mothong tova lomumu nge ur ulue anga.

³ Eneke i ranga ve aka thomu o rin lale nge vothung ulue anga omanga. Na lomu mimiong nunganga i ngo kine tomo ol nge a Krais aka a God nge.

⁴ Na lomu mimiong nunganga i voth nge a Krais ipanesnga, na nge nang aka aro Krais i velpol, aro thomu o velpol tomo mun nge i nge ile tolilisong.

Krais i eso a lemir, make te velpol ini toko ponganga

(Vonge 3:5-4:18)

Te el mimiong ponganga a Krais nge.

⁵ Lomu mimiong i venen re aken, mako aro thomu o so rin selelepot lomu vothung ulue anga aka i voth a thomu nge, ranga ve ini: Ngo tomoing nge toko na seng areko or ini oewo avele, na toko na seng aomngare, na theki le roroing, na lemi rumong nge vothung kerenga omanga, na sung sesong aka ini vothung aka ranga ve o lotual god le apaltetong.

⁶ Na nge vothung areken God ile lemi klingong aro i es a tokokoe areko o nongal ile riong avele.

⁷ Na nomenga thomu mun o oma vothung areken nge lomu mimiong neginga.

⁸ Aveto ponange aro thomu o mothong selelepot mun vothung aka ranga ve ini: Lemi klingong, na lemi velong, na ri tangatunong, na voltetong, na riong kerengare ringa.

⁹ Na thomu o mothong tova lomu apaltet pel, eneke thomu o modoppot vothung nomenganga areken lale,

¹⁰ na o elo ol mimiong ponganga aka Patenger i oma i. Na mimiong aken Patenger i pesrou nge ipaonolnga avele

mo aro te velpol ranga ve ini i, moro aken lemire senu nge ur aka i sis ve aro te oma i.

¹¹ Na nge lomu mimiong ponganga aken thomu o vur e pel ol. Na Judare o relpot avele nge areko or ini Judare avele. Na areko o is ole avele o vur e pel nge areko o is ole. Na toko rerelire o vur e pel nge toko vulutngare. Na toko um polpolongare o vur e pel nge tokokoe areko or ini um polpolongare avele. Eneke Krais i voth a it alavusnga nge na i mukal nge ur alavusnga.

Vothung ako nge mimiong ponganga.

¹² Maken i nunganga aka God i ateal thomu ve ini ile tokokoere na ia sagu rintet thomu, mako aro thomu o el vothung aka ranga ve ini: Lemi esaling, na vothung le sivengaing, na paruruong, na riong mosnga, na matheongre elnga.

¹³ Naro thomu o potun inga matheong areko sivengomu o sung pel nge, naro lomumu simikal pel nge vothung kerenga kathnga aka lomumu i voth nge, ranga ve aka Toko Pomnga ilemi simikal lomu vothung kerenga.

¹⁴ Naro thomu o engeng nge asaguong, eneke asaguong i mukal nge vothung sivenga areken, na i paengeng or mo o womlo pel nge ole omaing, na ur e avele aro i pakerenga ole omaing aken.

¹⁵ Aro lomu womtun nge a Krais ile lemi moring mo i theal lomumu, eneke God i ateal thomu ve aro lemi moring i vual a thomu nge, aka ranga ve ini ini peti epipeere aka o voth pis a omei. Na evelenga aro thomu o ri sivengaing a God nge.

¹⁶ Aro lomu womtun nge a Krais ile riong mo i voth senu a lomumu. Aro thomu o pamireal na patorial pel nge mire ninenga elonga. Naro thomu o vo voing areko o voth a Buk Song lemi, tomo mun nge omu lotuonga a voingre, na voing aka Oni Riringa i pavelpol i a lomumu. Naro opomu lemi i vual nge ri sivengaing a God nge.

¹⁷ Na lomu omaing elonga tomo nge lomu riong elonga aro thomu o oma ir ranga ve aka thomu ini a Toko Pomnga

a Jisas ile, naro thomu o ri sivengaing a Titemer a God nge a Jisas.

Pol i ri nge tutunongare a menong.

¹⁸ Thomu seng peangere thomu o nongal ewomuere ole riong, eneke ini vothung vengvenga a Toko Pomnga itheki.

¹⁹ Thomu toko peangere omu sagu ewomuere na thomu o mothong tova o akrisal or.

²⁰ Thomu wainlangaere thomu o nongal omu vovoere na omu ninaere ole riong elonga, eneke Toko Pomnga ilemi sivenga nge vothung aken.

²¹ Thomu a vovoengaere thomu o mothong tova o ri pompom nge tutumuere ole vothung elonga, aro vene mo olemi kerere mo oni plong nge omaing sivenga e omanga.

Pol i ri nge vothung aka nge um polpolongare tomo nge ole mukalingare ole menong.

²² Thomu toko um polpolongare o nongal tokoningomure ole riong elonga. Na o mothong tova o pawomwomal or tova o mit na o the thomu aka o um, aveto o nongal tokoningomure ole riong nge lomumu alavusnga, ranga ve aka thomu o papomnga a Toko Pomnga na o nongal ile riong.

²³ Na thomu o oma lomu omaing elonga nge lomumu alavusnga ranga ve aka o oma i nge a Toko Pomnga na nge tokokoere avele.

²⁴ Eneke lomumu mire aka ve, Toko Pomnga aro i sung loa olongomu nge ur aka i kin ile riong nge nomenga. Na Krais ini lomu mukalinga na thomu o oma inga ile omaing.

²⁵ Na tokokoe areko o oma vothung kerenga aro o el oolalnga nge ole vothung aken. Na Toko Pomnga ile thopolong nge toko alavusnga i vur e pel inga a itheki.

4

¹ Thomu mukalingare thomu o oma vothung vengveng na sivenga nge lomu toko um polpolngare, eneke lomumu mire aka ve, lomu Mukalinga mun i voth a Pen a Urvet.

Aro te nong engeng na te oma vothung vengvenga.

² Aro thomu o sungpot lomu mimiong nge nongong, na o thealal, na o ri siven-gaing a God nge.

³ Naro thomu o nong mun nge them mo aro God i thep sovengalo nge lemem panongpolong mo aro them pavurvur aro them panongpol nge a God ile riong nge a Krais ako i ngo kine nomenga. Ave toko pelie oni plong i, mako o paeso tho a mang a midenga nge.

⁴ Naro thomu o nong mo aro tho panongpol pat ol ile riong aken, ranga ve aka i sis ve aro tho oma i.

⁵ Na thomu o the senu nge nang elonga aka thomu o sangpolo tokokoe areko ole mio nge a Krais avele, naro thomu o panes lemi rumong ninenga nge soven-galo kathnga aka aro o elo or nge.

⁶ Naro lomu riong alavusnga aro i vual nge themosaling, na i mosisen mo aro tokokoere o nong sial i, naro thomu o olal senu ole ninong elonga.

Pol i pasungalu ile nang sivenga nge ithangangaere aka a Kolosi.

⁷ Titeir a Tikikus aka emem sagu i aka ini toko opoalinga sivenga na ini a Toko Pomnga ile umonga tomo nge them, aro i ritet thomu nge tho.

⁸ Naro tho pake i a thomu nge wot mo aro i ritet senu thomu nge lemem menong ake mo aro i paengeng lomumu.

⁹ Naro i es tomo nge titeir a Onesimus aka emem sagu i aka i panes senu a Toko Pomnga na ini lomu rem lemia. Naro or paini o ritet thomu nge ur alavusnga aka i velpol ol a them nge.

¹⁰ Na Aristarkus aka i voth tomo nge tho a mang a midenga, i pasungalu ile nang sivenga a thomu nge. Na Mak aka ini a Barnabas ile lavokunga i pasungalu mun ile nang sivenga a thomu nge. (Na thomu o el malueng lale aka i ri ve, aro ve Mak i velpol a thomu nge, aro thomu o nongpoo i.)

¹¹ Na Jastus aka iion aininga a Jisas i mun kene i pasungalu ile nang sivenga a thomu nge. Na toko or me inga aken or ini Judare nge areko o um tomo nge tho

nge panongpolong nge a God ile menong e nepes. Na o paengeng lemik nge omaing aken.

¹² Na Epapras aka ini lomu rem lemia ini mun i a Krais Jisas ile umonga, na i pasungalu mun ile nang sivenga a thomu nge. Na i mostun nongong nge thomu, na i nong engeng mo aro thomu o mit engeng nge ur areko God i sis ve aro thomu o oma i, naro thomu o motu nge lomu lemioong aka lomumu mire nge ve i nunganga. Ma i nong ve aro thomu o panes vengveng inga a God ilemi.

¹³ Sivengek tho thopol ile omaing en-genga nge thomu tomo nge toko lemioon-gare aka a Laodisia na Hierapolis.

¹⁴ Titeir a Luk aka emem sagu i aka ini vuralinga tomo nge a Demas or paini o pasungalu mun ole nang sivenga a thomu nge.

¹⁵ Aro thomu o pasungalu mun lek nang sivenga a toko lemioongare nge aka a Laodisia na o pasungalu mun lek nang sivenga a Nimpa tomo nge toko lemioon-gare aka o pathun a ile vel lemi.

¹⁶ Na nge nang aka ve, thomu o tital malueng ake lale, aro thomu o sung es mun i a toko lemioongare nge, aka a Laodisia na thomu aro o tital mun lek malueng aka tho wat i a Laodisia angare nge.

¹⁷ Naro thomu o ria Arkipus ve i sivenga aka aro i patopalal a Toko Pomnga ile omaing aka i sungu i a i nge.

¹⁸ Tho a Pol tho wat riong pasungalinga ake nge sivengek menik ol. Na lomumu rum mun tho nge lek menong a mang a midenga lemi. God ile themosaling aro i voth tomo nge thomu.

Na i re aken. I vus.

**Pol ile malueng teltelnga
ako i wat i a toko
lemioongare nge ako o voth
a Tesalonaika
1 Tesalonaika
Ritetong nge a 1
Tesalonaika**

Pol i es a epee a Masedonia na i panongpol Tesalonaika angare nge Panongpolong Sivenga, na ile panongpolong aken i pavelpol toko lemioonga pelie a rem aken. Pol ia sagu rintet toko lemioongare ako o voth a rem a Tesalonaika, na i panes mun vothung vengvenga nge wop lemi aka i voth tomo nge or. (2:1-12) Aveto kerengaing aolonga i velpoltun toko lemioongare nge wop lemi aken, mako o ovulal a Pol ve aro i plosa ma i es, aro vene mo rinong aro i el i. (Pakeke 17:1-10) Mako Pol i es tel a Beria, lamako i es ol a Atens la. Ma i velpol a Atens, aveto rongan ilemi voth nge Tesalonaika angare, nge matheong aken o el i, (2:13-3:10) mako i pake a Timoti a or nge. (3:1-5) Panen tie lamo Pol i esu a Korin la, na Timoti i lo werer ma i ria Pol nge Tesalonaika angare ole asaguong na ole lemioong. (3:6) Mako Pol i wat malueng ake a or nge, mo aro i paengeng or, naro i patorial or nge vothung sivenga panesnga. (4:1-12; 5:12-22) Na Pol i patorial mun or nge aka Krais aro i lo werer me, na nge toko lemioongare ole los wereraing nge rinong, eneke Pol i voth tomo nge or palolo avele, ma oleme nine senu nge ur areken rongan. (1:9; 4:13-5:11) Pol ile patorialing nge nang le vusonga ini ur aolonga aka i voth nge ile malueng or aini aka i wat i a toko lemioongare nge aka o voth a rem a Tesalonaika. (O thopol mun 2 Tesalonaika 2:1-12)

**Pol tomo nge ithangangaere
olemi kerere nge
Tesalonaika angare**

(Vonge 1:1-3:13)

1 Tho a Pol tomo nge a Sailas ome a Timoti.

Them wat malueng ake a thomu toko lemioongare nge aka a rem a Tesalonaika aka thomu ini Titemer a God na Toko Pomnga a Jisas Krais ole.

Na tho nong ve aro God ile themosaling na ile lemi moring aro i voth tomo nge thomu.

Pol ilemi sivenga nge Tesalonaika an-gare ole lemioong.

2 Na evelelga them ri sivengaing a God nge, nge thomu alavusnga, na lemimem rum thomu nge lemem nongongre.

3 Na nge lemem nongong areken, aka a Titemer a God nge, evelelga lemimem rum thomu, nge lomu omaing aka lomu lemioong i pavelpol i, na nge lomu omaing engenga aka lomu asaguong i pavelpol i, na nge lomu mit engenging aka lomu men sialing nge ar Pomnga a Jisas Krais ile lo wererong me, kene i pavelpol mun i.

4 Na titeik areko God ia sagu thomu, lemimem mire aka i ateal thomu ve ini ile,

5 eneke nge wop lemi aka them panongpol Panongpolong Sivenga a thomu nge, i velpol ini riong polpolnga a thomu nge avele, aveto i velpol tomo nge pathepolong engengare aka Oni Riringa i pavelpol i. Na i pavurvur aka aro thomu o thepol nine aka, lemem lemioong i engeng rintet nge Panongpolong Sivenga aken. Na e mun e aka lomumu mire nge lemem vothung sivenga aka them pathengal i a thomu nge, nge aka them voth tomo nge thomu.

6 Na thomu o elo a God ile riong aken, make matheong pulua i velpoltun thomu, aveto Oni Riringa i pavelpol lemi sivengaing a lomu mimiong, na nge vothung aken i velpol a thomu nge ranga ve aka i velpol a them nge, na a Toko Pomnga mun nge.

7 Na lomu matheong potunnga tomo nge lemi sivengaing aken i velpol ranga ve ini paatealing sivenga, aka i sivenga aka aro toko lemioongare ake a epee a Masedonia na Akaia aro o panes i.

8 Na lemimem mire aka i venen aken, eneke Toko Pomnga ile riong i kimapot a thomu nge me, na i ranga ve ini kom le onngaing. Na i kima inga a epee ake

a Masedonia na Akaia avele, aveto a pen elonga ako them es nge kene o nongpol mun nge ritetong ako lomumuo ol nge a God. Maken them pavurvur aro them ritet ol or nge ritetong aken avele,

⁹ eneke osivenga o rurum toko na sengre nge lomu vothung sivenga ako ranga ve o nongpoo them nge nang ako them velpol a thomu nge. Na o rurum mun nge ako thomu o lel kimomu nge avalare olotu-alnga, na o eksing, mako o elo a God a lomu mimiong, make o velpol ol ini a God nunganga aka i mimi, ile umongare.

¹⁰ Na o ri mun nge lomu vothung aka o men sial ol nge a God Itun ile lo wererong a Pen a Urvet me, ini a Jisas aka God i palos werera i nge rinong, na ini toko aka i pamimi it nge a God ile lemi klingong aka aro i velpol panen.

2

Pol i ri nge ile omaing aka i oma i a Tesalonaika nomenga.

¹ Na titeikre, lomumu mire lale aka ve, lemlem umong aka them oma i a thomu nge, nge aka them voth tomo nge thomu, ini ur polpolnga avele, aveto i pavelpol imonnga.

² Na lomumu mire mun aka nomenga, nge aka them es a thomu nge rongan, na rongan them voth a rem a Pilipai, ma them el matheong na sisisong aolonga, na o ri riong kerenga a them nge, aveto nge aka them es a thomu nge, ler God i opoal them, make them ngeip avele nge areko o engeng ve aro o volalal them, ma them panongpol thomu nge a God ile Panongpolong Sivenga.

³ Na nge aka them leng thomu ve aro lomumuo nge a Jisas, them ngeip avele, eneke them sung riong nunganga a thomu nge, na them pamolomolo thomu avele, na lemlem apaltet thomu avele.

⁴ Aveto them ini toko areko God ilemi sivenga nge lemlem mimiong, lamako i sungu omaing nge ile Panongpolong Sivenga panongpolnga a them nge. Na lemimem ve aro them oma omaing mo i palemi senu tokokoere, kene avele, aveto

aro i palemi senu inga a God aka i avrum lemimem.

⁵ Na lomumu mire lale aka ve, lemlem olo thomu avele, na them selalo aka them engeng nge umtun elnga, kene avele. Na ini a God aka i thepol lemlem vothung ma i ri ve i vengveng inga.

⁶ Na lemimem ve aro them um mo thomu eve toko mun pelie aro o paesa iomem roro, kene avele.

⁷ Na i nunganga aka them ini a Krais ile pakekere, make them pavurvur aka aro them sung matheong a thomu nge, nge thealngemem. Aveto nge aka them voth tomo nge thomu, them nak inga vothung ranga ve ini wain a nina aka i theal senu itutunre na i pasusu or.

⁸ Na emem sagu rintet thomu, make them sis rintet ve aro them opoal thomu nge a God ile Panongpolong Sivenga ienga inga avele, aveto them sungpot mun lemlem mimiong nge opoalngomu, eneke thomu o velpol ranga ve ini titeimem sivengare.

⁹ Titeikre, nge wop lemi aka them voth tomo nge thomu, na them panongpol thomu nge a God ile Panongpolong Sivenga, na lemik mire aka lomumu rum werer nge lemlem omaing engenga aken aka them oma i nge menimem, aka them um engeng nge nang na mlik moro aken aro them mothong tova them sungu matheong a thomu nge, nge thealngemem nge ur pelie.

¹⁰ Na sivengomu o thepol na lomumu mire, na God mun i thepol na ilemi mire nge vothung aka them oma i a thomu areko lomumuo nge a Krais, ranga ve aka them oma inga vothung aka i riri a God itheki, na vothung aka i vengvenga a tokokoere nge, na vothung aka vothung kerenga e avele i voth a lemi.

¹¹ Na lomumu mire mun aka vothung aka them oma i a thomu omole omole nge, i ranga ve ini vothung aka wain a vovo i oma i a itutunre nge.

¹² Ako ranga ve them sung riong aka aro i paengeng lomumu na i opoal thomu nge matheong potunnga. Na them tor mun lomu mo o panes inga mimiong aka aro i palemi senu inga a God, na ini a God aka i

lengo thomu a ile menong e nepes mo o el mun ia malmaling a urvet aken.

Pol i sivengaing ako toko lemioongare o mit engeng nge matheong potunnga.

¹³ Na opisleonga them ri sivengaing mun a God nge, nge thomu, eneke nge wop lemi ako thomu o elo a God ile riong aka them ripot i nge womem, lomumu ve ini tokokoere ole avele, aveto thomu o elo i ranga ve aka ini a God ile riong nunganga. Na i nunganga, aken ini a God ile riong nunganga aka i um a thomu toko lemioongare a lomumu nge.

¹⁴ Na titeikre, lemimem mire aka ur aken i nunganga, eneke ur areko i velpol a thomu nge, i ranga ve ini mun i aka i velpol a God ile lotuongare aka o voth a Judia aka o teo a Krais Jisas nge. Na i vene: Thomu o el mun matheong aka a lomungare omeni, ranga ve aka Judare o el mun matheong a olengare omeni.

¹⁵ Na or ini tokokoe mun areko o pun rin Toko Pomnga a Jisas na God ile riong elnga nomengangare mun, na o wis meresu mun them. Na nge ole vothung areken o palemi kling a God, na o velpol ini toko alavusngare ole ngarang.

¹⁶ Eneke o engeng ve aro o mit roal them ve, them mothong tova them panongpol areko or ini Judare avele, eneke oni plong ve aro God i el werer or nge lemem panongpolong aken. Na nge ole omaing areken, o paen tomoal ole vothung kerenga, makola i vual taktak, mako God ilemi esal ol or avele, mako i paomelal ol or nge ile lemi klingong aken.

Pol i sis rintet aka ve, i thepol mun ine Tesalonaika angare.

¹⁷ Aveto a them nge, titeikre, Judare ole omaing aken, i ovulal them ve aro them voth tomo nge thomu avele nge wop lemi tel ake. Na them voth tomo nge thomu nge nimem peti avele, aveto nge lemimem them voth tomo ol nge thomu. Make them kath rintet sovengalo pelie aka aro them es werer a thomu nge wot, eneke lemimem i voth rintet nge thomu.

¹⁸ Na aken i nunganga, eneke them sis ve aro them es a thomu nge wot, ma tho a Pol, tho ri nunganga, nang pulua tho

tongporum aka aro tho es wot, aveto Satan i mit roal them.

¹⁹ Na them sis ve aro them es werer a thomu nge wot, eneke them men sial nge nang aka aro thomu o mit engeng a Jisas itheki tova i lo werer nge me. Na thomu mun ini areko o palemi senu them nge lomu lemioong, na thomu mun ini areko aro them magon nge thomu, nge nang aka aro ar Pomnga a Jisas Krais i lo werer nge me, eneke lemem omaing monnga i velpol senu a thomu nge. Na toko pelie avele o mukal nge thomu nge aken.

²⁰ I nunganga, thomu ini toko na seng areko them magon nge thomu, na thomu ini areko o palemi senu them.

3

Pol i pake werer a Timoti a Tesalonaika angare nge.

¹ Na i venen aken na lemimem kerere rintet nge thomu, na i pavurvur aro them men palolo tomo nge matheong aken avele. Make a lemimem i sivenga aka aro them e a Sailas sivengemem aro them voth werer a Atens.

² Na them pake werer a Timoti aka ini titeir lemioonga e aka i um tomo nge them nge a God ile umong aka nge a Krais ile Panongpolong Sivenga panongpolunga nge pen elonga. Make them pake i mo i paengeng thomu na i opoal thomu, nge lomu lemioong.

³ Aro vene mo matheong areke aro o pavothal thomu. Ave lomumu mire senu lale aka ve, God i ateal it lale ve aro te el matheong areken.

⁴ Na lomumu mire aka ur aken i nunganga, eneke nge aka rongan them voth tomo nge thomu, ma them ria thomu papulua a mukaling ve, matheong pulua aro i velpoltun it. Na lomumu mire ol ponange aka ve, ur aka them ri nge, kene i velpol lale.

⁵ Na nge lomu matheong areken inga, tho pavurvur aro tho palolotun ol ur e avele. Make tho pakepot werer mun a Timoti a thomu nge wot, mo i avrum vet nge lomu lemioong. Eneke lelik aka ve, ava Satan i sangpolo sovengalo pelie aka va i tongporum thomu nge, aken varo

lemem umong areken aro i velpol ini ur polpolnga inga.

Timoti i ritet nge Tesalonaika angare ole mit engenging.

⁶ Aveto avele! Na Timoti ako i losa a thomu nge, ponange re ake ma i velpol werer a them nge, ma i pavelpol rite-tong sivenga nge lomu lemioong na nge lomu asaguong. Na i ria them mun ve, opisleonga lomu lemi rumong nge them i sivenga inga, na evelelnga thomu o sis ve aro o thepol werer mun them, ranga ve mun ako them sis ve aro them thepol werer mun thomu.

⁷ Na titeikre, them nongpol aka ve, lomu lemioong rongan i voth engeng. Na aken i paengeng lemimem nge matheong na sisisong akao them el i.

⁸ Na them nongpol aka lomu lemioong i mit engeng nge a Toko Pomnga, make ponange lemem mimiong i sivenga rintet ol.

⁹ I nunganga, na them pesrou avele nge lemem riseaing a God nge, nge thomu, eneke lemimem i sivenga rintet nge thomu aka a ler God itheki.

¹⁰ Na nge nang na mlik them nong engeng ve aro them thepol werer mun thekumu mo them opaal mun lomu lemioong nge ur aka rongan o oror nge.

Pol ile nongong a God nge.

¹¹ Na them nong ve aro ler God isivenga aka ini Titemer na ar Pomnga a Jisas aro o monsi lemem sovengalo aka aro them es werer a thomu nge wot.

¹² Naro Toko Pomnga aro i paaolonga lomu asagupeling tomo mun nge lomu asaguong nge toko alavusnga mo i aalonga rintet ranga ve ini lemem asaguong a thomu nge.

¹³ Na nge sovengalo aka God aro i paengeng lomumu, mo aka nge nang aka aro thomu o mit a Titemer a God itheki nge nang aka ar Pomnga a Jisas i es werer nge me tomo nge ile toko riringare, aro i thepol thomu aka ini toko riringa aka ur kerenga e avele i voth a thomu nge. I nunganga.

Tesalonaika angare aro osa womo vothung sivenga mo i engeng ol a or nge

4

(Vonge 4:1-5:28)

Mimiong aka God ilemi sivenga nge.

¹ Na titeikre, lek riong patopalalnga i vene: Thomu o el pamirealing lale a them nge, nge mimiong aka God ilemi sivenga nge. Na i nunganga aka rongan thomu o mimi venen aken. Aveto ponange them nin na them tor lomu nge engenging aka Toko Pomnga a Jisas i sungu i a them nge, ve aro thomu o rong esa mun lomu vothung aka i venen aken mo i esa esa.

² Eneke lomumu mire nge torong areko them tor lomu nge, akao them el i a Toko Pomnga a Jisas nge.

³ Na vothung aka God i sis ve aro thomu o oma i kene i vene: Aro thomu o sungpot lomu mimiong alavusnga a God nge, mo lomu vothung i vengveng inga a itheki, ranga ve aka aro thomu o voth mela nge vothung aka nge ngo tomoing nge areko or ini ewomuere avele.

⁴ Na i sis mun ve aro thomu toko omole omole aro lomumu mire senu nge soven-galo aka aro o el ewomu sengengaere nge, aka aro i vengveng a God itheki, na a tokokoere otheki mun.

⁵ Na o mothong tova o oma ranga ve ini areko ole mi mire nge a God avele, aka otheki roro nge sangre na o panes inga vothung kerenga engenga aka oopo i vurpoltn i.

⁶ Na nge vothung aken God i sis ve aro thomu o mothong tova o pakol titeumu lemioonga e ikei, eve o oma vothung kerenga pelie a i nge. Toko Pomnga aro i paomelal tokokoere nge ole vothung aka i venen aken, ranga ve akao them ri na them tor lomu nge lale.

⁷ Naro i paomelal or, eneke God i lengpot it ve aro te oma vothung akopnga, kene avele, ave i lengpot it ve aro te oma inga vothung aka i riri a itheki.

⁸ Maken aro ve toko e i lel ikime nge pamirealing ake, aken i lel ikime nge tokokoere ole pamirealing avele, aveto

ako ini a God ile pamirealing ako i lel ikime nge. Na ini a God aka i sungu Ioni Riringa a thomu nge.

Aro te um engeng mo aro vothung sivenga aro i velpol engeng a it nge.

⁹ Na nge titeumu na lulumu lemioongare oasagunga, i pavurvur aro tho wat ol riong pelie a thomu nge avele, eneke thomu kene, God i pamireal thomu lale ve aro omu sagu pel.

¹⁰ Na i nunganga aka omu sagu titeir na lulur lemioonga alavusnga aka o voth a epee a Masedonia. Aveto titeikre, them ri engeng thomu ve aro o rong esa mun vothung aka i venen aken mo i esa esa.

¹¹ Na them ri engeng mun thomu ve aro o betet inga nge lomu menong le sivengainga naktetnga, na o mothong tova o situn pel mo o pavothal thongongomuere, aveto aro o um engeng inga nge sivengomu lomu mimiong thealnga, ranga ve aka them ri tel i a thomu nge lale.

¹² Aken aro i oma thomu mo toko relnga e avele aro i theal thomu nge ur elonga nge lomu mimiong aken. Naro o mimi venen aken mo lomu mimiong aken aro i oma areko or ini toko lemioongare avele, mo o ri riong kerenga e avele nge lomu mimiong aken.

Pol i patorial nge a Toko Pomnga ile lo wererong me.

¹³ Na titeikre, them sis ve aro lomumu mire senu nge areko o rin lale, mo o mothong tova lomumu kerere nge or, ranga ve ini areko or ini toko lemioongare avele, aka o men sial nge ole mimiong panen anga avele.

¹⁴ Naro lomumu kerere nge or avele, eneke lemiro aka ve, Jisas i rin lale ma i los werera mun, aken lemiro mun aka ve, areko olemio nge a Jisas na o rin lale, God aro i wola or tomo nge a Jisas, tova Jisas i lo werer nge me.

¹⁵ Na i ranga ve aka Toko Pomnga isivenga i ri nge lale, na them ri mun i a thomu nge ve, it areko rongan te mimi ake ru a ulue, i mulal nge nang aka Toko Pomnga aro i lo werer nge me, aro te mukal la tel avele, nge toko lemioonga areko o rin lale.

¹⁶ Eneke God aro i presa viringa, naro enselre ole mukalinga aro i leng lengpot, naro i thupot a God ia kuth, naro Toko Pomnga isivenga aro i esu a Pen a Urvet me, na areko olemio nge a Krais na o rin lale, aro o los werera tel nge rinong.

¹⁷ Lamo it areko rongan te mimi ake ru a ulue, God aro i el tomoa it nge or a malang po la, mo te thepolo a Toko Pomnga nge. Na nge sovengalo aken, aro te voth tomo nge a Toko Pomnga evelelnga aka aro ile vusonga avele.

¹⁸ Na riong aken i nunganga, maken aro thomu o paengeng pel lomumu nge riong aken.

5

Aro te monsi na te thealal nge a Toko Pomnga ile lo wererong me.

¹ Na titeikre, i pavurvur aro tho wat ol riong pelie a thomu nge, aka nge nang kathnga aka aro Toko Pomnga i lo werer nge me, kene avele,

² eneke lomumu mire senu lale aka ve, Toko Pomnga ile nang aken aro i velpoltun tokokoere, ranga ve ini toko kemonga aka i pakuktun kemong a or nge pemlik.

³ Na nge aka toko na sangre o ri ve, "Lemi moring na men senuong i velpol ol a ulue lale." Na nge wop lemi aken, kerengaing aro i pakuktun or ranga ve ini popong a sisisong aka i velpoltun seng aka iopo, naro o pavurvur aro o lo nge avele.

⁴ Aveto thomu titeikre, thomu o voth ol a mideng avele ol, maken aro nang aken i pavurvur aka aro i pakuktunu thomu ranga ve ini toko kemonga, kene avele.

⁵ Eneke thomu ini pen lalanga tomo nge nang itutunre, eneke lomumuo nge a Toko Pomnga. Na it toko lemioongare it ini mideng esngare avele ol, na i ranga ve aka te voth nge mideng avele.

⁶ Na i venen aken mo te mothong tova it ranga ve ini areko o nokolkol, aveto i sivenga aka aro te thealal, naro ler lemi rumong i nine ol.

⁷ Eneke areko o nokolkol, o nokolkol inga pemlik na areko o thin loptet thei engenga, o thin inga pemlik.

⁸ Aveto it kene, it ini a God ile pen lalanga ilengare, mako aro te engeng mo ler lemi rumong aro i nine inga. Ako ranga ve aro te teuna ler lemioong na vothung ako nge asaguong mo o paseral ler, ranga ve ini toko ile teunong paseralnga aka i paseral ipakei nge punong. Naro lemiro inga nge a Jisas ile omaing aka aro i pamimi it nge, aken aro i paseral mun it ranga ve ini pounger paseralnga.

⁹ Naro te paseral it venen aken, eneke God i ateal it ve aro te el ile lemi klingong a paomelaling avele, aveto i ateal it ve aro i pamimi it aka nge ar Pomnga a Jisas Krais ile rinong.

¹⁰ Na i rin nge opoalnger, mo aka aro nge ile lo wererong me, aro ve te mimi eve te rin lale, aro te voth tomo ol nge i.

¹¹ Maken aro thomu o kis inga vothung aka aro o paengeng pel lomumu nge, naro o opoal pel sivengomu mo lomu lemioong i mit engeng inga, ranga ve aka ponange thomu o oma i.

God aro i opoal toko lemioongare nge vothung sivenga omanga.

¹² Na titeikre, them nong thomu ve aro o papomnga areko o voth tomo nge thomu aka o um engeng nge a God ile omaing a thomu nge, eneke or ini lomu mukalangare aka nge Toko Pomnga ile atealing aka o pamireal thomu nge vothung vengvenga omanga.

¹³ Naro thomu o papomnga rintet or na oa sagu or, eneke ole omaing aken i opoal thomu. Naro thomu o men senu inga tomo nge pel.

¹⁴ Na titeikre, them nong engeng mun thomu ve aro o oma vene: Aro o pator engeng areko otheki namal, naro o paengeng areko o ngeip polpol, naro o opoesal areko ole lemioong i motu rongan, naro o oma vothung mosnga a toko na seng alavusnga nge.

¹⁵ Na aro ve toko e, i oma vothung kerenga a omu e nge, aro thomu o palemi rumal i ve, i mothong tova i olal i a i nge, aveto evelelnga aro thomu o um engeng ve aro o oma vothung sivenga inga nge titeumu lemioongare, na nge areko or ini toko lemioongare avele mun.

¹⁶ Na evelelnga aro thomu o risea inga.

¹⁷ Na evelelnga aro thomu o nong inga a God nge.

¹⁸ Na ur kathnga aka i velpoltun thomu, aka i sivenga eve i kerenga, aro thomu o risivengaing inga a God nge, eneke God i sisve aro thomu areko o teo a Krais Jisas nge, aro o oma vothung areken.

¹⁹ Na aro ve Oni Riringa i pavurpola ur pelie a lomumu, o mothong tova o mit roal i nge.

²⁰ Na aro ve Oni Riringa i pavurpola riong a omu e nge, na i panongpol i a thomu nge, o mothong tova lomumu ve, ini riong polpolnga.

²¹ Aveto aro o nongpol rum vet riong alavusnga mo lomumu mire senu nge ve, i es a God nge me eve avele, na aro ve i sivenga, aro o panes i.

²² Aveto aro o mothong vothung kerenga elonga.

Pol ile riong patopalalnga.

²³ Na tho nong a God nge aka i sung lemi moring a it nge, ve aro isivenga aro i pariri thomu mo thomu o riri selele. Na tho nong mun i ve aro i oma thomu mo vothung kerenga e avele aro i voth a lomu lemi rumong, na numu peti, na onumu mun, i pavurvur nge nang aka aro ar Pomnga a Jisas Krais i lo werer nge me.

²⁴ Na God aka i leng thomu mo thomu ini ile, isivenga kene aro i oma venen aken nge thomu, eneke i panes inga ile riong elonga.

²⁵ Na titeikre, aro thomu o nong mun nge a God mo aro i opoal mun them.

²⁶ Naro thomu o titpororoling a toko lemioonga alavusngare nge, ranga ve aka omu sagu pel.

²⁷ Na tho a Pol, tho tor engeng lomu ve aro o kin lomu riong tomo nge a Toko Pomnga ve aro o tital malueng ake a toko lemioonga alavusngare nge.

²⁸ Na tho nong ve aro ar Pomnga a Jisas Krais ile themosaling aro i voth tomo nge thomu.

Na i re aken. I vus.

Pol i le malueng aininga ako i wat i a toko lemioongare nge ako o voth a Tesalonaika 2 Tesalonaika Ritetong nge a 2 Tesalonaika

Pol i wat malueng ake a rumongaling tie nge ile malueng teltelnga aka i wat a toko lemioongare nge aka o voth a rem a Tesalonaika. (O thopol 1 Tesalonaika a ritetong) Na rongan olemi nine senu nge a Toko Pomnga ile lo wererong me rongan. Na oa pelie olemi ve, Krais i lo wereru me lale, aveto Pol i ria or ve, toko kerenga e aka ini a God ile ngarang aro i velpol tel, na vothung kerenga omanga aro i aolonga rintet tel, lamo Krais aro i lo wereru me. (2:1-12) Toko powe ninenga pulua olemi ve, God ile ngarang aken ini mekerem tevivinga aka Riong Ngopatnga 13:1-10 i ri nge, na ini mun i toko kerenga aka ru Matiu 24:25 i ri mun nge. Pol i paengeng mun or nge matheong potunnga aka o voth nge, (1:4-10) na i pator mun or aka aro o panes engeng vothung vengvenga omanga. (2:13-3:15)

Toko Pomnga ile nang aro i velpol panen

(Vonge 1:1-2:17)

¹ Tho a Pol tomo nge a Sailas ome a Timoti. Them wat malueng ake a thomu toko lemioongare nge aka a rem a Tesalonaika aka thomu ini Titemer a God na Toko Pomnga a Jisas Krais ole.

² Na tho nong ve aro thomu o el themosaling na lemi moring aka a Titemer a God tomo nge Toko Pomnga a Jisas Krais nge.

Aro te mit engeng inga nge matheong potunnga.

³ Na titeikre, i sivenga aka evelelnga them ri sivengaing a God nge, nge thomu, na lemem vothung aken i vengveng, eneke lomu lemioong i esa esa, na thomu omole omole lomu asagupeling i vur e pel mun inga.

⁴ Na lomu vothung i venen aken, make them paesa iomu roro a God ile lotuongare nge, aka a pen elonga. Na them ria or nge tongporumong na matheong aka i velpoltun thomu, aveto thomu o mit engeng inga nge, na lomu lemioong mun i mit engeng inga, nge aka thomu o potun matheong areken.

God aro i avrum nge ler vothung le sivengaing.

⁵ Na panen, ur areken kene aro i pathengal aka ve, God aro i olal vengveng tokokoere ole vothung aka o oma i. Eneke aro i apet thomu ini toko sivengare aka o pavurvur aka aro o eso a God ile menong e nepes lemi, eneke thomu o mit engeng inga nge matheong areken aka thomu o el sisisong nge.

⁶ Aveto aro i olal werer kerengaing nge tokokoe areko o sung kerengaing aken a thomu nge. I nunganga, God ini a God aka i olal vengveng toko na sangre nge ole vothung kathnga aka o oma i.

⁷ Naro i eltetpot matheong areko thomu o potun i ponange a thomu nge, naro i eltetpot mun i a them nge. Naro i oma venen aken nge nang aka Toko Pomnga a Jisas tomo nge ile ensel engengare, aro o esu tomo nge won sesenga anilelenga a Pen a Urvet me, mo aro o velpol pat ol a tokokoere otheki.

⁸ Naro i paomelal areko oni plong ve aro oleli mire nge a God, na o panes ar Pomnga a Jisas ile Panongpolong Sivenga avele.

⁹ Na nge ile paomelaling aken, aro o el kerengaing aka aro ile vusonga avele, naro o voth mela rintet nge a Toko Pomnga tomo nge ia malmaling a Urvet aka i tolilis rintet na ile engenging mun, naro o pavurvur aro o thopol ol itheki avele ol.

¹⁰ Na ur areken aro i velpol vengtun nge nang aka aro Toko Pomnga i esu nge me, na nge nang aken Toko Pomnga aro i pathengpot ia malmaling a urvet aken a God ile tokokoere otheki, or ini areko olelio nge i, naro o kukuk nge i, naro o papomnga i, na o risea i. Na thomu mun aro o voth tomo mun nge or, eneke lomumuo

nge lemem riong ako them panongpol i a thomu nge lale.

*O nong nge a God ve aro i paengeng
Tesalonaika angare ole mimiong.*

¹¹ Na lemimem i voth nge aken, make them kis inga nge lemem nongong nge a God nge thomu. Na them nong ve aro ler God kene aro i opoal thomu mo o pavurvur aka aro o oma vothung aka i leng thomu nge omanga. Na them nong mun ve aro i paengeng thomu mo o pavurvur aka aro o oma vothung sivenga alavusnga aka thomu o sis ve aro o oma i, tomo mun nge lomu omaing aka lomu lemioong i pavelpol i.

¹² Na them nong venen aken, mo aro tokokoere aro o risea ar Pomnga a Jisas, eneke o thepol lomu omaing sivenga aken. Naro i risea mun thomu, eneke thomu o teo a i nge. Naro i velpol venen aken, eneke ler God na Toko Pomnga a Jisas ole themosaling i voth a thomu nge.

2

*God ile ngarang aro i mukal tel nge a
Jisas ile lo wererong me.*

¹ Na titeikre, them sis ve aro them ritet thomu nge ar Pomnga a Jisas Krais ile lo wererong me, na nge ler velilopeling a i nge. Na them nong thomu ve aro o ta senu telngomu nge lemem riong ake.

² Ava toko pelie o ria thomu nge ve, Toko Pomnga i lo werer me lale, ma o ri mun ve, Oni Riringa i paespot riong aken a wok me, eve o ri ve them panongpol tokokoere nge riong aken, eve o ri ve them wat riong aken a lemem malueng nge, aveto ole apaltet, ole riong aken i nunganga avele. Maken aro o mothong tova lomumu pelekpol virial, eve o kukuk nge ole riong aken.

³ Na o mothong mun tova somu wom toko le apaltetonga e mo i paleklek thomu nge ile le apaltetong a sovengalo pelie, eneke ur pelie aro i velpol tel a mukaling, lamoko Toko Pomnga ile lo wererong me kene aro i velpol. Ranga ve nge aka tokokoe pulua aro o lel tel okime nge a God, lamo toko kerenga e aka ini a God

ile ngarang aro i velpol pat ol, ini toko aka God aro i paesu i a won sesenga nge la.

⁴ Naro ile ngarang tomo nge ur alavusnga aka tokokoere o lotual i na o apet ir ve ini ole god. Naro i papomnga isivenga roro nge ur areken. Naro i men a God ile Lotu Tepun a Vel lemi, na i panongpol ve, "Sivengek tho ini a God."

⁵ Na nge wop lemi aka tho voth tomo nge thomu, tho ritet thomu papulua nge ur areke lale, na ava lomumu simikal i avele, e?

⁶ Na lomumu mire lale nge ur aka rongan i mit roal ol toko kerenga aken ile velpoling, mo aken aro i velpol pat ol nge nang aka God i ateal i a i nge lale.

⁷ Na lomumu mire aka i venen aken, eneke ponange vothung kerenga inkininga aka tokokoere o lel okime nge a God kene i voth lale, aveto ur* aka i mit roal ur areken ile velpoling a pen lalanga kene aro i kis inga ile omaing aken i pavurvur nge nang aka God aro i eltetpot i nge ile omaing aken.

⁸ Lamoko toko kerenga aka ini a God ile ngarang aken kene, aro i velpol pat ol. Ini toko aka Toko Pomnga a Jisas aro i pun rin i nge riong inga aka i espot a iwo me, na ile velpoling tomo nge ia malmaling a urvet kene aro i pavus toko aken ile engenging aken.

⁹ Na Jisas aro i lo werer, aveto a mukaling toko kerenga aken aro i velpol tomo nge a Satan ile omaing engenga, naro i oma pakukukaling na pathepolong le apaltetonga pulua a tokokoere otheki.

¹⁰ Maken aro i paleklek tokokoe areko o panes rinong a sovengalo nge ile omaing engenga areken, tomo mun nge vothung kerenga pulua. Na o panes rinong a sovengalo aken, eneke oni silal nge a God ile riong nunganga, mako aro i pamimi or avele.

¹¹ Na i venen aken, make God i pasulung rintet oleli mo olelio ol inga nge riong le apaltetonga aken.

¹² Na nge aken God aro teltun oa, eneke oni plong ve aro olelio nge ile riong nunganga, aveto oleli ve aro o oma inga ole vothung kerenga.

* ^{2:7:} Ava ur ake i ri nge Oni Riringa.

*Aro te mit engeng, eneke God i ateal it
lale ve it ini ile.*

¹³ Na titeik areko Toko Pomnga ia sagu thomu, i ranga ve ako them ri tel i a thomu nge lale, lemem vothung ako evelelnga aro them ri sivengaing a God nge, nge thomu i vengveng inga, eneke God i ateal thomu ve aro i pamimi thomu. Na i pamimi thomu aka nge Ioni Riringa ile omaing aka i pariri thomu a itheki na nge lomu lemioong mun nge ile riong nunganga. Na nge aken thomu o velpol tel ini toko lemioongare tomo nge areko o nongpol tel Panongpolong Sivenga aka them panongpol nge.

¹⁴ Na nge lomu lemioong nge Panongpolong Sivenga aken, God i lengpot thomu ve aro thomu o el mun ar Pomnga a Jisas Krais ia malmaling a urvet panen.

¹⁵ Maken titeikre, aro thomu o mit engeng na o krim bibim pamirealing aka them sung esu i a thomu nge, pelie aka them ripot i a thomu nge, na pelie aka them wat i a thomu nge.

¹⁶ Na tho nong a ar Pomnga a Jisas Krais isivenga tomo nge Titemer a God aka ia sagu it, na i paengeng it evelelnga aka aro ile vusonga avele, na i pamen sial it nge ur aka i kin ile riong nge, na i oma ur areke aka nge ile themosaling,

¹⁷ na tho nong a i nge ve aro i paengeng lomumu, naro i paengeng mun thomu nge lomu omaing sivenga elonga tomo nge lomu riong sivenga elonga.

Tesalonaika angare aro o pavengveng theki namalngare mo otheki wom ol

3

(Vonge 3:1-18)

*Pol i sis ve aro Tesalonaika angare aro
o nong a God nge, nge or.*

¹ Na titeikre, lek riong patopalalnga i vene: Aro thomu o nong a God nge, nge them, ve aro Toko Pomnga ile riong aro kimapot virial a pen elonga mo aro tokokoere aro o papomnga i na olemio nge i, ranga ve aka thomu o oma i.

² Naro thomu o nong mun ve aro God aro i paseral them nge toko kerengare, eneke toko elonga olemio nge lemem panongpolong avele.

³ Aveto Toko Pomnga i panes inga ile riong elonga, make aro i paengeng na i paseral thomu nge a Satan aka i kerenga selele.

⁴ Na Toko Pomnga i oma them mo lemimem mire senu aka ve, rongan thomu o oma ur alavusnga aka them pator lomu nge, na lemimem mire senu mun aka ve, aro thomu o pesrou nge omanga avele.

⁵ Na them nong a Toko Pomnga nge ve aro i oma thomu mo lomumu mire senu nge a God ile asaguong a thomu nge, na nge a Krais ile vothung aka i potun matheong nge.

*Pol i pator theki namalongare ole ve aro
o um engeng nge omeni.*

⁶ Na titeikre, them pator lomu aka nge engengeng aka Toko Pomnga a Jisas Krais i sungu i a them nge, na them pator lomu ve aro thomu o voth mela nge titeumu lemioonga alavusnga areko otheki namal, na o panes pamirealing aka them sungu i a thomu nge, kene avele.

⁷ Na them ri venen aken, eneke siven-gomu lomumu mire aka i sivenga aka aro o panes vothung aka thomu o thepol i a them nge lale. Na nge aka them voth tomo nge thomu, ma thekimem namal avele,

⁸ na them an inga omu aning areko them ol i, na them el polpol i avele. Aveto them betet na them um engeng nge menimem nge nang na mlik elonga, na thekimem wom nge omaing mo them mothong tova them sung matheong e avele a omu e nge aka nge thealngemem nge ur pelie.

⁹ Na i vava aka them oma venen aken, e? Eneke them pavurvur aka aro them ovulal thomu nge thealngemem, eneke them panongpol thomu, aveto them oma venen aken avele, eneke them sis ve aro lemem mimiong aro i velpol ranga ve ini paatealing aka i sivenga aka aro thomu o panes i.

¹⁰ Naro thomu o voth mela nge theki namalongare, eneke nge wop lemi aka them voth tomo nge thomu, them sung

patorong ake a thomu nge na i vene: “Aro ve toko e ini plong nge omaing, o mothong tova o sung ia aning.”

¹¹ Na them nongpol ako ve, omu pelie otheki namal na o oma omaing pelie avele, aveto o situn othangangaere na o pavothalo or.

¹² Na them ri engeng na them pator areko o venen aken nge engenging ako Toko Pomnga a Jisas Krais i sungu i a them nge, ve aro o naktet ole menong na o oma ole omaing nge omeni ako aro o el oa aning nge.

¹³ Aveto thomu titeikre, aro thomu o pesrou avele nge vothung sivenga omanga.

¹⁴ Na aro ve toko e i avsa lemem pamirealing aka i voth a malueng ake nge, aro thomu o pamilempot i na o lel kimomu nge i mo ile mara nge ile vothung aken.

¹⁵ Aveto o mothong tova lomumu ve ini lomu ngarang, aveto aro o pator inga ile ranga ve ini teum lemioonga e.

Pol i pavus ile malueng.

¹⁶ Na tho nong ve aro Toko Pomnga isivenga aka ini lemi moring tepun kene evelelnga aro i sung lemi moring a thomu nge, nge lomu omaing alavusnga. Na Toko Pomnga aro i voth tomo nge thomu alavusnga.

¹⁷ Tho a Pol, tho wat riong ake nge sivengek menik ma tho pasungalu lek nang sivenga a thomu nge wot. Na menik mei nge lek wating i venen aken aka tho pavus lek malueng alavusnga nge mo lomumu mire aka ini lek malueng nun-ganga.

¹⁸ Na tho nong ve aro ar Pomnga a Jisas Krais ile themosaling aro i voth tomo thomu alavusnga. I nunganga.

Na i re aken. I vus.

Pol ile malueng teltelnga ako i wat i a Timoti nge 1 Timoti Ritetong nge a 1 Timoti

Tokokoere olemi nine ako Pol i voth a mang a midenga lemi a rem pomnga a Rom. (Pakeke 28) Na lemire mire senu avele, aveto ava palolo tie, nako Pol i vthopot nge kinong aken, ma i patea ile panongpolong a esong penelnga aka aro i panongpol mun tokokoere nge Panongpolong Sivenga. O thepol a Pol ile panongpolong a esong penelnga nge pes 346. Na lemire mire aka ilemi ol nge esong a epee a Spen. (Rom 15:24,28) Mako ava i es a Spen, lama i lo werer ma i es a mtho a Krit, ini wop aka i pamenu a Taitus nge mo i voth nge, mo i theal tetal toko lemioongare na i pavengveng ole lotu. (Taitus 1:5) Na ava panenu tie lama Pol i es a Miletus (2 Timoti 4:20) na Kolosi (Pilemon 22) na Epesus (1 Timoti 1:3) aka a epee a Esia. Na i pamenu a Timoti a Epesus mo i voth nge mo i theal tetal toko lemioongare na i pavengveng ole lotu, lamako Pol i es a epee a Masedonia. (1:3) Na Pol rongan i voth a epee a Masedonia na i wat ile malueng teltelnga a Timoti nge aka rongan i voth a Epesus, na i wat mun ile malueng a Taitus nge aka rongan i voth a mtho a Krit. Lama panenu tie, mako i es a Nikopolis. (Taitus 3:12) Lamako i plosa werer ma i es werer mun a rem pomnga a Rom, palolo avele, nako o rere mun a Pol ma o paeso werer mun i mang a midenga lemi. Na i voth nge ma i wat ile malueng aininga a Timoti nge. (2 Timoti 1:16; 2:9) Panenu tie, nako ava o pun rin a Pol (2 Timoti 1:16; 2:9) na ava i rin nge tovu po a 67 A.D.

Na nge wop lemi aka Timoti rongan i apo, nako i es tomo nge a Pol nge ile esong aininga a Masedonia na Gris aka iion aininga ini a Akaia. (Pakeke 16:1-4; 17:14-15; 18:5) Na Timoti i es tomo mun nge a Pol nge ile esong menga a Epesus (Pakeke 19:22) lamako o es werer mun a Masedonia na Akaia. Na Timoti kene i voth tomo mun nge a Pol nge wop lemi

ako o paeso tel a Pol a mang a midenga. (Pilipai 1:1; Kolosi 1:1; Pilemon 1:1) Timoti i um senu nge Panongpolong Sivenga a omaing, na Pol i wat malueng ake a i nge mo i paengeng i nge ile omaing aka i theal toko lemioongare aka o voth a Epesus kene ole lotu. Pol i pator a Timoti nge pamirealonga le apalitetongare. (1:3-7; 4:1-8; 6:3-5; 6:20-21) I patorial i nge lotuong theal tetalnga, na nge vothung aka lotuongare aro o panes i, (2:1-15; 5:1-16; 6:17-19) na nge omaing aka lotu a mukalingare aro o panes mun i. (3:1-13; 5:17-25) Pol i sung torong engenga a Timoti nge aka aro i mit engeng nge omaing nge toko lemioongare othealtetalnga. (1:18-19; 4:6; 4:10-16; 6:11-14) Malueng ake i opaal it ponange na i patorial senu it nge lotuong ile thoing, na nge lotu a mukalingare ole theal tetaling nge lotu.

Timoti aro i naktet ile vothung tomo mun nge toko lemioongare ole vothung

(Vonge 1:1-6:25)

¹ Tho a Pol, aka ini a Krais Jisas ile pakeke. Eneke God aka ini ler pamimionga tomo nge a Krais Jisas aka aro i lo werer me panen na te men tetal i, kene o ategal tho ve aro tho velpol ini ole pakeke.

² Tho wat malueng ake a wong a Timoti nge, aka ong ini tuk, eneke ler lemioong omole ol inga nge a Jisas Krais. Naro wong el themosaling, asaguong na lemi moring a God nge aka ini Titemer tomo nge a Krais Jisas aka ini ar Pomnga.

Pol i panakal a Timoti nge areko o patorial nge riong le apalitetonga.

³ Na tho sis ve aro wong voth inga a Epesus, ranga ve aka tho ria tel wong nge lale, nge wop lemi aka tho losa mo tho es a Masedonia la, eneke toko pelie aka ru o voth nge, o patorial nge riong le apalitetonga. Naro ong sung riong engenga a or nge, aka aro i mit rup ole patorialing areken.

⁴ Naro wong pator or mo o mothong tova o rirum rurumong le apalitetonga opisleonga, tomo mun nge otitevie

nomengangare oionre ako o pulua rintet. Eneke riong areken aro i pavelpol inga ako ini ripeling, na i pavurvur aro i opoal a God ile omaing avele, eneke ini inga lemioong inga ako aro i opoal a God ile omaing.

⁵ Naro ong pator or venen aken moro aken asaguong a vothung aro i velpol. Na vothung ako o pavelpol asaguong aken nge, kene i vene: Toko i rov aka ve, vothung kerenga e avele i vota a ilemi, na ilemi i riritet, na ile lemioong nge a Krais i nunganga.

⁶ Na tokokoe pelie o mothongel vothung sivenga areken lale. Make ponange o mostun ol inga ako ini riong polpolngare ringa.

⁷ Na o sis ve aro o patorial toko na seng pelie nge a Moses ile patorong, aveto osivenga olemi mire nge riong ako o ripot i, kene avele. Na olemi mire nge ur aka osivenga o ri engeng nge kene tepun e avele.

⁸ Na lemir mire aka ve, Moses ile patorong kene i sivenga, aka tova te panes senu i na te rurum polpol nge avele.

⁹ Na lemir mire mun nge patorong aken ile omaing, aka i pavurvur aro i teltun areko o oma vothung vengvenga oa, kene avele. Aveto patorong ile omaing kene i vene: Aro i teltun tokokoere oa aka o avsa patorong, na o panes vothung aka i vengveng avele. Ranga ve aka o lel okime nge a God, na o oma vothung kerengare, na o papomnga a God na lotuong avele, na o so rin otema ome oa ninaere, na o so rin polpol tokokoere,

¹⁰ na o aom toko na sengre, na toko i ngo tomo nge toko, na seng i ngo tomo nge seng, na o kem toko na sengre mo o velpol ini ole um polpolongare, na ole apaltet, na o panes ole riong kinnga avele, na o oma vothung kerenga mun pulua aka i panes a God ile pamirealing vengvenga avele.

¹¹ Na God ile pamirealing vengvenga aken ini Panongpolong Sivenga aka i sivenga rintet aka God aka te paesa iion roro, i sungu i a tho nge mo tho panongpol nge.

Poliri sivengaing nge a God ile themosaling a i nge.

¹² Na tho ri sivengaing a Krais Jisas nge aka ini ar Pomnga, aka i sungu engenging a tho nge, eneke ilemi ve tho pavurvur aka aro tho oma ile omaing. Make i ateal tho mo tho oma ile omaing ake.

¹³ I nunganga aka nomenga tho voltitet, na nik silal, na tho pakerenga ile tokokoere, aveto God kene i themosal tho, eneke lemiko a i nge rongan, na lemik mire aka ur areko tho oma i, kene i kerenga avele.

¹⁴ Na ar Pomnga ile themosaling aken i aolonga rintet nge tho, ma i sung lemioong na asaguong aka ini areko o teo a Krais nge ole, a tho nge.

¹⁵ Na riong aka i nunganga rintet, na i pavurvur aka aro tokokoere aro o nongal senu i, na olelio nge, kene i vene: Krais Jisas i esu a ulue me mo i pamimi tokokoe areko ole vothung kerenga. Na tho ini toko aka lek vothung kerenga i mukal nge or alavusnga.

¹⁶ Aveto Krais Jisas i sis ve aro toko alavusnga aro oleli mire senu aka ve, ini toko aka i paomelal virial areko o oma vothung kerenga, kene avele. Mako i oma senu nge tho, aka lek vothung kerenga i aolonga nge tokokoere ole vothung kerenga alavusnga, mo aro tho velpol ini patongrumong sivenga a tokokoere nge aka aro olelio nge i, na o el mimiong aka aro ile vusonga avele.

¹⁷ Na God ini nepes aka aro ile vusonga avele, na i pavurvur aro i rin avele, na i pavurvur mun aro te thepol i avele, na ienga inga ini a God. Naro opisleonga aro te risea i na te paesa iion roro. I nunganga.

Poliri nge a Timoti ile omaing.

¹⁸ Tuk a Timoti, tho pator wong nge riong aka ranga ve nomenga God ile riong elngare o ri nge wong. Na tho sung riong aken a ong nge mo aro ong panes i, naro wong um engeng nge a Toko Pomnga ile omaing, ranga ve ini toko punonga aka i pun engeng nge punong.

¹⁹ Naro wong krim engeng lom lemioong nge a Jisas Krais, na o oma inga ur aka lomum ve i sivenga. Toko pelie o oma venen aken avele, mako o pakerenga

ole lemioong ranga ve ini imot ako i tho a kurkurpo ma i kerenga selele.

²⁰ Na Himeneus na Aleksander o oma vene aken, ma tho sungu or paini a Satan imeni mo or paini o el paomelaling nge, mo o mothong tova o voltitet ol a God.

2

Pol i ritet nge lotuong a Sovengalo.

¹ Na ur teltelnга aко aro wong oma i, kene i vene: Aro wong ria tokokoere mo o nong a God nge, na o ri sivengaing a i nge, na o nin i ve aro i opoal toko alavusnga.

² Naro o oma venen aken nge nepesre, na a gavman a mukalinga alavusngare mo aко aro it alavusnga aro ler menong kene aro i sivenga inga, na te men lemi moring nge aко te papomnга a God, na te panes vothung sivenga alavusnga.

³ Na nongong aко i venen aken, i sivenga inga a God itheki aко ini ler pamimionga, na ilemi sivenga nge.

⁴ Na ini a God aко i sis ve aro i pamimi toko alavusnga, na i sis mun ve aro olemi mire senu nge ile riong nunganga.

⁵ Eneke it alavusnga lemir mire aко God ini inga omole aко i voth. Na toko inga omole aко i voth a sapat a God na tokokoere nge, na ienga inga aко i wol tokokoere a God nge la. Toko aken ini a Krais Jisas aко i velpol ini toko nunganga.

⁶ Na i sungpot isivenga ile mimiong mo aко aro i ol werer toko alavusnga mo i pamimi or. Na nge vothung aken God i pathengal it aко ve, i sis ve aro i pamimi it alavusnga. Na ur aken i velpol lale nge nang aко God i ateal i nge.

⁷ Make God i ateal tho ve ini ile pakeke, na ini mun i ile panongpolonga mo aко aro tho pamireal areko or ini Judare avele, mo aro olempio nge a Jisas Krais, naro olempio mire nge riong aко i nunganga. Na tho ri ake nunganga, na lek apaltet avele.

⁸ Na i venen aken, make tho sis ve toko riringare aко a lotuong a pen alavusnga, aro o paesa omeni roro mo o nong, na o mothong tova olempio kling eve o vol.

Pol i ritet nge seng lemioongare ole omaing nge lotuong.

⁹ Na e mun e aко tho sis mun ve aro sengre aro o teun inga aко ini teunong aко iennga sivenga inga. Na o mothong tova o magon, na o pamalmal ophothoi na oni peti nge nanaing pelekpolnга na malmaling sivesivenga aко i olonga i roro rintet.

¹⁰ Aveto i sivenga nge seng areko o ri ve o lotual a God, aro o vual inga aко nge omaing sivesivenga omanga. Aken inga aко ini oa malmaling.

¹¹ I sivenga aко aro sengre o men poreng inga, na o paesu or ruru, na o el pamireal ing aко nge lotuong.

¹² Na ong mit roal sengre mo o mothong tova o paesa or nge totomonengaere na o pamireal or nge a God ile riong. Aro sengre o men poreng inga na o nongpol riong.

¹³ Eneke God i oma tel a Adam a mukaling, lamako i oma ol a Iv a rumongaling.

¹⁴ Na ina Adam aко i nongal riong le apaltetonga avele, aveto seng aken kene i nongal riong le apaltetonga aken. Mako i avsa a God ile patorong.

¹⁵ Aveto God aro i pamimi sengre nge ole omaing aко nge wain popnга. Tova olempio nge i, na oa sagu toko alavusnga, na o voth seng riringa, na o nak inga ole menong.

3

Lotu a mukalingare aro o panes inga vothung sivenga.

¹ Na riong ake i nunganga rintet, aro ve toko e i sis aко ve, ini mukalinga nge lotu, akennga i sis re ake ini omaing sivenga.

² Na ine lotu a mukalinga aro ile vothung i vengveng a tokokoere otheki. Naro i voth ini seng omole inga iewo. Naro i naktet ile menong, na i panes inga aко ini lempio rumong sivenga, naro ile menong i sivenga a tokokoere otheki. Naro ini toko aко i nongpoo longre a ile vel, naro ini toko aко i pavurvur aко aro i pamireal senu toko na seng nge a God ile riong.

³ Naro ini toko aко i thin loptet thei engenga avele.* Na i mothong tova ini toko volinga na sisoinga, aveto aro ini

* ^{3:3:} O thopol mun a 1 Timoti 5:23.

toko lemi moringa, naro ini toko ako ile mimiong i voth nge umtun avele.

⁴ Naro ini toko ako i theal senu ile vel lemiare, naro itutunre ako aro o nongal ile riong, na o papomnga i evelelnga.

⁵ Na aro ve toko ilemi mire senu nge iewo na itutunre othealnga avele, aken i pavurvur aro i theal senu toko na seng areko o lotual a God, kene avele.

⁶ Naro ini toko ako ile lemioong i motu nge a Jisas Krais, aro vene mo vothung aka nge magoning aro i esa a i nge, naro God i paomelal i ranga ve aka i paomelal a Satan nge ile magoning.

⁷ Naro ini toko aka, areko o voth nge lotuong avele kene o ri ve ini toko vengvenga na o papomnga i, aro ve avele, aro i el le maraing nge, naro i ting nge a Satan ia suol.

Lotu a opoalingare aro o panes inga vothung sivenga.

⁸ Na ine lotu a opoalingare mun aro tokokoere o papomnga ir. Naro ini tokokoe areko o ri nunganga, na ole apaltet avele. Naro o thin thei engenga aka ini vain pom avele. Na o mothong tova oleli engeng nge umtun na o el polpol tokokoere ole umtun.

⁹ Naro o krim engeng riong nunganga aka God i pathengal i a it nge, naro o rov aka ve, vothung kerenga e avele i voth a oleli.

¹⁰ Naro o tongporum tel or, na aro ve o thepol ur e avele aka i kerenga a ole mimiong, aken aro o velpol ini lotu a opoalingare.

¹¹ Na oewo sengengaere[†] aro tokokoere o papomnga mun or. Na o pavurvur aro o ri ngunngun avele, naro o naktet ole menong, naro ole omaing alavusnga i vengvenga.

¹² Ine lotu a opoalinga aro i voth ini seng omole inga iewo. Naro i theal senu itutunre na ile vel lemiare.

¹³ Ine lotu a opoalingare aka o oma senu ole omaing, tokokoere aro o papomnga or. Naro o pavurvur aro o ngange nge aka aro o panongpol nge ole lemioong nge a Jisas Krais, kene avele.

[†] 3:11: Eve Pol i ri nge sengre aka ini lotu a opoalingare.

Pol i ritet nge a God ile omaing aka i mathe.

¹⁴ Na lelle inga atike tho sis ve aro tho es a wong nge, mo tho thepol wong. Aveto lelik ve i sivenga aka aro tho wat tel malueng ake a wong nge wot.

¹⁵ Na aro ve tho velpol viri avele, aro wong thepol riong ake mo aro lomum mire nge vothung sivenga aka it tokokoe areko ini a God ilengare, kene te panes i. Na it tokokoe areko ini a God ilengare, it ranga ve ini Lotuonga a Vel aka ini a God ile aka aro ile vusonga avele. Na te mit ranga ve ini ile Lotuonga a Vel. Na te krim bibim nge a God ile riong nunganga mo i ngo senu ranga ve ini wovek sapatanga aka i krim bibim vel.

¹⁶ Na lemir mire aka ve, God ile riong avera aka i patheng pat i a it nge, kene i aolonga rintet. Ma i vene:

Na Krais i velpol ini toko nunganga.
Na Oni Riringa i pathengal aka ve,
ile vothung alavusnga i vengveng rin-
tet.
Na enselre o thepol i.
Na tokokoere o panongpol nge i
a rumrem elonga.
Na tokokoere ake ru a ulue olelio nge
i.
Na God i ela i roro a Pen a Urvet
mo i voth tomo nge i.

4

Tokokoe areko aro o panes pamirealing le apaltetonga aro o pakerenga ole lemioong.

¹ Na Oni Riringa i ritet senu nge ve, toth nge nang le vusonga aro toko na seng pelie aro o modop ole lemioong nge a Jisas, naro o nongal tamata le apaltetongare, naro o panes tamata kerengare ole pamirealing.

² Na pamirealing aken toko le apaltetongare aro o panongpol nge. Na o vual nge lemi rumong kerenga. Naro o pavurvur aro o rov ol le maraing nge ole vothung kerenga aken avele.

³ Na tokokoe areko o venen aken, o mitrup toko na sengre nge peangeong, na o ri ve aro o mothong tova o an aning pelie, aveto God i oma aning alavusnga aken, na

tokokoe areko olemio nge i, na olemi mire nge ile riong nunganga, kene o pavurvur nge aning alavusnga aken annga, tova o ri sivengaing a God nge.

⁴ Eneke ur alavusnga ako God i oma i, kene i sivenga inga. Na i pavurvur aro te mothong ur e avele, aveto aro te ri sivengaing a God nge, naro te el i.

⁵ Eneke ini a God ile riong na ler non-gong aken, ako i oma i mo i riri a God itheki.

Pol i pamireal a Timoti mo i voth ini a Jisas ile umonga sivenga.

⁶ Na aro ve wong sungu patorong areke a titeum lemioongare nge, aken aro ong ini a Krais Jisas ile umonga sivenga. Naro wong el engengeng aolonga nge ur aka lemiro nge, na nge pamirealing nunganga aka ong panes i nomenga vet aka me lale.

⁷ Aveto aro wong lel kimom nge riong le apaltetonga, aka i panes Panongpolong Sivenga avele, na nge rurumong polpolng mun. Naro wong paengeng lom lemioong nge a God ile riong panesnga.

⁸ Na aro ve te paengeng nir peti, aken aro i opoal inga it tunti. Aveto aro ve te paengeng ler lemioong nge a God ile riong panesnga, aken aro i opoal rintet it evelelnga. Eneke aro i opoal it nge mimiong ake ru te voth nge ponange, naro i opoal mun it nge mimiong aka aro te voth mun nge panen.

⁹ Na riong aken i nunganga rintet, ma i pavurvur aro tokokoere aro o nongal i mo olemio nge.

¹⁰ Make ranga ve te oma na te um engeng nge, eneke lemir i ngo engeng nge, na te men sial nge a God mo i sungu mimiong a it nge aka aro ile vusonga avele. Eneke God i mimi opisleonga, na ini toko alavusnga areko olemio nge i ole pamimionga.

¹¹ Wong patorial or na patoral or nge ur areken.

¹² Na tokokoere aro o thepol aka rongan ong ini kulpo, aveto o mothong tova o paposnga wong a otheki, aveto aro wong oma inga aka ini vothung sivenga inga mo toko lemioongare aro o thopol lom vothung aken mo o panes i. Naro o thopol

vothung sivenga aka nge lom riong, na nge lom esong, na nge lom asaguong, na nge lom lemioong, na aka aro wong voth ini toko riringa a God itheki.

¹³ Na opisleonga aro wong tital a God ile erere a tokokoere otheki, na panongpol or na patorial or nge. Naro ong oma venen aken i pavurvur aro tho velpol a wong nge.

¹⁴ Naro wong mothong tova loltun Oni Riringa ile sungong aka i sungu i a wong nge nomenga nge wop lemi aka God ile riong elngare o ritet nge, na lotu a mukalin-gare o ronga omeni a wong nge.

¹⁵ Naro evelelnga aro wong oma lom omaing areken na sungu lom mimiong alavusnga nge, mo lom omaing aken aro i velpol senu senu ol a toko alavusngare otheki.

¹⁶ Naro wong naktet wong nge lom mimiong, na nge lom pamirealing nge toko na sangre. Aro ong mit engeng inga nge ur areke omanga. Eneke aro ve wong oma i venen aken, aro God aro i pamimi wong tomo mun nge areko o nongpol lom panongpolong.

5

Sovengalo aka nge tokokoere othealnga.

¹ Na mothong tova wong vol toloklokere, i sivenga aka aro ong sungu riong mosnga a or nge ranga ve ini tomom. Naro wong oma vothung sivenga a kulpopoere nge, ranga ve aka ini titeumre.

² Naro oma vothung sivenga a kimeit-meitere nge, aka ranga ve ini ninom, naro oma mun vothung sivenga a seng ovotvotere nge, aka ranga ve ini lulumre, na lom vothung alavusnga aro i riri a God itheki.

³ Naro wong oma vothung sivenga na pavothal nge seng basbasuere aka olenga e avele, na oenga o voth polpol.

⁴ Aveto aro ve seng basu aken itutun pelie, eve ititevie pelie o voth, aro olemi mire senu aka ve, ole omaing mukalinga aka o lotual a God nge i vene: Aro o theal senu oa ninaere. Na nge vothung ake aro o olal werer omaing aka nomenga otema na oa ninaere o oma i a or nge.

Eneke vothung ako i venen aken God ilemi sivenga nge.

⁵ Na aro ve seng basu e ako ilenga e avele i voth ako aro i opoal i, seng aken i men tetal inga ako ini a God ile opoaling. Ma i nong mo i nin a Toko Pomnga nge nang na mlik elonga ako nge ile opoaling nge i.

⁶ Aveto aro ve seng basu e i panes inga ilemi nge vothung ulue anga omanga, aken ranga ve aka i rin lale. I nunganga aka rongan i mimi, aveto ion i rin lale.

⁷ Naro wong pator basbasuere tomo nge olengare nge riong ake. Moro aken riong e avele aro i tupa a or nge.

⁸ Eneke aro ve toko e i theal senu ilengare eve iewo na itutunre avele, aken i lel ikime nge ile lemioong nge a Krais lale. Na toko aka i oma vothung aken, i kerenga rintet nge tokokoe areko or ini toko lemioongare avele.

⁹ Na seng basu pelie oion i voth lale mo lotuongare o theal or, na ong watu mun inga seng basu mun pelie oion tomo nge or, tova ve oa tovu po i el mule pa limae na i es teleka, ur mun e aka aro o voth inga toko omole iewo.

¹⁰ Naro ini seng aka tokokoere ole mi mire aka ve, ini seng aka i oma vothung sivenga, na nomenga i theal senu itutunre, na i nongpoo longre a ile pen ma i paan or. Naro ini seng aka i paruru isivenga, na i oma vothung sivenga nge toko lemioongare. Na i opoal areko o voth nge matheong, na eveleInga i um engeng inga nge vothung sivengare omanga.

¹¹⁻¹² Aveto ong mothong tova watu seng basu areko rongan o apo oion tomo nge basbasue areken oion, eneke aro lemi rumong i velpol werer a or nge ve aro o peange werer mun, na aro ve o peange werer mun, aken o avsa riong aka o kin tel i tomo nge a Krais lale,* na aken ranga ve aka o lel okime nge a Krais.

¹³ Na e mun e aka, aro otheki namal nge aka o mosal ol inga aka ini siong nge vel pupo elonga. Na o oma inga aken avele, aveto o mosal mun inga aka ini ri kinineong, na o pavothalo tokokoere nge

ole riong, na o ri riong aka i sivenga avele aka aro o ri nge.

¹⁴ Na tho sis ve aro seng basu aka rongan i apo, i sivenga aka aro o peange werer mo o pop otutunre mo o theal ole vel. Aro ve o oma vene aken, aro ler ngarang e avele aro i thepol vothung e avele a it nge, aka aro o ri moluplup it nge.

¹⁵ Tho ri venen aken, eneke seng basu pelie o lel okime nge ole lemioong nge a Krais lale, na o panes ol inga aka ini a Satan.

¹⁶ Na aro ve seng lemioonga ilenga pelie or ini seng basu, i sivenga aka aro seng aken aro i theal or. Aro i oma venen aken mo aka aro lotuongare aro o el matheong nge othealnga avele. Naro lotuongare aro o theal inga seng basu areko olenga e avele.

¹⁷ Aro thomu o ol senu lotu a mukalinga areko o oma senu lotu a omaing, naro o papomnga or. Ranga ve mun nge mukalinga areko o oma engeng nge panongpolong na patoraling.

¹⁸ Eneke God ile erere i ri nge ve,
“Thomu o mothong tova o kin kup bul-
makau iwo
tova ve i te giguaku wit monnga
ma petiti i palitlot
mo aro i an pelie.” *Lo 25:4*

Na i ri mun ve,
“Toko umonga aro i el iolonga.” *Luk 10:7*

¹⁹ Aro ve toko omole ol inga i teltun lotu a mukalinga, aro ong mothong tova nongal riong aken. I sivenga aka aro o nongal riong aken tova ve toko or aini, eve toko or me o ri nge riong aken.

²⁰ Aro ve mukalinga pelie o oma vothung kerenga, aken aro wong pavengvengu or a toko alavusnga otheki mo or alavusnga o thepol i mo o ngeip nge vothung kerenga aken omanga.

²¹ Na tho ria wong a God na Krais Jisas na God ile enselre otheki, na tho pator engeng wong ve, aro wong panes inga patorong alavusnga ake ru tho ria wong nge. Na vothung areko aro wong oma i,

* ^{5:11-12:} Aro ve seng basu i sis ve aro i velpol ini lotu a umonga, aro i kin ile riong ve aro i peange werer avele, mako lotuongare o watu iion ve aro o theal i, na i um inga a Toko Pomnga ile omaing. Maken aro ve i peange werer, aken i avsa ile riong kinnga aken.

aro i vur e pel inga nge toko alavusnga. Na mothong tova lomum ol a lomngare nge.

²² Na mothong tova songalal nge menum ronganga a toko e nge mo o ateal i mo i oma a God ile omaing, o thopol senu tel ile vothung. Mothong tova supo tomo nge tokokoe areko o oma vothung kerenga, aro vene mo ole vothung i theo wong. Aro naktet senu wong ako aro wong velpol ini toko riringa a God itheki.

²³ Na mothong tova thin inga thei ienga, i sivenga ako aro ong thin mun thei engenga tie ako ini vain mo ako aro i opoal opom lemi, eneke ako ni multhanging i voth a ong nge nang pulua.

²⁴ Na toko pelie ole vothung kerenga i ngo pat, na lemire mire nge lale aka aro o el paomelaling nge. Aveto toko pelie ole vothung kerenga i ngo kine ponange, aveto panen aro i ngo patu ol.

²⁵ Na i vene mun re aka nge toko le vothung sivenga, pelie ole vothung i ngo pat ol lale. Aveto pelie ole vothung sivenga i ngo kine ponange, i pavurvur panen aro i ngo patu ol.

6

¹ Na toko lemioonga alavusnga aka or ini toko um polpolongare, aro o papomnga otokoningare mo aka tokokoere aro o ri silil nge a God iion tomo nge ile pamirealing avele.

² Na aro ve toko um polpolonga omole itokoninga ini toko lemioonga, aro toko um polpolonga aken i mothong tova ilemi ve ake ini inga itein lemioonga mo i ri ve i wathalal ile riong. Aro ilemi inga ve, "Aro tho um engeng inga mo aka aro tho opoal i, eneke ini toko lemioonga mun aka God ia sagu i." Naro wong palemi rum or nge vothung aken, na patoral mun or nge.

Pol i pator engeng nge umtun sisngare na patoraling le apaltetonga pelie aka aro o velpol.

³ Na aro ve toko e ile patoraling i rel, na i patoral nge riong aka i vur e pel nge a ar Pomnga a Jisas Krais ile riong nunganga avele, eve i patoral nge riong aka i vur e pel nge a God ile pamirealing avele,

⁴ aken toko aken i vual inga nge mago-nning, na ilemi mire ol nge ur e avele. Na ilemi ol inga nge ur kerenga ranga ve ako i pavelpol polpol punpeling a riong nge riong mirenga. Na vothung aken aro i pamien kerere tokokoere mo o vol pel nge riong, na o ser pel mo o ri ve o velpol ini mukalinga, na o ri silil pel, na olemi otun pel.

⁵ Na opisleonga o mosal ol inga aka ini volpelting, eneke ole mire kene i poor, na olemi mire ol nge riong nunganga avele ol. Na o rivenga vothung aka nge Toko Pomnga ipanesnga ini sovengalo aka aro o el ur elonga pom nge.

⁶ I nunganga aka aro ve te panes a God ile vothung, aro te el ur sivenga pulua, tova ve lemire sivenga nge ur areko i sungu i a it nge.

⁷ Eneke nge nang aka ar ninaere o pop it nge, te es tomopot nge ur e avele. Naro nge nang aka aro te rin mun nge i pavurvur aro te es tomou mun nge ur e avele.

⁸ Na aro ve ar aning na ar teunong i voth, aken aro te ri ve i pavurvur re aken.

⁹ Aveto areko o sis ve aro o velpol ini toko le urnga, aken o matu nge tongporumong, na oleme nine avele, ma o sis ve aro o oma vothung pulua aka i pakerenga or. Mako vothung aken i paesu or nge ur aka aro i pakerenga selele or.

¹⁰ Eneke vothung aka nge umtun sisngare ini vothung kerenga puluanga tepun. Na toko pulua aka o sis rintet umtun, vothung aken i papelekpol oleme ma o modop ole lemioong lale, na o el sisong aolonga nge.

Patorong sivenga nge toko lemioongare ve aro o mit engeng.

¹¹ Aveto wong aka ini a God ile toko, naro geltet nge vothung kerenga alavusnga areken. Naro lom vur nge vothung vengvenga, na nge a God ipanesnga, na mit engeng nge lom lemioong, naro om sagu toko alavusnga, na mit engeng nge matheong alavusnga potunnga, na vothung mosnga nge tokokoere.

¹² Toko aka ilemio nge a Jisas i ranga ve ini toko aka i tho nge sertetpeling. Na i sivenga aka aro ong tho engeng nge sertet-peling sivenga aken, mo ong el mimiong

sivenga ako aro ile vusonga avele aka God i ateal i a ong nge, nge wop lemi aka ong ritetpot nge lom lemioong a toko puluanga otheki.

¹³ Tho pator wong a God itheki aka i sungu mimiong a ur alavusnga nge, na a Krais Jisas itheki aka i mit engeng ma i ripot ile lemioong a Pontius Pailat itheki, na tho ri engeng a wong nge ve,

¹⁴ aro ong panes senu inga aka ini patorong aka wong el i lale. Na mothong tova papelekpol patorong areke mo tokokoere oma riong kerenga pelie nge. Avele, aro panes senu inga patorong areken mola i pavurvur nge nang aka aro ar Pomnga a Jisas Krais aro i velpol nge.

¹⁵ Aro i velpol nge nang aka God i ateal i lale. Na aka ini a God ienga inga aka te risea i. Na ienga inga aka i theal ur alavusnga, na ini nepes alavusngare ole nepes. Na ini toko pomnga alavusngare oa Pomnga.

¹⁶ Na ienga inga aka i pavurvur aro i rin avele, na i voth nge pen lalanga aka i pavurvur aro toko e i eso nge avele. Na toko e i thepol i rongan, na e i pavurvur aro i thepol i avele. Na evelelnga aro it alavusnga aro te papomnga i tomo nge ile engenging aka aro ile vusonga avele. I nunganga.

¹⁷ Pator tokokoe areko ole ur elonga pom ake ru a ulue mo o mothong tova o paesa osivenga oion roro. Naro o mothong tova olemio nge ur areko aro i kerenga viri viri, ave aro ole lemioong aro i voth inga nge a God, eneke God inga aka i sungu ur alavusnga alarolpot a it nge, mo aro lemir sivenga nge.

¹⁸ Na pator mun or nge, mo o oma inga aka ini vothung sivenga nge ole umtun aken mo ole omaing sivesivenga pom ranga ve ini ole umtun. Na evelelnga aro ole sungong i alarolpot na o opoal areko ole ur e avele.

¹⁹ Na aro ve o oma venen aken, i ranga ve aka o paen tomoal ur sivenga pulua a Pen a Urvet ranga ve ini ole vel le mitainga sivenga, aken aro o krim mimiong aka ini mimiong nunganga.

²⁰ Timoti, aro theal senu omaing aka God i sungu i a wong nge. Na lel kimom nge riong polpolngare na ripeling aka i panes a God ilemi avele. Toko pelie ole apaltet ve riong aken ini lemi rumong sivenga, aveto avele.

²¹ Lel kimom nge ur areken, eneke toko pelie aka o oma venen aken, o modop ole lemioong nge a Jisas Krais lale.

Na God ile themosaling aro i voth tomo nge thomu.

Na i re aken. I vus.

Timoti aro i the senu nge ile omaing.

Pol ile malueng aininga ako i wat i a Timoti nge 2 Timoti Ritetong nge a 2 Timoti

Pol i voth werer mun a mang a midenga lemi aka a rem pomnga a Rom. (O thopola 1 Timoti a ritetong.) Na ilemi mire aka ve i toth aka aro o so rin i, (4:6-8) na ilemi rit nge ur omole inga aka i vene: I sis rintet aka aro Timoti tomo nge toko lemioong-gare aro i theal tetal senu Panongpolong Sivenga, aro vene mo pamirealonga le apaltetongare aro o eksing kerere i. (1:12-14; 2:2; 2:14-3:17) Aken ini ur aolonga aka i voth a malueng ake. Pol i pator engeng a Timoti mo i monsi nge Panongpolong Sivenga panongpolnga, (4:2) naro i monsi mun nge matheongre potunnga. (1:8; 2:5; 4:5) Ake ini patoraling sivenga i pavurvur nge lotu a mukalingare ve aro o panongpol senu, na o theal tetal senu Panongpolong Sivenga.

Timoti aro i um engeng mo aro i velpol ini a God ile omainga sivenga

(Vonge 1:1-4:22)

¹ Tho a Pol, aka ini a Krais Jisas ile pakeke, eneke God ilemi ve tho ini ile pakeke. Na i pake tho ve aro tho ritet nge mimiong aka nomenga i kin ile riong lale ve aro i sungu i a tokokoe areko o panes a Krais Jisas nge.

² Tho wat malueng ake a wong a Timoti nge aka ini tuk, eneke ler lemioong omole ol inga nge a Jisas Krais.

Naro ong el themosaling na asaguong na lemi moring a God aka ini Titemer tomo nge a Jisas Krais aka ini ar Pomnga nge.

Pol i paengeng a Timoti mo i mit engeng nge ile lemioong.

³ Na tho ri sivengaing a God nge aka tho oma ile omaing, na tho rov i a lemik aka ur e avele i ngo a lemik, ranga ve aka tithevikre o oma i. Na nge lek nongong aka nge nang na mlik elonga, lemik rum

wong, mako tho ri sivengaing a God nge, nge wong.

⁴ Na lemik rum thekum einga aka i teel, na tho sis rintet ve aro tho thepol wong mo aka lemik sivenga werer.

⁵ Na lemik rum mun lom lemioong nunganga, aka nomenga i voth a tovum sengenga a Lois tomo mun a ninom a Iunis nge. Na lemik mire mun aka lemioong aken i voth mun a wong nge.

⁶ Make tho palemi rum ong ve aro evelelnga ong oma omaing nge sungong aka God i sungu i a wong nge, nge wop lemi aka tho ronga menik a wong nge.

⁷ Wong oma omaing aken, eneke God Ioni aka i sungu i a it nge, i voth a it nge mo aro te ngange avele, aveto i pavual it nge ile engengna ile asaguong, na i opoal it mo te nak ler menong.

⁸ Naro wong mothong tova lom maral nge ar Pomnga ipanongpolnga, eve nge tho aka ini ile toko aka tho voth a mang a midenga lemi, aveto aro ong el mun sisong nge a God ile Panongpolong Sivenga panongpolnga aka ranga ve tho el mun i, i pavurvur nge engengna ake God i sung i a wong nge, mo wong mit engeng nge.

⁹ Na God i pamimi it na i ateal it ve aro te velpol ini toko riringa. Na i ateal it aka nge ler omaing avele, aveto nge isivenga ilemi, na nge ile themosaling. Na nomenga vet aka nge ur elonga pateanga, God ilemi aka ve, aro i sungu ile themosaling aken a it nge, aka nge ler teoong a Krais Jisas nge.

¹⁰ Make ponange te thopol ile themosaling aken nge ler pamimionga a Krais Jisas ile velpol. Ma Jisas i pavus rinong ile engengna a it nge, na nge Panongpolong Sivenga i patheng pat it nge mimiong aka aro ile vusonga avele.

¹¹ Na God i ateal tho ve tho ini ile pakeke, na pamirealonga, na panongpolonga nge Panongpolong Sivenga ake.

¹² Na nge ur aken tho el sisong areke nge, aveto lek mara avele, eneke lemik mire senu aka toko aka lemiko nge i, i pavurvur aro i theal senu omaing aka i sungu i a tho nge, i mulal nge nang le vusonga.

¹³ Aro ong panes inga riong nunganga

ako tho patoral wong nge. Na krim ler lemioong na ler asaguong ako Krais Jisas i sungu i a it nge.

¹⁴ Aro ong theal senu ur sivesivenga ako God i sungu i a wong nge, na theal i aka nge Oni Riringa ile engenging aka i voth a it nge.

¹⁵ Lomum mire aka ve, thengengek alavusnga aka ru a epee a Esia, o lo vrau ok tomo nge a Pigelus na Hermogenes.

¹⁶ Naro Toko Pomnga aro i sung ile themosaling a Onesiporus ile vel lemiare nge, eneke nang pulua i panisisi tho, na ile mara nge tho aka tho voth a mang a midenga ake, kene avele.

¹⁷ Aveto nge ile velpoling a Rom, i patea nge kathngek, makola i pavurvur nge aka i thopol tho.

¹⁸ Na tho nong ve aro Toko Pomnga aro i sung ile themosaling a i nge, nge nang le vusonga. Na lomum mire senu nge ur alavusnga aka i opoal tho nge, aka ru a Epesus.

2

Pol i ri ve Timoti aro i mit engeng ranga ve aka Jisas ini ile Toko Punonga.

¹ Na tuk, aro ong mit engeng, eneke Krais Jisas i sung ile themosaling a it tokokoe areko ini ile.

² Naro ong elespot pamirealing aka ong nongpol i aka tho panongpol i a pulua otheki, mo ong sung esu i a tokokoe areko o nongal riong, na o pavurvur aka aro o patoral tokokoere nge.

³ Naro ong el sisong tomo nge them ranga ve aka ong ini a Jisas ile toko sivenga aka ini lom Toko Punonga.

⁴ Na toko aka i oma punong a omaing, i pavurvur aro i oma ol omaing relnga ol e avele, eneke i sis ve aro i panes inga ia pomnga ikei mo aro ia pomnga ilemi sivenga nge i.

⁵ Naro ong panes a Toko Pomnga ile patorong, eneke aro ve toko e i eso a asisaling pomnga na i panes senu asisaling a patorong avele, aken i pavurvur aro i ela iolonga avele.

⁶ Na toko pen lesnga mun aro i el tel ia ometa lemia.

⁷ Na lomum rum lek riong ake, eneke Toko Pomnga aro i panine lomum nge ur alavusnga areke.

⁸ Evelenga aro lomum rum a Jisas Krais aka i los werera nge rinong, na ini nepes a Devit itevinga aka i rumongal nge i. Na aken ini Panongpolong Sivenga aka tho panongpol nge.

⁹ Na tho el sisong, na o kin tho nge sen ranga ve ini toko aka i avsa patorong, eneke tho panongpol nge Panongpolong Sivenga, aveto o pavurvur aro o mit roal a God ile riong avele.

¹⁰ Make aro tho el inga ur alavusnga aken mo aro tokokoe areko God i ateal or, aro o el mimiong nge a Jisas Krais, tomo nge menong a urvet aka aro ile vusonga avele.

¹¹ Na riong ake kene i nunganga na i vene:

Na aro ve te rin tomo nge a Krais,
aro te mimi tomo mun nge i.

¹² Na aro ve te el inga sisong,
aro te velpol ini nepes tomo nge i.
Na aro ve te kelelal i,
aro i kelelal mun it.

¹³ Na aro ve te kin ler riong tomo nge i,
aveto te panes senu i avele,
aro i panes inga ile riong aka i kin i
lale.”
Eneke i pavurvur aro i eksing ol avele.
Aro i panes inga ile riong aka i kin i
lale.

Pol i ria Timoti mo i mit engeng nge a Jisas ile omaing omanga.

¹⁴ Naro wong palemi rumal toko lemioongare nge lek riong areken tho ri nge lale, na pator engeng or a God itheki mo o mothong tova o vol pel nge riong pelie, vothung aken aro i opoesal or avele, naro i pakerenga areko o nongpol ole riong aken.

¹⁵ Na um engeng a God itheki mo ong velpol ini ile umonga aka ong patorial senu nge ile riong nunganga, naro lom mara avele nge omaing aken.

¹⁶ Na lel kimom nge riong polpolnga aka i panes a God ilemi avele, eneke areko o ri riong aken, kene o es melanga rintet nge a God.

¹⁷ Na ole riong le apaltetonga i ranga ve ini kolok aolonga ako i an toko. Na toko aini ako o oma venen aken ini a Himeneus ome a Piletus.

¹⁸ Ma or paini o sele sovengalo nunganga lale, na o pakerenga toko mun pelie ole lemioong, eneke o patorial kerere or ve, ler los wereraing i velpol lale, naro i velpol ol panen avele ol.

¹⁹ Aveto God ile riong tepun i ranga ve ini wovek papesnga ako i ou i lale ma i wat riong nge ako i ri ve, "Toko Pomnga ilemi mire nge ilengare" na i wat mun ve, "Toko alavusnga aka o ri ve or ini a Toko Pomnga ile, aro o lel okime nge vothung kerenga."

²⁰ Na aka a toko le urnga ile vel lemi, oto vet mun pelie aka o oma i nge silva eve gol o voth tomo mun nge oto vulutnga aka o oma i nge saka na won. Na oto vulutngare o voth mo o an nge, nge nang elonga, na oto vet pelie aka ini toko kimangare oa.

²¹ Na toko aka i ranga ve ini oto vulutnga, aro ve i pavthopot isivenga nge patorialing le apaltetonga areken, aro i velpol ranga ve ini oto vet aka ini a God ia, eneke ini a God ile toko, na i oma a Toko Pomnga ile omaingre, na i monsi lale nge omaing sivenga kathnga areko God aro i sungu i a i nge.

²² Naro ong lo lelpot nge kulpoing a vothung na lom vur nge vothung vengvenga, naro om sagu toko alavusnga, na mit engeng nge lemioong na lemi moring tomo mun nge areko olemi i riritet na o avav a Toko Pomnga mo aro i opoal or.

²³ Aveto aro ong voth mela nge riong vulutnga na ripeling polpolnga, lomum mire aka ve, ur areken i pavelpol volpeling.

²⁴ Na Toko Pomnga ile umonga i mothong tova i vol. Aro i oma inga vothung sivenga, na ini toko aka i pavurvur aka aro i patorial senu tokokoere, na i ri riong mosinga a or nge.

²⁵ Na i ri riong mosinga mun nge areko o wathalal ile riong mo i pavengveng or. Eneke ilemi mire avele aka aro God i oma or mo o eksing olemi mo aro olemi mire nge riong nunganga, eve avele.

* **3:8:** Judare oa tenesing i vene, Janes ome a Jambres or paini ini a Isip angare ole nepes a Pero ile toko nong tungtangonga nge wop lemi aka Moses i voth. O thopol i a Kisim Bek 7:22 na 9:11.

²⁶ Na o ting nge a Satan ia suol lale, ma i paleklek or mo o panes ilemi. Na aro ve olemi mire nge riong nunganga, aro o ate ole vothung, naro o lo lelalpot nge a Satan ia suol aken.

3

Ur kerenga pulua aro i velpol nge nang le vusonga.

¹ Na lomum mire aka ve, matheong pulua aro i velpol nge nang le vusonga.

² Na tokokoere aro o sis inga osivenga, naro ole mimiong i voth inga nge umtun, naro osivenga o pasea or, na o magon, na o ri inga riong kerenga, naro o wathalal otema ome oninaere ole riong, naro o ri sivengaing nge toko aka i oma vothung sivenga a or nge, kene avele, naro o papomnga a God avele,

³ naro oni silal tokokoere, naro olemi simikal vothung kerenga aka o oma i a or nge, kene avele, naro o ri riong le apaltetonga nge tokokoere, naro olemi kling semel semel, naro o pun tokokoere, naro oni silal ur aka i sivenga,

⁴ naro ole olo tokokoere, naro olemi rum senu tel avele na o panes viri viri aka ini olemi, naro o vual nge magoning, naro oni plong ve aro o nongal a God, naro o sis inga aka ini vothung ulue anga.

⁵ Naro o panes a God nge oni peti inga, aveto ole mimiong i pathengal it aka ve, ole lotuong ini ur polpolnga inga. Aro ong voth melanga nge tokokoe areko o oma vothung areken.

⁶ Pelie a or nge o eso a velre lemi mo o ri ololo marati sangre mo o panes olemi. Na seng areken o rov matheong nge ole vothung kerenga aka o oma i nomenga. Na vothung pelekpolnga i ther wereral or.

⁷ Na evelengla olemi ve aro o el pamirealing, aveto o pavurvur aro olemi mire senu nge riong nunganga avele.

⁸ Na nomenga Janes tomo nge a Jambres* ole ngarang a Moses ranga ve ini mun i pamirealonga le apaltetonga areken ole ngarang mun nge riong nunganga. Na

ole mire kene i oror na ole lemioong i matu selele.

⁹ Aveto ole vothung aken aro i palolo avele, eneke toko alavusnga aro o ate ole omaing areken i ranga ve ini toko ngongong ile. Na i ranga ve mun ako i velpol a Janes tomo nge a Jambres nge lale.

Pol i ria Timoti ve aro i krim engeng a God ile riong.

¹⁰ Aveto engom, lomum mire senu nge lek patoraling, na lek mimiong, na lek omaing tepun, na lek lemioong, na lek asaguong, na lomum mire mun ako tho ini toko mosinga, na tho mit engeng nge matheong.

¹¹ Na lomum mire nge matheong areko tokokoere o oma i a tho nge, na sisisong aka tho el i, na ur alavusnga aka i velpol a tho nge a rem aka a Antiok, na Aikoniam, na Listra aka tho potun matheong aolonga nge. Aveto Toko Pomnga i eltetpot math-eong alavusnga areken a tho nge.

¹² I nunganga, toko alavusnga aka o sis ve aro o teo a Krais Jisas nge, na o panes a God ilemi, aro o el matheong.

¹³ Na toko kerengare tomo nge toko le apaltetongare aro ole vothung aro i kerenga selele. Na ole apaltet tokokoere na ole apaltet mun osivenga.

¹⁴ Aveto engom, aro ong krim engeng riong nunganga aka o patorial ong nge, riong aken lom lemioong i nunganga nge, eneke lomum mire senu nge lom patorialingare.

¹⁵ Na nomenga nge lom posngaing, lomum mire nge erere riringa aka i pavurvur aka aro i patorial ong ve, toko e aro ilemio nge a Jisas Krais mo aro God i pamimi i.

¹⁶ Na God i pavelpol ile riong alavusnga aka i voth a erere nge, mo i opoal it nge patorialing nge riong nunganga, na nge toko pavengvenga, na nge torong nge ole vothung kerenga, na nge pamirealing nge vothung vengvengare omanga,

¹⁷ mo aka aro God ile toko umonga ile mire i aolonga mo i pavurvur aka aro i omaing sivenga elonga.

4

Pol i rive Timoti aro i engeng nge a God ile riong panongpolnga.

¹ Tho ria wong a Timoti a God na Krais Jisas otheki na Jisas ake, ini toko aka aro i nongpol tokokoe areko o mimi na tokokoe areko o rin lale ole riong, naro i lo werer mo i velpol ini toko alavusnga ole nepes, make tho tor lom ve,

² aro panongpol nge riong sivenga, aro ve o nongal i, eve o nongal i avele, evelelna aro ong engeng nge ipanongpolnga. Naro ong ri ole nge ole vothung kerenga, na pavengveng tokokoere, na paengeng olemi, na themosal or nge patorialing.

³ Eneke panen tokokoere aro o nongal patorialing vengvenga avele, aveto aro o ta otelnga nge riong pelekpolnga, naro o wol velilo patorialingare a or nge aka o pamolomolo or nge riong aka o sis ve aro o nongpol i.

⁴ Naro o lel okime nge riong nunganga nongpolnga. Naro olelio nge rurumong polpolngare.

⁵ Aveto engom, aro evelelna lomum i nine, naro ong el inga sisisong, na um inga nge panongpolong a omaing, na oma inga omaing alavusnga aka ranga ve ong ini a God ile umonga.

⁶ Eneke, i toth lale aka aro lek mimiong i velpol ranga ve ini sungong aka aro o sungu i a God nge, na i toth lale aka aro lek mimiong i penthal.

⁷ Na lok vur rintet mun nge sertetong lale. Na sertetong aken i ranga ve ini lek omaing aka tho oma i. Na tho pavus sertetong aken lale, na tho panes inga lek riong aka tho kin tel i lale tomo nge a Krais.

⁸ Na ponange God i theal sungong aka ranga ve tho voth ini toko vengvenga a itheki, na Toko Pomnga aka ini toko vengvenga aka aro i nongpol toko alavusnga ole riong, aro i sung sungong aken a tho nge, nge ile nang aken. Naro engek avele, aveto tomo mun nge toko alavusnga areko o men tetal na o sis ve aro o thepol ile velpoling.

Pol ile ritetong nge tokokoere na ile torong patopalalnga.

⁹ Na tho sis rintet ve aro ong es viri viri a tho nge me.

¹⁰ Eneke Demas ia sagu vothung ulue anga, mako i lo nge tho ma i es a Tesalonaika. Na Kresens i es a Galesia. Na Taitus i es a Dalmesia.

¹¹ Na Luk inga ako i voth tomo nge tho. Wola mun a Mak mo i es tomo nge wong, eneke aro i opoal tho nge lek omaing.

¹² Na tho pakepot a Tikikus a Epesus lale.

¹³ Na nge nang ako aro ong es nge me, aro ong ela lek tekruk seltunnga aka tho parong leu i a Karpus nge aka a rem a Troas, na ela mun lek erere pelie, na mothong tova lomum simikal lek erere aka o oma i nge mekerem peti.

¹⁴ Na Aleksander aka ini toko aka i sotunu ain na i viv i, i oma kerengaing aolonga nge tho, naro Toko Pomnga aro i olal werer i a i nge, nge ile omaing aken.

¹⁵ Naro ong naktet sivengom nge i, eneke i wathalal rintet ler panongpolong.

¹⁶ Ako nge lek lelong teltelnga, toko e avele i mit a kimek, aveto or alavusnga o lo vrau nge tho. Naro God i mothong tova aro i olal werer vothung aken a or nge!

¹⁷ Aveto Toko Pomnga i voth tomo nge tho, ma i sungu engenging a tho nge, mako tho panongpol vustetpot Panongpolong Sivenga aken a toko alavusnga nge aka or ini Judare avele, ma o nongpol i. Mako God i eltetpot tho a rinong lemi.

¹⁸ I nunganga, Toko Pomnga aro i eltetpot tho nge ur kerenga alavusnga naro i pamimi tho, naro i paeso tho a Pen a Urvet aka ini ile nepes a menong. Naro te paesa iion roro opisleonga aka aro ile vusonga avele. I nunganga.

¹⁹ Na pasungalu lek nang sivenga a Prisila ome a Akuila tomo mun nge a Onesiporus ile vel lemiare.

²⁰ Erastus i voth a Korin. Na tho los lelpot a Tropimus a rem a Miletus, eneke ini multhang.

²¹ Na tho sis rintet ve aro wong velpol tel, lamo theu po aro i velpol ol. Na Iubulus na Pudens na Linus na Klodia tomo mun nge toko lemioonga alavusngare o pasungalu ole nang sivenga a wong nge wot.

²² Naro Toko Pomnga aro i voth tomo nge wong. Naro God ile themosaling aro i voth tomo nge thomu.

Na i re aken. I vus.

Pol ile malueng ako i wat i a Taitus nge Taitus Ritetong nge a Taitus

Pol i pamenu a Taitus a mtho a Krit, mo i voth nge mo i theal total toko lemioongare na i pavengveng ole lotu. (O thopola 1 Timoti a ritetong.) Krit angare o oma vothung ako i kerenga rintet, mako Pol i ri pompom nge vothung sivenga ako aro toko lemioongare tomo nge lotu a mukalingare aro o panes i. (2:2-13; 3:1-3) Taitus 1:6-9 na Timoti 3:1-12 o ritet it nge toko le vanga o pavurvur aka aro o velpol ini lotu a mukalingare. Pol i tor a Taitus ile ve aro i vol pamirealonga le apaltetongare. (1:5; 1:10-16; 2:1; 2:7-8; 2:15; 3:9-11) I sivenga aka aro lotu a mukalingare aro o el senu mire nge a 1 Timoti, 2 Timoti na Taitus mo aro o pavurvur nge toko lemioongare othealnga na lotuong ile thoing.

Taitus aro i paengeng toko lemioongare aka o voth a mtho a Krit ole lemioong, naro i pavengveng mun ole vothung

(Vonge 1:1-3:15)

¹ Tho a Pol, tho ini a God ile toko umonga, na Jisas Krais ile pakeke. Na God i ateal tho ve aro tho pamireal tokokoere areko God i ateal or lale ve aro or ini ile, mo olemio nge i. Na i ateal mun tho ve aro tho opoal or mo olemi mire senu nge a God ile riong nunganga aka i ritet nge mimiong aka God i sis ve aro o panes i.

² Na tho opoal or venen aken, eneke te men sial ol nge mimiong aka aro ile vusonga avele. Na nomenga nge aka God i pamenu ur e rongan, God aka ile apaltet avele, i kin ile riong lale ve aro i sungu mimiong aken a it nge.

³ Na nge nang aka isivenga i ateal i, i pateng pat ile riong aken, aka nge panongpolong. Na God aka ini ler pamimionga i

pator engeng tho, ma i sungu omaing aken a tho nge, ve aro tho panongpol nge ile panongpolong aken.

⁴ Na tho wat malueng ake a wong a Taitus nge, na wong ini tuk nunganga, eneke ler lemioong i omole inga.

Na tho nong ve aro ong el themosaling na lemi moring a God nge aka ini Titemer tomo nge a Krais Jisas aka ini ler pamimionga.

*Taitus aro i the senu tel lamo i ateal ol
lotu a umongare aka a mtho a Krit.*

⁵ Na tho rialalu wong ve aro wong vothu a mtho a Krit mo aro wong pavengveng umong uluo aka i vengveng senu rongan, naro wong ateal lotu a mukalingare aka ole lemioong i motu aka a rumrem alavusnga, ranga ve aka tho ria wong nge lale.

⁶ Naro wong ateal inga tokokoere areko tokokoere o thepol ur e avele i kerenga a ole mimiong, na toko aka aro i velpol ini lotu a mukaling venen aken, aro i ewoa inga seng omole inga, na itutunre aro ole lemioong i voth mun a Krais nge, na o mothong tova ve tokokoere o appet or ve ini telnga plaignare eve or ini wainlanga areko o nongal riong avele.

⁷ Na lotu a mukalinga pomnga i pavurvur ve tokokoere aro o thepol ur e avele aka i kerenga a ile mimiong, eneke ini a God ile toko aka i theal a God ile omaing. Na i mothong tova ilemi ve ini toko pomnga aka aro i theal toko alavusnga. Na i mothong mun tova ini toko aka ilemi kling viri viri, eve i thin loptet thei engenga, eve i siso polpol tokokoere. Na e mun e aka i mothong tova ini toko aka i engeng nge umtun elnga.

⁸ Aveto aro ini toko aka i nongpoo longre. Na ini toko aka ia sagu vothung sivenga panesnga, na i panes inga lemi rumong sivenga. Naro i panes vothung vengvenga, naro i sungpot ile mimiong a God nge, naro i naktet isivenga ile mimiong.

⁹ Naro i krim engeng riong nunganga aka i pavurvur aka aro tokokoere aro o nongal senu i na olemio nge aka ranga ve te pamireal nge, mo i pavurvur aka aro i pamireal na i pator tokokoere nge

pamirealing vengvenga panesnga, mo i pavurvur mun ako aro i pathengal toko le apaltetongare nge ole le apaltetong ako owo paenal nge riong nunganga aken.

Taitus aro i pavengveng areko o panes riong le apaltetonga.

¹⁰ Na lotu a mukalinga aro i pavurvur nge tokokoere opavengvenga, eneke toko puluanga aka a mtho a Krit o pun tomo nge pamirealing vengvenga, na o nongal riong avele, na o ri riong aka imonngare avele, na o paleklek tokokoere. Na ine toko puluanga areken ini Judare aka o sis ve tokokoere aro o panes patorong aka nge toko ini peti isnga.

¹¹ Naro wong mit roal or, eneke o pakkerenga vel lemia pulua ole lemioong, aka nge ole pamirealing le apaltetonga aka o mothong tova o ri nge. Na pamirealonga areken ole mara avele aka o eprum inga aka ini umtun.

¹² Na osivenga ole toko e aka ini Krit anga aka ile mire i aalonga i oma riong vene: "Ine Krit angare evelelnga ole apaltet, na o ranga ve ini mekerem wengare, na o mosal inga aka ini aning na theki namaling."

¹³ Na riong aken i nunganga a or nge, maken aro wong vol engeng or nge ole vothung areken, mo aro ole lemioong aro i nunganga nge pamirealing vengvenga.

¹⁴ Naro o modop Judare otiteviere ole rurumong pelekpolnga nongalnga, tomo mun nge patorong aka tokokoere aka o lel okime nge a God ile riong nunganga, kene osivenga o pavelpol i.

¹⁵ Na aro ve tokokoere o riri a God itheki lale aka nge ole lemioong nge a Jisas, aken ur pelie aka aro o an i, eve o oma i, aka ole lotu i rial or nge, kene aro i paakop or a God itheki avele. Aveto aro ve tokokoere o riri a God itheki avele, eneke ole vothung kerenga, na olemio nge a Jisas Krais avele, aken ur alavusnga aka o mothong nge annga eve o oma i mo aro o panes vothung aka ole lotu i rial or nge, kene aro i riri a God itheki avele. I nunganga, ole lemi rumong i kerenga inga, mako o pavurvur avele aka aro o ate vothung aka i kerenga.

¹⁶ Na osivenga o ri ve ole mi mire nge a God, aveto ole vothung i pathengal i aka ve, o lel okime nge i lale. Na o nongal ile riong avele, na God i pilalpot or na o pavurvur aro o oma vothung sivenga e avele.

2

Taitus aro i pamireal tolokre ome kimeitre ve aro o panes pamirealing vengvenga.

¹ Aveto wong, aro wong pamireal nge ur areko i panes pamirealing vengvenga.

² Naro wong pamireal tolokre mo o naktet ole menong, naro o panes vothung vengvenga mo tokokoere o papomnga or, naro o panes inga lemi rumong sivenga, naro ole lemioong i voth engeng nge pamirealing vengvenga, naro oa sagu rintet tokokoere, naro o mit engeng nge matheong potunnga.

³ Naro wong pamireal mun kimeitre mo o panes inga vothung aka God i sis ve aro o oma i. Na o mothong tova o ri tangatun, na i mothong tova thei engenga i theal ole mimiong. Aveto aro o pavurvur nge vothung sivenga patoralnga.

⁴ Naro o venen aken mo aro o tor seng apongare ve aro oa sagu oewoere na otutunre,

⁵ naro o panes inga lemi rumong sivenga, naro o voth ini seng riringare a God itheki, naro o oma senu ole omaing alavusnga aka ru a ole velre nge. Naro o oma vothung sivenga, naro o nongal oewoere ole riong. Na aro ve o oma venen aken, aro tokokoere o pavurvur aro o oma riong kerenga nge a God ile riong avele.

Taitus ile vothung aro i patorial toko apongare nge vothung sivenga panesnga.

⁶ Naro wong pamireal mun toko apongare ve aro o panes inga lemi rumong sivenga.

⁷ Na sivengom lom omaing alavusnga aro i pathengal vothung sivenga a or nge mo o panes i. Na nge lom pamirealing alavusnga, mothong tova patho tomo i nge asisaling na ri posililaling.

⁸ Naro wong ri riong vengvenga inga ako tokokoere o pavurvur aro o ri riong kerenga e avele nge, mo ako aro ler ngarangre ole maral, eneke o pavurvur aro o oma riong kerenga e avele a it nge.

Toko um polpolongare aro o nongal otokoningare ole riong.

⁹ Naro wong tor toko um polpolongare ve aro o nongal inga otokoningare ole riong, na nge ole umong alavusnga, aro o palemi senu otokoningare nge. Na o mothong tova o wathalal ole riong,

¹⁰ eve o kem ole ur elonga. Aveto aro o pathengal i ako ve, ole omaing alavusnga i vengvenget inga, aken tokokoere aro o thepol ole omaing elonga, naro o papomnga a God aka ini ler pamimionga ile pamirealing vengvenga.

Aro te mimi ranga ve aka God i sis ve aro te oma i.

¹¹ Naro wong pamireal toko lemioon-gare venen aken, eneke God ile themosaling a it nge, kene ini Itun aka i pakeu i a it nge me lale, mo aro i el werer toko alavusnga nge i.

¹² Na i pamireal it ve aro te modop vothung aka God ilemi i sivenga nge avele, tomo mun nge vothung ulue anga areko i mita a lemire me. Na i pamireal it ve aro te panes inga lemi rumong sivenga, na vothung vengvenga, na vothung aka God i sis ve aro te oma i, nge ler mimiong elonga aka te voth nge ake ru a ulue.

¹³ Naro te mimi venen aken, nge aka te men sial nge ur sivenga aka aro i palemi senu rintet it nge, aka ini a Jisas Krais ile velpoling tomo nge ile tolilisong aka aro i sivenga rintet. Na i kene ini ler God aka i aolonga rintet, na ini ler pamimionga mun.

¹⁴ Na i sungpot isivenga ile mimiong mo i opoal it, na i ol wererpot it nge ler vothung kerenga alavusnga, mo i oma it mo te voth ini isivenga ile toko riringare, aka te engeng nge vothung sivenga omanga.

¹⁵ Naro wong pamireal tokokoere nge ur areko tho ri nge lale. Naro wong paengeng na pavengveng tokokoere nge lom engenging alavusnga aka God i sungu

i a wong nge, nge othealnga. Naro ong mothong tova som womo or mo olemi ve lom omaing aken ini ur polpolng.

3

Vothung sivenga aka aro te oma i.

¹ Naro wong palemi rum toko lemioon-gare ve aro o voth a gavman a mukalin-gare osa thewo, naro o nongal ole riong. Na evelenga aro o monsi nge omaing sivenga elonga omanga.

² Naro o mothong tova o voltet toko e, na o mothong tova o kelelal pel. Aveto aro o nak ole menong, na o oma inga vothung sivenga a toko alavusngare nge.

³ Eneke nomenga sivenger mun ler vothung i ranga ve aka lemire nge a Krais avele, na te nongal riong avele, mako te leklek. Na i ranga ve aka te velpol ini toko um polpolonga nge lemi rumong kerenga kathnga aka i mita a lemire me, tomo mun nge vothung kerenga aka te sis ve aro te oma i. Na ler mimiong aken i vual nge vothung kerenga omanga, na te theseal tokokoere ole ur elonga. Na te oma tokokoere mo oni silal it ma nir silal pel.

⁴ Aveto God aka ini ler pamimionga, ia sagu rintet it, na i oma vothung sivenga a it nge. Ma nge nang aka ile vothung aken i velpol ol a pen lalanga

⁵ i pamimi it. Na i pamimi it nge ler vothung vengvenga aka sivenger te oma i, kene avele. Aveto nge isivenga ile themosaling inga, mako i pamimi it nge sovengalo aka i pariri it nge. Na i pakeu Ioni Riringa mo i pavelpol mimiong ponganga a it nge, mo te onol mo te velpol ini ile toko ponganga ol re.

⁶ Na i odoroktun it nge Ioni Riringa, aka nge a Jisas Krais aka ini ler pamimionga ile omaing, mo i um engeng a lemire.

⁷ Na God i themosal it venen aken, make te velpol ini toko vengvengare a itheki lale, mo te men tetal ol inga mimiong aka aro ile vusonga avele aka i kin ile riong nge ve aro i sungu i a it nge.

⁸ Na riong alavusnga areke ru tho ri nge kene i nunganga, na i pavurvur aka aro tokokoere aro o nongal senu i na olemin nge.

Na tho sis ve aro wong pesrou nge ur areke pamirealnga avele, mo tokokoe areko olemio nge a God, evelenga aro o betet nge vothung sivenga omanga.

Na pamirealing areken i sivenga rintet, naro i opoal tokokoere.

⁹ Aveto aro wong voth mela nge areko o pun pel e riong ako imonnga avele, ranga ve aka o pun rum pel nge otiteviere oionre, na o wathalal pel nge riong, na o vol pel nge Judare ole patorongre. Naro wong voth mela nge or, eneke ur areko i venen aken, i pavurvur aro i opoal tokokoere avele, na ini ur polpolnga inga.

¹⁰ Na aro ve toko e i oma vothung aka i omreu lotuongare, aro wong tor ile mo i modopu i. Na aro ve i nongal avele, aro wong tor werer mun ile paininga. Na eve i nongal ol avele, aro wong mothongelu ol i,

¹¹ eneke lomum mire ol aka ve, toko aka i venen aken i leklek lale, na i oma vothung kerenga. Na nge ile avsaing aken, isivenga i pavelpol a God ile paomelaling a i nge.

Pol ile riong patopalalnga.

¹² Nge nang aka aro tho pake a Artemas eve Tikikus mo i es a wong nge wot mo i el meum, akennga aro wong um engeng yet mo wong velpol a tho nge aka a Nikopolis, eneke lemik i ngo lale ve aro tho voth nge, i pavurvur nge theu po ile vusong.

¹³ Na Apolos tomo nge a Senas aka ini toko aka ile mire i aolonga nge patorongre, aro ve o monsi lale, aro wong opoal engeng or paini nge ole esong mo o oror nge ur e avele.

¹⁴ Na ler toko lemioongare aro olemi mire mun aka ve, aro o betet nge vothung sivenga omanga aka nge areko o oror rintet nge ur elonga, oopoalnga. Aro vene mo ole mimiong aken imonnga avele.

¹⁵ Ine tokokoe areko o voth tomo nge tho o pasungalu ole nang sivenga a wong nge wot. Naro wong ria mun areko olemio nge a Jisas na oa sagu them ve, them pasungalu lemem nang sivenga a or nge.

Na tho nong ve aro God ile themosaling aro i voth tomo nge thomu alavusnga.

Na i re aken. I vus.

Pol ile malueng ako i wat i a Pilemon nge Pilemon Ritetong nge a Pilemon

Ava Pol i voth a mang a midenga lemi ako a rem pomnga a Rom na i wat malueng ake a Pilemon nge, ini toko Kolosi anga omole. Na ava nge wop lemi aken Pol i wat mun ile malueng a toko lemioongare nge ako o voth a Kolosi. Na Pilemon ile toko um polpolonga omole i voth, aka iion a Onesimus. Ava i kem itokoninga a Pilemon ile ur elonga pelie, ma i lo mela aka la a Rom. Na nge wop lemi aka i voth a Rom, Onesimus i nongpol Panongpolong Sivenga aka Pol i panongpol nge, ma illemio nge a Krais, ma i opaal a Pol nge ile menong a mang a midenga aken. Na Romre ole patorong i ri vene: Aro ve toko um polpolonga i lo itokoninga ia, i sivenga aka aro tokokoere o rere i mo o so rin i. Aveto Pol i pake werer a Onesimus tomo nge malueng ake a Pilemon nge la, na i nong a Pilemon ve aro ilemi simikal a Onesimus ile vothung kerenga, naro i nongpo werero i, eneke i velpol ini itein lemioonga e, eneke i velpol ini a Krais ile. Na ava Pilemon i pavurvur aro i avsa a Pol ile riong avele, eneke i ranga ve aka ia thangaroong aolonga i voth a Pol nge, eneke Pol i panongpol a Pilemon nge a Krais, mako Pilemon i elo a Krais a ilemi. (1:19)

Pilemon ile um polpolonga i lo ia, lama i velpol ini toko lemioonga, mako Pol i pake werer i a Pilemon nge la

¹ Tho a Pol, aka tho voth a mang a midenga lemi, eneke tho panongpol nge a Krais Jisas ile panongpolong, na titeir a Timoti aka i voth tomo nge tho, i opaal tho nge malueng ake watnga.

Na tho wat i a wong a Pilemon nge. Wong ini titeimem sivenga aka ler omaing i thun.

² Na tho wat mun malueng ake a toko lemioongare nge, aka o pathun a lom vel nge lotuong. Tomo mun nge lulur a Apia na titeir a Arkipus aka i um engeng tomo nge them nge a God ile omaing aka ranga ve ini toko aka i voth nge punong.

³ Na tho nong ve aro thomu o vual nge themosaling na lemi moring aka nge a God aka ini Titemer tomo mun nge Toko Pomnga a Jisas Krais.

Pol i risea a Pilemon nge ile asaguong na ile lemioong.

⁴ Na teik, evelelnga tho ri sivengaing a lek God nge, nge wong, nge aka lemik rum wong nge lek nongongre.

⁵ Eneke tho nongpol aka tokokoere o ri nge lom asaguong nge a God ile tokokoere, na o ri mun nge lom lemioong nge a Jisas Krais.

⁶ Na lemik mire aka wong ini toko sun-gonga, na tho nong a God nge ve aro lom vothung aken, aka lom lemioong i pavelpol i, aro i oma wong mo aro lomum mire senu nge ur sivesivenga areko ini lom, aka nge lom teoong a Krais nge.

⁷ Na teik, lom asaguong aken i palemi senu werer lemik, ma lemik i ngo senu ol, eneke om sagu rintet a God ile tokokoere, na nge lom vothung inga aken ong pasisi werer olemi.

Pol i nong a Pilemon ve aro i el werer mun a Onesimus aka ini a Pilemon ile toko um polpolonga.

⁸ Na teik, tho ini a Krais ile pakeke, mako tho ngeip avele, na tho pavurvur aka aro tho pakealal wong nge ur aka i vengveng aka aro wong oma i.

⁹ Aveto aro tho nin inga wong, eneke ar sagu pel. Na tho ini tolok a Pol, na tho voth a mang a midenga lemi, eneke tho panongpol nge a Jisas Krais ile riong, na tho sis ve aro lomum esal tho,

¹⁰ mako tho nin wong ve aro wong oma vothung sivenga nge a Onesimus aka i velpol ini tuk nge aka i nongpola panongpolong aka tho panongpol nge a mang a midenga lemi, ma i elo ol a Jisas Krais a ilemi.

¹¹ Na nomenga ile umong i sivenga nge opaalngom avele. Aveto ponange ile

omaing i sivenga ol nge it alaini opoalnger.*

¹² Na ponange tho pake werer ol i a ong nge wot, na lemk i es rintet nge i.

¹³ Na tho sis rintet ve aro tho krim wereru i, mo aro i el meum nge opoalngek, eneke tho voth a mang a midenga nge Panongpolong Sivenga panongpolnga.

¹⁴ Aveto nik plong ve aro tho ovulal wong nge opoalngek. Aveto tho sis ve aro wong oma opoaling a tho nge ako i panes inga lom lowoming. Na aken aro tho oma ur e avele i pavurvur aka aro som wompot ol i a tho nge.

¹⁵ I nunganga aka Onesimus i lo lelpot om palolo avele. Na ava i lo lelpot om venen aken mo aro i velpol ini lom toko werer ol.

¹⁶ Na ponange mothong tova lomum ol ve ini inga lom toko um polpolonga. I nunganga aka ini lom toko um polpolonga, aveto i sivenga nge toko um polpolonga, eneke i velpol ini teum sivenga mun aka nge thomu paini lomu teoong a Krais nge. Na ok sagu i, aveto aro om sagu rintet i ranga ve ini lom toko um polpolonga, na ranga ve ini mun i teum aka nge lomu teoong a Krais nge.

¹⁷ Na aro ve wong ate tho ve ini teum sivenga aka ler omaing i thun, tho nin ong ve aro wong nongpo werero a Onesimus ranga ve aka wong nongpoo tho nge.

¹⁸ Na aro ve i oma vothung kerenga e a wong nge, eve ia thangaroong i voth a ong nge, i sivenga aka aro ong eksing iion ma ong watu iok nge, ve aro tho pavengveng i a wong nge.

¹⁹ Naro tho wat ol riong ake nge sivengek menik, tho a Pol, aro tho olal ia thangaroong a ong nge.

Aveto aro tho ri ur e avele nge om thangaroong a tho nge, na om thangaroong aken ini sivengom lom mimiong, eneke ong eksing lom mimiong nge panongpolong aka tho panongpol nge.

²⁰ I nunganga teik, tho sis ve aro wong oma vothung sivenga aken a tho nge, eneke it aini te voth ini a Toko Pomnga ile toko. Naro ong palemi senu werer lemk

nge lom vothung aken, eneke te teo a Krais nge.

²¹ Na nge aka tho wat malueng ake a wong nge, lemk mire aka aro wong panes senu lek ninong aken, na e mun e aka lemk mire mun aka aro lom omaing aro i aolo leltun ur ake ru tho nin ong nge.

²² Na lek riong mun e i vene: Aro wong monsi meik e a lom vel, eneke lemk mire aka ve, God aro i olal lomu nongong mo tho vthopot nge kinong ake, naro tho lo werer a thomu nge wot.

Pol ile riong patopalalnga.

²³ Na Epapras i voth tomo nge tho a mang a midenga ake, eneke i mun kene i panongpol nge a Krais Jisas ile panongpolong, na i pasungalu ile nang sivenga a wong nge.

²⁴ Na thengengek areko them um tomo nge pel aka ini a Mak, Aristarkus, Demas na Luk, or mun kene o pasungalu mun ole nang sivenga a wong nge.

²⁵ Na tho nong ve aro Toko Pomnga a Jisas Krais ile themosaling aro i voth tomo nge thomu.

Na i re aken. I vus.

* ^{1:11:} Onesimus iion i mirenga ve ini toko opoalinga.

Malueng ako i es a Hibrure nge la Hibru Ritetong nge a Hibru

Lemir mire nge toko kathnga aka i wat malueng ake avele. Toko pelie olemi ve ini a Pol, na pelie olemi ve ini a Barnabas eve Apolos, na pelie olemi ve ini toko relnga e. Aveto i nine aka malueng ake i es a Judare nge, aka o apet mun or ve ini Hibrure, aka olemio nge a Krais. Toko pelie aka or ini toko lemioongare avele, o sung matheong a toko lemioonga Hibrure nge, aken i toth aka oa pelie aro o panes werer a Moses ile patorong tomo nge Judare ole lotuong a vothung. Na malueng ake i tor engeng ole ve aro o mothong tova o lel okime nge a Krais venen aken, aro vene mo God aro i paomelal or, ranga ve aka i paomelal otitevie Israelre nomenga. Na malueng ake i ritet aka ve, Krais ienga inga i pavurvur aka aro i pamimi tokokoere, eneke ini a God Itun, aken i pathengal it aka ve, Krais i mukal, koto i aolonga nge a God ile riong elnga nomengangare, na enselre, na Moses mun. (1:1-3:6) Na Krais i mukalpo tokokoere a God nge la, aka nge ile rinong, na ile vothung aken i sivenga rintet nge pris Judare ole vothung aka o wola tokokoere a God nge. Eneke Krais i pavelpol a God ile riong kinnga ponganga aka i el a God ile riong kinnga neginga imei. (8:6-13) God ile riong kinnga neginga aken i ri inga nge mekeremre oongtunnga aka ini ole sungong a God nge. Na sungong aka i venen aken i pavurvur aka aro i eltetpot tokokoere ole vothung kerenga avele. Aveto Krais ile rinong i pavurvur, na Krais ini pris pomnga aka i mukalpo tokokoere a God nge, aka aro i voth evelelga aka aro ile vusonga avele. (7:1-10:18) Na i venen aken, maken aro it toko lemioongare aro te es totho a God nge tomo nge ngeipong avele, aka nge ler teoong a Krais nge. (10:19-22) Naro te mit engeng nge ler lemioong (10:22-39) ranga ve aka toko lemioonga nomengangare o oma i. (11:1-40) Ako a malueng ake lemi,

torong motunga or lim o voth aka o ri engeng nge it ve, te mothong tova te lel kimer nge a Krais. (2:1-4; 3:7-4:13; 5:11-6:20; 10:26-31; 12:18-29) Eneke Krais ienga inga i pavurvur aka aro i pamimi it, na aken ini riong aolonga aka i voth a malueng ake lemi.

Jisas i aolonga rintet nge enselre, eneke ini a God Itun

(Vonge 1:1-2:18)

God i pasungal ile riong a Itun a Jisas nge mo i sungu i a it nge.

¹ Nomenga nomenga aka God i pasungal ile riong a ile riong elngare nge, mo o ripot i papulua na nge sovengalo rel relnga a titevirre nge,

² ave ponange ol ake nge nang patopalalnga areke te voth nge, i sung ile riong a it nge, aka nge isivenga Itun, aka i ateal i ve aro i el ur alavusnga mo ini ile. Na a Itun aken imeni, God i pamenu ulue, sepsa, sivemitre na ur alavusnga aka o voth.

³ Na Itun aken i patheng patpot ol a God ia malmaling Pen a Urvet anga aka i tolilis. Na ome a God kene o thun inga. Na nge Itun aken ile riong engenga inga, i paengeng ulue, sepsa, sivemitre na ur alavusnga aka o voth, mo o kis inga ole omaing aka i ria i a or nge lale. Na i patopalal ile omaing aka i thep so mo i pavurvur aka aro God ilemi simikal tokokoere ole vothung kerenga, lamo i esa ol a Pen a Urvet la, mo i men ol a God aka aolonga rintet a ilo sei a imeni sivenga nge anga, ini wop aka o papompom i nge.

God Itun a Jisas i mukal nge ensel alavusnga.

⁴ Na i venen re aken, mako i pathengal it aka ve, God Itun aken i mukal rintet nge enselre, ranga ve nge ioning aka God i apet a Jisas nge ve ini Itun, i mukal rintet nge ioning aka i apet ile enselre nge, aka i apet inga or ve, ini ile pakekere.

⁵ Na i venen aken, eneke God i ri nge a Jisas ve,

“Ong ini Tuk,

na tho velpol ol ini Tomom.” *Buk Song 2:7*

Ave i ri venen aken nge ensel e avele. Na God ile erere i ritet mun tokokoere ve,
“Aro tho velpol ini Itema,
naro i velpol ini Tuk.” *2 Samuel 7:14*

⁶ Na God i pathengal mun ako ve, Jisas i mukal nge enselre, eneke nge ako i pango patu ia tengen ake ru a ulue, i sung ile riong mun e ako a enselre nge ve,
“I sivenga ako aro God ile ensel alavusngare
aro o lotual i.” *Lo 32:43*

⁷ Na lemir mire ako ve, God ile enselre ole umong i eksingu eksinga, eneke God isa wom toko e ako aro i wat riong ake a God ile erere nge ve,
“God i oma ile enselre

mo o velpol ranga ve ini thue,
ma i oma ile umonga areken
mo o velpol ranga ve ini won
sesenga ile anlideeling.” *Buk Song 104:4*

⁸ Aveto God i ria Itun ve,
“Evelelga ong voth ranga ve ini tho a God,
na lom menong e nepes aro i voth evelelga
ako aro ile vusonga avele,
na lom avrumong nge tokokoere ole
vothung i vengveng inga.

⁹ Na om sagu vothung vengvenga
na num silal vothung kerenga.
Make tho a God,
ako ini lom God,
tho taul poungom aka i ateal ong
mo ong mukal nge or alavusnga
ako o voth tomo nge wong.
Na aken i oma ong
mo lomum i sivenga rintet.” *Buk Song 45:6-7*

¹⁰ Na God i ria mun Itun ve,
“Toko Pomnga,
nomenga nge ur alavusnga opateanga,
ong pamenu tel ulue,
na ong oma mun sepsa nge menum
tomo nge ur alavusnga aka o voth
nge.

¹¹ Naro o penthal,
aveto wong, aro ong voth reletun ol
ako aro lom vusonga avele.
Sepsa na ur alavusnga aka o voth nge
aro o negiu ranga ve ini teunong.

¹² Mo ong pinmola i

ranga ve ini seltun neginga,
naro ong rorol i nge ponganga
ranga ve ini toko aka i rorol ile
teunong neginga.

Aveto wong, ong voth inga venen
aken,
na ong eksingu eksinga avele,
naro om tovu po mun aro ile
vusonga avele.” *Buk Song 102:25-27*

¹³ Na God i ria mun Itun ve,
“Aro ong meno a lok seik me
a menik sivenga nge anga,
i pavurvur aka aro tho paesu lom
ngarangre a som thewo.” *Buk Song 110:1*

Aveto i ri venen aken nge ensel e avele.

¹⁴ Na Jisas aka ini a God Itun i mukal
venen aken, na i vava nge enselre, e?
Ensel alavusnga or ini inga oniong aka ini
a God ile aka i pakeu pakea inga or nge
ile omaing, mo aro o opoal areko aro o el
mimiong aka aro ile vusonga avele a God
nge.

2

*Te mothong tova te lel kimer nge a God
Itun ile omaing aka i pamimi it.*

¹ Na Jisas i mukal nge enselre venen
aken, mako aro te ta senu telnger nge
riong aka nge a God Itun aken, aro vene
mo ar perus nge.

² Naro i velpol venen aken, eneke God ile
riong aka ile enselre o ri esu i a Moses nge,
ini a God ile riong nunganga, na tokokoe
alavusnga areko o nong sirik na o avsa
riong aken, o el paomelaling i pavurvur
nge ole omaing aken.

³ Na aro ve God i oma venen aken nge
ile riong teltelng ako ile enselre o ri esu i,
aro i oma vava nge it, tova ve te nong sirik
nge ile riong sivenga aka aro te el mimiong
sivenga nge, aka isivenga Itun i ri esu i a it
nge, e? Na aro ve te nong sirik nge ile riong
aken, aro te men kine nge ile paomelaling
vava, e? Na riong sivenga aken kene Toko
Pomnga a Jisas i ritet tel nge a mukaling,
lamo areko o nongpol i a i nge, kene o ri
esu mun i a it nge, na o pathengal it aka
ve, ile riong aken i nunganga.

⁴ Na God mun i pathengal it mun ako ve, Itun ile riong aken i nunganga selele nge ako i oma pathepolong na pakukukaling pulua, na nge ako i sung Ioni Riringa ile sungong a tokokoere nge, ranga ve ako i sis ve aro i oma i.

Jisas i mukal nge enselre, eneke ini tokokoere ole pamimionga.

⁵ Na ler menong panen anga aka tho ri nge ponange, kene God aro i pathealu enselre nge avele.

⁶ Aveto aka a God ile erere epee omole, toko e aka i ritet ve,
“God, them tokokoere them ini ur le vanga
ako lomum i voth nge them, e?
Na them e tutumemre them ini ur
polpolnga,
na i vava aka ong theal senu them, e?

⁷ Na wong oma them
naro them voth lelle inga atike a enselre osa thewo,
ave ong papomnga them
na ong paroro them

⁸ na ong ateal them
mo ur alavusnga aka ong pamenu or,
aro o voth a semem thewo.” *Buk Song 8:4-6*

Na God ile riong aken i ri ve, ur alavusnga aro o voth a ser thewo, na aken i mirenga ve, God isa womo ol ur e aka aro i voth gat a ser thewo, kene avele. Aveto ponange te thepol aka i velpol venen aken a it nge rongan.

⁹ Aveto lemir mire nge toko omole aka i velpol venen aken a i nge lale, ini a Jisas aka God i paruru i a enselre nge, nge tovu po pom avele, mo aro i rin nge it alavusnga opoalnger, na aken God ile themosaling i pavelpol i. Na God i paruru i venen aken, aveto palolo avele, nako i papomnga i na i paroro i, eneke i rov sisong aolonga nge rinong lale.

¹⁰ Na i vengveng aka God i oma venen aken nge a Jisas, eneke God ini ur alavusnga tepun, na i pamenu ur alavusnga aken mo ini ile, na i sis ve aro i wola itutun puluangare a Pen a Urvet la, na i sis mun ve aro Jisas i rov sisong aken, mo i velpol ini toko mukalpoinga nge ur alavusnga, aken kene i thep sovengalo mo i mukalpoa ole a Pen a Urvet la.

¹¹ Aken i nunganga, Jisas tomo nge areko i oma or mo o riri a God itheki, kene oa Vovo inga omole. Mako Jisas ile maral avele aka aro i apet or ve ini ititeinre.

¹² Eneke i ria God ve,
“Aro tho ritet titeikre nge wong.

Na nge aka them pathun nge lotuong,
aro tho vo riseangom a voingre a
or nge.” *Buk Song 22:22*

¹³ Na i ria mun ve,
“Tho kene aro lemiko nge a God.” *Aisaia 8:17*

Na i ria mun ve,
“Thepol!
Ake ini wainlanga areko God i sungu
i a tho nge,
na them voth.” *Aisaia 8:18*

Jisas i velpol ini toko neneanga mo aro i opoal it.

¹⁴ Na wainlanga areken aka God i sungu i a Jisas nge, or ini toko neneangare, mako Jisas i velpol mun ini toko neneanga ranga ve ini or, mo aro i rin mo i pakerenga rinong ile engenging a Satan imeni,

¹⁵ mo i pavthopot areko nomenga o ngeip evelelnga nge rinong na o voth a rinong a kinong lemi.

¹⁶ Na aken i pathengal it aka ve, ini enselre aka Jisas i opoal or, kene avele. Aveto ini inga a Abraham ititeviere aka i opoal or.

¹⁷ Na Jisas i sis ve aro i opoal or venen aken, na i sis ve aro i velpol ini ole mukalpoinga a God nge la, aka i pavurvur nge othemosalnga, na i pavurvur mun aka aro i oma senu a God ile omaing, ranga ve ini prisre oa pomnga. Na i sis mun ve aro i sung sungong a God nge, aka aro i patitepot tokokoere ole vothung kerenga. Na ilemi venen aken, mako sovengalo omole inga i voth aka aro i panes i, kene i vene: I velpol ini toko neneanga, ma i aterungalpot ranga ve ini it ititeinre.

¹⁸ Na nge aken i pavurvur aka aro i opoal it nge aka tongporumong i velpoltun it, eneke isivenga mun i el sisong nge aka tongporumong i velpoltun i.

**Krais iion le kimaing i
mukal rintet nge a Moses
iion le kimaing**

3

(Vonge 3:1–4:13)

Jisas i mukal mun nge a Moses.

¹ Na titeikre, riong alavusnga ako tho ri nge lale kene i nunganga, ako thomu o riri a God itheki lale, na i lenga mun thomu ve, aro o el mun ur sivesivengare a Pen a Urvet. Maken aro lomumu rum ol inga nge a Jisas ini ao. I kene ini a God ile pakeke ako i pakeu i me ve aro i sung esu ile riong a it nge. Na i ranga ve ini mun i Pris Pomnga aka i wola tokokoere a God nge la.* Na lemimemo ol nge ile riong aken na them panongpol ol i a tokokoere nge.

² Na God i ategal i nge ile omaing aken, ma i panes selele i ranga ve aka God i ria i nge, ranga ve mun aka nge a Moses aka i panes selele omaing aka God i sungu i a i nge, nge ile wainlangaere othealnga.

³ Na ranga ve aka toko aka i pavelpol wainlangaere kene iion i kima ol nge ile wainlanga areken, Jisas iion mun i kima ol nge a Moses iion, eneke Jisas i pavelpol a God ile wainlangaere, ave Moses ini othealnga inga.

⁴ Na i nunganga aka toko omole omole o pavelpol ole wainlangaere, ave ini a God aka ini ur alavusnga tepun pavelpolnga.

⁵ Na i nunganga aka Moses i panes selele omaing alavusnga aka God i sungu i a i nge, nge ile wainlangaere othealnga, aveto ini inga a God ile umonga. Na ile omaing aken i ritet nge ur aka God aro i oma i a ikime ol me.

⁶ Aveto Krais i mukal nge a Moses, eneke i mun kene i panes selele omaing alavusnga aka God i sungu i a i nge, nge ile wainlangaere othealnga, aveto ini a God ile umonga avele, ini a God Itun aka i theal or. Na it kene it ini a God ile wainlangaere, tova te mit engeng nge ler lemioong na te men sial nge ur sivesivenga areko God aro i sungu i a it nge panen, ini ur aka ler maral nge ripotnga avele.

Aro te lel kimer nge a God ranga ve aka Israelre o oma i nomenga, kene avele, aro vene mo te el a God ile thauong aken mun avele.

* ^{3:1:} O thepol a Hibru 5:1.

⁷ Na thomu ini a God ile wainlangaere venen aken, maken aro thomu o nongal riong aka Oni Riringa i ri nge ve,

“Na ponange aro ve thomu o nongpol a God ikei,

⁸ na o mothong tova o krim tuntun opomu, ranga ve aka titovumuere o oma i nomenga

nge aka o lel okime nge a God, na o tongporum i nge ole vothung nge ole esong a pen polpolnga.

⁹ Na titovumuere o thepol lek omaing aolongaere a pen aken,

i pavurvur nge tovu po or mule pa penel, aveto o tongporum inga tho nge ole vothung kerenga.

¹⁰ Na aken ini tepun aka i oma tho ma lemik kling nge or, mako tho ri vene,

‘Evelelnga olemi es mela e tho, na o panes ol vothung aka tho sis ve aro o oma i, kene avele.’

¹¹ Na lemik kling venen aken nge or, mako tho kin lek riong ve, ‘I pavurvur aka aro o eso ol a lek thauong lemi avele ol.’ ” *Buk Song 95:7-11*

¹² Na titeikre, aro o panes ole vothung aken avele, aro thomu o naktet thomu mo omu e i mothong tova ilemi kerenga, mo i pakerenga ile lemioong, mako i lel ikime nge a God aka i mimi evelelnga, naro i paomelal tokokoere nge ole vothung kerenga.

¹³ Aveto aro thomu o paengeng pel sivengomu nge nang elonga, i pavurvur nge nang alavusnga aka God i sungu i a thomu nge, aka tokokoere o apet i ve ini “Ponange.” Aro thomu o oma venen aken mo aro vothung kerenga i mothong tova i paleklek omu e ilemi, mo i lel ikime nge a God.

¹⁴ Naro thomu o oma venen aken, eneke aro ve ler lemioong i engeng ranga ve nge nang aka te elo a Krais a lemir, na i mul nge ler rinong, aken aro te supo tomo nge a Krais ile ur sivesivengare elnga aka nge ler teoong a i nge.

¹⁵ Na i ranga ve ako God ile erere i ri nge ve,
 “Na ponange aro ve thomu o nongpol a God ikei,
 na o mothong tova o krim tuntun opomu,
 ranga ve ako titovumuere o oma i nomenga
 nge ako o lel okime nge a God.”
Buk Song 95:7-8

¹⁶ Na ini anga areko o nongpol nunganga a God ikei, aveto o lel okime a i nge, e? Ini titovumuere aka Moses i woltetpot or a Isip me.

¹⁷ Na God ilemi klingtun angare nge tovu po or mule pa penel aken, e? Ini mun re aka ini titovumuere aka o oma vothung kerenga aken, mako o rin a pen polpolnga.

¹⁸ Na God i kin ile riong ve,
 “I pavurvur aka aro o eso a lek thauong lemi avele ol.”

Na i kin ile riong aken tomo nge angare, e? Ini areko o avsa ile riong.

¹⁹ Na i venen aken, mako lemire akei ve, o pavurvur aka aro o eso a ile thauong lemi avele, eneke ole lemioong i voth pis nge a God avele.

4

God ile tokokoere o pavurvur aka aro o voth ol a God ile thauong lemi.

¹ Na God i kin ile riong tomo nge titovumuere ve, o pavurvur aka aro o eso a ile thauong lemi, aveto o eso nge avele, na ile riong kinnga aken, rongan ponange i voth mun a it nge. Maken aro te ngeip na te naktet it, aro vene mo i velpol mun venen aken a omu e nge mo i penthal.

² Na tho ri venen aken, eneke te nongpol Panongpolong Sivenga ranga ve aka o nongpol mun i, aveto panongpolong aka o nongpol i, kene i opoal or avele, eneke o nongpol inga, na olemio nge avele.

³ Aveto ini inga it areko lemiro nge a God ile riong, aka aro te eso a ile thauong lemi. Na ile thauong lemi aken i voth nomenga vet aka me, aveto areko olemio nge a God ile riong avele, o eso nge avele. Ranga ve aka God ile erere i ri nge ve,

“Na lemik kling nge or,
 mako tho kin lek riong ve,

‘I pavurvur aka aro o eso ol a lek thauong lemi avele ol.’” *Buk Song 95:11*

Na lemire akei ve, God ile thauong lemi i voth lale nomenga, eneke God i pavus ile omaing elonga, nge aka i pamenu ur alavusnga nomenga.

⁴ Na aken i nunganga, eneke riong epee i voth a God ile erere nge, aka i ri nge nang limainga ve,

“Na nge nang limainga,
 God ile omaing alavusnga i vus,
 mako i thou ol i.” *Stat 2:2*

⁵ Aveto riong aka te thopol tel nge, kene i ri ve,

“I pavurvur aka aro o eso ol a lek thauong lemi avele ol.” *Buk Song 95:11*

⁶ Aken i pathengal it akei ve, rongan i pavurvur aka toko pelie aro o voth ol a God ile thauong lemi aken. Aveto areko o nongpol Panongpolong Sivenga nomenga o eso nge avele, eneke o avsa a God ile riong aken.

⁷ Na tovu po pulua o lutetu lale, mako God i ateal nang vet e aka aro ile tokokoere o voth ol a ile thauong lemi aken, na i apet nang aken ini “Ponange” nge voing aka i pavelpol i a Nepes a Devit nge, aka tho wat tel i a thomu nge lale na i ri vene:

“Na ponange aro ve thomu o nongpol a God ikei,
 na o mothong tova o krim tuntun opomu.” *Buk Song 95:7-8*

⁸ Na Josua i wola titovumuere a epee a Kenan, aveto o voth a God ile thauong lemi avele. Aro ve o voth nge, God aro i ri mun nge thauong nge nang relnga ol e avele a rumongaling, aveto Devit i ri nge lale.

⁹ Aken i pathengal it akei ve, rongan i pavurvur aka aro God ile tokokoere aro o voth ol a ile thauong lemi. Na thauong aken i ranga ve ini nang limainga a thauong aka God i thou i nge nomenga.

¹⁰ Eneke toko kathnga aka i voth ol a God ile thauong lemi, i thou i nge isivenga ile omaing ranga ve aka God i thou i nge ile omaing nomenga.

¹¹ Maken aro te betet rintet nge thauong aken esonga, moro ken e avele aro i panes titovumuere ole vothung

avsanga, maken aro i matu nge esoong aken avele.

¹² Naro te betet venen aken, eneke God ile riong ini mimiong tepun, na i um engeng a tokokoere olemi. Na i ranga ve ini bainat. Na bainat kene i wowo rintet epee epee, na i pavurvur aro i pun toko mo i tho seleleo a ilemi, na i pavurvur mun ako aro i sosa ipokin mo ile ngus i ngo pat, na i pavurvur mun ako aro i sorotetpot ieve pomusire. Aveto God ile riong i wowo rintet nge bainat ako i venen aken, na i pun toko iopo, na i tho seleleo a ilemi mo ile vothung ako i pango kine i, i ngo patu ol, na ile lemi rumong inkinenga mun aro i ngo pat mun. Na God ile riong i avrum senu lemi rumong le vanga aka i vengveng, na i avrum senu mun ur aka i mita a toko ilemi me.

¹³ Na ur e avele aka God i pamenu i, i pavurvur aka aro i ngo kineo a itheki. Na ur alavusnga i ngo pat inga a itheki. Na ini a God aka aro te mit nge riong a itheki, naro i avrum it nge ler vothung alavusnga.

Jisas i voth a Pen a Urvet ranga ve ini Pris Pomnga ako i pavelpol a God ile riong kinnga ponganga

(Vonge 4:14-10:39)

*Jisas ini ler mukalpoinga a God nge la
na ini Pris Pomnga aka i mukal nge Prisre
oa Pomnga.*

¹⁴ Aro tho ri werer tel mun nge riong aton tho ri tel i a thomu nge lale.* Ako nge ler mukalpoinga a God nge la kene i voth, na ini ler Pris Pomnga aka i pomnga nge Prisre oa Pomnga, na i eso a Pen a Urvet, ma i aka i voth ol nge, ini a Jisas aka ini a God Itun. Na ini ler mukalpoinga venen aken, maken aro te krim bibim ler lemioong aka te ripot i a tokokoere otheki lale.

¹⁵ Eneke ler mukalpoinga aken i pavurvur aka aro ilemi esal it nge wop areko te matu nge, eneke i mun kene tongporumong alavusnga areko o velpoltun it, o velpol mun a i nge, aveto i matu nge e avele.

* **4:14:** O thepol a 2:17.

¹⁶ Na aken i nunganga, maken aro nir peti perper nge aka te es totho a God nge, aka ini a God themosalina. Naro te es totho a i nge mo aro te el ile lemi esaling, na ile themosalina aka aro i opaal it nge nang kathnga aka aro te el matheong nge.

5

*Ler mukalpoinga a Jisas aro i pamimi it
nge ler vothung kerenga.*

¹ Na Prisre oa Pomnga ile omaing vene: God aro i ateal or omole omole a tokokoere oa wop, na God i ateal omole mo i es a i nge me, mo aro i opaal tokokoere, naro i sung ole sungong a God nge, naro i ongtuna mekeremre aka i pavurvur nge ole vothung kerenga seltunnga.

² Na i pavurvur aro i ri mosnga nge areko ole mire i oror, nge ur kathnga aka i sivenga na ur kathnga aka i kerenga, tomo mun nge areko o leklek nge a God ipanesnga. Na i pavurvur aro i ri mosnga nge or, eneke i semel nge i mun aka aro i matu mun nge vothung kerenga pelie.

³ Na aken ini tepun aka i ongtun tel mekerem nge isivenga ile vothung kerenga seltunnga, lama i ongtun mun mekerem nge tokokoere ole vothung kerenga seltunnga mun.

⁴ Na toko e avele aro i papompom isivenga mo i velpol ini Prisre oa Pomnga. Avele! Ini inga a God ienga inga aka aro i ateal i nge omaing aken, rangga ve aka nomenga i ateal a Aron nge omaing aken.

⁵ Na i venen aken mun nge a Krais, i papompom isivenga mo i velpol ini Pris Pomnga, kene avele. Aveto God ienga inga i ateal i nge pris a omaing, nge aka i ria i ve, “Wong ini tuk.

Na ponange tho ri pat aka ve,
“Tho ini om Vovo.” *Buk Song 2:7*

⁶ Na God ile erere epee mun i ri vene: “Wong ini pris aka lom vusonga avele, rangga ve ini mun i a Melkisedek.” *Buk Song 110:4*

⁷ Na nge wop lemi aka Jisas i mimi ake ru a ulue, i nong engeng nge a God aka i pavurvur aro i eltetpot i nge rinong lemi aka i voth nge. Ma i presa viringa ma i

tang a i nge, mo aro i opoal i, mo i voth a isa thewo na i panes inga a God ilemi, mako God i nongpol ile nongong aken ma i opoal i.

⁸ Na i nunganga ako Jisas ini a God Itun, aveto i el sisisong aken, ma sisisong aken i pamireal i nge ur kathnga aka i el sisisong nge a God ipanesnga.

⁹ Na nge aken i pasum ile pamirealing a God itheki, mako i velpol ini tokokoere ole pamimionga aka aro o el mimiong aka aro ile vusonga avele a i nge, tova ve o nongal ile riong.

¹⁰ Eneke God i ateal i mo i velpol ini Pris Pomnga ranga ve ini mun i a Melkisedek.

Ler mire i mothong tova i voth ranga ve ini povothevole mire.

¹¹ Lek riong pulua rongan i voth, aka tho sis ve aro tho ripot i a thomu nge, nge riong aka ranga ve, Jisas ini Pris Pomnga ranga ve ini mun i a Melkisedek,* aveto i engeng nge tho ve aro tho ekrispot i a thomu nge, eneke riong aka thomu o nongpol i, o el viri mirenga avele.

¹² Na i nunganga aka thomu ini toko lemioonga nge tovu po pulua lale, na i pavurvur lale nge aka aro o pamireal tokokoere nge a God ile riong, aveto avele. Lomu lemi rumong i oror, na i pavurvur aka aro toko e aro i pamireal werer mun thomu nge a God ile riong semelnga, aka toko lemioonga ponganga i pavurvur nge elnga. Na thomu o pavurvur nge riong motunga elnga avele. Thomu o ranga ve ini areko rongan o susu inga, eneke thomu o betet inga nge a God ile pamirealing semelnga elnga!

¹³ Na lemir mire aka ve, areko o susu inga, kene ini povothevole, eneke oleli voth inga nge susu, na oleli oror nge vothung vengvenga aka God i sis ve aro o oma i.

¹⁴ Aveto tokokoe areko ole lemioonga i motu, o pavurvur nge a God ile riong motunga elnga ranga ve ini aning engenga annga. Na tokokoe areko ole lemioonga i motu o velpol venen aken, eneke nang pulua o pawetal or nge ur kathnga aka i

sivenga, na ur kathnga aka i kerenga aka a God itheki.

6

Aro ler lemioong i motu mo te mit engeng.

¹⁻² Maken aro te mothonglelu pamirealing semelnga nge a Krais, aka toko lemioonga ponganga i pavurvur nge elnga, ranga ve ini aka, toko aro i lel ikime nge vothung kerenga areko God aro i paomelal i nge, na toko e aro ilemio nge a God, na toko aro i el pamirealing nge paninuong kene i vava, na Judare ole nnuong pelekngare i vava, na riong nge toko meni ronganga, na riong nge toko rinrinongare ole los wereraing, na riong nge toko kerengare ole mitong nge riong na ole paomelaling aka aro ile vusonga avele. Pamirealing elonga areken ini pamirealing semelnga nge a Krais, naro te mothonglelu i a toko lemioonga pongangare nge. Aveto it, aro te el pamirealing motunga aka i pavurvur nge tokokoe areko ole lemioong i motu. Aro vene mo, te velpol ranga ve ini toko aka i mostun inga vel a wovek pamitanga, aveto i ari vel nge avele.

³ Na aro ve God isa wom i a it nge ve aro te oma venen aken, aro te oma i.

⁴⁻⁶ Na toko na seng pelie nomenga oleli mire senu tel nge a Krais ile omaing a or nge, na o el tel opoaling a i nge aka i esu a Pen a Urvet me, na o elo tel Oni Riringa a ole mimiong, na o tongporum tel a God ile riong ma oleli mire aka i sivenga, na o rov tel a God ile engenging a or nge, ranga ve aka aro i velpol panen, aveto o lel werer selele ol okime nge a God. Na areko o venen aken i pavurvur aka aro pamirealing semelnga aken nge a Krais, aro i wol werer or mo o lel werer okime nge ole vothung kerenga, kene avele, eneke i ranga ve aka aro o pamon werera mun a God Itun a won ngoronga nge, mako tokokoere aro o ri silil werer mun nge i. Na i venen aken, mako aro te mothonglelu pamirealing semelnga pamirealnga, naro te eso ol nge pamirealing motunga pamirealnga.

* ^{5:11:} O thepol a vonge 7.

⁷ Eneke tokokoere o ranga ve ini ulue, pelie i sivenga na pelie i kerenga. Na ulue ako vit i molu mola nge, ma ilemi pis, aro i pavelpol aning sivenga ako aro i opoal toko ako i les pen nge wop aken. Aken i pathengal it ako ve, God i oma senu nge ulue aken.

⁸ Aveto ulue ako i pavelpol tuokre na kikire i opoal toko e avele, ini ulue kerenga na i toth ako aro God i paomelal i, na panen aro i ongtun selele i.

⁹ Na areko ok sagu thomu, tho pator lomu venen aken, aveto lemik mire ako ve, thomu o lel kimomu nge a God venen aken avele, eneke tho thepol lomu omaing sivenga ako o opoal tokokoere nge. Ini omaing ako areko God i pamimi or kene o oma i.

¹⁰ God kene i vengveng, naro ilemi simikal lomu vothung sivenga ako thomu o oma i, kene avele. Ranga ve aka omu sagu a God, mako o pesrou avele nge ile tokokoere oopoalnga.

¹¹ Na tho sis ve aro thomu omole omole aro o betet inga nge lomu omaing, na lomu lemioong venen aken, i pavurvur nge lomu rinong, aken aro lomumu mire senu aka aro o el ur sivesivengare aka o men sial nge.

¹² Na nik plong ve aro thekumu namal nge ur aken omanga, aveto aro thomu o velpol ranga ve ini areko ole lemioong na ole punapoing i oma or mo o el ol ur sivesivengare aka God i kin ile riong nge nomenga.

Te pavurvur aro lemiro nge ur aka God i kin ile riong nge nomenga.

¹³ Na nomenga nge aka God i kin ile riong tomo nge a Abraham, i panunganga ile riong aken nge isivenga iion apetnga, eneke e avele iion i aolonga ol nge i aka aro i panunganga ile riong nge.

¹⁴ Na i ria Abraham vene:
“I nunganga, sivengek aro tho oma senu nge wong,
naro tho pavelpol titovumre
mo o pom rintet.” *Stat 22:17*

¹⁵ Na Abraham i punapo inga, makola i velpol a i nge ranga ve aka God i kin ile riong nge.

¹⁶ Na aro ve toko e i sis ve aro i panunganga ile riong, aro i apet toko e aka i aolonga nge i kene iion mo i panunganga ile riong nge. Na aro ve i oma venen aken, toko aken aro i teltuno i nge ile riong aken. Na aken o pavurvur aro o ri pompom ol nge ile riong aken avele ol.

¹⁷ Na nomenga God i oma venen aken nge aka i kin ile riong tomo nge a Abraham ve aro i oma senu nge it ini ititeviere. Na i panunganga ile riong venen aken, eneke i sis ve aro i panine rintet lemir, mo lemir mire senu aka ve, i pavurvur aro i eksing ilemi nge ur aka i kin ile riong nge lale, kene avele.

¹⁸ Make God i kin ile riong tomo nge it, na e mun e, i panunganga ile riong aken, na riong or aini aken o pavurvur aro o eksing avele, eneke i pavurvur aka aro God ile apaltet avele. Na i oma venen aken mo aka aro, it areko te korlelo a God isa thewo la, kene aro i paengeng rintet it nge ler men sialing nge ur sivesivengare aka i kin ile riong nge lale.

¹⁹⁻²⁰ Na ler men sialing aken i paengeng ler lemioong ranga ve ini imot krim tun-tunnga aka i mathe, kene i krim bibim imot mo aro i monpot avele. Na imot krim tun-tunnga aken i esu ruru a rua lemi ranga ve aka Jisas i eso tel a God ile vothinga, ini Pen aka i Riri Rintet aka a God ile lotuonga a vel Pen a Urvet anga lemi, aka a lavlav kime aka i mon rupal pen aken. Na Jisas i mukalpoo it nge pen aken mo i opoal it. Na i velpol ranga ve ini Pris Pomnga aka aro ile vusonga avele, ranga ve ini mun i a Melkisedek.

7

Melkisedek ini pris aka i mukalpo tokokoere a God nge la na i mukal nge pris alavusnga.

¹ Na Melkisedek ake tho ri nge, ini rem a Salem angare ole nepes, na ini mun i pris aka i mukalpo tokokoere a God nge la aka i aolonga rintet. Na nomenga Abraham ome ile tokokoere o pun tomo nge nepes or penel tomo nge ole tokokoere, na ole mong or lale, ma o lo werer a ole pen,

mako Melkisedek i sangpolo or a sovengalo, ma i nong a God nge ve aro i oma senu nge a Abraham.

² Na Abraham i ate i ve ini toko pomnga e, mako i omreu ur elonga alavusnga ako i el i a nepes areken nge, ma i omreu i nge epee or mule pa omole, ma i sung epee omole a Melkisedek nge. Na te eksing ioning ake ini a Melkisedek i mirenga ve, “Nepes Ako Ile Vothung I Vengveng Rintet.” Na e mun e, ini “Salem angare ole nepes”, aken i mirenga ve, “Nepes Ako I Pavelpol Lemi Moring.”

³ Na God ile erere i ritet nge inina ome itema avele, na i ritet nge ititeviere mun avele, na i ritet nge imanenga na ile rinong mun avele. Na i venen aken, mako i velpol ini patongrumong ako i ranga ve ini a God Itun aka i voth ini pris evelelnga aka aro ile vusonga avele.

⁴ Na ur areken tho ri nge kene i pathengal it aka ve, Melkisedek ini toko pomnga e. Naro lomumu rum senu tel vene: Abraham ini titevir mukalinga, ave i omreu ur elonga alavusnga aka i el i a nepes areken nge, ma i omreu i nge epee or mule pa omole, ma i sung epee omole a Melkisedek nge!

⁵ Na Moses ile patorong i ri vene: Livai ilengare* oenga inga aro o velpol ini prisre, na prisre aro o el otitein Israelre ole ur elonga, na oa aning epee omole na epee or limpenel aro i voth. Na i nunganga aka or mun ini a Abraham ititeviere, aveto prisre o el epee omole aken a or nge.

⁶ Aveto Melkisedek ini a Livai ilenga avele, aveto i el epee omole aken a Abraham nge. Na Abraham ini toko aka God i kin ile riong tomo nge i lale, ave Melkisedek i nong nge a God ve aro i oma senu a i nge.

⁷ Na aken i pathengal it aka ve, Melkisedek i pomnga mun nge a Abraham, eneke toko aka i nong nge a God ve aro i oma senu a ithanga e nge, kene i pomnga nge ithanga aken.

⁸ Na Judare ole prisre o el epee omole aken a tokokoere nge, aveto or ini tokokoe

areko aro o rin. Aveto Melkisedek i pomnga nge or, eneke ini pris aka i el epee omole mun, ave God ile erere i ritet nge ile rinong avele, aken ini patongrumong aka i mirenga ve pris e avele aro i el imei, eneke i voth reletunu ol.

⁹ Na i venen aken, mako i pavurvur aka aro te ri ve, Livai aka ilengare o el epee omole aken, kene i ul epee omole a Melkisedek nge, aka a Abraham imeni,

¹⁰ eneke ini a Abraham ia powes aka rongan i voth a Abraham ini peti, nge wop lemi aka Melkisedek i sangpolo a Abraham a sovengalo aken.

Jisas i velpol ini pris aka i mukal nge pris nomengangare.

¹¹ Naro tho ri werer mun nge lek riong aka tho ri tel i a thomu nge lale,[†] nomenga Israelre o el a Moses ile patorong aka i ri ve, Livai ilengare oenga aro o oma pris a omaing. Na aro ve ole omaing aken i pavurvur aka aro i oma tokokoere mo o riri a God itheki, i vava aka God i ri mun nge pris a omaing relnga e aka aro i velpol a rumongaling me, e?[‡] Pris a omaing aken aro i velpol ranga ve ini a Melkisedek ile omaing, aro i ranga ve ini a Livai ome a Aron olengare ole omaing avele. I ri nge aken, eneke Aron ilengare ole omaing i pavurvur aro i opoal tokokoere mo o riri a God itheki, kene avele.

¹² Na God i eksing pris a omaing venen aken lale. Na i velpol venen aken, mako God i eksing mun ile torong.

¹³⁻¹⁴ Na toko aka God i ri nge, kene ini ar Pomnga, eneke ile net rel nge a Livai, na ile net ini Juda, na nomenga, toko e avele aka ini net Juda i oma pris a omaing aka a God ile sungong a lekleka, na nge aka Moses i ri nge toko kathnga areko aro o velpol ini prisre, i ri riong e avele nge net aken.

¹⁵ Na te thepol i aka, pris relnga i velpol lale, ini a Jisas aka i ranga ve ini mun i a Melkisedek. Aken i panine rintet it ve, ur aken i eksing lale.

¹⁶ Na patorong i ri nge ve, Livai ilengare oenga aro o velpol ini pris, aveto Jisas i velpol ini pris nge sovengalo aken avele.

* ^{7:5:} Judare otutunre ole net i panes rum aka ini otitemaere. † ^{7:11:} Riong aka i ri nge i voth nge 5:6 na 7:17.

‡ ^{7:11:} O thepol a 5:5-10.

I velpol ini pris nge ile mimiong engenga
ako aro ile vusonga avele.

¹⁷ Eneke God ile erere i ritet vene:
“Wong ini pris ako aro lom vusonga avele,
ranga ve ini mun i a Melkisedek.” *Buk
Song 110:4*

¹⁸ Aken i pathengal it ve, God i pavus a
Moses ile patorong lale, eneke ile engeng-
ing avele, na ini ur polpolnga ol,

¹⁹ eneke i pavurvur aro i opoal toko mo
i riri a God itheki, kene avele. Ma God
i thep sovengalo ponganga aka i sivenga
rintet nge aken, na nge sovengalo aken i
pavurvur aro te es totho a God nge la.

²⁰ Na e mun e, Jisas i pomnga nge pris
nomengangare, eneke God i panunganga
ile riong aka i ateal a Jisas ve ini pris. Na
pris nomengangare o velpol ini pris venen
aken ol avele,

²¹ aveto God i panunganga ile riong aka
i ateal a Jisas ve ini pris, nge aka i ri ve,
“Toko Pomnga i panunganga ile riong,
naro i eksing ilemi avele aka i ri ve:

‘I nunganga wong ini pris
ako aro lom vusonga avele.’ ” *Buk
Song 110:4*

²² Na God i panunganga ile riong ve-
nen aken, mako riong kinnga aka Jisas i
pavelpol i, kene i sivenga rintet nge riong
kinnga nomengangare aka ini a Moses ile
patorong.

²³ Na pris nomengangare o pom, eneke
o rin rin, na e avele i pavurvur aro i voth
reletun nge pris a omaing aken,

²⁴ aveto Jisas i voth reletun ol nge ile pris
a omaing aken, eneke i mimi evelelnga
ako aro ile vusonga avele, na e avele i
pavurvur aro i tepolal ol i nge imei.

²⁵ Maken i pavurvur aro i pamimi selele
areko o es a God nge aka nge i, eneke i
mimi evelelnga aka aro ile vusonga avele,
mo aro i nong a God nge ve aro i opoal or.

²⁶ Na Jisas ini Pris Pomnga venen aken,
ako i pavurvur nge opoalnger. Ini toko
ako i riri rintet a God itheki, na vothung
kerenga e avele i voth a i nge, na lemi
rumong kerenga e avele i voth mun a i
nge. Mako God i papomnga i roro a Pen
a Urvet la, ma i voth mela nge vothung
kerenga omangare.

²⁷ Na i ranga ve ini pris nomengangare
avele, eneke or kene o oma sungong a God
nge, nge nang elonga. A mukaling tel o
oma sungong i pavurvur nge osivenga ole
vothung kerenga seltunnga, lamo o oma
sungong i pavurvur nge tokokoere ole
vothung kerenga seltunnga mun. Aveto
Jisas i oma venen aken avele. I oma
sungong omole inga aka ini isivenga ile
mimiong sungpotnga. Na ile sungong
omole inga aken i pavurvur ol nge toko
alavusnga ole vothung kerenga eltetpot-
nga.

²⁸ Na Moses ile patorong i ateal tokoko-
ere mo o velpol ini Prisre oa Pomngare,
aveto or ini areko o pavurvur nge vothung
sivenga alavusnga panesnga avele. Aveto
God ile riong aka i panunganga i, kene i
velpol ol a Moses ile patorong kime, na
riong aken i ateal a God Itun ve ini Pris
Pomnga, eneke i panes selele a God ilemi
ako aro ile vusonga avele.

8

*Jisas ini Pris Pomnga aka i pavelpol a
God ile riong kinnga ponganga.*

¹ Na lek riong aka tho ri nge kene itepun
vene: Jisas ini ler Pris Pomnga ranga ve
ako tho ri nge lale, na i men ol a God ilo sei
a imei sivenga nge anga, toth a ile nepes a
menonga ake ro a Pen a Urvet, ini wop aka
o papompom tokokoere nge.

² Na i oma pris a omaing, aka i wola
tokokoere a God nge la. Na i oma ile
omaing aken aka a Lotu Tepun a Vel Pen
a Urvet anga lemi. Ini Lotu Tepun a Vel
nunganga aka Toko Pomnga isivenga i ari
i, na ini Lotu Tepun a Vel aka tokokoere o
ari i, kene avele.

³ Na Moses ile patorong i ateal Prisre
oa Pomnga omole omole ve aro i sung na
i ongtun sungongre a God nge la, aken i
venen mun aka aro Jisas ile sungong i voth
ako aro i sung mun i a God nge la.

⁴ Na aro ve rongan i voth ake ru a ulue,
aro ini pris avele, eneke pris ulue angare
o voth lale, aka aro o sung sungong a God
nge la, ranga ve aka Moses ile patorong i
ri nge.

⁵ Na o oma ole omaing ako a Lotu Tepun a Vel ulue anga lemi, ako i patongrum Lotu Tepun a Vel Pen a Urvet anga ia sei. Aken ini tepun ako God i ri engeng nge a Moses nge wop lemi ako i toth aro aro i patea lotuonga a sel aringa, na i ri ve,
 “Na naktet aringa, na panes senu i ranga ve aka tho pathengal ia sei a wong nge
 a tete polemi aken.” *Kisim Bek 25:40*

⁶ Aveto pris a omaing ako Jisas i oma i, kene i aolonga rintet nge pris ulue angare ole omaing, eneke God ile riong kinnga ponganga aka Jisas i pavelpol i, kene i aolonga rintet nge riong kinnga nomen-ganga aka i voth a Moses ile patorong lemi. Na e mun e aka, ur sivesivengare aka riong kinnga ponganga i ri nge, kene i sivenga rintet nge ur aka riong kinnga nomenganga i ri nge.

⁷ I nunganga, aro ve tokokoere o pavurvur aro i velpol ini toko riringare a God itheki, aka nge riong kinnga nomen-ganga ipanesnga, i pavurvur aro God ilemi ve aro i tepolal ol i nge riong kinnga ponganga mun e avele.

⁸ Aveto God i thopol i aka ve, tokokoere o panes senu i avele, na rongan o oma vothung kerenga, mako i ri vene:
 “Tho Toko Pomnga tho ri vene,
 ‘Nongpol! Tho ateal nang e aka aro i velpol,
 aka aro tho kin lek riong kinnga pon-ganga
 tomo nge Israelre.

⁹ Naro i velpol
 ranga ve ini riong kinnga nomen-ganga
 aka tho kin tomo i nge otiteviere,
 nge aka tho theal senu or
 na tho wolpot or a Isip me, kene
 avele.’
 Tho Toko Pomnga tho ri vene,
 ‘Aro tho kin lek riong ponganga tomo nge
 or,
 eneke o panes senu lek riong kinnga
 nomenganga avele,
 mako tho lel kimek nge or.’

¹⁰ Tho Toko Pomnga tho ri vene,
 ‘Lek riong kinnga

ako aro tho kin tomo i nge Israelre,
 nge nang aken aro i vene:
 Aro tho paeso lek patorongre a olemi
 mo olemi mire ol nge,
 naro olemi engeng ol nge panesnga.
 Naro tho voth ol ini ole God.
 Naro o voth ol ini lek tokokoere.

¹¹ Na toko e avele aro i voth ol
 aka aro i patalor ithanga eve itein ve,
 “I sivenga aka aro lomum mire nge a Toko
 Pomnga”,
 eneke or alavusnga aro olemi mire ol
 nge tho,
 i patea nge toko vulutnga
 na i mul nge toko kimanga
 aro olemi mire ol nge tho.

¹² Eneke aro tho patitepot ole vothung
 kerengare,
 naro lelik ruma ol i avele.’ *Jeremaia 31:31-34*

¹³ Na ile riong kinnga ake God i apet
 ve ini “ponganga,” aken i oma ile riong
 kinnga teltelngga mo i velpol ol ini ur
 polpolnga. Na ur aka ini ur polpolnga aro
 i voth palolo avele naro i penthal.

9

Sungong nomenganga ini mekeremre oa mla.

¹ Na nge a God ile riong kinnga teltelngga,
 God i sung patorong pelie nge lotu. Na
 lotuonga a vel i voth mun ake ru a ulue.

²⁻³ Na o ari lotuonga a sel aken ma i
 vene: O pamonsopalu lavlav aolonga a
 lemi pat, na epee mukalinga o apet i ve ini
 “Pen Riringa” na epee aininga aka i voth a
 lavlav aken kime, o apet i ve ini “Pen aka
 i Riri Rintet” eneke God i voth nge. Ako
 ru a “Pen Riringa” aken, theki lalainga le
 mitainga omole i voth nge, na ring omole i
 voth mun nge, na bret riringa aka o sungu
 i a God nge, o pango mun i a ring aken nge.

⁴ Na ur elonga aka ini “Pen aka i Riri
 Rintet” ile kene i vene: Sungong a lekleka
 aka o oma i nge gol aka o ongtunu ongtuna
 ur una vrongare nge, na i voth a mukaling
 a lavlav aolonga aken nge. Na aka a epee
 aken lemi, God ile riong kinnga a bokis aka
 o viv gol a ilemi na a lalanga a ikime, kene i
 voth nge. Na aning mei aka o oma i nge gol
 i ngo a bokis aken lemi, na i vuual nge aning

ako o apet i ve ini “Mana.” Na Aron ile eel ako nomenga kene i susup i voth mun a lemi. Na um velvelnga or aini ako God i wat ile riong kinnga nge i voth mun a lemi.

⁵ Na roro a bokis aken thekia, ensel vet or aini ako oa sei o mit epee epee na oni giniti i vavrat tunu bokis thekia aken, na or paini o paateal a God ile vothinga. Na wop aka oni giniti i vavrat tunu i, kene o apet i ve ini a “God Ile Themosaling A Wop.” Aveto nik plong ve aro tho ekris ol riong nge ur areke ponange.

⁶ Na nge ako o paen senu ur areken a omei venen aken, famo prisre o koru kora nge “Pen Riringa” aken nang omole omole, na o oma ole omaing nge.

⁷ Aveto Prisre oa Pomnga iengga inga aka i koro nge “Pen aka i Riri Rintet” na i koro pa omole inga nge tovu po omole omole. Na i koro tomo nge mekeremre oa mla aka i pavurvur nge isivenga ile vothung kerenga seltunnga, na i seltun mun tokokoere ole vothung kerenga aka o oma i, aveto olemi mire nge avele.

⁸ Na nge vothung areke Oni Riringa i pathengal it ve, ler sovengalo i thep rongan aka aro te koro nge “Pen aka i Riri Rintet” tova ve riong kinnga nomenganga aken rongan i voth.

⁹ Na patongrumong i voth nge ur areken i velpol nomenga. Ur areken i pathengal it ve, sungong aka tokokoere o sung i a God nge, aka prisre o ongtun i, kene i pavurvur aro i pasenu selele olemi avele, eneke rongan olemi rum aka ve, or ini toko kerenga a God itheki.

¹⁰ Patorong areken o ri inga nge aning aka aro o an i, na thinong aka aro o thin i, na nunuong palekngare aka aro o panes i. Ur areken i pavurvur inga aka nge oni peti inga, na i oma ur pelie a olemi avele, i pavurvur nge nang aka aro Krais ile sovengalo ponganga i velpol.

Sungong ponganga ini a Krais ia mla.

¹¹ Aveto Krais i velpol ini Pris Pomnga lale, ma i pavelpol ur sivesivengare aka te pavurvur nge elnga ponange. Na i kene i koro nge lotuonga a vel aka i pomnga na i sivenga rintet nge lotuonga a vel ulue

anga, ini lotuonga a vel Pen a Urvet anga aka tokokoere oma i nge omeni avele.

¹² Na i koro tomo nge meme na bulmakau tun oa mla avele. Aveto i koro nge “Pen aka i Riri Rintet” ma i oma sungong nge isivenga ia mla pa omole inga aka i pavurvur nge toko alavusnga oelwerernga. Na i oma mun i avele, eneke ile sungong aken i eltetpot selele tokokoere ole vothung kerenga, mako o pavurvur aro o voth tomo nge a God evelelnga aka aro ile vusonga avele.

¹³ Na nomenga aro ve tokokoere o riri a God itheki avele, prisre aro o el meme eve bulmakau tomonnga oa mla, mo o patitirit leltun or nge, eve aro o ongtun bulmakau sengenga mo i velpol ini vuvus, mo o mota vuvus pelie mo o sul tomo i nge thei mo o patitirit leltun or nge, na nge ur areken kene o pariri inga oni peti. Na aro ve mekeremre oa mla i oma venen aken,

¹⁴ i vava nge a Krais ia mla, e? Ia mla aro i pariri selele it mo te rov i a lemire ve, vothung kerengare aka aro o pavelpol rinong a it nge, kene i vus selele. Na Krais i pavurvur aro i pariri selele it, eneke i sungpot isivenga ile mimiong a God nge, ranga ve ini sungong aka ur kerenga e avele i voth nge. Na i oma venen aken aka nge Oni Riringa ile engenging. Na i pariri it venen aken mo aro te pavurvur nge a God aka i mimi evelelnga ipanesnga.

Krais ia mla i pavelpol nunganga a God ile riong kinnga ponganga.

¹⁵ Na Krais i pariri it venen aken, mako God i ateal i ve aro i pavelpol ile riong kinnga ponganga a it nge, mo areko God i ateal or ve ini ile, aro o el ur sivesivenga aka i kin ile riong ve aro itutunre aro o eli. Na ur sivesivenga areken aro i voth evelelnga aka aro ile vusonga avele. Na Krais i pavurvur aro i pavelpol riong kinnga aken, eneke ile rinong aken i pavthopot or nge ole vothung kerenga aka o oma i, aka rongan o voth a riong kinnga nomenganga lemi.

¹⁶ Na toko aka i sis ve aro i ateal itun kathnga aka i aro i pakomkomes ile ur elonga, aro i watu riong kinnga tel a mukaling a erere nge. Na aro ve itun aken

i sis ve aro i pakomkomes itema ile ur elonga, aken tokokoere aro olemi mire tel ako ve, itema i rin lale.

¹⁷ Eneke riong kinnga aken aro i um inga tova ve toko i rin, na aro ve toko rongan i mimi, ile riong kinnga aken rongan i voth polpol inga.

¹⁸ Aken ini tepun ako o so rin mekerem pelie mo oa mla i pavelpol riong kinnga nomenganga aken ile omaing.

¹⁹ Na nge wop lemi aka Moses i panong-pol toko alavusnga nge patorong elonga aka i voth a God ile patorong a erere nge, lamo i so rin bulmakau tun na meme tun, ma i ela oa mla, ma i sul tomo i nge thei. Na i kin sipsip ini thoi selelenga a won aka ini Hisop ongepo, ma i paesu i a mla aken nge, ma i patitirit i a erere aken nge na tomo mun nge toko alavusngare.

²⁰ Na i ri ve, “Mla ake i pavelpol a God ile riong kinnga ile omaing aka i pator lomu ve aro o panes i.” *

²¹ Na ranga ve aka i oma i lale, i patitirit mun mla aken a lotuonga a sel tomo mun nge ur elonga aka o um nge mo o lotual a God.

²² I nunganga, aka a Moses ile patorong lemi, i toth re aka aro o pariri ur alavusnga nge mla. Na aro ve mla i palalas avele, God aro ilemi simikal tokokoere ole vothung kerenga mun avele.

Krais ia mla inga aka i eltetpot ler vothung kerengare.

²³ I nunganga, mekeremre oa mla i pavurvur nge lotuonga a vel ulue anga tomo nge ur elonga ipariringa, eneke i patongrum inga aken ini lotuonga a vel Pen a Urvet anga ia sei. Aveto sungong aka i pavurvur nge ur nunganga areko a Pen a Urvet ipariringa, i aoseletun sungong aka o oma i nge mekerem.

²⁴ Tho ri nge ur Pen a Urvet anga, eneke Krais i koro nge lotuonga a vel aka i patongrum lotuonga a vel nunganga ia sei aka tokokoere o oma i nge omeni, kene avele. Aveto i koro inga a Pen a Urvet la, na i mit ol a God itheki nge opoalnger.

²⁵ Na lomumu rum senu tel, Prisre oa Pomnga i koro papulua nge “Pen aka i

Riri Rintet” pa omole omole nge tovu po elonga, na i koro tomo nge mla aka ini isivenga ia avele. Aveto Krais i oma venen aken avele. I eso a Pen a Urvet pa omole inga mo i sung isivenga ia mla a God nge ranga ve ini sungong.

²⁶ Na aro ve Krais i oma ile omaing aken papulua, aro i el sisong na i rin papulua mun. Naro i patea nge nang aka God i pamenu ur alavusnga a ulue. Aveto Krais i velpol ake ru a ulue pa omole inga, nge wop lemi ake toth nge ulue ake ile vusong, mo aro i sungpot isivenga ile mimiong nge vothung kerenga eltetpotnga.

²⁷ Na God i ateal it ve aro te rin inga pa omole, lamo te mit ol nge riong a itheki.

²⁸ Na i venen mun nge a Krais, i rin pa omole inga ranga ve ini sungong a God nge aka i eltetpot puluangare ole vothung kerenga paomelalnga. Naro i velpol werer mun paininga, aveto aro i eltetpot vothung kerenga ol avele, aro i pamimi ol inga areko o men total i nge ile lo wererong me.

10

Mekeremre oa mla sunga i pavurvur nge vothung kerenga pavusnga avele.

¹ Na Moses ile patorong i patongrum ur sivesivengare aka aro i velpol, kene oa sei, aveto ini ur nunganga aken avele. Na nge a Moses ile patorong panesnga, prisre o ongtunu ongtuna ole sungongre papulua a God nge, nge tovu po elonga. Mako sungong areken, aka areko o lotual a God o oma i, kene o pavurvur aro o pavengveng selele or a God itheki avele.

² Na aro ve sungong areken o pavurvur aro o pavengveng selele or a God itheki, aken aro o oma ol sungong mun e avele. Eneke sungong inga aken aro i pavurvur aro i pariri ol or pa omole a God itheki. Maken aro o rov ol le maraing nge ole vothung kerenga, kene avele.

³ Aveto i vene aken avele, sungong areken aka o oma i nge tovu po omole omole i palemi rumal werer or aka ve, ole vothung kerenga rongan i voth.

* 9:20: Kisim Bek 24:6-8

⁴ Eneke bulmakau tomonnga ome meme oa mla i pavurvur nge vothung kerenga eltetpotnga avele.

⁵ Maken nge wop lemi aka Krais i velpol a ulue me, i ria God nge ve,

“Num plong ve aro o ongtun ole sungong a wong nge,

mako wong monsi nik peti
mo aro tho panes inga lomum.

⁶ Na lomum sivenga avele
nge sungong aka o ongtun selea i,
tomo mun nge sungong
ako i seltun ole vothung kerenga.

⁷ Lamako tho ria ong nge ve,
‘Lek God, thepol, tho ol ke,
tho monsi lale ve aro tho oma inga
ur aka ong sis ve aro tho oma i,
ranga ve aka o wat i a lom erere
nge, nge tho.’” *Buk Song 40:6-8*

⁸ Na a mukaling i ri ve, “Num plong ve aro o ongtun ole sungong a wong nge, na lomum sivenga avele nge sungong aka o ongtun selea i, tomo mun nge sungong aka i seltun ole vothung kerenga.” (Aveto prisre o oma venen aken, eneke o panes a Moses ile patorong.)

⁹ Lamako i ria ve, “Tho ol ke, tho monsi lale ve aro tho oma inga ur aka ong sis ve aro tho oma i.” Aken i pathengal it ve, God i mothonglelu ol sungong teltelnga, na i tepopal i nge a Krais ile sungong aken.

¹⁰ Na Jisas Krais i oma ranga ve aka God i sis ve aro i oma i, mako i sungpot isivenga ile mimiong pa omole inga a God nge ranga ve ini sungong. Na nge ile sungong aken, make te velpol ol ini toko riringare a God itheki.

Krais ia mla sunga i pavurvur nge vothung kerenga pavusnga.

¹¹ Na nang omole omole pris alavusnga o mita mo o oma ole lotuong a omaing, na o oma sungong papulua a God nge aka i thun inga. Na sungong areken o pavurvur nge vothung kerenga pavusnga avele.

¹² Aveto Krais i sung sungong pa omole inga aka i pavus selele vothung kerenga alavusnga, lamako i men ol a God ilo sei a imeni sivenga nge anga, ini wop aka o papompom i nge.

¹³ Na i patea nge nang aken, na rongan i men tetal ol aka aro God i paesu ile ngarangre a isa thewo.

¹⁴ Na i men ol venen aken, eneke i oma sungong omole inga aka i pavengveng selele ol areko God i ateal or mo o riri a itheki.

¹⁵ Na Oni Riringa mun i ritet it nge aken.
A mukaling i ri vene,

¹⁶ “Tho Toko Pomnga tho ri vene,
‘Lek riong kinnga

ako aro tho kin tomo i nge or,
nge nang aken aro i vene:
Aro tho paeso lek patorongre a ole mi
mo ole mi mire ol nge,
naro ole mi engeng ol nge panesnga.””

Jeremaia 31:33

¹⁷ Na a rumongaling i ria mun ve,
“Aro tho patitepot ole vothung kerenga,
naro lemik ruma ol i avele.” *Jeremaia 31:34*

¹⁸ Maken aro o oma ol sungong nge vothung kerenga eltetpotnga, kene avele, eneke God ilemi simikal vothung kerenga areken lale.

Aro te mit engeng nge ler lemioong mo te es totho a God nge.

¹⁹ Na titeikre, ur areken tho ri nge kene i nunganga, maken aro te es totho a God nge, eneke Jisas ia mla i eltetpot ler vothung kerengare lale, aken te pavurvur aro te eso a “Pen aka i Riri Rintet” aka God i voth nge, naro te ngeip nge esoong nge avele.

²⁰ Na te pavurvur nge esoong aken, eneke Jisas ile rinong i thep sovengalo ponganga aka mimiong i voth nge, eneke ile rinong i pavus ur aka i mit roal it nge esoong a God nge la, ranga ve ini lavlav aolonga aken ile minraueng.

²¹ Naro te es totho mun a God nge, eneke Jisas ini ler Pris Pomnga aka i theal a God ile toko alavusngare.

²² Na Jisas i pariri lemire, mako te mothong tova lemire rum ol ve, vothung kerenga rongan i voth a it nge. Na te riri ol ranga ve aka te nunu nge thei ninenga. Maken aro te es totho a God nge, na te mothong tova lemire sulung salang nge ipanesnga, naro ler lemioong i engeng aka ve, i sis rintet aka aro te es totho a i nge.

²³ Naro te mit engeng nge ler lemioong ako te ripatu i a tokokoere otheki tomo mun nge ur sivesivenga areko te men sial nge, eneke God aro i panes vengveng ur ako i kin ile riong nge lale.

²⁴ Naro lemir rum senu nge sovengalo kathnga aka aro te panes i, aka aro i pavurpol tokokoere olemi nge asagupeling, na nge vothung sivenga panesnga.

²⁵ Naro te mothong tova te modop vothung aka ini pathunpeling nge lotu, ranga ve aka pelie o oma i. Aveto aro te paengeng pel, eneke te ate aka ve, Toko Pomnga ile nang aken kene i toth me lale.

*Te mothong tova te lel kimer nge a Jisas
ako ini a God Itun.*

²⁶ Naro te paengeng pel venen aken, eneke aro ve te elo a God ile riong nun-ganga mo i panine ol lemir, aveto te kis inga vothung kerenga omanga, aken sun-gong e avele i voth ol aka i pavurvur nge vothung kerenga aken eltetpotnga.

²⁷ Aveto aro te men tetal inga ile tel-tunong aka a it nge, naro te ngeip rintet, eneke ile teltunong aken ini won sesenga aolonga aka aro i ongtun a God ile ngarangre.

²⁸ Na nomenga i vene: Aro ve toko e i lel ikime nge a Moses ile patorong panesnga, na aro ve toko or aini eve or me o pamilem i a riong nongpolngare nge, aken aro o pun rin toko aken, naro olemi esal vet i avele.

²⁹ Na aro ve i venen aken nge toko aka i lel ikime nge a God ile riong kinnga nomenganga, aro i vava nge toko aka i lel ikime nge a God ile riong kinnga ponganga, e? Toko aka ini silal a God Itun, na i ri tangatun nge Oni Riringa ile themosaling, na i ri pat ve, Krais ia mla aka i pavelpol a God ile riong kinnga ponganga, na i eltetpot ler vothung kerenga, kene ini ur polpolnga. Toko aka i venen aken ipaomelalnga aro i aolo rintet nge toko nomenganga aken ipaomelalnga.

³⁰ Eneke lemir mire nge a God ini God aka i ri ve,

“Sivengek aro tho olal i a tokokoere nge, aro tho paomelal or nge ole vothung kerenga areken.” *Lo 32:35*

Na i ria mun ve,
“Tho a Toko Pomnga
aro tho pamit lek tokokoere nge ri-
ong.” *Lo 32:36*

³¹ Aken toko i venen aken, ma i voth a God aka ilemi mire nge ur alavusnga imeni mo i el paomelaling a i nge, aro saluk rintet i nge.

*Aro te mit engeng nge matheong potun-
nga.*

³² Aro lomumu rum werer nge ur aka God i oma tel i a thomu nge, nge aka i panine lomumu, mako lomumuo nge a Krais. Nge wop lemi aken thomu o el matheong na sisisong puluanga nge a Krais ipanesnga, aveto thomu o mit engeng inga.

³³ Na nge nang pelie tokokoere o pak-erenga thomu, na o ri tangatun nge thomu a pulua otheki. Na nge nang mun pelie matheong sungare o oma venen aken a thongongomuere nge, ma thomu o opoal or nge matheong areken potunnga.

³⁴ Na lomumu esal na o opoal areko o paeso or a mang a midenga lemi. Na somu wom inga areko o kemtitet lomu ur elonga, eneke lomumu mire ve, sivengomu lomu ur sivesivengare i voth naro ile vusonga avele.

³⁵ Na thomu o mit engeng venen aken nomenga, mako o mothong tova o lol ol nge lomu mitong aken, eneke God aro i sung ur sivesivengare a thomu nge, tova o mit engeng inga.

³⁶ Naro thomu o mit engeng nge ur aka God i sis ve aro thomu o oma i, aken aro o el ur sivesivengare aka i kin ile riong nge lale.

³⁷ I nunganga,elle inga atike aro i velpol ranga ve aka God ile erere i ri nge ve,

“Toko aka aro i es me, aro i pakekeal avele.

³⁸ Na lek toko vengvenga aro i mimi ol, eneke ilemio ol a tho nge.

Na aro ve itheki namal nge panes-ngek,
aro lelik sivenga ol nge i avele.”

Habakuk 2:3-4

³⁹ Aveto it ranga ve ini areko otheki namal ma o el kerengaing, kene avele.

Avele, it ini toko lemioongare ako Krais aro i pamimi it.

Aro te pamit engeng ler lemioong a God nge

11

(Vonge 11:1-13:25)

Lemioong tepun ini uneke?

¹ Lemioong ini ur nekenga? Ini ur ako i vene: Aro ve toko e ile lemioong i voth, akennga ilemi mire senu lale ako aro i el ur ako i men sial nge. Na toko aken ilemi engeng ve, ur ako i thepol i nge itheki avele, kene aro i velpol.

² Na toko nomengangare ole lemioong i venen aken, mako God i ria or ve, ole vothung aken i sivenga.

³ Na nge ler lemioonga inga, lemir mire ako ve, God ile riong i pamenu sepsa tomo nge ulue na ur alavusnga aka o voth nge, aken i mirenga ve, ur alavusnga aka te thepol i nge thekir, kene i velpolpot nge ur aka te thepol i nge thekir avele.

Abel, Enok na Noa ole lemioong.

⁴ Na nge ile lemioonga inga, Abel i sung sungong a God nge aka i sivenga nge itein a Ken ile sungong. Ma God pango patu ol ile riong ve, ile sungong aken i sivenga, mako God i apet i ve ini toko vengvenga, eneke ilemio nge a God ile riong. Na i nunganga aka Abel i rin lale, aveto ile lemioong aken rongan i patoral it nge lemioong a vothung nge a God.

⁵ Na Enok mun kene ile lemioong mun nge a God, na God i pango patu ol ile riong ve, ini toko sivenga aka ilemi i ngo senu nge i, mako God i ela i alamimmia a Pen a Urvet la, ma i rin vet avele. Na tokokoere o kathu katha i, aveto o thepolo i avele, eneke God i elteta i la lale.

⁶ Na aro ve toko e ilemio nge a God avele, aken i pavurvur aro God ilemi i ngo senu nge i avele, eneke toko e aka i sis ve aro i es a God nge, aro ile lemioong ve, God i voth na i sung ur sivesivengare nge areko o kartet i.

⁷ Na Noa mun kene ile lemioong mun nge a God ile riong, aka i ritet i nge ur kerenga aka aro i velpol, aka tokokoere

o thepol i rongan, ma ilemio nge riong aken, ma i ngeip, mako i oma imot aolong aken i pamimi iewo sengenga na itutunre nge. Na ile lemioong aken kene i teltun toko alavusnga ake ru a ulue. Na i velpol ini toko vengvenga a God itheki nge ile lemioong aken.

Abraham ile lemioong.

⁸ Na Abraham mun kene ile lemioong mun nge a God. God i lenga i ve aro i losa mo i es nge pen relnga e aka aro i sungu i a i nge panen. Na Abraham ilemio nge riong aken, ma i nongal i ma i es, aveto ilemi mire nge wop kathnga aka i es nge, kene avele.

⁹ Na ilemio nge riong aken, mako i es ma i men nge pen epee aka God i kin ile riong ve aro i sungu i a i nge. Na ile menong nge pen epee aken i ranga ve ini loomere, ma i ngoalo nge valvale aka ini sel. Na i nunganga aka God i kin ile riong tomo mun nge a Aisak ome a Jekop ve aro i sung pen epee aken a or nge, aveto or mun kene o ngoalo mun venen aken nge valvale areko ini sel.

¹⁰ Na Abraham i mimi venen aken, eneke i men sial nge rem pomnga panen anga aka aro i voth evelenga, aka i panes a God ilemi na God isivenga i ari i.

¹¹ Na Abraham i toluku lale na Sara mun kene ini sarit, aveto ilemio nge a God ile riong, mako God isa wom i ve aro i pavelpol itun e, eneke ilemi engeng ve, God aro i panes inga ur aka i kin ile riong nge lale.

¹² Na i venen aken, mako toko aka i pavurvur nge wain pavelpolnga avele, i pavelpol ititeviere, na oa titaling i pom rintet ranga ve ini sivemitre aka o voth a sepsa na tomo mun nge rua a wonwon.

¹³ Na tokokoe areken ole lemioong i voth tomo nge or, i pavurvur nge ole rinong. Na o el vet ur e avele aka God i kin ile riong nge. Na i ranga ve aka o mit mela, na o the inga nge ur areken, na olemi sivenga inga aka ve, aro i velpol panen. Na o rimilimlemu ol ve, or ini loomere ake ru a ulue.

¹⁴ Na areko ole riong i venen aken, i pathengal it aka ve, o kath pen e aka aro ini osivenga ole.

¹⁵ Na aro ve olemi engeng nge pen epee ako o pamupot nge, i pavurvur aka aro o lo werer mun nge la.

¹⁶ Aveto olemi engeng nge pen epee aka i sivenga rintet, aka ini Pen a Urvet anga. Maken God ile maral avele aka o apet i ve ini ole God, eneke i monsi ole rem pomnga aken lale.

¹⁷⁻¹⁸ Na God i kin ile riong tomo nge a Abraham ve,
“Ini inga tum a Aisak aka aro i pavelpol titovumre.” *Stat 21:12*

Lamako God i tongporum i ma i ria mun i ve,

“Aro ong sungpot tum a Aisak
mo ong ongtun i a tho nge.”

God i ri venen aken, aveto Abraham rongan ilemio nge a God ile riong teltelnga. Na isivenga i monsi lale, na i toth aka aro i so rin itun omole inga aken,

¹⁹ eneke ilemio ve, “Aro ve tho so rin a Aisak, God i pavurvur aka aro i palos werera i nge rinong.” Na nge aka i el werer i, i ranga ve aka i el werer i nge rinong.

Aisak, Jekop na Josep ole lemioong.

²⁰ Na Aisak mun kene ile lemioong mun nge a God, na i nong a God nge ve aro i oma senu nge a Jekop ome a Iso nge ur aka aro i velpol a or nge panen.

²¹ Na Jekop mun kene ile lemioong mun nge a God, na nge nang aka i toth nge ile rinong, i rong viloa imeni a Josep itun or aini ma i nong a God nge ve aro i oma senu nge or,* na i oalala i nge ile eel ma i lotual a God.

²² Na Josep mun kene ile lemioong mun nge a God, na nge nang aka i toth nge ile rinong, i ritet nge Israelre ole lospotong a Isip, ma i pator engeng or nge ur nekenga aka aro o oma i nge ipokikin.

Moses ile lemioong.

²³ Na Moses itema oma inina mun kene ole lemioong mun nge a God, na i patea nge nang aka inina i maneu i nge, nako o parong kine i, i pavurvur nge ngov or me, eneke o ate aka ini wain sivenga, na o ngeip nge a Isip angare ole nepes a Pero ile torong nge wain so rinnga, kene avele.

²⁴ Na Moses mun kene ile lemioong mun nge a God, na nge aka i poma ini plong rintet ve aro o apet ol i ve ini Isipare ole nepes itun sengenga itun.

²⁵ Na i sis inga aka ve, aro i el math-eong tomo nge a God ile tokokoere, na ini plong ve aro ini sisi nge vothung kerenga omanga aka i palolo avele.

²⁶ Na ilemi ve, toko aka God i ateal i ve aro i el werer ile tokokoere, kene aro ini toko Israel e, mako i sis ve aro i el le maraing tomo nge or, na ilemi ve ile menong aken i sivenga rintet nge ur sivesivengare aka i voth a Isip nge, eneke ilemi i voth inga nge iolonga panen anga.

²⁷ Na ilemio nge a God, mako i lospot nge a Isip, na i ngeip nge a Isip angare ole nepes a Pero ile lemi klingong avele. Na i mit engeng, eneke i ranga ve aka i thepol a God aka tokokoere o pavurvur nge ithepolnga avele.

²⁸ Na ilemio nge a God, mako i nongal a God ile riong vene: I oma Punseleainga a Aning ma i ria tokokoere ve aro o patitirit mla a ole vel thekiare nge, aken ini paatealing mo tengen so rinngaa aro i so rin Israelre otutun tengenre avele.

Toko Israel pulua ole lemioong.

²⁹ Na Israelre mun kene ole lemioong mun nge a God, mako o apola Rua Sele-lenga ranga ve aka ini ulue sapun. Aveto nge aka Isip angare o tongporum espotong nge la, rua i palimtunu selele or.

³⁰ Na Israelre olemio nge a God ile riong, mako o es kalual a Jeriko nge nang or limai, mako Jeriko a lok i vulthipthepu.

³¹ Na seng sovengalo anga a Rahap mun kene ile lemioong mun nge a God, na i rin tomo nge toko avsaingare avele, eneke i nongpoo Israelre ole pen rengare.

³² Na tho pavurvur aro tho ritet mun nge toko pulua, aveto i lollo rintet aka aro tho tenes rum nge a Gideon, Barak, Samson, Jepta, Devit, Samuel, na nge a God ile riong elngare.

³³ Na tokokoe areken olemio nge a God, mako pelie kene ole mong ol tokokoe areko okei rel rel. Na pelie o theal tokokoere nge vothung vengvenga. Na pelie o el

* **11:21:** O thepol a Stat 48:13-20.

ur ako God i kin ile riong nge. Na pelie o el kerengaing nge laionre owo avele.

³⁴ Na pelie oni miringrang vet nge won sesenga annga avele. Na pelie tokokoere o engeng nge osorinnga, aveto o tholel ir. Na pelie ole engenging avele, aveto God i paengeng or nge ile omaing. Na pelie o es nge punong ma o velpol ol ini toko multhanga na ole mong ole ngarangre.

³⁵ Na seng pelie o el werer olengare ako God i palos werera or nge rinong. Aveto pelie, ole ngarangre o rere or ma o ria or ve, "Aro thomu o vthopot tova ve o lel kimomu nge a God." Aveto o nongal okei avele, mako o el sisong aolonga i pavurvur nge ole rinong, eneke olemi ve aro o los werera nge rinong aken, na ole mimiong aken aro i sivenga rintet nge mimiong ulue anga aken.

³⁶ Na pelie kene tokokoere o ri posilil or na o so litlit or. Na pelie o kin or nge sen na o paeso or a mang a midenga lemi.

³⁷ Na pelie o pun or nge um. Na pelie o soro or ainiu. Na pelie o so rin or nge bainat. Na pelie o esu esa tomo nge ole teunong aka ini sipsip na meme oni peti, na o men vulut inga, na o el kerengaing a tokokoere nge, na tokokoere o oma vothung kerenga a or nge.

³⁸ Na o esu esa a pen polpolnga na pengenere nge, na ole vel avele, mako o men kine a silkeplemi na volre lemi. Na or ini toko vengvengare a God itheki, aveto toko ulue angare oni plong ve aro o voth tomo nge or, mako o wis or venen aken.

³⁹ Na or alavusnga areken God ilemi sivenga nge ole lemioong a i nge, aveto o el vet ur e avele aka God i kin ile riong nge.

⁴⁰ Eneke God i monsi sovengalo ponganga lale a it nge, aka i sivenga rintet nge ur aka i kin ile riong tomo nge or nomenga. Na i sis ve aro it tomo mun nge or aro te velilo pel mo i pasum ile omaing vene aken.

12

Aro te betet nge ler mimiong ponganga.

¹ Na tokokoe areken o pathengal it nge lemioong a vothung, na i ranga ve aka o mit kalual it, na o paengeng it nge aka te

tho nge ler mimiong ranga ve ini toko aka i tho nge sertetpeling. Na i venen aken, maken aro te mothong ur alavusnga aka i montet werer it, na vothung kerenga aka i kin it ma te tho ses, maken aro te pavurvur aro te tho engeng nge ler mimiong ranga ve aka God i sis ve aro te oma i.

² Na ranga ve aka toko i the a mukaling nge wop aka i tho nge, aro te the inga a mukaling aka a Jisas nge, ini ler mukalpoinga aka i pathengal senu rintet it nge lemioong a vothung. Na i the inga a mukaling nge lemi sivengaing aka aro i el i panen, mako i el inga sisong a won ngoronga nge, na ilemi i voth nge le maraing aka i el i nge ile rinong aken, kene avele. Lamako i men ol a God ile nepes a menonga a imeni sivenga nge anga, ini pen aka o papompom tokokoere nge.

God i sung pasavilong a itutunre nge mo i pavengveng or.

³ Na toko kerengare oni silal a Jisas, aveto i el inga matheong aken, maken aro lomumu rum senu nge aken mo aro o mothong tova o lol na lomu lemioong i matu.

⁴ Na i nunganga aka lomu vur nge punong mo aro o matu nge vothung kerenga avele, aveto omu e avele rongan i patel mla nge punong aken.

⁵ Na ava lomumu simikal a God ile riong aka i sis ve aro i paengeng thomu nge, eneke thomu ini itutunre. Na i ri ve, "Tutukre, aro ve Toko Pomnga i vol thomu

na i sung pasavilong pelie a thomu nge
mo aro i pavengveng thomu,
o mothong tova lomumu ve ini ur polpolnga
na numu plong nge.

⁶ Eneke Toko Pomnga i sung pasavilong pelie
nge areko ia sagu or.
Na i sung paomelaling nge or alavusnga
aka i leng or ve ini itutunre
mo i pavengveng or." *Gutpela Sindaun 3:11-12*

⁷ Naro thomu o el inga matheong, eneke ini a God ile pasavilong aka i sungu i a thomu nge aka ini itutunre. Eneke wain

alavusnga o el pasavilong a otitemaere omeni nge.

⁸ Na God i sung pasavilong a itutun alavusngare nge, na aro ve thomu o el pasavilong pelie a i nge avele, aken thomu ini itutun nungangare avele, thomu ini wain sovengalo angare.

⁹ Naro lemire rum nge titemerre ake ru a ulue, or alavusnga o sung pasavilong a it nge, ma te papomnga or nge. Na i vava nge Titemer Pen a Urvet anga, e? I sivenga rintet ako aro te voth ol a ile pasavilong lemi mo te el mimiong aro aro ile vusonga avele.

¹⁰ Na titemer ulue angare o sung pasavilong a it nge, na i palolo mos avele, na i pavurvur nge ur aco olemi ve i sivenga. Aveto God i sung pasavilong a it nge, mo ini ler sivengaing, mo te pavurvur aro te velpol riri ol ranga ve ini i.

¹¹ Na nge aco te el pasavilong, lemire sivenga nge avele, eneke te el sisong nge. Aveto panen pasavilong aken i pavropol imonnga aco ini vothung vengvenga na lemi moring, tova ve ser wom inga nge pasavilong aken mo i pavengveng it.

¹² Na pelie a thomu nge lomu lemioong i molilil, na thomu o ranga ve ini toko aco i tho engeng ma i molos, maken aro thomu o paengeng evomu na menumu motungtungare.

¹³ “Na o naktet lomu mimiong mo i vengveng,” * mo areko ole lemioong i molilil aro o matu selele avele, aveto aro el engeng nge lomu mimiong aken.

Te mothong tova te lel kimer nge a God.

¹⁴ Naro thomu o betet nge menong nge lemi moring tomo nge toko alavusnga, naro o betet mun ve aro o velpol ini toko riringare a God itheki, na aro ve toko e i riri venen aken avele, i pavurvur aro i thepol a Toko Pomnga avele.

¹⁵ Naro thomu o naktet thomu, mo omu e avele i lel ikime nge a God ile themosaling. Na o naktet mun thomu, mo omu e avele i velpol a omu wop ranga ve ini won aco ini Luki aco i nes thomu mo i pakerenga lomu vothung a God itheki.

¹⁶ Naro o naktet mun thomu mo omu e avele i oma vothung aco nge toko na seng aomnga, eve ilemi ve God ile riong ini ur polpolnga, ranga ve aco nomenga Iso i oma i. Iso ini tengen aco aro i pakomkomes a God ile riong aco i kin tomo i nge itema, aveto i tepolal ia tengen a omaing aken mo i ol inga aning omole inga nge.

¹⁷ Na lomumu mire aco ve, panen i sis rintet ve aro i el werer ia tengen a omaing aken, aveto i pavurvur ol avele. Na i pavurvur aco aro i pavengveng werer ol ur areko i oma i lale, kene avele. Na i tang rintet nge ur areken elnga, aveto i el vet i avele.

Te pavurvur aco aro te velpol ol a God nge.

¹⁸ (v 18b) Na nomenga nge a God ile riong kinnga nomenganga lemi, Israelre o velpol a tete a Sainai ake ru a ulue, aco won sesenga aolonga i voth nge, ma i ranga ve ini ombulong a won sesenga ile klungong aco ia midingdeng na thue aolonga i voth tomo nge.

¹⁹ Na o nongpol kuth ile avvuvong, na o nongpol mun a God ikei aco i leng leng, ma saluk or, ma o nong ve aro i mothong tova i ri riong mun pelie a or nge,

²⁰ eneke o ngeip rintet nge a God ile patorong aco i ri ve,
“Toko eve mekerem kathnga
ako i papalo nge tete aken,
aro o pun rin i nge um.” *Kisim Bek 19:12-13*

²¹ Na o thopol tete aco itheki i vene aco, mako saluk rintet or, ma Moses mun saluk rintet i, ma i ria ve,
“Tho mun, sawir tho ma tho ngeip rintet.”

Lo 9:19

²² (v 22,18a) Aveto thomu o velpol a God nge, ranga ve ini or avele, eneke thomu o voth a God ile riong kinnga ponganga lemi, na i ranga ve aco thomu o velpol a tete a Saion, aco Jerusalem Pen a Urvet anga i voth nge, ini a God aco i mimi evelelenga ile pen. Na thomu o velpol a pen aco ensel pulua aco o mengmeng avele o voth nge, na o velilo pel na o risea.

* **12:13:** Gutpela Sindaun 4:26

²³ Na thomu o velpol a pathunong ako God itutunre o voth nge, na or alavusnga o ranga ve ini ia tengen. Or ini areko oionre i voth a God ile erere lemi aka a Pen a Urvet. Na thomu o velpol a God nge, aka ini toko alavusngare ole riong nongpolnga. Na thomu o velpol a pen aka toko vengvengare ooni i voth nge, na God i oma or ma o sivenga rintet lale.

²⁴ Na thomu o velpol a Jisas nge, ini toko aka i pavelpol a God ile riong kinnga ponganga nge ia mla aka i patitirit leltun thomu nge mo o riri a God itheki. Na ia mla aken i sivenga rintet nge a Abel ia mla, eneke Abel ia mla i pavelpol a God ile paomelaling, aveto Jisas ia mla i pavelpol ler vothung kerenga eltetpotnga.

Aro te naktet it, aro vene mo te el a God ile paomelaling.

²⁵ Aro thomu o naktet thomu, na o mothong tova o lel kimomu nge a God aka ponange i sung ile riong a thomu nge. Eneke ar pompomere o nongpol a God ikei aka a tete a Sainai ake ru a ulue, na i sung ile panakaling a or nge, aveto o avsa ile riong aken, na o pavurvur aka aro o lo nge ile paomelaling avele. Na aro ve riong aken i nunganga, i nunganga rintet aka te pavurvur mun avele aro te lo ol nge ile paomelaling, tova ve te avsa ile panakaling aka i espot a Pen a Urvet me.

²⁶ Na nomenga nge wop lemi aken ikei i wir ulue, aveto i kin ol ile riong ve,

“Pa omole mun inga aro tho wir mun ulue, aveto aro ini inga ulue ienga avele, aro ulue na sepsa mun.” *Hagai 2:6*

²⁷ Na ile riong aka i ri ve, “pa omole mun inga” i mirenga ve, aro i eltetpot ur alavusnga areko i pamenu ir, ini ur areko o pavurvur aro o vaikik. Naro i oma vene mo ur areko o pavurvur aro o vaikik avele, aro o voth reletun ol aka aro ole vusonga avele.

²⁸ Maken aro te ri sivengaing a God nge, eneke te el ol ile menong e nepes aka i pavurvur aro i vaikik avele. Maken aro te lotual a God ranga ve aka i sis ve aro te oma i, naro te papomnga i na te risea i.

²⁹ Eneke ler God i ranga ve ini won sesenga aka i pavurvur nge ur alavusnga ongtunnga.

13

Vothung aka toko lemioongare aro o oma i.

¹ Thomu toko lemioongare aro omu sagu pel ranga ve ini titeinpelre.

² Na o mothong tova lomumu simikal longre onongpoonga, eneke nge vothung aka i venen aken toko pelie o nongpoo enselre, aveto olemi mire nge avele.

³ Naro lomumu rum areko o voth a mang a midenga lemi na lomumu esal or, ranga ve aka o voth tomo nge or. Na lomumu rum mun areko o el kerengaing a tokokoere omeni, ranga ve aka sivengomu o el sisisong aken tomo nge or.

⁴ Naro toko alavusnga o pavothal nge peangeong a vothung. Na toko eve seng peange aro i ngo tomo inga nge iewo ienga, eneke God aro i paomelal areko o ngo tomo nge areko or ini oewo avele, tomo mun nge toko na seng aomngare.

⁵ Naro thomu o voth gat nge umtun thesealnga a vothung, naro lomumu ngo pis inga nge lomu ur elonga aka i voth lale a menumu, eneke God i ri vene:

“Aro tho modop vet wong avele.

Naro tho lel kimek nge wong avele.”

Lo 31:6

⁶ Maken aro lemir engeng mo te ri ranga ve aka nepes a Devit i ri nge ve, “Toko Pomnga ini opoalngeka, naro tho ngeip avele.

Naro tokokoere o oma neke a tho nge, e?” *Buk Song 118:6*

Aro ler maral nge a Jisas ipanesnga avele.

⁷ Naro lomumu rum werer nge lomu lotu a mukalingare, aka o panongpol tel a God ile riong a thomu nge. Naro lomumu rum senu nge ole mimiong sivenga aka o mimi nge, i pavurvur nge ole rinong, naro o panes senu ole lemioong aken.

⁸ Eneke Jisas Krais i eksingu eksinga avele, i pavurvur nomenga, ponange na panen aka aro ile vusonga avele.

⁹ Naro o mothong tova osa womalo toko le apaltetongare mo o paleklek thomu

nge ole pamirealing pelekpolngare. Aveto i sivenga ako aro God aro i paengeng opomu nge ile themosaling, eneke i pavurvur aro opomu i engeng, tova thomu o an inga aning ako lotu i ri ve i sivenga nge annga, kene avele. Vothung aken ini ur polpolnga a God itheki.

¹⁰ Na Jisas i ranga ve ini ler sungong ako i eltetpot ler vothung kerengare, na areko rongan o panes a Moses ile patorong na o ongtun mekeremre ako a God ile lotuonga a sel, o pavurvur aro o el opoaling a Jisas nge, kene avele.

¹¹ Na Prisre oa Pomnga i ela mekeremre oa mla ma i eso a “Pen aka i Riri Rintet” mo aro i oma sungong nge vothung kerenga seltunnga, aveto mekerem areken oni peti o ongtun i aka a rem wopo.

¹² Na Jisas mun i venen aken, i el sisisong aka a rem wopo, a lalanga a lok thekia, na isivenga ia mla i pariri selele toko na sangre a God itheki.

¹³ Maken aro te es a i nge la, naro te voth gat nge areko rongan o panes a Moses ile patorong, naro te el inga ur areko oni silal it nge, ranga ve aka oni silal mun a Jisas, nge ile rinong.

¹⁴ Eneke ler rem pomnga aka aro ile vusonga avele, kene i voth ake ru a ulue avele, aveto te sis ve aro te eso nge rem pomnga aka aro i velpol panen.

¹⁵ Na ini a Jisas ienga inga aka i wola it a God nge la, maken aro te kis inga a God iriseanga ranga ve ini ler sungong aka a i nge. Naro te risea i vene: Aro te ri patpot ol ve, it ini a God ile.

¹⁶ Naro thomu o oma vothung sivenga a tokokoere nge, naro o opoal or nge ur areko o oror nge, na o mothong tova lomumu simikal vothung aka i venen aken, eneke ini ler sungong a God nge aka aro ilemi sivenga nge.

¹⁷ Naro o nongal lomu mukalingare ole riong, naro o voth a osa thewo. Eneke o theal senu thomu. Naro o theal senu thomu, eneke panen aro o mit a God theki, naro o ripatu ol i nge ole omaing aken nge thealngomu. Naro o nongal ole riong mo olemi sivenga nge ole omaing aken, na o mothong tova o sung matheong a or nge,

eneke vothung aken aro i opoal thomu avele.

Malueng patopalalnga.

¹⁸ Naro thomu o nong a God nge ve aro i opoal them, eneke them rov ur e avele aka i voth a lemimem, na them sis rintet ve aro lemem vothung alavusnga aro i vengveng inga.

¹⁹ Na tho ri engeng nge thomu ve aro o nong a God nge ve aro i opoal tho mo tho pavurvur aka aro tho velpol viri mun a thomu nge.

²⁰ Na tho nong a God nge aka ini lemi moring tepun. Na ini a God aka i palos werera ar Pomnga a Jisas nge rinong. Na Jisas ini toko aka i theal it ranga ve ini sipsip thealnga sivenga. Na ia mla i pavelpol a God ile riong kinnga ponganga aka aro ile vusonga avele. Na Jisas i oma venen aken, mako God i palos werera i nge rinong.

²¹ Na tho nong a God nge ve aro i sung ur sivesivengare a thomu nge mo o pavurvur aro o panes senu ur aka i sis ve aro o panes i. Na tho nong mun a i nge ve, aro i um engeng a lemire omole omole, aka nge ler teoong a Jisas Krais nge, mo te oma inga ur aka i sis ve aro te oma i. Naro te papomnga i evelelnga aka aro ile vusonga avele. I nunganga.

²² Na titeikre, tho ri engeng nge thomu ve aro o nongpol senu nge lek riong atike tho paengeng lomumu nge, eneke tho wat inga malueng orornga a thomu nge.

²³ Na tho sis ve aro lomumu mire aka ve, titeir a Timoti i vthopot nge mang a midenga lale, na aro ve i velpol virial a tho nge, them paini aro them es a thomu nge wot.

²⁴ Na tho pasungalu lek nang sivenga nge lomu mukalingare tomo mun nge a God ile tokokoe alavusngare. Na toko lemioongare ake ru a epee a Itali, o pasungalu mun ole nang sivenga a thomu nge.

²⁵ Na tho nong a God nge ve aro i sung ile themosaling a thomu alavusnga nge.

Na i re aken. I vus.

Malueng ako Jems i wat i Jems Ritetong nge a Jems

Ava Jems aka i wat malueng ake ini a Jisas iteinnga. Na ini mun i lotu a mukalinga aka a Jerusalem. (Pakeke 15:13) Na i wat malueng ake a toko lemioonga pelie aka or ini Judare. (1:1; 2:1) Na ur aolonga aka i voth a malueng ake lemi i vene: Toko e avele i pavurvur aka aro i ri inga aka ve, ilemio nge a Krais. Avele, ile vothung sivenga aro i pathengal tokokoere aka ve, ile lemioong aken i nunganga. Na aro ve vothung sivenga e avele i voth a ile mimiong, aken ile lemioong aken ini ur polpolnга. (2:26) Na tongporumong na matheong aka aro i velpoltun it, kene i pathengal mun it aka ve, ler lemioong aken i nunganga. (1:2-18) Aro te mothong tova te nongpol polpol Panongpolong Sivenga, aveto aro te panes i. (1:19-27) Jems i ri pompom nge vothung aka toko lemioongare aro o oma i, ranga ve aka aro te naktet ler riong, (3:1-12) naro te el mire aka ini Pen a Urvet anga, (3:13-18) naro te paruru sivenger nge vothung sivenga omanga, (4:1-17) aro vene mo aro te mit nge riong. (5:1-11) Na Jems ile patoraling i ranga ve ini a Jisas ile patoraling aka i voth nge a Matiu 5-7.

Aro te mit engeng nge tongporumong, maken aro God ilemi sivenga nge it

(Vonge 1:1-1:18)

¹ Tho a Jems, aka ini a God na Toko Pomnga a Jisas Krais ole umonga.

Na tho wat malueng ake a thomu toko na seng alavusnga aka o voth nge Israelre ole net or mule pa omole pothoi or aini, na o voth mela nge lomu rem tepun, ma o vra a pen elonga ake ru a ulue.

Na tho pasungalu mun lek nang sivenga a thomu alavusnga nge.

Ine tongporumong ini ur aka aro i pavengveng it.

² Titeikre, aro lomumu i sivenga rintet tova ve tongporumong rel relnga i velpoltun thomu,

³ eneke lomumu mire aka ve, aro ve lomu lemioong i mit engeng nge tongporumong areken, aken i pathengal aka lomu lemioong aken i nunganga, maken thomu o pavurvur aro o mit engeng evelelnga.

⁴ Maken aro thomu o mit engeng evelelnga mo aro i oma thomu mo aro thomu o voth ini tokokoe areko o motu rintet nge vothung riringa, naro thomu o oror nge vothung sivenga e avele.

Aro ve toko e i oror nge lemi rumong sivenga, aro i nong a God nge mo i sungu i a i nge.

⁵ Na aro ve omu e i oror nge lemi rumong sivenga, aken aro i nong a God nge aka ini God sungonga, maken aro i sungu inga a i nge, eneke God i sungu lemi rumong sivenga aken a or alavusnga aka o nong i a i nge, na ikei palil or nge avele.

⁶ Na aro ve wong nong, aro lomumo ve, God kene i sivenga, naro i sungu i a ong nge, na mothong tova lomum aini nge, eneke toko aka i nong na ilemi venen aken, i ranga ve ini thev le lolikong aka sa thuu thua i ma i ngo pis avele.

⁷ Na toko aka i venen aken i mothong tova ilemi ve, Toko Pomnga aro i sungu ur e a i nge. Aken aro avele.

⁸ Eneke ilemi omoletet inga a God nge avele, na ilemi ngo pis mun avele nge ile omaing elonga.

Areko ole ur elonga avele na areko ole ur elonga pom o vur e pel inga a God itheki.

⁹ Toko lemioonga areko ole ur elonga avele aro olemi ngo senu, eneke God i paesa oion roro tomo nge a Krais lale.

¹⁰ Na areko ole ur elonga pom aro olemi ngo senu nge aka o ranga ve ini toko vulunga a God itheki. Eneke ole mimiong i lollo avele, ranga ve ini kolkolung punpolnга aka i punpolna inga, lamako i movur werer mun.

¹¹ Na riong aken i nunganga, eneke nang i ina me, ma ivelvelnga i totun kolkolung punpolnга aken, ma i molit, mako ipunpolnга i matu, na ile sivengaing aka te thopol i nge, kene i kerenga. Na toko

le urngare kene o vene re aken, aro o penthal leltun ole ur elonga alavusnga ako o mostun omanga nge ole mimiong.

God i oma inga vothung sivenga nge it, na i tongporum it nge vothung kerenga omanga avele.

¹² Sapase toko aka i mit engeng nge tongporumong, eneke aro ve i mit engeng na ile mong tongporumong areken, aro i el mimiong aka aro ile vusonga avele, aken ini ile sungong vet aka God i kin ile riong nomenga lale ve aro i sungu i nge areko oa sagu i.

¹³ Aro ve tongporumong e i velpol a toko e nge ve aro i oma vothung kerenga, i mothong tova i ri ve, "Tongporumong ake i es a God nge me." Eneke ur e avele i pavurvur aka aro i tongporum a God ve aro i oma vothung kerenga. Na e mun e aka God i tongporum toko nge vothung kerenga omanga avele.

¹⁴ Aveto tongporumong i velpol a toko omole omole nge vene: Lemi rumong kerenga i mita a ilemi, ma ilemi altetpot nge omanga, mako i oma i.

¹⁵ Maken aro ve lemi rumong kerenga aken i tea a toko ilemi, aro i papel vothung kerengare. Na aro ve vothung kerenga areken i motu aro i papel rinong.

¹⁶ Titeik areko ok sagu thomu, o mothong tova o nongal riong aka o ri ve, "God i sung tongporumong a tokokoere nge" aken aro i patelek thomu.

¹⁷ Na sungong alavusnga areko o sivenga na o riri, kene o esu a Pen a Urvet me, na o esu a God nge me aka i pamens pen lalanga alavusnga aka a sepsa. Na ini a God aka i eksing avele, na i eksing mun ranga ve ini mlil aka i eksingu eksinga, kene avele.

¹⁸ Na nge isivenga ilemi vet i pavelpol ol it mo ini itutunre nge ile riong nunganga aka i sungu i a it nge. Na i oma it vene aken mo aro te mukal nge ur alavusnga aka i pamenu ir oelwerenga mo ini ile ol.

Aro ve ler lemioong i nunganga nge a God, aro te oma mun vothung sivenga

(Vonge 1:19–5:6)

Aro te panes riong, na te mothong tova te nongpol polpol i.

¹⁹ Titeik areko ok sagu thomu, aro lomumu rum senu nge lek riong ake. Aro thomu o paviri nge aka aro o ta telngomu, na o mothong tova o ases virialpot lomu riong, naro o mothong tova lomumu kling viri viri.

²⁰ Eneke toko ile lemi klingong i pavurvur avele aka aro i pavelpol vothung vengvenga aka God i sis ve aro te oma i.

²¹ Maken aro thomu o modop lomu vothung akromnga tomo nge ni silalpeking aka thomu pulua o oma i. Na o paesu thomu ruru, na o elo riong aka God i o i lale a opomu lemi, eneke ini riong aka i pavurvur aro i pamimi thomu.

²² Maken aro thomu o nongal riong aken. Na aro ve thomu o nongpol inga riong na o panes i avele, aken kene lomu apaltet sivengomu,

²³ eneke toko e aka i nongpol inga riong na i panes i avele, kene i ranga ve ini toko aka i thepol isivenga itheki lemi nge thealuonga.

²⁴ Ma i thepol itheki lemi ma vus, ma i es na a ur e avele, nako ilemi simikal werer mun itheki lemi aken kene i vava ol.

²⁵ Aveto toko aka i thepol senu patorong aka i alarorol, aka i pavthopot tokokoere, na i pesrou nge omanga avele, na ilemi simikal ur aka i nongpol i avele, aveto i oma ir, aken kene God aro i pamens senu toko aken nge ile omaing alavusnga.

²⁶ Aro ve toko ilemi ve i panes senu lotu, aveto i naktet senu ile mumavele, aken kene ile apaltet isivenga, na ile ni sisiong nge lotu panesnga, aken kene ini ur polpolnga.

²⁷ Na lotuong panesnga aka i riri rintet, na i nunganga a Titemer a God itheki kene i vene: Aro te opoal patungtungere tomo nge basbasuere nge ole matheong. Na e mun e aka aro te naktet ler mimiong, aro vene mo vothung ulue anga i pamatu it.

¹ Titeikre, lomumuo nge ar Pomnga a Jisas Krais na o papomnga rintet i. Na o mothong tova o paroro toko pelie na o paruru pelie.

² Na aro ve toko le urnga e ako i teun malmaling ako iolonga roro na i es me mo i lotu tomo nge thomu, na toko le ur avelenga mun e ako i teun ur minriranga i eso mun me,

³ na aro ve thomu o naktet senu toko ako ia malmaling i sivenga rintet mo aro o ria i ve, "Aro wong menu nge menonga sivenga ake." Na aro ve thomu o ria toko le ur avelenga aken ve, "Aro wong mit inga ako la," eve "Aro wong menu inga a ulue totho a ekek tepun."

⁴ Na aro ve thomu o oma vothung ako i vene aken, akennga lomu vothung nge tokokoere i vur e pel avele, ma thomu o omreu sivengomu nge lomu lemi rumong kerenga aken.

⁵ Titeik areko ok sagu thomu, aro thomu o nongpol! Lomumu mire ako God i ateal toko le ur avelengare ake ru a ulue, ve aro o velpol ranga ve ini toko le urnga nge ole lemioong, na i ateal mun or ve aro o eso a God ile menong e nepes ako i kin ile riong nomenga lale ve aro i sungu i nge areko oa sagu i.

⁶ Aveto thomu o paruru toko le ur avelenga areken. Aveto ini toko le urnga areko o sung matheong a thomu nge ma o pamit thomu nge riong!

⁷ Na ini toko le urnga mun inga areko o ri tangatun nge a Toko Pomnga iion sivenga ako thomu ini ile.

⁸ Aveto i sivenga tova ve thomu o panes patorong avera ako i voth a God ile erere nge ako i ri ve,

"Aro om sagu toko alavusnga

ranga ve aka om sagu mun siven-gom." *Wok Pris
19:18*

⁹ Aveto aro ve thomu o paroro toko pelie, na o paruru pelie, akennga thomu o matu nge vothung kerenga lale, na Moses ile patorong i teltun omu aka thomu ini patorong avsangare.

¹⁰ Na i vene ake, eneke toko e aka i panes patorong alavusnga, ave i avsa inga patorong omole inga, aken i matu lale

ranga ve aka i avsa patorong alavusnga lale.

¹¹ Na lek riong aken i nunganga, eneke God aka i ri ve,

"Thomu o mothong tova o ngo tomo nge areko or ini ewomu avele." *Lo 5:18*

I ri mun ve,

"O mothong tova o so rin polpol toko." *Lo 5:17*

Na aro ve wong ngo tomo nge toko rel-naga iewo avele, aveto wong so rin polpol toko, akennga wong avsa patorong lale.

¹² Na i sivenga aka aro thomu o naktet lomu vothung na lomu riong alavusnga, eneke aro thomu o mit nge riong mo aro God i olal i a thomu nge, nge aka thomu o panes patorong aka i pavthopot thomu.

¹³ Naro thomu o oma venen aken, eneke toko e aka i themosal tokokoere avele, panen tova i mit nge riong, God aro i themosal mun i avele, naro i sung inga paomelaling a i nge, aveto themosaling a vothung, kene i pavthopot toko nge a God ile paomelaling.

Aro ve lemioong i es tomo nge vothung sivenga omanga avele, aken ini ur polpol-nga.

¹⁴ Titeikre, aro i vava, aro ve toko e i ri ve, "Lek lemioong i voth," aveto i oma vothung sivenga avele, ile lemioong aken i pavurvur aro i pamimi ol i eve avele?

¹⁵ Aro ve titeir eve lulur lemioonga e i oror nge teunong na aning,

¹⁶ na aro ve omu e i ria i ve, "Nak lom esong ti la. Naro mesi pun ong avele, naro num merir mun avele." Aveto i sungu ur areko aro i opoal ile mimiong avele, aro ile riong aken aro i opoal i vava?

¹⁷ Na i vene mun nge lemioong, aro ve toko e i ri ve ile lemioong i voth, aveto ile vothung i panes ile lemioong avele, nge vothung sivenga omanga, aken kene ile lemioong aken i rin lale.

¹⁸ Na ava toko e aro i ri vene, "Toko e ile lemioong i voth, na toko mun e ile vothung sivenga i voth."

Aro tho olal riong aken ve, "Aro ve lo-mumo inga na wong oma vothung sivenga mun avele, aken aro lemik mire ol nge lom lemioong vava? Aveto lek vothung

sivenga aro i pathengal wong ako lek lemioong i nunganga.”

¹⁹ Na lomumu mire ve God omole inga ako i voth. Ur mun e avele, eneke tamata kerengare or mun olemio mun venen aken, ma saluk or.

²⁰ Wong ini ngongong! Wong sis ve aro tho patheng vengveng i a ong nge ako ve, aro ve lom lemioong inga i voth, na wong oma vothung sivenga mun avele, aken lom lemioong aken kene ini ur polpolnga inga?

²¹ Na i vava nge titevir a Abraham ako i voth nomenga, e? I nongal a God, nge ako i kin itun a Aisak ma i ronga i a sungong a lekleka nge mo ini ile sungong.* Na God i thopol ile omaing aken, mako i apet i ve ini toko vengvenga.

²² Aro lomum mire senu ako, Abraham ile lemioong i um tomo nge ile vothung sivenga. Na ile vothung aken i pathengal i ako ve, ile lemioong aken i nunganga.

²³ Ma i velpol ranga ve aka God ile erere i ri nge, aka i ri vene,

“Abraham ilemio nge a God,
mako God i apet i ve ini toko
vengvenga.” *Stat 15:6*

Mako o apet a Abraham ini a God ithanga.

²⁴ Maken aro lemir mire senu aka ve, God i apet toko ini toko vengvenga nge ile vothung sivenga omanga, na nge ile lemioong aka i voth polpol, kene avele.

²⁵ Na i vava nge seng sovengalo anga aka ini a Rahap? I vene mun re aka God i apet i ve ini seng vengvenga nge ile vothung sivenga aka i nongpoo Israelre ole pen rengare, ma i opoal or mo aro o lo ol nge sovengalo relnga e.

²⁶ Maken aro ve toko aka ini peti inga, na ion i voth avele, aken i rin lale. Na i ranga ve mun nge lemioong, aro ve lemioong inga, na vothung sivenga i voth tomo nge avele, aken i rin mun lale.

3

Aro te naktet senu wor nge riong.

¹ Titeikre, aro thomu pulua o mothong tova o velpol ini pamirealongare, eneke

lomumu mire aka ve, them areko ini pamirealongare, God aro i avrum lemem vothung, na ile avrumong aken aro i aolo leltun toko polpolngare ole.

² Na tho ri vene aken, eneke it alavusnga te matu nge vothung rel relnga pelie. Aveto aro ve toko e i naktet ile riong alavusnga, aken ini toko vengvenga aka i pavurvur aro i naktet mun ile vothung alavusnga.

³ Na aro ve te sis ve hos aro i panes inga aka ini lemir, aro te kino we a iwo, na nge sovengalo aken te pavurvur aka aro te paes ilopat alavusnga nge pen kathnga aka te sis ve aro te es nge la.

⁴ Naro lomumu rum mun nge imot, ini ur aka i aolonga rintet, na thue engenga inga aka aro i patho i a thev stha, aveto sauthonga aka i patho vengveng imot ini ur aka i tunti. Aveto imot pathonga i pavurvur aka aro i paes imot aken nge wop kathnga aka i sis ve aro i es nge.

⁵ Na i ranga ve ini mun i nge ler muma, ini nir peti epee aka i tunti, aveto i pavurvur aka aro i risea nge ur aoliloenga. Naro lomumu rum mun won mikeri inga aka i pavurvur aka aro i ongris kleng epee aolonga e.

⁶ Na ler muma i ranga ve ini won sesenga. Na i ranga ve aka vothung ulue anga elonga i voth a i nge. Na ini nir peti epee omole mun e aka, aveto i pakerenga ler mimiong alavusnga ranga ve ini won sesenga aka i ongtun kleng alavusnga. Na won sesenga aken kene Satan i papola i.

⁷ Na mekerem elonga aka ranga ve ini men, na mekerem areko o re nge oopo, na silangre, or alavusnga tokokoere o pavurvur aka aro o popolul or,

⁸ aveto toko e avele i pavurvur aro i oma venen aken nge ile muma. Evelelnga i sesa ses nge riong kerenga omanga, na i ranga ve ini pilimo aka iwo ei i kerenga.

⁹ Na nge ler muma te oma riong aka te paesa Toko Pomnga iion nge, aka ini Titemer, na nge ler muma mun kene te ri tangatun nge tokokoere, na or ini areko God i pamien or nge isivenga ia sei.

* ^{2:21}: O thepol a Stat 22:9-12.

¹⁰ Na riseaing a riong tomo nge ri tangatunong a riong, or alaini o espot inga ako a pen omole ako ini wor. Titeikre, i mothong tova i venen aken.

¹¹ Na nge thei povovloainga omole kene i pavurvur aro thei sivenga tomo nge thei welwelnga aro o lel tomopot nge me avele.

¹² Titeikre, i pavurvur ako aro vero aro i mon mo i pavelpol vuvi? Eve ine wain aro i mon mo i pavelpol vero? Avele! Na i pavurvur mun ako aro thei sivenga na thei kerenga aro o lel tomopot nge thei povovloainga omole, kene avele.

Mire sivenga ako i esu a God nge me.

¹³ Anga a thomu nge ilemi ve ini toko ako ile lemi rumong i sivenga ma ile mire i nine, e? I sivenga aka toko aken aro i pathengalpot ile omaing a tokokoere nge, aka ranga ve ini ile vothung sivenga aka i oma i, nge aka i paruru isivenga, na i panes lemi rumong sivenga.

¹⁴ Aveto aro ve opom lemi i vual nge thesealing nge mukaling a menong, na nge riong welwelnga, na nge sivengom thealngom, mothong tova ong pasea sivengom nge, aro vene mo lom apaltet nge a God ile riong nunganga.

¹⁵ Na vothung aka i venen aken, aka thomu o apet i ve ini lemi rumong sivenga, kene i esu a Pen a Urvet me avele, ini ulue anga vet aken, na Oni Riringa i pavelpol i avele, ini tamata kerenga areko o pavelpol i.

¹⁶ Tho ri venen aken, eneke pen aka vothung nge thesealing nge mukaling a menong, na sivengom thealngom o vothung nge, kene men kerereong na vothung kerenga elonga o voth mun nge.

¹⁷ Aveto tokokoe areko o el lemi rumong sivenga aka i esu a Pen a Urvet me, aro o oma vothung aka i vene: Vothung aka i mukal nge vothung elonga i vene: Aro lemire omoletet inga nge vothung riringa omanga. Naro te men senu tomo nge tokokoere, naro te panes mosing a vothung, naro te nongal riong, naro te vual nge themosaling aka aro i pavelpol imonnga sivenga, naro te paruru toko pelie na te paroro pelie, kene avele, naro te panes neoong a vothung avele.

¹⁸ Areko o men senu, na o engeng nge men senupeling, o pavelpol vothung vengvenga nge tokokoere.

4

Toko aka ia sagu vothung ulue anga ini a God ile ngarang.

¹ Na ur nekenga i patea punpeeling nge riong, na volpeeling aka ru a thomu nge, e? Aken ini lemi rumong kerenga aka i virpol ma i pun tomo pel nge lemi rumong sivenga.

² Na thomu o sis rintet ur puluanga elnga, aveto thomu o el vet i avele. Na thomu o so rin toko, na o theseal ole ur, aveto thomu o pavurvur nge ur aken elnga avele. Na thomu o vol pel na o patea sisoing nge ur pelie elnga, aveto thomu o el i avele, eneke thomu o nong a God nge avele.

³ Na nge aka thomu o nong nge ur e, thomu o el vet i avele, eneke lomumu i sivenga nge avele, aka ranga ve thomu o sis ve aro o papomnga inga lomu lemi rumong kerenga nge.

⁴ Thomu o mothong a God lale, ranga ve ini seng aka i mothong iewo, na i ngo pelekpol tomo nge toko elonga. Lomumu mire senu ol aka ve, toko aka ia sagu vothung ulue anga, akennga ini silal a God. Maken toko e aka i panes vothung ulue anga ranga ve aka i panes ithanga, akennga i velpol ini a God ile ngarang.

⁵ Naro thomu o mothong tova lomumu ve, riong aka God ile erere i ri nge kene ini ur polpolnga, aka i ri vene: “God ilemi i engeng rintet nge iona aka i pango i a it nge.”

⁶ Aveto God ile themosaling aka i sungu i a it nge, kene i engeng rintet. Maken God ile erere i ri vene,
“Na God i paesu areko o paesa oion roro.

Aveto i sungu ile themosaling
nge areko o paruru or.” *Gutpela Sindaun 3:34*

⁷ Maken aro thomu o paesu thomu ruru a God isa thewo. Aro thomu o mothong a Satan ile tongporumongre, maken aro i lolpot thomu.

⁸ Aro thomu o eso totho a God nge, naro i eso totho a thomu nge. Na i sivenga aka

aro thomu toko le vothung kerengare aro thomu o pariri thomu. Na thomu toko lemi aini ainingare aro thomu o eksing mo lomu lemi rumong i omoletet inga a God nge.

⁹ Naro lomumu kerere na o tang nge lomu vothung kerengare. Na thomu tokokoe areko o ngenge sise, aro lomu ngenge siseong i eksing mo thomu o tang ol. Na thomu areko o men senunge lomu vothung kerenga, aro thomu o mothong ol lomu men senuong aken, naro lomumu kerere ol nge lomu vothung kerenga areken.

¹⁰ Naro thomu o paesu sivengomu a Toko Pomnga itheki, aken aro Toko Pomnga aro i paesa thomu roro.

Aro te mothong tova te oma riong kerenga nge thengengerre.

¹¹ Titeikre, o mothong tova keumu paenal pel. Na aro ve toko e ikei paenal itein eve i avrum ile vothung, akennga ikei paenal nge a God ile patorong na i avrum ile patorong aken, aka kathnga i sivenga. Na aro ve ong avrum a God ile patorong venen aken, akennga wong panes i avele, aveto ong paesu patorong aken nge aka ong avrum kathnga nge aka i sivenga.

¹² Na God ienga inga aka i sung patorong a it nge me, na ienga mun inga ini riong nongpolnga aka i pavurvur aro i pamimi toko, eve i pakerenga toko. Aveto wong, wong ini ao aka ong avrum thongongomre ole vothung, e?

Te mothong tova lemir simikal a God nge ler omaing elonga.

¹³ Thomu o nongpol, thomu tokokoe areko o ri ve, "Ponange eve lelken aro te pe nge rem e aka mo te voth nge tovu po omole, naro te kath sovengalo pelie aka aro te el umtun puluanga nge."

¹⁴ Na thomu o ri venen aken, aveto lomumu mire nge lomu mimiiong aka ve, lelken aro i vava? Lomu mimiiong i ranga ve ini songen aka aro i velpola na palolo avele, nako i penthal werer mun.

¹⁵ Aveto i sivenga aka aro thomu o ri inga ve, "Tova ve Toko Pomnga i sis ve aro

te oma vene, aro te mimi palolo mo aro te oma venen aken."

¹⁶ Aveto ponange thomu o risea thomu nge lomu magoning aken, aveto riseaing areko i venen aken ini vothung kerenga.

¹⁷ Maken aro ve toko e ilemi mire nge vothung sivenga e aka i sivenga aka aro i oma i, aveto i oma i avele, akennga ini vothung kerenga re aken.

5

Panakaling a riong nge toko le urninga areko ole vothung kerenga.

¹ Thomu toko le urningare, thomu la, aro thomu o tang na o wal nge kerengaing aka aro i esa a thomu nge.

² Lomu ur elonga aro i keimu re, na omu teunongre inanre aro o atiti ir.

³ Na lomu umtun alavatharnga aka o oma i nge gol ome silva, ine lumlum aro i tea ol nge. Na ine lumlum areken ru aro i pathengalpot lomu vothung kerengare,* naro i an vustetu numu peti ranga ve ini won sesenga. Na nang le vusonga i velpol lale, ave thomu o vura vura ol nge ur elonga paen tomoalnga ol.

⁴ Na thomu o nongpol, nomenga thomu o pake toko umongare ma o lel omu ometa. Aveto thomu o ol or avele. Na o thepol vet nge ole pareking aken, ma i eso a God aka ini Pen a Urvet a punongare oa Pomnga itelnga lale.

⁵ Na nge lomu mimiiong ake ru a ulue, thomu o el ur sivesivengare, na thomu o opoal inga sivengomu nge lomu menong le sivengaing. Na thomu o paan sivengomu, mola enongomu i aolonga, mo i vengtunu ol nge nang aka aro o so rin ol thomu nge.

⁶ Na thomu o teltun toko vengvengare oa, ma o so rin polpol or, na tokokoe areken o oma ur pelie avele a thomu nge.

Aro te mit engeng, na te nong a God nge, na aro te men sial nge a Toko Pomnga ile lo wererong me

(Vonge 5:7-20)

* ^{5:3:} Lumlum aro i pathengalpot ole vothung kerenga, eneke ole umtun i ngo polpol inga na o opoal tokokoere nge avele.

Aro te mit engeng na te potun matheong i pavurvur ako la Jisas aro i lo werer.

⁷ Maken titeikre aro thomu o men punapo inga na o el inga matheong mola i pavurvur nge a Toko Pomnga ile lo wererong me. Naro lomumu rum aka ve, toko aka i o ur elonga a ometa, i pakinkinal avele na i punapoaltun inga vit, makola i pavurvur nge aka la ometa lemia i motu ma o pavelpol ol oenanga sivesivengare.

⁸ Na thomu mun aro o punapo na o mit engeng, eneke nang aka aro Toko Pomnga i lo werer nge me, i toth me lale.

⁹ Na titeikre, o mothong tova keumu paenal pel, aro vene mo God aro i pamit thomu nge riong. Na riong nongpolnga aken, i ake i tothtuno it lale.

¹⁰ Titeikre, aro lomumu rum werer nge aka nomenga God ile riong elngare o panongpol nge a Toko Pomnga iion, na o men punapo inga nge matheong elnga, na i sivenga aka aro thomu o oma ranga ve ini or.

¹¹ Na lomumu mire aka te ri ve, sapase areko o mit engeng nge matheongre lale. Na thomu o nongpol lale nge a Jop ile mit engenging nge matheongre aka i velpoltun i, na lomumu mire mun lale nge ur sivenga aka Toko Pomnga i oma i a i nge tova matheong areken i vus. Maken aro lemire mire nge aka, Toko Pomnga ilemi esal rintet it na i themosal it.

O mothong tova o olotet tokokoere nge lomu riong.

¹² Titeikre, ur aolonga mun e aka aro thomu o oma i kene i vene: O mothong tova o apet Pen a Urvet iion, eve ulue, eve ur pelie mun mo aro o paengeng lomu riong nge. Aro ve thomu o ri ve, “Ena” akennga aro i mirenga aka ve, “I nunganga.” Na aro ve thomu o ri ve, “Avele” akennga aro i mirenga aka ve, “Avele” aro vene mo God aro i teltun omu.

Toko vengvenga ile nongong kene ile engenging i voth.

¹³ Na omu anga e i voth tomo nge lemi kerereong, e? I sivenga aka aro i nong a God nge. Na omu anga e ilemi ngo senu, e? I sivenga aka aro i vo riseaing a voing a God nge.

¹⁴ Na omu anga e ini multhang, e? I sivenga aka aro ikei song lotu a mukalin-gare aka ole lemioong i motu, mo o es me, naro o nong ile na o taultun ini peti nge wel nge a Toko Pomnga iion.

¹⁵ Na aro ve o nong na ole lemioong omoletet inga a God nge, aro ole nongong aken aro i pamimi ni multhanginga aken, naro Toko Pomnga aro i palosa i. Na aro ve ile vothung kerenga i voth, na i pamilempot i, God aro ilemi simikal i.

¹⁶ Maken aro thomu o pamilem pel nge lomu vothung kerengare, naro thomu o nong pel epee epeenga, maken God aro i pasenu werer thomu. Eneke toko vengvenga ile nongong, kene i engeng rintet nge ur aka i pavurvur aro i oma i.

¹⁷ Na Elaija ini toko neneanga ranga ve ini it. Ma i nong engeng a God nge ve aro vit i mothong tova i molu, mako vit i molu avele a ulue, nge tovu po or me na ngov or limae.

¹⁸ Lamako i nong mun a God nge, mako vit i molu mun a sepsa me ma ur oingare o plo werer mun ma o mon.

¹⁹ Titeikre, aro ve omu e i leklek nge riong nunganga panesnga, na omu e mun e i pavengveng werer mun i,

²⁰ aro toko aken ilemi mire nge aka ve: Aro ve toko e i pavengveng toko le vothung kerenga e nge ile leklekong aken, akennga i pamimi toko aken nge rinong, na God aro i pasopal ile vothung kerenga puluanga aken.

Na i re aken. I vus.

Malueng teltelnga aka Pita i wat i 1 Pita Ritetong nge a 1 Pita

Pita i voth a rem pomnga aka i apet i ve ini “Babilon” ma i wat malueng aka. (5:13) Na toko pelie olemi ve i ri nge Babilon nunganga aka i voth a epee a Mesopotemia. Ave toko pelie olemi ve, Pita i ri riong agelalnga aka i apet rem aka i voth nge ini a “Babilon”, eneke i vual nge vothung kerenga. Na olemi ve, rem nunganga i voth nge ini a Rom eve Jerusalem eve rem omole aka ru a epee a Isip. Pita i pasong malueng aka nge areko o lo vra nge ole pen ma or ini loomere nge pen pelie, (1:1) aka Kristenre o el matheong nge. Pita i sis ve aro i paengeng Krais ile tokokoe areko o el kerengaing nge toko kerengare. (1:6; 2:8-26; 3:13-17; 4:6-19) Na Pita i ri ve, matheong areken o velpoltun it mo aro i tongporum ler lemioong mo i pathengpot aka ve, ler lemioonga aken i nunganga. (1:6-7) Pita i pator it ve, aro te panes vothung sivenga aka Jisas i oma i, nge aka i el sisisong venen aken. (1:3-5; 1:13; 4:7) It ini a God ile tokokoere, (2:9-10) maken aro te mimi ranga ve aka it ini a God ile, na aro ve matheong i velpoltun it, aro te oma inga vothung sivenga, naro te mit engeng nge ler lemioong. Aken ini riong aolonga aka i voth a malueng aka lemi.

It ini a God ilengare, mako te oma vothung sivenga, naro te men sial nge ur sivesivengare aka aro te el i

(Vonge 1:1-2:10)

¹ Tho a Pita, tho ini a Jisas Krais ile pakeke.

Tho wat malueng aka a thomu areko God i ateal thomu ve ini ile, na o lo vra nge lomu pen a Israel na o voth ini loomere a epee a Pontus, Galesia, Kapadosia, Esia na Bitinia.

² Na ar Vovo a God i ateal thomu, ranga ve aka nomenga ilemi ve aro i oma i, na i pavelpol thomu ini toko riringare, aka nge Ioni Riringa mo aro thomu o nongal a Jisas Krais, naro ia mla i tiptip leltun thomu mo aro i pavthopot thomu nge lomu vothung kerenga.

Na tho nong ve aro God ile themosaling na ile lemi moring aro i vual rintet a thomu nge.

Ler men sialing nge mimiong Pen a Urvet anga i paengeng it nge matheong potunnga.

³ Aro te risea a God aka ini ar Pomnga a Jisas Krais Itema, eneke i themosal rintet it, mako i sung mimiong ponganga a it nge, aken te men sial ol nge ur areko aro i sungu i a it nge aka aro ile vusonga avele. Naro ile vusonga avele, eneke Jisas Krais i los werera nge rinong.

⁴ Na i themosal it venen aken mo aro te el ol ile ur sivesivenga areken aka i pango total i nge it aka a Pen a Urvet. Na ur areken, i pavurvur aro ur e avele i pakerenga ir, na ur e avele aro i paakop ir, na ile sivengaing aro i vus avele.

⁵ Na nge lomu lemioong, God i paseral thomu nge ile engenging mo aro thomu o el sele mimiong aka aro i pamimi ol tokokoere nge. Na i monsi lale ve aro i pango pat ol ile pamimiong aken nge nang le vusonga.

⁶ Na thomu o risea rintet nge ur areken. Aveto matheong pelekpolngare aka thomu o el i ponange, na lelle inga atike na o el sisisong nge, kene i pavurvur aro i pakerenga lomu riseaing aken avele.

⁷ Na tongporumong areken o velpoltun thomu mo i pathengal aka ve, lomu lemioong i nunganga. Na o tongporum mun gol venen aken aka o paeso i a won sesenga nge mo i pavelpol ile sivengaing. Aveto nge a God itheki, lomu lemioong i sivenga rintet nge gol aka aro i voth palolo avele. Na tongporumong aro i velpol a thomu nge venen aken mo lomu lemioong aro i mit engeng, aken nge nang aka Jisas Krais aro i velpol pat ol, aro i risea na i paesa thomu nge lomu lemioong aken, na

ia malmaling a urvet aro i sung mun i a thomu nge.

⁸ Na thomu o thepol i rongan, aveto rongan omu sagu i, na ponange mun ake rongan thomu o thepol i avele, aveto rongan lomumuo a i nge, mako thomu o vual rintet nge riseaing, na riseaing aken o pavurvur aro o patongrum i nge ur ulue anga e avele.

⁹ Na thomu o risea venen aken, eneke ponange ol ake thomu o el ol lomu lemioong monnga ako ini lomu lemioong motunga ako ini pamimingomua.

¹⁰ Na God ile riong elnga areko o ritet nge pamimiong aken ako aro i sungu i a thomu nge ako nge ile themosaling, na o kathu katha rintet mun nge pamimiong aken ile velpoling aro i vava aka a God ile erere nge.

¹¹ Na nomenga Krais Ioni aka i voth a olemi, kene i ritet tel a mukaling nge sisong aka aro Krais aro i el i panen, na nge ia malmaling a urvet aka aro i el mun i a rumongaling me. Na olemi rumu ruma Oni Riringa ile riong aken nge a Krais ile velpoling, naro i velpol penva.

¹² Na God i pango pat i a or nge ve, ur areko osivenga o ritet nge, kene aro i velpol nge nang aka o mimi nge avele, aveto aro i velpol ol a thomu nge. Na ranga ve ponange ol i velpol ol a thomu nge lale, nge aka o panongpol thomu nge Panongpolong Sivenga aka nge Oni Riringa ile engengeng aka God i pakeu i a Pen a Urvet me. Na ur aka o ritet i a thomu nge lale, ensel munre o sis ve aro olemi mire nge.

God i leng it ve aro ler mimiong aro i riri a itheki.

¹³ Maken aro thomu o naktet senu lomu lemi rumong, na o theal senu lomu mimiong. Na o men sial ol inga nge pamimiong aka Jisas Krais aro i sungu i a thomu nge, aka nge ile themosaling, nge aka aro i velpol pat ol.

¹⁴ Na nomenga lomumu mire nge a God avele, na o panes inga vothung kerenga, aveto ponange thomu ini a God itutun areko o nongal ile riong, na o mothong tova o panes werer ol lomu lemi rumong kerenga areken.

¹⁵ Aveto lomu vothung alavusnga aka o oma i, aro i riri a God itheki, ranga ve aka God ienga aka i ateal thomu mo ini ile kene i riri.

¹⁶ Eneke God ile riong i ri vene,
“Aro thomu o velpol ini toko riringa,
eneke tho ini God riringa.” *Wok Pris 11:44-45; 19:2; 20:7*

Olonger aka God i ol werer it nge kene i roro rintet.

¹⁷ Na nge aka thomu o nong a God nge, o apet i ve ini, Vovo. Na ini a God aka aro i avrum toko alavusnga ole vothung, na ile avrumong aken i vur e pel inga, naro i panes inga vothung aka toko omole omole o oma i. Aken aro thomu o mimi tomo nge lomu ngeipong nge i, nge lomu mimiong ol ake ru a ulue, aka ranga ve o voth ini longre nge pen aken.

¹⁸ Naro o mimi venen aken, eneke lomumu mire mun aka ve, God i ol wererpot thomu nge lomu mimiong aka o elespot i a titovumuere nge aka imonnga avele. Na i ol thomu nge ur aka i kerenga virial ranga ve ini gol na silva, kene avele,

¹⁹ aveto i ol thomu nge ur aka iolonga i roro rintet naro i penthal avele, aka ini a Krais ia mla. Na Krais i ranga ve ini sipsip itun aka ur kerenga e avele i teo a i nge, aka o so rin i mo o oma ole sungong a God nge.

²⁰ Na God i pamens ulue rongan na i ateal a Krais lale ve aro i rin venen aken, aveto nge nang patopalalnga areke te voth nge ponange, God i pango pat a Krais lale ve aro i opoal thomu.

²¹ Na nge a Krais ile omaing aken, lomu lemioong i voth ol nge a God aka i palos werera i nge rinong, na i sung malmaling a urvet a i nge. Maken lomu lemioong i engeng ol nge a God, na o men sial ol nge ur aka God i kin ile riong nge lale.

Aro ar sagu rintet pel.

²² Na lomu mimiong i riri a God itheki lale, eneke thomu o nongal a God ile riong nunganga nge a Jisas lale, mako o pavurvur aro o sung asaguong nunganga a toko lemioongare nge, maken aro omu sagu pel tomo nge lomumu alavusnga.

²³ Eneke thomu o el mimiiong ponganga lale. Na ini mimiiong ako titomomue ulue angare o pavelpol i avele, eneke mimiiong aken kene aro i voth palolo avele. Ini mimiiong ako aro ile vusonga avele, eneke God ile riong aka i sung mimiiong naro ile vusonga avele, kene i pavelpol i a thomu nge.

²⁴ Na riong aken i nunganga, eneke God ile riong i ri vene,

“Toko alavusnga o ranga ve ini pilil
ako nang i in i ma i voth palolo avele.
Na tokokoere oa malmaling ile siven-
gaing
i ranga ve ini won punpolnga
ako i punpolpot inga, nako i
movurpot werer.

²⁵ Aveto Toko Pomnga ile riong i voth,
naro ile vusonga avele.” *Aisaia 40:6-8*

Na riong aka God ile riong ake i ri
nge kene ini Panongpolong Sivenga aka o
panongpol thomu nge lale.

2

¹ Na thomu o el mimiiong ponganga lale, maken aro thomu o modop vothung kerenga elonga ranga ve ini le apaltetong alavusnga, na siveneaing nge vothung sivenga, na ni silaling nge areko ole ur elonga pom, na ri moluplupong alavus-
naga.

² Naro thomu o betet nge a God ile riong inga elnga ranga ve ini povothvoth areko o maneu ol or, ma oa pun rintet nge susuong, mo aro thomu o motu nge lomu mimiiong ponganga, i mulal nge nang aka aro God i pamimi selele ol thomu nge.

³ Naro thomu o oma venen aken, eneke thomu o tongporum a Toko Pomnga lale, ma i sivenga ol a thomu nge.

*Toko lemioongare o ranga ve ini um aka
God i aria ile vel nge.*

⁴ Na nge aka thomu o es a Toko Pomnga nge, o es a i nge ranga ve aka ini um aka mimiiong i voth nge aka tokokoere o siv lelpot i, aveto a God itheki ini um a urvet aka iolonga i roro rintet, mako i ateal i ve aro i aria ile vel nge.

⁵ Na nge aka o es a i nge venen aken, thomu mun o ranga ve ini umre aka mimiiong i voth nge, na God i veliloalo

thomu mo Ioni i aria ile lotuonga a vel nge thomu. Na i oma venen aken mo aro thomu o velpol ranga ve ini ile pris riringare mo o sung lomu sungong aka Oni Riringa i pavelpol i a lomumu nge. Na God ilemi sivenga nge lomu sungong areken, eneke thomu o teo a Jisas Krais nge.

⁶ Na ur areken i nunganga, eneke God ile riong i ri vene:

“O nongpol! Tho ateal nepes omole lale,
na i ranga ve ini um a urvet
ako i olonga i roro rintet
na i toth aka aro tho pangoa i a tete a
Saion
ranga ve ini um aka i paengeng
vel ile mitong,
ranga ve ini wovek sapatanga.
Na toko aka ilemio nge i,
aro i el le maraing nge i avele.” *Aisaia 28:16*

⁷ I nunganga aka God i paroro thomu areko lomumuo nge a Jisas aka ini um a urvet aken. Aveto nge areko olemio nge i avele, God ile erere i ri vene:

“Na um aka vel aringare o siv lelpot i,
i kene i velpol ini um aka i paengeng
vel ile mitong,
ranga ve ini wovek sapatanga,
ma i mukal ol nge um alavusnga
areken.” *Buk Song 118:22*

⁸ Na God ile erere i ri mun ve:
“Ini um aka ini tokokoere oeve le titonga,
na ini ur aka aro i pamatu tokokoere.”

Aisaia 8:14

Na o matu ranga ve aka God i ateal or nge, eneke o nongal a God ile riong avele.

⁹ Aveto God i ateal thomu ve aro ini ile tokokoere, na thomu ini ler nepes a God ile prisre, na thomu ini tokokoe areko o riri, aka God isivenga i lengpot thomu mo ini ile. Na i oma venen aken mo aro thomu o panongpol nge ur sivesivenga areko i oma i, aka te risea i nge, nge aka i lengpot thomu a mideng lemi me, ma i paeso thomu nge ile pen lalanga aka i sivenga rintet.

¹⁰ Nomenga thomu ini a God ile tokokoere avele, aveto ponange thomu ini ile tokokoe ol re. Nomenga thomu o el vet a God ile themosaling avele, aveto ponange thomu o el ol a God ile themosaling.

Aro ler esong i vengveng inga a toko alavusnga otheiki

(Vonge 2:11–3:22)

Ler vothung aro i sivenga.

¹¹ Titeik sivengare, thomu o voth ini longre ake ru a ulue, make tho pator thomu ve aro o mothong tova o panes lemi rumong kerenga ako i mita a lomumu, na i pun tomo nge lomu lemi rumong sivenga.

¹² Na i nunganga ako areko or ini toko lemioongare avele, o teltun polpol omu nge vothung kerenga omanga, aveto a oa lemimi aro lomu vothung aro i vengveng inga, aken aro o thepol lomu vothung sivenga aken, naro o risea a God, nge nang ako aro i lo werer nge me.

Aro te voth a mukalingare osa thewo.

¹³ Aro thomu o voth a toko mukalinga ulue angare osa thewo, eneke Toko Pomnga i sis ve aro thomu o oma venen aken. Naro thomu o voth a nepes mukalinga ako ini nepes alavusnga oa pomnga isa thewo.

¹⁴ Naro thomu o voth mun a ile gavman a mukalingare osa thewo, eneke i pake or mo aro o paomelal areko o oma vothung kerenga, na o risea mun areko o oma vothung sivenga.

¹⁵ Naro thomu o voth a osa thewo venen aken, eneke God i sis ve aro lomu vothung sivenga aro i paporengu tokokoere ole riong pelekpolnga areko olemi otun polpol thomu nge.

¹⁶ Aro thomu o mimi ranga ve ake o vthopot nge patorong iteltunnga, aveto o mothong tova o seltunu vothung kerenga omanga nge lomu vthopotong aken. Avele! Aro thomu o mimi inga ranga ve ini a God ile umongare ako o panes inga ikei.

¹⁷ Aro thomu o papomnga toko alavusnga. Naro omu sagu titeumu lemioongare. Naro o papomnga rintet a God tomo nge ngeipong. Naro o papomnga mun lomu nepesre oa pomnga.

Toko um polpolongare aro o voth a otokoningare osa thewo.

¹⁸ Na thomu toko um polpolongare, aro thomu o paesu sivengomu a tokoningomure osa thewo, naro o papomnga or

alavusnga. Naro o oma venen aken inga nge areko o oma vothung sivenga, na o themosal thomu inga, kene avele, aveto aro o oma venen aken mun nge areko o pamern kerere polpol thomu.

¹⁹ Eneke God ilemi sivenga inga nge lomu vothung ake thomu o panes inga a God ilemi, na o potun inga matheong na sisong ake tokoningomure o oma polpol i a thomu nge.

²⁰ Na aro ve omu e i oma vothung kerenga e, na i el inga sisong ake o siso i nge, aro lomum vava nge aken? Aro God ilemi sivenga nge? Avele! Aveto aro ve thomu o el sisong nge vothung sivenga omanga, na o el inga aken, aken God ilemi sivenga inga nge aken.

²¹ Na God i lengpot thomu mo aro o panes vothung aken, eneke Krais mun i el sisong nge opaalngomu. Na i oma venen aken mo aro i pathengal thomu nge sovengalo ake aro thomu o panesrum i nge.

²² Na i oma vothung kerenga e avele, na riong le apaltetonga e avele i espot mun a iwo.

Aisaia 53:9

²³ Na nge ake o oma riong kerenga a i nge, i olal werer riong kerenga a or nge avele. Na nge ake i el sisong a or nge, i ria vet ve, aro i paolal werer i a or nge avele. Aveto i sungu inga ur alavusnga a God imeni ake i avrum vengveng tokokoere ole vothung.

²⁴ Na isivenga ini peti i mon a won ngoronga nge, eneke i el ler vothung kerenga olalnga. Na nge aken, i pavurvur aro te mothong selele vothung kerenga omanga ranga ve ini toko rinonga, naro te panes inga vothung vengvenga tomo nge ler mimiong alavusnga. Na ile omaing i vene re aken na i pamimi thomu ake nge sisong ake i el i.

²⁵ Na i oma venen aken nge thomu, eneke nomenga thomu o leklek ranga ve ini sipsipre ake o nongal otokoningare okei avele, aveto ponange thomu o eksing, na o panes ol inga toko ake i theal lomu mimiong ranga ve ini sipsipre othealnga.

Sengre aro o voth a oewoere osa thewo.

¹ Na i vene mun nge thomu seng peangere, aro thomu o voth a ewomuere osa thewo mo aro ve oa pelie ole mio nge a God ile riong avele, na aro ve thomu o sung mun riong pelie a or nge avele, ur e avele, aro lomu vothung aken inga aro i oma or mo ole mio nge a Toko Pomnga,

² eneke aro o thepol lomu vothung riringa tomo mun nge lomu vothung non-galnga.

³ Na o mothong tova omu malmaling ini lalanga anga, ranga ve ini pounga thoing galelgalelnga, na nanaing ako ini gol nananga, na teunong sivesivengare teunnga mun.

⁴ Aveto i sivenga ako aro omu malmaling ini lomumu anga aka i penthal avele, ranga ve ini vothung lemi mosing tomo nge lemi moring. Na malmaling aka i venen aken, iolonga i roro rintet a God itheki.

⁵ Na ini vothung aka seng nomengangare aka o riri na ole mio nge a God ve aro i panes ile riong kinnga, kene o panes i. Na o pamalma osivenga nge aka o paesu or a oewoere osa thewo.

⁶ Na Sara i venen aken, eneke i nongal a Abraham ikei, na i apet i ve ini ia pomnga. Na thomu ini itutun sengengaere, tova ve lomu vothung i vengveng, na ngeipong ile mong thomu avele.

Tokokoere aro o theal senu oewoere.

⁷ Na i vene mun nge thomu toko peangere, aro thomu o pamen senu ewomu sengengaere ranga ve aka God i sung mire a thomu nge. Naro o theal senu or ranga ve aka ole engenging i posnga nge lomu engenging, eneke God i themosal mun or, naro o el mun ile sungong tomo nge thomu aka ini mimiong aka aro ile vusonga avele. Naro thomu o oma venen aken mo aro ur e avele aro i mit roal lomu nongong.

Aro te pamen senu pel.

⁸ Na lek riong patopalalnga nge ur areken i vene: Aro thomu alavusnga aro lomumu omole ol inga, naro lomumu esal pel, naro omu sagu pel ranga ve aka titeumu pel, naro o sung lomumu

alavusnga nge tokokoere oopoalnga, naro o paruru mun sivengomu.

⁹ Na o mothong tova o olal werer vothung kerenga nge areko o oma vothung kerenga a thomu nge. Na o mothong mun tova o olal werer ri moluplupong nge areko o ri moluplup thomu. Aveto aro thomu o olal werer i a or nge, nge lomu riong aka o nong a God nge ve aro i oma senu nge or, eneke God i ateal thomu ve aro o oma venen aken mo aro God i oma senu nge thomu.

¹⁰ Naro thomu oma venen aken, eneke God ile riong i ri vene:

“Aro ve toko e i sis ve aro i el mimiong sivenga

na i mimi nge nang sivenga,
aro riong kerenga e avele,
na le apaltetong e avele mun
aro i espot a iwo.

¹¹ Naro i lel ikime nge vothung kerenga omanga, naro i panes inga vothung vengvenga. Naro i betet ve aro i men senu tomo nge toko alavusnga.

¹² Eneke Toko Pomnga i theal senu nge areko ole vothung i vengveng, na i ta itelnga nge ole nongong. Aveto Toko Pomnga i lel ikime nge areko o oma vothung kerenga.” *Buk Song 34:12-16*

Aro te el inga sisong nge ler vothung sivenga ranga ve aka Krais i el i.

¹³ Na anga aro i pakerenga thomu tova thomu o betet inga nge vothung sivenga omanga, e?

¹⁴ Aveto aro sapase thomu tova ve, thomu o el sisong nge lomu vothung vengvenga. “O mothong tova o ngeip nge ole vothung aka o pangeip thomu nge. Na o mothong tova lomumu kerere.” *

¹⁵ Aveto a lomumu aro o pamina a Krais roro mo o papomnga inga ienga ve aro ini omu Pomnga. Na opisleonga aro thomu o monsi ve aro o olal tokokoere ole ninong nge lomu men sialing nge a God ile ur sivesivengare.

¹⁶ Aveto nge lomu riong olalnga aken, aro o papomnga or, na o ri riong mosnga

* ^{3:14:} Aisaia 8:12

a or nge. Naro o oma inga ur aka i sivenga mo ur e avele i voth a lomumu, mo aro ve tokokoere o oma riong kerenga nge lomu vothung sivenga aka o panes a Krais nge, aken aro ole mara nge ole riong kerenga aken.

¹⁷ Naro thomu o mimi venen aken, eneke aro ve God i sis ve aro thomu o el sisisong, i sivenga aka aro o el sisisong nge lomu vothung sivenga omanga, eneke ile sungong e avele i voth nge sisisong aka thomu o el i nge lomu vothung kerenga.

¹⁸ Na i sivenga aka aro thomu o el sisisong nge lomu vothung sivenga omanga, eneke Krais aka ini toko vengvenga i el mun sisisong nge areko or ini toko vengvenga avele oopoalnga, na i rin leltun ole vothung kerenga. Na i rin pa omole inga mo i opoal toko alavusnga mo o pavurvur aka aro o es a God nge. Na nge aka o so rin i, ma ini peti inga i rin, aveto ioni rongan i mimi, na i el mimiong ponganga.

¹⁹ Na nge sovengalo aken, i es mo i panongpol Waliare ole, aka o voth a paomelalinga a pen.

²⁰ Ini areko o nong sirik nomenga nge aka God i paninal or ve aro o eksing. Na ile paninaling aken i voth nge nang areko Noa i oma imot aolonga nge. Na toko inga or limme inga aka o el mimiong a imot lemi na o monu mona a thei i pavurvur nge aka thei aken i pamimi or.

²¹ Na thei aken ini paatealing nge paninuong aka i pamimi ol thomu aka nge a Jisas Krais ile los wereraing. Na ini numu peti akopnга paut rirpotnга avele, ini lomu riong kinngа aka thomu o oma i a God nge ve aro o oma inga ur aka i sivenga mo ur e avele aro i eso ol a lomumu.

²² Na Krais ini toko aka i esa a Pen a Urvet lale, na i men ol a God imeni sivenga nge anga, nge wop aka o papompom tokokoere nge. Na enselre, na tamatare, na ur alavusnga aka ole engenging i voth, kene o voth ol aka a isa thewo.

Tongporumong aolonga na sisiong aro i velpoltun toko lemioongare

4 (Vonge 4:1-5:14)

Aro te lel kimer nge vothung ulue angare.

¹ Na Krais i el sisisong nge ini peti, aken aro thomu o el mun ile lemi rumong aken, mo i monsi thomu nge sisisong elnga. Eneke toko e aka i el sisisong nge ini peti lale, aken i pavus ol vothung kerenga ile engenging a i nge lale.

² Na nge ile mimiong ake ru a ulue, aro i panes ol inga vothung aka God i sis ve aro i oma i, naro i panes ol vothung ulue anga aka i mita a ilemi me, kene avele.

³ Eneke i palolo rintet lale nge lomu mimiong aka thomu o panes vothung ulue anga aka areko or ini a God ile tokokoere avele o oma i, ranga ve aka ole mimiong i vual nge toko na seng aomnga, tomo nge vothung pelekpolngare omanga, na theki le roroing, na o thin rinrin thei engenga evelelnga, na o thinu thina thei engenga nge saal aolongaere aka vothung kerenga pulua i voth a lemi, na ole lotualing nge avalare i kerenga selele, na lomu vothung areken ru o modopu i lale aro i pavurvur ol venen aken ol.

⁴ Na o kukuk aka thomu o supo tomo ol avele nge ole vothung aka i ranga ve ini mekerem wengare ole, mako o oma riong kerenga pulua nge thomu.

⁵ Aveto aro o mit nge riong nge ole vothung aken, na riong nongpolnга aka i monsi lale ve aro i avrum toko rinrinon-gare na toko mimingare ole riong, aro i oma or mo o pamilempot tepun vava aka o oma ole vothung areken.

⁶ Na tepun aka Krais i esu a Wali na i panongpol Panongpolong Sivenga nge areko o rin lale kene i vene: Nomenga areko olemio nge a God, toko ulue angare o teltun polpol oa, ma o rin mun ranga ve ini toko neneanga alavusnga, aveto o nongpol Panongpolong Sivenga ma olemio mun nge mo i pavurvur aro ooni aro o mimi ol tomo nge a God.

Aro te um senu tomo nge sungong aka God i sungu i a it nge.

⁷ Na ur alavusnga ile vusong i toth me lale, maken aro lomu lemi rumong aro i

nine, na o theal senu lomu mimiong mo i pavurvur aro o nong a God nge.

⁸ Na vothung ako i mukal nge vothung alavusnga i vene: Aro omu sagu rintet pel, eneke vothung ako nge asaguong i seltun vothung kerenga puluanga.

⁹ Naro o nongpoo pel, na o mothong tova lomumu a riong nge.

¹⁰ Naro thomu o opoal pel sivengomu nge sungong rel relngare aka thomu omole omole o el i nge a God ile themosaling, na o theal senu or evelelinga ranga ve ini ile umonga sivengare.

¹¹ Na aro ve toko e i el sungong nge riong panongpolnga, aro i panongpol vengveng inga riong aka i es a God nge me. Na aro ve toko e i el sungong nge tokokoere oopoalnga, aro i oma i tomo nge engenging aka God i sungu i a i nge. Naro thomu o oma venen aken mo aro tokokoere o thepol lomu sungong areken, na o risea a God aka nge a Jisas Krais. Na ini toko aka i el malmaling a urvet na engenging aka aro ile vusonga avele. I nunganga.

Te mothong tova ler mara tova te el sisong nge ler lemioong nge a Krais.

¹² Na titeik sivengare, o mothong tova o kukuk nge sisong velvelnga aka i tongporum thomu, ranga ve aka ini ur ponganga aka i velpoltun thomu.

¹³ Aveto aro lomumu i sivenga inga aka thomu o el mun sisong ranga ve aka Krais i el i, na lomu voth vosaling aro i panes tomo mun sisong aken mo aro o vual rintet nge voth vosaling nge nang aka aro God i pavelpol pat ol a Krais ia malmaling a urvet.

¹⁴ Na aro ve tokokoere o ri tangatun nge thomu, eneke thomu o panes a Krais, sapase thomu, eneke God Ioni na ia malmaling a urvet i seltun thomu.

¹⁵ Na o mothong tova o pavelpol sisong nge sivengomu nge lomu vothung aka ranga ve ini toko so rinnga, na toko kemonga, na patorong avsanga, eve o pavothalo tokokoere nge ole umong.

¹⁶ Aveto aro ve thomu o el sisong nge aka thomu ini a Krais ile tokokoere, o mothong tova lomu mara nge, aveto aro

thomu o ri sivengaing a God nge aka Krais ion i sop a thomu nge.

¹⁷ Eneke nang aka God ile tokokoere o mit nge riong i patea lale. Na aro ve i patea i a it nge aka te el sisong a tokokoere nge, aro ile vusong i vava ol nge areko o avsa a God ile Panongpolong Sivenga, e?

¹⁸ Na i ranga ve aka God ile erere i ri nge aka i ri vene:
“Na aro ve i klip rintet nge toko vengveng-

ve aro o el ole pamimiong a God
nge,
aro i vava nge areko o lel okime nge a
God
na ole vothung kerenga, e?” *Gut-
pela Sindaun 11:31*

¹⁹ Maken areko o el sisong ranga ve aka God i sis ve aro o el i, aro o kis inga vothung sivenga omanga, naro o sung osivenga a God imeni aka ini Patenger aka i theal senu or ranga ve aka i kin ile riong nge lale.

5

Lotu a mukalinga areko ole lemioong i motu aro o theal senu a God ile tokokoere.

¹ Na thomu lotu a mukalinga areko lomu lemioong i motu, tho ini lotu a mukalinga mun ranga ve ini thomu, na tho ini toko aka tho thepol sisong aka Krais i el i, na tho panongpol nge, na tho ini toko aka aro tho supo tomo mun nge areko aro o el mun ia malmaling a urvet aka aro i velpol pat ol panen, make tho pator engeng thomu lotu a mukalingare

² ve aro o theal senu a God ile tokokoe areko i pathealu thomu nge or, ranga ve ini sipsip thealnga i theal ile sipsipre. Naro thomu o theal senu or, eneke lomumu i sivenga nge omanga ranga ve aka God i sis ve aro thomu o oma i. Na o mothong tova o oma i ranga ve aka toko i pakealal thomu nge. Na o mothong mun tova o oma i ranga ve aka lomumu i voth inga nge umtun elnga, aveto aro o oma i, eneke lomumu i engeng nge omaing aken omanga.

³ Na o mothong tova o papomnga sivengomu a otheki mo o pakeu pakea tokokoe areko God i pathealu thomu nge, aveto aro

o pathengal lomu vothung vengvenga a or nge mo i pavurvur ako aro o panes i.

⁴ Na aro ve thomu o oma venen aken, i pavurvur aka la Jisas aka ini Sipsip Thealngare Oa Pomnga i velpol pat ol, aro thomu o el olongomu aka ini ia malmaling a urvet, na i ranga ve ini vevea aka ile sivengaing i pavurvur aro i vus ol avele.

Aro te sung ler mimiong alavusnga a God imeni.

⁵ Na i vene mun nge thomu apongare, tho pator mun thomu ve aro o paesu sivengomu a lotu a mukalingare osa thewo. Na thomu alavusnga aro o paruru sivengomu mo o opoal pel, eneke God ile erere i ri vene:

“God i lel ikime nge areko o paroro osivenga,
aveto i sung ile themosaling nge areko o paruru osivenga.”

Gutpela Sindaun. 3:34

⁶ Maken aro thomu o paruru sivengomu, na o paeso sivengomu a God ile thealing engenga lemi mo aro i paesa thomu roro nge nang aka i ateal i a thomu nge lale.

⁷ Na matheong alavusnga aka lomumu i voth nge, aro o sungu i a i nge, eneke i theal thomu, na ilemi i voth nge thomu.

⁸ Naro lomu lemi rumong aro i nine na o thealal, eneke teltunngomua a Satan i esu esa ranga ve ini laion* aka i ngirikal, na i kath toko e aka aro i rereu i mo i ontetu i.

⁹ Aveto aro thomu o mit engeng nge lomu lemioong nge a Satan imitroalnga, eneke lomumu mire aka titeumu lemioongare ake ru a ulue o el mun sisong kathnga aka thomu o el mun i.

¹⁰ Na tho nong ve aro God aka ini themosaling alavusnga tepun, aka i lengpot thomu mo aro thomu o el ia malmaling a urvet aka aro ile vusonga avele, aka nge lomu teoong a Krais nge, kene aro i pasenu werer thomu nge aka tova thomu o el tel sisong nge nang pelie, naro i paengeng thomu, na i pamensenu thomu mo o mit engeng inga nge nang elonga.

¹¹ Na ini a God aka ile engenging i voth evelelnga aka aro ile vusonga avele. I nunganga.

Pita ile malueng patopalalnga.

¹² Na malueng atike tho wat i, Sailas i opoal tho nge. Na tho ate ve ini titeir aka i pesrou avele nge a Toko Pomnga ile omaing omanga. Na nge lek malueng ake tho pator engeng thomu, na tho ekris senu a God ile themosaling nunganga a thomu nge. Maken aro thomu o mit engeng ol nge.

¹³ Na toko lemioongare aka o voth a rem pomnga ake a Babilon o pasungalu ole nang sivenga a thomu nge. Na or ini areko God i ateal or tomo nge thomu mo ini ile. Na Mak aka i ranga ve ini tuk i pasungalu mun ile nang sivenga a thomu nge.

¹⁴ Naro thomu o titpororoling ranga ve aka omu sagu pel.

Na God ile lemi moring aro i voth tomo nge thomu alavusnga aka o teo a Krais nge.

Na i re aken. I vus.

* **5:8:** O thepola laion ia sei nge pes 632.

Aro te betet rintet nge vothung ako i panes a God ilemi.

Malueng aininga aka Pita i wat i 2 Pita Ritetong nge a 2 Pita

Pamirealonga le apaltetonga pulua o engeng ve aro o pakerenga toko lemioongare nge ole vothung kerenga, na nge ole riong le apaltetonga. Pita i pator toko lemioongare ole ve, aro o naktet or nge toko kerenga areken, aro vene mo o paleklek or. (2:1-22) Pita i sung torong engenga a or nge ve, aro o panes inga vothung sivenga. (1:3-11) Pita ilemi mire aka i toth nge ile rinong, (1:12-15) na i sis ve aro i palemi rumal or ve, Panongpolong Sivenga aka o el i kene i nunganga, na Krais aro i lo wereru me. God ile riong aka i ripot i roro a tete nge, (Mak 9:2-8) tomo nge a God ile riong elngare ole riong, kene i pathengal aka ve, Krais aro i lo wereru me. (1:16-21) Aken aro ve toko pelie o ri ve, Krais aro i lo werer avele, aken ole riong aken ini ur polpolnga. (3:3-6) Aro te men sial nge ile lo wererong me, (3:8-15) naro ler vothung i riri, naro te naktet it nge pamirealonga le apaltetongare. (3:14-18) Aken ini riong aolonga aka i voth a malueng ake lemi.

Vothung sivenga aro i velpol engeng a ler mimiong, naro te lel kimer nge toko kerengare ole vothung

(Vonge 1:1-3:18)

¹ Tho a Saimon Pita aka ini a Jisas Krais ile toko umonga na tho ini ile pakeke mun.

Tho wat malueng ake a thomu areko o el mun lemioong aka i vur e pel inga tomo nge lemem lemioong, na ini lomu ur sivenga ranga ve aka ini lemem ur sivenga mun. Na te el ler lemioong aka nge a Jisas Krais aka ini ler God na ler pamimionga aka i oma it mo te velpol ol ini ile toko vengvengare a itheki.

² Na tho nong ve aro thomu o vual rintet nge a God ile themosaling na ile lemi moring, nge aka lomumu mire senu nge a God na ar Pomnga a Jisas.

³ Na engenging aka ini a God ile engenging kene i sungu ur alavusnga a it nge lale, mo te pavurvur aro te mimi ranga ve aka i sis ve aro te mimi nge. Na i sungu ile engenging aken a it nge, eneke lemir mire senu nge toko aka i lengpot it mo te el mun isivenga ile sivengaing na ia malmaling a urvet.

⁴ Na nge sovengalo aken, i sungu mun ile sungong a it nge lale aka ini ile riong kinnga aka i aolonga rintet na i sivenga rintet. Na nge ile sungong aken, te pavurvur aro te tholel nge vothung aka i kerenga rintet aka toko ulue angare o oma i, eneke o panes inga vothung ulue anga aka i mita a olemei me. Na nge ile sungong mun aken, te pavurvur aro te supo tomo nge areko o elo a God ile vothung vengvenga a ole mimiong.

⁵ Na i nunganga aka God i oma venen aken nge thomu, mako aro thomu o betet nge vothung sivenga rong esanga a lomu mimiong nge.

Ranga ve aka aro o rong esa mun vothung vengvenga a lomu lemioong nge.
Na nge lomu vothung vengvenga,
aro o rong esa mun mire aka i panes a God ilemi.

⁶ Na nge lomu mire aka i panes a God ilemi,
aro o rong esa mun sivengomu lomu mimiong naktetnga.

Na nge lomu mimiong naktetnga,
aro o rong esa mun mit engenging nge matheong potunnga.

Na nge lomu mit engenging nge matheong potunnga,
aro o rong esa mun mimiong aka i panes a God ilemi.

⁷ Na nge lomu mimiong aka i panes a God ilemi,
aro o rong esa mun titeinpeling a vothung.

Na nge lomu titeinpeling a vothung,
aro o rong esa mun asagupeling.

⁸ Na aro ve vothung areken i esa esa, aken i pathengal aka ve, lomu mire nge ar Pomnga a Jisas Krais i pavelpol imonnga a lomu mimiong, na ini ur polpolnga avele.

⁹ Aveto areko, vothung areke i voth a or nge avele, kene i ranga ve ako otheki pros na o the senu avele, mako olemi simikal aka God i pariri or nge ole vothung kerenga aka o oma i nomenga.

¹⁰ Maken titeikre, aro thomu o betet mo lomumu mire senu aka ve, thomu omole omole ini toko aka God i lengpot i na i ateal i ve ini ile. Na aro ve thomu o panes vothung areke, aro lomu lemioong aro i penthal selele ol avele,

¹¹ naro God aro i thep lomu sovengalo sivenga aka aro o eso a ar Pomnga na ler pamimiionga a Jisas Krais ile menong e nepes aka aro ile vusonga avele.

Pita i palemi rumal or nge ur areko i nunganga.

¹² Na ur alavusnga aka tho ri nge, kene i nunganga, maken aro tho pesrou nge palemi rumalngomu nge ur areken avele. Na i nunganga aka lomumu mire nge ur areken lale, na o mit engeng nge riong nunganga aka thomu o el i lale,

¹³ aveto lemik ve i vengveng aka aro tho pokeses mun nge palemi rumalngomu aka rongan tho voth a neneanga ranga ve aka onik i menalo a valvale aka ini nik peti inga,

¹⁴ eneke lemik mire lale aka ve, i toth aka aro onik i lospot nge valvale aken aka ini nik peti, na i ranga ve aka ar Pomnga a Jisas Krais i ritet i a tho nge lale.

¹⁵ Mako aro tho betet nge malueng watnga mo aro ve tho rin, tho sung sovengalo a thomu nge lale mo aro nge nang elonga thomu o pavurvur aka aro lomumu rum werer nge ur areke.

God ile riong elngare ole riong alavusnga i nunganga, eneke ole riong pelie i velpol nunganga lale.

¹⁶⁻¹⁷ Na nomenga nge aka them ritet thomu nge ar Pomnga a Jisas Krais ile velpoling tomo nge engenging, them panes rurumong aka tokokoere o pavelpol i nge ole mire ma o palumtun lemimem nge, kene avele. Aveto nge nang aka ar Vovo a God i papompom a Jisas nge na i sung malmaling a urvet aka i tolilis a i nge, them thepol vengveng ia malmaling a

urvet aken nge thekimem, na them nongpol mun a God aka ia malmaling a urvet i tolilis rintet kene ile leng lenging aka i velpolpot a i nge me na i ri ve, "Ake ini tuk aka ok sagu rintet i, na lemik i sivenga inga nge i." *

¹⁸ Na sivengemem them nongpol leng lenging aken aka i espot a Pen a Urvet me, eneke them voth tomo nge a Jisas a tete riringa polemi aken.

¹⁹ Na them thopol i veno aka a tete aken, mako lemlem lemioong i engeng ve, Jisas ini toko aka God i ateal i ve aro i el werer ile tokokoere, na i ranga ve aka God ile riong elngare o ri nge. Na i sivenga aka aro lomumuo mun nge ole riong aken, eneke ole riong aken aro i opaal thomu, i mulal nge nang aka aro Krais aro i lo werer nge me, na riong aken i ranga ve ini theki lalainga aka i opaal tokokoe areko o voth a mideng, i mulal nge erangunga. Na nge nang aken Krais aro i pango pat ol ur alavusnga a lemir ranga ve aka lempoa i totun ur alavusnga, mako tokokoere o thepol pat ol ir.

²⁰ Na tho sis rintet ve aro lomumu i nine nge ve, God ile riong elngare ole riong aka i voth a God ile erere nge, e avele i velpola inga a toko e ilemi,

²¹ eneke God ile riong elngare ole riong e avele i velpol polpolpot a toko e nge, aveto Oni Riringa i pavurpol tokokoere olemi, mako o ripot ol riong aka God i sungu i a or nge.

2

Pita i ritet nge pamirealonga le apalte-tongare ole vothung.

¹ Na i nunganga aka Oni Riringa i pavelpol a God ile riong venen aken, aveto ine riong elnga le apaltetongare o voth mun. Na nomenga o velpol a Israelre oa wop ranga ve ini pamirealonga le apalte-tongare aka aro o velpol mun a omu wop lemi. Naro o segelal omu nge ole riong le apaltetonga aka aro i pakerenga lomu lemioong, na ole le apaltetong aken aro i mulal aka nge ole lelaing nge ar os a Toko Pomnga aka i ol werer it nge ile rinong,

* ^{1:16-17:} Matiu 17:5; Mak 9:7; Luk 9:35

mako osivenga o pavelpol kerengaing viri
viri a or nge.

² Na toko pulua aro o panes ole vothung
le maraing. Na tokokoere aro o thepol ole
vothung areken naro o ri riong kerenga
nge Sovengalo Nunganga aka i es a God
nge.

³ Na olemi voth inga nge umtun elnga,
naro o pawomwomal thomu nge ole riong
le apaltetonga aka osivenga o pavelpol i,
na aken o oma thomu ranga ve ini ole
lulu aka aro o el umtun nge. Na nomenga
vet aka me God i teltun oa lale ve aro
i paomelal or, na i toth me aka aro ole
kerengaing aken aro i velpol.

⁴ Na lemire mire aka God aro i paomelal
areko o oma vothung kerenga, eneke i
wen enselre aka o oma vothung kerenga,
kene avele, aveto i asesu or a paome-
lalinga a pen, na i paeso or a vol a mi-
denga, naro o theal tetal or i pavurvur nge
ile nang aka aro i pamit or nge riong.

⁵ Na i wen mun toko nomengangare
avele, aveto i pavelpol wong aolonga aka
i pavus toko alavusnga aka o voth a ulue
aka o lel okime nge i, aveto i pamimi a
Noa aka ini vothung vengvenga panong-
polnga, tomo nge iewo na itutunre na
oewoere aka oa titaling or limai.

⁶ Na God i teltun mun rem pomnga a
Sodom ome a Gomora angare oa, na i
pavus selele or ome ole rebo nge won
sesenga na o velpol ol ini vuvus. Na aken
ini pathepolong nge ur aka aro i velpol nge
areko aro o lel okime nge i.

⁷ Aveto i pamimi a Lot aka ini toko
vengvenga aka i voth a Sodom. Ini toko
ako ilemi kerere nge patorong avsangare
ole vothung aka nge toko na seng aomnga,

⁸ eneke ur aka toko vengvenga aken i
thepol i na i nongpol i, nge aka i voth tomo
nge or, kene i oma i ma ilemi kerere rintet
nge nang elonga nge ole vothung kerenga
areken.

⁹ Na aro ve Toko Pomnga i pavurvur
nge a Noa ome a Lot opamimbinga venen
aken, i pavurvur mun nge areko o panes i,
opamimbinga nge ole tongporumongre. Na
aro ve i pavurvur nge tokokoere opaome-

lalnga venen aken, i pavurvur mun aka
aro i pesrou avele, nge toko kerengare
opaomelalnga i mul nge ile nang aka aro i
pamit tokokoere nge riong.

¹⁰ Na alemminga nge areko o panes inga
vothung aka i mita a olemi me, nge toko na
seng aomnga, na oni plong rintet ve aro o
vot h a mukalinga e isa thewo.

Na pamirealonga le apaltetongare aka o
vot h tomo nge thomu, o engeng nge mago-
ning, na o ngeip avele nge ole voltetongre
aka o oma i a tamatare nge aka o vot h roro
nge or.

¹¹ Aveto enselre aka ole engenging na
ole pomngaing i mukal nge or, o teltun
tamatare nge voltetong venen aken aka a
Toko Pomnga itheki, kene avele.

¹² Aveto pamirealonga le apaltetonga
areken o ranga ve ini mekerem wenga
areko ole mire avele, ma ole velpoling a
ulue kene itepun inga aka aro te rere or na
te so rin or. Na o voltet inga ur aka olemi
mire nge avele. Naro o el kerengaing
ranga ve ini mekerem wengare.

¹³ Na oolonga olalnga aro i vur e pel
inga tomo nge sisong aka o oma i a
tokokoere nge. Na olemi sivenga inga aka
aro o oma inga saal kerenga a vothung
nge eranga. Na or ini toko akopngare
aka o pavelpol le maraing a thomu nge,
eneke olemi sivenga inga nge ole vothung
areken omanga nge aka o an tomo mun
nge thomu toko lemioongare, nge omu
anigre aka i patheng lomu asagupeling.

¹⁴ Na evelelga olemi i vual inga nge
thek i le roroing, na o pesrou nge vothung
kerenga omanga avele. Na o paleklek
tokokoe areko olemi sulung salang nge ole
lemioong, na o pamireal olemi nge umtun
thesealnga na elnga. Na o vot h ol aken a
God ile paomelaling lemi.

¹⁵⁻¹⁶ Na o leklek, eneke o lel okime
nge sovengalo vengvenga panesnga, na
o panes a Balam* aka ini a Beor itun
ile sovengalo. Ini a God ile riong elnga
e aka ilemi vot h inga nge umtun elnga
nge vothung kerenga omanga. Aveto ile
donki i vol i nge ile vothung kerenga aken.
Na donki ini mekerem areko o leng leng

* ^{2:15-16:} O thopol tenesing nge a Balam aka a Namba 22-24.

avele, aveto i leng leng ranga ve ini toko a Balam nge, mako i modopu ol ile vothung ngongonga aken.

¹⁷ Na pamirealonga le apaltetonga areken o ranga ve ini thei povovloainga ako i ma lale, na o ranga ve ini mun i vit theki ako thue engenga i thutet i. Na God i monsi ole paomelalinga a pen a midingdenga lale ako aro o voth nge.

¹⁸ Eneke owo a thei nge ole riong polpolnga, mako o ri ololo werero areko o patea ol nge okime lelunga nge vothung kerenga areken omanga, ini vothung ako areko olemi mire nge a God avele, kene o oma i. Na o titpo werero mun or nge ole riong polpolnga aka o ri nge toko na seng aomnga na vothung kerenga areko oni peti i vurpoltun i.

¹⁹ Na o kin ole riong tomo nge tokokoere ve, "Aro thomu o vthopot nge patorong panesnga." Aveto osivenga o vthopot nge avele, eneke o voth inga a vothung kerenga lemi. Na ur aka tho ri nge i nunganga, eneke vothung kathnga aka ile mong toko e, toko aken i voth a vothung aken lemi.

²⁰ Na aro ve tokokoere olemio nge ar Pomnga a Jisas Krais aka ini ler pamimionga, ma o lel okime nge vothung akopnga aka areko o panes vothung ulue anga o oma i, aveto vothung areken i kin werer mun or, na ile mong werer mun or, aken kene ole menong aken i kerenga rintet nge ole menong teltelinga aka o voth nge, aka olemio nge a Jisas rongan.

²¹ Eneke aro ve olemi mire nge a God ile sovengalo vengvenga avele, paomelaling aka aro o el i, aro i aolonga mos avele. Aveto aro ve o el mire nge a God ile sovengalo vengvenga lale, na o lel okime nge patorong riringa areko o panongpol or nge, aken kene paomelaling aka aro o el i, aro i aolo selele ol.

²² Na ur aka i velpol a or nge i ranga ve ini riong agelalnga aka i ri ve, "Nanau i an werer mun ia mutmutong." [†] Na omole mun i ri ve, "Kie aka i nunu lale, lamako i sisa werer mun ini peti ponganga aken a patpat nge."

3

Toko Pomnga a Jisas aro i lo werer mun me ranga ve aka i kin ile riong nge lale.

¹ Titeik sivengare, ake ini lek malueng aininga aka tho wat i a thomu nge. Na nge lek malueng or aini aken tho palemi rum werer thomu nge ur areke mo i pavurpol lomumu mo lomumu i voth inga nge ur aka i riri rintet.

² Na tho sis ve aro lomumu rum werer nge a God ile riong elnga riringare ole riong aka o ritet tel nomenga nge ur areko aro i velpol panen, tomo mun nge a Toko Pomnga aka ini ler pamimionga ile torong aka thomu o nongpol i a ile pakekere owo.

³ Na ur aolonga aka aro lomumu mire senu nge kene i vene: Nge nang patopalalnga tokokoe areko o panes vothung kerenga aka osivenga oni peti i vurpoltun i, aro o ri sililal thomu nge ole riong

⁴ aka o ri vene: "I kin ile riong lale aka aro i lo werer nge me, aveto i kala ol, e? Na i voth a kath? Aro i lo werer avele, eneke i patea nge nang aka titevirre aka o nongpol ile riong kinnga aken o rin lale, na i mul nge ponange, na ur e avele i eksing ol, na imei omoleal ol inga ranga ve ini ur areko God i pamenu i nomenga."

⁵ Na oni plong rintet ve aro olemi rum werer nge ur areko God i oma i nomenga. Ranga ve aka God i ri na ile riong aken i pavelpol sepsa ome ulue. Na ulue i tea a thei lemi me, na thei i lel kalual i,

⁶ na nge a God ile riong mun thei i pavusu ulue nomenganga nge wong aolonga.

⁷ Na nge ile riong mun aken i theal senu sepsa ome ulue aka o voth ponange mo aro ini won sesenga ia ol, na i theal or i mulal nge ile paomelaling a nang aka aro i pakerenga areko o lel okime nge a God.

⁸ Na i nunganga aka Toko Pomnga i lo werer nge me rongan, aveto titeik sivengare, o mothong tova lomumu simikal ur omole ake kene i vene: Nge a Toko Pomnga ile thepolong, nang omole i ranga ve ini tovu po or 1,000 na tovu po or 1,000 i ranga ve ini nang omole inga.

[†] 2:22: Gutpela Sindaun 26:11

⁹ Na toko pelie olemi ve, Toko Pomnga i pakeketun nge ur ako i kin ile riong nge, aveto i oma venen aken avele. I paninal aken nge thomu, eneke ini plong ve aro toko e i penthal, aveto i sis ve aro toko alavusnga aro o eksing olemi a i nge.

¹⁰ Aveto Toko Pomnga ile nang aro i es me, naro i pakuktun tokokoere ranga ve ini toko kemonga. Na nge nang aken sepsa aro i penthal tomo nge ile avvuvong aolonga. Na won sesenga aro i ongtun ur alavusnga aka i voth nge mo i kerenga selele, na ulue na ur alavusnga aka o voth mun nge aro o vus selele.

¹¹ Na aro ve God aro i pakerenga ur alavusnga venen aken, aro i vava nge thomu areko o mimi ponange lomu vothung, e? Aro lomu mimiong aro i riri, naro o panes a God tomo nge lomu mimiong elonga.

¹² Aro thomu o mimi venen aken nge aka o men tetal a God ile nang na o pavirial i me. Na nge nang aken won sesenga aro i pakerenga sepsa, na ur alavusnga aka o voth nge aro o ongtun.

¹³ Aveto te men tetal nge ur aka i kin ile riong nge lale, aka ini sepsa ponganga na ulue ponganga aka toko vengvengare aro o voth selele ol nge.

Aro te naktet senu ler vothung na te men tetal a Toko Pomnga ile nang.

¹⁴ Maken titeik sivengare, nge aka o men tetal nge nang aken, aro o betet nge aka o voth riri mo aro omu theki e avele a God itheki, naro o voth lemi moring tomo nge i.

¹⁵ Naro lomumu i vene: Toko Pomnga ile paninaling aken ini sovengalo aka aro i pamimi tokokoere nge. Na lek riong aken i ranga ve aka titeir a Pol aka ar sagu i, i wat riong pelie a thomu nge lale, aka nge mire ninenga aka God i sungu i a i nge.

¹⁶ Na i ri vene aken nge ile malueng elonga. Na ur pelie aka i voth a ile malueng lemi i klip nge imirenga elnga. Na toko nongalproingare aka ole mire avele o ekris kerere ile riong aken ranga ve aka o oma i nge a God ile riong mun pelie lale. Na nge ole omaing aken o pavelpol kerengaing a osivenga nge.

¹⁷ Maken titeik sivengare, lomumu mire nge ur areken lale, mako aro o thealal, aro vene mo tokokoe areko o panes patorong avele aro o paleklek thomu nge ole riong le apaltetonga, kena aro o matu nge lomu mit engengen aken.

¹⁸ Aveto tho nong ve aro ar Pomnga a Jisas Krais aka ini ler pamimionga ile themosaling aro opisleonga aro i esa esa a lomumu, naro lomumu mire senu nge ur aka i sis ve aro o oma i. Naro te risea i ponange na evelelnga aka aro ile vusonga avele. I nunganga.

Na i re aken. I vus.

Malueng teltelnga aka Jon i wat i 1 Jon Ritetong nge a 1 Jon

Jon aka ini a Krais ile pakeke i wat malueng ake, na riong pulua aka i voth nge, i ranga ve ini riong aka i voth nge Panongpolong Sivenga aka Jon i wat mun i. Toko powe ninengare olemi ve, Jon i voth a epee a Esia ma i wat malueng ake a toko lemioongare nge aka o voth mun a epee aken. Jon i sis ve aro i pator toko lemioongare nge pamirealonga le apaltetongare (2:26) aka o ri ve, ur areko te thepol i ake ru a ulue na nir peti mun ini ur kerenga, na onir inga ini ur sivenga. Maken o ri mun ve, aro ve te oma vothung kerenga tomo nge nir peti kerenga, ur e avele. Na o ri mun ve, Krais Ioni i lo lelpot tel ini peti lamoko i rin. Pamirealonga le apaltetongare o ri venen aken, aveto Jon i mothongpot ole lemi rumong aka i venen aken. Na i ri ve, aro ve te oma vothung kerenga, aken te avsa a God ile patorong, (3:4) na i ri mun ve, God itutunre o kis inga vothung kerenga omanga avele. (2:28-3:12) Jon i sis rintet ve aro te es a pen lalanga lemi, ranga ve aka Jisas ome Itema a God o voth a pen lalanga nge. Riong aolonga aka i voth a malueng ake lemi i vene: Toko lemioongare aro o es ol a pen lalanga lemi. (1:5-7) Toko e avele i pavurvur aro i ri ve, ilemio a Krais nge, na rongan i kis inga vothung midenga omanga. Aveto toko e aka i nongal ol a God ile patorong, i kene i teo a God nge. (3:14) Na ur aolonga aka i voth a God ile patorong i vene: Aro ar sagu pel naro lemiro nge a Jisas Krais aka ini a God Itun. (3:23) Jon i sis ve aro lemir nine aka ve, toko neneanga a Jisas (1:1; 4:2-3) ini a Mesaia, ini toko aka God i ateal i ve aro i el werer ile tokokoere, aka o apet mun i ve ini a Krais, (2:22; 5:1) na ini a God Itun. (2:23; 3:23; 4:9-10; 4:14-15; 5:5-13; 5:20) Na ienga inga i rin mo aro i opoal it mo aro i pamimi it. (5:4-8) Jon i sis ve aro lemir nine aka ve, aro te el mimiong aka aro ile

vusonga avele, tova lemiro nge a God Itun. (5:13)

Aro te es ol a pen lalanga lemi, na te mothong tova te nongal mideng esngare ole riong

(Vonge 1:1-3:10)

Riong aka i sung mimiiong i velpol ol a pen lalanga.

¹ Them wat nge toko aka ulue ake i velpol rongan na i voth tel lale. Na them nongpol ikei aka i leng leng, na them thepol i nge thekimem, na them the a i nge, na menimem i vugir mun i. Na ini toko aka ile riong i sung mimiiong a tokokoere nge, na them panongpol thomu nge ile riong aken.

² Na mimiiong tepun aken i velpol ol a pen lalanga, ma them thepol i ma them ritet nge. Na them panongpol thomu nge toko aken ve ini mimiiong aka aro ile vusonga avele kene tepun, aka nomenga i voth tomo nge Titemer a God, ma i velpol a them nge lale.

³ Na ur aka them thepol i, na them nongpol i, aken them panongpol mun thomu nge, mo aka thomu o pavurvur mun aro o supo tomo nge them nge titeinpeling a menong, na ler titeinpeling a menong aken i voth tomo nge Titemer a God na Itun a Jisas Krais.

⁴ Na them wat riong ake a thomu nge mo lemir i vual rintet nge lemi sivengaing.

Aro te es inga a pen lalanga lemi.

⁵ Na riong aka them nongpol i a Jisas Krais nge, na them panongpol i a thomu nge, kene i vene: God ini pen lalanga na mideng e avele i voth a i nge.

⁶ Na aro ve te ria ve, te men titeinpeling tomo nge i, aveto rongan ler vothung i pathengal i aka ve, rongan te es a mideng nge, aken ler riong aken te ri nge, ini riong le apaltetonga, na te panes a God ile riong nunganga avele.

⁷ Na aro ve te es a pen lalanga lemi, ranga ve aka God i voth a pen lalanga nge, aken te men titeinpeling tomo nge a God ile tokokoere, na Jisas aka ini a God Itun

ia mla i pariripot ol it nge ler vothung kerenga alavusnga.

⁸ Na God i ri lale ve, toko alavusnga o oma vothung kerenga, na aro ve te ria ve, ler vothung kerenga e avele, aken ler apal-tet sivengare, na God ile riong nunganga i voth a it nge avele.

⁹ Aveto aro ve te pamilempot ler vothung kerengare, aken God aro i panes ile riong ako i kin tomo i nge it lale, naro i oma vothung vengvenga a it nge, aka aro ilemi simikal ler vothung kerenga areken, naro i pariri ol it nge ler vothung alavusnga aka i vengveng a itheki avele.

¹⁰ Na aro ve te ri ve te oma vothung kerenga e avele, aken te apet a God ini toko le apaltetonga, na God ile riong i voth a ler mimiong nge avele.

2

Krais ini ler opoalinga.

¹ Na tutukre, tho wat riong ake a thomu nge, mo aro o oma vothung kerenga avele. Aveto aro ve omu e i oma vothung kerenga, kimer mitnga ake ro i voth aki i ri nge it aki a Titemer a God itheki, ini a Jisas Krais, aka i tokon vengvenga.

² Na i sungpot isivenga ile mimiong aki nge ler vothung kerenga eltetpotnga. Na i oma venen aken nge enger inga avele, aveto i oma mun i nge toko alavusnga ake ru a ulue, ole vothung kerenga eltetpotnga mun.

Toko aki ilemi mire senu nge ur aki God i sis ve aro i oma i, aro i panes mun i.

³ Na aro ve te panes a God ile patorongre, aken lemire mire aki ve, lemire mire senu nge ur aki i sis ve aro te oma i.

⁴ Na aro ve toko e i ri ve, "Lemik mire senu nge ur aki God i sis ve aro tho oma i." Aveto i panes a God ile patorong alavusnga avele, toko aken ini toko le apaltetonga, na God ile riong nunganga i voth a i nge avele.

⁵ Aveto aro ve toko e i panes senu a God ile riong, aken ile asaguong nge a God i alarorol a ile mimiong. Na lemire mire aki teo a God nge vene:

⁶ Toko e aki i ri ve i teo a God nge, aro ile vothung i ranga ve ini a Krais ile vothung.

⁷ Na titeik sivengare, ine patorong ake ru tho wat i a thomu nge i ponganga avele. Aveto ini patorong neginga aki thomu o nongpol i nomenga vet aki me i patea nge aki o elo a Krais a lomumu. Na patorong neginga aken ini riong aki thomu o nongpol tel i lale, aki aro omu sagu pel.

⁸ Aveto patorong aken aki tho wat i a thomu nge i ponganga mun a thomu nge, na o thepol i a lomu mimiong ranga ve aki ini a Krais ile mimiong. Na o thopol i a lomu mimiong, eneke mideng a esong i penthalu, na pen lalanga a esong i velpol lale ma i to ol.

⁹ Na aro ve toko e i ri ve i voth a pen lalanga, aveto rongan ini silal itein lemioonga e, aken toko aken rongan i voth a mideng nge.

¹⁰ Na toko aki ia sagu ititein lemioongare, aken i voth a pen lalanga, na ur e avele i voth a i nge aki aro i pamatu i.

¹¹ Aveto toko aki ini silal itein lemioonga e, aken i voth a mideng nge, na rongan i es a mideng lemi, na ilemi mire nge wop kathnga aki i es nge, kene avele, eneke mideng rongan i pasopal itheki.

¹² Na rongan tho wat riong ake a thomu tutukre aki ini a Krais ile, eneke aki nge a Krais inga, God i eltetpot lomu vothung kerenga.

¹³ Na rongan tho wat riong ake a thomu a vovoengae mun re nge, aki lomu lemioong i motu, eneke lomumu mire senu nge a Krais aki i voth evelelnga.

Na rongan tho wat riong ake a thomu apoapongare nge, aki lomu lemioong i engeng, eneke lomu mong a Satan, aki i kerenga selele lale.

Na i nunganga aki tho wat lale a thomu tutukre aki ini a Krais ile, eneke lomumu mire senu nge Titemer a God.

¹⁴ Na tho wat lale a thomu a vovoengae mun re nge, aki lomu lemioong i motu, eneke lomumu mire senu nge a Krais aki i voth evelelnga.

Na tho wat lale a thomu apoapongare nge,
ako lomu lemioong i engeng,
eneke thomu o engeng, na God ile
riong i mimi a lomumu, na lomu
mong a Satan, ako i kerenga selele
lale.

*Te mothong tova ar sagu vothung ulue
anga.*

¹⁵ Thomu o mothong tova omu sagu
vothung ulue angare, eve ur areko i vot
mun nge. Eneke aro ve omu e ia sagu
vothung ulue anga, aken God iasagunga i
vot a i nge avele.

¹⁶ Na i venen aken, eneke vothung
alavusnga ako ini toko ulue angare ole, i
es a Titemer a God nge me avele, ranga
ve ini ako o panes inga vothung areko
i mita a olemi me, na o theseal, na o
magon. Vothung alavusnga areken ini
vothung ulue anga vet aken.

¹⁷ Na ine ulue ake tomo nge areko oa
sagu vothung ulue anga aro o vus, aveto
tokokoe areko o oma ur areko God i sis
ve aro o oma i, aro ole mimiong aro ile
vusonga avele.

Krais ile ngarangre o velpol lale.

¹⁸ Na tutukre, te tohttunal ol nang le
vusonga lale. Na ranga ve aka o nongpol
ako ve, Krais ile ngarang aro i es me, na
ponange ol ake Krais ile ngarangre pulua
o velpol lale. Na nge aken, lemir mire aka
ve, te tohttunal ol nang le vusonga.

¹⁹ Na tokokoe areken nomenga o vot
tomo tel nge it, lama o lo lelpot ar ma o es.
Aveto or ini lernga nunganga avele. Eneke
aro ve or ini lernga, aro rongan o vot
tomo nge it. Aveto o lo lelpot ar lale, make
i nunganga aka ve, or ini lernga avele.

²⁰ Aveto thomu o el Oni Riringa lale aka a
Toko Riringa nge me, na i panine lomumu
mo aka lomumu mire nge riong nunganga
ako God i pathengal i a it nge.

²¹ Ava lomumu ve tho wat a thomu nge,
eneke lomumu mire nge riong nunganga
avele, aveto avele. Tho wat a thomu nge,
eneke lomumu mire nge riong nunganga
lale, na lomumu mire mun aka riong
nunganga i pavelpol riong le apaltetonga
e avele.

²² Toko le apaltetonga ini anga? Ini toko
ako i kelelal ve, Jisas ini toko aka God i
ateal i ve aro i el werer ile tokokoere, kene
avele. Na toko aka i venen aken, ini a Krais
ile ngarang. Ma i lel ikime nge Titemer a
God na Itun a Jisas.

²³ Na toko aka i lel ikime nge a God Itun
aken, akennga i lel mun ikime nge Titemer
a God. Na toko aka ilemio nge a God Itun,
akennga i lemio mun nge Titemer a God.

*Oni riringa i pamireal it nge riong nun
ganga.*

²⁴ Na riong areko thomu o nongpol i
nomenga nomenga vet aka me i patea nge
ako o elo a Krais a lomumu, kene aro
thomu o krim engeng i. Na aro ve thomu
o krim engeng inga, aken rongan o teo a
Jisas nge na a Titemer a God nge.

²⁵ Na ake ini ur aka i kin ile riong a it
nge lale ve aro i sungu mimiong aka aro
ile vusonga avele a it nge.

²⁶ Na tho wat riong areken a thomu nge
mo tho pator lomu nge tokokoe areko o
tongporum ve aro o paleklek thomu.

²⁷ Aveto thomu o el Oni Riringa a God
nge me, na rongan i vot a lomumu,
make o mothong tova o sis ol pamirealinga
e, eneke Oni Riringa ienga inga aka i
pamireal thomu nge ur alavusnga. Na Oni
Riringa aken ile omaing i nunganga na ile
apaltet avele. Maken aro thomu o kis inga
lomu teoong a Krais nge ranga ve aka Oni
Riringa i pamireal thomu nge.

Na ponange te voth ol ini a God itutunre.

²⁸ Na tutukre, aro thomu o pesrou avele
nge lomu teoong a Krais nge, moro aken
nge nang aka aro i velpol a pen lalanga,
aro te mit engeng, naro ler mara nge
mitong a itheki avele, aka nge ile esuong
me.

²⁹ Na lomumu mire aka ve, Krais ile
vothung alavusnga i vengveng rintet,
aken aro lomumu mire mun aka ve, toko
alavusnga aka o oma vothung vengvenga,
or ini a God itutunre ol lale.

3

¹ O, ken! O thepol vet Titemer a God
ile asaguong aolonga aka i sungu i a it
nge, make i apet it ini itutunre ol! Na
i nunganga aka it ini a God itutunre ol!

Aveto toko ulue angare o ate it ve ini itutunre avele, eneke olemi mire nge a God avele.

² Na titeik sivengare, te voth ol ini a God itutunre, aveto ler mimiong panen anga aken o panine mos i a it nge rongan. Aveto lemire mire ako ve, panen tova Jisas i velpol, aro te velpol ranga ve ini mun i i, eneke aro te thepol i ako ve, i kene ini a God.

³ Na toko alavusnga aka o men sial tomo nge ole lemioong nge ur aken, o oma inga vothung riringa mo o riri ranga ve aka Krais i riri.

⁴ Na tokokoe areko o mosal inga nge vothung kerenga omanga, o avsa a God ile patorong. Na i nunganga aka vothung kerenga omanga ini vothung aka i avsa a God ile patorong.

⁵ Aveto lomumu mire ako ve, Krais i velpol mo aka aro i eltetpot ler vothung kerenga areken. Na vothung kerenga e avele i voth a i nge.

⁶ Na aro ve toko e i teo a Krais nge, aro i mos ol nge vothung kerenga omanga ol avele. Aveto aro ve toko e i mosal inga nge vothung kerenga omanga, aken lemire mire ako ve, ilemi mire nge a Krais avele, na i elo i a ilemi rongan.

⁷ Na tutukre, aro thomu o naktet thomu, aro vene mo toko e aro i palek-lek thomu. Na toko aka i mosal inga nge vothung vengvenga omanga, ini toko vengvenga ranga ve ini a Krais aka ini toko vengvenga.

⁸ Na toko aka i mostun inga nge vothung kerenga omanga ini a Satan ile, eneke nomenga vet aka me i patea nge ur alavusnga patenga, Satan i mosal inga nge vothung kerenga omanga. Na tepun aka God Itun i velpolu ake, mo aro i pakerenga a Satan ile omaing.

⁹ Na toko aka i velpol ini a God itun lale, aro i mos ol inga nge vothung kerenga omanga avele, eneke God ile mimiong i voth a i nge, na i pavurvur aro i panes ol vothung kerenga avele, eneke i velpol ini a God itun lale.

¹⁰ Naro lemire mire nge toko kathnga aka ini a God itun, na toko kathnga aka ini a Satan itun kene vava? Toko e aka i

oma vothung vengvenga avele eve ia sagu ititeinre avele, aken ini a God itun avele.

It omole omole aro ar sagu tokokoere

(Vonge 3:11-5:21)

I sivenga aka aro ar sagu pel.

¹¹ Na riong e aka thomu o nongpol i nomenga vet aka me i vene: Aro ar sagu pel.

¹² Na te mothong tova it ranga ve ini a Kein, aka ini a Satan ile toko, aka ini silal itein, mako i so rin i. Na i vava aka i so rin itein, e? I so rin i, eneke ini silal i, eneke isivenga ile vothung i kerenga, na itein ile vothung i vengveng.

¹³ Na titeikre, aro ve toko ulue angare oni silal thomu, aken aro o mothong tova o kukuk nge.

¹⁴ Na lemire mire ako ve, te lo lelpot rinong lemi lale, na te es ol a mimiong lemi, eneke ar sagu titeir lemioongare. Na toko e aka ia sagu avele, rongan i voth a rinong lemi.

¹⁵ Na toko e aka ini silal itein lemioonga e, aken ini toko aka i so rin toko aka a God itheki. Na lomumu mire aka ve, toko aka i so rin toko, mimiong aka aro ile vusonga avele, kene i voth a i nge avele.

¹⁶ Na lemire mire nge aka asaguong ini vothung le vanga, e? Eneke Jisas Krais i sungpot isivenga ile mimiong, mako i rin mo aka aro i opoal it. Na ile vothung aken i pathengal it nge vothung aka nge asaguong. Na it mun aro te sungpot mun sivenger ler mimiong mo aro i opoal titeir lemioongare.

¹⁷ Na aro ve toko lemioonga e aka ile ur elonga i voth, na i thepol itein lemioonga e aka i oror nge ur e, na aro ve i opoal i avele, aken lemire mire aka ve, God ile vothung aka nge asaguong i voth a i nge avele.

¹⁸ Na tutukre, te mothong tova ar sagu titeir lemioongare nge riong inga nge wor, aveto aro te opoal or nge ur pelie aka o oror nge, aka ranga ve God ile riong nunganga i ri nge.

It toko lemioongare aro te mit engeng a God itheki.

¹⁹ Na aro ve ar sagu titeir lemioongare venen aken, aken lemire mire ako ve, te voth a God ile riong nunganga lemi. Na nge aken te pavurvur aro te ngeip nge mitong a God itheki avele.

²⁰ Na aro ve opor lemi i teltun ar nge ur pelie, ur e avele, eneke God i aolonga nge ur areken i voth a opor lemi, na ilemi mire nge ur alavusnga aka ru i voth a it nge.

²¹ Na thomu areko ok sagu thomu, aro ve opor lemi i teltun ar avele, aken aro te mit engeng a God itheki,

²² naro te el ur kathnga aka te nong i a i nge, eneke te panes ile patorong, na te oma vothung aka ilemi sivenga nge.

²³ Na ile patorong i vene: Aro lemiro nge Itun a Jisas Krais, naro ar sagu pel ranga ve aka i tor ler nge.

²⁴ Na aro ve toko e i panes a God ile patorong, aken i teo a God nge, na God i teo mun a i nge. Na lemire mire aka God i teo a it nge vava? Eneke Ioni Riringa aka i sungu i a it nge kene i pathengal it nge ler teoong aken.

4

Aro te tongporum vet panongpolong elonga aka i es a God nge me eve avele.

¹ Na titeik sivengare, riong elnga le apaltetonga pulua o esu esa a pen elonga, ma o panongpol. Na o mothong tova lomumuo nge toko alavusnga aka o ri ve, God Ioni i voth a or nge, kene ole panongpolong. Aveto aro thomu o tongporum vet or nge ole panongpolong aken, aka i es a God nge me eve avele.

² Naro thomu o ate nge a God Ioni vava, e? Aro thomu o nongpol senu nge ole panongpolong. Na aro ve o ri ve Jisas Krais i velpol ini toko nunganga ake ru a ulue, aken ini toko aka God Ioni i voth a i nge.

³ Aveto tokokoe areko o oma riong aka i venen aken avele nge a Jisas, aken tamata le apaltetonga i voth a or nge, na o es a God nge me avele. O ranga ve ini a Krais ile ngarang aka nomenga o nongpol i aka ve, aro i es me, na ponange i velpol ol a ulue lale.

⁴ Na thomu tutukre, thomu ini a God ile na lomu mong or lale. Eneke God Ioni aka i voth a thomu nge, kene ile engenging i

aolonga rintet nge a Satan aka i voth a ulue ake, kene ile engenging.

⁵ Na o ri inga nge ur ulue anga, eneke o panes inga vothung ulue anga, make areko o panes vothung ulue anga o nongal inga ole riong.

⁶ Aveto it aka ini a God ile. Na areko oleme mire nge ur aka God i sis ve aro o oma i, aro o nongal ler riong. Aveto areko or ini a God ile avele, aro o nongal ler riong avele. Na nge vothung inga aken, te pavurvur aka aro te ate nge Oni Riringa aka i pavelpol riong nunganga, na tamata kerenga areko o pavelpol riong le apaltetonga.

Aro ar sagu tokokoere, eneke God ia sagu tel it.

⁷ Na titeik sivengare, aro ar sagu pel, eneke vothung aka nge asaguong i es a God nge me. Na toko e aka ia sagu tokokoere, ini a God itun aka God i pavelpol mimiong ponganga a i nge, na ilemi mire senu nge ur aka God i sis ve aro i oma i.

⁸ Na toko e aka ia sagu tokokoere avele, aken ilemi mire nge ur aka God i sis ve aro i oma i, kene avele, eneke God ilemi alavusnga ini asaguong popepenga.

⁹ Na God i pathengal it aka ve, ia sagu rintet it, nge aka i pakeu Itun omolenga aken, a ulue me mo i sung mimiong aka aro ile vusonga avele a it nge, aka nge ile rinong.

¹⁰ Na vothung aka nge asaguong kene i vava, e? Ini vothung aka ar sagu a God, kene avele. Aveto ini vothung aka God ia sagu it, mako i pakeu Itun aken me, mo i sungpot isivenga ile mimiong, aka nge ler vothung kerenga eltetpotnga.

¹¹ Na titeik sivengare, God ia sagu it venen aken, mako i sivenga aka aro it mun aro ar sagu pel.

¹² Na toko e avele i thepol a God. Aveto aro ve ar sagu pel, aken God i voth a it nge, na ile vothung aka nge asaguong i alarorol a it nge.

¹³ Na lemire mire aka ve, te teo a God nge, na God i teo mun a it nge vene: Eneke i sungu isivenga Ioni a it nge.

¹⁴ Na te thepol ur aka God i oma i lale, aka ranga ve i pakeu Itun me, mo i

velpol ini toko alavusnga ake ru a ulue ole Pamimionga, make te panongpol ol nge aken.

¹⁵ Na aro ve toko e i nutun ve, Jisas ini a God Itun, aken God i teo a i nge, na i teo mun a God nge.

¹⁶ Make ranga ve te thepol a God ile asaguong a it nge, na lemiro nge ile asaguong aken.

God ilemi alavusnga ini asaguong popepenga. Na toko e ako i mimi a asaguong lemi, aken i teo a God nge, na God i teo mun a i nge.

¹⁷ Na aro ve te teo a i nge venen aken, vothung ako nge asaguong, kene i alarorol a ler mimiong, eneke it ranga ve ini a Krais ake ru a ulue. Na i venen aken, mako aro te mit engeng nge nang ako aro te mit nge riong a God itheki.

¹⁸ Na asaguong ako i venen aken, ngeipong i voth a lemi avele, eneke aro ve vothung ako nge asaguong i voth engeng a toko e nge, aken i eltetpot ngeipong a i nge. Maken aro ve toko e i ngeip nge a God, aken ile asaguong nge a God i alarorol avele, eneke rongan i ngeip nge a God ve aro i paomelal i nge ile vothung kerenga.

¹⁹ Na it kene ar sagu a God tomo nge tokokoere, eneke God ia sagu tel it a mukaling.

²⁰ Na aro ve toko e i ri ve ia sagu a God, aveto ini silal itein lemioonga e, aken ini toko le apaltetonga, eneke toko e ako ia sagu itein avele ako i thepol i nge itheki, i pavurvur mun avele ako aro ia sagu a God ako i thepol i nge itheki avele.

²¹ Na patorong ako te el i a i nge, kene i vene: Toko ako ia sagu a God, aro ia sagu mun itein lemioongare.

5

It toko lemioongare ler mong vothung ulue anga ile engenging.

¹ Na toko alavusnga ake olemio ve, Jisas ini toko ake God i ateal i ve aro i el werer ile tokokoere, aken or ini a God itutun areko i pavropol mimiong ponganga a or nge. Na toko alavusnga ake oa sagu

Titemer a God, akennga aro oa sagu mun itutunre.

² Naro lemir mire ake ve, ar sagu rintet a God itutunre vava, e? Eneke ar sagu a God na te panes ile patorong alavusnga.

³ Na aro ve ar sagu a God, aken aro te panes mun ile patorong alavusnga. Na ile patorong areken i pavurvur aro i sungu matheong a it nge avele.

⁴ Eneke it ini itutun areko i pavropol mimiong ponganga a it nge, na ler mong vothung ulue anga. Na ler mong vothung ulue anga aken lale, ake nge ler lemioong nge a God.

⁵ Na anga i pavurvur aro ile mong vothung ulue anga, e? Ini inga areko olemio ve, Jisas ini a God Itun.

God i ritet nge Itun.

⁶ Na lemir mire ake ve, Jisas Krais ini a God Itun ake nge paatealing or aini.* Na omole i velpol nge ake i es me ma i el paninuong nge thei. Na aininga i velpol nge ake ia mla i palalas a won ngoronga nge. Na lemir mire ake ve, Jisas ini a God Itun nge paatealing omole inga ake nge paninuong elnga, kene avele. Aveto lemir mire ake ve, ini a God Itun nge paatealing or aini, ake nge paninuong elnga tomo mun nge ia mla ake i palalas a won ngoronga nge. Na Oni Riringa mun kene i ritet mun it nge venen aken. Na lemiro nge ile riong aken, eneke ile riong alavusnga i nunganga inga.

⁷ Na ur or me aken o ritet ve, Jisas ini a God Itun.

⁸ Na ur or me aken ini Oni Riringa, paninuong, na ia mla, na or alame aken ole ritetong i thun inga.

⁹ Na i nunganga ake it tokokoere lemiro nge riong ake tokokoere o ritet it nge. Aveto riong ake God i ritet it nge, kene i mukal nge ole riong, eneke i es aken a God nge me, na ini a God ake i ritet it nge Itun.

¹⁰ Mako toko e ake ilemio nge a God Itun, aken i elo a God ile riong aken a ilemi lale. Aveto toko e ake ilemio nge a God ile riong avele, i ranga ve ake i apet a God ini toko le

* ^{5:6:} Lemir mire senu avele, aveto ava paatealing or aini ake kene i ri nge a God ikei ake i espot a Pen a Urvet me. O thepol a Matiu 3:17 and Jon 12:28.

apaltetong, eneke ilemio avele nge a God ile riong ako i ri nge Itun.

¹¹ Na riong nunganga aka God i ritet i a it nge lale kene i vene: God i sungu mimiong aka aro ile vusonga avele a it nge lale. Na mimiong aken tepun i voth inga a Itun nge.

¹² Mako toko e aka i elo a God Itun a ilemi, aka nge ile lemioong nge i, aken i el mun mimiong aka aro ile vusonga avele a i nge. Aveto toko e aka i elo a God Itun a ilemi avele, aken mimiong aka aro ile vusonga avele, kene i voth a i nge avele.

I pavurvur aro lemire mire aka ve, mimiong aka aro ile vusonga avele, kene i voth a it nge lale.

¹³ Na tho wat lek riong vene ake, na tho wat i a thomu areko lomumuo nge a God Itun, mo aka aro lomumu mire aka ve, thomu o el mimiong aka aro ile vusonga avele lale.

¹⁴ Mako te mit engeng a God itheki, eneke lemire mire aka ve, aro ve ler non-gong i panes ilemi, aken aro i nongpol ler nongong aken.

¹⁵ Na aro ve lemire mire aka ve, i nongpol ler nongong aken, aken lemire mire mun aka ve, ur kathnga aka te nong i a i nge, kene aro i sungu i a it nge.

¹⁶ Maken aro ve toko e i thepol itein lemioonga e aka i matu nge vothung kerenga, aveto vothung kerenga aken i pavurvur nge esuong a won sesenga nge avele, aken i sivenga aka aro i nong a God nge ve aro i opoal toko aken. Naro God i pavropol werer ile mimiong aka i panes a Krais nge. Na tho ri inga ake nge tokokoe areko o oma vothung kerenga aka i pavurvur avele nge esuong a won sesenga nge. Ine vothung kerenga e aka i voth aka i pavurvur aro i paeso toko a won sesenga nge.[†] Na tho ri ve aro thomu o nong nge toko aka i oma vothung aken, kene avele.

¹⁷ Ine vothung alavusnga aka i vengveng avele, ini vothung kerenga. Na vothung kerenga pelie aka i voth aka aro i paeso toko a won sesenga nge avele.

¹⁸ Na lemire mire aka ve, toko alavusnga areko or ini a God itutunre aka i pavropol mimiong ponganga a or nge, kene aro o mos ol nge vothung kerenga omanga ol avele. Aveto evelelnga God Itun i paseral ole, na Satan aka i kerenga selele, kene i pavurvur aro i pakerenga or avele.

¹⁹ Na lemire mire mun aka ve, it ini a God itutunre, aveto ulue alavusnga ake i voth a Satan ile engenging lemi.

²⁰ Na lemire mire mun aka ve, God Itun i es me lale, na i sungu lemi rumong ninenga a it nge, mo aka aro lemire mire senu nge ur aka God nunganga i sis ve aro te oma i. Na te teo a God nunganga nge, aka nge ler teoong a Itun a Jisas Krais nge. Na Jisas Krais ini a God nunganga. Na ini mimiong aka aro ile vusonga avele kene tepun.

²¹ Maken tutukre, aro thomu o voth melanga nge god le apaltetongare olotual-nга.

Na i re aken. I vus.

[†] 5:16: Toko powe ninengare o ri ve vothung kerenga aka i paeso toko a won sesenga nge i ranga ve aka o lel okime nge a God, eve oni silal a God itutunre, eve o apet a God ini toko le apaltetong.

Malueng aininga ako Jon i wat i 2 Jon

Ritetong nge a 2 Jon

Jon aka ini a Krais ile pakeke aka i tolu i wat malueng ake. Na nge wop lemi aken panongpolngare o esu esa a pen elonga nge Panongpolong Sivenga panongpolnga. Jon i sis ve aro toko lemioongare aro oa sagu pel, naro o nongpoo panongpolnga areken. Aveto i patoror ve aro o naktet or nge pamirealonga le apaltetonga areko o rivenga toko ne-neanga a Jisas ini a God Itun avele, na o rivenga mun aka ini toko aka God i ateal i ve aro i el werer ile tokokoere kene avele. Jon ini plong ve aro o nongpoo areko o venen aken, aro vene mo o opoal ole riong le apaltetonga areken.

Aro te krim engeng a God ile riong nunganga, naro te naktet it nge areko o panongpol nge riong relnga

¹ Tho ini tolok a Jon aka tho ini lotu a mukalinga.

Tho wat malueng ake a thomu lotuongare nge, aka o ranga ve ini seng a urvet tomo nge itutun areko God i ateal or ve ini ile, na ok sagu rintet mun thomu, eneke lomumuo mun nge a God ile riong nunganga. Na ini inga engek aka ok sagu thomu avele, aveto toko alavusnga areko oleli mire mun nge a God ile riong nunganga, oa sagu mun thomu.

² Eneke God ile riong nunganga i mimi a it nge, naro i voth tomo ol nge it aka aro ile vusonga avele.

³ Na tho nong ve aro it kene aro te el themosaling, na lemi esaling, na lemi moring aka a Titemer a God tomo mun nge Itun a Jisas Krais nge, eneke ile riong nunganga i voth a it nge, make ar sagu pel.

Aro te panes vothung aka nge tokokoere oasagunga.

⁴ Na lemik i sivenga rintet nge aka tho nongpol aka ve, thomu pelie rongan o panes a God ile riong nunganga, ranga ve aka Titemer a God i patorit nge ve aro te panes i.

⁵ Na tho sis ve aro tho wat torong a thomu lotuongare nge aka ok sagu thomu ve aro ar sagu pel. Na patorong ake ini ponganga aka tho wat i a thomu nge, kene avele. Ini patorong ake te nongpol vet i nomenga aka me i patea nge aka te elo a Krais a lemir.

⁶ Na vothung aka nge asaguong, kene i vene: Aro te panes ile patorong alavusnga. Na patorong ake thomu o nongpol vet i nomenga aka me kene i vene: Aro thomu o panes vothung aka nge asaguong nge lomumu alavusnga.

Aro te krim engeng a Krais ile riong.

⁷ Naro thomu o naktet thomu venen aken, eneke toko le apaltetonga pulua o es a pen elonga ake ru a ulue mo aro o paleklek tokokoere. Na or ini areko o lela ve, "Jisas Krais i velpol ini toko nunganga avele." Na toko e aka i venen aken ini toko le apaltetonga aka i paleklek tokokoere, na ini a Jisas Krais ile ngarang.

⁸ Aro thomu o naktet senu thomu, aro vene mo omu avar nge ur aka te um engeng nge. Aveto aro o mit engeng mo aro o el olongomu alavusnga.

⁹ Na aro ve toko e i krim engeng a Krais ile patoraling avele, na i avsa ma i panes riong relnga e, aken God i voth tomo nge i avele. Aveto aro ve toko e i krim engeng a Krais ile patoraling, aken Titemer a God tomo nge Itun o voth a i nge.

¹⁰ Na aro ve toko e i es a thomu nge na i panongpol thomu, aveto i panongpol thomu nge a Krais ile patoraling ake avele, o mothong tova o nongpoo i a lomu vel, na o mothong tova o theal i.

¹¹ Na toko aka i nongpoo toko aken, aken i supo tomo nge i nge ile omaing kerenga aken.

Riong patopalalnga.

¹² Na lek riong puluanga kene rongan i voth aka tho sis ve aro tho sungu i a thomu nge, aveto nik plong ve aro tho wat i nge malueng. Aveto tho sis ve aro tho es wot,

naro te thepol pel thekir, na te leng leng,
mo ako aro lemir sivenga nge pel.

¹³ Na toko lotuongare a pen ake, ako
God i ateal or ve ini ile, na o ranga ve ini
lulumuere na titeumuere, na o pasungalu
ole nang sivenga a thomu nge.

Na i re aken. I vus.

Malueng menga aka Jon i wat i 3 Jon

Ritetong nge a 3 Jon

Jon aka ini a Krais ile pakeke aka i toloku i wat malueng ake, na ilemi sivenga nge a Gaius, eneke i nongpoo na i opoal panongpolngare aka o es a i nge. (O thepol ritetong nge a 2 Jon) Aveto Jon i vol toko kerenga a Diotrepes, eneke i nongpoo panongpolnga areken avele, na i mit roal lotuongare nge toko areken oopoalnga mun. Na aro ve pelie o nongpoo panongpolnga areken, Diotrepes i pavus or nge lotuong.

Aro te opoal a God ile umongare

Jon i ri sivenga nge a Gaius.

¹ Tho ini tolok a Jon aka tho ini lotu a mukalinga.

Tho wat malueng ake a wong a Gaius nge, wong ini toko aka ok sagu rintet wong, eneke lomumo mun nge a God ile riong nunganga.

² Na teik sivenga, tho nong a God nge ve, ur alavusnga aka aro wong oma i aro i sivenga. Naro num peti i sivenga inga, ranga ve aka lemik mire aka lom lemioong i voth senu inga.

³ Na lemik sivenga rintet nge aka titeir pelie aka o velpol ma o ria tho ve, wong mit engeng inga nge a God ile riong nunganga panesnga, na rongan ong mimi a riong nunganga aken lemi.

⁴ Na ur aka i pasenu rintet lemik ini inga tova tho nongpol aka ve, tutuk lemioongare rongan o panes inga a God ile riong nunganga. Na ur e avele i aolonga nge aken.

Gaius i oma omaing sivenga.

⁵ Na teik sivenga, wong panes senu a God ilemi nge lom omaing sivenga aka ong nongpoo toko lemioongare, aka or ini long aka o velpol a ong nge.

⁶ Na pelie a or nge o ria lotuongare nge wop ake, nge lom asaguong aken. Na eve pelie o patea mun ole esong nge wop aka ru o es nge, i sivenga aka aro ong opoal or nge ur pelie nge ole esong aken, ranga ve aka God i sis ve aro ong oma i.

⁷ Naro wong oma venen aken nge or, eneke o oma aka ini a Krais ile omaing nge ole esong aken. Na o el opoaling e avele nge areko olemio nge Krais avele.

⁸ Maken i sivenga aka aro it toko lemioongare aro te opoal tokokoe areko o venen vet aken, mo aro te um tomo nge or nge a God ile riong nunganga panongpolnga.

Diotrepes i oma vothung kerenga.

⁹ Na tho wat malueng lale nge nongpooing a vothung aken, ma tho pasong i a toko lotuongare nge. Aveto Diotrepes i sis ve aro ienga inga ini lomu mukalinga, make i lel ikime nge them.

¹⁰ Make aro ve tho es ol a thomu nge, aro tho pamilempot ol vothung aka i oma i, aka i oma riong kerenga na riong le apal-tetonga aka nge them. Na ilemi ngo senu nge vothung areken avele, mako i rong esa mun vothung kerenga mun pelie nge, aka ranga ve i nongpoo toko lemioongare a ile vel nge avele. Na aro ve toko pelie o sis ve aro o nongpoo tokokoe areken a ole vel, aken aro i mit roal or nge, na i pavus mun or nge lotuong.

Demitrius i oma vothung sivenga.

¹¹ Na teik sivenga, mothong tova vothung kerenga e aka i venen aken aro i pakerenga lom vothung sivenga, aveto aro ong kis inga vothung sivenga omanga. Na toko aka i oma vothung sivenga ini a God itun. Na toko aka i oma vothung kerenga, aken ilemi mire nge a God avele.

¹² Naro wong nongpoo a Demitrius, eneke toko alavusnga o ritet nge omaing sivenga aka i oma i. Na ile vothung aken i panes mun a God ile riong nunganga. Na them mun them ritet mun nge ile omaing sivenga aken, na lomum mire aka lemem ritetong aken i nunganga.

Jon i sis ve aro i thepol a Gaius.

¹³ Na lek riong puluanga kene rongan i voth ako tho sis ve aro tho sungu i a wong nge, aveto nik plong ve tho wat i nge malueng.

¹⁴ Na lelle inga atike na tho sis ve aro tho velpol a wong nge mo te leng leng tomo nge pel.

Na tho nong ve aro lemi moring aro i voth tomo nge wong. Na thongongom areke o voth ake, o pasungalu ole nang sivenga a wong nge wot. Naro wong pasungalu mun lek nang sivenga a then-gengek omole omolenga re nge.

Na i re aken. I vus.

Malueng ako Jut i wat i Jut Ritetong nge a Jut

Ava Jut aka i wat malueng ake ini a Jisas iteinnga (O thepol a Matiu 13:55 na Mak 6:3) na ini a Jems itein mun. (1:1 na o thopol mun ritetong nge a Jems) Na riong pulua aka i voth a malueng ake lemi i ranga ve ini riong pelie aka i voth a 2 Pita 2:1-22. Na nge wop lemi aken, tokokoe areko o kerenga rintet o supo tomo nge toko lemioongare nge lotu, na o eksing Panongpolong Sivenga na o ri ve, i sivenga aka aro toko lemioongare o oma vothung kerenga. (1:4) Aveto Jut i palemi rumal toko lemioongare ve, i pavurvur aka aro Panongpolong Sivenga i eksing avele. (1:3) Na i rirum nge tenesing pelie aka o voth a God ile erere nomenganga mo i pathengal aka ve, God aro i paomelal tokokoe areko o panes vothung kerenga venen aken. (1:5-16)

Aro thomu o naktet lomu lemioong, na o lel kimomu nge areko ole ngarang tomo nge Panongpolong Sivenga

¹ Tho a Jut aka ini a Jisas Krais itein nunganga na tho ini ile toko umonga, na tho ini a Jems* itein nunganga mun.

Tho wat malueng ake a thomu areko God i lengpot thomu lale ve ini ile, na o voth a ar Vovo a God ile asaguong lemi tomo mun nge a Jisas Krais ile thealing lemi.

² Na tho nong ve aro God ile themosaling na ile lemi moring tomo mun nge ile asaguong aro i vual rintet a thomu nge.

O naktet thomu nge pamirealonga le apaltetongare aka o voth tomo nge thomu.

³ Titeik sivengare, tho sis rintet ve aro tho wat a thomu nge, nge pamimiiong aka it alavusnga te el i, aveto riong pelie i oma tho ma lelik ve aro tho wat ol vene: Aro tho pator thomu ve aro o mit engeng nge

ur areko lomumuo nge lale, na o pun tomo nge pamirealonga le apaltetongare, eneke Panongpolong Sivenga aka lomumuo nge, i eksingu eksing avele, God i sungu i pa omole inga a ile tokokoere nge.

⁴ Naro thomu o mit engeng venen aken, eneke toko pelie aka o lel okime nge a God, o re wolteto a thomu nge lale. Na nomenga God ile erere i ritet nge paomelaling aka aro o el i. Na o eksing ler God ile themosaling, ma o ri ve aro te oma inga vothung aka nge toko na seng aomnaga na vothung kerenga mun pelie, eneke o ri ve God i pamimi it aken nge ile themosaling inga. Aveto o lel okime nge a Jisas Krais aka ienga inga ini ar Pomnga na ini ar os.

⁵ Na i nunganga aka lomumu i nine nge ur areke, aveto tho sis ve aro tho palemi rumal werer thomu nge ur aka Toko Pomnga i oma i, aka i el werer Israelre a Isip me, aveto palolo avele, nako i pakerenga oa pelie aka olemio nge i avele.

⁶ Na e mun e aka nge ensel pelie aka God i paeso toko pelie a osa thewo, ave o voth pis nge ole menong aken avele, aveto o lo lelpot nge ole pen aka God i pamenu or nge, mako God i kino or nge sen, na i paeso or a paomelalinga a pen aka ia midingdeng. Naro o voth venen aken evelelnga i mulal nge nang pomnga aka aro o mit nge riong a God itheki.

⁷ Na Sodom ome a Gomora angare tomo nge areko o voth toth a or nge, ole vothung i ranga ve ini ensel areken ole vothung, nge aka o engeng inga nge toko na seng aomnaga, na vothung aka i kerenga rintet nge aken, ini ole vothung aka o sis ve aro o ngo tomo nge areko osivanga i rel nge or. Na paomelaling aka o el i, ini won sesenga aka aro ile vusonga avele. Na aken ini patongrumong nge areko aro o el paomelaling a God nge.

⁸ Aveto pamirealonga le apaltetongare aka o voth tomo nge thomu o venen aken mun. Ole oni theong i oma or, mako o oma pelekpol oni peti, na oni plong rintet ve aro o voth a mukalinga e isa thewo, na o voltet tamatare aka o voth roro nge or.

* ^{1:1:} Jut na Jems na Jisas oa nina ini a Maria, na Jems ini a Jisas Krais ile pakeke na ini toko lemioonga areko o voth a Jerusalem oa pomnga.

⁹ Aveto enselre ole mukalinga ako ini a Maikel i oma venen aken avele. Nomenaga nge ako i ri tomo nge a Satan, na or paini o pun pel nge riong ako nge a Moses ini peti elnga, na ilemi ve, aken ini ile omaing avele ako aro i vol a Satan mo i teltun ia, mako i ri vene, "Toko Pomnga aro i vol ong."

¹⁰ Aveto pamirealonga le apaltetonga areken o vol ur areko olemi mire nge avele. Na o ranga ve ini mekerem wengare ako ole mire avele, na o panes inga ur aka i mita a olemi me, na ole vothung aken aro i pakerenga or.

¹¹ Patong or! Eneke o panes a Kein[†] ile vothung aka i so rin itein. Na o sungpot osivenga ole mimiong nge umtun elnga ranga ve aka Balam[‡] i oma i. Na o ri pompom nge ole mukalingare ranga ve aka Kora[§] i oma i, naro o el kerengaing nge, ranga ve aka Kora i el i.

¹² Na or ini toko akopngare aka o pavelpol le maraing a thomu nge, eneke ole mara avele nge ole vothung kerenga areken omanga nge aka o an tomo nge thomu toko lemioongare, nge omu aning aka i patheng lomu asagupeling. Na nge aning aken oleli voth inga nge osivenga oopo lemia. Na o ranga ve ini vit theki aka thue engenga i thutet i na vit i mol ol avele. Na o ranga ve ini won areko o mon avele nge ole moning po. Na o ranga ve ini won menengare aka o rin lale na o lelrisa i.

¹³ Na ranga ve ini rua loliknga le punong aka i pavelpol mesmes akopnga a rua wo peti elonga, tokokoe areken o pesrou nge vothung le marainga omanga avele, na o pango pat ol i a tokokoere nge venen aken. Na o ranga ve ini mun i topoa areko o mopespot, na palolo avele na o eso a paomelalinga a pen aka ia midingdeng aka God i monsi lale, naro o voth ol nge evelelnga aka aro ile vusonga avele.

¹⁴ Na Adam itun itevinga itun itevinga ini a Enok ini a God ile riong elnga aka i ritet nomenga nge pamirealonga le apaltetonga areken na i ri vene, "O thepol, Toko

Pomnga aro i es tomou me nge ile ensel riringare or tausen pulua,

¹⁵ mo aro i pamit toko alavusngare nge riong. Naro i teltun areko o lel okime nge a God, nge ole vothung kerenga areko o oma i nge aka o panes a God avele. Naro i teltun mun oa nge ole riong kerenga areko o ri tangatun nge a God." Na aken ini a Enok ile riong aka i ritet nge.

¹⁶ Na riong aken i ri nge pamirealonga le apaltetonga areko o voth tomo nge thomu. Na or ini tokokoe areko o ri pompom, na okei palil, na o panes inga vothung kerenga areko oni peti i vurpoltun i, na owo a thei aolo rin nge osivenga, na o pamolomolotun toko na sengre mo o opoal osivenga.

Aro thomu o mit engeng nge lomu lemioong na nge matheong potunga.

¹⁷ Aveto titeik sivengare, aro lomumu rum senu nge riong aka ar Pomnga a Jisas Krais ile pakekere o ritet i a thomu nge lale,

¹⁸ aka o ri ve, "Nge nang patopalalnga, tokokoe areko o ri sililal nge thomu aro o velpol, naro o panes inga vothung kerenga areko oni peti i vurpoltun i, na nge aken o lel okime nge a God ipanesnga."

¹⁹ Na or ini tokokoe areko o pavelpol omreupeling, na o panes inga vothung ulue anga, na Oni Riringa i voth a or nge avele.

²⁰ Aveto thomu titeik sivengare, aro thomu o paengeng lomu mitong nge lomu lemioong aka i riri rintet. Naro thomu o panes inga Oni Riringa ilemi nge lomu nongong.

²¹ Aro thomu o voth inga nge a God ile asaguong lemi, nge aka o men tetal ar Pomnga a Jisas Krais ve aro i sungu mimiong aka aro ile vusonga avele a thomu nge, aka a ile themosaling lemi.

²² Na toko pelie rongan oleli sulung salang nge ole lemioong, aro thomu o themosal or.

²³ Na ranga ve aka toko mun pelie o mata ol a won sesenga nge, aro thomu o titpoa or mo o el mimiong. Na toko mun pelie ole vothung i kerenga selele na

[†] **1:11:** O thepol a Stat 4:3-8. [‡] **1:11:** O thopol tenesing nge a Balam aka a Namba 22-24. [§] **1:11:** O thepol a Namba 16.

i ranga ve ini ole teunong ako i akop rintet, aro lomumu esal or, aveto aro o naktet senu thomu, aro vene mo ole vothung akopnga aken aro i teo mun a thomu nge.

Aro te risea a God iion roro.

²⁴ Na God i pavurvur nge thealngomu ako aro thomu o matu avele. Na i pavurvur mun aka aro i pamensenu thomu a itheki mo o thepol ia malmaling Pen a Urvet anga. Na nge ile pamensenuong aken omu theki e avele. Aken aro thomu o pesrou nge iriseanga avele.

²⁵ Na ienginga ini a God na ini ler Pamimionga. Naro te risea i aka nge ler teoong a ar Pomnga a Jisas Krais nge, eneke malmaling a urvet i voth a i nge, na i pomnga rintet, na ile engenging i aolonga rintet, na ur alavusnga o voth a isa thewo. Na ur areko o voth a i nge venen aken nomenga vet aka me, na ponange, naro i voth evelelnga venen aken a i nge aka aro ile vusonga avele. I nunganga.

Na i re aken. I vus.

Jon ile malueng ako i ritet nge ur areko aro i velpol panen

Riong Ngopatnga Ritetong nge a Riong Ngopatnga

Jon i watu ur areko Krais i pango patu i a nge, na tovu po aka ur areken i velpol a i nge, kene tokokoere olemi mire senu nge avele, aveto toko powe ninengare olemi ve i velpol nge tovu po a 95 A.D. Na nge wop lemi aken, nepes a Donitian ini a Romre ole nepes, na i ri ve, isivenga ini a Toko Pomnga a god, na toko pulua aka a epee pulua aka o voth a Romre osa thewo kene o lotual nepes aken. Aveto toko lemioongare o lotual a Romre ole nepes aken avele, eneke olemio ve Toko Pomnga omole inga i voth, ini a Jisas Krais aka ini a God Itun. Maken Romre o patea toko lemioongare opakerenganga, na sisong aolonga pelie i velpoltun toko lemioonga pelie. (2:10; 2:13; 3:10; 6:9) Na Jon aka ini a Jisas ile pakeke, kene o paeso i a mang a midenga aka a mtho a Patmos.

Na riong aolonga aka i voth a malueng ake lemi i vene: Aro te mit engeng nge ler lemioong, naro ler mong tongporumongre, eneke aka nge ulue ile vusong, ar Pomnga a Jisas Krais kene aro ile mong selele a Satan ome ile tamata kerengare na ile tokokoere. Malueng ake i ritet nge a God ile paomelaling aolilongaere aka aro i paomelal toko kerengare nge. Aveto Krais i pator toko lemioongare ve, aro o mit engeng nge ole lemioong, na nge ole vothung sivenga omanga, i pavurvur nge nang le vusonga mo aro God i oma senu nge or.

Erere ake i rel nge a God ile erere pulua, eneke i vual nge riong agelalnga na ur pelie oa sei, na sei areken i ranga ve ini sei pelie aka o voth nge erere nomenganga aka Daniel i wat i. Sei areken ini riong agelalnga na omirenga i voth. Ur pelie i klip ve aro te el imirenga, ave i nine aka ve, God aro ile mong selele ur alavusnga.

Maken aro toko lemioongare aro o mit engeng nge ole lemioong.

Nge vonge teltelinga, Jon i thepol a Jisas Krais aka aro i pangopat ur areken a i nge. Na nge vonge 2-3 Krais i pator toko lotuongare aka o voth a rem or limai aka a epee a Esia ve aro o mit engeng nge tongporumongre. Na vonge 4-5 i pathengal it ve, God i sivenga rintet, na i aolonga rintet tomo mun nge Itun a Jisas aka ini Sipsip Tun aka i paglokpot sthong or limai aka o pathengal it nge a God ile paomelaling aolonga. Na sthong limainga (6:1-8:1) i pathengal it nge kuth or limai aka paomelaling aolonga rintetnga o voth mun nge. (8:2-11:19) Na a rumongaling me, oto or limai o voth aka o vual nge a God ile lemi klingong. (15:1-16:21) Na Satan, mekerem tevivinga, riong elnga le apal tetonga na seng sovengalo anga, or alapenel o pavurvur aka aro o lo nge a God ile lemi klingong aken, kene avele. (12:1-14:20; 17:1-19:5) Lama Krais aro i lo wereru me naro i teltun rinong a toko kerenga alavusngare nge, (19:11-20:15) aveto toko lemioongare aro o eso nge Pen a Urvet ponganga na ulue ponganga aka i sivenga rintet, naro o mimi nge aka aro ile vusonga avele. (21:1-22:17)

Jisas Krais i pasong ile riong a toko lemioongare nge aka o voth a rem or limai

(Vonge 1:1-3:22)

¹ Erere ake i ritet nge ur areko aro i velpol. Na God i pathengal i a Jisas Krais nge, mo aro i pathengal mun i a ile umongare nge, na i ritet nge ur areko aro i velpol lelle inga atike. Na Jisas i pake ile ensel omole mo aro i pathengal ur areken a ile umonga a Jon nge.

² Na tho a Jon, tho ritet nge ur areko tho thopol i, na nge ur areko tho nongpol i a God nge, na nge ur areko Jisas Krais i pathengal i a tho nge.

³ Na sapase toko aka i tital viringa a God ile riong ake a tokokoere nge, na sapase mun areko o nongpol i na o nongal i, eneke i toth lale aka aro God i pavelpol nunganga ur areko tho wat i a erere ake nge.

Jon i wat erere ake a toko lotuongare nge, aka o voth a rem or limai aka a epee a Esia.

⁴ Tho a Jon, tho wat erere ake a thomu toko lotuongare nge, aka o voth a rem or limai aka a epee a Esia.

God ako i voth nomenga, na i pavurvur ponange, naro i es mun me, aro i sung lemi moring na ile themosaling a thomu nge. Na God Ioni Riringa aro i sung mun lemi moring na ile themosaling a thomu nge. Na Oni Riringa aken ile engenging i mukal nge ur alavusnga, na i voth a God itheki lemi, aka i men a ile nepes a menonga nge.

⁵ Na Jisas Krais aro i sung mun lemi moring na ile themosaling a thomu nge. Ini toko aka i panongpol vengveng a God ile riong, na ile panongpolong aken i pavurvur aro toko na sengre aro o nongal senu i, na olemio nge. Na ini toko teltelnga aka i rin na i mimi werera. Na ini nepesre aka o voth a ulue oa nepes.

Na ia sagu it. Na i rin mo aro te vthopot nge ler vothung kerengare.

⁶ Na i oma it mo aro te velpol ini toko avlung aka ini Itema a God ile umongare ranga ve ini prisre. Na i venen aken, mako tho nong ve aro Jisas Krais ile engenging na iriseanga aro i voth evelelga aka aro ile vusonga avele. I nunganga.

⁷ Thepol, aro i es tomou nge songen me!

Naro toko alavusnga aro o thopol i nge otheki,

tomo nge tokokoe areko o pun i nge peang.

Na toko alavusnga ake ru a ulue aro olemi kerere,

na o tang nge ile velpoling aken.

Naro i velpol vene re aken. I nun-ganga.

⁸ Na Toko Pomnga a God aka i voth nomenga, i pavurvur ponange, naro i es me, kene i ri vene: “Tho ini a God aka lek engenging i aolonga rintet, na tho ini ur alavusnga opateanga, na ole vusonga mun.”

Jon i thopol a Krais.

⁹ Tho a Jon aka ini titeumu aka tho wat malueng ake a thomu nge wot, na tho

el mun matheong tomo nge thomu nge a Jisas ipanesnga, naro tho men tomo nge thomu nge a God ile menong e nepes. Na te el inga matheong alavusnga aka i velpoltun it, eneke te panes a Jisas. Mako o rere tho, na o paespot tho a mtho a Patmos, eneke oni plong ve aro tho pakomkomes panongpolong nge a God ile riong, tomo nge riong nunganga aka Jisas i pathengal i a tho nge.

¹⁰ Na nge a Toko Pomnga ile nang omole, Oni Riringa i rero tho, na tho nongpol a kimek aka toko ikei aka i ri viringa, na i avvuv ranga ve ini kuth.

¹¹ Ma i ri vene, “Watu ur areko aro ong thopol i a erere nge na pasong i a toko lotuongare nge aka o voth a rem or limai aka ini a Epesus, na Smerna, na Pergamum, na Taiataira, na Sardis, na Piladelpia na Laodisia.”

¹² Lamako tho eksinga mo aro tho thopol toko aka i ria tho nge me, ma tho thopol ine theki lalainga le mitainga or limai aka o oma i nge gol.

¹³ Na toko e aka i ranga ve ini a Toko Pomnga Itun* i mit a theki lalainga le mitainga areken nge a lemi pat, na i pavlestun inga nge seltun lollonga, na i panaklesu nanaing aka ini gol a ipakei.

¹⁴ Na ipo thoi i veleles rintet ranga ve ini songen, na itheki i tolilis ranga ve ini won sesenga ile lallaing.

¹⁵ Na ieve i tolilis rintet ranga ve ini brast[†] aka o ongtun i ponganga mo i riri rintet ma i tukling tuklilng, na tho nongpol ikei aka i tang aolonga ranga ve ini awong le alululong.

¹⁶ Na i krim ine sivemit or limai a imeni sivenga nge. Na bainat aka iwowonga i voth epee epee i oselpot a iwo me. Na itheki lemi i tolilis rintet ranga ve ini nang theki aka i in penang lopat.

¹⁷ Na tho thopol i, mako tho ngou a ieve tepun ranga ve ini toko aka i rin lale, ave i ronga imeni sivenga a tho nge ma i ria ve, “Wong mothong tova wong ngange, tho ini ur alavusnga opateanga na ole vusonga mun.

* ^{1:13:} O thepol a Daniel 7:13; 10:5. † ^{1:15:} Bras ini ur aka o oma tang a tap nge na ur pelie mun.

¹⁸ Tho ini toko ako mimiong i voth a tho nge. Nomenga tho rin, ave ponange tho mimia ol naro lek vusonga ol avele. Na lek engenging i pavurvur nge toko pun rinnga eve ipamimbinga, na tho pavurvur mun ako aro tho paeso toko a Wali eve tho eltetpot i nge.

¹⁹ "Naro ong watu ur areko ong thopol i ponange, naro ong watu mun ur areko aro i velpol panen.

²⁰ Na ong thopol sivemit or limai ake o voth a menik sivenga nge, na ong thopol mun theki lalainga le mitainga or limai ako o oma i nge gol, na paatealing inkinnenga nge ur areken i vene: Na sivemit or limai ake i paateal nge lotuongare ako nge rem or limai aton othealngare,[‡] na theki lalainga le mitainga or limai ake i paateal nge lotuonga areko o voth a rem or limai aken."

2

Riong i es a lotuongare nge aka a rem a Epesus.

¹ Ma toko aken i ria mun ve, "Aro ong wat malueng a lotuonga areko a rem a Epesus othealnga, naro ong wat vene: Tho ini toko aka tho krim sivemit or limai a menik sivenga nge, na tho esu esa a theki lalainga le mitainga or limai aka o oma i nge gol a lemi pat, na lek riong a thomu nge i vene:

² Lemik mire nge ur areko thomu o oma i ranga ve aka thomu o mit engeng nge lomu lemioong, na thomu o el inga math-eong areko i velpoltun thomu nge panesngek. Na lemik mire mun aka thomu o lel kimomu nge toko kerenga areko o ri ve or ini pakekre, ave ole apaltet na thomu o avrum senu ole riong aken, mako lomumu mire nge ole le apaltetong aken.

³ Na lemik mire aka thomu o potun math-eong nge panesngek na thomu o el kerengaing nge, aveto thomu o mit engeng nge.

⁴ Ave nik plong nge lomu vothung pelie aka ranga ve lomu asaguong nge tho i ranga ve ini nomenganga avele.

⁵ Lomumu rum senu nge vothung sivenga aka thomu o oma tel i nomenga nge aka lomumuo a tho nge, ave ponange thomu o modop i lale. Aro o lel kimomu nge lomu vothung kerenga areken, naro o oma ranga ve aka thomu o oma tel i nomenga. Aro ve thomu o lel kimomu nge lomu vothung kerenga areken avele, aro tho es a thomu nge me, naro tho eltetpot lomu theki lalainga le mitainga a imei, aken aro thomu o velpol ini lek ol avele.

⁶ Aveto ur inga aka tho thopol i a thomu nge, na lemik i sivenga nge ma i vene: Numu silal tokokoe areko o panes a Nikolas* ile pamirealing ole vothung, na tho mun, nik silal mun i.

⁷ Na aro ve toko e i sis ve aro ilemi mire senu nge riong ake, aka God Ioni i sungu i a lotuongare nge, mo i sivenga aka aro i ta senu itelnga nge. Na areko ole mong a Satan ile tongporumongre, aro sek wom or mo o an won monnga nge won ako i sung mimiiong aka i voth a God ia ometa aka a Pen a Urvet."

Riong i es a lotuongare nge aka a rem a Smerna.

⁸ Ma toko aken i ria mun ve, "Aro ong wat malueng a lotuonga areko a rem a Smerna othealnga, naro ong wat vene: Tho ini ur alavusnga opateanga na ole vusonga mun. Na tho ini toko aka nomenga tho rin, ave ponange tho mimia ol. Na lek riong a thomu nge i vene:

⁹ Lemik mire nge matheong areko i velpoltun thomu. Lemik mire mun aka, ake ru a ulue thomu o oror nge ur elonga, aveto ake ro a Pen a Urvet lomu ur elonga i pom. Na lemik mire mun aka tokokoe areko or ini Judare o ri tangatun nge thomu, ave ole vothung i panes senu Judare ole vothung avele, or ini toko avlung aka ini a Satan ile.

¹⁰ O mothong tova o ngange nge kerengaing aka i toth aro i velpoltun thomu. O nongpol! Satan aro i tongporum thomu nge aka aro o rere omu pelie mo o paeso ir a mang a midenga lemi. Naro lomu

^{‡ 1:20:} Nge Grikre okei riong ake ini 'ensel' na i venen mun aken nge vonge 2 na ves 1, 8, 12 na 18. ^{*} ^{2:6:} Nikolas ile pamirealing i vene: Vothung kerenga aka tokokoere o oma i nge ole mimiong, i pavurvur aro i pakerenga ole menong tomo nge a God avele, nako o ngo tomo nge areko or ini oewoere avele, na o lotual avalare na vothung kerenga mun pelie.

kerengaing aken aro i voth inga nge nang mule pa omole. Aro lomu lemioong i voth engeng mola i pavurvur nge lomu rinong, maken aro tho olal i a thomu nge, nge mimiong ako aro ile vusonga avele.

11 Na aro ve toko e i sis ve aro ilemi mire senu nge riong ake, aka God Ioni i sungu i a lotuongare nge mo i sivenga aka aro i ta senu itelnga nge. Areko ole mong a Satan ile tongporumongre, aro o el kerengaing e avele nge rinong aininga.” †

Riong i es a lotuongare nge aka a rem a Pergamum.

12 Ma toko aken i ria mun ve, “Aro ong wat malueng a lotuonga areko a rem a Pergamum othealnga, naro ong wat vene: Tho ini toko aka bainat aka iwowonga i voth epee epee na i oselpot a wok me. Na lek riong a thomu nge i vene:

13 Lemik mire nge lomu rem, ini rem aka i voth a Satan imeni na ini ile vulonga. Na thomu o voth engeng a tho nge, na lomu lemioong a tho nge i matu avele, i pavurvur nge nang aka o pun rin a Antipas nge, aka a lomu rem aka Satan i voth nge. Na Anitpas ini lek umonga sivenga aka i panongpol tokokoere nge lek riong.

14 Ave nik plong nge lomu vothung pelie aka ranga ve omu pelie o panes a Balam‡ ile pamirealing, nomenga ini toko aka i patorial a Balak nge sovengalo aka aro i paleklek Israelre nge aka ranga ve o an aning aka o sung tel i a avalare nge, na o ngo tomo nge areko or ini oewoere avele.

15 Na Balam ile pamirealing aken i ranga ve ini a Nikolas§ ile pamirealing aka omu pelie o panes mun i.

16 Maken aro o lel kimomu nge lomu vothung kerenga, aro vene mo lelle inga atike aro tho velpol a thomu nge mo aro tho pun tomo nge areko o lel ikime nge ole vothung kerenga avele. Naro tho pun or nge bainat aka i oselpot a wok me.

17 Na aro ve toko e i sis ve aro ilemi mire senu nge riong ake, aka God Ioni i sungu i a lotuongare nge mo i sivenga aka aro i ta senu itelnga nge. Na areko ole mong a Satan ile tongporumongre, aro tho sung aning aka i ngo kine ponange aka o apet i ve ini ‘Mana’ ** a or nge. Naro tho sung mun um po velelesnga†† a or omole omole nge. Na nge um areken oion ponganga i voth nge na toko e avele ilemi mire nge, ini inga areko o el um areken.”

Riong i es a lotuongare nge aka a rem a Taiataira.

18 Ma toko aken i ria mun ve, “Aro ong wat malueng a lotuonga areko a rem a Taiataira othealnga, naro ong wat vene: Tho ini a God Itun na thekik i tolilis ranga ve ini won sesenga ile lallaing, na ekek i tolilis rintet ranga ve ini bras‡‡ aka o ongtun i ponganga mo i riri rintet ma i tukling tukling. Na lek riong a thomu nge i vene:

19 Lemik mire nge ur areko thomu o oma i ranga ve nge lomu asaguong na nge lomu lemioong engenga, na nge lomu opoesaling, na aka thomu o engeng na o el inga matheong. Na lemik mire mun aka lomu omaing i esa ol na i mukal nge lomu omaing teltelng ako i patea nge aka thomu o panes tel tho.

20 Ave nik plong nge lomu vothung pelie aka ranga ve, somu wom seng aka i ranga ve ini a Jesebel§§ aka i voth nomenga, na seng aken i apet isivenga ve ini a God ile riong elnga, na i patorial na i paleklek lek umongare mo aro o ngo tomo nge areko or ini oewoere avele, na o an aning aka o sung tel i a avalare nge.

21 Sek wom i ve aro i lel ikime nge ile vothung aka i ngo tomo nge tokokoe areko or ini iewo avele, aveto ini plong.

22 Maken aro tho pangomeng i a ile ring, na aro ve areko o oma vothung kerenga tomo nge i, o lel okime nge ole vothung

† **2:11:** Rinong aininga ini won sesenga aka aro ile vusonga avele. O thopol 20:14; 21:8. ‡ **2:14:** O thopol tenesing nge a Balam aka a Namba 22-24. § **2:15:** O thepol ritetong rurunga aka a 2:6 aken i ritet nge a Nikolas ile pamirealing. ** **2:17:** Judare olemi ve, Jeremaia i parong kine ‘Mana’ pelie a silkep lemi, naro i voth nge makola ole pamimionga i velpol ol a or nge, lamako God aro i paan or nge ‘Mana’ aken. †† **2:17:** Um po velelesnga aken ini a God ile ateong nge or. ‡‡ **2:18:** Bras ini ur aka o oma tang a tap nge na ur pelie mun. §§ **2:20:** Jesebel ia tenesing i voth nge a 1 King 18-21 na 2 King 9.

areken avele, aro tho pangomengo mun or.

²³ Naro tho pun rin areko o panes ile pamirealing, maken toko lemioonga alavusnga aro olemi mire ako tho ini toko aka lemk mire nge toko alavusnga oopo na olemi, naro tho olal vengveng i a or omole omole nge, i pavurvur nge ur areko o oma i.

²⁴ Aveto thomu areko o voth a Taiataira aka o panes seng aken ile pamirealing kerenga aken avele, aka osivenga o apet i ve ini a ‘Satan ile pamirealing inkinenga aka i mathe.’ Na tho ria thomu ve, aro tho parong mun matheong e avele a thomu nge.

²⁵ Ave aro thomu o mit engeng nge lomu vothung aka o krim i lale i pavurvur aka aro la tho es me.

²⁶ Na areko ole mong a Satan ile tongporumongre na o panes senu tho i mul nge nang le vusonga, aro tho sung engenging a or nge ranga ve aka Vovo i sungu i a tho nge. Naro tho papomnga or mo aro o theal toko alavusnga ake ru a ulue areko or ini Judare avele.

²⁷ ‘Naro ole thealing aken
aro i engeng rintet
ranga ve ini ain.
Naro o so rek rek or
ranga ve ini thei pokin
ako o oma i nge saka.’ *Buk Song*

2:9

²⁸ Naro tho sungu mun sivemit a lempoa a or nge, aken i pathengal aka ole mong ur alavusnga lale.

²⁹ Na aro ve toko e i sis ve aro ilemi mire senu nge riong ake, aka God Ioni i sungu i a lotuongare nge mo i sivenga aka aro i ta senu itelnga nge.’

3

Riong i es a lotuongare nge aka a rem a Sardis.

¹ Ma toko aken i ria mun ve, “Aro ong wat malueng a lotuonga areko a rem a Sardis othealnga,* naro ong wat vene: Tho ini toko aka God Ioni aka ile engenging i mukal nge ur alavusnga, kene i voth a tho nge, na sivemit or limai i voth mun

a tho nge. Na lek riong a thomu nge i vene: Lemik mire nge lomu omaing aka tokokoere o rivenga thomu o mimi, ave onumu i rin lale nge panesngek.

² O mimeta, na o paengeng lomu vothung sivenga atiiken i rin rongan, eneke i toth aro i rin. Naro o oma venen aken, eneke tho thopol lomu vothung aka i vengveng a lek God itheki rongan.

³ Maken aro lomumu rum werer nge Panongpolong Sivenga aka thomu o nong-pol tel i lale, na o patalor thomu nge, naro thomu o nongal nge, na o lel kimomu nge lomu vothung kerenga. Na aro ve thomu o mimeta avele, na o nong nong inga, aro tho velpol a thomu nge ranga ve ini toko kemonga, naro lomumu mire avele nge nang aka aro tho velpoltun thomu nge.

⁴ Ave omu pelie aka a rem a Sardis lomu vothung rongan i riri ranga ve ini tekruk velelesnga. Aro thomu o teuna tekruk velelesnga mo o es tomo nge tho, eneke lomu vothung i vengveng tomo nge tho.

⁵ Na areko ole mong a Satan ile tongporumongre aro o teuna mun tekruk velelesnga venen aken, naro oion i ngo a erere aka i ritet nge areko God aro i sung mimiong a or nge, naro tho patitepot oion nge avele. Naro tho ritet nge or a ok Vovo itheki tomo nge ile enselre otheki ve, or ini lek.

⁶ Na aro ve toko e i sis ve aro ilemi mire senu nge riong ake, aka God Ioni i sungu i a lotuongare nge mo i sivenga aka aro i ta senu itelnga nge.”

Riong i es a lotuongare nge aka a rem a Piladelpia.

⁷ Ma toko aken i ria mun ve, “Aro ong wat malueng a lotuonga areko a rem a Piladelpia othealnga, naro ong wat vene: Tho ini toko aka tho riri rintet na tho ini ur nunganga tepun. Na ranga ve aka nomenga Nepes a Devit i krim ur aka ini pupalinga thepnga a Jerusalem neginga, aro tho mun aro tho krim ur aka ini pupalinga thepnga a Jerusalem ponganga aka a Pen a Urvet. Na aro ve tho theppot vel thekia aken, aro toko e avele i pavurvur aro i pupal ol i. Na aro ve

* **3:1:** Nge Grikre okei riong ake ini ‘ensel’ na i venen mun aken nge ves 7 na 14.

tho pupalo i, toko e avele i pavurvur aro i theppot ol i. Na lek riong a thomu nge i vene:

⁸ Lemik mire nge lomu omaing na lemik mire mun ako iomu kene i kima avele, na thomu o panes senu lek riong, na thomu o kelelal iok avele, make tho theppot vel thekia nge thomu aka toko e avele i pavurvur aro i pupalo i.

⁹ O nongpol, toko avlung aka ini a Satan ile, aka o apet or ve, or ini Judare, ave ole vothung i panes senu Judare ole vothung avele, aro tho paruru or mo aro o koru oeve a evomu tepun mo aro olemi mire aka ok sagu rintet thomu.

¹⁰ Na thomu o panes lek panakaling nge matheong potunnga lale, make aro tho paseral thomu nge matheong aoliloenga aka aro i es me mo aro i tongporum toko alavusnga ake ru a ulue.

¹¹ I toth lale aka aro tho es me, aro thomu o mit engeng nge lomu vothung aka thomu o krim i lale, maken aro toko e avele i pavurvur aro i kempot olongomu.

¹² Na toko e aka ile mong a Satan ile tongporumongre, aro tho pamit i a lek God ile Lotu Tepun a Vel ranga ve ini wovek. Na i pavurvur aro i voth evelelnga a Lotu Tepun a Vel aken. Naro tho wat lek God iion a i nge tomo nge a Jerusalem ponganga iion. Ini lek God ile rem aka aro i esu a Pen a Urvet me. Naro tho wat mun iok ponganga a i nge.

¹³ Na aro ve toko e i sis ve aro ilemi mire senu nge riong ake, aka God Ioni i sungu i a lotuongare nge mo i sivenga aka aro i ta senu itelnga nge.”

Riong i es a lotuongare nge aka a rem a Laodisia.

¹⁴ Ma toko aken i ria mun ve, “Aro ong wat malueng a lotuonga areko a rem a Laodisia othealnga. Naro ong wat vene: Tho ini ur nunganga tepun na tho panongpol vengveng a God ile riong elonga, na i pavurvur aka aro toko na sengre aro o nongal senu i na olemio nge. Na tho ini pamenong alavusnga itepun. Na lek riong a thomu nge i vene:

¹⁵ Lemik mire nge lomu omaing aka numu plong nge panesngek avele, ave thomu o engeng nge panesngek mun avele. Tho

sis ve aro numu plong, eve o engeng nge panesngek,

¹⁶ aveto avele. Lomumu i ngo a sapat, na i ranga ve ini thei aka i merir avele na i vel avele, maken aro tho mutpot thomu nge wok.

¹⁷ Na thomu o ri ve, ‘Lemem umtun pom tomo nge lemem ur elonga, na them oror nge ur e avele.’ Aveto patong onumu o men vulut inga, na ole ur e avele, na o men alalilanga, na otheki pros. Aveto lomumu mire nge avele.

¹⁸ Na tho tor lomu ve aro o ol gol aka o ongtun i ponganga mo i riri kene a tho nge, mo aro lomu ur elonga pom a God itheki. Naro o olpot mun tekruk velelesnga a tho nge, maken aro o men alalilanga avele, naro lomu mara mun nge avele. Naro o olpot mun thekumu rongalnga ei a tho nge, mo aro thekumu i senu werer.

¹⁹ Na areko ok sagu or, aro tho vol or mo aro tho pavengveng ole vothung. Aro thomu o lel kimomu nge lomu vothung kerenga, naro thomu o engeng nge panesngek.

²⁰ O nongpol, tho mit a vel thekia na tho erema, na aro ve toko e i nongpol keik, na i thep ile vel thekia nge tho, aro tho eso a ile vel aken naro te an tomo e pel.

²¹ Na toko aka aro ile mong a Satan ile tongporumongre, aro tho pamen totho i a lok seik me, naro te men a lek nepes a menonga nge, ranga ve aka lek mong a Satan ile tongporumongre na tho men ol a ok Vovo ilo sei, na them men a ile nepes a menonga nge.

²² Na aro ve toko e i sis ve aro ilemi mire senu nge riong ake, aka God Ioni i sungu i a lotuongare nge mo i sivenga aka aro i ta senu itelnga nge.”

Sipsip Tun i thep erere aka a Pen a Urvet, mako ur kerengare i vru leltun toko na seng ake ru a ulue

4
(Vonge 4:1-11:19)

Jon i thopol a God aka i men a ile nepes a menonga ake ro a Pen a Urvet.

¹ Lamako tho the werer mun na tho thopol vel thekia ako i thep a Pen a Urvet. Na toko ikei aka i avvuv ranga ve ini kuth aka tho nongpol tel i lale, i ria mun tho ve, “Esa a Pen a Urvet me, mo tho pathengal ong nge ur areko aro i velpol panen.”

² A ur e avele na Oni Riringa i rero mun tho, mako tho thopol nepes a menonga omole aka i voth a Pen a Urvet, na toko omole i men nge.

³ Na toko aken i men, ini peti i tolilis rintet, na i ranga ve ini ur rangranga na selelenga, na butuleso aka imekilkil rintet i voth kalalual i.

⁴ Na menonga or mule paini pothoi or penel o men kalalual nepes a menonga aken. Na toko mukalinga or mule paini pothoi or penel o men nge menonga areken, na o teun teunong velelesnga, na o ur mun vevea aka o oma i nge gol aka ini nepesre oa.

⁵ Na pen kitnga i kitpot pelekpol a nepes a menonga aken. Na pen akrunga i akrung ma i espot mun nge, na ongueralinga or limai aka o an lilel, kene o to a mukaling a nepes a menonga aken nge. O paateal Oni Riringa ile engenging aka i mukal nge ur alavusnga.

⁶ Na a mukaling nge nepes a menonga aken, ur e aka i nine nine i voth nge, ranga ve ini a thei a pamonlel aka i nine nine rintet.

Na ur miminga or penel o voth kalalual a nepes a menonga aken. Na ur miminga or penel aken otheki pulua i voth a oni peti elonga.

⁷ Na ur miminga teltelinga ipounga i ranga ve ini laion* ipounga. Na ur miminga aininga ipounga i ranga ve ini bulmakau tomonnga ipounga. Na ur miminga menga itheki lemi i ranga ve ini toko. Na ur miminga penelinga ipounga i ranga ve ini viso aka i rer.

⁸ Na ur miminga or penel aken oni giniti or limae nge or omole omole, na otheki i voth a oni peti elonga na a oni giniti thewo mun. Na nge nang na mlik elonga o pesrou avele nge ole riong inga aka o ri ve,
“God aka ini Toko Pomnga

ako ile engenging i aolonga,
i riri, i riri, i riri.
Nomenga i voth,
na ponange i voth,
na panen aro i es me.”

⁹ Na ur miminga or penel aken o papomnga, na o paaolonga, na o ri sivengaing a toko aka i men a nepes a menonga aken nge, ini toko aka i voth, na ile mimiong aro ile vusonga avele. Ma nge aka o oma venen aken,

¹⁰ toko mukalinga or mule paini pothoi or penel o koru oeve mo o papomnga toko aka i men a nepes a menonga aken nge, na o lotual i. Ini toko aka i voth, na ile mimiong aro ile vusonga avele. Na o un-teta oa vevea ma o parongu i a mukaling a nepes a menonga aken na o ri ve,

¹¹ “Emem Pomnga, ong ini lemum God,
i pavurvur aka aro tokokoere o papomnga ong,
na o paaolonga ong, na o risea ong nge lom engenging,
eneke ong pamenu ur alavusnga,
na ong panes lomum nge ur areko ranga ve aka ong pamenu ir.”

5

Jon i thopol erere omole aka o patetun i.

¹ Lama tho thopol erere omole aka i voth alapinmolnga a toko aka i men nge nepes a menonga aken, a imeni sivenga nge, na wating i voth epee epee, na o patetun i nge sthong pa or limai.

² Na tho thopol ensel engenga omole aka i presa viringa ve, “Toko kathnga i sivenga rintet mo i pavurvur aka aro i paglokpot sthong or limai aken mo i thep erere aken e?”

³ Aveto toko e avele aka a Pen a Urvet, eve a malang po, eve a ulue, eve a Wali, kene i pavurvur aka aro i paglokpot sthong or limai aken mo i thep erere aken mo i the a lemi.

⁴ Mako tho tang rintet, eneke toko e avele i pavurvur aro i thep erere aken mo i the a lemi.

* 4:7: O thepol laion ia sei nge pes 632. * 5:5: O thepol laion ia sei nge pes 632.

⁵ Lama mukalinga omole i ria tho nge ve, "Mothong tanging, thepol toko engenga omole ako o apet i ve ini 'Laion,*
ako ile net Juda' na ini a nepes a Devit
ako i voth nomenga itevinga, na i ranga
ve ini mun i ilongo, na ile mong a God
ile ngarangre, make i pavurvur aka aro i
paglokpot sthong or limai aken mo i thep
erere aken."

⁶ Lama tho thopol Sipsip Tun omole aka
i mit na i ranga ve aka o so rin i lale, na
i mito totho nge nepes a menonga aken.
Na ur miminga or penel aken tomo nge
mukalinga areken o voth kalalual i. Na ia
sagar or limai, na itheki or limai mun aka
i paateal Oni Riringa ile engenging aka i
mukal nge ur alavusnga. Na God i pakepot
Oni Riringa aken a pen elonga ake ru a
ulue lale.

⁷ Lamako Sipsip Tun aken i es la ma i ela
erere aken ru i voth a toko aka i men nge
nepes a menonga aken, a imeni sivenga
nge.

⁸ Ma nge aka i ela erere aken, ur
miminga or penel tomo nge mukalinga or
mule paini pothoi or penel o koru oeve
a Sipsip Tun aken nge. Na mukalinga
areken or omole omole o krim won agolu
ako i pavurvur nge velnga, na o krim
mun oto aka o oma i nge gol aka ur una
vrongare i voth nge, ma o pasiseo i ma i
klunga na won klunga aken i paateal toko
lemioongare ole nongongre.

⁹ Na mukalinga areken o vo voing ponga
gaka i ri vene:

"Ong pavurvur aka aro ong ela erere aken
mo ong paglokpot sthong areken nge,
na ong thep i.
Eneke o so rin ong,
na lom rinong aken i ol werer tokoko-
ere a God nge me,
tokokoe areko o voth a pen elonga ake
ru a ulue
ako okei rel rel,
na oni peti rel rel,
na ole net rel rel.

¹⁰ Na ong oma or
mo o velpol ini toko avlung
ako ini a God ile umongare ranga
ve ini prisre,
naro o voth ranga ve ini nepesre,

naro o theal tokokoere ake ru a
ulue."

¹¹ Lama tho thopol mun, na tho nong-
pol ensel pulua rintet ole lenging na i
pavurvur nge otitalnga avele. Na o mit
kalalual nepes a menonga aken tomo nge
ur miminga o penel aken tomo mun nge
mukalinga areken.

¹² Na o pres a viringa na o vo vene:
"Sipsip tun aka o so rin i nomenga
i sivenga inga na i pavurvur aro te
risea i,
eneke iion i kima, na ile ur elonga
pom,
na ile mire aolonga, na ile en-
genging aolonga.

Na i pavurvur aka aro toko alavus-
ngare o risea i,
na o papomnga i, na o paaolonga i."

¹³ Na tho nongpol ur alavusnga ake ru o
mimi, na o voth a Pen a Urvet, na a malang
po, na a ulue, na a Wali, na a rua, o vo
vene:
"Toko aka i men nge nepes a menonga
tomo mun nge Sipsip Tun aken,
aro te risea or paini, na papomnga or,
na paaolonga or, na pakima oion
evelelnga,
naro ile vusonga avele."

¹⁴ Na ur miminga or penel aken o ri
ve, "I nunganga." Na mukalinga areken
o koru oeve a or paini nge, na o lotual or
paini.

6

Sipsip tun aken i paglokpot sthong a erere aken nge.

¹ Lama tho thopol Sipsip Tun aken aka
i paglokpot sthong teltelinga nge sthong
or limai aken nge, mako tho nongpol ur
miminga omole nge or penel aken, ma ikei
i tang ranga ve ini pen akrunga ma i ria ve,
"Ong es me."

² Lamako tho thopol hos velelesnga
omole, na toko e aka i men roro a iwe aka
i es me, na i krim peang, na i ur vevea aka
i paateal ve ile mong punong, na i espot a
Pen a Urvet me mo aro ile mong punong
ranga ve aka ile mong punong nomenga.

³ Lama Sipsip Tun aken i paglokpot
sthong aininga aka i pasopal erere aken,

na tho nongpol ur miminga aininga ako i ria ve, "Ong es me."

⁴ Mako hos relnga i velpola mun na ini peti i selele. Na toko aka i men roro a iwe i el engenging i pavurvur aka aro i pavelpol punong a ulue mo aro tokokoere o pun rin ol pel osivenga. Na i el bainat aolonga mo aro i oma ol venen aken nge.

⁵ Lama Sipsip Tun aken i paglokpot sthong menga aka i pasopal erere aken, na tho nongpol ur miminga menga aka i ria ve, "Ong es me." Na tho thopol hos pokukurutnga aka i es me, na toko aka i men roro a iwe i krim sikel aka o patongrum ur elonga ole matheong epee epee nge a imeni.

⁶ Na tho nongpol lenging aka i ranga ve ini toko ikei aka i espot a ur miminga or penel aken oa wop me, ma i ria ve, "Es mo o pavelpol mesi a ulue mo aro toko omole aka i um nge nang omole na i el iolonga i pavurvur inga aka aro i ol aning posalnga inga ranga ve ini luvo monnga aka a kilo inga omole eve woso aka imathenga a kilo or me. Aveto ong mothong tova pakerenga wel ome vain."

⁷ Lama Sipsip Tun aken i paglokpot sthong penelnga aka i pasopal erere aken, na tho nongpol ur miminga penelnga aka i ria ve, "Ong es me."

⁸ Ma tho thopol hos aka ini peti kothal aka i es me. Na toko aka i men roro a iwe kene iion a "Rinong" na toko omole i panes i aka i paateal Waliare. Na or paini o el engenging nge toko so rinnga, na o pun rin toko na seng epee omole ake ru a ulue, ave epee or me rongan i voth. Na o pun rin or nge punpeling, na mesi, na putput, na mekerem wengare mun aro o pun rin pelie.

⁹ Na Sipsip Tun aken i paglokpot sthong limnga aka i pasopal erere aken, na tho thopol rinrinongare ooni aka o voth a sungong a lekleka thewo, na tokokoere o so rin or nomenga, eneke or ini tokokoe areko o mit engeng nge a God ile riong, na nge ile riong panongpolnga.

¹⁰ Na o pres viringa ve, "Toko Pomnga ong riri rintet nge ur alavusnga, na ong ini God nunganga. Aro ong pamit toko ulue

angare nge riong penva? Naro ong olal pun rinngememare penva?"

¹¹ Na o sungu tekruk velelesnga a or omole omole nge na o ria or vene: "Aro thomu o thau tel thomu tie i pavurvur aka aro pun rinngomuare aro o pun rin mun areko o um tomo nge thomu, na ti-teemuere mo oa titaling i mul nge titaling aka God i ateal i a or nge. Maken aro God i olal werer i nge pun rinngomuare."

¹² Na tho thepol aka Sipsip Tun aken i paglokpot sthong limaenga aka i pasopal erere aken. Nako wiring aolonga i velpola a ulue, na nang theki ia mideng na i pokukurut ranga ve ini seltun pokukurutnga, na ngov itheki i selele ma vusu ranga ve ini mla.

¹³ Na sivemitre o matmatu a ulue ranga ve aka thue engenga i thu pupos mo pokin tangare o matmatu me.

¹⁴ Na sepsa i penthal ranga ve ini ngosel aka o pinmol i. Na tete alavusnga ome mthore o men gatpot nge omei.

¹⁵ Na toko alavusnga ake ru a ulue ranga ve ini nepesre, na toko kimangare, na punongare ole mukalingare, na toko le uringare, na toko engengare, na toko vulungare, na areko o um polpol a tokokoere nge, tomo nge areko o theal osivenga ole mimiiong, or alavusnga o lopot, na pelie o men kine a silkep lemi, na pelie o men kine a um thewo aka ru a tetere nge.

¹⁶ Na o pres a tete na umre nge ve, "Mata a them nge mo o ngo sopalu them mo aro toko aka i men a nepes a menonga aken aro i thopol them avele, naro Sipsip Tun ile lemi klingong aro i velpol mun a them nge avele.

¹⁷ Eneke or paini ole nang kerenga aka or paini aro o paomelal it tokokoere nge, kene i velpol. Na toko e avele i pavurvur aro i lopot nge or paini ole paomelaling aken."

7

Toko or 144,000 aka or ini Judare o el a God ile paatealing.

¹ Na ur areken i vus, lama tho thopol ensel or penel aka o mit a ulue ongepo

epipeere nge, na o krim tuntun thue le espotonga or penel aken mo thue i pavurvur avele aro a i thu ulue na rua na won.

² Lama tho thopola ensel relnga e ako i velpol a nang theki ile velpolainga na i es me, na i krim a God aka i mimi evelelnga ile ur aka i oma paatealing nge. Na i presa viringa nge ensel or penel aka God i sungu engenging a or nge ve aro o pakerenga ulue ome rua.

³ Na i ria ve, “O mothong tova o pakerenga ulue na rua na won i pavurvur aka aro them oma paatealing a ler God ile umongare a opowe tel.”

⁴ Na tho nongpol areko o ela a God ile paatealing a opowe kene oa titaling na i pavurvur nge 144,000. 12,000 nge Judare ole net omole omole.

⁵⁻⁸ Ranga ve Juda, na Ruben, na Gat, na Aser, na Naphtali, na Manase, na Simeon, na Livai, na Isakar, na Sebulun, na Josep ome a Benjamin. Toko or 12,000 nge net omole omole areken o el a God ile paatealing aken.

Pulua pomnga o lotual a God.

⁹ Lama tho thopol pulua pomnga na i pavurvur aro toko e i tital or avele, na or ini toko na seng areko o voth a pen elonga ake ru a ulue aka okei rel rel, na oni peti rel rel, na ole net rel rel, na o mit a mukaling nge nepes a menonga aken a Sipsip Tun itheki lemi, na o teun tekruk seltunnga velelesnga, na o krim vait thoing a omeni.

¹⁰ Na o presa viringa na o vo voing aka i vene,
“Ler God aka i men a nepes a menonga
tomo nge Sipsip Tun
or paini inga aka o pamimi it.”

¹¹ Na ensel alavusnga o mit kalalual nepes a menonga aken tomo nge mukalinga areken na ur miminga or penel aken. Na o koru oeve nge nepes a menonga aken ma o lotual a God.

¹² Na o vo voing aka i vene,
“I nunganga!

Te risea ler God
na te papomnga i,
na te ri sivengaing a i nge,
na te paaolonga i,
eneke iion i kima,

na ile mire aolonga,
na ile engenging aolonga.
Naro te oma venen aken
nge nang elonga
ako aro ile vusonga avele.
I nunganga!”

¹³ Lama toko mukalinga aken e i nina tho ve, “Na areko o teun tekruk seltunnga velelesnga, or ini anga? Na o es a kath me?”

¹⁴ Na tho olal ile riong ve, “Toko Pomnga, lemik mire nge avele.”

Na i ria tho ve, “Or ini areko o espot me nge matheong aolonga na sisong. Na Jisas ile rinong i pariri or a God itheki, na i ranga ve aka o paut rir ole teunong nge Sipsip Tun ia mla, mako oa teunong i veleles.

¹⁵ Maken
“O mit a mukaling nge a God ile nepes a menonga
na nang na mlik o oma ile omaing
a ile Lotu Tepun a Vel lemi.
Na toko aka i men nge nepes a menonga aken
i voth tomo nge or na i theal or.

¹⁶ Naro mesi pun ol or avele,
naro thei i pun mun or avele ol,
naro nang eve pen velnga
i pavurvur aro i in oni peti avele ol.

¹⁷ Eneke Sipsip Tun
ako i voth tothal nge nepes a menonga aken,
aro i velpol ini othealnga,
naro i wol or a pen
ako thei aka i sung mimiong
kene i lelpot nge me.
Na God aro i girtetpot otheki einga
naro o tang ol avele ol.”

8

Sipsip tun i paglokpot sthong limainga.

¹ Lama Sipsip Tun i paglokpot sthong limainga aka i pasopal erere aken, nako ur alavusnga aka a Pen a Urvet o men poreng ol, i pavurvur nge aua epee.

² Lama tho thopol ensel or limai aka o mitit a God itheki lemi, ma o sungu kuth or limai a or nge.

³⁻⁴ Na ensel relnga mun e ako i krim oto ako o oma i nge gol i es me, ma i mitu a God itheki totho a sungong a lekleka aka o oma i nge gol, na i voth a mukaling nge nepes a menonga aken. Na o sung ur una vronga pulua a ensel aken nge mo aro i sul tomo i nge ur aka i paateal a God ile tokokoere ole nongongre, ma i odoroka sungong aken a won mikeri nge aka i voth a sungong a lekleka aken nge, ma o klung na or alaini oklunga i suthultun pel a God nge la.

⁵ Lamako ensel aken i ela won mikeri a sungong a lekleka nge, ma i pangou i a oto aken lemi ma i asesu won mikeri aken a ulue me. Nako pen akrunga i akrung, na pen kitnga i kit, na wiring i tok.

Ensel or penel o thuo kuth.

⁶ Lama ensel or limai aka o krim kuth or limai o monsi mo aro o thuo ol kuth.

⁷ Na ensel teltelnga i thuo iana kuth. Mako vit aka imolnga i pootitoli na i merir merir tomo nge won sesenga aka i selele ranga ve ini mla, o apupluta a ulue me, na i ranga ve aka i omreu ulue ma or meu na i ongtun epee omole na won aka i voth a epee aken i ongtun mun na ur pothoinga areko o ongtun mun.

⁸ Na ensel aininga i thuo iana kuth. Mako ur aka i ranga ve ini tete aolonga aka won sesenga i voth nge i mata a rua. Ma i ranga ve aka i omreu rua ma or meu ma epee omole i selele ranga ve ini mla.

⁹ Na ur miminga areko o voth a rua epee aken o rin rin, na imot mun areko o voth a rua epee aken o kerenga.

¹⁰ Lama ensel menga i thuo iana kuth. Mako sivemit aolonga aka i an ranga ve ini ongueralinga kene i matpot a sepsa me, mako thei lelelongare na povovloaingare i thomreu ma or meu, ma i mata a epee omole a or nge.

¹¹ Na sivemit aken iion a "Welwelonga," mako thei areko o voth a epee aken o eksing ma o welwel ol. Na toko na seng pulua aka o thin thei aken o rin rin, eneke thei areken o welwel.

¹² Lama ensel penelnga i thuo iana kuth. Mako i ranga ve aka nang na ngov na sivemitre ole toong i thomreu ma or meu na epee omole a or nge i kerenga ma o to ol nge avele, mako ole toong i oror, mako

eranga i oror ol, na pemliknga ia mideng rintet.

¹³ Lamako pok watha ma tho thopol viso omole aka i rer a malang po, na tho nongpol ikei aka i presa viringga ve, "Patong, patongti re thomu areko o voth a ulue ma o nongpol kuth le avvuvong aka ensel or me, i toth aka aro o oma i, eneke aro i pavelpol paomelaling or me aolonga a thomu nge."

9

Ensel limnga i thuo iana kuth.

¹ Lama ensel limnga i thuo iana kuth. Mako tho thopol ensel omole ma i ranga ve ini sivemit aka i matu a ulue me, na i ela vel thekia thepnga aka ini vol luku-lukunga thepnga.

² Na i thep vol aken thekia, ma won klunga i klunga me ma i ranga ve ini ombulong aolonga, na won klunga aken i pasopal nang theki na sepsa a pen elonga.

³ Lama sisapuere o espot a won klunga aken nge me, na o esu a ulue me, na God i sung engenging a or nge ranga ve ini telenga.

⁴ Ma i ria or ve, o mothong tova o pak-erenga pilil, eve won, eve ur pothoingthoinga, ave aro o pakerenga inga tokokoe areko God ile paatealing i voth a opowe avele.

⁵ Na God isa wom sisapue areken mo aro o pasisis or i pavurvur nge ngov or lim, aveto aro o pavurvur aro o pun rin or avele. Na sisisong aka toko na sengre o el i a or nge, i ranga ve ini telenga ile pitong.

⁶ Na nge ngov or lim aken, tokokoere aro olemei a rinong, ave aro o rin avele, na o sis ve aro o rin, ave rinong aro i lopot a or nge.

⁷ Na sisapue areken otheki ranga ve ini hos aka i monsi lale nge punong, na o ur vevea aka ini gol na otheki lemi i ranga ve ini toko,

⁸ na opouniga thoing i loloe loloe ranga ve ini seng, na owo pupo i ranga ve ini pua,

⁹ na opakei paseralnga i engeng ranga ve ini ain, na oni giniti i avvuvrut ranga ve ini arungrungong aka hos puluanga aka o tipo karis e punong.

¹⁰ Na ole pupo i ranga ve ini telenga aka ile pitonga i voth nge, na ole engenging i

voth a ole pupo, na o pakerenga tokokoere nge, i pavurvur nge ngov or lim.

¹¹ Na ole nepes ako i theal or ini ensel aka i theal tetal vol lukulukunga aken. Na ensel aken iion a Abadon aka ini Hibrure okei. Na iion mun a Apolion aka ini

Grikre okei. Na i mirenga ve, "Toko Pakerenganga".

¹² Na paomelaling teltelnga i vus, aveto paomelaling or aini rongan i voth.

Ensel limaenga i thuo iana kuth.

¹³ Lama ensel limaenga i thuo iana kuth. Mako tho nongpol toko ile lenging aka i espot a sungong a lekleka aka o oma i nge gol a songlel or penel aka sagar omole omole o mit nge. Na sungong a lekleka aken i voth a mukaling a God nge.

¹⁴ Na lenging aken i ria ensel limaenga aka i krim kuth aken ve, "Inospot ensel or penel aka nomenga God i kintun or ma o voth a thei aolonga aka iion a Iupretis."

¹⁵ Mako ensel or penel aken o vthopot. Na nomenga God i rial or i pavurvur nge tovu po, na ngov, na nang, na aua aka i ateal i lale a or nge. Ma o es mo aro o thomreu tokokoere mo o mitu theki or meu, naro o pun rin nge epee omole.

¹⁶ Na tho nongpol areko o tho nge hos oa titaling i pavurvur nge 200,000,000.

¹⁷ Na tho thopol areko o tho nge hos na opakei paseralnga aka o oma i nge ain, pelie ini uvuvnga, na pelie ini klenga, na pelie ini kothnga. Na hosre opouniga i ranga ve ini laion.* Na won sesenga na won klunga tomo nge uk aka ini misep anga i espot a owo.

¹⁸ Na o thomreu tokokoere mo o mitu theki or meu, na o pun rin nge epee omole nge kerengaing or me aken aka ini won sesenga, na won klunga, tomo nge uk aka ini misep anga aka i espot a owo.

¹⁹ Na hosre ole engenging aka o pakerenga tokokoere nge, i voth a owo tomo nge ole pupo, eneke ole pupo i ranga ve ini pilimo, na ipouniga i voth mun na o pun tokokoere nge.

²⁰ Na tokokoe areko rongan o voth aka kerengaing areken o pun rin or avele,

kene o lel okime nge avala aka o oma i nge omeni olotualnga, kene avele. Rongan o lotual tamatare na avalare aka o oma i nge gol na silva na bras[†] na um na won. Avala areken o thopol avele, na o nongpol avele, na o esu esa avele.

²¹ Na o lel okime nge ole vothung kerenga omanga avele, ranga ve ini toko so ringa, na longung kerenga, na ngo tomoing nge areko or ini oewoere avele, na kemong mun.

10

Jon i thopol ensel aka erere tun i voth a imeni.

¹ Lamako tho thopol ensel engenga omole mun e aka i espot a Pen a Urvet me. Na i seltun nge songen, na butuleso i ngo kalalual ipouniga. Na itheki lemi i tolilis ranga ve ini nang theki, na ieve i ranga ve ini won sesenga aka i anlilel roro.

² Na erere tun omole i vlesu a imeni, na i pamitu ieve sivenga a rua stha na i pamitu ieve kerenga a ulue nge.

³ Na i presa viringa ma i tang ranga ve ini laion* aka i ngirikal. Na i oma vene aken lama pen akrunga or limai o olal i.

⁴ Na tho nongpol pen akrunga or limai aken ole riong, na i toth aka aro tho watu ole riong, aveto tho nongpol toko ikei aka i espot a Pen a Urvet me na i ria tho ve, "Mothong tova ong watu i, sivengom aro ong pango inga ole riong."

⁵ Lama tho thopol ensel aton ru i mitu a rua na ulue na imeni sivenga i osea a Pen a Urvet la.

⁶ Ma i kin ile riong tomo nge a God aka i mimi evelelnga naro ile vusonga avele. Ini God aka i oma Pen a Urvet, na ulue, na rua, na ur alavusnga areko o voth nge. Na ensel aken i ria ve, "Ur e avele aro i ngo roal ur areken ole velpoling.

⁷ Na aro ve ensel limainga aro i thuo iana kuth, aro God aro i pavelpol ilemi inkinenga ranga ve aka i ritet i a ile riong elngare nge lale."

⁸ Lamako tho nongpol mun lenging aton i espot mun a Pen a Urvet me, ma i ria mun

* **9:17:** O thepol laion ia sei nge pes 632. † **9:20:** Bras ini ur aka o oma tang a tap nge na ur pelie mun. * **10:3:** O thepol laion ia sei nge pes 632.

tho ve, "Ong es mo o ela erere tun ako i ngo a ensel aka i mit a rua na ulue kene imeni."

⁹ Mako tho es a ensel aken nge ma tho ria i ve, "Ong sung erere tun aken a tho nge me." Na i olal lek riong ve, "Ong ela i mo ong an i, aro i mosisen ranga ve ini sthong ei a wom, ave opom lemi aro i velvel."

¹⁰ Na tho ela erere tun aken a imeni, na tho an i, ma i mosisen a wok ranga ve ini sthong ei, aveto tho an i ma i vus ma i eksing ma i welwel a opok lemi.

¹¹ Lama o ria tho nge ve, "Aro ong ritet mun nge ur aka aro God i oma i nge tokokoe areko o voth a pen elonga ake ru a ulue, na okei rel rel, na oni peti rel rel, na ole nepesre mun."

11

Toko or aini aro o panongpol nge a God ile riong.

¹ Lamako o sunga eel a tho nge me, na i ranga ve ini ur elonga thangarumnga. Ma God i ria tho nge ve, "Ong es mo ong thangarum lek Lotu Tepun a Vel, na sungong a lekleka aka i voth nge, naro ong tital mun tokokoe areko o lotu a lemi.

² Aveto ong mothong tova ong thangarum wop aka o avalal lek lotuong a vel nge, eneke tho sung wop aken nge areko or ini lek avele, naro o tepetuntun lek rem riringa i pavurvur nge ngov or mule pa penel pothoi or aini.

³ Naro tho pake lek toko or aini, naro o malmal nge lemi kerereong a malmaling, naro o panongpol nge lek riong i pavurvur nge ngov or mule pa penel pothoi or aini aken." *

⁴ Na toko or aini aken o ranga ve ini won oliv or aini na theki lalainga or aini. Na o mit a Toko Pomnga itheki aka i theal ulue alavusnga.[†]

⁵ Na aro ve tokokoere o sis ve aro o pakerenga or paini, won sesenga aro i velpolpot a or paini owo na i ongtun ole ngarang areken, na toko e aka i sis ve aro i pakerenga or paini aro i rin mun venen aken.

⁶ Na or paini o el engenging i pavurvur aka aro o rial sepsa mo aro vit i molu avele, i pavurvur nge nang alavusnga aka aro o panongpol a God ile riong nge. Na ole engenging i pavurvur mun aka aro o eksing thei mo i velpol ini mla, na o pavurvur mun aka aro o panes oleme nge ur kerenga pelekpolnga pavelpolpotnga a ulue.

⁷ Na nge aka or paini o pavus ole panongpolong aken, mekerem tevivinga aka i voth a vol lukulukunga aken aro i velpol mo aro i pun tomo nge or paini, naro ile mong or paini mo o rin.

⁸ Naro or paini oni peti aro o ngo a sovengalo aka a rem pomnga aka o pamona or paini oa Pomnga nge. Na rem pomnga aken iion agelalnga ini a Sodom eve a Isip.

⁹ Na toko alavusnga ake ru a ulue aka okei rel rel, na oni peti rel rel, na ole net rel rel aro o thopol or paini oni peti i pavurvur nge nang or me na uluo, naro o mit roal tokokoere nge or paini oni peti tetunnga.

¹⁰ Na toko alavusnga ake ru a ulue aro o voth vos, eneke or paini aka o pavelpol kerengaing pelekpolnga a or nge, kene o rin lale. Na o voth vos nge aning omanga, na o sung pel ole ur.

¹¹ Na nang or me na uluo aken i vus, lama God i sung werer mun thue aka i sung mimiong a or paini nge, na or paini o mita. Na areko o thopol or venen aken ma saluk or.

¹² Lama or paini o nongpol lenging aolonga aka i espot a Pen a Urvet me, ma i lenga or paini ve, "O esa me," ma songen i ela or paini a Pen a Urvet la a ole ngarangre otheki.

¹³ A ur e avele na wiring aolonga i tok. Na rem pomnga aken epee omole i vulthepu, ave epee or limpenel rongan o voth. Na toko or 7,000 o rin nge. Na areko rongan o voth, o ngange rintet na o risea God aka i voth a Pen a Urvet kene ile engenging.

¹⁴ Na paomelaling aininga i vus, aveto paomelaling menga i toth aro i velpol.

* **11:3:** Eve nang or 1,260. † **11:4:** O thopol a Sekaraia 4:3,11-14.

Ensel limainga i thuo iana kuth.

¹⁵ Lama ensel limainga i thuo iana kuth. Na tho nongpol areko o voth a Pen a Urvet okei ma o presa viringga na o vo voing vene:

“Ulue ake ini ar Pomnga

tomo nge toko ako i ateal i ve aro i el werer tokokoere, kene ole, na e avele aro i theal ol i, naro ole thealing aken aro ile vusonga avele.”

¹⁶ Na mukalinga or mule paini pothoi or penel aken, ako o men a ole menonga toth a God nge, o koru oeve na o lotual a God.

¹⁷ Ma o vo voing vene:

“Toko Pomnga a God

ako lom engenging i aolonga rintet ong ini a God aka ong voth nomenga na i pavurvur ponange.

Na them ri sivengaing a wong nge aka ong patea lom thealing nge ur alavusnga nge lom engenging aolonga aken.

¹⁸ Na tokokoe areko or ini lom avele, olemi klingtun ong,

ave nang aka aro lomum klingtun or nge, kene i velpol lale.

Na nge nang aken, aro ong pamit rinrinongare nge riong, naro ong olal ur sivengare nge lom umongare,

na lom riong elngare tomo nge lom tokokoe areko o papomnga iom,

ranga ve nge areko oion kima tomo nge areko oion kima avele. Na nge nang aken, aro ong pakerenga areko o pakerenga toko na sengre ake ru a ulue.”

¹⁹ Na o vo venen aken, lamako God ile Lotu Tepun a Vel aka a Pen a Urvet lemi i thep, na tho thopol a God ile riong kinnga a bokis[‡] aka ini ile vothinga. Na pen kitnga i kit, na pen akrunga i akrung, na wiring i tok, na vit aka i molnga i pootitoli na i merir merir i apuplantu.

Satan tomo nge ilengare o el selele kerengaing

[‡] 11:19: O thepol a God ile riong kinnga a bokis ia sei nge pes 548.

12

(Vonge 12:1-20:15)

Jon i thepol seng tomo nge telenga pokin.

¹ Lama paatealing aolonga e aka tokokoere o kukuk nge kene i velpol a sepsa. Na i vene: Ini seng aka i seltunu ini nge nang theki, na ngov i voth a ieve sa thewo, na i ur vevea aka sivemit or mule pa omole pothoi or aini o sop nge.

² Na iopo ol ma i toth aka aro i pop ma popong a sisong i velpol a i nge, mako i wal ol.

³ Lamako paatealing mun aolonga e aka i velpol mun a sepsa, na i vene: Ini telenga pokin aolonga aka ini peti selele, na ipounga or limai, na ia sagar or mule, na vevea posposengae areko o men men a ipounga omole omole.

⁴ Na ile pupo i lelegairpot sivemit pelie, na i ranga ve aka i pamatu epee omole a ulue me, ave epee or aini rongan o voth a sepsa. Na i mit toth a seng aken nge mo aro i an itun tova i poppot i.

⁵ Na seng aken i poppot itun ma ini totomone. Ini toko aka God i ateal i ve aro i theal toko alavusnga ake ru a ulue, na ile thealing aken aro i engeng rintet ranga ve ini ain. Ma o maneteta i na o pasong i a God nge mo aro i men tomo nge i a ile nepes a menonga nge.

⁶ Lamako seng aken i lo a pen polpolnga la. Ini pen aka God i monsi nge lale mo aro i voth nge. Naro o theal i nge i pavurvur nge nang or 1,260.

⁷ Lamako punpeling i velpol a Pen a Urvet, ensel Maikel ome ile enselre o pun tomo nge telenga pokin ome ile enselre.

⁸ Aveto Maikel ome ile enselre ole mong or, mako i pavurvur aro o voth ol a Pen a Urvet avele.

⁹ Na telenga pokin aolonga aken ini ingop nomenganga aka iion mun a Satan aka i paleklek toko alavusnga ake ru a ulue. Na o asespot i a ulue me tomo nge ile enselre.

¹⁰ Lama tho nongpol lenging aka i espot a Pen a Urvet me ma i leng viringga na i vo vene:

"Ponange re ake God aro i el werer ile tokokoere
na i pathengal ol ile engenging lale
ma i velpol ol ini nepes.
Na toko aka i ateal i ve aro i el werer
ile tokokoere,
kene i pathengal mun ile engeng-
ing.
Eneke o asespot titeirre oteltunnga a
Pen a Urvet,
ini a Satan aka nomenga i mit a God
itheki
nge nang na mlik elonga mo i
teltun oa.

¹¹ Na titeirre ole mong i nge Sipsip Tun ia
mla
tomo nge Panongpolong Sivenga aka
o panongpol nge.
Na o sungpot ole mimiong,
na o ngeip nge ole rinong avele.

¹² Maken Pen a Urvet
tomo nge thomu areko o voth nge,
aro lomumu ngo senu.
Aveto patongti re thomu areken ru o
voth a ulue na rua,
eneke Satan i esu a thomu nge wot
lale.
Na i vual nge lemi klingong,
eneke ilemi mire lale aka aro i voth
ollo avele."

¹³ Ma nge aka telenga pokin aken i
thopol aka o asespot i a ulue me lale, mako
i patea nge seng aken iwisnga, ini seng aka
i pop wain tomonnga aken.

¹⁴ Aveto God i sungu viso aolonga ini
giniti or aini a i nge mo aro i rer mo i lo
lelpot telenga pokin aken. Ma i rer a pen
polpolnga aken nge aka aro o theal i nge,
i pavurvur nge tovu po or me na ngov or
limae.

¹⁵ Lamako telenga pokin aken i mutpot
thei mo i lel a seng aken nge la, mo aro thei
awonga aken aro i theltetpot i la.

¹⁶ Aveto ulue i opoal seng aken ma i woa
ma i onu thei aka i espot a telenga pokin
iwo nge.

¹⁷ Lama telenga pokin i thopol i veno
ako, ma ilemi kling rintet nge seng aken,
mako i eso la mo aro i pun tomo ol nge
itutun rel relnga elonga, ini areko o nongal
a God ile patorong, na o panes senu riong
nunganga aka

13
Jisas i ripot i. ¹ Ma telenga pokin aken i
mitu a rua a wonwon po.

Mekerem tevivinga i esa a rua lemi me.

Lama tho thopol mekerem tevivinga
ako i es a rua lemi me. Na ia sagar
or mule, na ipounga or limai, na vevea
posposengae areko o men men a ia sagar
omole omole nge. Na ioning i voth a
ipounga omole omole aka o voltet nge a
God.

² Na mekerem tevivinga aken kene i
ranga ve ini lepat, na ieve tepun i ranga
ve ini bea, na iwo i ranga ve ini laion.
Na telenga pokin aken i sung isivenga ile
engenging a i nge, na i papompom i mo
i velpol ini nepes. Na ile engenging i
aolonga ranga ve ini telenga pokin aken
ile engenging.

³ Na mekerem tevivinga ipounga omole
ia peang wo i voth nge ma i pavurvur aka
aro i rin nge, ave i mama werer. Na toko
alavusnga ake ru a ulue o kukuk nge aka i
rin avele, mako o paneso i.

⁴ Na toko alavusnga o lotual ol telenga
pokin aken, eneke i sung ile engenging a
mekerem tevivinga aken nge. Na o lotual
mun i na o ria ve, "Ur e avele i ranga ve ini
mekerem tevivinga aken. Na toko e avele
i pavurvur aka aro i pun tomo nge i."

⁵ Na God isa wom mekerem tevivinga
aken mo aro i leng leng, mako i papomnga
isivenga na i paruru a God. Na God isa
wom mun i ve aro i paeso tokokoere a
isa thewo i pavurvur nge ngov or mule pa
penel pothoi or aini.

⁶ Mako mekerem tevivinga aken i leng
leng ma i paruru a God, mako i voltet a
God iion tomo nge Pen a Urvet aka ini ile
vothinga, na tomo mun nge areko o voth a
Pen a Urvet aken.

⁷ Na God isa wom mun i ve aro i pun
tomo nge ile tokokoere mo aro ile mong
or. Na God isa wom mun i ve aro i theal
toko alavusnga ake ru a ulue aka okei rel
rel, na oni peti rel rel, na ole net rel rel.

⁸ Naro o lotual ol i, ini inga areko o
watu oion avele nomenga nge aka God i
pamenu ur e rongan, na oion i ngo avele a
erere aka i ritet nge areko God aro i sung

mimiong a or nge. Na erere aken ini Sipsip Tun ako o so rin i nomenga kene ile.

⁹ Na aro ve toko e i sis ve aro ilemi mire senu nge riong ake, mo i sivenga aka aro i ta senu itelnga nge riong ake.

¹⁰ Na areko God i ateal or ve aro o rere or, kene aro o rere ol or.

Na areko God i ateal or ve aro o pun rin or nge bainat, kene aro o pun rin ol or nge bainat.

Na nge wop lemi aken God ile tokokoere aro o mit engeng, naro ole lemioong aro i mit engeng mun.

Mekerem tevivinga i esa a ulue lemi me.

¹¹ Lama tho thopol mekerem tevivinga relnga e aka i esa a ulue lemi me. Ma ia sagar or aini ranga ve ini sipsip itun ia. Ave i ri ranga ve ini telenga pokin.

¹² Na nge aka mekerem tevivinga aken i voth tomo nge mekerem tevivinga teltelnga aken, i el ile engenging a i nge, na i paketun toko alavusnga ake ru a ulue mo aro o lotual mekerem tevivinga teltelnga aton ru ia peang wo i voth aka i pavurvur aro i rin nge, aveto i mama werer.

¹³ Na i oma pathepolong aolonga aka ranga ve won sesenga i ru a sepsa me. Na i oma venen aken a tokokoere otheki.

¹⁴ Na God isa wom i ve aro i oma pathepolong pelie a mekerem tevivinga teltelnga itheki, mako i paleklek toko alavusnga ake ru a ulue. Na i ria or ye aro o oma avala aka ini mekerem tevivinga teltelnga ia sei, mo aro i papomnга mekerem tevivinga aka o pun i nge peang ma i mimia werer.

¹⁵ Na God isa wom i ve aro i sung mimiong a avala aken nge, mo i palav mo i paketun tokokoere mo o pun rin areko o lotual i avele.

¹⁶ Na mekerem tevivinga aininga aken i paketun toko alavusnga ve aro o el paatealing a omeni sivenga nge eve a opow. Or ini areko oion kima eve oion kima avele, tomo mun nge toko le urngare na toko le ur avelengare, na toko um polpolongare eve toko aka i um na i el iolonga.

* **13:18:** Judare o kaumtim toko iion a namba vene: Leta omole omole ia namba i voth, aka ranga ve a=1, b=2, c=3, d=4... I venen aken na aro ve toko e aka iion ini a Daba, aro o kaumtim iion a namba vene, D+a+b+a = 4+1+2+1, mako iion a namba ini a 8.

¹⁷ Na paatealing aken ini mekerem tevivinga teltelnga aken iion eve iion a namba. Na aro ve toko e i el paatealing aken avele, i pavurvur aro i ol ur e eve i tepolal ur e nge umtun avele.

¹⁸ Na tokokoe areko o sis ve aro oleli mire nge mekerem tevivinga ile namba, aro oleli i nine. Na aro ve oleli i nine, aro o kauntim senu mekerem tevivinga aken iion a namba,* eneke namba aken ini toko iion a namba, na namba aken ini a 666.

14

Sipsip tun ile tokokoere o vo voing ponganga.

¹ Lamako tho thopol Sipsip Tun aton aka i mit a tete a Saion na toko or 144,000 o voth tomo nge i, na iion tomo mun nge Itema iion o wato i a opowe.

² Na tho nongpol toko ikei aka i espot a Pen a Urvet me ma i ranga ve ini thei awonga ile alululong. Na i ranga ve ini mun i pen le akrungong aolonga, na i tang mun ranga ve aka tokokoere aka o vel ole won agolure.

³ Na toko or 144,000 aken o mit totho a nepes a menonga aken, na ur miminga or penel aken tomo mun nge mukalinga areken, na o vo voing ponganga aka oenga inga oleli mire nge. Na or ini areko God i el werer or ake ru a ulue.

⁴ Na or ini tokokoe areko o ngo tomo nge seng e avele, mako o ranga ve ini ur ponganga aka toko e i vugiro i rongan. Na o panes Sipsip Tun a pen elonga aka i es nge. Na or ini areko God i el werer or ake ru a ulue. Na or ini areko o velpol tel ini a God ile tomo nge Sipsip Tun ile, na o ranga ve ini aning ometa anga aka i motu tel mo o sungu i a God nge.

⁵ Na riong le apaltetonga e avele i espot a owo, na oa theki e avele.

Ensel or me o panongpol.

⁶ Lama tho thopol mun ensel relnga mun e aka i rer a malang po. Na i panongpol toko alavusnga ake ru a ulue aka okei rel rel, na ole net relrel, na oni

peti rel rel nge Panongpolong Sivenga ako aro ile vusonga avele.

⁷ Na i pres a viringa ve, “Aro thomu o papomnga a God na o risea i, eneke nang i velpol lale aka aro i pamit tokokoere nge riong. Aro thomu o lotual i, eneke ini a God aka i oma Pen a Urvet, na ulue, na rua, na thei.”

⁸ Lama ensel aininga i panes ensel teltenga aken. Ma i ria ve, “Rem alumlumnga a Babilon i kerenga ma i kerenga selele. Nomenga ile vothung kerenga i paleklek toko alavusnga ake ru a ulue mo o panes ile vothung kerenga pulua nge toko na seng aomnga, na o lel okime nge a God, na i ranga ve aka i pathin or nge thei engenga pulua ma otheki vaisis, mako God i paomelal or nge ole vothung areken.”

⁹ Lama ensel menga i opistuno mun or paini. Ma i pres a viringa ve, “Toko na seng areko o lotual mekerem tevivinga tomo nge ia sei, na o el ile paatealing a opowe eve a omeni,

¹⁰ aro God aro i paomelal rintet or, na i ranga ve aka i save ile lemi klingong a ia oto na i rongolo i avele, na o thin i, naro o el kerengaing nge won sesenga tomo nge uk* annga, aka a ensel riringare tomo nge Sipsip Tun otheki.

¹¹ Na won klunga aka i velpol a won sesenga aken nge aka o el kerengaing nge, i klung evelengla aka aro ile vusonga avele. Na paomelaling aken i pesrou avele nge nang na mlik elonga nge areko o lotual mekerem tevivinga, na ia sei, na o el ile paatealing aka ini iion a namba.”[†]

¹² Na nge wop lemi aken God ile tokokoere aro o mit engeng, or ini areko o nongal a God ile patorongre na olemio ol nge a Jisas.

¹³ Lama tho nongpol lenging aka i espot a Pen a Urvet me ma i ria ve, “Ong watu vene: Na i patea ol ponange, sapase areko o teo a Toko Pomnga nge lamo o rin.”

Na Oni Riringa i ria mun ve, “Ena, sapase or, eneke aro o thau or nge ole omaing engenga aken, naro o es polpol

ol avele, aro o es tomo ol nge ole omaing monngare.”

Nang le vusonga ile velpoling.

¹⁴ Na tho thopol songen velelesnga na toko e aka i men nge, na itheki i ranga ve ini a Toko Pomnga Itun‡ na i ur vevea aka o oma i nge gol, na lominga wowonga i voth a imeni.

¹⁵ Lama ensel relnga e i espot a God ile Lotu Tepun a Vel nge me, na i presa viringa nge toko aka i men a songen nge ma i ria i ve, “Lom lom nge lom lominga aken, eneke aning elonga aka a ulue i motu lale.”

¹⁶ Mako toko aka i men a songen we, i lom nge ile lominga aken a ulue, na i veliloalo ur alavusnga aka i voth a ulue.

¹⁷ Na ensel relnga mun e aka i espot mun a God ile Lotu Tepun a Vel aka i voth a Pen a Urvet nge me, na i krim mun lominga wowonga.

¹⁸ Na ensel relnga mun e aka i theal won sesenga i espot a sungong a lekleka nge me, na i presa viringa nge ensel aka i krim lominga wowonga aken ma i ria i ve, “Lom lom nge lom lominga aken na veliloalo vain monnga areko o voth a ulue, eneke i vunvuntet lale.”

¹⁹ Mako ensel aken i lom nge ile lominga aken a ulue, na i veliloalo vain monnga areko o voth a ulue na i asesu or a pen aka o tepiplas vain monnga nge, aken ini riong agelalnga nge aka aro God ile lemi klingong aro i paomelal tokokoere.

²⁰ Na o tepiplas vain monnga aken aka a rem alumlumnga kime, na mla i lelpot nge na i lel ma i pavurvur nge kilomita or 300 na ile lukulukuong i pavurvur nge mita omole na epee, na i pavurvur mun nge hos iwo.

15

Ensel or limai o monsi nge a God ile lemi klingong patopalalnga omanga.

¹ Lama tho thopol mun pathepolong e aka i velpol a sepsa, na i aolonga ma tho kukuk nge. Ranga ve ensel or limai aka o krim ur kerenga or limai ranga ve ini

* ^{14:10:} Uk ini misep anga aka o apet i ve ini salpa.

‡ ^{14:14:} O thepol a Daniel 7:13.

† ^{14:11:} O thepol ritetong rurunga aka i voth nge 13:18.

putput ako tokokoere o rin nge. Na ur kerenga or limai aken ini a God ile lemi klingong patopalalnga.

² Lama tho thopol ur e aka i nine nine, na i ranga ve ini thei a pamonlel aka i nine nine rintet na won sesenga i voth nge. Na tho thopol mun areko ole mong mekerem tevinga aka o oma avala nge ia sei aka iion a namba* aken i voth nge. Na areko ole mong i, o mit a thei a pamonlel aken wo peti, na o krim won agolu aka i pavurvur nge velnga aka God i sungu i a or nge.

³ Ma o vo a Moses aka ini a God ile umonga, ia voing tomo mun nge Sipsip Tun ia voing, na i vene:

“Toko Pomnga a God

ako lom engenging i aolonga rintet,
na lom omaing kene i aolonga rintet,
na them kukuk nge.

Na ong ini toko alavusnga ole nepes,
na lom omaing nge or i vengveng
na i nunganga.

⁴ Toko Pomnga,
toko alavusnga aro o papomnga ong
na o paaolonga ong,
eneke engom inga aka ong riri.
Na toko alavusnga ake ru a ulue
aro o es me mo o lotual wong,
eneke lom vothung vengvenga i ngo
pat lale.”

⁵ Na tho thopol lotuonga a valvale aka ini sel aka o apet i ve ini “God ile Riong Kinnga a Valvale” ma i voth a Pen a Urvet, na Pen aka i Riri Rintet na o pavothal nge, kene i thep.

⁶ Na ensel or limai aka o krim ur kerenga or limai aken o korpot nge me, na o teun seltun velelesnga aka i tukling tukling, na o panaklesu nanaing aka ini gol a opakei.

⁷ Na ur miminga omole nge or penel aken i sung oto or limai aka o oma i nge gol a ensel or limai aken nge, na oto areken o vual nge a God aka i mimi evelelnga aka aro ile vusonga avele, kene ile lemi klingong.

⁸ Na God ile Lotu Tepun a Vel aken i vual nge won klunga tomo nge ia malmaling Pen a Urvet anga aka i tolilis aka o paateal

a God ile engenging aka i aolonga rintet. Na i pavurvur aro toko e i koro nge avele, i pavurvur nge aka ensel or limai aken o pavus tel ole omaing nge ur kerenga or limai aken.

16

Oto or limai aka o vual nge a God ile lemi klingong.

¹ Lama tho nongpol lenging aka i espot a God ile Lotu Tepun a Vel aken nge me, na i leng viringa a ensel or limai aken nge ma i ria or ve, “Thomu o es mo o odorokpot oto or limai aka i vual nge a God ile lemi klingong a ulue la.”

² Mako ensel teltelnga i es ma i odorokpot tel iana a ulue, ma koliklok kerekereengare i velpol nge tokokoe areko o el mekerem tevinga ile paatealing aken a or nge na o lotual ia sei.

³ Lamako ensel aininga i odorokpot iana a rua stha, mako i velpol ranga ve ini toko rinnga ia mla na mekerem elonga aka o voth a rua lemi o rin rin.

⁴ Lamako ensel menga i odorokpot iana a thei alavusngare nge, ma o velpol ini mla.

⁵ Na tho nongpol ensel aka i theal thei alavusngare kene i ri vene:

“God ong ini God Riringa
na ong voth nomenga i pavurvur
ponange,
lom paomelaling nge tokokoe areke
kene i vengveng.

⁶ Eneke o pun rin rin lom toko lemioon-gare,
na lom riong elngare
ma oa mla i palalas,
mako ong eksing thei aka o thin i
mo i velpol ini mla,
na ini ole vothung kerenga areken
olalnga.”

⁷ Lama tho nongpol lenging aka i espot a sungong a lekleka nge me ma i ria ve,
“Toko Pomnga a God

lom engenging i aolonga rintet,
lom paomelaling kene i vengveng
na i nunganga.”

* **15:2:** O thepol ritetong rurunga nge 13:18.

⁸ Lamako ensel penelinga i odorokpot iana a nang theki nge, mako God isa wom i ve aro i velvel rintet na i ongses tokokoere.

⁹ Na oni peti i ongses vene aken, mako o voltet a God iion ako ile engenging i pavelpolpot kerengaing areken. Aveto rongan oni plong ve aro o lel okime nge ole vothung kerengare, na o risea a God avele, na o papomnga mun i avele.

¹⁰ Lamako ensel limnga i odorokpot iana a mekerem tevivinga aken ile nepes a menonga, mako mideng i seltun pen ako mekerem tevivinga aken i theal i, na sisong i el tokokoere ma o atun ole mama,

¹¹ eneke sisong aka o el i nge oni akolikloknga kene i aolonga rintet, mako o voltet a God aka ini Pen a Urvet anga, aveto rongan oni plong ve aro o lel okime nge ole vothung kerengare.

¹² Lamako ensel limaenga i odorokpot iana a thei pomnga aka iion a Iupretis, mako i matet, mako nepesre aka o voth a epee a nang le esainga me kene ole sovengalo i thep.

¹³ Lama tho thopol tamata kerenga or me aka otheki ranga ve ini rukrak, na omole i espot a telenga pokin aken iwo lemi me, na omole i espot a mekerem tevivinga teltelinga aken iwo lemi me, na omole i espot mun a mekerem tevivinga aininga aken iwo lemi me, aken kene ini riong le apaltetonga elnga.

¹⁴ Or ini tamata kerenga areko o oma pathepolongre, na o es a nepes alavusnga ake ru a ulue mo o veliloalo or mo aro o pun tomo nge a God aka nge ile nang aolonga aken, ini God aka ile engenging i aolonga rintet.

¹⁵ Na Jisas i ri vene: “Nongpol, aro tho velpol ranga ve ini toko keminga. Na sapase tokokoe areko o monsi ole tekruk mo i ngo a olo sei, na o ngo ma o nongal, eneke aro ve tho velpol, aro o esu esa alalilanga a tokokoere otheki avele.”

¹⁶ Na tamata kerenga areken o veliloal nepesre nge pen aka o apet i nge Hibrure okei ve ini a “Armagedon.”

¹⁷ Lamako ensel limainga i odorokpot iana a sepsa, mako lenging i velpolpot a nepes a menonga aka i voth a God ile Lotu

Tepun a Vel aken nge me, ma i ria ve, “I vus.”

¹⁸ Na pen kitnga i kit, na pen akrunga i akrung, na wiring aolonga i tok. Na wiring aken i aolonga rintet, na wiring e avele i pavurvur nge wiring aken ile toking i patea nge tokokoere ole velpoling a ulue.

¹⁹ Ma i isis uluesa aka a rem alumlunga a Babilon, ma rem aken i velpol epee or meu, na rem pompomenga ake ru a ulue kene o vulthepu. Na God ilemi rum Babilonre ole vothung kerenga, mako i pathin vuso or nge oto aka i vual nge ile lemi klingong.

²⁰ Ma mtho elonga o vlu, na tete e avele i vothu ol.

²¹ Ma vit aka imolnga i pootitoli, na i aolonga, na i merir merir, na ile matheong i pavurvur nge kilo or mule pa lim, na o apuplulu a ulue me ma o mata a tokokoere nge, mako o voltet a God nge kerengaing aken, eneke i kerenga rintet.

17

Seng sovengalo anga i men a mekerem tevivinga iwe.

¹ Lamako ensel omole nge ensel or limai aka o krim oto or limai aken, i es a tho nge me ma i ria tho ve, “Es me mo aro tho pathengal wong nge paomelaling aka God aro i sungu i nge seng sovengalo anga aka iion i kima, na i paateal nge rem alumlunga aken aka i voth tothal thei pulua.

² Na nepes puluanga ake ru a ulue o ngo tomo nge i, na o lel okime nge a God, nge ole vothung kerenga pulua. Na tokokoe areke ru a ulue, or mun kene o ngo tomo mun nge i, na o lel okime nge a God, nge ole vothung kerenga pulua. Na i ranga ve aka o thin thei engenga pom ma otheki vaisis, mako God i paomelal or nge ole vothung areken.” Eneke toko alavusnga ake ru a ulue o ngo tomo nge i na o lel okime nge a God na i ranga ve aka o thin thei engenga pom ma otheki vaisis

³ Na Oni Riringa i rero tho, mako ensel aken i wola tho a pen polpolnga la. Na tho thopol seng aka i mena nge mekerem tevivinga aka ini peti selele, na ini peti i vual nge ioning puluanga aka o voltet a

God iion, na ipounga or limai, na ia sagar or mule.

⁴ Na seng aken i pavlestun i nge seltun or aini. Omole ini selelenga, na omole ini vuvavnga na oolonga i roro. Na ia malmaling kene pelie o oma i nge gol, na um poumpipenga ako iolonga i roro rintet, na pengep otoli.* Na i krim oto aka o oma i nge gol a imeni, na i vual nge vothung kerenga pulua nge toko na seng aomnga, na vothung alavusnga aka God ini silal i.

⁵ Na o watu iion a ipowe na iion inkinenga aken i mirenga vene:

THO INI REM ALUMLUMNGA A BABILON, THO
INI SENG SOVENGALO ANGA ALAVUSNGA
ONINA, THO INI VOTHUNG ALAVUSNGA AKO
GOD INI SILAL I, KENE OTEPUN AKE RU A
ULUE.

⁶ Na tho thopol seng aken aka i pun rin a God ile tokokoere tomo nge areko o panongpol nge a Jisas iion, na i thin or pulua oa mla, mako itheki vaisis.

Na tho thopol or pulua aka i pun rin or, ma tho kukuk rintet nge.

⁷ Aveto ensel i ria tho nge ve, "I vava aka ong kukuk nge, e? Aro tho panine wong nge ur inkinenga mirenga aka nge seng aken tomo nge mekerem tevivinga aka i men nge, mekerem aka ipounga or limai na ia sagar or mule.

⁸ Mekerem tevivinga aka ong thopol i lale, kene nomenga i mimi, aveto ponange i rin lale, na i toth aka aro i espot nge vol lukulukunga aken, naro i el kerengaing. Na areko o watu oion avele nomenga nge aka God i pamenu ur e rongan, na oion i ngo avele a erere aka i ritet nge areko God aro i sung mimiong a or nge, kene aro o thopol mekerem tevivinga aken naro o kukuk nge i, eneke nomenga i mimi, aveto ponange i rin lale, na i toth aro i velpol werer mun.

⁹ "Na aro ve lomum i nine aro lomum mire nge ur areken, na mekerem tevivinga ipounga or limai aken, i paateal tete po or limai aka seng aken i men a opolemi nge roro.†

¹⁰ Na i paateal mun nepes or limai, or lim o rin lale, na omole i voth ol, na omole

i velpol rongan, aveto aro ve i velpol aro i voth palolo avele.

¹¹ Na mekerem tevivinga aka nomenga i mimi, ave ponange i rin lale aro i velpol werer mo ini nepes or limmenga, aveto ini nepes omole nge nepes or limai aken, aro i voth palolo avele naro i el kerengaing.

¹² "Na ia sagar or mule aka ong thopol i lale, i paateal nepes or mule aka o velpol ini nepes rongan, aveto aro o el engenging mo o velpol ini nepes tomo nge mekerem tevivinga, aveto ole engenging aken aro i voth inga nge aua omole inga.

¹³ Na nepes or mule aken aro ole lemieng omole ol inga, naro o sung ole nepes a engenging a mekerem tevivinga aken nge.

¹⁴ Naro o pun tomo nge Sipsip Tun tomo nge areko i ateal or na o panes senu i, naro ole mong or, eneke ini toko pompomere oa Pomnga, na ini nepesre oa nepes."

¹⁵ Na ensel aken i ria mun tho ve, "Na thei pulua aka o voth tothal nge seng sovengalo anga aken, i paateal toko pulua pomnga ake ru a ulue aka okei rel rel, na oni peti rel rel, na ole net rel rel.

¹⁶ Na ia sagar or mule aka ong thopol i lale tomo nge mekerem tevivinga aken aro oni silal seng sovengalo anga aken. Naro o el vuvestpot ile ur elonga, naro i voth ol alalilanga, naro o an isivanga, naro o ongtuna i nge won sesenga.

¹⁷ Naro o oma venen aken, eneke God aro i oma or mo aro o panes ilemi, maken aro oleli omole inga aka aro o sung ole nepes a engenging a mekerem tevivinga nge. Naro o voth a isa thewo, i pavurvur nge aka God ile riong aro i velpol nun-ganga.

¹⁸ Na seng sovengalo anga aken i paateal rem alumlumnga aka i theal nepes alavusnga ake ru a ulue."

18

Rem a lumlumnga a Babilon i vulthepu.

¹ Lamako tho thopol mun ensel mun e aka i esu a Pen a Urvet me. Na ile

* ^{17:4}: O thepol pengep otoli ia sei nge a Matiu 13:45 pes 36. † ^{17:9}: Toko powe ninengare o ri ve riong ake i ri nge a rem alumlumnga a Rom, eneke tete po or limai i voth a Rom lemi.

engenging i aolonga rintet, na ile tolilisong i to a ulue me, mako pen elonga i lala.

² Na i presa viringa ve,
“Rem a lumlumnga a Babilon i vulthepu lale.

Na i velpol ranga ve ini tamata kerengare ole pen ol tomo nge men kerengare.

³ Na rem aken i vulthepu, eneke i ranga ve ini seng sovengalo anga na toko alavusnga ake ru a ulue o ngo tomo nge i, na o lel okime nge a God.

Na i ranga ve ako o thin thei engenga pulua ma otheki vaisis, mako God i paomelal or nge ole vothung kerenga areken.

Na nepes puluanga ake ru a ulue o ngo tomo nge i, na o lel okime nge a God.

Na toko alavusnga ake ru a ulue ako or ini lulu paesngare o velpol ini toko le urngare. Eneke toko pulua aka a Babilon aka o men a ole ur sivesivenga we, o ol ole lulu.”

⁴ Lama tho nongpol presing mun e aka i espot a Pen a Urvet me ma i ria ve, “Lek tokokoere aro o lopot nge pen aken, aro vene mo thomu o panes ile vothung kerenga, naro thomu o el mun kerengaing aken.

⁵ Eneke ile vothung kerenga i pom rintet na i ranga ve ini ree aka o ases tomoal i, na i esa esa mo i toth a Pen a Urvet, na God ilemi simikal ile vothung kerenga areken avele.

⁶ Aro thomu o olal i a i nge ranga ve aka i oma i a tokokoere nge lale. Naro thomu o rong esa kerengaing a i nge ranga ve aka i oma i. Naro thomu o sung thei engenga aka i engeng rintet a i nge

mo i thin i.

⁷ Na i papomnga isivenga, na i men a ile ur sivesivenga we, maken aro thomu o sung kerengaing a i nge, i pavurvur nge ile vothung kerenga aken. Naro thomu o pasisis i mo aro i wal, eneke isivenga i risea i ve, ‘Tho men ranga ve ini nepes, na tho ini basu avele, na i pavurvur avele aka aro tho el matheong mo aro tho wal nge.’

⁸ Na i venen aken, mako aro ile kerengaing aro i velpoltun i nge nang omole inga, ranga ve ini rinong na matheong na mesi. Naro won sesenga aro i ongtun i, eneke Toko Pomnga a God aka aro i sung paomelaling a i nge, kene ile engenging i aolonga rintet.

⁹ “Na nepes alavusnga ake ru a ulue aka o ngo tomo nge i, na o lel okime nge a God, kene o men a ole ur sivesivenga we ranga ve ini i, naro o thopol won sesenga na won klunga aka o ongtun i nge, naro olemi kerere mo o wal nge i.

¹⁰ Naro o mit mela nge i, eneke o ngeip ve aro paomelaling aken aro i eso mun a or nge, naro o ria ve,

“Patong a Babilon ong ini rem alumlumnga aka lom engenging i aolonga, aveto nge aua omole inga ong el paomelaling na ong vus.”

¹¹ “Na toko alavusnga ake ru a ulue aka or ini lulu paesngare, aro olemi kerere naro o wal nge i, eneke toko ol e avele aka aro i olol ole lulu,

¹² ranga ve aka ini gol na silva, na um aka iolonga i roro, na pengep otoli,* na neong sivesivenga aka i veleles na i selele na i vuvav, nako i melongal mun na neong areken iolonga i roro. Na won areko i una vro, na ur puluanga aka o oma i nge mekerem wo pupo, na won aka iolonga i

* **18:12:** O thepol pengep otoli ia sei nge a Matiu 13:45 pes 36. † **18:12:** Bras ini ur aka o oma tang a tap nge na ur pelie mun.

roro, na bras,[†] na ain, na um ako a wating i ut kolol.

¹³ Na ur aka i una vro ranga ve ini madan, na sanda, na vain, na wel aka o apet i ve ini oliv, na plaua, na luvo monnga, na bulmakau, na sipsip, na hoso tomo nge karis, na toko um polpolonga tomo mun nge tokokoere, na ur alavusnga areken ini ole lulu na oolonga i roro.

¹⁴ “Na areko or ini lulu paesngare aro o ria Babilon ve, ‘Ur sivesivengare aka lomum i vurpol nge, i vus lale na lom ur sivesivenga areko ong men a we, kene i vus mun lale, naro ong thopol werer ol i avele.’

¹⁵ Na lulu paesnga areko o el ole umtun pulua a i nge, aro o mit mela, eneke o ngeip ve aro paomelaling aken i eso mun a or nge. Na olemi kerere ma o wal.

¹⁶ Na o ria i ve,
“ ‘Patong rem a lumlumnga a Babilon, nomenga ong ne neong sivesivengare aka ini velelesnga na selelenga, na vuvavnga, na ong pamalmal num peti nge nanaing aka o oma i nge gol, na um areko iolonga i roro, na pengep otoli.[‡]

¹⁷ Aveto nge aua omole inga, lom ur elonga pom rinnga aken i penthal.’

“Na imot thealngare tomo nge ole mukalingare tomo mun nge areko o esu esa a imot nge, aro o mit melanga nge a Babilon.

¹⁸ Naro o thopol won sesenga klunga aka i antun i naro o tang ve, ‘Rem alumlumnga ol e avele aka i ranga ve ini a Babilon.’

¹⁹ Naro olemi kerere naro o vor vor vuvus a opounga naro o wal naro o ri ve, “ ‘Patong a Babilon, nomenga wong ini rem alumlumnga aka areko o patho imot o el ole umtun pom nge lom ur elonga aka i pom.

Na nge aua omole inga, lom ur alavusnga i vus.

²⁰ Aveto thomu Pen a Urvet angare tomo nge toko lemioongare, na God ile pakekere,

na ile riong elngare, Aro thomu o risea, eneke God i paomelal a Babilon lale nge ile vothung kerenga aka i oma i a thomu nge.’ ”

²¹ Lamako ensel engenga omole i ela um aka i aolonga rintet ma i ultet i viringa a rua stha na i ria ve, “Rem alumlumnga a Babilon

aro ong vulthepu viringa ranga ve ini um ake tho ultet i a rua stha. Na toko ol e avele aro i thopol werera mun ong.

²² Na toko e avele aro i nongpol ol won agolu le tanging, eve kuth le avvuvong, eve moku le tanging, eve tokokoe areko o vo voing a ong nge.

Na toko e avele aro i oma ol ile omaing e a ong nge.

Na toko mun e avele aro i monsi ol aning a ong nge.

²³ Na theki lalainga e avele aro i to ol a ong nge. Na toko e avele aro i nongpol ol peangeong a riong a ong nge.

Na ong vulthepu venen aken, eneke lom tokokoe areko or ini lulu paesngare

o mukal nge toko alavusnga ake ru a ulue ole, na ong nong tungtang na lom apaltet toko alavusnga ake ru a ulue.

²⁴ God i pakerenga a Babilon, eneke i pun rin ile riong elngare na ile toko lemioongare nge pen elonga ake ru a ulue.”

19

Pen a Urvet angare o risea nge a Babilon ile vulthepong.

¹ Lamako tho nongpol pulua pomngra ole presing a Pen a Urvet me, ma o prespot ve, “Te risea a God,

[‡] 18:16: O thepol pengep otoli ia sei nge a Matiu 13:45 pes 36.

eneke ile engenging
na ile Pen a Urvet a malmaling
i aolonga rintet,
na ienga inga i el werer tokokoere.

- ² Na ile avrumong nge tokokoere
i vengveng na i nunganga.
Na i paomelal seng sovengalo anga
aken
ako iion i kima,
eneke i paleklek toko alavusnga
ake ru a ulue
nge ile vothung kerenga omanga
ako nge eve eling.
Na i olal ile umongare oa mla a i nge.”
- ³ Na o presa mun ve,
“Te risea a God,
eneke won sesenga klunga
ako i antun rem alumlumnga
aken
aro i klung evelenga
ako aro ile vusonga avele.”

⁴ Na mukalinga or mule paini pothoi or
penel tomo mun nge ur miminga or penel
aken, o koru oeve na o lotual a God ako i
men a nepes a menonga aken nge, na o ri
ve,
“I nunganga.

Te risea a God.”

⁵ Lama tho nongpol mun presing aka i
espot a nepes a menonga aken nge me ve,
“Thomu areko ini a God ile umongare
tomo nge areko o papomnga i,
tova iomu kima eve iomu kima avele,
Aro thomu o risea ler God.”

Sipsip Tun isungalnga a aning i velpol.

⁶ Lamako tho nongpol presing aka i
ranga ve ini pulua pomnga ole presing, ma
i ranga ve ini thei awonga ile afululong, na
pen le akrungong aolonga ma o presa ve,
“Te risea a God,
eneke ler God aka ini Toko Pomnga
ako ile engenging i aolonga rintet
i velpol ini nepes lale.

⁷ Aro te risea,
na te voth vos,
na te papomnga i,
eneke i toth lale
ako aro Sipsip Tun i peange,
na iewo sengenga i monsi lale
nge ole peangeong.

⁸ Na God isa wom seng aken

ve aro i ne neong velelesnga
ako i riri na i tolilis.”
(Na neong velelesnga aken
i paateal a God ile tokokoere
ole vothung vengvenga.)

⁹ Na ensel aken i ria tho nge ve, “Ong wat
i vene: Sapase areko God i pasong ikei a
or nge mo o es nge Sipsip Tun isungalnga
a aning.” Na i ria mun tho ve, “Riong ake
ini a God ile riong nunganga.”

¹⁰ Lama tho koru evek totho a ensel aken
ieve nge mo aro tho lotual i, aveto i ria
tho nge ve, “Mothong tova oma venen
aken, tho mun ini a God ile umonga ranga
ve ini wong tomo nge titeumre, it ini
areko te panes riong nunganga aka Jisas
i pavelpol i. Aro ong lotual inga a God,
eneke riong nunganga aka Jisas i pavelpol
i, i pavurpola mun a God ile riong elngare
olemi.”

*Jon i thopol toko aka i men roro a hos
velelesnga nge.*

¹¹ Lama tho thepol aka Pen a Urvet i
thep na hos velelesnga omole aka i mit
nge. Na o apet toko aka i men a iwe
ve ini “Riong Nunganga Tepun” na “Toko
Ako i Panes Senu a God” na ile vothung
elonga i vengveng tova ve i pun tomo nge
tokokoere eve i avrum ole vothung.

¹² Na itheki ile toong i ranga ve ini
won sesenga ile anlideeling. Na i ur vevea
posposenga pulua a ipounga, na o wato
ioning a i nge aka ienga inga ilemi mire
nge.

¹³ Na teunong aka i teun i, i vual nge mla,
na iion ve, “God Ile Riong.”

¹⁴ Na Pen a Urvet a punongare o panes
i na o men men roro a hos velelesngare
nge, na o teun teunong velelesnga aka i
riri rintet.

¹⁵ Na bainat wowonga i oselpot a toko
aken iwo me, mo aro ile mong toko alavus-
nga ake ru a ulue nge. Naro i theal toko
alavusnga ake ru a ulue. “Na ile thealing
aken aro i engeng ranga ve ini ain.” *
Naro i sung a God aka ile engenging i
aolonga rintet ile lemi klingong a tokoko-
ere nge, ranga ve ini vain monnga aka o
tepiplas i.

* 19:15: Buk Song 2:9

¹⁶ Na wating ako i voth a ile tekruk seltunnga epee ako i pasopal ia olu i vene:

NEPESRE OLE NEPES NA POMPOMERE OA POMNGA.

¹⁷ Lamako tho thopol ensel omole ako i mit a nang nge, na i presa viringa a menre nge ako o rer a malang po ve, "O velilo pel me nge a God ia aning aolonga

¹⁸ mo aro thomu o an nepesre osivanga tomo nge punongare na ole mukalingare osivanga na hosre tomo nge opathongare osivanga tomo mun nge toko alavusnga osivanga. Or ini areko o um polpol eve o el oolonga, na areko oion i kima eve oion i kima avele."

¹⁹ Lama tho thopol mun mekerem tevivinga aken tomo nge nepes alavusnga ake ru a ulue tomo mun nge ole punongare, kene o velilo pel mo aro o pun tomo nge toko aton i men roro a hos velelesnga nge, ome ile punongare.

²⁰ Na o rere mekerem tevivinga aken tomo nge riong le apaltetonga elnga ako i oma pathepolongre a mekerem tevivinga itheki. Na pathepolong areken i paleklek areko o el mekerem tevivinga ile paatealing tomo mun nge areko o lotual mekerem tevivinga ia sei. Na God i asesu mekerem tevivinga ome riong le apaltetonga elnga aken alamimmia a pen ako won sesenga tomo nge uk aka ini misep anga o anlile nge.

²¹ Na toko aka i men roro a hos nge i pun rin ole punonga alavusngare nge bainat aka i oselpot a iwo me, na men alavusngare o an osivanga ma osa pup rintet.

20

Satan i voth nge kinong i pavurvur nge tovu po or 1,000.

¹ Lamako tho thopol mun ensel mun e aka i esu a Pen a Urvet me, na i krim vol lukulukunga thepnga, na i krim mun sen aolonga.

² Na i rere telenga pokin aken ini ingop nomenganga aka iiion mun a Satan. Na i kintun i nge sen aken, i pavurvur nge tovu po or 1,000.

³ Ma i asesu i a vol lukulukunga aken, na i pupal rit thekia mo aro Satan i esa

ol me avele, aken i pavurvur avele ako aro i paleklek tokokoere ake ru a ulue i pavurvur nge tovu po or 1,000 aken. Na aro ve tovu po or 1,000 aken i vus, Satan aro i vthopot werer mun palolo avele nge ile kinong aken.

⁴ Lama tho thopol nepes a menongare, na areko o men nge, o el engenging aka aro o pamit tokokoere nge riong. Na tho thopol mun tokokoere ooni aka o sokorpot opounga, eneke o panongpol nge riong nunganga aka Jisas i pavelpol i tomo mun nge a God ile riong. Na or ini areko o lotual mekerem tevivinga eve ia sei mun avele. Na o el ile paatealing a opowe eve a omeni, kene avele. Na o el werer mimiong, na o velpol ini nepes na o theal tokokoere tomo nge a Krais, i pavurvur nge tovu po or 1,000 aken.

⁵ Aken ini los wereraing teltelnga. (Na toko alavusnga aka o rin lale na olemio nge a Krais avele, kene o el werer mimiong rongan i pavurvur aka aro tovu po or 1,000 aken i vus.)

⁶ Sapase tokokoe areko o mimi werera nge los wereraing teltelnga aken, eneke o riri na or ini a God ile. Na rinong aininga ile engenging, kene i pavurvur aro ile mong or avele. Naro o velpol ini a God tomo nge a Krais ole umongare ranga ve ini prisre, naro o theal tokokoere tomo nge a Krais, i pavurvur nge tovu po or 1,000 aken.

God i paomelal a Satan.

⁷ Na tovu po or 1,000 aken i vus, lamako o thep wererpot vol aka Satan i voth nge, mako i vthopot nge ile kinong aken.

⁸ Naro i espot mo i paleklek tokokoere a pen elonga ake ru a ulue, na o apet or ve ini a Gok, na Satan aro i veliloalo or mo o monsi nge punong, na o apet pen aken ini a Magok. Na oa titaling i ranga ve ini wonwon areko a rua wo peti.

⁹ Na o es nge pen elonga ake ru a ulue na o re kalalual nge rem pomnga aka God ia sagu i aka ile tokokoere o voth nge, aveto won sesenga i esu a Pen a Urvet me, mako i antun or.

¹⁰ Na Satan aka i paleklek tokokoere, kene God i asesu i a pen aka won sesenga

tomo nge uk ako ini misep anga o anlilel nge, ini pen ako God i asesu mekerem tevivinga na riong le apaltetonga elnga aken, or paini nge lale. Naro or alame aro o el kerengaing nge nang na mlik elonga ako aro ile vusonga avele.

God i pamit tokokoere nge riong nge nang le vusonga.

¹¹ Lamako tho thopol nepes a menonga ako i veleles na i aolonga, na tho thopol mun toko aka i men nge, nako ulue na sepsa o lo nge i, na o voth ol avele.

¹² Lama tho thopol toko alavusnga aka o rin lale, areko oion i kima tomo nge areko oion i kima avele, na o mit a mukaling nge nepes a menonga aken. Na enselre o thep erere areko o ritet nge tokokoere ole vothung. Na o thep mun erere mun e aka i ritet nge areko God aro i sung mimiong a or nge. Na God i avrum toko na seng rinrinongare ole vothung ranga ve aka i voth a erere areken nge.

¹³ Na areko o rin a rua o plos werera mo o mit nge riong aken tomo mun nge areko rin na o voth a Wali, mako God i avrum ole vothung aka ranga ve o oma i.

¹⁴ Na God i asesu Waliare a pen aka won sesenga tomo nge uk aka ini misep anga o anlilel nge. Mako rinong i vus ol, na Wali i vus mun. Na pen aka won sesenga tomo nge uk aka ini misep anga o anlilel nge, kene ini rinong aininga.

¹⁵ Na areko oion i ngo avele nge erere aka i ritet nge areko God aro i sung mimiong a or nge, kene God i ases mun or a pen aka won sesenga tomo nge uk aka ini misep anga o anlilel nge.

God i paponganga ur alavusnga

21

(Vonge 21:1-22:21)

Sepsa ponganga ome ulue ponganga o velpol.

¹ Lamako tho thopol sepsa ponganga ome ulue ponganga aka o velpol. Na sepsa neginga ome ulue neginga o penthal selele, na rua i voth ol avele.

² Lama tho thopol rem pomnga aka ini a God ile, aka ini a Jerusalem ponganga na God i monsi i lale, na i paesu i a Pen a Urvet me. Na ia malmaling i ranga ve ini seng peange ponganga ia aka i monsi ve aro i peange nge iewo tomonnga.

³ Na tho nongpol lenging aka i espot a nepes a menonga aken nge me na i ria ve, "God ile vothinga i voth ol a tokokoere nge, naro isivenga aro i voth na i mimi tomo ol nge or, naro o velpol ol ini ile tokokoere, naro i velpol ol ini ole God.

⁴ Aro i girtetpot otheki ei, naro o rin ol avele, naro o walal ol avele, na matheong ol avele, na sisisong na tanging avele. Eneke ur nomengangare o vus ol lale."

⁵ Lamako toko aka i men nge nepes a menonga aken i ria ve, "Nongpol, i patea ponange tho paponganga ol ur alavusnga." Na i ria mun tho ve, "Watu i vene, lek riong ake i nunganga na i pavurvur aka aro tokokoere olemio nge."

⁶ Na i ria mun tho ve, "I vus lale, tho ini ur alavusnga opateanga na ole vusonga mun, aro ve thei i pun toko e, aro tho savea thei povovoinga aka i sung mimiong mo tho sungu i a i nge, naro i ol i avele.

⁷ Na toko e aka ile mong a Satan ile tongporumongre kene aro i el ur areke a tho nge, naro tho velpol ini ile God naro i velpol ini tuk.

⁸ Aveto areko o lol nge ole lemioong, eve o lel okime nge a Jisas, na areko o oma vothung kerenga rintetnga, na areko o so rin toko, na areko o ngo tomo nge areko or ini oewoere avele, na areko o nong tungtang, na areko o lotual avalare tomo mun nge toko le apaltetongare, kene ole pen aka ini pen aka won sesenga tomo nge uk aka ini misep anga o anlilel nge aka ini rinong aininga."

Jon i thopol a Jerusalem ponganga.

⁹ Lamako ensel omole nge ensel or limai aka o krim oto or limai aka o vual nge ur kerenga or limai aka ini a God ile lemi klingong patopalalnga, kene i es a tho nge me ma i ria tho ve, "Es me mo aro tho pathengal ong nge seng peange ponganga aka ini Sipsip Tun iewo."

¹⁰ Na Oni Riringa i rero tho, mako ensel aken i wola tho a tete polemi ako i roro rintet, na i pathengalpot tho nge Sipsip Tun iewo aka ini a God ile rem pomnga aka ini a Jerusalem aka God i paesu i a Pen a Urvet me.

¹¹ Na ile tolilisong ini a God ia malmaling ile tolilisong, ma i tolilis ranga ve ini moto aka o apet i ve ini Jaspa ile tolilisong aka i tolilis rintet.

¹² Na rem pomnga aken a lok kene i roro rintet, na thekia or mule pa omole pothoi or aini, na ensel or mule pa omole pothoi or aini o theal tetal lok thekia areken. Na Israelre ole net or mule pa omole pothoi or aini oionre o voth a lok thekia areken nge.

¹³ Na lok aken kene epee or penel ma lok thekia or me kene o voth a epee omole omole.

¹⁴ Na rem pomnga a lok aken ile mitainga or mule pa omole pothoi or aini na Sipsip Tun ile pakeke or mule pa omole pothoi or aini oionre o voth nge.

¹⁵ Na ensel aken aka i ri tomo nge tho, i krim eel aka o thangarum nge aka o oma i nge gol mo aro i thangarum rem pomnga aken tomo nge a lok na thekia mun.

¹⁶ Na rem pomnga aken ile aolongaing kene itelipupo alapenel i vur e pel inga, na ensel aken i thangarum i nge ile eel aken na itelipo epee omole ile lolloing i velpol kilomita or 2,400 na ile roroing kene i vur e pel mun inga.

¹⁷ Na ensel aken i thangarum mun lok aken ile roroing, mako i velpol mita or mule pa limae pothoi or limae. Na i thangarum ur alavusnga aken ranga ve aka toko ulue anga i thangarum i.

¹⁸ Na lok aken God i oma i nge moto aka o apet i ve ini Jaspa. Na rem pomnga aken i oma i nge gol ienga aka ile nine rintetong i ranga ve ini glas.

¹⁹ Na lok ile mitainga aken o oma i nge um omole omole aka i olonga i roro rintet. Na ile mitainga teltelinga aken o oma i nge Jaspa, na ile mitainga aininga o oma i nge Sapaia uvuvnга, na ile mitainga menga o oma i nge Aget, na ile mitainga penelng a oma i nge Emerald rangranga,

²⁰ na ile mitainga limnga o oma i nge Sardonikis selelenga na velelesnga, na ile mitainga limaenga o oma i nge Konilian klenga, na ile mitainga limainga o oma i nge Krisolait kothkothnга, na ile mitainga limmenga o oma i nge Beril rangranga, na ile mitainga limpenelnga o oma i nge Topas kothkothnга, na ile mitainga mulenga o oma i nge Krisopres, na ile mitainga mule pa omole pothoi omolenga o oma i nge Haiasin, na ile mitainga mule pa omole pothoi or aininga o oma i nge Ametis selelenga.

²¹ Na lok thekia or mule pa omole pothoi or aini areken o oma ir nge pengep otoli* na thekia omole omole o oma i nge pengep otoli aolonga omole omole, na rem pomnga a sovengalo o oma i nge gol ienga na ile nine rintetong i ranga ve ini glas.

²² Na God ile Lotuonga a Vel e avele i voth a rem pomnga aken, eneke Toko Pomnga a God aka ile engenging i aolonga rintet tomo nge Sipsip Tun o ranga ve ini a God ile Lotuonga a Vel aka a rem pomnga aken.

²³ Na nang ome ngov ole toong o palala rem pomnga aken avele, eneke God ome Sipsip Tun ole tolilisong o palala rintet rem pomnga aken.

²⁴ Na ile tolilisong aken i pavurvur aka aro toko alavusnga ake ru a ulue o esu esa nge. Na nepes alavusnga ake ru a ulue aro o paeso ole ur sivesivenga a i nge.

²⁵ Na lok thekia areken o thep evelelnga na o pupal re avele, eneke midenga ol avele nge.

²⁶ Naro o paeso toko alavusnga ake ru a ulue ole ur sivesivengare aka o papomnga or nge kene a i nge.

²⁷ Na ur akopnга e avele aka aro i eso nge, na areko o oma vothung le marainga tomo nge areko ole apaltet, o pavurvur aka aro o eso a lemi avele, ini inga areko oion i ngo a Sipsip Tun ile erere aka i ritet nge areko God aro i sung mimiong a or nge.

22

Jon i thopol thei ome won aka o sung

* ^{21:21:} O thepol pengep otoli ia sei nge a Matiu 13:45 pes 36.

mimiong.

¹ Lamako ensel aken i pathengal tho nge thei aken i sung mimiong aken i nine rintet, ma thei aken i lelpot aken a God ome Sipsip Tun ole nepes a menonga aken nge me.

² Na i lel rumrum rem pomnga a soven-galo aken lemi pat. Na wonre aken omon-naga i sung mimiong o mit a thei aken wo peti epee epee. Na won areken o mon nge ngov omole omole, na won areken thoing i pavurvur aro o pamimi toko alavusnga ake ru a ulue.

³ Na ur aken God i rial i, kene i voth a rem pomnga aken avele. Na God ome Sipsip Tun ole nepes a menonga aken aro i voth a rem pomnga aken, naro ile umongare aro o lotual i.

⁴ Naro o thopol itheki lemi, naro o wato iion a opowe.

⁵ Aro mideng ol avele nge, naro o pasise theki lalainga avele, na nang ile toong aro i palala pen aken avele, eneke Toko Pomnga a God aro i velpol ini ole pen lalanga. Naro o theal tokokoere ranga ve ini nepes evelelnga aken aro ile vusonga avele.

Jisas aro i paviri mun me.

⁶ Lamako ensel aken i ria tho ve, "Riong areke i vengveng na i nunganga. Na Toko Pomnga a God aken i pavelpol ile riong a ile riong elngare olemi, kene i pake ile ensel mo aro i pathengal ile umongare nge ur areko i toth aken aro i velpol."

⁷ Na Jisas i ri vene, "O nongpol, i toth ol aken aro tho velpol. Sapase areko o nongal riong aken i voth a erere ake nge, aken i ritet nge ur areko i toth aken aro i velpol."

⁸ Na tho a Jon, aken tho nongpol na tho thopol ur areke tho watu i lale. Na tho thopol i ma tho nongpol i ma i vus, mako tho koru evek a ensel ieve tepun mo aro tho lotual i aken i pathengal tho nge ur areke.

⁹ Aveto i ria tho nge ve, "Ong mothong tova oma venen aken, tho mun ini a God ile umonga ranga ve ini wong tomo nge titeum areko or ini a God ile riong elngare tomo mun nge areko o nongal riong aken i voth a erere ake nge. Aro ong lotual a God."

¹⁰ Lama i ria mun a tho nge ve, "Ong mothong tova parong kinealo riong aken i

voth a erere ake nge, aken i ritet nge ur areko i toth aken aro i velpol, eneke i toth lale ol aken aro i velpol.

¹¹ Na areko o oma vothung kerenga aro o kis inga nge omanga, na areko o akop a God itheki aro o akop reletun, na areko o oma vothung vengvenga aro o kis inga nge omanga, na areko o riri a God itheki aro o riri reletun."

¹² Na Jisas i ri vene, "O nongpol, i toth ol aken aro tho velpol, naro tho es tomo nge ole omaingre olalnga sivenga, naro tho olal i a or nge i pavurvur nge ole omaing omole omole.

¹³ Tho ini ur alavusnga opateanga na ole vusonga mun."

¹⁴ Sapase areko o pariri ole tekruk sel-tunningare, maken o pavurvur aken aro o an won monnga aken i sung mimiong, naro o eso a rem pomnga a lok thekia.

¹⁵ Na areko ole vothung i ranga ve ini nanaure, na ine nong tungtangongare mun tomo mun nge areko o ngo tomo nge areko or ini oewoere avele, na areko o so rin polpol toko, na areko o lotual avalare tomo mun nge areko oa sagu vothung le apaltetonga omanga, na tokokoe areken aro o voth a lalanga.

¹⁶ Na Jisas i ri vene, "Tho ini a Jisas, aken tho pakepot lek ensel mo aro i ritet nge ur areke a thomu toko lemioongare nge. Tho ini nepes a Devit itevinga na i kene i ranga ve ini longongek na tho tepot mun a i nge, na tho ranga ve ini lempoa aken i tolilis rintet."

¹⁷ Oni Riringa tomo nge seng peange ponganga o ri ve, "Ong es me." Na areko o nongpol riong aken aro o ri mun ve, "Ong es me." Na aro ve thei i pun toko e, aro i es me mo i thin thei aken i sung mimiong, naro i ol i avele.

Riong patopalalnga.

¹⁸ Tho a Jon, tho pator engeng toko alavusnga aken o nongpol riong aken i voth a erere aken i ritet nge ur areko i toth aken aro i velpol. Na tho pator or vene: Aro ve toko e i rong espot mun riong pelie nge riong aken, God aken i rong espot mun kerengaing aken erere aken i ritet nge, a i nge.

¹⁹ Na aro ve toko e i eltetpot riong pelie a erere ake nge, ako i ritet nge ur areko i toth ako aro i velpol, God aro i eltetpot mun ile sungong a i nge ranga ve aka i pavurvur avele aka aro i an won monnga aka i sung mimiong aka erere ake i ritet nge. Na i pavurvur mun avele aka aro i mimi a rem pomnga riringa aka erere ake i ritet mun nge.

²⁰ Na toko aka i panongpol nge ur areke i ri ve, “I nunganga, i toth aka aro tho es me.”

I nunganga. Toko Pomnga a Jisas ong es me.

²¹ Na Toko Pomnga a Jisas ile themos-aling aro i voth tomo nge toko lemioonga alavusnga. I nunganga.

Na i re aken. I vus.

Read the New Testament daily

January

date	Scripture
1	Matiu 1:1-2:12
2	Matiu 2:13-3:6
3	Matiu 3:7-4:11
4	Matiu 4:12-25
5	Matiu 5:1-26
6	Matiu 5:27-48
7	Matiu 6:1-24
8	Matiu 6:25-7:14
9	Matiu 7:15-29
10	Matiu 8:1-17
11	Matiu 8:18-34
12	Matiu 9:1-17
13	Matiu 9:18-38
14	Matiu 10:1-23
15	Matiu 10:24-11:6
16	Matiu 11:7-30
17	Matiu 12:1-21
18	Matiu 12:22-45
19	Matiu 12:46-13:23
20	Matiu 13:24-46
21	Matiu 13:47-14:12
22	Matiu 14:13-36
23	Matiu 15:1-28
24	Matiu 15:29-16:12
25	Matiu 16:13-17:9
26	Matiu 17:10-27
27	Matiu 18:1-22
28	Matiu 18:23-19:12
29	Matiu 19:13-30
30	Matiu 20:1-28
31	Matiu 20:29-21:22

date	Scripture
1	Matiu 21:23-46
2	Matiu 22:1-33
3	Matiu 22:34-23:12
4	Matiu 23:13-39
5	Matiu 24:1-28
6	Matiu 24:29-51
7	Matiu 25:1-30
8	Matiu 25:31-26:13
9	Matiu 26:14-46
10	Matiu 26:47-68
11	Matiu 26:69-27:14
12	Matiu 27:15-31
13	Matiu 27:32-66
14	Matiu 28:1-20
15	Mak 1:1-28
16	Mak 1:29-2:12
17	Mak 2:13-3:6
18	Mak 3:7-30
19	Mak 3:31-4:25
20	Mak 4:26-5:20
21	Mak 5:21-43
22	Mak 6:1-29
23	Mak 6:30-56
24	Mak 7:1-23
25	Mak 7:24-8:10
26	Mak 8:11-9:1
27	Mak 9:2-29
28	Mak 9:30-10:12

February

March

date	Scripture
1	Mak 10:13-31
2	Mak 10:32-52
3	Mak 11:1-26
4	Mak 11:27-12:17
5	Mak 12:18-37
6	Mak 12:38-13:13
7	Mak 13:14-37
8	Mak 14:1-21
9	Mak 14:22-52
10	Mak 14:53-72
11	Mak 15:1-47
12	Mak 16:1-20
13	Luk 1:1-25
14	Luk 1:26-56
15	Luk 1:57-80
16	Luk 2:1-35
17	Luk 2:36-52
18	Luk 3:1-22
19	Luk 3:23-38
20	Luk 4:1-30
21	Luk 4:31-5:11
22	Luk 5:12-28
23	Luk 5:29-6:11
24	Luk 6:12-38
25	Luk 6:39-7:10
26	Luk 7:11-35
27	Luk 7:36-8:3
28	Luk 8:4-21
29	Luk 8:22-39
30	Luk 8:40-9:6
31	Luk 9:7-27

date	Scripture
1	Luk 9:28-50
2	Luk 9:51-10:12
3	Luk 10:13-37
4	Luk 10:38-11:13
5	Luk 11:14-36
6	Luk 11:37-12:7
7	Luk 12:8-34
8	Luk 12:35-59
9	Luk 13:1-21
10	Luk 13:22-14:6
11	Luk 14:7-35
12	Luk 15:1-32
13	Luk 16:1-18
14	Luk 16:19-17:10
15	Luk 17:11-37
16	Luk 18:1-17
17	Luk 18:18-43
18	Luk 19:1-27
19	Luk 19:28-48
20	Luk 20:1-26
21	Luk 20:27-47
22	Luk 21:1-28
23	Luk 21:29-22:13
24	Luk 22:14-34
25	Luk 22:35-53
26	Luk 22:54-23:12
27	Luk 23:13-43
28	Luk 23:44-24:12
29	Luk 24:13-53
30	Jon 1:1-28

*Abrial**May*

date	Scripture
1	Jon 1:29-51
2	Jon 2:1-25
3	Jon 3:1-21
4	Jon 3:22-4:3
5	Jon 4:4-42
6	Jon 4:43-54
7	Jon 5:1-23
8	Jon 5:24-47
9	Jon 6:1-21
10	Jon 6:22-40
11	Jon 6:41-71
12	Jon 7:1-29
13	Jon 7:30-52
14	Jon 7:53-8:20
15	Jon 8:21-30
16	Jon 8:31-59
17	Jon 9:1-41
18	Jon 10:1-21
19	Jon 10:22-42
20	Jon 11:1-53
21	Jon 11:54-12:19
22	Jon 12:20-50
23	Jon 13:1-30
24	Jon 13:31-14:14
25	Jon 14:15-31
26	Jon 15:1-27
27	Jon 16:1-33
28	Jon 17:1-26
29	Jon 18:1-24
30	Jon 18:25-19:22
31	Jon 19:23-42

date	Scripture
1	Jon 20:1-31
2	Jon 21:1-25
3	Pakeke 1:1-26
4	Pakeke 2:1-47
5	Pakeke 3:1-26
6	Pakeke 4:1-37
7	Pakeke 5:1-42
8	Pakeke 6:1-15
9	Pakeke 7:1-29
10	Pakeke 7:30-50
11	Pakeke 7:51-8:13
12	Pakeke 8:14-40
13	Pakeke 9:1-25
14	Pakeke 9:26-43
15	Pakeke 10:1-33
16	Pakeke 10:34-48
17	Pakeke 11:1-30
18	Pakeke 12:1-23
19	Pakeke 12:24-13:12
20	Pakeke 13:13-41
21	Pakeke 13:42-14:7
22	Pakeke 14:8-28
23	Pakeke 15:1-35
24	Pakeke 15:36-16:15
25	Pakeke 16:16-40
26	Pakeke 17:1-34
27	Pakeke 18:1-21
28	Pakeke 18:22-19:12
29	Pakeke 19:13-41
30	Pakeke 20:1-38

date	Scripture
1	Pakeke 21:1-16
2	Pakeke 21:17-36
3	Pakeke 21:37-22:16
4	Pakeke 22:17-23:10
5	Pakeke 23:11-35
6	Pakeke 24:1-27
7	Pakeke 25:1-27
8	Pakeke 26:1-32
9	Pakeke 27:1-20
10	Pakeke 27:21-44
11	Pakeke 28:1-31
12	Rom 1:1-17
13	Rom 1:18-32
14	Rom 2:1-24
15	Rom 2:25-3:8
16	Rom 3:9-31
17	Rom 4:1-12
18	Rom 4:13-5:5
19	Rom 5:6-21
20	Rom 6:1-23
21	Rom 7:1-14
22	Rom 7:15-8:6
23	Rom 8:7-21
24	Rom 8:22-39
25	Rom 9:1-21
26	Rom 9:22-10:13
27	Rom 10:14-11:12
28	Rom 11:13-36
29	Rom 12:1-21
30	Rom 13:1-14
31	Rom 14:1-23

date	Scripture
1	Rom 15:1-21
2	Rom 15:22-16:7
3	Rom 16:8-27
4	1 Korin 1:1-17
5	1 Korin 1:18-2:5
6	1 Korin 2:6-3:4
7	1 Korin 3:5-23
8	1 Korin 4:1-21
9	1 Korin 5:1-13
10	1 Korin 6:1-20
11	1 Korin 7:1-24
12	1 Korin 7:25-40
13	1 Korin 8:1-13
14	1 Korin 9:1-18
15	1 Korin 9:19-10:13
16	1 Korin 10:14-11:1
17	1 Korin 11:2-16
18	1 Korin 11:17-34
19	1 Korin 12:1-26
20	1 Korin 12:27-13:13
21	1 Korin 14:1-17
22	1 Korin 14:18-40
23	1 Korin 15:1-28
24	1 Korin 15:29-58
25	1 Korin 16:1-24
26	2 Korin 1:1-11
27	2 Korin 1:12-2:11
28	2 Korin 2:12-17
29	2 Korin 3:1-18
30	2 Korin 4:1-12
31	2 Korin 4:13-5:10

*August**September*

date	Scripture
1	2 Korin 5:11-21
2	2 Korin 6:1-13
3	2 Korin 6:14-7:7
4	2 Korin 7:8-16
5	2 Korin 8:1-15
6	2 Korin 8:16-24
7	2 Korin 9:1-15
8	2 Korin 10:1-18
9	2 Korin 11:1-15
10	2 Korin 11:16-33
11	2 Korin 12:1-10
12	2 Korin 12:11-21
13	2 Korin 13:1-14
14	Galesia 1:1-24
15	Galesia 2:1-16
16	Galesia 2:17-3:9
17	Galesia 3:10-22
18	Galesia 3:23-4:20
19	Galesia 4:21-5:12
20	Galesia 5:13-26
21	Galesia 6:1-18
22	Epesus 1:1-23
23	Epesus 2:1-22
24	Epesus 3:1-21
25	Epesus 4:1-16
26	Epesus 4:17-5:2
27	Epesus 5:3-33
28	Epesus 6:1-24
29	Pilipai 1:1-26
30	Pilipai 1:27-2:18

date	Scripture
1	Pilipai 2:19-3:6
2	Pilipai 3:7-4:1
3	Pilipai 4:2-23
4	Kolosi 1:1-20
5	Kolosi 1:21-2:7
6	Kolosi 2:8-23
7	Kolosi 3:1-17
8	Kolosi 3:18-4:18
9	1 Tesalonaika 1:1-2:9
10	1 Tesalonaika 2:10-3:13
11	1 Tesalonaika 4:1-5:3
12	1 Tesalonaika 5:4-28
13	2 Tesalonaika 1:1-12
14	2 Tesalonaika 2:1-17
15	2 Tesalonaika 3:1-18
16	1 Timoti 1:1-20
17	1 Timoti 2:1-15
18	1 Timoti 3:1-16
19	1 Timoti 4:1-16
20	1 Timoti 5:1-25
21	1 Timoti 6:1-21
22	2 Timoti 1:1-18
23	2 Timoti 2:1-21
24	2 Timoti 2:22-3:17
25	2 Timoti 4:1-22
26	Taitus 1:1-16
27	Taitus 2:1-14
28	Taitus 2:15-3:15
29	Pilemon 1:1-25
30	Hibru 1:1-14
31	Hibru 2:1-18

date	Scripture
1	Hibru 3:1-19
2	Hibru 4:1-13
3	Hibru 4:14-5:14
4	Hibru 6:1-20
5	Hibru 7:1-19
6	Hibru 7:20-28
7	Hibru 8:1-13
8	Hibru 9:1-10
9	Hibru 9:11-28
10	Hibru 10:1-18
11	Hibru 10:19-39
12	Hibru 11:1-16
13	Hibru 11:17-31
14	Hibru 11:32-12:13
15	Hibru 12:14-29
16	Hibru 13:1-25
17	Jems 1:1-18
18	Jems 1:19-2:17
19	Jems 2:18-3:18
20	Jems 4:1-17
21	Jems 5:1-20
22	1 Pita 1:1-12
23	1 Pita 1:13-2:10
24	1 Pita 2:11-3:7
25	1 Pita 3:8-4:6
26	1 Pita 4:7-5:14
27	2 Pita 1:1-21
28	2 Pita 2:1-22
29	2 Pita 3:1-18
30	1 Jon 1:1-10

date	Scripture
1	1 Jon 2:1-17
2	1 Jon 2:18-3:2
3	1 Jon 3:3-24
4	1 Jon 4:1-21
5	1 Jon 5:1-21
6	2 Jon 1:1-13
7	3 Jon 1:1-14
8	Jut 1:1-25
9	Riong Ngopatnga 1:1-20
10	Riong Ngopatnga 2:1-17
11	Riong Ngopatnga 2:18-3:6
12	Riong Ngopatnga 3:7-22
13	Riong Ngopatnga 4:1-11
14	Riong Ngopatnga 5:1-14
15	Riong Ngopatnga 6:1-17
16	Riong Ngopatnga 7:1-17
17	Riong Ngopatnga 8:1-13
18	Riong Ngopatnga 9:1-21
19	Riong Ngopatnga 10:1-11
20	Riong Ngopatnga 11:1-19
21	Riong Ngopatnga 12:1-18
22	Riong Ngopatnga 13:1-18
23	Riong Ngopatnga 14:1-20
24	Riong Ngopatnga 15:1-8
25	Riong Ngopatnga 16:1-21
26	Riong Ngopatnga 17:1-18
27	Riong Ngopatnga 18:1-24
28	Riong Ngopatnga 19:1-21
29	Riong Ngopatnga 20:1-15
30	Riong Ngopatnga 21:1-27
31	Riong Ngopatnga 22:1-21

Ritetong nge riong pelie ako i voth a God ile erere lemei

Abel Abel ini a Adam itun, na ini a Kein itein posnga. Na Kein i so rin a Abel, eneke God i ri ve Abel ile sungong i sivenga na Kein ile sungong i kerenga. (Stat 4:1-8) O thepol a “Kein.” (Matiu 23:35; Luk 11:51; Hibrus 11:4; 12:24)

Abraham Abraham ini toko ako i pavelpol Judare eve Israelre. Nomenga God i kin ile riong tomo nge a Abraham ve aro i sung ulue epee ponganga a i nge, mako i es a ulue epee aken. Lamako God i kin ile riong mun tomo nge a Abraham ve aro ititeviere aro o velpol ini a God itutunre, naro i theal or tova ole mio nge i. (Stat 15; Rom 4; Hibrus 6:13-15; Buk Song 105)

Na Abraham iewo ini a Sara, aveto ini sarit ma otun e avele. Lamako Sara i kimeitu ol na Abraham ini tolok, aveto God ilemi rum ile riong, mako i opoa a Sara mo i opo, ma i pop itun tomonnga aki iion a Aisak. (Stat 16; Hibrus 11:17-19)

Aisak i poma ma i ewo a Rebeka ma otutun or aini, Iso ome a Jekop aki iion mun a Israel.

Jekop i poma ma i ewo a Lea ome itein a Resel, na i peange mun ole seng um polpolongare or aini, mako Jekop i pavelpol itun tomonnga or mule pa omole pothoi or aini. Na or omole omole o pavelpol ole net omole omole aki oion i voth nge. Net areken ini Judare ole net or mule pa omole pothoi or aini.

Adam Nomenga nge ur alavusnga pateanga, God i pamenu ulue lamako i ela ulue pelie mo i pavelpol a Adam nge. Adam ini toko teltelinga aki i mimi ake ru a ulue. Na God i oma mun iewo a Iv, aveto or paini o avsa a God ile riong na o oma vothung kerenga. Na i patea nge or paini ole omaing aken, na toko neneanga alavusnga ake ru a ulue o oma mun vothung kerenga. Aveto God i pakeu Itun

me ve aro i eltetpot it nge vothung kerenga aken lemi. O thepol 1 Korin 15:45.

(Luk 3:38; Rom 5:12-21; 1 Korin 15:22, 45; 1 Timoti 2:13-14; Jut 1:14)

Aron Aron ini a Livai itevinga, na Livai ini a Jekop itun omole nge itutun or mule pa omole pothoi or aini. Na Aron ini toko aki God i ateal tel i mo i velpol ini pris, na ini inga a Aron ititeviere aki aro o velpol ini pris mo o ongtun Judare ole sungongre a God nge.

Na Aron ini a Moses itein pomnga, na or paini o um tomo e pel nge aki o pavthopot Israelre nge Isip angare omeni. Nomenga Israelre o voth ini Isip angare ole um polpolongare, aveto God i pavthopot or nge ole matheong aken, na Aron ome a Moses o wolpot or a Isip la. (Luk 1:5; Pakeke 7:40; Hibrus 5:4; 7:11; 9:4)

Babilon Babilon ini rem pomnga ao longa. Nomenga Babilon angare o pun tomo nge Israelre ma ole mong or na o ela Israelre a ole pen la, ma o oma or mo o velpol ini ole umpolpolongare aki a Babilon. Na Israelre o el matheong na sisong aki a Babilon i pavurvur nge tovu po or mule pa limai. Lamako God i wol werer or a ole pen la. (Matiu 1:11, 12, 17; Pakeke 7:43)

Na Jon i ri riong agelalnga pelie nge a Babilon. (Riong Ngopatnga 17-18) Na lemire mire aki i ri nunganga nge rem aki i vual rintet nge vothung kerenga. Na toko pelie ole mi ve i ri nunganga nge rem pomnga a Rom, aveto lemire mire senu nge avele.

Devit Devit ini Israelre ole nepes sivenga, na i sivenga nge ole nepes alavusnga. Ini a Jesi itun rumongalinga, na rongan i posnga na i theal itema ile sipsipre. Na nge nang omole i pun rin toko omole aki iion a Golait, ini toko aki i aolonga rintet na ini toko multhanga, aveto Devit i pun rin i nge um. (O thepol 1 Samuel 17.)

Na Devit ia sagu rintet a God, na i wat voing pulua aki o paesa God iion roro. Na Buk Song i vual nge a Devit

iana voing areken. Na God i kin ile riong tomo nge a Devit ve aro itevinga omole aro i velpol ini toko ako God i ateal i ve aro i el werer ile tokokoere, na toko aken ini a Jisas Krais. (O thepola Rom 1:3 na Riong Ngopatnga 6:6; 22:16.) (Matiu 1:1-17; Luk 3:31)

Ensel Enselre ini a God ile pakekere ako o voth a Pen a Urvet, nge pen ako God i voth mun nge. Or ini toko neneangare avele. Or ini onire na tokokoere o pavurvur aro o thopol or avele, aveto aro ve ensel i sis ve aro i pathengal isivenga a toko e nge, aken i pavurvur aro i thopol i.

God i pakeu pakea ile enselre mo aro o oma ile omaing, ranga ve aka aro o theal ile tokokoere. (Pakeke 12:6-11; 27:23; Hibru 1:14) Na nge nang pelie God i pakeu ile ensel a toko e nge, mo i sungu a God ile riong vet a i nge.

Na enselre ole mukalinga iion a Maikel. (Jut 1:9) Na ensel mun aka i aolonga kene iion a Gabriel. (Luk 1:19, 26)

Erere Erere ini riong aka i mirenga ve, ini buk eve ur aka wating i voth nge.

God ile menong e nepes Nge men kei o apet i ve ini "Kingdom bilong God." Na God ile menong e nepes i mirenga ve, God ile tokokoere o voth a isa thewo na o voth mun a ile thealing lemi, maken i paseral or, na i sung ur areko o oror nge a or nge, na i pathengal or nge sovengalo sivenga aka aro o panes i. Na tokokoe areko o voth a God ile menong e nepes lemi, kene olemi i voth a God nge na o nongal ikei. Na nge aka Jisas Krais i velpol ake ru a ulue, God ile menong e nepes i velpol mo i rel na i ponganga, eneke Jisas Krais i thep so ponganga aka aro tokokoere o velpol nunganga ini a God ile tokokoere. Na nge Oni Riringa ile engenging o pavurvur aro o mimi ranga ve aka God i sis ve aro o mimi, na o pavurvur mun aka aro o men senu ol tomo nge a God.

Nge pen kathnga aka tokokoere o ri ve, God ini oa nepes na o voth a isa thewo, nge pen aken God ile menong e

nepes i voth a or nge. Na penen nge nang le vusonga, Jisas Krais aro i lo werer tel me, lamo God ile menong e nepes alarolnga aro i velpol pat ol ake ru a ulue ponganga, na toko alavusnga aro o thepol i.

God ile Sipsip Tun Nge a Jon 1:29, 36

Jon aka ini toko paninuonga i apet a Jisas ve ini "God ile Sipsip Tun." Na Judare ole vothung vet aka aro o so rin sipsip mo ia mla i seltun ole vothung kerenga a God itheki. Na o apet a Jisas ve ini "God ile Sipsip Tun," eneke ile rinong na ia mla i patitepot tokokoere ole vothung kerenga areken ru i ngo tomoal a God itheki, maken o pavurvur aro voth riri ol a God itheki, tova olemio nge a Jisas ile omaing aken.

Herot Herot ini toko iion, na God Ile Riong Kinnga Ponganga i ri nge a Herot or penel. Or alapenel ini toko Rom.

Herot Pomnga Nepes a Herot, aka o apet mun ve ini Herot Pomnga, ini nepes aka i theal a Judia nge wop lemi aka Maria i menu a Jisas. Na i kene i tongporum ve aro i pun rin a Jisas nge wop lemi aka ini povothvoth. O thepol a Matiu 2:1-22 na Luk 1:5.

Herot Antipas Herot Antipas ini mukalinga aka i theal epee a Galili, nge wop lemi aka Jisas i panongpol na i oma pathepolong. I kene i peange nge seng aka iion a Herodias, na i sorotetpot a Jon aka ini toko paninuonga kene ikei. Na nge wop lemi aka Jisas i mit nge riong, o pasong i a Herot nge mo i nongpol ile riong. O thepol a Mak 6:14-29 na Luk 23:6-12.

Herot Agripa 1 Nepes a Herot Agripa 1 i sung matheong na i pakerenga tokokoe areko olemio nge a Jisas Krais. Na i pun rin a Jems aka ini a Jon itein na otema ini a Sebedi. O thepol a Pakeke 12:1-23.

Herot Agripa 2 Nepes a Herot Agripa 2 ini nepes aka Pol i mit nge riong a itheki, na i pakepot a Pol a rem pomnga a Rom, mo aro i mit nge riong a nepes a Sisar itheki. O thepol a Pakeke 25:13-26; 26:19; 26:27-32.

Hibrū Hibrure na Judare o thun inga. Na o apet or ve ini Hibrure, eneke o ri riong ako o apet i ve ini Hibrū. Hibrure ini a Abraham ititevie areko o rumongal nge i, na o apet or venen aken, eneke Abraham itevinga omole ako i mukal nge i kene iion a Eber.

Israel Israel ini a Jekop iion aininga ako God i sungu i a i nge. Na Jekop ini a Aisak itun ako iewo a Rebeka ia sagu rintet i. (O thepola Stat 27.)

Na ulue epee ako Judare o voth nge kene o apet mun i ve ini Israel. Na nomenga iion a Kenan. Na iion mun ini Palestain.

Jekop Jekop iion mun a Israel. Na itutun or mule pa omole pothoi or aini ako o pavelpol Israelre ole net or mule pa omole pothoi or aini. O thepol mun a “Abraham.”

Jisas Jisas i mirenga ve, “Pamimionga” eve “Ar God ini ar Pamimionga.” Na o apet mun a Jisas ve, Jisas Krais, God Itun, Toko Pomnga Itun na Devit itevinga.

Juda Juda ini a Jekop itun omole nge itutun or mule pa omole pothoi or aini. Na i pavelpol net Juda. Na ulue epee ako ititeviere o voth nge o apet i ve ini Judia. Na ini epee ako rem pomnga a Jerusalem i voth nge. Na Jisas Krais ile net ini Juda.

(Hibrū 7:14; 8:8; Riong Ngopatnga 5:5; 7:5)

Judare, Hibrure, Israelre Ioning or me ake i ri nge a Abraham na itevinga a Jekop otiteviere. Nomenga o apet or ve ini Hibrure, eneke Hibrū ini okei. Na o apet or ve ini Israelre, eneke Israel ini a Jekop iion aininga. (O thepol Stat 32:28.) Na o apet mun or ve ini Judare, eneke nomenga Asiria angare ole mong or na o pakepot ole net or mule mo o voth ini lomere, aveto o pakepot net Juda a ole pen avele. Mako net Juda i pavelpol ol toko pulua a pen aken. Aken ini tepun ako o apet tokokoere nge pen aken ini Judare.

Judare oa aning aolongaere Judare oa aning aolongaere pom aka o oma

i nge tovu po omole omole. Na nge oa aning areken, olemi rum nge a God ile vothung sivenga nge or. Na Judare oa aning pelie oion vene:

Punseleaing a Aning eve ‘Pasova’

Punseleaing a Aning ini aning pomnga aka Judare o oma i. Na iion vene, eneke nomenga nge aka o voth ini um polpolongare a Isip, God i ria or ve aro i pakeu ile ensel mo aro i so rin Isip angare oa tengenre, aveto i ria Judare ve, aro ve o so rin sipsip mo o patitirit ia mla a ole vel thekiare nge, aken ini paatealing mo tengen so rinngaa aro i punsele vel aken mo i so rin otutun tengenre avele. Na nge aka Isip angare oa tengenre o rin lale ma o pavthopot Judare mo lopot nge a Isip. Na nge Punseleaing a Aning, Judare olemi rum nge ole vthopotong aken.

Aning aka o an bret aka pawimpot-nга eve yis i voth nge avele Aning ake o oma i tomo mun nge Punseleaing a Aning, eneke nge aka Judare o lospot a Isip, o es viri viri na o pavurvur aro o men tetal nge bret ve aro i wimpot, kene avele, mako o an inga bret aka yis i voth nge avele.

Pentikos Pentikos i mirenga aka nang mule pa lim i lutetu nge Judare oa Punseleainga a Aning. Na nge aning ake Judare olemi sivenga, eneke wit monnga i vunvun. Na olemi rum mun nge nang aka nomenga God i sungu ile patorong a Moses nge mo aro o panes i.

Na ponange Pentikos ini nang aka toko lemioongare olemi rum nge Oni Riringa ile velpoling aka i velpol tel na i rero areko olemio nge a Jisas. (O thepol Pakekere Ole Omaing 2:1-4. (Pakeke 2:1-4))

Kein Kein ini a Adam ome a Iv oa tengen. Na ome itein posnga o oma ole sungong a God nge. Kein i sung ometa lemia a God nge, aveto itein posnga a Abel i sung sipsip itun a i nge. Na God i thepol or paini ole sungong aken, ma ilemi sivenga nge a Able ile sungong, aveto ini plong nge a Kein ile sungong. Mako Kein ilemi klingtun itein posnga ma i so rin i. I

venen aken na God i oma paatealing a Kein ini peti mo aro areko o thopol i aro o lel okime nge i. (Stat 4:1-16) (Hibru 11:4; 1 Jon 3:12; Jut 1:11)

Krais Krais na Mesaia, riong or aini aken mirenga omole inga. Krais ini Grikre okei na Mesaia ini Hibrure eve Judare okei. Aveto imirenga i thun inga. Na i mirenga ve, ‘toko ako o taul ipounga.’ Na nomenga aro ve God i ategal toko omole ve aro i oma ile omaing, eve aro i velpol ini Judare oa nepes, toko omole aro i taul toko aken ipounga mo ini paatealing ako God i ategal i lale. Na nomenga God i kin ile riong tomo nge Israelre ve aro i pake ole pamimionga mo aro i men ranga ve ini nepes mo i theal or. Na toko aken o apet i ve ini a ‘Krais’ eve ‘Mesaia.’ Na nge wop lemi ako Jisas i velpol ake ru a ulue, Judare o voth a Romre osa thewo, na Romre o sung matheongre a or nge, mako Judare o sis rintet ve aro toko ako God i ategal i ve aro i el werer or, kene aro i velpol mo i pavthopot or. Na nge aki Jisas i velpol, toko pelie oleli ve, ini a God ile toko aken, aki o apet i ve ini a ‘Mesaia’ eve a ‘Krais’, eneke i pavthopot or nge a Satan isa thewo. Aveto toko pelie oleli ve, Jisas ini Mesaia avele, eneke i pavthopot or nge a Romre osa thewo avele. (Matiu 16:16; Luk 22:67; Jon 4:25; 7:41; Pakeke 2:36; 4:26; 1 Korin 1:23; 1 Jon 2:22; 5:1)

Lotuonga a vel Israelre ole lotuonga a vel or me o voth.

Lotuonga a Sel Nomenga aki nge wop lemi aki Judare eve Israelre o esu esa a pen polpolnga, God i ria Moses ve aro i oma sel aki ini a God ile lotuonga a vel. Na i ritet senu i nge sel aken omanga. Na i ri ve aro i oma i nge lavlav sivesivengare na mekeremre oni peti. Na pen or aini i voth nge. Omole o apet i ve ini ‘Pen Riringa’ na pen aininga o apet i ve ini ‘Pen aki i Riri Rintet.’ Na o paeso a God ile riong kinnga a bokis nge ‘Pen aki i Riri Rintet’ na ini a God ile vothinga, maken toko omole inga i eso nge paomole inga nge tovu po omole

omole. (O thepol ritetong nge Prisre oa Pomnga.) Aro thomu o thepol pen or aini aken ole ur elonga nge pes 547 na 548.

Na a lalanga nge pen or aini aken o av lok na Judare o nong na o oma ole sungong nge pen aken. Na ini prisre aki o ongtun tokokoere ole sungong a God nge. Na Judare o lotual a God nge lotuonga a sel venen aken i pavurvur nge aki Solomon i ari a God ile Lotu Tepun a Vel. Na lotuonga a sel ia sei i voth nge pes 671.

Lotu Tepun a Vel Lotu Tepun a Vel omole inga i voth. Na i voth a Jerusalem, aki ini rem pomnga aolonga aki i mukal nge Judare ole rem elonga. Na Judare o es inga a Lotu Tepun a Vel ienga ve aro o sung ole sungong a God nge, naro o oma mun oa aning aolongaere nge pen aken. Na Lotu Tepun a Vel ake i el lotuonga a sel imei. Na ‘Pen Riringa’ na ‘Pen aki i Riri Rintet’ o voth. Na prisre o ongtun tokokoere ole sungong a Lotu Tepun a Vel lemi, aveto o voth a mukaling nge pen riringa or aini aken. O thepol wop kathnga aki pen areke o ngo nge, nge pes 673. Na o av lok a lalanga nge Lotu Tepun a Vel aken. O thepol ia sei nge pes 672. Na toko elonga o pavurvur aki aro o eso a Lotu Tepun a Vel a lok lemi, aveto Judare oenga o pavurvur aki aro o eso a Lotu Tepun a Vel lemi. Na prisre oenga o pavurvur aki aro o eso a ‘Pen Riringa’ lemi, na Prisre oa Pomnga ienga i pavurvur aki aro i eso a ‘Pen aki i Riri Rintet,’ eneke ini a God ile vothinga, na i eso nge pa omole inga nge tovu po omole omole. (Hibru 9)

Na lavlav aolonga i mon rupal ‘Pen aki i Riri Rintet.’ Na nge aki Jisas i rin, lavlav aken i minra roro ma i alpou, ma epee ainiu, (Matiu 27:51; Mak 15:38; Luk 23:45) aken i pathengal it aki ve, sovengalo a God nge i thep ol. Na it toko lemioongare te pavurvur aki aro te es vengveng a God nge la. Na it mun ranga ve ini a God ile lotuonga a vel, eneke Ioni Riringa i voth a lemire. (1 Korin 3:16-17)

Judare ole lotuonga a vel Nge Ju-

dare ole rem omole omole, ole lotuonga a vel i voth nge. Ini vel aka o pathun nge, nge nang rialonga. Na nge ole lotuonga a vel aken lemi, God ile erere i voth, aka toko watonga omole i wat i nge imeni. Na nomenga ole Baibel pom ranga ve ponange avele. Baibel omole inga i voth nge rembo omole omole, na i voth a ole lotuonga a vel lemi. Na aro ve o pathun nge lotu, toko omole aro i tital viringa a God ile riong aken mo toko pulua o nongpol i na olemi mire nge. Na lotu a mukalingare o patoral toko na senger nge a God ile riong na nge a Moses ile patorong panesnga.

Moses Nomenga nge wop lemi aka Israelre o voth ini toko umpolpolongare na o el sisisong aka a Isip, God i ateal a Moses ve aro i wolpot Israelre a Isip la mo o es a ulue epee aka nomenga i kin ile riong ve aro i sungu i a or nge. God i pathengal isivenga a Moses nge, nge aka i thepol won sesenga aka i anlilel a won pok a vutvutnga nge, aveto i ongtun avele. Na God i pake werer a Moses a Isip la mo i pavthopot ile tokokoere nge. Na God i oma pathepolong aolonga nge a Moses imeni. Na Israelre o apola Rua Selelenga ranga ve aka ini ulue sapun, aveto nge aka Isip angare o tongporum espotong nge la, rua i palimtunu selele or. Na Moses ini ole mukalinga i pavurvur nge tovu po or mule pa penel aka o esu esa a pen polpolnga nge.

Na God i sungu ile patorong a Moses nge, na i ritet a Moses nge ur aka i sis ve aro ile tokokoere o oma i. Na Moses i watu a God ile riong aken a erere nge, na ponange i voth nge Stat, Kisim Bek, Wok Pris, Namba na Lo.

Nang rialonga Nge men kei o apet i ve ini "De Sabat." Na Manseng pelie o apet mun i ve ini "Nang reresonga." Ini nang aka te um nge avele, eneke God i pamenu ur alavusnga, lamo nge nang limainga i thau i, na i um avele.

Nepes Nge men kei o apet i ve ini 'king.' Na ini toko pomnaga aka i voth roro nge toko alavusnga ranga

ve ini Praim Minista nge Papua New Guinea. Romre ole nepes pomnaga o apet i ve ini a Sisar, na gavana na nepes pelie o voth a isa thewo, na o theal tokokoere ake ru a ulue.

Noa Noa ini toko aka i mimi nomenga. Na nge wop lemi aken toko alavusnga ake ru a ulue o oma inga vothung kerenga, mako God i ri ve aro i oma wong aolonga mo i pun rin toko alavusnga ake ru ulue. Aveto Noa ini toko sivenga, na i nongal a God ikei, mako God i ria Noa ve aro i oma imot aolonga, lamako i paeso mekerem rel relngare na menre na ur reingare a imot aken lemi. Lamako God i pavelpol vit aolonga, na thei i espot mun a ulue lemi me, mako thei awong i velpol ma i aolonga rintet ma i seltun pen elonga ake ru a ulue, mako ur miminga alavusnga aka o voth a imot aken lemi avele kene o rin. Ini inga a Noa ome iewo na otutun or me ome oewoere aka o mimi ol ake ru a ulue, tomo mun nge mekerem areko o voth mun a imot lemi. O thepola Stat 6-9. (Matiu 12:41; Luk 3:36; 17:26-27; Hibru 11:7; 1 Pita 3:20; 2 Pita 2:5)

Oni Riringa Oni Riringa ini a God Ioni. Na Oni Riringa na God na Jisas Krais o thun inga. (O thepola Matiu 28:19.) Na God Ioni Riringa i rero tokokoe areko olemio nge a Jisas Krais na i voth reletun a or nge. Na o apet mun i ve ini 'Opoalinga.' Na Oni Riringa ile omaing vene:

1. I panine tokokoere olemi mo olemi mire nge riong kathnga i nunganga nge a Jisas. (Jon 16:13; 1 Korin 2:10-13)
2. I opoal toko lemioongare nge ole nongong a God nge. (O thepola Rom 8:26.)
3. I opoal tokokoere mo olemi mire nge ur aka God i sis ve aro o oma i. (Pakeke 13:2; 16:6-7)
4. I sung engenging a toko lemioongare nge mo o pavurvur nge a God ile riong ripotnga na nge ile omaing omanga. (1 Korin 2:4-5)
5. I sung ile sungong a toko omole omole nge mo o pavurvur nge ur pelie

omanga ako aro i paengeng lotuongare mo o mit omole ol inga. (1 Korin 12; 14)

Pakeke; Aposel Jisas i ateal toko or mule pa omole pothoi or aini nge areko o panes i, mo o velpol ini ile pakekere na o apet mun or ve ini ‘aposelre.’ (Matiu 10:1-4; Mak 3:13-19; Luk 6:12-16) Tokokoe areke o voth tomo nge a Jisas na i patoral or. Na Jisas i rin ma i los werera ma or alavusnga o thopol i nge otheki ako i los werera. (Pakeke 1:21-22) Ma Jisas i pake or mo o ritet tokokoere nge ur areko o thopol i, mako o panongpol tokokoere nge Panongpolong Sivenga nge a Jisas. Na o velpol mun ini toko lemioongare ole mukalingare na o theal ole lotu. Na ini ole patoraling ako i velpol ini patoraling aka loture o panes i. (Epesus 2:20)

Na nge erere aka te apet i ve ini “Pakekere Ole Omaing,” Pol ome a Barbabas na toko mun pelie or ini pakekere, eneke Jisas i ateal or ve aro o oma ile omaing. Na Oni Riringa ile sungong i voth mun a tokokoere nge aka aro o oma omaing ranga ve aka pakekere o oma i. (1 Korin 12:28-29; Epesus 3:11)

Pris Prisre ini tokokoe areko o ateal or ve aro o ongtun Israelre ole sungong a God nge, ranga ve ini mekeremre na ometa lemia. Na nge wop lemi aka Jisas i voth ake ru a ulue, Prisre o ongtun sungongre a God nge, a Lotu Tepun a Vel lemi, aka a Jeruslem. Pris alavusnga ini a Aron ititeviere aka o rumongal nge i. Na Aron ile net ini Livai, na i velpol tel ini pris.

Prisre oa Pomnga Prisre oa Pomnga i mukal nge pris alavusnga. O ateal pris omole mo i velpol ini Prisre oa Pomnga i pavurvur nge tovu po omole inga, lamo o ateal pris relnga mun e aka aro i el imei, i pavurvur nge tovupo omole mun. Prisre oa Pomnga ieng inga i pavurur aka aro i koro nge ‘Pen aka i Riri Rintet’ aka a Lotu Tepun a Vel lemi. Na i koro nge pen aken paomole inga nge tovu po omole omole. Na i koro nge ‘Pen

ako i Riri Rintet’ mo aro i sung sungong a God nge i pavurvur nge isivenga ile vothung kerenga seltunnga na tokokoere ole vothung kerenga seltunnga mun. Na nge erere a Hibru them wat Jisas ini Pris Pomnga na them wat ‘Prisre oa Pomnga’ avele, eneke ienga inga i voth venen aken, na pris pelie o voth a isa thewo na o el imei kene avele.

Pris kimangare Pris pelie o apet or ve ini Pris kimangare, or ini pris areko o velpol tel ini Prisre oa Pomnga na pris mun areko oion kima.

Parisi Parisire ini Judare avlung aka o engeng rintet nge a Moses ile patorong panesnga, eneke o sis rintet ve aro o velpol ini toko vengvenga a God itheki, nge ole vothung aken. Na Pol ini Parisi mun. Na tokokoere o papompom Parisire, eneke olemi ve or ini toko vengvengare. Aveto Jisas i apet or ini pokonongare, eneke o panes riong engenga aka o patoral tokokoere nge, kene avele. Na Parisire tomo mun nge Israelre ole mukalingare, o lel okime nge a Jisas, eneke olemi ve Jisas aro i pavus a Moses ile patorongre. Na o ngeip rintet mun ve, Romre aro o paomelal or tova tokokoere o panes a Jisas ranga ve ini ole nepes. Aken ini tepun aka Parisire o sis ve aro pun rin a Jisas. O thepol mun ‘Sadiusi.’

Riong kinnga Nge men kei o apet riong kinnga ve ini ‘kontrak’ eve ‘tok promis.’ Aro ve toko e i kin ile riong tomo nge toko relnga e, aro or paini o panes inga ole riong aken, eneke ini riong polpolnga avele, na o panunganga ole riong lale. Na aro ve omole i panes ile riong avele, ole riong kinnga aken i vus. Aveto God, aro ve i kin ile riong tomo nge tokokoere, i pavurvur aro i nong sirik avele, aro i panes inga ile riong aken, naro i oma ranga ve aka i ri nge lale, eneke tokokoere o pavurvur aka aro o pakerenga a God ile riong avele. Na God i kin ile riong tomo nge toko na seng ake ru a ulue pa or aini.

Riong Kinnga Nomenganga Riong

kinnga nomenganga ini riong ako God i kin tomo i nge a Moses. Na te apet mun ve ini Moses ile patorong. Na God i kin ile riong vene: Toko kathnga areko o panes senu ile patorong, aro o velpol ini a God itutunre. Aveto e avele i pavurvur nge ipanesnga, mako toko e avele i velpol ini toko vengvenga a God itheki nge a Moses ile patorong panesnga. (Luk 1:72; Pakeke 3:25; 7:8; Galesia 3:17; Hibrus 9:1)

Riong Kinnga Ponganga Moses ile patorong i voth lale, lamako Jeremaia i ritet nge a God ile riong kinnga ponganga aka aro i velpol. (O thepol a Jeremaia 31:31-34 na Hibrus 8:6-13.) Na Jisas Krais i pavropol a God ile riong kinnga ponganga aken aka i el a Moses ile patorong imei. Na nge ile riong kinnga ponganga God i ri ve, tokokoere aro o velpol ini toko vengvengare a itheki nge ole lemioong inga, na nge a Moses ile patorong panesnga avele. (O thepol a Rom 3:21-24 na Rom 8:3-4.)

Rom Rom ini rem pomnga aolonga aka i voth a pen epee a Itali. Na nge wop lemi aka Jisas i esu esa ake ru a ulue, Romre ole mong pen epee pulua ake ru a ulue. Na ole mong mun pen epee a Israel, na Israelre o voth a osa thewo. Mako Israelre oni silal Romre, na o sis rintet ve aro o wis or mo o pavurvur aka aro o theal osivenga. Romre o apet oa nepes ve ini Sisar na ini nepes aka i mukal nge nepes alavusnga ake ru a ulue, nge wop lemi aken.

Sadiusi Sadiusire ini toko avlung aka o panes selele a Moses ile patorongre, na or ini Judare ole mukalingare mun. Judare oa pompomere pulua or ini Sadiusire. Ole lemirusung i toth nge a Parisire ole lemirusung, aveto Sadiusire o panes inga buk or lim inga aka o voth a mukaling nge a Olpela Testamen, na o nak rintet osivenga nge ipanesnga. Na olemi ve, aro ve toko i rin lale, aro i los werera panen avele, na o pun pel nge riong tomo nge Parisire nge ole lemiong aken. (O thepol mun a Parisi.)

Satan Satan ini tamata kerengare ole mukalinga. Na ini a God ile ngarang. Na ile riong alavusnga ini riong le apaltetonga. Nomenga ini a God ile ensel omole, aveto i papomnga isivenga roro, na ini plong ve aro i voth a God isa thewo, mako God i asesu i ulue me. (Luk 10:18; Riong Ngopatnga 12:7-9) Na ponange i tongporum engeng ve aro i palek-lek tokokoere, na i pavurpol olemi nge vothung kerenga omanga. Na i palemirumal toko lemioongare nge vothung kerenga areko o oma i mo aro ole lemioong i matu mo o panes senu a Jisas avele. Aveto Jisas ile mong a Satan lale, na Oni Riringa ile engenging i aolonga nge a Satan ile engenging. Na panen nge nang le vusonga Jisas aro i pakerenga selele a Satan. (O thepola Riong Ngopatnga 20.)

Sei Riong ake Mangseng pelie olemi mire senu nge avele. Na nge men kei o ri ve, ‘Piksa’ na aken i toth nge ‘ia sei’ imirenga. Na aro ve toko e i te won mo i thepol ranga ve ini men, aro te ri ve, won aken ini men ia sei. Na Mangseng pelie o ri ve won aken ini men ion, aveto ‘ion’ imirenga relnga i voth mun, na i sivenga avele aka aro te wat riong omole aka imirenga or aini a God ile erere lemi, aro vene mo i palemi pelekpol toko pelie olemi.

Sungong a lekleka Nge men kei o apet i ve ini ‘alta.’ Na nomenga Judare o oma ole sungong a God nge. O ela mekerem na o so rin i na o ongtun i a God nge, aken ini ole vothung vet aken. Na o oma ole sungong venen aken a sungong a lekleka we. O thepol sungong a lekleka aka o oma i nge um, kene ia sei nge pes 555.

Toko aka God i ateal i ve aro i el werer ile tokokoere O thepol a “Krais.”

Toko Pomnga Itun Nge men kei riong ake ini “Pikinini bilong Man.” Nomenga, God ile riong elnga a Daniel i ri riong ake, nge aka i ri nge toko aka God i ateal i ve aro i el werer ile

tokokoere. (Daniel 7:13-14) Na Jisas i apet isivenga ini a Toko Pomnga Itun, eneke ini toko neneanga, na ini mun i toko ako God i pakeu i me ve aro i el werer ile tokokoere, na ini a God Itun mun.

Vain monnga Nge men kei o apet i ve ini ‘Diwai Wain.’ Na o thepol vain monnga ia sei nge pes 257. Na o thepol vain a ometa nge pes 116. Na vain monnga i mosisen na i sivenga nge

annga. Na Judare ole vothung vet ako aro o tepiplas vian monnga mo ie i lelpot mo o oma vain nge. (Jon 15; Matiu 21:33-43)

Uk Uk ini ur ako i ngo a misep na i kothkoth, na i una kerenga. I una ranga ve ini otel ako i plot. Na i pavurvur ako aro i anlilel. Na o apet mun i ve ini ‘salpa.’ (Riong Ngopatnga 9:17)